

New Testament

Noone Language

Noone - Bible - New Testament

Mat	3	
Mak	78	
Luk	125	
Jon	204	
Lem	262	
Lum	333	
1 Kol	366	
2 Kol	398	
Gal	418	
Efε	430	
Fili	441	
Kolo	449	
1 Tεs	457	
2 Tεs	464	
1 Tim	468	
2 Tim	477	
Tay	484	
Flm	488	
Ibu	490	
Jεm	515	
1 Bi	523	
2 Bi	532	
1 Jon	538	
2 Jon	546	
3 Jon	547	
Jut	549	
Mwm	552	

Noone - Bible - New Testament

Mat

Mat 1

Kfuu di bo Jisos Klistu le

(Luk 3:23-38)

- 1 Eyan nu ediee ε bo'icee kfuu di bo Jisos Klistu le. Jisos Klistu to nu waa Nfon Dawe wvù to nu waa Aba'am.
- 2 Aba'am to nu icee Aysik, ε Aysik nu icee Yakow, ε Yakow nu icee Judas bô boom bo ice le,
- 3 ε Judas nu icee Beles bô Sela bô bwee bó to nu Tama. ε Beles nu icee Eslon, ε Eslon nu icee Lam.
- 4ε Lam nu icee Aminada, ε Aminada nu icee Na'shon, ε Na'shon nu icee Salmon.
- 5 ε Salmon nu icee Boas wvù bwee to nu La'ab. ε Boas nu icee Obed wvù bwee to nu Lut. ε Obed nu icee Jεese.
- 6 ε Jεese nu icee Nfon Dawe. ε Nfon Dawe nu icee Saamun wvù bwee to nu kpweε Uliaa.
- 7 ε Saamun nu icee Le'ubwam, ε Le'ubwam nu icee Abija, ε Abija nu icee Asa.
- 8 ε Asa nu icee Je'ushfat, ε Je'ushfat nu icee Jolam, ε Jolam nu icee Usaya.
- 9 ε Usaya nu icee Jotam, ε Jotam nu icee A'as, ε A'as nu icee Esikaya,
- 10 ε Esikaya nu icee Manase, ε Manase nu icee Amos, ε Amo nu icee Josaya.
- 11 ε Josaya nu icee Jεkonaya bô boom bo bwee bó le. Bó to boke bó ε è to nu kefew kè bonyii bo Babilon to kooyεε bonyii bo Isael gen dvú woj wvubo wvù Babilon e.
- 12εjim jodvu, no bó to kooyεε bonyii bo Isael gen dvú Babilon, ε Jεkonaya no nu icee Shiltia, ε Shiltia nu icee Selubabel,
- 13ε Selubabel nu icee Abiud, ε Abiud nu icee Eliakim, ε Eliakim nu icee Aso,
- 14ε Aso nu icee Sadok, ε Sadok nu icee Akim, ε Akim nu icee Eliyu,
- 15ε Eliyu nu icee Eliesa, ε Eliesa nu icee Matan, ε Matan nu icee Yakow.
- 16 ε Yakow nu icee Yosew wvù dwee Maalia, ε Maalia nu wvù to bokεε Jisos wvù bó teje le Klistu.

¹⁷Nonen bo'icee kfuu di bo Jisos e ban ε mum ε no nu yuufe ncow bonew keekew yî Abl'am e eto ebuy yî Nfon Dawe le, bvuu nu yuufe ncow bonew keekew yî Nfon Dawe le eto ebuy seke bó to kooyε bonyii bo Islael gen dvú Babilon. Ε keekew seke bó to kooyε bonyii bo Islael eto ebuy seke bó to bokεε Klistu nu ten ε bo'icee kfuu dibole nu yuufe ncow bonew.

Εκουμε no boo di Jisos e to lenεε

(Luk 2:1-7)

¹⁸Boo di Jisos Klistu le to len ε je yin e. Bwee wvù Maalia to nu ε bó ε seyse wase le wvú nu ke enu kpweε Yosew. Έ bó se keeke etaashε bvujen, nu ε fí to nε buy le wvú nu wase bô fue ε mvuᅅgay mvu Keyoy ke Yuule le.

¹⁹No fí kooyε nonen, ε Yosew wvù dweese, no ε to nu wee wvu teytoy yaa koonke keeshoose wvú ke, mum yen le wen nu egawsen bô wvú ε ε nu ejim ejim.

²⁰No wvú to bεε kpwaake keege nonen, ε fí kooy le nceendaa Tata to nu ε nε to fô wvú le ε εfile le seke wvú to leete gay ε wvú le, “Yosew, waa Nfon Dawe, fo wo efan keejo Maalia bwee yew wo le ke, njefo fue din di wvú nu bô dí nu ε wvú keᅅke ε mvuᅅgay mvu Keyoy ke Yuule le.

²¹Wvú nu ke eboo wan diemsen ε wo ecu diee diew le Jisos, njefo wvú nu ke eboyse bonyii bew can bibefe bibole.”

²²Mwεem mvun mvunciim to kooyi keege ε fí eto ekocen no Tata to jemyεε wase diuw wee we ntum e le,

²³“Ben eyeke eyuw, wan wvu tfu mvu nu ke eleem bô fue, eboo wan diemsen ε bó eteᅅe wvú le Emanwel.” Diee din nu le, “Nyo' nu beene ε bó.”

²⁴No εfile kie lamεε Yosew nonen, ε wvú ke kamse mum ge ke no nceendaa Tata gayεε ε wvú. Wvú to nu ε jo Maalia bwee yew we le,

²⁵geenen ε bô wvú faᅅe yaa ecee diewe no wee bô kpweε ké no cee ke. Ε bô wvú ke ce nonen gen buy no Maalia to ghanεε eboo. Ε Yosew mum cu diee di wan e le Jisos.

Mat 2

Ε bogoyfee gen keebun Jisos

¹Bó to boke Jisos ntew wvù Betele'em wvu ε keba ke woᅅe e kè Judea le. Ε ε to nu kefew kedvu le ε 'Elod nu Nfon wvu Judea jodvu. Ε fí kooy le bogoyfee bomew to nu ε nε woᅅe wvumew e ε keba kè diuu sane le, to Jelusalem no biwci le,

²“Nfon Bojuu wvù bó boke we nu fεε? Bese biwci nen njefo bese nu ε yen jon ye le ε keba kè diuu sane le, ε mum ε no too keebun wvú.”

³Ε Nfon 'Elod dīoo yuw saaka wvun ε wvú shiw fitele fiew, shiw noo fi bonyii bo Jelusalem e bocii.

⁴Ɛ wvú tooy bocee ncese bo baay baay bocii bô bonyii bocii bô duñci bonci bo Nyo' le ê bonyii, Ɛ bó tase. Ɛ wvú bife ê bó le laa fò bó to nu keeke eboo Mboyse wvù Nyo' to kawee, nu fee le?

⁵Ɛ bó tfuse le, “Bó to nu keeke eboo ntew wvù Betele'em wvu ê keba kè Judea le. Fifin nu no wee ntum Nyo' to sañee le,

⁶ ‘Wo wvù Betele'em wvu woñ wvù Juda le, fo wo ekpwaakè le wo nu fintew fi caan baay woñ wvù Juda le ke. È keè le wee nu ke ebuy ntew wvun e wvù nu ke esaake bonyii bem bo Israel.”

⁷Ɛ Nfon 'Elod mum tooy ten bogoyfee ba ejim ejim biwce yuw ê bó ntay kefew kè jon yidvu to buyee.

⁸No wvú yuw mum tum bó Betele'em gay le, “Ben egen ebosen egom wan wvudvu ntay. Ben dioo Ɛ gom Ɛ yen, kase to see ê me, wvu le è nulo é me ten engen embun wvú.”

⁹Ɛ bonyii bodvu yuw no Nfon gay nonen, mum buy no gene ñgen wvubo. Ɛ bó dioo gene, Ɛ fí kooy le jon yì bó to yenee ê keba kè diuu sane le ye to nu Ɛ no lene gene ê bó fwe duñci bó je. Ɛ yí ke gen nen buy fò wan wvudvu to nu, mum leem fò.

¹⁰No bó yenee jon yidvu le nonen, Ɛ njoñ yuwye bó baay, Ɛ ye no jee bó.

¹¹Ɛ bó ke gen ley yew yì wan to nu dvú le, yen wan bô bwee wvù Maalia le, mum gbwe ê wan ejise bun wvú. No bó bun mum yene bikele bibole bvuse mwem mvubole mvu kembunfon e, nya ê wvú. Ɛ mwem mvun to nu ketwaa ke bigew e kè yelee, bô kfuu jiin dimew, noo kfuu nfiey mvu.

¹²Ɛ Nyo' ke ciise lo ê bó ê efile le le bó eyene fo bó ebvuu etu jim le bó eyen Nfon 'Elod e ke. Ɛ bó ke mum tu wase jim woñ wvubole ê je mi le jee.

Ɛ Yosew jo wan Ɛ bô bó sam gen Ijiw

¹³No bogoyfee ba nen'ye wase gen, Ɛ fí kooy le nceendaa Tata to nu Ɛ ne to fô Yosew e ê efile le gay ê wvú le, “Ja we ejo wan bô bwee é ben Ɛ bó efee egen woñ wvù Ijiw e, enù jó egen ebuy kefew kè me nu ñke engay le ben ekase le. Me ñgayte nen njefo Nfon 'Elod nu egomte wan wvudvu keeyu.”

¹⁴Ɛ Yosew mum ja we, jo wan bô bwee entañ ne gen Ijiw,

¹⁵mum no nu jó gen buy kefew kè Nfon 'Elod to lae le. Fí to kooy nonen keege é fí eto ekocen no Nyo' to jemyee diuw wee ntum we le le, “Me nteje waa wem wvú Ɛ buy Ɛ è nu woñ wvù Ijiw e.”

Ɛ Nfon 'Elod yuwye boom Betele'em

¹⁶Ɛ 'Elod ke dioo yen le bogoyfee ba nu Ɛ lee wen, Ɛ fí ffuw wvú baay. Ɛ wvú mum tum bonyii le bó egen Betele'em noo biba bi mbew jó le bicii, eyuwye boom bolemse bô nu Ɛ kew bilum bifee Ɛ tu jim. Wvú to nya bilum bin bii no wvú to biwcee ê bogoyfee ba yuw ntay kefew kè bó to yenee jon ye le.

¹⁷Ɛ bó gen yuwyε boom ba nonen, ε fí mum kocen no wee ntum Nyo' wvù Yelimia to jemyεε wase le,

¹⁸ “Bó nu ε yuw etale ntew wvù Lama le, ε wee fuunke kpwe, beele ffule. Ɛ è nu Lashel ε wvù beele boom bew. Ɛ bó cimse wvù cimse ηkuun, njefo ke boom bew bee ke.”

Ɛ bo Yosεw ne ljiw kase tu jim

¹⁹Ɛ Nfon 'Elod ke dioo la, ε fí kooy le nceendaa Tata to nu ε buynen fô Yosεw e ê efile le won wvù ljiw e, gay ê wvù le,

²⁰ “Ja we ejo wan bô bwee é ben ε bó ekase etu jim won wvù Isael e, njefo bó ba bô se gomte keeyu wan wvun nu ε kpweken wase.”

²¹Nonen ε Yosεw mum ja we jo wan bô bwee ε bô bó no tuu jim won wvù Isael e.

²²Geenen, ε wvù ke dioo to, yuw le waa Nfon 'Elod wvù Akilius nu ε die kentaw ke ice le Judea ε no saake, ε wvù mum fan keegen jó. Ɛ bó bvuu lew ε wvù ê efile le le fo wvù egen jó ke. Ɛ wvù mum bee gen wase ε è nu ê keba ke won e kè Galilee le,

²³ gen no cee ntew wvù bó teje le Nasalet e. Fí to kooy nonen keekocen no wee ntum Nyo' to jemyεε wase le, “Bó nu ke eteje wvù le Wee wvu Nasalet.”

Mat 3

N'yeeyi Jon Nleseejoo

(Mak 1:1-8; Luk 3:1-18; Jon 1:19-28)

¹È to nu kefew kekie le, ε Jon Nleseejoo ne buy gen ηkpwaante ê keba ke won e kè Judea le no fewci ê bonyii le,

² “Ben ekumen mvuntelem mvunen, njefo bvunfon bvu fowe nu wase nceencee.”

³ Jon wvun nu wvù wee ntum Nyo' wvù Yesaya to jemyεε ekume wvù seke wvù to gayεε le, “Diεw wee fuunke ηkpwaante le, ‘Bó eseyse je Tata, enele é yí enù teyey.’”

⁴ Jon to jiise ndvú ε bó kene bô yvúw nyam mi yì bó teje le kamel, seenke kecaw cin ε bó kene bô jew nyam, ε mwεem mwew mvudien nu cúma bô ndon.

⁵No wvù to fewci nonen, ε bonyii mum no buyte Jelusalem bô bontew bocii bo Judea jodvu le noo biba bi mbew Joo Joodan e bicii, gene fô wvù le.

⁶No bó gene nonen no seje bibefe bibole, ε wvù mum leese bó ê joo ê Joo Joodan e.

⁷ Geenen, ε wvù ke dioo yen ε Bofalasii bô Bosadusii bomew nteen too le wvù else bó ê joo, ε wvù gay ê bó le, “Eηgoke ke yó le, è tefe yeε ben le ben elewtè shém Nyo' yì ffuuke yì wvù nu ke eduñce ê ben, ε se no too nen?”

⁸Ben egeè mwεem mvù duñci le ben nu ε kumen wase mvuntelem mvunen.

⁹ Fo ben emum eduù ke lo ê bikuu binen le Ablam nu icee wene ke. É me ensee ê ben le è nulo é Nyo' ebanke eta eyan é yó etu boom bo Ablam e.

¹⁰ Ben ekeè le bó nu ε γεε wase teme ê binyi bi bite le. Kete kecii kè baa yumte mvuntam mvù jee, nu ε bó nu egbwo naa eley yí γεη e, eton lo.

¹¹ Me nleese ben ê joo njefo ben nu ε kumen wase mvuntelem mvunen. Geenε ε wee wvù too ê me ejim nu ε wvù kuuke fele me. Ε bolaba bew nu ε me mbaa ncim ηkpwentεn keentuu ke. Wvù nu ke elese fiew ben ε è nu can Keyoy ke Yuule le noo ηguy e.

¹² Wvù keηke fieε fiew εbo fi wvù nu efεεten εγιη dvù, eyese fò wvù fεεtene, ebaance εγιη egεε ê ηwaw e, emum ekuu nyiim eton ê ηguy wvù fieε se njime le.”

Ε Jon lese Jisos ê joo

(Mak 1:9-11; Luk 3:21-22)

¹³ No Jon to leese bonyii ê joo nonεn, ε Jisos ke mum ne ê keba ke won e kè Galilee le gen fò Joo Joodan e le Jon elese ten wen ê joo.

¹⁴ Geenε ε Jon no tune gayte le, “È nu wo wvù be keηke keelese me ê joo, wo ε kaa ε no too fò me le neε le?”

¹⁵ Ε Jisos tfuse ê wvù le, “Cine é fí enù nonεn keseen. È nu ê yin je le yì bee wo nu ege fieε ficii fi Nyo' gomte.” Nonεn ε Jon mum bee,

¹⁶ lese Jisos ê joo. Ke no Jisos to buyte ê joo nonεn, ε fí kooy le εbulε to nu ε yene, ε wvù yen Keyoy ke Nyo' le no kí shiile too nu diewe εbembe le, to mum bæm yí ye le.

¹⁷ Ε fí kooy le diew to nu ε jeme fowe le, “Wvun nu Waa wεm. Wvù nu fitele fiem. Me n'yuuke njon bò wvù baay.”

Mat 4

Ε dεwle no momte Jisos

(Mak 1:12, 13; Luk 4:1-13)

¹ Ε Keyoy ke Yuule mum ne jo Jisos gen bò wvù ηkpwaante le dεwle emom wvù.

² Ε wvù gen no nu jó shee too cee, yaa diee fieε yí εdiuw e mbaanye. Ejim jodvu ε jeη no yuu wvù.

³ Ε wvù wwuwe wvù ké no momte bonyii mum to gay ê wvù le, “É wo fen nu Waa Nyo', é wo gay ε eta eyan tu bontuw bo bvulem e.”

⁴ Ε Jisos tfuse le, “Fí nu ε bó ε saη le, ‘Ke wee cee ke nje bvulem maη ke. Wee cee ten nje diew yicii yì buyte diuw Nyo' le.”

⁵ Nonεn ε dεwle mum jo wvù gen dvù ê kelaante kè yuule le, leke fò kegoy ke yew ncese le,

⁶ gay ê wvú le, “É wo fɛn nu Waa Nyo', é wo sele ekuse, njefo fí nu ε bó ε saŋ le, 'Nyo' nu ke egay é bonceendaa bew ecɛyɛy wo.' É fí bvuu nu ε bó ε saŋ le, 'Bó nu ke eka wo fo wo ekfun ekale yí tɛ le.”

⁷ É Jisos tfuse ê wvú le “Bó nu ε saŋ tɛn le, 'Fo wo emomtè Tata wvù Nyo' wo kɛ.”

⁸ É dɛwle bvuu jo Jisos fó, gen wase dvú yí ekolɛ ke kum mvu le ε wvú defe ewe ntay, mum duŋɛ bitum bi yí ekolɛ ke nshe le bicii bô bvukukɛ bvù nu bí le ê wvú.

⁹ No wvú duŋci nonɛn mum gay le, “Me nu enya mwɛɛm mvun mvunciim ê wo, é wo fɛn ε gbwe ê me ejise ε wvum me.”

¹⁰ É Jisos gay ê wvú le, “Gɛnɛ eke Satan! Bó nu ε saŋ le, ‘È wvumtè Tata wvù Nyo' wo, lemte kɛ ε è nu wvú le maan.”

¹¹ Nonɛn ε dɛwle mum cinɛ Jisos e, gen. É fí kooy le bonceendaa bo Nyo' le to nu ε nɛ to no taale fô wvú le.

É Jisos kɛw lemme diɛw Galilee

(Mak 1:14, 15; Luk 4:14, 15)

¹² É Jisos ke nɛ yuw le bó nu ε koo Jon Nleseɛjoo ε fɛn yew ncaw e, ε wvú mum nɛ kase tu jim keba kè Galilee le.

¹³ É wvú gen buy Nasalet, nɛ jó gen no cee ê kelaante kè Kafana'um e. Kelaante kin nu mbew Mamase yí Galilee le noo mbew biba bi bonyii bo Sɛbulun bô bo Naftali le.

¹⁴ Fifin to kooy nɛn keekocɛn no wee ntum Nyo' wvù Yesaya to jemyɛɛ wase le,

¹⁵ “Keba kè Sɛbulun bô kè Naftali bì nu mbew mamase le Joo Joodan kewvu keki, nshe yí Galilee jo bonyii bô yaa nu ke Bojuu,

¹⁶ bonyii bô se shee cee ejiwɛ le, nu ε yɛn wase n'yuw wvu baay e. Diuu nu ε san wase fô bonyii ban bô se shee cee gbwen ejiwɛ ke kpwe le.”

¹⁷ É kɛw kefew kekɛ le, ε Jisos mum kɛw no fewci ê bonyii gayte le, “Ben ekumɛn mvuntelem mvunɛn, njefo bvunfon bvu fowe nu wase nceencee.”

É Jisos tee bonyii bonɛw le bó enù boom bew bo ŋgoo le

(Mak 1:16-20; Luk 5:1-11)

¹⁸ É Jisos ke nɛ no lɛne mbew Mamase yí Galilee le, yɛn bonyii bomew e bofɛɛ, ε è nu wee bô waa bwee. Bonyii ban to nu Semon wvù bó to tɛɛ le Bita, bô waa bwee wvù Andulu, ε bó laaŋke kensaŋ ê mamase le, no ŋkieŋ wvubo to nu byé yí koolɛn.

¹⁹ É Jisos gay ê bó le, “Ben ebì me le é me enge é ben ekoole wase ε è nu bonyii.”

²⁰ Kaŋ mwaan ε bó mum cinɛ binsaŋ bibole no bii wvú le.

²¹ É Jisos ke dioo nɛ fó gɛncɛ, bvuu yɛn bonyii bomew e bofɛɛ ε è nu tɛn wee bô waa bwee. Bonyii ban to nu Jem bô waa bwee wvù Jon bô to nu boom bo Sɛbedɛɛ le, ε bó nu ê kekoŋ e bô bo icee bó wvù Sɛbedɛɛ tumci binsaŋ. É wvú tee tɛn bó.

²²Kaṅ mwaan̄ ε bó mum cinε kekoṅ e bô icee bó le no bii wvú le.

ε Jisos no yεεyi bonyii bvuu fele bo bincem e

(Luk 6:17-19)

²³ ε Jisos ke nε mum no ghane ê keba kè Galilee le kecii yεεyi bonyii yéw bunle yibole bvuu fewci saaka wvù jee wvu εkumε bvunfon bvú Nyo' le. Wvú to fele ten kencem kecii noo ntum tfuu yî bonyii le.

²⁴Nonen, ε saaka wvu εkumε wvú saan̄ken gen woṅ wvù Silia le tfuu. ε bonyii mum no too bô bonyii bocii bô to cemkene noo bô to nu yî monlum e fô wvú le, kenεε è nu bô bonceendaa bo dewle le njiṅsene bô bó, kenεε bô gbwee ken̄gbwe, kenεε bô nu ε kpwe keba kemwaan̄. ε bó too dvú nonen ε wvú fele bó bocii.

²⁵Naa fεε fô wvú to gene nu ε bibombom bi bonyii le bi baay no shfumte ke ê wvú ejim. Bonyii ban to nen'yi ê keba ke woṅ e kè Galilee le, ε bomew nen'yi ê Bilaante bi Yuufe le, bomew Jelusalem noo bontεw bo Judea le bomew e. ε bomew nen'yi Joo Joodan kewvu keki.

Mat 5

Njoṅ wvù è nu wvu baay

(Luk 6:20-23)

¹ ε Jisos ke dīoo yen kebombom ke bonyii le nonen, mum nε ben gen shii yî kum e, ε boom bew bo ṅgoo le baance to mbew ye le.

²ε wvú mum kew no yεεyi bó gayte le,

³ “Njoṅ wvu baay nu fô bonyii bô kee le bó fuute yî mwεem mvu ê keyoy e, njefo bvunfon bvú fowe nu bvubole.

⁴ Njoṅ wvu baay nu fô bonyii bô beele le, njefo Nyo' nu ke ecimse bó.

⁵ Njoṅ wvu baay nu fô bonyii bô joo bikuu bibole fokuse, njefo bó nu ke eyow ekole ke nshε le.

⁶Njoṅ wvu baay nu fô bonyii bô jeṅ yuu bó ε kendoṅ yumte bó εkumε nce wvu teytey e, njefo Nyo' nu ke ege é bó effuu.

⁷ Njoṅ wvu baay nu fô bonyii bô camte shen fô bomew e, njefo Nyo' nu ke ecam ten shen fô bó le.

⁸ Njoṅ wvu baay nu fô bonyii bô yuule ê mvuntelem e, njefo bó nu ke eyen Nyo' le.

⁹ Njoṅ wvu baay nu fô bonyii bô too bô nyεkeey e, njefo Nyo' nu ke eteṅe bó le boom bew.

¹⁰ Njoṅ wvu baay nu fô bonyii bô bonyii bone bikaa ê bó ejim nje bó cee nce wvu teytey, njefo bvunfon bvú fowe nu bvubole.

¹¹ Njoṅ wvu baay nu wene, seke bonyii nan'yi ben, bone bikaa ê ben ejim, jemyi kfuū mwεem mvù befe mvunciim ê ben yî ecici le nje ben nu bonyii bem.

12 Fí ke dío kooyi nonen ε ben no yuukè njoη lanlanè, njefo mmawce wene wvù kuuke nu woη wvu we le. Ben ekeè le è nu ke nonen no bonyii to bone bikaa ejim jo bonyii bo ntum Nyo' le bò to yawεε to fwe ê ben e.

Ben nu ηkauw bô n'yuw wvu yî woη wvun e

(Mak 9:50; Luk 14:34, 35)

13 È nu ben ηkauw yi yî nshe yin e. Geenεn é ηkauw ne lo ε cife, é bó ebvuu ege nεε dvú é yí se ebvuu ekase eyeke? Ke è nulo é bó ebvuu ege fiεε fi jee dvú efey le bó elan lo é bonyii efele leenci bô bikaa ke.

14È nu ten ben n'yuw wvu yî woη wvun e. Ke kelaante kè bó bom yî kum e ké no nyiime ke.

15 Ke wee ké tfuuke ten ken'yeese bvuu jo ηkaa kfuuke dvú ke. Wvú ké tome ε è nu yî fiεε fi bó tomyi ken'yeese yî dvú le, ε kí mum no yeese wee tfuu wvù nu yew.

16 È nu ke lenlen no n'yuw wene kenke keebaa ê bonyii ejise, wvu le bó eyene lemme dinen di jee le emum enyaa mbense ê icee wene wvù nu fowe.

N'yεεyi ekumε bonci bo Muses e

17 Fo ben ekpwaakè le me nto keenfiwse mwεεm mvù nu ê Nwa' bonci bo Muses e noo mvù nu ê Bonwa' bo bonyii bo ntum Nyo' le ke. Me nto keenje é mvú ekocen lo. Ke me nto keenfiwse lo ke.

18 É me ensee ê ben kecεεy le ε gen ε buy naa no εbule bô nshe nu ke eka, nu ε ke fijise fi ηwa' le ê Nwa' bonci le naa é fí cim doose nεε, nu ke eyuu efey kuse se fiεε fidvu ε kocen no fí duηci ke.

19Fí ε mum ε no nu le é è nu naa yεε wvù jine nci mvu ê bonci ban e, é wvuwe nci cim doose naa nεε, ε no yεεyi bonyii le bó ejinè ten nonen, tu mweten nu ke enu lo wee wvu caan ente jo bvunfon bvu fowe. Geenεn é wee gεεle bonci ban, bvuu yεεyi ten bonyii le bó egεelè, tu mweten nu ke enu lo wee wvu baay ente jo bvunfon bvu fowe.

20Nonen me ε no nseηe ê ben le, é gee dinen di teyey baa fele di bonyii bò duηci bonci bo Nyo' le noo di Bofalasii le, ben saa ke eyuu eley bvunfon bvu fowe le ke.

N'yεεyi ekumε shém yi ton'yεεn

21 Ben nu ε yuw wase le bó to nu ε gay ê bonyii bo fwele le, 'Fo wo eyu wee ke. É wee yu lo wee, tu wvú kenke nsaw.'

22 Geenεn me ε no ngayte ê ben le wee tfuu wvù ton'yi shém bô waa bwee, nu ε wvú kenke ten nsaw. Wee é nan waa bwee, é wvú no keè le wvú nu ke eleem fwe dvu bonyii bò saake bonsaw. Wee é tee waa bwee le, 'keyuη' é wvú no keè le wvú nu ke eley ηguy wvu baay e.

23Fí ε mum ε no nu le, é wo leeme keenya nnya yo fô ketan ke ncese le, ε kume le waa bwoo kenke wo fô shem,

24 É wo cine nnya yo le mbew ketan ke ncese le, gen ε ben ε wvú yaw mance mwεem, ε wo se kase to nya nnya yo.

25 É wee jo wo ε no gene dvú yew nsaw e, é wo mom ε ben ε wvú yanşen seyse tu wee bô nsan ε è bæε ê je, fo wvú ke egen efese wo can wee wvú saake bonsaw e, é wvú efese wo can nci le é bó efen wo yew ncaw e.

26 É me ensee ê wo keceey le ke wo nu ke ebuy dvú se wo ε mese ε law finyinyi ficii fi bó shieele ke.

N'yεεyi ekumε kenjan

27 Ben nu ε yuw wase le bó to nu ε gay le, 'Fo wo ejan kpweε wee ke.'

28 Geenεn me ε no ngayte ê ben le, wee tfuu wvú taale kpwoon kenke shiee we, nu ε wvú ε jan ke wase wvú ê fitele le.

29 É jise diuw di εceey gee ε wo gee kebefε, é wo min jise didvu lan. Fí jee le wo elase keba kuw ke ye le kemwaan, efey fo bó ke elan ye yo yicii nguy wvu baay e.

30 Kebo kuw ke εceey é no gee ten ε wo gee kebefε, é wo sum kebo kedvu lan. Fí jee le wo elase keba kuw ke ye le kemwaan, efey fo ye yo yicii egen nguy wvu baay e.

N'yεεyi ekumε keekun kpwoon

(Mak 10:11, 12; Luk 16:18)

31 Bó to nu ε gay ten le 'É wee kun lo kpweε, é wvú san nwa' nya ê kpwoon wvudvu wvú dunji le ke wvú bæε kpweε wen ke.'

32 Geenεn me no ngayte ê ben le, é wee kun lo kpweε, ε è baa nu le kpwoon wvudvu nu ε ge nsake, tu wvú nu ε ge le wvú egen etu kpwoon nsake. Wee é jo kpwoon wvú buy ê diemsen yew ε gee yew dvu wvú, tu wvú nu ε jo kpweε wee.

N'yεεyi ekumε keejeme fiε ekan

33 Ben nu ε yuw wase ten no bó to gayεε ê bonyii bo fwele le, 'Fo wo ejeme fiε ekan se wo nu ke ege fí ke. Wo kenke keege fiε fi wo nu ε jeme ε kan le wo nu ege fô Tata le.'

34 Geenεn me ε no ngayte ê ben le, fo wee dioo ε jeme fiε kan naa lo ke. Fo wvú ekan ê diee di fowe le ke, njefo fowe nu kawla Nyo'.

35 Fo wvú ekan nshe ke, njefo nshe nu kedvuushεε ke bikaa bi Nyo' le. Fo wvú ekan Jelusalem ke, njefo Jelusalem nu kelaante ke Nfon wvu baay e.

36 Fo wvú cim ekan naa ekole kew ke, njefo ke wvú nulo ege é yvuw miaan etu dibvuu kenεε eyiile ke.

37 É wee beje fiε le "Éε," é fí kocεn nonεn. Wvú é tun le, "Aay," é fí kocεn nonεn. É wvú bvuu bise lo fiε fó, tu fifie ne wase fô Satan wvú wee kebefε le.

N'yεεyi ekumε keetfuse εnvuke

(Luk 6:29, 30)

38 Ben nu ε yuw wase ten le bó to nu ε gay le, ‘É wee bvuse jise di wee le, é bó bvuse ten diew. Wee é baa ege ke wee le, é bó baa ten kew.’

39 Geenɛn me ε no ηgayte ê ben le, fo wee etɛɛcinè fiɛɛ bô wee wvù befe ke. É wee suη lo kediew kuw ke εcɛɛy, é wo banke ke ηηkoηko ε wvù mɛse.

40 Wee é shomse wo le wen efi kekum kuw ke ente, é wo mɛse nya naa noo ke ekfuη fô.

41 Wee é kan wo le wo elɛn egeη may mwaan, é wo len buy naa bomay bofɛɛ ben ε wvù.

42 Wee é no lɛke fiɛɛ ê wo, é wo nya. Wee é no foole fiɛɛ ê wo, fo wo etun keenya ke.

N'γɛɛyi εkumɛ no wee egeè bô wee we bvuban

(Luk 6:27, 28, 32-36)

43 Ben nu ε yuw wase le bó to nu ε gay le, ‘È kooηkè waa bwoo banè wee wo bvuban.’

44 Geenɛn me ε no ηgayte ê ben le, ben ekoηkè bonyii bonɛn bo bvuban e, ebunleè fô bô bone bikaa ê ben εjim e.

45 Nonɛn, é ben emum enu boom bo Icee wene wvù nu fowe le. È nu wvù wvù ké no gee ε diuu sane fô bonyii bô befe le noo bô jee le. Wvù ké no gee ten ε jaη too fô bonyii bô gee mwɛɛm teytey, noo fô bô yaa gee ke mwɛɛm teytey e.

46 Ben kpwaake le é ben kooηke ke ε è nu bonyii bô kooηke ben, é sɛw wvudvu enu la fô ben e? Ke naa bonyii bô fii shile gee ke ten nonɛn e?

47 É ben fɛn gayte ke ε è nu boom bo bwee wene le, tu fiɛɛ fi ben gee fi bonyii bomew yaa gee ke nu la? Ke bonyii bô yaa kee ke Nyo' ké no gee ke lɛηlɛη e?

48 Fí ε mum ε no nu le ben kɛηke keejeè gene mɛɛse no Icee wene wvù nu fowe jee gene mɛɛse.”

Mat 6

N'γɛɛyi εkumɛ nnya

1 “Ben eyɛnè fo ben dioo gee mwɛɛm mvù jee, no gee fwe dvu bonyii wvu le bó eyɛnè ke. É ben gee nonɛn, é icee wene wvù nu fowe saa ke emawcɛ ben ke.

2 Nonɛn, seke wo nyaa fiɛɛ ê wee wvù fuute, fo wo emum etooηke soη diɛwɛ no bonyii bo kensaa ye le ké no gee yéw bunle le noo jé le, wvu le bonyii ebɛnsɛè bó ke. É me ensee ê ben kecɛɛy le bó nu ε kɛηke wase mmawcɛ wvubo.

3 Geenɛn, seke wo nyaa fiɛɛ ê wee wvù fuute, fo wo ege é kebo kuw ke ηηkoηko ekieɛ fiɛɛ fi ke εcɛɛy gee ke.

⁴Nonen é nnya yo enù ê nnyile le, é Ico wvù ké no yene mwεem mvù bó gee ê nnyile le ke emawce wo.

N'yeeyi ekume bunle

(Luk 11:2-4)

⁵Seke ben bunlee, fo ben egeè diewe no bonyii bo kensaa ye le ké no gee ke. Bó ké no koonke keeleemene yéw bunle le, noo ntasen jé le se bunlee, wvu le bonyii eyenè bó le. É me ensee ê ben keceey le bó nu e keŋke wase mmawce wvubo.

⁶Geenen seke wo nu keebunle, ε wo ley gen yew ente, faa kembuŋ se no bunlee ê Ico wvù nu ê nnyile le. É Ico wvù ké no yene mwεem mvù bó gee ê kenyile le ke emawce wo.

⁷Ben dioo bunlee, fo ben eshe elamtè diewe no bonyii bò maa Nyo' ké no gee ke. Bó ké no gee nonen kpwaake le bó nu eyuw bunle yibo nje díew yì bó jemyi nteen.

⁸Fo ben enù ke diewe bó le ke. Ben ekeè le Icee wene ké no kee wase fiε fi ben shieele ε ben se ké no biite.

⁹È neε no è nulo é ben ebunleè nen: 'Icee wese wvù nu fowe, gee é bonyii ewvumtè diee diuw,

¹⁰ege é bvunfon bwuw eto, ege é fiε fi wo shieele enù fokuse fen no fí nu fowe.

¹¹Nya bese bô mwεem mvudien mvu εben.

¹²Lεεshe bibefe bisese, no bese lεεshi bibefe bì bonyii bomew gee fô bese le.

¹³Fo wo ecine é bese eley mmom yì eghaw bese le ke. Fi bese can wee kebefε le.' [Bvunfon nu bwuw, ε mvuŋgay nu mwuw, ε bvukuke nu bwuw sekecii se ŋka. Fí enù nonen.]

¹⁴Ben ekeè le é ben lεεshi bibefe bì bonyii bomew gee fô ben e, é Icee wene wvù nu fowe elεεshi ten binen.

¹⁵Geenen, é ben nu se ben lεεshi bibefe bì bonyii bomew gee fô ben e, é Icee wene wvù nu fowe saa elεεshi ten binen ke.

N'yeeyi ekume mbam mwεem mvudien

¹⁶Seke ben bamte mwεem mvudien, fo ben etaalè nen yvulaa diewe no bonyii bo kenduŋce ye le ké no gee ke. Bó ké kumen monshim mobole sekekie, wvu le bonyii eyenè le bowen bamte mwεem mvudien. É me ensee ê ben keceey le bó nu e keŋke wase mmawce wvubo.

¹⁷Geenen, seke wo bamte mwεem mvudien, ε wo yefe ekole kuw, cuke bvushiw bwuw,

¹⁸wvu le fo eyenè bonyii le wo bamte mwεem mvudien ke, é eyene Ico wvù nu ê nnyile le. É Ico wvù ké no yene mwεem mvù bonyii gee ê kenyile le ke emawce wo.

N'yεεyi ekume ntfu

(Luk 12:33, 34)

- 19 Fo ben egεε ntfu wene fokuse fen fò è nulo é shéw ekan, ε è nulo ten é wvú eduwse, ε bocooη nulo ηgoy eley ecoη ke.
- 20 Ben egεε ntfu wene ε è nu woη wvu we le, fò è yaa nulo é shéw ekan ke, ε è yaa nulo ten é wvú eduwse ke, ε bocooη yaa nulo ten ηgoy eley ecoη ke.
- 21 Ben ekeè le fò wee gεke kpaw we nu ke fò fò fitele fiew nu enu.

Ken'yεese ke ye wee le

(Luk 11:34-36)

- 22 Jise di wee le nu ken'yεese ke ye ye le. Nonen, é jise diuw yuule lo, é ye yo yicii enu ε yí ε yiηsen bô n'yu.
- 23 Geenen, é jise diuw jiime lo, é ye yo yicii enu ε yí ε yiηsen bô kejiwe. É n'yu wee ne ε tu kejiwe, é kejiwe kedvu ebemte wase neε?

Nyo' taale fô bonyii bew e

(Luk 16:13; 12:22-31)

- 24 Ke wee nulo elemte bocee ekole le bofεε ke. É wvú lemte nonen, é wvú ebane wvumvu, kooηke wvumvu, kenεε eyuuke wvumvu le ntay, joo wvumvu ekuse. Ke ben nulo elemte Nyo' le bvuu lemte bigew e ke.
- 25 Nonen, me ε no ηgayte ê ben le fo ben eyaηyaηè ekume nshii wene le laa ben nu ke edie la, kenεε ewu la, kenεε ekume ye yene laa ben nu ke ejise la le. Ke keyoy ke wee le fele mwεem mvudien, ε ye wee fele ten ndvú le?
- 26 Ben etaa eyen no mvunyiim mvù bile we nu. Ke mvú ké no jewyi, kenεε gbweci ηgu baanci gεele ê bigone le ke. Geenen, Icee wene wvù nu fowe nyaηyi ke mvú. Ke ben fele mvunyiim e?
- 27 È nu yeε ê ben enteleη wvù yaηyaηe, wvù nulo ebise ke naa kefew caan yí nshii we le?
- 28 Ben yaηyaηe ekume ndvú nje la? Ben ke etaa eyen no fow kuu ηkpwaante nu. Ke fow ké no lemte kenεε shile ndvú ke.
- 29 Geenen, é me ensee ê ben le ke naa Nfon Saamun bô bvukuke bvucii bvù wvú to keηke to ké suute ye no nu ε wvú ε buy fô fow mvu le ke.
- 30 É Nyo' suute egay yo ηkpwaante nen, egay yò kuu eben, buy ntfuu ε bó ε fwεε wase fotaη, tu ke è nulo é wvú esufe ben efey lo nonen e? O oo bonyii bo mbee wvù doose le!
- 31 Nonen, fo ben eyaηyaηè duu le laa ben nu ke edie la, ewu la, kenεε ejise la ye le le.

³² Mwεem mvun mvunciim nu mvù bonyii bò yaa kee ke Nyo' ké no leese bvufee yí dvú le. Ben nu finen ε Icee wene wvù nu fowe kee le ben shieele mwεem mvun mvunciim.

³³ Ben eyaw elese bvufee bvunen ε è nu yí bvunfon bvú Nyo' le noo yí fiε fi læŋ fi wvú gomte le, é wvú emum enyaa ten mwεem mvun mvunciim ê ben.

³⁴ Fí ε mum ε no nu læ, fo ben eyaŋyaŋè ekumε ntfuu ke. Bó nu ebuy eyaŋyaŋe yí fiε fi ntfuu le, ε è nu ntfuu. Ngew wvu yí diuu le ekocen ke yí diuu didvu diε le.”

Mat 7

Fo wee elomtè gee di wee mvu le ke

(Luk 6:37-38, 41-42)

¹ “Fo ben elomtè gee di bonyii bomew e ke, nonen é Nyo' saa ke elom ten dinen ke.

² Ben ekeè læ je yí ben lomte gee di wee mvu le jó, nu ke yí Nyo' nu ke elom ten dinen jó. Fiε fi wee feeke fiε jó sε nyaa ê wee, nu ke fí fi Nyo' nu ke efew jó sε nya ê mweten.

³ È nu nje la wvù wo ké no taale ε è nu sheshe yí nu ê waa bwoo jise, geenen yaa yene kekew kè nu ê diuw jise le ke?

⁴ È nulo é wo eghan nεε sε no gayte ê waa bwoo læ, ‘Ke leem é me embvuse sheshe ê wo jise,’ geenen ε kekew nu ê diuw jise le?

⁵ Wo nu wee kenduŋcε ye! Yawε ebvuse kekew kè nu ê diuw jise le sε loocε eyen sheshe yí nu ê jise di waa bwoo le, emum ebvuse.

⁶ Fo ben ejo fiε fi Nyo' le enya ê bwé ke. É ben ge nonen, é yí ebanke ye elumye lo ben. Fo ben ejo ten ejise ε baŋ eyene enya ê bonkunyam ke. É ben ge nonen, é bó efoy ke lo bô bikaa.

Ben ebiitè, gomtè, kumci

(Luk 11:9-13)

⁷ Ben ebiitè, é Nyo' ke enya ê ben. Ben egomtè, é Nyo' ke ege é ben eyen. Ben ekumci kembuŋ, é Nyo' ke eyene ê ben.

⁸ Ben ekeè læ wee tfuu wvù biite, nu ke ekeŋke, ε wee tfuu wvù gomte, nu ke eyen, ε wvù kumci kembuŋ nu ε bó nu ke eyene ê wvú.

⁹ È nu yεε ê ben enteleŋ wvù waa we bife bvulem, é wvú enya ε è nu tε ê wvú?

¹⁰ Kenεε wvú bife bye, é wvú enya ε è nu yo ê wvú?

¹¹ É ben fen bò è nu bonyii bò befe kee keenya mwεem mvù jee ê boom bonen, tu ke Icee wene wvù nu fowe nulo enya mwεem mvù jee ê bonyii bò biite ê wvú efey naa lo nonen e?

12 Fí ε mum ε no nu le, naa la fi ben shieele le bonyii egeè fô ben e, enù fí fi ben egeè ten fô bó le, njefo fifin nu naa fiεε ficii fi Nwa' bonci bo Muses e noo Bonwa' bo bonyii bo ntum Nyo' le yeeyi.

Diuw ketaañ wvu fiasaa noo wvu gbwuuu

(Luk 13:24)

13 Ben eley ê ketaañ e ε è nu fô diuw wvu fiasaa le, njefo diuw wvù nu gbwuuu nu wvu cekey keeley fó, ε wvuwe nu wvù gene fô bó nu ke elése lo bonyii, ε bonyii leyte fô wvuwe le nteen.

14 Ben ekeè le diuw ketaañ wvu fiasaa, bô je yì temyi nu yì gene fô nshii wvù mey lo le. Ε bonyii bò yene yí le nu caan.

No è nulo é wee ekieε bonyii bo ntum Nyo' le bo mbiay e

(Luk 6:43, 44)

15 Ben eyenè ekume bonyii bò mbiayte le bó nu bonyii bo ntum Nyo' le. Bó too fô ben e yen'yi ye le le è nu njée, geenεn ε ente nu bokuula bò nulo eyese lo njée.

16 Ben nu ke ekieε bó ε è nu yî gee dibole ke leηleη no bó ké kieε kete yî mvuntam mvù yumte yî dvú le. È nulo é bó ekoy yoη yî bisafe le, kenεε ekoy fimbi yî ewante le?

17 Fí nu le kete kè jee kecii ké no yumte mvuntam mvù jee, ε kete kè befe yumte mvuntam mvù befe.

18 Ke kete kè jee nulo eyum mvuntam mvù befe ke. Ε ke è nulo ten é kete kè befe eyum mvuntam mvù jee ke.

19 Kete kecii kè yaa yumte mvuntam mvù jee nu ε bó ké gbwo ton lo.

20 Nonεn, ben nu ke ekieε bonyii bo mbiay e bodvu ε è nu yî gee dibole.

(Luk 13:25-27)

21 Ke è nu wee tfuu wvù teηe me le, 'Tata, Tata', wvù nu ke eley bvunfon bvú fowe le ke. È nu ke eley ke wee wvù gee fiεε fi Icεm wvù nu fowe shieele.

22 È nu ke enu εbvubwe bvú nsaw wvu fokemεse le, é bonyii nteen ebiite ê me le, 'Tata, Tata, bese se teete ke bontum bo Nyo' le yî mvunγay mvu diee diuw e, bvúuse bonceendaa bo dεwle le yî bonyii le yî mvunγay mvu diee diuw e, bvúu gee biηghaw bi mwεεm e yî mvunγay mvu diee diuw e?'

23 Ε me emum εηγay lo ê bó le, 'Ke me ηke nu ε ηkieε wa lo ben ke. Ben enε lo ê me εjise bonyii bò buwyi mwεεm.'

Wee kembom wvù keηke bvufee bô wvù nu keyuη

(Luk 6:47-49)

24 Nonεn, wee tfuu wvù yuuke njeme wεm wvun, gee no wvú gayte nu diewe wee bvufee wvù to bomεε yew ye yî kεmbaan e.

²⁵Ɛ jaŋ ke gbwe, Ɛ jóo yiŋsen buy, Ɛ fwefwe fey ci yew yidvu, geenen Ɛ yí faŋe yaa ekese ke, njefo wvú to nu Ɛ lese kenffuy kedvu yí kemaan e.

²⁶Geenen, Ɛ wee wvù yuuke njeme wem wvun yaa gee no wvú gayte, nu ke diewe keyuŋ ke wee le wvù to bomε ye yew Ɛ è nu yí monshεem e.

²⁷Ɛ jaŋ ke gbwe, Ɛ jóo yiŋsen buy, Ɛ fwefwe fey ci yew yidvu, Ɛ yí kesε, shii fokuse yicii nen wuuu.”

Mvuŋgay mvu n'yεεyi le mvù Jisos keŋke

²⁸ Ɛ Jisos ke jeme mwεem mvun mvunciim mεse, Ɛ kebombom ke bonyii le kedvu no keŋke lo ŋghaw yí n'yεεyi we le,

²⁹njefo wvú to yεεyi diewe wee wvù keŋke mvuŋgay mvu n'yεεyi le. Ke wvú to yεεyi diewe no bonyii bobole bò duŋci bonci bo Nyo' le to ké no yεεyi ke.

Mat 8

Ɛ Jisos fe wee ntun wvu baay

(Mak 1:40-45; Luk 5:12-16)

¹Ɛ Jisos ke ne yí kum e bow, Ɛ kebombom ke bonyii le ke baay shfum bi wvú le.

²Ɛ fí kooy le wee mvu wvù to cεmte bô ntun wvu baay, to nu Ɛ ne to tum envuw fwe dvu Jisos gay ê wvú le, “Tata, wo nulo efe me é me en'yuule, é wo fen kooŋke lo.”

³Ɛ Jisos mum neke kebo kum wvú le gay le, “Me ŋkooŋke lo, bonen le eyuule.” Kaŋ mwaan, Ɛ ntun wvu baay wvudvu mum ka yí ye le, Ɛ wvú no yuule.

⁴ Ɛ Jisos ciise lo ê wvú le, “È yenè, fo wo esee ê wee ke. Geenεn, gene duŋce ekole kuw ê cee ncese, emum enya nnya yí Muses to gayεε le wee keŋke keenya keeduŋce ê bonyii le wen nu Ɛ bonen wase yí ntun wvun e Ɛ no yuule.”

Ɛ Jisos fe waa lemme ekole ke bonyii bo nci le

(Luk 7:1-10)

⁵Ɛ Jisos ke ne gen ley kelaante kè Kafana'um e, Ɛ ekole ke bonyii bo nci le kemew to yen wvú le no kule can ê wvú gayte le,

⁶“Tata, waa wem lemme jiime yew ŋgeyte lo, Ɛ wvú Ɛ kpwe wase keba kemwaan.”

⁷Ɛ Jisos gay ê wvú le, “Me nu ento enfε wvú.”

⁸Geenen, Ɛ ekole ke bonyii bo nci le kedvu tfuse ê Jisos le, “Tata, ke me wvun nu Ɛ me Ɛ ŋkocεn wee wvù wo eto ê wvú yew ke. Jeme ke Ɛ è nu diew é waa wem lemme emum ebonen.

⁹È keè le me nu ê mvuŋgay mvu wee mvu le ekuse, Ɛ bonyii bo nci le nu ten ê me ekuse. É me ŋké engay ê mvu le, ‘È genè,’ é wvú no gene lo, ŋké engay ê mvu le, ‘To,’ é wvú no too lo. É me ŋké engay ten ê nfwa wem le, ‘Geε nen,’ é wvú no gee lo.”

10 Ɛ Jisos dīoo yuw fiεε fi wvú jeme, ε diuw yum lo wvú. Ɛ wvú jeme ê bonyii bô to bii wvú le le, “É me ensee ê ben kecεεy le, me ηke mbaa n'yen wase wee le ke naa Islael ε wvú ε lese kfuu fin fitele yî yem e nen ke.

11 É me ensee ê ben le bonyii nteen nu ke enε biba bicii ε kew jò diuu sane ε gen ε buy jò dí seeyi, eto eshii ediekene bô bo Ablam'noo Aysik noo Yakow woη Nyo' wvu we le,

12 geenεn, ε boom bô woη wvudvu nu wvubo nu ε bó ε laη ê εjiwε le εkfuη fô bonyii nu ke ebeeε ηgeci bigew.”

13 No Jisos jeme nonεn mum gay ê εkolε ke bonyii bo nci le kie le, “È genè le, fi ege ye fô wo le no wo nu ε lese fitele yî yem e.” Ɛ waa lemme εkolε ke bonyii bo nci le wvudvu mum bonεn lo ke sekedvu.

Ɛ Jisos fε bonyii bo bincεm e nteen

(Mak 1:29-34; Luk 4:38-41)

14 Ɛ Jisos ke nε gen ley yew dvu Bitā, yen ε mwεse Bitā jiime cεmte bô ken'ya'.

15 Ɛ Jisos kum kebo kew e, ε ken'ya' kedvu mum cine wvú le, ε wvú mum ja we taa fiεε ε Jisos die.

16 Ɛ è ke no nu εkieguu, ε bonyii no too bô bonyii nteen bô bonceendaa bo dεwle le to njiηsene bô bó. Ɛ Jisos no bvuuεε biyoy bidvu ε è nu ke bô diεw maη. Ɛ wvú bvuu no fele tεn bonyii bocii bô to cεmkene.

17 Fifin to kooy keεge é fi ekocεn no wee ntum Nyo' wvù Yesaya to jemyεε wase le, “Wvú nu ε jo wase bontun bosεse, ε tuu bincεm bisεse.”

Bongεw bo wee wvù bii Jisos e

(Luk 9:57-62)

18 Ɛ Jisos ke dīoo yen ε kebombom ke bonyii le ke baay ε tase wase mbew ye le, ε wvú gay ê boom bew bo ηgoo le le, “Beene elente mamase egen kewvu keki.”

19 Ɛ wee mvu wvù to duηci bonci bo Nyo' le mum bence gay ê Jisos le, “Wee n'yεεyi, me nu embii wo le naa fεε fô wo gene.”

20 Ɛ Jisos tfuse ê wvú le, “Nyám yi ηkpwaante keηke bibuw bibole, ε mvunyiim mvù bile we keηke yéw yibo, geenεn ke wee wvù dieε nu Waawee keηke naa lo fô wvú ejike εkolε kew ke.”

21 Ɛ wee we ηgoo mvu gay ê wvú le, “Tata, yawε ecine é me engen endwey icεm nse no mbii.”

22 Geenεn ε Jisos tfuse ê wvú le, “È biì me le, ecine é bonyii bô nu le bó nu ε kpweken wase edweyte bonyii bobole bô kpwekene.”

Ɛ Jisos wam nffum

(Mak 4:35-41; Luk 8:22-25)

23 Ɛ Jisos ke gen ley ê kekoη e, ε boom bew bo ηgoo le bi tεn wvú le jó.

24 Ɛ fí kooy le nffum mvu wvu baay to nu ɛ ne sɛsɛ kew ê mamase yidvu le no bvuyte joo ɛ yí bene, gomte keeyiŋsɛn ê kekoŋ e. Ɛ è to nu ɛ Jisos leete lo fiew.

25 Ɛ boom bew bo ŋgoo le gen no kamsee wvú gayte le, “Tata, ficɛ, beene nu ekpwekɛn.”

26 Ɛ wvú kamse gay ê bó le, “O oo bonyii bo mbee wvù doose le. Ben fane la?” No wvú gay nonɛn mum ja we wam nffum wvudvu noo joo yi baay, ɛ mvú lu, ɛ mondvuum cife nen ndvumm.

27 Ɛ diuw yum bonyii bodvu nen kaww. Ɛ bó ghay le, “Kfuu wvuwwun wee nu wvu nɛɛ wvù naa nffum noo joo yuuke wvú le?”

Ɛ Jisos bvuse bonceendaa bo dɛwle le yí bonyii bofɛɛ le

(Mak 5:1-20; Luk 8:26-39)

28 Ɛ Jisos ke lente buy kewvu keki ê keba ke bonyii bo Gadala le. Ɛ bô bonyii bofɛɛ tasɛn ɛ bonceendaa bo dɛwle le nu yí bó le. Bonyii bodvu to buy ê ditfum dî bó dweyte bonyii jó le, ɛ bó to ké no cɛwkene baay, ɛ wee yaa nulo efey lo je jó kɛ.

29 Ɛ fí kooy le bó to nu ɛ kew no wamte foweewe biite le, “Waa Nyo', wo fii la ê bese? Wo to fɛn keenya ŋgɛw ê bese sɛ kefew ɛ kpwen e?”

30 È to nu ɛ ŋgoo boŋkunyam bomew diekene kekeŋ kedvu le ɛ bó duule lo.

31 Ɛ bonceendaa bo dɛwle le bodvu mum lekɛ Jisos le, “Kee wo, é wo bvuse lo bese, é wo ciinse bese yí boŋkunyam boba le.”

32 Ɛ Jisos mum gay ê bó le, “Ben egen lo.” Ɛ bó mum buy, gen ley yí boŋkunyam bodvu le. Ɛ fí kooy le ŋgoo boŋkunyam yidvu yicii to nu ɛ sɛn bow ê ŋkoŋ e, shii ê mamase yidvu le kpwekɛn jó.

33 Ɛ bonyii bô to cɛyte boŋkunyam bodvu fɛɛ lo, gen ɛlaante, see fiɛɛ ficii naa noo fi kooyɛ bô bonyii bô bonceendaa bo dɛwle le to nu yí bó le.

34 Ɛ fí kooy le kelaante kedvu kecii to nu ɛ buy lo keeto yen Jisos e. No bó toɛ yen wvú le, lekɛ le wvú enɛ gbwen bowene.

Mat 9

Ɛ Jisos fɛ wee ɛ wvú ɛ kpwe wase keba kemwaan

(Mak 2:1-12; Luk 5:17-26)

1 Ɛ Jisos ley ê kekoŋ e, kase lente gen ê kelaante kew e.

2 Ɛ fí kooy le bonyii bomew to nu ɛ to bô wee mvu fô wvú le ɛ wvú ɛ kpwe wase keba kemwaan, ɛ bó ɛ tuu ê fikɛɛy e. Ɛ Jisos yen no bonyii bodvu nu ɛ lese fitele yí ye le, ɛ wvú gay ê wee wvù to kpweɛ keba kemwaan wɛ le, “Nsaa yɛm, jicɛ fitele le. Me nu ɛ nɛɛshe wase bibefɛ biuw.”

3 Ɛ fí kooy le bonyii bomew bô to duŋci bonci bo Nyo' le to nu ɛ kew no wvukene ebonɛbon gayte le, “Wee wvun joo bvudvuu bvú Nyo' le.”

⁴Ɛ Jisos kiese fiε fi bó kpawaci, bife ê bó le, “Ben kenke ηkpawace wvù befe ê mvuntelem mvunen e nen nje la?”

⁵Fiε fi nu cekey keegay nu fi la? Keegay ê wee wvun le me nu ε nleεshe wase bibefe biew, nuu le wvú eja we elene le?”

⁶Geenen, me nu enge é ben ekiese le wee wvù diee nu Waawee kenke mvunḡay fokuse fen keelεshe bibefe.” No wvú gay nonen mum gay ê wee wvù to kpwee keba kemwaan ḡe le, “Ja we, ejo fikεy fiuw egene fô yew e.”

⁷Ɛ wvú mum ja we no gene fô yew e.

⁸Ɛ kebombom ke bonyii le yen fiε fi kooyε le, ε nfan koo bó, ε bó no tumte moḡkum mo Nyo' wvù nu ε nya kfuw mvumvun mvunḡay ê wee wvu wum.

Ɛ Jisos tee Matio

(Mak 2:13-17; Luk 5:27-32)

⁹ Ɛ Jisos ke ne fó dioo lene gene yen wee mvu le ε bó teḡe le Matio, ε è nu wee wvù to fii shile, ε wvú ε shii fô bvudvuu bwew bvu lemme le. Ɛ Jisos gay ê wvú le, “È bii me le.” Ɛ wvú mum ne we no bii wvú le.

¹⁰ Ɛ Jisos ke gen shii dioo diekene yew dvu Matio, ε fi kooy le bonyii bomew nteen bò to fii shile, noo bonyii bò befe bomew ten to nu ε to shii no diekene bò bo Jisos noo boom bew bo ηḡoo le.

¹¹Ɛ Bofalasii dioo yen no bò bó diekene nonen mum bife ê boom bew bo ηḡoo le le, “È nu nje la wvù wee wene n'yεyi diekene bò bonyii bò fii shile noo bonyii bò befe bomew?”

¹²Ɛ Jisos yuw no bó bife, gay ê bó le, “Ɛ bonyii bò temyi ké no gomte wee εfuwe ke. È ké no gomte bò cεmkene.

¹³ Ben egen ekpawace, eyen laa kenyi ke fiε fi bó saḡ fin ε Nyo' jemyi le, ‘Me nshieele le bonyii ecamtè ε è nu shen fô bonyii le, ke me nshieele le bó egeè boncese fô me le ke’, nu le la le? Ben ekeè le ke me nto keentee bonyii bò nu teyḡey ke. Me nto keentee ε è nu bò befe.”

Ɛ bonyii bife εkumε keebamte mwεεm mvudien

(Mak 2:18-22; Luk 5:33-39)

¹⁴ Ɛ boom bo ηḡoo le bo Jon Nleseejoo le ke ne to bife ê Jisos le, “È nu nje la wvù bee Bofalasii ké no bamte mwεεm mvudien, ε boom buw bo ηḡoo le yaa bamte ke?”

¹⁵ Ɛ Jisos tfuse ê bó le, “Ben kpwaake le è nulo é bó ebe bonyii bò bvujen, é bó egen enu yii yii ε cee bvujen nu bò bó? Geenen, diuu too lo di bó nu ke efi cee bvujen wvudvu ê bó, é bó emum ekew ebamte mwεεm mvudien.

16Ke wee nulo ejo njaw ndvu yi fie, etumce ndvu yi yvum dvú ke. É wvú ge lo nonen, é njaw ndvu yidvu emese esaa ndvu yi yvum yidvu, é kebuw kè nu fó emese ekuw efey lo no kí be shee nu.

17É ke wee nulo ten ejo mbvuum mo monfem egeé ê gham mbvuum wvù bó kene bô jew nyam e, ε wvú ε yvumen wase ke. É wvú ge lo nonen, é mbvuum mo monfem modvu ke ekoo, é gham wvudvu ebvuye etawse lo, é mbvuum modvu emum egen kuse. Fi len nu le bó kenke keegeé mbvuum mo monfem ε è nu ê gham wvu fwε le. Nonen, é mbvuum bô gham emum enù.”

É kpwoon mvu kum Jisos e bonen, ε Jisos yemmke waa wee wvu baay

(Mak 5:21-43; Luk 8:40-56)

18Ke no Jisos to bæe jemyi ê bó nonen, ε fí kooy le wee wvu baay mvu to nu ε to ley tum envuw ê wvú ejise lèke le, “Waa wem wvù kpwoon nu ε kpwe ke keseen nen, geenen, to ekum wvú le bô kebo kuw é wvú ekase etu dvú.”

19É Jisos mum nε we ε bô wvú no gene, ε boom bew bo ηgoo le bii ten wvú le.

20 É fí kooy le kpwoon mvu wvù to nu ε cem wase bô kencem ke bokene le bilum yuufe ncow bifεε to nu ε to ê Jisos ejim kum ηgem ndvu ye le.

21Wvú to kum nonen, ε wvú to jeme wase fô fitele fiew e le, “É me encim enkum ke naa ε è nu ndvu ye le, tu me ε mbonen wase.”

22 No wvú kumεε nonen, ε Jisos banke ye yen wvú le, gay ê wvú le, “Bwεem, fo wo efanè ke. Fitele fiuw fi wo lese yî yem e nu ε ge wase wo ε bonen.” Ke sekedvu, ε kpwoon wvudvu mum bonen lo.

23É Jisos ke gen fεse fô yew e fo wee wvu baay wε, yen bonyii bò to ké no toonke bondonj bo kpwe le noo kebombom ke bonyii le. É fó ffule lo bô kpwe.

24 É Jisos gay ê bó le, “Ben etawse, wan wvudvu baa kpwe ke, wvú leete lo.” É bonyii bodvu no kieele lo wvú.

25 É bó ke dīoo bvuse bonyii bodvu ekfuη, ε wvú mum ley gen yew, jice wan wvudvu yî kebo le, ε wvú mum ja we.

26É saaka wvu ekumε fieε fidvu ghan gen ê keba ke woj e kedvu le kecii.

É Jisos yene ejise binfefe bifεε

27 É Jisos ke nε fô yew e fε, dīoo lene gene, ε binfefe bimew bifεε, ε è nu bolemse no kuηene bii wvú le wamte foweewe gayte le, “Waa Nfon Dawe, came shen fô bese le.”

28É Jisos ke gen ley yew, ε binfefe bidvu bi wvú le, ε wvú bife ê bó le, “Ben nu ε bee le è nulo é me enje fieε fi ben beele fin e?” É bó bee le, “Éε Tata.”

29 É Jisos mum kum ejise ebole gay le, “Bii fitele fi ben lese yî yem e, fí ege le ye nonen fô ben e.”

³⁰ Ɛ ejise ebo mum yene. Ɛ Jisos looce lew lo ê bó gay le, “Ben eyenè fo ben emom ege é wee ekiee ke.”

³¹Geenen, Ɛ bó kaa gen no sanse lo saaka ekume lemme di Jisos e ê keba ke won e kedvu le kecii.

Ɛ Jisos fe kencife

³² No bonyii bodvu to nen'yee wase egene, Ɛ fí kooy le bonyii to nu Ɛ ne to bô kencife kemew fô Jisos e Ɛ nceendaa dewle nu yî ye le.

³³Ɛ Jisos dīoo bvuse nceendaa dewle wvudvu yî wee wvudvu le Ɛ wvú mum kew no jemyi. Ɛ kebombom ke bonyii le yen nonen no ghayte gayte le, “Ke bó ke nu Ɛ yuu wase eyen fiee le diewe fin e won wvù IsraeI e ke.”

³⁴Geenen, Ɛ Bofalasii gay fibole le, “Wvú bvuse bonceendaa bo dewle le ban nen Ɛ è nu bô mvungay mvu nfon bonceendaa bo dewle le bodvu.”

Ɔgbwele duule baay, Ɛ bonyii bo ngbwele le nu caan

³⁵ Ɛ Jisos ke ne no ghane ê bilaante le bicii noo ê bontew e yeyi bonyii yéw bunle yibole, bvuu fewci ten saaka wvù jee ekume bvunfon bvú Nyo' le. Wvú to ghane nonen fele ten kencem kecii noo ntun tfuu.

³⁶ É wvú ké eyen kebombom ke bonyii le, é shen koo wvú bô bó njefo bó to nu yî monlum e, se wee wvù efi bó, diewe njée yì nu se wee ncey e.

³⁷Ɛ wvú ke mum ne gay ê boom bew bo ngoo le le, “Ngbwele duule baay, geenen Ɛ bonyii bo ngbwele le nu caan.

³⁸Nonen, ben ebunleè le Tata wvù Cee wee eciinse bonyii bo ngbwele le wene dvu wvú.”

Mat 10

Ɛ Jisos tum boom bew bo ngoo le bo yuufe ncow bofee

(Mak 3:13-19; Luk 6:12-16)

¹Ɛ Jisos ke ne tee boom bew bo ngoo le bo yuufe ncow bofee Ɛ bó to. Ɛ wvú nya mvungay ê bó mvù bó ebvuse biyoy bì yiile yî bonyii le bvuu fele kencem kecii noo ntun tfuu dvú.

²Eyan nu ediee Ɛ boom bo ntum e bo Jisos e bo yuufe ncow bofee le bodvu: Wvu fwe nu Semon wvù bó to bvuu teje le Bitá, bô Andulu wvù waa bwee. Ɛ bomew nu Jem wvù waa Sebēdee bô waa bwee wvù Jon noo

³Filew bô Batolomu, Toma bô Mat wvù to fii shile, Jem wvù waa Alfiyus, Tadio bô

⁴Semon wvù to nu ngoo Boselot e bô Judas Iskaliot wvù to gesee Jisos.

(Mak 6:7-13; Luk 9:1-6)

- ⁵ E Jisos tum bonyii bo yuufe ncow bofɛɛ ban, gay ê bó le, “Ben dioo gene, fo ben egen bvudvuu le se è nu bvuu wee Juu le ke. Fo ben egen bilaante bì è nu bi bonyii bo Samalia le ke.
- ⁶ Ben egen e è nu fô boom bo Israeɛ e bò nu e laken wase diewe njée le.
- ⁷ Ben dioo gene no fewci ê bó gayte le, ‘Bvunfon bvuu fowe nu wase nceencee.’
- ⁸ Ben efelè ten bonyii bò cemkene, geè e bonyii bò kpwekene tuu dvú, felè bonyii bò kenke ntun wvu baay, bvuusè bonceendaa bo dewle le yí bonyii le. Me nu e nya mvungay ê ben scici. Ben egen le efii ten bonyii dvú scici.
- ⁹ Ben dioo gene, fo wee ejo bigew suu yí kecaw e ke, kenɛɛ è nu bì bó kene bô ketwaa ke bigew e kè yeɛle, kenɛɛ è nu kè baa, kenɛɛ kè bó kene bô kfuu ketwaa kè nɛɛ.
- ¹⁰ Fo wee ejo ekɛle. Fo wee ejo bikum bifɛɛ kenɛɛ bolaba bomew, kenɛɛ kembra ke. Ben ekeè le é wee lemte lemme, tu è nu fò wvú kenke keediekene.
- ¹¹ Ben dioo e gen e ley ê kelaante le, kenɛɛ ntew e, gom yen wee wvù nu e kocɛn e, e ben e bó no cee gen buy kefew kè ben ke enɛnɛ jó le.
- ¹² Ben ke dioo e gen, e dioo leyte yew dvu wee, gay yew e.
- ¹³ É yew yidvu nu e yí e kocɛn, é kembonen kenɛn eto yew dvudvu. É yew yidvu baa nu e yí e kocɛn, é kembonen kenɛn ekase etu ê ben.
- ¹⁴ É wee faɲ keefiisen ben kenɛɛ keeyuw fiɛ fi ben jemyi le, é ben dioo buyte yew dvudvu kenɛɛ kelaante kedvu le kuce kebvu ke yí bikaa binɛn e.
- ¹⁵ É me ensee ê ben kecɛy le è nu ke edioo enu diuu di nsaw wvu fokemɛse le, é mwɛɛm ebonɛn yí kelaante kè Sodom bô kè Gomola le efey kelaante kekis.

Bongɛw bo boom bo ntum e bo Jisos e

(Mak 13:9-13; Luk 21:12-17)

- ¹⁶ Ben eyekɛ yuw, me ntumte ben e ben nu egen enu diewe njée le ente jo bokuula. Nonɛn ben dioo ghane no feefenè diewe yó le, enù ten nyɛkeey diewe bibembɛ le.
- ¹⁷ Ben dioo ghane no yenè ekumɛ bonyii. Ben ekeè le bó nu ke enya ben can bonyii bò saake bonsaw e. Bó nu ke etamte ben yéw bunle yibole.
- ¹⁸ Bó nu ke egufe ben egen dvú fwe dvu bonyii bò saake biba bi won e, noo fwe dvu bonfon nje me, wvu le ben emum ejeme ê bó noo ê bonyii bò yaa nu ke Bojuu ekumɛ me.
- ¹⁹ Bó ke dioo e nya ben ê bó nonɛn, fo ekolɛ ekfumtè ben le laa ben nu ke egen ejeme naa la ê je yì nɛɛ le le, njefo Nyo' nu ke enya fiɛ fi ben ejeme kefew kedvu le.

20 Ben ekeè le ke è bæε ke ejemyi ben ke. È nu ke ejemyi Keyoy ke Icee wene le diuw wene le.

21 Wee nu ke enε ejo waa bwee enya é bó eyu, é cee wan ejo waa we enya é bó eyu. Boom nu ke enε ebone bikaa ê bo'icee bobole ejim, gee ε bó yuwyi bó.

22 Bonyii nu ke ebane ben nje diee diem. Geenεn wee wvù nu ke ekuu shém egen ebuy fokemεse nu wvù nu ke eboy.

23 Seke bonyii ε bon bikaa ê ben ejim ê kelaante kemew e, ε ben fεε gen ê kemew e. É me ensee ê ben kecεεy le, ke ben nu ke elen bilaante bi Islael e bicii sε wee wvù diee nu Waawee ε to ke.

24 Ke waa ηwa' ké no fele wee wvù yεεyi wvú ke, ε ke waa lemme ké no fele ten cee εkolε we ke.

25 Fí nu leη le waa ηwa' nulo enu diεwε wee wvù yεεyi wvú le, ε waa lemme nu ten diεwε cee εkolε we le. É bó teηe cee yew le wvú nu Belsebu, é bó saa ke etee boom bo yew e bô diee di bemte fele lo didie?

(Luk 12:2-7)

26 Nonεn fo ben efanè wee ke. Ben ekeè le ke fiεε nu dvú fi bó banji fi nu ke enu sε fí ε buy εmwa ke. E ke fiεε nu dvú ten fi bó nyile fi nu ke enu sε bó ε kiεε ke.

27 Fiεε fi me nseηe ê ben εntaη, ε ben no jemyi ê bonyii εmvunsheen. E fi me ntfumtfume lo ê ben, ε ben jaη ε è nu fô εkolε ke yew e.

28 Fo ben efanè bonyii bò nulo eyu ke ε è nu nyam ye maan sε è nulo é bó eyu ten keyoy ke. Ben efanè ε è nu Nyo' wvù nulo elεse keyoy ke wee le bô ye ye ηguy wvu baay e.

29 Ke bó geese mvunsha mvunfεem ke yí finyinyi le maan? Geenεn, ke fimwaan ké gbwe fokuse sε Icee wene nu ε bee ke.

30 Finεn nu ε Nyo' kee naa yvúw yicii yì nu ê ben εfa.

31 Nonεn fo ben efanè ke. Ben fele lo mvunsha fó nteen.

(Luk 12:8-9)

32 É wee beηe ê bonyii fwe le wen kee me, tu wee wvù diee nu Waawee nu ke ebee ten mwεten fwe dvu Ice wvù nu fowe.

33 Geenεn naa yεε wvù ma lo me fwe dvu bonyii, nu ε me nu ηke ema lo ten wvú fwe dvu Icεm wvù nu fowe.

Jisos to bô kenɣawsεn

(Luk 12:51-53; 14:26-27)

34 Fo ben ekpwaakè le me nto ε è nu bô nyεkeey yí nshε le fen ke. Ke è nu fifie fi me nto dvú ke. Me nto ε è nu bô jem.

35 Ben ekeè le me nto keenje é wan wvù diemsen ediuu bô ice, ε wan wvù kpwoon diuu bô bwee, ε kpweε wan diuu bô bwee dweese.

36 Bonyii bo bvuban e bo wee le nu ke enu ke bonyii bo ê wvù yew.

37 É wee koonke ice kenεε bwee fele me, tu wvù baa ekpwenten keenu wee wem ke. Wee é no koonke ten waa we wvù diemsen kenεε wvù kpwoon fele me, tu wvù baa ekpwenten ten keenu wee wem ke.

38 É wee baa etuu kew kentam ebii me le, tu wvù baa ekpwenten keenu wee wem ke.

39 É wee bawci nshii we, é wvù ke elase ke nshii wvudvu. Geenεn é wee lase nshii we nje me, é wvù ke ekeηke nshii wvù mey lo.

(Mak 9:41)

40 É wee fiisene ben, tu wvù fiisene ε è nu me. Wee é fiisen me, tu wvù fiisene ε è nu wee wvù tum me.

41 É wee fiisene wee ntum Nyo' njefo wvù kee le è tum Nyo' wvù, tu wvù nu ke ekeηke mmawce wvù Nyo' mawci bonyii bew bo ntum e dvù. É wee fiisene wee wvu teyey njefo wvù kee le mweten nu wee wvu teyey, tu wvù nu ke ekeηke mmawce wvù Nyo' mawci bonyii bo teyey dvù.

42 É me ensee ê ben keceey le, é wee nya ke naa fiko fi joo yì læ le ê wee mwaan ηgoo bonyii bo caan caan ban e njefo wvù kee le è nu wee wem ηgoo, tu ke mweten nu ke efufe mmawce we ke.”

Mat 11

ε Jon Nleseεjoo tum boom bew bo ηgoo le fô Jisos e

(Luk 7:18-35)

1 ε Jisos ke mεse tefe boom bew bo ηgoo le bo yuufe ncow bofεε mum ne fó no ghane ê bilaante bi jó le yeeyi bonyii bvuu fewci saaka wvù jee.

2 È to nu kefew kedvu le, ε Jon Nleseεjoo nu yew ncaw e. ε wvù ke ne yuw ekume mwεem mvù Klistu to gee, mum tum boom bew bo ηgoo le le bó egen,

3 ebife ê wvù le laa, è nu wvù wvù to nu keeke eto, nuu bó ecεytè wee mvu le.

4 ε bó gen bife, ε Jisos tfuse ê bó le, “Ben ekase egen esee ê Jon mwεem mvù ben nu ε yuw bô mvù ben yen e.

5 Binfeεe yene wase mwεem e, ε bontεηε lene teyey, ε bonyii bô cemkene bô ntun wvu baay bonene, ε bincife yuuke mwεem, ε bonyii bô kpweken kaase tuu dvù, ε bó bvuu fewci ten saaka wvù jee wvù wvu Nyo' ê bonyii bo kefufe le.

6 Njonn wvu baay nu wvu wee wvù baa maηene me ke.”

⁷Ɛ boom bo Jon e bo ηgoo le ba ke ne, ε Jisos mum kew no jemyi ê kebombom ke bonyii le ekume Jon biite le, “Ben se shee buyte gene ηkpwaante keegen yen ε è nu la le? Gayi di fwefwe fele shiike?”

⁸No è baa nu nonen, ben ε se ε no buyte gene jó nje la? Ben se gene keeyen wee le ε wvú ε sufe ye bô ndvú yi bonene? Ben eyeke eyuw, bonyii bô suute ye bô ndvú yi bonene ké no nu ε è nu ê bontow e.

⁹No è baa nu nonen, ben ε se ε no buyte gene jó nje la? Keegen yen wee ntum Nyo' le nuu? 'Ɛε, é me ensee ê ben le è nu wee ε wvú fele wee ntum Nyo'.

¹⁰È nu wvú wvù bó to saηee ekume wvú ε Nyo' gayte le, ‘Yeke eyuw, me nu ηke enciinse wee wem ntum é wvú esa fwe dvu wo, eseyse je yo é wo se no too.’

¹¹É me ensee ê ben kecεey le, ente jo bonyii bô bokene nu ε boo wase, nu ε bó baa boo wase wee wvù kuuke fele Jon Nleseejoo ke. Geenεn, ε wee wvù nu naa wee wvu caan ente jo bvunfon bvu fowe nu ε wvú kuuke fele wvú.

¹²Ɛ kew yi kefew kè Jon Nleseejoo to kewεe lemme diew e ε to ε buy keseen e, nu ε bonyii taanke bvunfon bvu fowe, ε bonyii bo mvunγay e lole bô mvunγay.

¹³Ɛ fí nu nonen njefo bonyii bo ntum Nyo' le bocii noo bonci bo Muses e to jemyi ekume bvunfon bvu fowe ke ghan to buy kefew ke Jon Nleseejoo le.

¹⁴É ben nu ε yen le ben nulo ebee, é ben bee le Jon wvun nu Ɛlayja wvù to nu keeke eto.

¹⁵Wee wvù keηke bitem ε wvú yuw.”

¹⁶Ɛ Jisos ne ghay ye le, “È nulo é me enfewsεn ηngokε ke keseen kin ε è nu bô la? Bó nu ke lo diewe boom bo caan caan e bô shiiyen mondvuum mo way e, ε bomew teηe bomew biite le,

¹⁷‘Bese toonke ndoη se ben bine lo le? Nyaa ηkiee kpwe se ben beηe lo le?’

¹⁸Me njemyi nonen njefo Jon to nu ε to faηe yaa diekene kεneε wukene ke, ε ben no jemyi le wvú keηke nceendaa dεwle yi ye le.

¹⁹Wee wvù diee nu Waawee ε dīoo to, diekene bvuu wukene, ben le bó etaa eyen, wvú ghane wuwte mwεem mvudien wuwte mbvuum, bvuu nu nsaa bonyii bô fii shile noo bonyii bô befe bomew. Ben ekeè le bvufee ké no duηci ye ε è nu yi fīεε fi bvú lemte le.”

Ɛ Jisos no shaanke gee di bilaante bimew e

(Luk 10:13-15)

²⁰Ɛ Jisos mum ne kew no shaanke gee di bilaante bimew bi wvú to yamεε ge biηhaw bi mwεem e bí le, njefo wvú to nu ε ge nonen, ε bonyii bo jó faηe yaa cim kumen nce wvubo ke.

21 Ɛ wvú no shaan̄ke nonen, jemyi le, “Ngew wvu baay nu wene ben bonyii bo Kolasen, ɛ ngew wvu baay nu ten wene ben bonyii bo Besayda. Ben ekeè le, é me nto ndioo n̄ge biṅghaw bi mwɛem e bi me nto n̄geɛ jo ben ɛ è nu Taya bô Sidon, tu bó to nu ɛ jise wase bimbamkpwe, kfum taan ye le nceke keeduṅce le bó nu ɛ kumen wase mvuntelem mvubole.

22 É me ensee ê ben le, è nu ke edioo enu diuu di nsaw wvu fokemese le, é mwɛem ebonene fô bonyii bo Taya noo bo Sidon e fele ben.

23 Noo ben bonyii bo Kafana'um, ben kpwaake le bó nu ke ebense ben é ben eben we? 'Aay! Bó nu ke eshike lo ben é ben eshii egen won̄ boṅkfu le. Ben ekeè le, é me nto ndioo n̄ge biṅghaw bi mwɛem e bi me nto n̄geɛ jo ben ɛ è nu Sodom, tu kelaante kedvu be bæe dvú ɛ to ɛ buy eben e.

24 Geen̄en, é me ensee ê ben le, è nu ke edioo enu diuu di nsaw wvu fokemese le, é mwɛem ebonene fô bonyii bo Sodom e fele ben.”

Kemmbuṅ ke Jisos e yaatene lo

(Luk 10:21-22)

25 Ke kefew kedvu le, ɛ Jisos ne gay le, “Me nyaa keyoone ê wo Icɛm Nfon ɛbulɛ bô nshɛ le wo nu ɛ nyile mwɛem mvun ê bogoyfee noo boṅkieɛfiɛɛ, ɛ duṅce ɛ è nu ê mvunley mvu boom e.

26 È nu no fi nu Icɛm, njefo è nu no wo to shieele le fi enù.

27 Icɛm nu ɛ nya wase mwɛem mvunciim ê me. Ke wee nu dvú wvù kee Waa Nyo' ɛfey Ice ke. Ɛ ke wee nu dvú wvù kee Ice ɛfey Waa we noo bonyii bô Wan nu ɛ caw keeduṅce Ice ê bó ke.

28 Ben bocii bô nu ɛkuse jo bvujite ɛ bvú ghaake ben, ben eto fô me le, é me en̄ge é ben elɛɛten.

29 Ben ejo ɛ è nu kemmbuṅ kem eshfumɛ, ebil̄ n'yɛɛyi wɛm e, njefo me nu fiem wee wvu nyɛkeey, n̄ken̄ke fitele fi lætene, é ben ke eken̄ke nlɛɛten fô mvuntelem mvunen e.

30 Ke kemmbuṅ kem ghaake nshfumɛ le ke, ɛ ke bvujite bwem jite ke.”

Mat 12

Ɛ Jisos nele saaka wvu ɛkumɛ diuu di mbam e

(Mak 2:23-28; Luk 6:1-5)

1 Ɛ è no nu ke kefew kedvu le, ɛ Jisos bô boom bew bo n̄goo le no læne fele wɛɛ egiṅ wvumew e, ɛ è nu diuu di mbam e. È to nu ɛ jeṅ yuu boom bew bo n̄goo le, ɛ bó mum ne kew no sumyi bicɛɛ diee.

2 Ɛ Bofalasii yen, gay ê Jisos le, “Taa eyen, boom buw bo n̄goo le gee fiɛɛ fi nci baa bee le wee ege diuu di mbam e ke.”

³ E wvú bife ê bó le, “Ben ke baa taŋ wase ê Nwa' Nyo' le no jeŋ to yuu Nfon Dawe bô ŋgoo ye, e wvú ge le?”

⁴ Wvú to nu e ley yew Nyo' le, die blæd wvù bó to gee ncese dvú fô Nyo' le, e è to nu nci fo wvú kenæ bonyii bô to nu bô wvú edie. È to nulo edie ke bocee ncese.

⁵ Nu le ben ke baa taŋ wase ten ê bonci bo Muses e no è ké dioo nu diuu di mbam e, e bocee ncese ŋgoy nci mbam ge lemme dibole yew ncese le, geenen e nsaw saa nu ke?

⁶ É me ensee ê ben le fiæ nu dvú fen keseen fi kuuke fele yew ncese.

⁷ Bó nu e saŋ ê Nwa' Nyo' le e Nyo' jemyi le, ‘Me nshieele le bonyii ecamtè e è nu shen fô bonyii le, ke me nshieele le bó egeè boncese fô me le ke.’ É ben fen be kee fiæ fi bvudvuu bvudvu bvun gayte, ben saa esaake bonyii se bó keŋke jay ke.

⁸ Fí nu le wee wvù diee nu Waawee nu Cee Ekole wvu mbam.”

E Jisos fe wee diuu di mbam e e kebo e kpwe

(Mak 3:1-6; Luk 6:6-11)

⁹ E Jisos ke ne fó, gen ley yew bunle yibole.

¹⁰ E fí kooy le wee mvu to nu dvú e kebo kew kemew e kpwe wase. E bonyii bomew ne bife ê Jisos le, “Nci nu e bee le è nelo é bó efe wee diuu di mbam e?” E bó to biite nonen gomte e è nu fiæ fi bó etey yí ye le.

¹¹ E Jisos tfuse ê bó le, “È nu yæe ê ben ente wvù keŋke njee, yí e gbwe ê fwen diuu di mbam e, é wvú enu se wvú e jice e gufe e bvuse?”

¹² Ke wee wvu wum fele naa lo njee baay e? Nonen tu nci nu e bee le wee ege lemme di jee diuu di mbam e.”

¹³ E wvú mum gay ê wee wvù kebo to nu e kpwe we le, “Neke kebo kuw.” E wee wvudvu neke. E kí mum bonen no nu ke diæwe kemew kie le.

¹⁴ Geenen e Bofalassii buy gen mum jo nsey no bó nu ege se yu Jisos.

Jisos nu wee lemme wvu Nyo' wvù wvú nu e caw

¹⁵ E Jisos kieæ ekumæ nsey wvù bó joe, mum nene fó. E bonyii nteen bi wvú le. E wvú fe bó bocii bô to keŋke bincem,

¹⁶ ciise ê bó le fo bó ege é bonyii ekieæ wen ke.

¹⁷ Fí to nu nonen keege é fí ekocen no wee ntum Nyo' wvù Yesaya to jemyæ le,

¹⁸ “Ben etaa eyen, wvun nu waa wem lemme wvù me nu e ncaw. Me ŋkoonke wvú, e fitele fiem yuuke njoŋ bô wvú. Me nu ŋke enya Keyoy kem ê wvú, é wvú efewci ê bitum ekumæ je yi teyey yí me nsumtene bonsaw jó.

¹⁹ Ke wvú nu ke ewaale bô bonyii, kenæ kumte diuw ke. E ke wee nu ke eyuw diæw ye bifiaŋ bi jé le ke.

²⁰Ke wvú nu ke emese engoy gayi dì ngeyte wase ke. E ke wvú nu ke ejimse ken'yeese kè bæenci jiwejiwe ke. Wvú nu ke ege nonen egen ebuy no je yi teyey yì wvú sumtene bonsaw jó nu ke eso.

²¹E bitum bicii nu ke etaale fwe e bí e gæe bvufee yî ye le.”

Mvungay mvu Jisos e nen'yi fæe?

(Mak 3:20-30; Luk 11:14-23)

²²E bonyii bomew ke ne to bô wee mvu e wvú e fefe, nu kencife, e nceendaa dæwle nu yî ye le. E Jisos fe wvú e wvú no jemyi bvuu yene mwæem e.

²³E diuw yum bonyii bô to nu fó bocii, e bó no biite le, “È nulo é wee wvun enu waa Nfon Dawe?”

²⁴Geenen e Bofalassii dïoo yuw no bó biite nonen gay le, “Wee wvun bvuuuse bonceendaa bo dæwle le nen e è nu ke bô mvungay mvu Belsebu wvù nfon bonceendaa bo dæwle le.”

²⁵E Jisos kiee fiee fi bó kpawwci mum gay ê bó le, “É ketum ne e gawsen e no diuu ekinekin, tu kí nu ke ene etu binffuy. Kelaante kenæe yew e ne e gawsen e no diuu eyineyin, yí saa ke eleem ke.

²⁶Nonen, é Satan bvuuuse Satan mvu yî wee le, tu wvú nu e gawsen wase ye ye. É fi nu nonen, bvunfon bwew saa ke eleem ke.

²⁷É è nu le me mbvuuuse bonceendaa bo dæwle le nen e è nu bô mvungay mvu Belsebu le, tu bonen boom bvuuuse bô mvu yæe le? Fiee fi boom bonen bodvu gee nu eduŋce le ben nu e gbwe wase nsaw.

²⁸Geenen é me mbvuuuse bonceendaa bodvu e è nu bô mvungay mvu Keyoy ke Nyo' le, tu bvunfon bvù Nyo' le nu e to wase fô ben e.

²⁹Ben kpwaake le è nulo é wee eley yew dvu ntememvungay, ekuu mwæem mwew ebuy dvú, se wvú e yaw e koo ntememvungay wvudvu e kay e? Seke wvú e kay nonen se kuu mwæem mwew keceey buy dvú.

³⁰É wee baa nu ê keba kem e, tu wvú bane me. Wee é no nu se wvú fici me keebaanci lo, tu wvú tawse lo.

³¹Nonen, é me nsee ê ben le Nyo' nulo elæeshæ mwæem mvù befe noo díew yì befe yicii yì bonyii jemyi. Geenen é wee jeme díew yì befe ekumæ Keyoy ke Yuule, tu ke è nu naa lo é Nyo' elæeshæ ke.

³²É wee jeme díew yì befe ekumæ wee wvù diee nu Waawee, tu Nyo' nulo elæeshæ. Geenen é wee jeme díew yì befe e è nu ekumæ Keyoy ke Yuule, tu ke è nu naa lo é Nyo' ke eyuu elæeshæ é è cim nu kefew kin e kenæe kefew kè too le ke.

Bó ke kiee kete yî mvuntam mwew e

(Luk 6:43-45)

33 É wee keŋke kete kè jee, é wvú ekeŋke mvuntam mvù jee mvù yumte yí dvú le. Wee é no keŋke kete kè befe, é wvú ekeŋke ten mvuntam mvù befe mvù yumte yí dvú le. Bó ké kiee kete ε è nu yí mvuntam mvù yumte yí dvú le.

34 Eŋgokε ke yó le kin. Ben nulo ege nεε sε no jemyi njeme wvù jee ε ben nu bonyii bò befe? Ben ekeè le fiεε fi nu ε yiŋsen ê fitele fi wee le nu fí fi ké no buyte diuw we le.

35 Wee dioo nu wee wvù keŋke ntfu mwεem mvù jee yí ye le, ε wvú no bvuuuse mwεem mvù jee. É dioo nu wvù keŋke ε è nu ntfu mwεem mvù befe, ε wvú no bvuuuse mwεem mvù befe.

36 É me ensee ê ben le è nu ke edioo enu diuu di nsaw wvu fokemεse le, é wee ekeŋke keetaŋe diuw yí díew yi ncewncew yì wvú ke nu ε jeme wase le.

37 Ben ekeè le bó nu ke edioo esaake wee, é enu díew yì buyte diuw we le yì nu ke ege é wvú eyuu, ε è nu ke ten díew yì buyte diuw we le yì nu ke ege é wvú eley ηgew e.”

Ε bonyii bomew no gomte le Jisos eduŋce keŋghaw ke fiε le

(Mak 8:11-12; Luk 11:29-32)

38 Ε bonyii bomew bò to duŋci bonci bo Nyo' le noo Bofalasii mum nε gay ê Jisos le, “Wee n'yεεyi, bese gomte le wo ege fiεε fi duŋci mvuŋgay mwuw é bese eyen.”

39 Ε Jisos tfuse ê bó le, “Eŋgokε kè befe kè nu ε cine wase Nyo' le ε tu diewe kpwoon nsake le, gomte keeyen fiεε fi duŋci mvuŋgay mwem e! Ke è nulo é me enduŋce fiεε ê eŋgokε kin efey fi wee ntum Nyo' wvù Jona le ke.

40 No Jona to ceε ê shem jo bye yi baay ediuw εta, nu ke leŋleŋ no wee wvù diee nu Waawee nu ke enu ente jo nshe ediuw εta.

41 È nu ke edioo nu diuu di nsaw wvu fokemεse le, é bonyii bo Ninive eleem bô eŋgokε ke keseen kin ege é bó elese kí ηgew e, njefo bó, bonyii bo Ninive to nu ε yuw fiεε fi Jona to fewci, kumen nce wvubo. Geenεn ben eyekε eyuw, wee nu fen bô fiεε ε fí kuuke fele fi Jona le.

42 Yaa wvù to saake ketum kè Sheba nu ke eleem ten diuu di nsaw wvu fokemεse le bô eŋgokε ke keseen kin ege é bó elese kí ηgew e, njefo wvú to nu ε nε ketum kew e ê kendvuse ke woŋ e keeto eyuw bvufee bvυ Nfon Saamun e. Geenεn ben eyekε eyuw, wee mvu nu fen bô fiεε ε fí kuuke fele fi Saamun e.

(Luk 11:24-26)

43 Keyoy kè yiile ké buyte yí wee le mum gen ηkpwaante no gomte fô kí ecee. Geenεn ke dioo ε gom ηkuuŋ,

44 mum jeme ê ekole kew le, ‘Me nu eŋkase entu ê me yew fô me nse mbuyεε.’ Seke kí ε kase ε to ε yen ε yew nu se fiεε dvú, ε bó ε yeεε ε seyε yí ε no yuule,

⁴⁵nonen ε kí mum kase gen, to bô biyoy bimew bisooshwiw bì befe fele kí, ε bô bí mum to ley no cee dvú. Ε mwεem mum mεse fo yî mwεten e sekedvu fey no mvú se shee nu. È nu ke læŋlæŋ no fí nu ke enu fô εŋgokε kè befe ke keseen kin e.”

Bonyii bô è nu kfuu di Jisos e

(Mak 3:31-35; Luk 8:19-21)

⁴⁶Κε no Jisos to bæε jemyi ê bonyii nonen, ε fí kooy læ bwee Jisos bô boom bo bwee Jisos e to nu ε to leem εκfuŋ no gomte læ bô bó ejeme.

⁴⁷Ε wee mvu gay ê Jisos læ, “Bwoo bô boom bo bwoo le leeme εκfuŋ gomte læ ben ε bó ejeme.”

⁴⁸Ε wvú bife ê wvú læ, “Bwεem nu γεε, ε boom bo bwεem e nu baa?”

⁴⁹No wvú bife nonen, mum no lomte bonyii bew bo ηgoo le, gayte læ, “Bwεem bô boom bo bwεem e ban.

⁵⁰Ben ekeè læ wee tfuu wvù gee fiεε fi Icεm wvu fowe shieele nu ε wvú nu waa bwεem bô jeme yem no bwεem.”

Mat 13

Bongan εκumε bvunfon bvu fowe

(13:1-50)

Ngan εκumε wee wvù to tfumyi ηgow

(Mak 4:1-9; Luk 8:4-8)

¹Κε εbvubwε, ε Jisos ke nε buy yew, gen shii mbew mamase le.

²Ε kebombom ke bonyii le ke baay tase mbew ye le nen ghemm. Ε wvú mum nε wase ley shii ε è nu ê kekon e ê joo, ε kebombom kedvu no leeme ê ηkpwaante ηgem joo le.

³Ε wvú no jemyi mwεem nteen ê bó ê bongan e. Wvú to nu ε gay læ, “Wee to nu ε laa keegen etfume ηgow.

⁴Ε wvú ke dioo etfumyi, ε yimi gbweken ê je, ε mvunyiim to tacε die.

⁵Ε yimi ηgow gbweken fô bvudvuu bvu εta le ε nshε yaa nu fó ntay κε, ke mum yaŋsen buy njefo κε nshε to nu fó ntay κε.

⁶Ε mvum ke dioo kew ebaa mum suŋ ηgow yidvu. No yí to baa cime geŋ ntay κε, ε yí mum yowlεn.

⁷Ε yimi ηgow gbweken ê bisafe le. Ε bisafe bidvu ke ku mum baŋ ηgow yidvu.

⁸Ε yimi ηgow gbweken ε è nu yî nshε yì jee le, ke buy, ku yum ntay. Ε binyi bimew no nu εjise gbwee, bimew mbaŋsoocaa, bimew mbaanshe.

⁹Wee wvù keŋke bitem, ε wvú yuw.”

Shiee wvù Jisos jemyi ê bongan e

(Mak 4:10-12; Luk 8:9-10)

10 Ɛ boom bo ηgoo le bo Jisos e ne bence gen bife ê wvú le, “È nu nje la wvù wo jemyi ê bonyii ban ε è nu ê bonḡan e?”

11 Ɛ wvú tfuse ê bó le, “È nu ben bò Nyo' nu ε ge wase le è nulo é ben ekieε mwεem mvu bvunfon bvu fowe le mvù nu ê kenyile le. Geenεn wvú baa ge le è nulo é bonyii ban ekieε ke.

12 Ben ekeè le wee wvù keḡke fieε nu ε bó nu ke ebise é wvú ekeḡke ε fí duule. Ɛ wee wvù yaa keḡke ke fieε nu ε naa fi caan fi wvú keḡke nu ε bó nu ke efi lo ê wvú.

13 È neε fieε fi me njemyi ê bó ê bonḡan e, njefo bó taale mwεem yaa yene ke. Bó yeke mwεem, yaa yuuke keεε kee mvú ke.

14 Fieε fi wee ntum Nyo' wvù Yesaya to jemyεε nu ε looce naa ε kocεn bô fieε fi bonyii ban gee. Wvú to nu ε gay le, ‘Ben nu ke eyeke naa mwεem, geenεn yaa yuuke ke. Ben nu ke etaale naa mwεem, geenεn yaa yene ke.

15 Ɛ è ge njefo mvuntelem mvu bonyii ban e nu ε le wase, ε bitem bibole nu ε bí ε cin wase, ε bó ε kfuke wase ejise εbo. Ɛ bó ge nonεn wvu le fo bó eyenè mwεem e bô ejise εbo, yuuke mwεem bô bitem bibole,
é mvuntelem mvubole eyvuwsee,
é bó emum ekase etu jim fô me le,
é me enfε bó.’

16 Geenεn, njoḡ wvu baay nu wene njefo ejise eyene nu yò yene mwεem e, ε bitem binεn nu bì yuuke mwεem.

17 É me ensee ê ben keceεy le, bonyii bo ntum Nyo' le nteen bô bonyii bo teyḡey bomew to shee beele keeyεn mwεem mvù ben yene le, ke faḡe yaa eyen ke. No beele ten keeyuw mwεem mvù ben yuuke, ke faḡe yaa eyuw ke.

Fieε fi ḡgan wvu εkume wee wvù to tfumyi ḡgow duḡci

(Mak 4:13-20; Luk 8:11-15)

18 Ben eyuw le fieε fi ḡgan wε wvu εkume wee wvù to tfumyi ḡgow duḡci.

19 Wee ké yuuke fieε fi εkume bvunfon bvu fowe se wvú ε kieε kenyi kedvu, ε Satan wvù wee kebefε mum to cun diew yì bó jewe fô fitele fiew e bvuse. Fifi nu ḡgow yì bó to dioo tfumyi ε yí gbweken ê je.

20 Ɛ ḡgow yì bó to tfumyi ε yí gbweken fô bvudvuu bvu εta le nu wee wvù yuuke diew Nyo' mum fiisen lo kaḡ mwaanḡ bô njoḡ.

21 Geenεn, ε yí baa cime ḡḡ yí ye le ke. Ɛ yí mooce ke caan. É ḡḡew ke dioo ε kew keεε bó bone ε è nu bikaa ê wvú ejim nje diew yidvu, ε wvù mum tfuw bikaa kaḡ mwaanḡ.

22 Ɛ ɲgow yì bó to tfumyi ɛ yí gbweken ê bisafe le, nu wee wvù yuuke diew Nyo', ɛ ken'yanyan ke ekume mwɛem mvu yí won wvun e, noo shiee bvukuke mum tase baɲ diew yidvu ɛ yí laaye lo ɛcici.

23 Ɛ ɲgow yì bó to tfumyee yí nshɛ yì jee le mum nu wee wvù yuuke diew yidvu, yuw naa ntay no gee no yí gomte diewe ɲgow yì yum yimi ɛ nya ejise gbwee, yimi ejise mbansoocaa, yimi mbaanshe le.”

Ɔgan ekume ɲgow egiɲ bô yi egay

24 Ɛ Jisos bvuu ma ɲgan mvu ê bó le, “Bvunfon bvu fowe nu ɛ è nulo é bó efewsen bô wee mvu wvù to geneɛ tfume ɲgow yì jee yì è nu egiɲ ê wvù wene.

25 Ɛ bonyii ke dioo eleete wase, ɛ wee we bvuban gen tfume ɲgow egay yò fieesene egiɲ ente dvudvu mum nɛɛ.

26 Ɛ egiɲ yodvu ke dioo eku wase ekew etfumyi, ɛ ɲgow egay ye mum yene ten.

27 Ɛ bonyii bo lemme le bo wee wɛɛ wvudvu le to bife ê wvù le, ‘Cee ekole, wo to dioo tfume ɲgow wene ɛ è nu yi egiɲ, yi egay yin ɛ ghan nɛɛ le ɛ se no nu ente dvudvu?’

28 Ɛ wvù tfuse ê bó le, ‘È ge ke wee wɛm bvuban fifie fieɛ.’ Ɛ bonyii bo lemme le bodvu bife ê wvù le, ‘Wo gomte le bese egen edvun'ye?’

29 Ɛ cee ekole wvubo tun gay ê bó le, ‘È nelo é ben dioo dvun'yi ene ebaale ten egiɲ ente dvudvu.

30 Ben ecine é mvù ekuu mvunciim egen ebuy kefew ke ɲgbwele le. É ke dioo enu kefew ke ɲgbwele le, é me engay ê bonyii bo ɲgbwele le le bó eyaw edvun'ye egay yodvu ebaance eyile egeɛ bijiw e bijiw e, é bó ke eton, emum ebaance egiɲ egeɛ ê ɲwaw wɛm e.”

Ɔgan ekume kfuu ɲgow fintam fimew

(Mak 4:30-32; Luk 13:18-19)

31 Ɛ Jisos bvuu ma wvumvu ɲgan ê bó le, “Bvunfon bvu fowe nu diewe jise di ɲgow fintam fimew e, fi wee to joe tfume ê wvù wene.

32 Ɔgow yin nu ɛ yí ɲoynene baay fele ɲgów mi yicii. Geenɛn, seke yí ɛ buy, ɛ yí ku kuw fey teɲ mwɛem mvunciim, mum nɛ tu wase kete wvu le è nulo é mvunyiim mvù bile we eyoote yí tíew yidvu le.”

Ɔgan ekume fintunɲɛn

(Luk 13:20-21)

33 Ɛ wvù bvuu ma wvumvu ɲgan ê bó le, “Bvunfon bvu fowe nu diewe fintunɲɛn fi kpwoon to fewɛ mvuum bintee bi baay baay bitete, jo fiysen dvù, tow gee, ɛ fí mum ge ɛ mvuum modvu ben.”

(Mak 4:33-34)

34 Jisos to jemyi mwεem mvun mvunciim ê kebombom ke bonyii le ε è nu ke ê bonḡan e. Keceey, ke wvú to ké jeme fiεε ê bó se è nu ê ḡan e ke.

35 Wvú to gee nonen keege é fí ekocen no wee ntum Nyo' mvu to jemyεε wase le, “Me nu ḡke endioo eḡawse diuw wem é ebuyte ke bonḡan. Me nu ḡke embwaashe mwεem mvù to nu ê kenyile le ε kew no bó to bomεε woḡ.”

Fiεε fi ḡan wvu ekumε ḡgow εḡiḡ bô yi εḡay duḡci

36ε Jisos ke ne cine kebombom ke bonyii le ley gen yew. ε boom bew bo ḡgoo le bi wvú le bife ê wvú le, “Ke yuuse ê bese fiεε fi ḡan wvu ekumε εḡay yo wene εya duḡci.”

37ε wvú mum ḡay le, “Wee wvù tfumyi ḡgow yì jee nu wee wvù diee nu Waawee.

38ε wεε nu woḡ wvun. ε ḡgow yì jee duḡci boom bô è nu bo bvunfon bvu Nyo' le. ε εḡay nu boom bô è nu bo wee kebefε wε le.

39ε wee bvuban wvù to tfumyεε ḡgow yidvu nu dεwle. Kefew ke ḡgbwele le nu kefew kè woḡ wvun nu ke eka. ε bonyii bo ḡgbwele le nu bonceendaa bo Nyo' le.

40Ke no bó ké baayi εḡay baance ton bô ḡguy, nu ke leḡleḡ no fí nu ke enu kefew kè woḡ kaa wase le.

41 Wee wvù diee nu Waawee nu ke eciinse bonceendaa bew, é bó eḡhan ebaance mwεem mvunciim mvù too bô kebefε noo bonyii bô gee bibefε bocii ebvuse ê bvunfon bwew e,

42 elañ ê kembvuwlεn ke ḡguy e. È nu fó fò bonyii nu ke ebeele ḡgeci bigew.

43Nonen é bonyii bo teytey ebaa diewe diuu le ê bvunfon bvu Icee bó le. Wee wvù keḡke bitem ε wvú yuw.

ḡgan ekumε ntfu noo jise di baḡe le

44 Bvunfon bvu fowe nu diewe ntfu mvu wvù wee to joε gen nyile wene le. ε wee mvu ke to yen mum kase baḡyε, no kfuuyi ε njoḡ yuu lo wvú. ε wvú mum gen gese mwεem mvunciim mvù wvú to keḡke, gen ḡuy wεε wvudvu.

45ε bvunfon bvu fowe bvuu nu ke diewe wee way mvu wvù to ḡhane gomte εjise ε baḡ yò jee nen ntaḡ.

46ε wvú ke dioo egomte, gen yen dimew e ε è nu naa di lumte. ε wvú mum gen gese mwεem mvunciim mvù wvú to keḡke gen ḡuy jise di baḡe le didvu.

ḡgan ekumε kensaḡ ke byé le

47Bvunfon bvu fowe bvuu nu ke diewe kensaḡ e kè bó to tfumyεε ê joo, ε dikfuu di byé le dicii tase jó,

48ε kí yiḡsen. ε bonyii mum ḡufe bvuse ê ḡkpwaante, shii fokuse, caw byé yì jee ḡεε ê ḡkáa le, laḡ yì befe.

49 È nu ke no fí nu ke enu kefew kè woŋ kaa le. Bonceendaa bo Nyo' le nu ke ebuy eto egawsen bonyii bò befe fô bo teytoy e,

50 emum elañ bò befe ê kembvuwlɛn ke ŋguy e, fô bonyii nu ke ebeele ŋgeci bigew.”

51 È Jisos mum bife ê boom bew bo ŋgoo le le, “Ben nu ε yuw mwɛɛm mvun mvunciim ntay e?” È bó bee le, “Èε.”

52 È wvú mum gay ê bó le, “Fí ε mum ε no nu le, wee tfuu wvù duŋci bonci bo Nyo' le wvù bó nu ε yɛɛyi wase wvú ekumɛ bvunfon bvɔ fowe nu diɛwɛ cee yew wvù keŋke ntfu, ε wvú nulo ebvuse mwɛɛm mvu mvunfɛm kɛnɛɛ mvu mvuyvuum jó.”

È bó ma lo Jisos ntɛw we le

(Mak 6:1-6; Luk 4:16-30)

53 È Jisos ke mɛse ma boŋgan ban, mum nɛ jó,

54 gen ntɛw we le, gen ley no yɛɛyi bonyii yew yiɔo yi bunle le. È bó yuw n'yɛɛyi we no keŋke lo ŋghaw, mum kɛw no ghayte le, “Wee wvun jo fɛɛ bvun bvufɛɛ bvɔ baay bô mvuŋgay mvù wvú gee biŋghaw bi mwɛɛm e dvú nɛn?”

55 È nu ke waa cee la wvun wvù kane bite? Kɛ bwee nu Maalia le? Kɛ boom bo bwee le nu Jɛm bô Yoɛw noo Semon noo Judas e?

56 Kɛ jéme ye yicii nu beene ε bó fɛn e? Wee wvun ε ja fɛɛ bô mwɛɛm mvun mvunciim nɛn?”

57 No bó ghay nonɛn mum ma lo wvú. Nonɛn ε Jisos gay ê bó le, “Bó ké no wvumte wee ntum Nyo' mondvuum e monciim, efuw ke woŋ we le noo ê kfuɔ diɛw e.”

58 È Jisos faŋɛ yaa ebvuu ege biŋghaw bi mwɛɛm e jó nteen kɛ, njefo bó to baa elese fitele yí ye le kɛ.

Mat 14

Ekumɛ kpwe Jon Nleseejoo

(Mak 6:14-29; Luk 9:7-9)

1 È to nu kefew kedvu le, ε Nfon 'Elod wvù to saake keba ke woŋ e kè Galilee yuw ekumɛ lemme di Jisos e.

2 È wvú gay ê bocee woŋ bew le, “Wee wvun nu Jon Nleseejoo ε wvú ε kase ε buy yí kpwe le. È nu fiɛɛ fi ge wvú ε sɛ no keŋke mvuŋgay keegee biŋghaw bi mwɛɛm e bin nɛn.”

3 Fí nu ε 'Elod to gay ε bó koo Jon, kay, fen yew ncaw e nje 'Elodia wvù kpweɛ Filew wvù waa bwee 'Elod, ε 'Elod to jo kpweɛ le.

4 È Jon no tune gayte le nci baa bee le wvú ejo wvú kpweɛ le kɛ.

5 È 'Elod mum no gomte le wen eyu Jon, geenɛn no fane bonyii, njefo bonyii to keŋke Jon diɛwɛ wee ntum Nyo' le.

⁶Ɛ è ke no nu diuu dì Nfon 'Elod to gee ñkaw keekume diuu dì bó to bokεε wvú, ε waa 'Elodia wvù kpwoon ley cεɲ bine fwe dvu bonyii bò to nu fô ñkaw wvudvu le, ε 'Elod yεn ε ye yvuwse wvú.

⁷Ɛ wvú mum kaw wan wvudvu, die kelew le wen nu efene wvú ε è cim nu naa bô la fi wvú ε bife le wen efene wvú dvú.

⁸Ɛ bwee wan mum beyse wan le wvú egay le wvú enya εkolε ke Jon Nleseεjoo le ê juy e ê wvú.

⁹Ɛ wvú gay, ε Nfon 'Elod yuw nonεn ε ye keeshε lo wvú. Geenεn nje kelew kè wvú to dieε wase fwe dvu bonyii bò to nu fô ñkaw e, ε wvú mum gay le bó ege no wan gay.

¹⁰Ɛ wvú mum tum bonyii ε bó gen yew ncaw e bvuse εkolε ke Jon e,

¹¹to dvú ê juy e nya ê wan kpwoon wvudvu, ε wvú mum gen dvú nya ê bwee.

¹²Ɛ boom bo Jon e bo ñgoo le ke gen jo gvune di Jon e dwey, gen see saaka wvudvu ê Jisos.

Ɛ Jisos nyaje bonyii bontfuke botin

(Mak 6:30-44; Luk 9:10-17; Jon 6:1-14)

¹³ Ɛ Jisos ke dioo yuw fiεε fi kooy bô Jon, mum ley ê kekoɲ e lewse ye gen fô bonyii yaa nu ke. Geenεn ε bibombom bi bonyii le yuw, mum buy ê bilaante le len bô bikaε bi wvú le.

¹⁴ Ɛ wvú ke buy ê kekoɲ e dioo fεese ê ñkpwaante, yεn kebombom ke bonyii le nen ghemm. Ɛ shen koo wvú bô bó, ε wvú mum no fele bonyii bò to cemkene.

¹⁵Ɛ è ke dioo nu ekiεguu, ε boom bew bo ñgoo le bence gay ê wvú le, “Fεn nu ñkpwaante, ε diuu ε gen wase, gayε le bonyii ban egen bontεw e eguy mwεem mvubole mvudien.”

¹⁶Ɛ Jisos tfuse ê bó le, “Kε shieε nu dvú wvù bó enεnε ke. È nu enya ben fiεε é bó edie.”

¹⁷Ɛ bó tfuse ê wvú le, “Bese keɲke ke ε è nu bontuw bo blεed e botin bô byé yifiεε maan.”

¹⁸Ɛ wvú gay ê bó le, “Ben eto dvú enya ê me.”

¹⁹Ɛ bó to dvú, ε wvú fi, mum gay le kebombom ke bonyii le kedvu eshii fokuse yí egay e. Ɛ wvú jo bontuw bo blεed e bo botin ba bô byé yi yifiεε ye, taa we, nya keyoone ê Nyo', mum guushε bontuw bodvu nya ê boom bew bo ñgoo le, ε bó mum gawce ê kebombom kedvu.

²⁰ Ɛ bonyii bocii die ffuu. Ɛ boom bo Jisos e bo ñgoo le baance bimbeke bì to sheεtεε ε bí yiɲsen ñkáa yuufe ncow fiεε.

21 Bonyii bò to diee mwɛɛm mvudien mvudvu to nu bolemɛɛ diewɛ bontfuke botin e, ɛ sɛ jo bokɛnɛ bô boom.

Ɛ Jisos lan yî joo le

(Mak 6:45-52; Jon 6:15-21)

22 Ɛ Jisos mum gay ê boom bew bo ηgoo le le bó eley ê kekoη e esaa fwe kewvu keki é wen eshɛɛ egay kebombom ke bonyii le é kí ekfuuyi.

23 Ɛ wvú ke shɛɛ gay bó le, mum nɛ ben yî kum e wvú embeη keegen ebunle. Ɛ ekfuη ke jiim ɛ wvú nu ke fó wvú embeη.

24 Geenen è to nu kefew kedvu le, ɛ kekoη nu wase ê joo ncejole, ɛ joo kale kí, njefo fwefwe to too je fwe cile kí.

25 Ɛ è ke no nu wase en'yulem, ɛ Jisos nɛ no too fô bó le lenɛ yî joo le.

26 Ɛ boom bew bo ηgoo le dioo yɛn no wvú lenɛ yî joo le, ɛ kedvum gbwo bó. Ɛ bó no gayte le “È nu ηkfusay.” Ɛ bó mum no wamte foweɛwe bô nfan.

27 Kaη mwaan ɛ Jisos mum jeme ê bó le, “Ben ejice mvuntelem mvunen e, è nu me. Fo ben efanè ke.”

28 Ɛ Bita gay ê wvú le, “Tata é è fɛn nu wo, é wo gay ɛ me nlen ten yî joo le nto fô wo le.”

29 Ɛ Jisos gay ê wvú le, “È toò le.” Nonɛn ɛ Bita mum buy ê kekoη e no lenɛ yî joo le gene fô Jisos e.

30 No wvú to lenɛ gene, dioo yɛn no fwefwe gee, ɛ wvú mum no fane, mum kew no shiile ê joo. No wvú shiile mum bee le, “Tata fi me!”

31 Kaη mwaan ɛ Jisos lan kebo jice wvú le gay ê wvú le, “O oo, mbee wo doose baay! Wo be keηke kemaηen nje la?”

32 Ɛ bô wvú mum ben ley ê kekoη e, ɛ fwefwe wvudvu mum lu.

33 Ɛ boom bew bo ηgoo le bò to nu ê kekoη e mum nya n'wvum ê wvú gay le, “Kecɛɛy, wo nu Waa Nyo'.”

Ɛ Jisos fɛ bonyii bo bincɛm e Genɛsalet

(Mak 6:53-56)

34 Ɛ bó ke lente mamase buy keba kè Genɛsalet e.

35 Ɛ bonyii bo jó yɛn wvú le kiɛɛ wvú, mum ciinse ntum ê keba kedvu le kecii, ɛ bonyii no too bô bonyii bo bincɛm e bocii fô Jisos e,

36 leke le wvú ecine é bó ekum ke naa ɛ è nu ηgem ndvu ye le. Ɛ wee tfuu wvù to kumte, mum no bonene.

Mat 15

Ɛkumɛ nce woη bô diɛw Nyo'

(Mak 7:1-13)

- ¹Ɛ Bofalasii bô bonyii bomew bô to duŋci bonci bo Nyo' le ke mum ne Jelusalem to fô Jisos e bife ê wvú le,
- ² “È nu nje la wvù boom buw bo ŋgoo le beete bô nce woŋ bo'icee bosεεbeene bo fwele? Ke bó cuke can ê je yì nci gomte le se diekene ke.”
- ³Ɛ Jisos tfuse ê bó le, “È nu nje la wvù ben beete finen bô bonci bo Nyo' le bii ε è nu nce wene woŋ e?”
- ⁴ Me njemyi nen, njefo Nyo' to nu ε gay le, ‘Wvume ico bô bwoo.’ Bvuu gay ten le, ‘É wee nan lo ice kenεε bwee, é bó yu lo mweten.’
- ⁵Geenen, ben ε no gayte finen le, ‘É wee ne ε gay ê ice kenεε bwee le, “Fieε fi wo bee keekεŋke can yem e nu ε me ε nya wase ê Nyo',” tu ke è nulo é wvú ebvuu ejo fieε fidvu efi ice kenεε bwee dvú ke.’
- ⁶È neε no ben bii nce wene woŋ e nen mum gee ε diew Nyo' tuu fieε fi εcici.
- ⁷ Bonyii bô jemyi jεey gee jεey ban! Fieε fi wee ntum Nyo' wvù Yesaya to jemyεε ekumε ben nu naa lo keceey, no wvú to gayεε le,
- ⁸‘Bonyii ban wvumte me ke fomvu fomvu, ε mvuntelem mvubole nu ncejole fô me le.
- ⁹Bó bunlee me ε è nu ke εcici, njefo bó joo mwεem mvù è kpawaci bonyii yεeyi le è nu diew yem.”

Fieε fi nulo ebefe bô wee

(Mak 7:14-23)

- ¹⁰Ɛ Jisos ke ne tee kebombom ke bonyii le ε kí to. ε wvú gay ê kí le, “Ben eyeke eyuw, ekieε ntay.
- ¹¹ Ke fieε fi leyte ê wee εmvu nulo ebefe bô wvú ke. È nu fieε fi buyte lo ê wee εmvu fi nulo ebefe bô wvú.”
- ¹²Ɛ boom bo Jisos e bo ŋgoo le ke ne to gay ê wvú le, “Wo kee ke le Bofalasii be ε yuw fieε fi wo be jeme fieε fí ε gbwe bó?”
- ¹³Ɛ wvú tfuse ê bó le, “Kete kecii kè è nu se è yele Icem wvù nu fowe nu ε bó nu ke ebaa.
- ¹⁴ Ben edaaye ê bó le, è nu binfefe bì duŋci je ê bonyii. É kenfefe duŋci je ê kemew, é bó bocii ke egen egbweken ê kentuke le.”
- ¹⁵Ɛ Bitā gay ê Jisos le, “Ke yuuse ê bese fieε fi ŋgan we jemyi.”
- ¹⁶Ɛ Jisos bife le, “Ke ben ten kee mwεem e?”
- ¹⁷Ke ben kee le fieε ficii fi leyte ê wee εmvu booke ê shem ké ghan buy lo le?”
- ¹⁸Geenen, ε fieε fi buyte diuw wee le nen'yi ε è nu fô fitele le. ε è nu fifieε fi beete bô wee.

19 Fí ké nɛ ɛ è nu fô fitele le, ɛ wee sɛ no kɛŋke ŋkpawwɛ wvù befe, mum yu wee, jo kpwɛɛ wee kɛnɛɛ dwee wee, jaŋ kenjaŋ, coŋ bvucoŋ, ben jim nsaw mbiay kɛnɛɛ befe bô diee di wee le.

20 Mvun nu mwɛɛm mvù nulo ebefe bô wee. Kɛ keediekɛn bô can sɛ bó ɛ cuke nulo ebefe bô wee kɛ.”

Ɛ kpwoon mvu wvù to nu wee ketum lese fitele yí Jisos e

(Mak 7:24-30)

21 Ɛ Jisos ke nɛ fô lɛwse ye gen keba ke Taya bô Sidon e.

22 Ɛ fí kooy le kpwoon mvu wvu Kaanan wvù to nu jó to nu ɛ nɛ to yɛn Jisos e, bee fô wvù le le, “O Tata, waa Nfon Dawe, camɛ kɛ shen fô me le. Waa wɛm wvù kpwoon nu ɛ nceendaa dɛwle mvu njiŋsene naa lo bô wvù baay.”

23 Geenɛn ɛ Jisos yuw faŋɛ yaa ghay lo kɛ. Ɛ boom bew bo ŋgoo le bencɛ to lɛkɛ wvù gay le, “Gayɛ kɛ ê kpwoon wvun le wvù egenè. Wvù bii nyaa njɛɛɛ ɛ beene.”

24 Ɛ Jisos tfuse le, “Bó to tum me ɛ è nu fô bonyii bo Israeɛ e maan bô nu diɛwɛ njée yí nu ɛ nɛ wase ɛ no bvuyte lo le.”

25 Geenɛn ɛ kpwoon wvudvu to kɛ tum ɛnvuw ê Jisos ɛjise gay le, “Tata, fi kɛ me.”

26 Ɛ Jisos tfuse ê wvù le, “Kɛ fí nu lɛŋ keejo ŋgu boom elan fô bwé le kɛ.”

27 Ɛ kpwoon wvudvu gay le, “È nu kecɛɛy icɛm. Geenɛn naa bwé ké no bonyi kɛ tfúw yí icee bó dioo diekene ɛ yí no gbwekene.”

28 Ɛ Jisos mum tfuse ê wvù le, “O kpwoon wvun, mbee wo tɛmyi lo. Fí ekooy fô wo le no wo shieele.” Kɛ nonɛn ɛ waa we mum bonɛn lo.

Ɛ Jisos nyanɛ bonyii bontfuke bonɛw

29 Ɛ Jisos ke nɛ fô no gene, gen fey mbew Mamase yí Galilee le, ben gen yí kum e, shii fô.

30 Ɛ kebombom ke bonyii le ke baay to fô wvù le nɛn ghemm. Ɛ bomew to too bô bonyii bô nu bontɛŋɛ, noo bô kɛŋke bonfiaw ye le, noo bô nu binfefe, noo bô nu bincife, noo bomew bo bincɛm e nteen. No bó too bô bó, no jiwse ê wvù ɛjise ɛ wvù fele bó.

31 Ɛ kebombom kedvu no kɛŋke lo ŋghaw no bó to yɛne ɛ bincife jemyi, ɛ bonyii bô kɛŋke bonfiaw ye le bonene, ɛ bontɛŋɛ lɛne tɛn teyɛy, ɛ binfefe yɛne mwɛɛm e. Ɛ bó tum moŋkum mo Nyo' bonyii bo Israeɛ e.

(Mak 8:1-10)

32 Ɛ Jisos mum tee boom bew bo ŋgoo le gay ê bó le, “Me ŋkɛŋke shen fô kebombom kin e, njefo bó nu wase bee bó ɛdiuw ɛta, ɛ fiɛɛ fi bó edie yaa bvuu nu kɛ. Ɛ kɛ me ŋgomte le me encinɛ bó le é bó egene jɛŋ kɛ, njefo è nulo é bó egen egbwe jɛŋ ê je.”

33 Ɛ boom bew bo ηgoo le gay ê wvú le, “È nulo é beene ejo fεε mwεεm mvudien ηkpwaante jan mvù ekpwentεn keenyaηe kfuu kin kebombom ke bonyii le dvú?”

34 Ɛ Jisos bife ê bó le, “Ben keηke bontuw bo blεed e bomεε?” Ɛ bó tfuse le, “È nu bosoooshiwiy bô mvubyetεle nen caan.”

35 Ɛ Jisos mum gay le kebombom ke bonyii le kedvu eshii fokuse.

36 Ɛ bó shii, ε wvú jo bontuw bo blεed e bo bosoooshiwiy ba noo byé yidvu, nya keyoone ê Nyo', mum guushe nya ê boom bew bo ηgoo le, ε bó mum gawce ê bonyii bodvu.

37 Ɛ wee tfuu die, ffuu. Ɛ bó baance bimbεke bì to shεεtεε, ε bí yiηsen ηkáa yisooshiwiy.

38 Bonyii bô to dieε to nu bolemse bontfuke bonεw, ε se jo bokεne noo boom.

39 Ɛ wvú mum cine kebombom kedvu le ε kí no kfuuyi. Ɛ wvú ley ê kekoη e gen ê keba kè Magadan e.

Mat 16

Ɛ bonyii bomew no gomte le Jisos ege keηghaw ke fiεε le

(Mak 8:11-13; Luk 12:54-56)

1 Ɛ Bofalasii bô Bosadusii ke ne to fô Jisos e keemom wvú, mum gay le wvú ege fiεε fi duηci mvuηgay mvù ne fowe.

2 Ɛ Jisos gay ê bó le, “È ke dioo nu seke diuu seeyi ε εbule yεεle, ε ben no gayte le, ‘Ɛkfuη nu ebuy ejoη,’ njefo ben nu ε yen ε εbule yεεle.

3 Ɛ ke dioo nu seke diuu sane ε εbule yεεle ε kembεw ε suu, ε ben no gayte le, ‘Nffum nu ke efey εben,’ njefo ben nu ε yen ε εbule yεεle ε kembεw ε suu. Ben kee keetaa εbule mum kieε no ekfuη nu enu, geenεn yaa kee ke bonciise bô mwεεm mvù kooyi yî kefew kin e duηci nje la?

4 Ɛ ηgokε kè befe kè nu ε cine wase Nyo' le ε no nu diεwe kpwoon nsake le kin, gomte fiεε fi duηci mvuηgay mvù ne fowe. Kε è nulo é me enduηce fiεε ê kí efey fi wee ntum Nyo' wvù Jona le ke.” No wvú gay nonen mum cine bó le ne no gene.

Ɛ Jisos tefe boom bew le bó eyεnè εkumε gee di Bofalasii bô Bosadusii le

(Mak 8:14-21)

5 Ɛ boom bo Jisos e bo ηgoo le ke dioo fεse kewvu keki yen le bó be ε daaye keejo blεed.

6 Ɛ Jisos ke ne gay ê bó le, “Ben eyεnè, bvuu joo kefew yî fintuηλεεn fi Bofalasii noo fi Bosadusii le.”

7 Ɛ boom bew bo ηgoo le mum kew no jemyi εbonebon εkumε fiεε fidvu, gayte le, “Wvú jemyi fintuηλεεn fin nen njefo beene baa to bô blεed ke.”

8 Ɛ Jisos kɛɛ fiɛ fi bó jemyi ɛkumɛ fí mum gay lɛ, “O oo bonyii bo mbee wvù doose le ban! Ben jemyi ɛbeneben ɛ è nu ɛkumɛ blɛɛd wvù ben baa kɛŋke kɛ nje la?”

9 Ben baa yene wase mwɛɛm e le? Kɛ ben kumyi bontuw bo blɛɛd e bo botin bò bonyii se dieɛ bontfuke botin e? Bimbɛke bì ben se baance se nu ŋkáa yimieɛ?

10 Ɛ kɛ ben bvuu kumyi ten bontuw bo blɛɛd e bo bosooshwiw bò bonyii be die bontfuke bonɛw e? Ben be baanci bimbɛke bí ɛ buy ŋkáa yimieɛ?

11 È ge la wvù ben baa kɛɛ lɛ kɛ me njemyi ɛ è nu ɛkumɛ blɛɛd kɛ? Me mbvuu ŋgayte kɛ lɛ ben ejòð kefew ɛkumɛ fintuŋlɛɛn fi Bofalasii bô Bosadusii le.”

12 No wvù jeme nonɛn ɛ bó mum kɛɛ lɛ kɛ wvù jemyi lɛ bó ejoo kefew ɛ è nu ɛkumɛ fintuŋlɛɛn fi bó towte ê blɛɛd e kɛ, lɛ wvù jemyi ɛ è nu ɛkumɛ n'yɛɛyi wvu Bofalasii bô Bosadusii.

Ɛ Bitá cɛɛ lɛ Jisos nu Mboyse wvù Nyo' to kawɛɛ

(Mak 8:27-30; Luk 9:18-21)

13 Ɛ Jisos ke gen buy ê keba ke woŋ e kè Kaysalia Filibi le, ke nɛ bife ê boom bew bo ŋgoo le lɛ, “Bonyii duu lɛ wee wvù dieɛ nu Waawee nu yɛɛ?”

14 Ɛ bó tfuse ê wvù lɛ, “Bonyii bomew duu lɛ wo nu Jon Nlesesjoo, bomew le Elayja, ɛ bomew duu lɛ wo nu Yelimia kɛnɛɛ wee ntum Nyo' wvumvu.”

15 Ɛ wvù bife ê bó lɛ, “Ben duu finɛn lɛ me nu yɛɛ?”

16 Ɛ Semon Bitá tfuse lɛ, “Wo nu Mboyse wvù Nyo' to kawɛɛ wvù Waa Nyo', Nyo' wvù kɛŋke nshii.”

17 Ɛ Jisos tfuse ê wvù lɛ, “Semon waa Jona, Nyo' nu ɛ buw wo, njefo kɛ fin nu ɛ è seŋe wee wvu wum ê wo kɛ, è seŋe Icɛm wvù nu fowe ê wo.

18 Me ɛ no ŋgayte ê wo lɛ wo nu Bitá, ɛ è nu yí kɛmbaan kin e wvù me nu ŋke en'yoo kentaashe kem ke bonyii bo mbee le. Ɛ kɛ mvuŋgay mvu kpwe le nu ke eyuu eghaw kentaashe kedvu kɛ.

19 Me nu ŋke enya ken'yene ke bvunfon bvu fowe le ê wo. Fiɛɛ fi wo ɛ ke ɛ suu fokuse fɛn, tu bó nu ɛ suu wase fowe. Fiɛɛ fi wo ɛ ke ɛ fay fokuse fɛn, tu bó nu ɛ fay wase fowe.”

20 No Jisos gayɛɛ nonɛn, mum loocɛ ciise lo ê boom bew bo ŋgoo le lɛ bó eyene fo bó ke emom esee ê wee lɛ wen nu Mboyse wvù Nyo' to kawɛɛ kɛ.

Ɛ Jisos jeme ɛkumɛ kfuu kpwe yì wvù nu ke ekpwe

(Mak 8:31–9:1; Luk 9:22-27)

21 Ɛ kɛw yí kefew kekɛɛ le, ɛ Jisos mum kɛw no duŋci ê boom bew bo ŋgoo le lɛ wen kɛŋke kɛ keegen Jɛlusalɛm. Ɛ wen nu egen eyɛn bonɔɔw nteen can bonyii bò saake woŋ e bô bocee ncese bo baay baay noo bonyii bò duŋci bonci bo Nyo' le. Bó nu ke eyu wen, é ɛdiuw ebuy ɛta é wen ekase ebuy yí kpwe le.

²²ε Bita mum jo wvú ε bô wvú lewse ye. Ε wvú mum kew no saake wvú yî fiεε fidvu le, gayte le, “Tata, Nyo' elewseè. Ke fin fiεε nu ke eyuu ekooy bô wo ke.”

²³ε Jisos banke ye gay ê Bita le, “Ja ê me ejim Satan! Wo jewsee lo me njefo ke wo leeme ê keba ke Nyo' le ke. Wo leeme ε è nu ê ke wee wvu wum e.”

²⁴No Jisos jeme nonen, mum gay ê boom bew bo ηgoo le le, “É wee gomte keenu wee wem ηgoo, tu wvú keηke keetun ekole kew, etuu kentam kew ebii me le.

²⁵Ben ekeè le wee wvù bawci nshii we fo wvú elase nu ke elase ke lo. Geenεn ε wee wvù lase nshii we nje me nu ke ekeηke nshii.

²⁶É bó baanci naa woη wvun nen tfuu, ε nya ê wee wvú ε die, ε ke ε lase nshii we, é sεw wvudvu enu la? Nu le fiεε nu dvú fi è nulo é wee esum keyoy kew dvú le?

²⁷Ben ekeè le wee wvù diee nu Waawee nu ke eto bô bonceendaa bew ê bvukuke bvú Ice le, emum elaw wee tfuu yî fiεε fi wee nu ε ge le.

²⁸É me ensee ê ben keceey le bonyii bomew leeme fen bò yaa nu ke eyuw wvuη kpwe se bó ε yen no wee wvù diee nu Waawee too bô bvunfon bwew ke.”

Mat 17

ε Jisos duηce bvukuke bwew bvù wvú to keηke fowe

(Mak 9:2-13; Luk 9:28-36)

¹ε ediuw ke fey εsoocan, ε Jisos jo Bita bô Jem noo Jon wvù waa bwee Jem, ε bô bó ben yî kum wvumew e ε wvú defe εwe, no nu fó εbonebon.

²ε bó ke ne yen ε nfieesen ye ε kumen ê bó ejise, bvushiw bwew ε no baa lawkene diewe diuu le, ε ndvú ye baa ten lawkene nen mwawmwawmwaw.

³ε fí kooy le Muses bô Elayja to nu ε ne buynen fô bó le, no jemyi bô bo Jisos.

⁴ε Bita mum ne bvumten gay ê Jisos le, “Tata, fí jee no beene nu fen. É wo fen koonke lo é me en'yooy cún fen she, é yimi enu yo, yimi yi Muses, yimi yi Elayja.”

⁵Ke no wvú to bæε jemyi, ε fí kooy le kembew kè baa nen bvuuu to nu ε ne to ban bó, ε diew jeme ê kembew kedvu le le, “Wvun nu Waa wem, wvú nu fitele fiem. Me n'yuuke njoη bô wvú baay. Ben eyuukè ε è nu wvú le.”

⁶ε boom bew bo ηgoo le dioo yuw diew yidvu ε kedvum gbwo bó, ε bó gbweken tum monshim fokuse.

⁷Geenεn ε Jisos gen kum bó le gay le, “Ben eja we. Fo ben efanè ke.”

⁸ε bó dioo cake ejise we faηe yaa bvuu yen wee mvu le efey Jisos ke.

⁹ε bó ke ne yî kum wvudvu le dioo booke, ε Jisos lew ê bó le, “Fo ben ke esee fiεε fi ejise eyene be yen ê wee se wee wvù diee nu Waawee ε buy wase yî kpwe le ke.”

10 Ɛ boom bew bo ηgoo le bife ê wvú ƙε, “È nu nje la wvù bonyii bò dunçi bonci duu ƙε Ƙlayja ƙεηke keeke eyaw eto é Mboyse wvù Nyo' to kawεε sε to?”

11 Ɛ Jisos tfuse ƙε, “È nu keceey ƙε Ƙlayja ƙεηke keeyaw eto ekene mwεεm mvunciim.

12 Geenen é me ensee ê ben ƙε Ƙlayja nu ε to wase bó faηε yaa ƙiεε wvú ƙε, ε mum ε ge fiεε fi bó kooηke bô wvú. Ɛ è nu ƙε ƙεηke no wee wvù diee nu Waawee nu ƙε eyen ηgew can yibole.”

13 No wvú gay nonen, ε boom bew bo ηgoo le mum ƙiεε ƙε wvú jemyi ε è nu εkume Jon Nleseejoo.

Ɛ Jisos fε wan mvu wvù to gbwee ƙεηgbwe

(Mak 9:14-29; Luk 9:37-43a)

14 Ɛ Jisos bô boom bew bo ηgoo le ƙε bow fεse fô kebombom ƙε bonyii le to nu. Ɛ wee mvu nε to tum envuw ê Jisos fwe, gay ê wvú ƙε,

15 “Tata, came ƙε shen fô waa wεm e. Wvú gbwee ƙεηgbwe, yene ηgew baay. Wvù nen'yi gbwe fotaη, ƙé nε gbwe ê joo le.

16 Me mbe ε nto bô wvú fô boom buw bo ηgoo le bó ε mom ηkuuη keefe wvú.”

17 Ɛ Jisos gay ƙε, “O oo! Ƙηgokε ƙε εcici kè baa lese fitele yî Nyo' le kin. Me nu ηke enu beene eηgen embuy nεε? Me nu ηke eηkuu shém bô ben eηgen embuy nεε? Ben eto bô wan wvudvu fen enya ê me.”

18 Ɛ bó to dvú, ε Jisos wam nceendaa dεwle wvù to nu yî wan wvudvu le ε wvú buy, ε wvú mum bonen lo ƙaη mwaan.

19 Ɛ boom bo Jisos e bo ηgoo le ƙε nε gen fô wvú le ejim ejim, bife ê wvú ƙε, “È nu nje la wvù bese be mom ηkuuη keebvuse nceendaa dεwle wvudvu?”

20 Ɛ wvú tfuse ê bó ƙε, “È nu njefo mbee wene doose lo. É me ensee ê ben keceey ƙε, é ben be ƙεηke mbee ε wvú nu ƙε naa diεwε shem nsusu le, tu ben nulo egay ê kum wvun ƙε wvú emvuw ye fen egen eleem fofe, é wvú mvuwε, fiεε saa nu dvú fi nulo eghaw ben ƙε.

21 [Geenen, ƙε kfuu wvuwvun nceendaa dεwle nulo ebuy sε wee ε bunle ε she mbam mwεεm mvudien ƙε.]”

Ɛ Jisos bvuu jeme εkume kfuu kpwe yi wvú nu ƙε ekpwe

(Mak 9:30-32; Luk 9:43b-45)

22 No Jisos bô boom bew bo ηgoo le to taashεε Galilee, ε wvú gay ê bó ƙε, “Wee wvù diee nu Waawee nu ε bó nu ƙε enya wvú can bonyii le,

23 é bó eyu wvú, é ƙε edioo enu εdiuw εta, é wvú ebuy yî kpwe le.” Ɛ bó yuw nonen, ε ye keeshε bó baay.

Ɛkume shile wvu yew ncese

²⁴ E Jisos bô boom bew bo ηgoo le ke gen buy Kafana'um, ε bonyii bô to fii shile wvu yew ncese ke to yen Bita le sow ê wvú le, “Wee wene n'yεεyi ké no laaηke ke shile wvu yew ncese?”

²⁵ E wvú bee le, “Eε.” E Bita ke dīoo tu fô yew e, ε è yaw Jisos jike fiεε fidvu fokuse, bife ê wvú le, “Semon, wo yene fiuw le la? Bonfon bo fokuse fen ké no fii shile bô kensuw ε è nu ê baa? Bó ké no fii ê boom bo woη e, nuu ê botolo le?”

²⁶ E Bita tfuse le, “Bó ké no fii ε è nu ê botolo.” E Jisos gay ê wvú le, “Tu ke boom bo woη e yaa keηke keelaηke ke.

²⁷ Geenεn, wvu le fo bee wo eteensen mvuntelem mvu bonyii bodvu le, gene elan fincaw ê mamase le, bye yì wo ε yaw ε koo, ε wo yene diuw wvudvu, é wo eyen jise di bigew e jó, emum ebvuse egen enya ê bó keelaη shile wesebeewo dvú.”

Mat 18

Wee wvù kuuke ente jo bvunfon bvu fowe

(Mak 9:33-37; Luk 9:46-48)

¹ E è no nu ke kefew kedvu le, ε boom bo Jisos e bo ηgoo le to bife ê wvú le, “Wee wvù kuuke fele wee tfuu ê bvunfon bvu fowe le nu wvù la?”

² E Jisos mum tee wan caan leke ê bó enteleη,

³ gay le, “É me ensee ê ben keεεy le, é ben baa ekumen etu diewe boom bo caan caan e, tu ke ben nu ke eyuu eley naa lo bvunfon bvu fowe le ke.

⁴ Naa yεε wvù nu ε jo ekole kew caan ε no nu diewe wan wvun e, nu ε wvú nu wee wvù kuuke ente jo bvunfon bvu fowe.

⁵ É wee fiisene wan diewe wvun e ê diee diem e, tu wvú fiisene ε è nu me.

(Mak 9:42-48; Luk 17:1-2)

⁶ É è nu le wee ege é wee wvù nu ε lese fitele yî yem e diewe boom bo caan caan ban e ege kebefε, é fí ejee fô wvuwee wee le le bó esheηke kebwee ke diene le ê kendorη kew e, edomse wvú é wvú eshii egen ê joo yi baay e.

⁷ ηgew wvu baay nu fô bonyii bo yî woη wvun e. Mwεem mvù teeyi bonyii ε bó gee bibefe keηke ke keenu. Geenεn ε ηgew wvu baay nu fô wee wvù teeyi wee mvu ε wvú gee kebefε le.

⁸ É kebo kuw keεε ekale kuw gee ε wo gee kebefε, é wo sum kebo kedvu keεε ekale kedvu laη. Fí jee le wo ke eley nshii wvù mey lo le bô kebo keεε ekale keηkfuyte, efey keekeηke can yicii keεε bikaa bicii é bó ke ejo wo etfume ηguy wvù mey lo le.

⁹ É jise diuw gee ε wo gee kebefε, é wo min jise didvu laη. Fí jee le wo ke eley nshii wvù mey lo le bô jise dimwaan, efey keekeηke ejise ecii, é bó ke elan wo ηguy wvu baay e.”

Dgan ekumε njee yi to laε

(Luk 15:3-7)

10 “Ben eyenè fo ben ejòò mvu boom bo caan caan ban e ekuse ke. É me ensee ê ben le fowe nu ε bonceendaa bo Nyo' le bò shee bô bó ké no nu ke sekecii ejise jo Icem wvù nu fowe.

11 [É wee wvù diee nu Waawee to to keeboyse bonyii bò nu ε laken wase.]

12 Ben kpwaake le la? É wee kenke njée gbwee, yimiaaη ε la ente dvudvu, wvú saa eyaw ecine yi mbaη bvuuke ncow bvuuke le ê kum, egen egom njee yimiaaη yi la yidvu?

13 É me ensee ê ben keceey le, é wvú gom ε yen, é wvú eyuuke njoη bô njee yimiaaη yidvu fele yi mbaη bvuuke ncow bvuuke yi baa la ke.

14 È nu ke lenlen ten no Icen wvù nu fowe baa shieele le wee mwaan ηgoo boom bo caan caan ban e ela ke.

No è nulo é wee emance mwεem bô waa bwee

15 É waa bwoo ge fieε fi ε befε fô wo le, é wo gen yen wvú le duηce jay we ê wvú ke ben ε wvú bofεε. Wvú é yuw fieε fi wo jeme, tu wo ε kase wase ε kenke waa bwoo jim.

16 Wvú é no nu se wvú ε yuw fieε fi wo jeme, é wo jo wee mwaan kenεε bofεε ε ben ε bó kase gen fô wvú le, wvu le njeme wemen ekenke bonyii bofεε kenεε botete bò eben jim nsaw wvudvu.

17 Wvú é gen ε faη keeyuw fieε fi bó jemyi, é wo jo keseen gen dvú fô kentaashe ke bonyii bo mbee le. Wvú é faη keeyuw naa noo kentaashe ke bonyii bo mbee le, é wo jo wvú diewe wee wvù yaa kee ke Nyo' kenεε diewe wee wvù fii shile le.

18 É me ensee ê ben keceey le fieε fi ben ε ke ε suu fokuse fen, tu bó nu ε suu wase fowe, fieε fi ben ε ke ε fay fokuse fen, tu bó nu ε fay wase fowe.

19 Me ε mbvuu ε no ηgayte ê ben le, é bonyii bofεε ê ben ente beηe yí fieε le fokuse fen, ε lεke ê bunle le, é Icem wvù nu fowe ege fimweten fô bó le.

20 Ben ekeè le fô bonyii bofεε kenεε botete nu ε taashe ê diee diem e, nu ε me nu ê bó entelen.”

Dgan ekumε wee fioo wvù yaa koole ke shen

21 É Bitá mum bence bife ê Jisos le, “Tata, è nu bokaη bomεε bò waa bwεem gee mwεem mvù befε fô me le, é me enlεeshi ke lo? È nulo é ke egen ebuy bokaη bosoooshiy e?”

22 É Jisos tfuse ê wvú le, “Ke è nelo é me engay ê wo le è nelo enu ke bokaη bosoooshiy maan ke. È nelo enu mbaηsooshiy bokaη bosoooshiy.

- 23 È nɛɛ fiɛɛ fi bó nelo efewsɛn bvunfon bu fowe bô nfon mvu wvù to gomte keekpwaɲsɛn bô bonyii bew bo lemme le bô kpawaw we to nu can yibole.
- 24 No wvù to kɛwɛɛ keetaasse, ɛ bó to bô wee mvu ɛ ye fioo nu bikele bi bigew e bontfuke yuufe.
- 25 No kɛ è to nulo é wvù elaw, ɛ nfon wvudvu mum gay ɛ bó ejo wvù bô kpɛwɛɛ noo boom noo mwɛɛm mwew mvunciim egese eto bô bigew bidvu elaw fioo ye dvù.
- 26 No nfon gay nonɛn, ɛ wee wvudvu gbwe ê wvù ɛjise ku can ê wvù gay ɛ, 'Tata, kuu kɛ shém bee wo, me nu ɲke enlaw fiɛɛ ficii.'
- 27 ɛ shen ge ɛ cee ɛkolɛ we cinɛ wvù le daayɛ lo ê fioo yidvu le.
- 28 Geɛnɛn, ɛ wee wɛ kebɛɛ ke buy dioo gene, buynɛn yî wee mvu wvù bô bó lemte nfon e, ɛ wvù to kɛɲke wvù fioo ɛkelɛ ke bigew e kɛ kemwaaɲ. ɛ wvù mum jicɛ wvù yî sew e gay ɛ, 'Lawɛ fioo yo.'
- 29 ɛ wee lemme wvudvu mum gbwe tɛn ê wvù ɛjise, lɛkɛ wvù gay ɛ, 'Kuu kɛ shém bee wo, é me ɲke enlaw wo.'
- 30 ɛ wvù tun, jo wvù gen fen yew ncaw e ɛ wvù enù dvù egen ebuy no wvù ke elaw fioo ye.
- 31 ɛ bonyii bomew bô bô bó to lemte dioo yɛn fiɛɛ fi kooy le, ɛ fí ley bó baay. ɛ bó mum gen see fiɛɛ ficii fi be kooy ê nfon.
- 32 ɛ nfon tooy wvù ɛ wvù to, ɛ wvù gay ê wvù ɛ, 'Wo nu fiɛɛ fi ɛcici. Me mbe ɛ ndaayɛ ê yo fioo le yicii njefo wo be ɛ ku can ê me.
- 33 Kɛ è be nulo tɛn é wo ecam shen fô wee wvù ben ɛ bó lemte le no me mbe ɛ ncam tɛn fô wo le?'
- 34 ɛ nfon ton'ye shém, nya wvù ɛ bó efen yew ncaw e, enyɛwle bô wvù egen ebuy no wvù ke elaw fioo ye yicii.
- 35 Nonɛn, è nu kɛ lɛɲlɛɲ no Icɛm wvù nu fowe nu ke ege bô wee mwaan mwaan ben e, fɛn é wee baa elɛsɲɛ bô fitele fiew ficii fiɛɛ fi befe fi waa bwee nu ɛ ge fô wvù le."

Mat 19

N'ɣɛɣi ɛkumɛ keekun kpwoon

(Mak 10:1-12)

- 1 ɛ Jisos ke jeme mwɛɛm mvun mɛsɛ, mum nɛ ê keba ke woɲ e kè Galilee le gen ê kè Judea le Joo Joodan wvuke.
- 2 No wvù gen, ɛ kebombom ke bonyii le shfum bi wvù le, ɛ wvù fɛ bó bocii bô to cɛmkene jó.

(Mak 10:13-16; Luk 18:15-17)

³ Ɛ Bofalasii ke ne to fô wvú le keemom wvú, mum bife le, “Nci nu e bee le è nulo é wee ekuŋ kpwese yî fiεε le kenεε è nu naa fi la?”

⁴ Ɛ Jisos tfuse ê bó le, “Ben ke baa taŋ wase fiεε fi bó saŋ le, ‘Fonkew nu e wee wvù to bomεε bonyii to bom bó e bó no nu diemsen bô kpwoon’ e?”

⁵ Wvú to bom nonen mum gay le, ‘È nu nje fifin wvù diemsen nu ke ecine ice bô bwee le etaashe bô kpwese, é bó bofεε emum etu wase wee mwaan.’

⁶ Nonen, ke bó bee bonyii bofεε ke, bó nu wase wee mwaan. Fí e mum e no nu le, fiεε fi Nyo' nu e taashe wase, fo wee emom egawsen ke.”

⁷ Ɛ bonyii bodvu mum bife ê Jisos le, “È no nu nje la wvù Muses to gayεε le wee nulo esaŋ nwa' enya ê kpwese wvù duŋci le wen nu e kuŋ wase wvú, emum ekuŋ wvú?”

⁸ Ɛ Jisos tfuse le, “È to nu nje bikuu binen bi temyεen wvù Muses to cin'yεε le wee nulo ekuŋ kpwese. Geenεn, ke è nu no fí to nu fonkew ke.

⁹ Me e no ngayte fiem ê ben le, é wee ne e kuŋ kpwese e jo wvumvu, é è baa nu le kpwoon wvudvu nu e ne e no ghane gee nsake, tu wvú nu e ge kebefε ke diewe keejaŋ kpwoon mvu.”

¹⁰ Ɛ boom bo Jisos e bo ngoo le yuw fin gay ê wvú le, “É è fen nu no fí nu ekume diemsen bô kpwoon, é fí ejee le wee emey fiew nonen se wvú e taashe bvujen.”

¹¹ Ɛ Jisos gay ê bó le, “Ke è nu wee tfuu wvù nulo ebee fifin fiεε ke. È nulo ebee ke bonyii bô Nyo' nu e ge le bó ebee.

¹² Ben ekeè le bonyii bomew nu dvú e bó yaa ké no kenke shiee kpwoon ke, e è nu no bó to bokεε wase bó e bó nu. Ɛ bomew nu nonen e è ge bonyii bô can le bó enu nonen. Ɛ bomew nu fibole nonen e è ge bó bô bikuu bibole le bó enu nonen nje bvunfon bvu fowe. Wee wvù nulo ebee fifin e wvú bee.”

Ɛ Jisos laŋ kembonen yî boom bo caan caan e

¹³ Ɛ bonyii ke ne no too bô boom fô Jisos e le wvú ekum bó le, ebunle fô bó le, e boom bew bo ngoo le mum no saake lo bonyii bodvu.

¹⁴ Ɛ Jisos gay fiew le, “Ben ecine é boom bodvu etoo fô me le. Fo ben ejewsè bó ke, njefo bvunfon bvu fowe nu e è nu fô bonyii diewe boban e.”

¹⁵ No wvú gay nonen, mum gee can ye yî bó le mum ne no gene.

Jisos bô cee kpaw

(Mak 10:17-31; Luk 18:18-30)

¹⁶ Ɛ fí kooy le wee mvu to nu e ne to fô Jisos e, bife ê wvú le, “Wee N'yεεyi, fiεε fi jee fi me nkenke keenge nse nkenke nshii wvù mey lo nu la?”

17 Ɛ Jisos bife ê wvú le, “Wo biite ε è nu ê me ekumε fiεε fi jee nje la? Wee wvù jee mey ke mwaan. É wo gomte keeke eley nshii wvù mey lo le, é wo no gεelè bonci bo Nyo' le.”

18 Ɛ wee wvudvu bife ê Jisos le, “Bonci bo Nyo' le nu bò la?” Ɛ Jisos tfuse le, “Fo wo eyu wee, fo wo ejaη kpweε wee, fo wo ecoη bvucoη, fo wo eben jim nsaw mbiay,

19 è wvumtè ico bô bwoo, noo le, è kooηkè waa bwoo no wo kooηke ekole kuw.”

20 Ɛ cuwee wvudvu mum gay ê wvú le, “Bonci ban bocii nu ε me nse ηgεεle wase. È bvuu sheke la?”

21 Ɛ Jisos tfuse ê wvú le, “É wo fen gomte keenu wee wvù jee gene mεese, é wo gen gese mweem mvù wo keηke, gaw bigew bidvu ê bo kefufe le, é wo ke emum ekeηke ntfu ε è nu fowe. É wo dioo ε ge nonen emum eto ebii me le.”

22 Ɛ cuwee wvudvu yuw nonen, mum ne no gene nu lo shen shen, njefo wvù to keηke kpaw baay.

23 Ɛ Jisos mum gay ê boom bew bo ηgoo le le, “É me ensee ê ben keceey le fí nu ke etemyi fô wee kpaw e keeley bvunfon bvú fowe le.

24 É me embvuu ensee ê ben le, fí nu cekey fô nyambala le keeley ê jise di tase le fele fô wee kpaw e keeley bvunfon bvú Nyo' le.”

25 Ɛ boom bo Jisos e bo ηgoo le yuw fifin, ε diuw yum bó baay. Ɛ bó bife le, “É è fen nu nonen, é ke yuu eboy yεε?”

26 Ɛ Jisos taa bó nen, gay ê bó le, “É è nu fô wee wvu wum e, tu fí nulo eghaw. Geenεn ε fô Nyo' le nu ε ke fiεε yaa nulo eghaw wvú ke.”

27 Ɛ Bitá gay ê wvú le, “Taa eyen, bese nu ε cine wase fiεε ficii le ε no bii wo le. Bese nu ke ekeηke la?”

28 Ɛ Jisos gay ê bó le, “É me ensee ê ben keceey le seke wee wvù diee nu Waawee ε shii wase yí kawla we bvukuke le woη wvu fwε le, é ben ban bò se bii me le, eshii ten yí bokawla le yuufe ncow bofεε esaake dikfuu di Islael di yuufe ncow difεε.

29 Wee tfuu wvù nu ε cine la diew e, keηε boom bo bwee le, keηε jéme ye le, keηε ice le, keηε bwee le, keηε boom e, keηε ηεε le, ε wvú cin'yi nje yem, nu ke ekeηke bonyii bô mweem bokaη gbwee fele no wvù se keηke. Ɛ wvù nu ke ekeηke ten nshii wvù mey lo.

30 Geenεn, bonyii nteen bò nu fwe keseen nu ke enu ejim, é nteen bò nu ejim keseen enu fwe.”

Mat 20

Ɔgan ekumε wee wvù to joε bonyii bo lemme le lese wεne

- ¹ Ɛ Jisos bvuu gay ƙe, “Bvunfon bvu fowe nu diewe cee la mvu wvù to buyee ja fontaŋtaŋ gen keejo bonyii bo lemme le elese ê wvù wene.
- ² No wvù to genee yen bó le, ɛ bô bó mum kamen ƙe wvù nu ke elaw bó danali danali yî diuu le. Ɛ wvù mum ciinse bó ɛ bó gen no lemte ê wvù wene.
- ³ Ɛ è ke no nu diewe didiuu bvuuƙe le, ɛ wvù buy gen yen bomew bonyii le ɛ bó leeme fô way laame.
- ⁴ Ɛ wvù gay ê bó le, ‘Ben egen ten elemtè ê me wene, é me ŋke enlaw ben no bó ké no laake.’ Ɛ bó mum gen.
- ⁵ Ɛ wvù ke bvuu buy ke diewe emvunsheehen enteleh e, bvuu kase buy ke diewe didiuu ditete le, joo ke bonyii bo lemme le.
- ⁶ Ɛ è ke no nu diewe didiuu ditin e ekiegu, ɛ wvù bvuu buy gen yen bonyii bomew e ɛ bó leemene. Ɛ wvù bife ê bó le, ‘È nu nje la wvù ben to ɛ she leemene fen diuu dicile ecici?’
- ⁷ Ɛ bó tfuse le, ‘È nu njefo wee baa jo bese lemme le ke.’ Ɛ wvù mum gay ê bó le, ‘Ben egen le ten elemtè ê me wene.’
- ⁸ Ɛ è ke no nu ekiegu, ɛ cee wee mum to gay ê cee ekole bonyii bew bo lemme le le wvù etee bonyii bo lemme le, enya nlawma wvubo, keeke yî bonyii bò be to ejim e, egen emese yî bò be to fwe le.
- ⁹ Ɛ wvù mum kew no laake. Ɛ bonyii bò bó to joe bó yî lemme le didiuu ditin to ɛ wvù law bó danali danali.
- ¹⁰ Ɛ bonyii bò bó to yawee ejo ke dioo to mum no kpwaake le bó nu elaw bó efey bomew ba. Geenen, ɛ bó law ke ten bó danali danali.
- ¹¹ Ɛ bó fi nlawma wvubo mum kew no wvukene cee la we,
- ¹² gayte le, ‘Bonyii ban bò wo be jo ejim lem ke ntam kefew mwaan maan, geenen wo ɛ law bee bó leŋleŋ, ɛ bese nu bò be she ɛ ŋgvuse yî lemme le diuu dicile ɛ mvum sheyte yî yese le.’
- ¹³ Geenen ɛ cee wee wvudvu tfuse ê wee mvu bó le le, ‘Nsaa yem, ke me mbaa njay fiee bee wo ke. Bee wo be kamene ke lemme din yî danali le?’
- ¹⁴ Joo nlawma wo egenè. È koŋ me le me enlaw wee wvu ejim leŋleŋ diewe no me nlaw wo.
- ¹⁵ Ke me ŋkeŋke mvuŋgay keeŋge fiee fi me ŋkooŋke bô fiee fi è nu fiem e? Nu le wo bene kendoŋ njefo me nu ɛ n'yene can yem fô bonyii le le?”
- ¹⁶ No Jisos jeme nen, mum mese le, “È nu ke no bonyii bò nu ejim keseen nu ke enu bo fwe, ɛ bo fwe nu bo ejim.”

Ɛ Jisos bvuu jeme ekume kfuu kpwe yi wvù nu ke ekpwe

(Mak 10:32-34; Luk 18:31-34)

17 Ɛ Jisos ke no bene Jelusalem, ɛ bô boom bew bo ηgoo le bo yuufe ncow bofɛɛ buy ê je, ɛ wvú tee bó ɛ bô bó læwse ye, ɛ wvú gay ê bó læ,

18 “Ben eyekɛ eyuw, beene bene wase gene Jelusalem, ɛ bó nu egen enya wee wvù diee nu Waawee can bocee ncese bo baay baay noo bonyii bô duŋci bonci bo Nyo' le, é bó esaw wvú esumten læ bó eyu wvú,

19 emum enya wvú can bonyii bô yaa nu ke Bojuu le, é bó esɛwse wvú, tamte wvú bô bonɣbwan, emum eta wvú yî kentam e, é ke edioo enu ɛdiuw eta é Nyo' ekase ebvuse wvú yî kpwe le.”

Ɛ bwee Jon bô Jɛm lækɛ bintaw bi boom bew e ê Jisos

(Mak 10:35-45)

20 Ɛ bwee boom bo Sɛbedee le ke nɛ to fô Jisos e bô boom bew, tum envuw ê wvú ejise keelɛkɛ fiɛɛ.

21 Ɛ Jisos bife ê wvú læ “Wo be gomte læ la?” Ɛ wvú gay ê wvú læ, “Kawɛ læ è nu ke edioo enu seke wo saake wase bvunfon bwuw, é boom bem bo bofɛɛ ban eshii mbew yo le, wvumvu ê ebo kuw ke elemɛ læ, wvumvu ê ke ekɛnɛ le.”

22 Ɛ Jisos tfuse ê boom bodvu læ, “Kɛ ben kee fiɛɛ fi ben biite kɛ. È nulo é ben ke ewu fiko fi ηɣew e fi me nu ηke eη'wu?” Ɛ bó tfuse læ, “Bese nulo ke ewu.”

23 Ɛ wvú gay ê bó læ, “È nulo é ben ke ewu fiko fiem keɛɛy. Geenɛn keeshii ê ebo kem ke elemɛ bô ke ekɛnɛ le yaa nu bvudvuu bwem keenya ê ben kɛ. Mondvuum modvu nu ɛ è nu fô bonyii bô Icɛm nu ɛ seyse wase ɛ gɛɛ fô bó læ.”

24 Ɛ kebese ke boom bo ηgoo le bo Jisos e bo yuufe dioo yuw ekumɛ fiɛɛ fidvu, ɛ shém ton'ye bó bô boom bo bofɛɛ bodvu.

25 Geenɛn ɛ Jisos tee bó bocii, ɛ bó to ɛ wvú gay ê bó læ, “Kɛ ben kee læ bonyii bô saake bitum ké no shiile lo yî bonyii bobole, ɛ bonyii bo baay baay bobole duŋci mvuŋgay mvubole ê we jo bó?”

26 Kɛ fifiɛ keŋke keenu ê ben entelɛŋ kɛ. Wee wvù gomte keenu wee wvu baay ê ben entelɛŋ keŋke keenu wvù lemte lo ben e.

27 Wee é no gomte keenu wee wvu fwe ê ben entelɛŋ, tu wvú keŋke keenu nfwawene.

28 È nu ke læŋlɛŋ no kɛ wee wvù diee nu Waawee to to læ bonyii elemte lo wvú le kɛ. Wvú to to keelem lo fô bonyii le, enya nshii we keesum wee nteen yî kpwe le.”

Ɛ Jisos yene ejisɛ binfefe bifɛɛ

(Mak 10:46-52; Luk 18:35-43)

29 Ɛ Jisos bô boom bew bo ηgoo le ke gen dioo fele Jɛliku, ɛ kebombom ke bonyii le no shfumte ê wvú ejim.

30 Ɛ fí kooy Ɣ binfefe bimew bifee, Ɛ è nu bolemse bi to ké no shiile diuw je le, to nu Ɛ dioo yuw Ɣ Jisos fele lo, Ɛ bí mum no wamte gayte Ɣ, “Tata, Waa Nfon Dawe, came shen fô bese le.”

31 Ɛ kebombom ke bonyii le no wamene bó gayte Ɣ bó eban lo. Geen Ɛ bó bvuu wam gen lo fwe fwe Ɣ, “Tata, Waa Nfon Dawe came shen fô bese le.”

32 Ɛ Jisos mum leem, tee bó, Ɛ bó to, Ɛ wvú bife Ɣ, “Ben gomte Ɣ me enge la fô ben e?”

33 Ɛ bó tfuse Ɣ, “Tata, gee é ejise eyese eyene ye.”

34 Ɛ shen koo Jisos, Ɛ wvú kum ejise ebole. Kan mwaan Ɛ bó mum no yene mwem e, mum ne no bii Jisos e.

Mat 21

Ɛ Jisos ley Jelusalem diwe Nfon e

(Mak 11:1-11; Luk 19:28-40; Jon 12:12-19)

1 Ɛ Jisos bô boom bew bo ngoo le ke dioo fenene Jelusalem, Ɛ bó nu wase nte wvú Betfaj e yí Kum Bite bi Olif e, Ɛ wvú mum tum boom bew bo ngoo le bomew bofee,

2 gay ê bó Ɣ, “Ben egen nte wvu fwe we le. Ben nu dioo Ɛ gen, emum eyen lo bwee kembey e Ɛ bó Ɛ suu Ɛ waa we nu mbew ye le, é ben efay, eto dvú ê me.

3 é wee bife lo fie ê ben, é ben tfuse Ɣ Cee Ekole kenge shiee wvudvu, é wvú emum ecine lo kan mwaan é ben eto dvú.”

4 Fifi to kooy nonen keege é fí eto ekocen no wee ntum Nyo' mvu to jemye, gayte Ɣ,

5 “Wee egay ê kelaante kè Sayon Ɣ, ‘Ben etaa eyen, Nfon wene too ê ben e. Wvú nu Ɛ shike ekole kew, Ɛ ben yí kembey e, Ɛ è nu waa kembey, kembey Ɛ kí bee caan.”

6 Ɛ boom bo Jisos e bo ngoo le ba gen, ge ke no wvú to jemye.

7 Ɛ bó to bô kembey kedvu noo wan, yey bikum bibole yí dvú le, Ɛ Jisos ben shii yí kemew e, no gene.

8 Ɛ kebombom ke bonyii le nteen no yeyte ten bikum bibole ê je, Ɛ bomew faasshi tíew bite yeyte.

9 Ɛ kebombom kè to gene fwe dvu Jisos bô kè to bii ejim no wvuuyi Ɣ, “Eeee, mbense enù fô waa Nfon Dawe le leee! Nyo' nu Ɛ lan kembon yí wee wvú too ê diee di Tata le leee! Eeee, mbense enù fô Nyo' wvu fowe le leee!”

10 Ɛ Jisos ke gen fese Jelusalem, Ɛ kelaante kedvu keci shiw. Ɛ bonyii no ghayte, biite Ɣ, “Wvun se nu yee le?”

11 Ɛ kebombom tfuse le, “È nu wee ntum Nyo' wvù Jisos wvù ne ntew wvù Nasalet e, Galilee.”

Ɛ Jisos kuɲ bonyii ɛ bó kamene way fô yew ncese Nyo' le

(Mak 11:15-19; Luk 19:45-48; Jon 2:13-22)

12 Ɛ Jisos ke gen fô yew ncese Nyo' le, kuɲ bonyii bocii bò to geese bô bò to guyte mwɛɛm fô, baashɛ bidaɲ bi bonyii bò to kumene bigew e, bô bintaw bi bonyii bò to geese bibembɛ le.

13 Wvù to kuunke gayte le, “Fí nu ɛ bo ɛ saɲ ɛ Nyo' gayte le, ‘Bó nu ke eteɲe yew yem le yew bunle.’ Ben ɛ baɲke ɛ tu tfum bocooɲ.”

14 Ɛ Jisos no nu fô yew ncese le, ɛ binfeɛ bô bontɛɲe too ɛ wvù fele bó.

15 Geenɛn, ɛ bocee ncese bo baay baay bô bonyii bò to duɲci bonci bo Nyo' le ke dioo yen biɲghaw bi mwɛɛm e bi wvù to gee, bô no boom bo caan caan wvuuyi fô yew ncese le, gayte le, “Eeeee, mbense enù fô waa Nfon Dawe le leɛɛ,” ɛ fí no ton'yi lo bó.

16 Ɛ bó mum waa lo Jisos le, “Kɛ wo yuuke fiɛɛ fi boom ban gayte le?” Ɛ wvù tfuse ê bó le, “Ɛɛ, me n'yuuke lo. Fí nu le ben ke baa taɲ wase fiɛɛ fi bó saɲ le, ‘Nyo' nu ɛ ge mbense wvù jee gene mɛɛɛ ɛ no buyte dew boom bo caan caan e, noo dew boom bò bæ yamte emben e?”

17 Ɛ Jisos ke ne cine bó le, buy ê kelaante kedvu le, gen ntew wvù Betani le, ce jó.

Ɛ Jisos low kete kemew

(Mak 11:12-14, 20-24)

18 Ɛ è ke no nu entaɲentaɲ, no Jisos to kaase tuu jim ɛlaante, ɛ jeɲ no yuu wvù.

19 Ɛ wvù yen kete kemew e mbew je le ɛ bó ké no diee, mum gen fô, geenɛn faɲe yaa yen fiɛɛ le yí dvù le kɛ, yen kɛ ɛ è nu bibɛ yí dvù le maan. Ɛ wvù mum low kete kedvu gay le, “Fo fintam bæ ke ebvuu eyuu eyum lo yí yo le kɛ!” Kaɲ mwaan, ɛ kete kedvu mum yowlɛn lo.

20 Ɛ boom bo ɲgoo le bo Jisos e dioo yen nonɛn, ɛ diuw yum bó. Ɛ bó no ghayte le, “Kete kedvu ghan nɛɛ ɛ se yowlɛn lo kaɲ mwaan nɛn?”

21 Ɛ Jisos tfuse ê bó le, “É me ensee ê ben kecɛɛy le, é ben lese fitele yí Nyo' le, yaa keɲke naa lo kemaɲen kɛ, ben saa ge kɛ ɛ è nu fiɛɛ fi me ɲge bô kete kin maan kɛ. Ben é cim ɛ gay ê kum wvun le, ‘Mvuwe ye fɛn egen egbwe ê joo yi baay e,’ é fí ekooy nonɛn.

22 Ɛ naa la fi ben bunlee lɛke, nu ɛ ben nu ke ekeɲke fɛn é ben nu ɛ lese fitele yí Nyo' le.”

Ɛ bó bife fô mvuɲgay mvu Jisos e nɛ

(Mak 11:27-33; Luk 20:1-8)

23 Ɛ Jisos ke bvuu kase ley fô yew ncese le, ɛ bocee ncese bo baay baay bô bonyii bô saake wonɔ Bojuu ke to yen no wvú yɛɛyi bonyii, mum bife ê wvú le, “Wo jo fɛɛ mvunɔgay ɛ sɛ no gee mwɛɛm mvun? Ê nya yɛɛ mvunɔgay mvudvu ê wo?”

24 Ɛ Jisos tfuse ê bó le, “Me tɛn nu embife fiɛɛ ê ben. Ê ben tfuse lo, é me emum ensee ê ben wee wvù nya mvunɔgay le me enɔgeè mwɛɛm mvun.

25 Jon to leese bonyii ê joo ɛ mvunɔgay mvudvu nɛ fɛɛ? Ê to nya Nyo', nuu wee wvu wum ɛ?” No wvú bife nonɛn, ɛ bó no keɔene ɛbonɛbon gayte le, “Ê beene tfuse le è to nya Nyo', é wvú ebife ê beene le laa ɛ è ge la fo beene ebee Jon e le?”

26 Geenɛn, ɛ è yaa nulo é beene etfuse le, ‘Ê to nya wee wvu wum,’ ke, njefo beene fane kebombom ke bonyii le, no bó bocii nu ɛ bee le Jon to nu wee ntum Nyo'.”

27 Nonɛn, ɛ bó mum tfuse ê Jisos le, “Kɛ bese kee ke.” Ɛ Jisos mum gay ê bó le, “Tu kɛ me nu ensee tɛn ê ben wee wvù nya mvunɔgay ê me le me enɔgeè mwɛɛm mvun kɛ.”

Ɖgan ɛkumɛ boom bolemɛ bofɛɛ

28 Ɛ Jisos gen fwe bife le, “Ben kpwaake le la ɛkumɛ fin? Wee mvu to keɔke boom bolemɛ bofɛɛ. Ɛ wvú ke nɛ gen fô wan wvu fwe le, gay ê wvú le, ‘Waa wɛm, gene eshe elemtè wene ɛben.’

29 Ɛ wvú tfuse le, ‘Kɛ me nu enɔgen kɛ.’ Geenɛn ke nɛ kase kumɛn fitele fiew mum gen wene dvudvu.

30 Ɛ wee wvudvu gen fô wvu ɛjim e gay ke fiɛɛ fi wvú be gay wase ê wvu fwe. Ɛ wvú tfuse ê wvú le, ‘Me nu enɔgen icɛm.’ Geenɛn, faɔe yaa gen kɛ.

31 Tu entelɛɔ jo boom bo bofɛɛ ban, nu ɛ wvù to gee fiɛɛ fi ice shieele nu wvù la?” Ɛ bó tfuse le, “Ê nu wvu fwe.” Ɛ Jisos mum gay ê bó le, “Ê me ensee ê ben keɛɛy le, bonyii bô fii shile noo bokɛnɛ bo nsake le nu ɛ bó leyte wase bvunfon bvuu Nyo' le fwe ê ben e.

32 Me njemyi nɛn njefo Jon Nleseɛjoo to nu ɛ to keeduɔɔe je yi teytey ê ben, ɛ ben faɔe yaa bee wvú le kɛ, geenɛn ɛ bonyii bô fii shile bô bokɛnɛ bo nsake le bee wvú le. Ɛ ben ke dɔoo cim yen no bó beɔe nonɛn, faɔe yaa ekumen mvuntelem mvunɛn ebee tɛn wvú le kɛ.”

Ɖgan ɛkumɛ bonyii bô wee to tɛsɛɛ wɛɛ ê bó

(Mak 12:1-12; Luk 20:9-19)

33 Ɛ Jisos bvuu jeme le, “Ben ebvuu eyuw ɔgan mvu. Wee mvu to nu ɛ lem wɛɛ mvuntam mvù bó keenci mbvuum dvú, gem bô ketaaɔ kɛkɛɛ, cim fò bó nu ke ekoyte mvuntam mvudvu some ɛ mbvuum buyte, tum ketaale ke wee nɛy e wene dvudvu, mum tɛsɛ wɛɛ wvudvu ê bonyii, mum nɛ gen ketum kemew e.

34 Ɛ kefew kè bó ké no koyte mvuntam mvudvu ke to kocɛn, ɛ wvú tum bonyii bew bo lemme le fô bonyii bô wvú to tɛsɛɛ wɛɛ ê bó le, le bó egen efi mwuwene mvuntam.

- 35 Ɛ bó ɣɛn, ɛ bonyii bò wvú to tɛsɛ wɛɛ wvudvu ê bó koo bó, sun mvu, yu mvu, tumyɛ mvu bô ɛta.
- 36 Ɛ wvú bvuu tum bomew bonyii bo lemme le ɛ bó duule fele bo fwe ba, ɛ bonyii ba bvuu ge kɛ lɛɲlɛɲ no bó ɣɛɛ bô bo fwe ba.
- 37 Ɛjim jodvu ɛ wvú tum wase ɛ è nu waa we, kpwaake lɛ bó nu eɣɛn ewvum waa wen wvun.
- 38 Ɛgeenɛn, ɛ wvú ɣɛn, ɛ bonyii bodvu dɔo yɛn wvú le, jeme ɛbonebon lɛ, 'Wvun nu ndiela wee wɛɛ wvun. Ben eto é beene eyu wvú emum eyow bvushɛw bvudvu.'
- 39 Ɛ bó mum koo wvú bvuse wɛne, mum yu."
- 40 No Jisos fɛ nɛn, mum bife lɛ, "Wee wɛɛ wvudvu nu ke edɔo ɛ to ege nɛɛ bô bonyii bodvu?"
- 41 Ɛ bó tfuse lɛ, "Wvú nu ke eto elɛse lo mvunyaame mvudvu, etɛse wɛɛ wvudvu ê bonyii bomew bò nu ke enyaa mwew mvuntam seke ɲkoy e."
- 42 Ɛ Jisos bife ê bó lɛ, "Ben ke baa taɲ wase ê Nwa' Nyo' le lɛ, 'Tɛ didvu diɛ di bonyii bo kembom e to tunɛɛ, to nu ɛ kase nɛ tu tɛ di buu di yew e. Ɛ fifin nu ɛ è ge kɛ Tata, bonyii ɛ no taale kɛɲke ɲghaw' e?"
- 43 Me ɛ mum ɛ no nseɲɛ ê ben lɛ, Nyo' nu ke efi bvunfon bwew can yene le, enya ɛ è nu ê ketum kè nu ke egee no wvú gomte le."
- 44 ["Tɛ didvu din nu é wee gbwe yî dvú le, ecaafɛ lo, é dí gbwe yî wee le, efoonce lo mwɛtɛn."]
- 45 No Jisos ma ɲɲan wvun nɛn, ɛ bocee ncese bo baay baay noo Bofalasii dɔo yuw, mum kiɛɛ lɛ wvú ma ɛ è nu ɛkumɛ bowen.
- 46 Ɛ bó mum no gomte keekoo wvú, geenɛn, kase fan kebombom ke bonyii le, njefo kebombom kedvu to kɛɲke Jisos lɛ è nu naa wee ntum Nyo'.

Mat 22

Ɔɲan ɛkumɛ ɲkaw bvujɛn

(Luk 14:15-24)

- 1 Ɛ Jisos bvuu no jemyi ê bó ê boɲɲan e, ɛ wvumvu no nu lɛ,
- 2 "Bvunfon bvɛ fowe nu ɛ è nulo é bó efewsɛn bô nfon mvu wvù to seysɛɛ ɲkaw bvujɛn bvɛ waa we wvù diemsɛn e.
- 3 Ɛ wvú ke tum bonceendaa bew lɛ bó eɣɛn etooy bonyii bò wvú to beɛ bó bô ɲkaw bvujɛn wvudvu lɛ bó etoò. Ɛgeenɛn, ɛ bonceendaa bodvu ɣɛn ɛ bonyii bodvu faɲɛ yaa to kɛ.
- 4 Ɛ wvú tum bomew bonceendaa ɲay ê bó lɛ, 'Ben eɣɛn ejeme ê bonyii bò me nse mbee bô ɲkaw bvujɛn wvun lɛ bó eyekɛ eyuw, me nu ɛ nseyse wase mwɛɛm

mvudien, ε ηgbwo binson bi nyám e bô boom bo bona' le bô fanken. Me nu ε nseyse wase mwεem mvunciim, le bó etoò le fô ηkaw e.'

⁵Geenen, ε bó gen ε bonyii bodvu case lo, ne fibole no gene. E wee mvu laa wene dvu wvú, ε wee mvu laa way we.

⁶E kebese ke bonyii le kooye bonceendaa bodvu nyewle bô bó, mum yuwye bó.

⁷E fitele bente nfon wvudvu, ε wvú ciinse bonyii bew bo jem e, ε bó gen lese lo bonyii bô yuwye bonceendaa bew, mum ton kelaante kebole.

⁸No wvú ge nonen, mum gay ê bonceendaa bew bomew le, 'Me nu ε nseyse wase ηkaw bvujen. Geenen bonyii bô me nse mbee ba se baa nu naa lo bonyii ke.

⁹Ben egen ntašen jé le yicii, ebe bonyii bocii bô ben ε yen, le bó eto fô ηkaw bvujen wvun e.'

¹⁰E bonceendaa bodvu mum buy gen jé le yicii, kum bonyii bocii bô bó to yeneε, bonyii bô jee bô bô befe to dvú. E yew bvujen mum yiηsen bô bonyii.

¹¹E nfon ke ne ley yew bvujen yidvu le keeyen bonyii bô to toε fô ηkaw e, mum yen wee mvu le dvú ε wvú baa jise ndvú ηkaw bvujen ke.

¹²E wvú bife ê wvú le, 'Nsaa yem, wo ghan neε ε se ley dvun se ndvú ηkaw?' E wee wvudvu mey diuw tfu.

¹³Nonen, ε nfon mum gay ê bonceendaa bew le, 'Ben ekay can ye noo bikaa, etfume wvú ê ejiwε le ekfuη, jò bonyii nu ke ebeele ηgeci bigew.'"

¹⁴No Jisos jeme nonen, mum gay le, "Ben ekeè le Nyo' nu ε be bonyii nteen, geenen ε caw ke caan."

ε bó tele Jisos ekume shile wvú lanžen

(Mak 12:13-17; Luk 20:20-26)

¹⁵E Bofalasii mum ne gen seyse no bó nu ege é Jisos se lowsen njeme é bó ekoo wvú.

¹⁶E bó mum tum boom bobole bo ηgoo le noo ηgoo bonyii bo Nfon 'Elod e fô Jisos e. E bó gen jeme ê wvú le, "Wee n'yεeyi bese kee naa le wo nu wee keceey, ε wo yεeyi bonyii bô je yì yi Nyo' ê je yi keceey e. Ke wo ké no joo le wee mvu nu jεey ke, njefo ke wo taale laa mweten nu naa la le.

¹⁷Ke see ê bese wo ηkpwawce. Nci nu ε bee le beene elaanke shile ê Kaysa, nuu fo bó elaanke le?"

¹⁸E Jisos kieε fieε fi bó wεentene bô fí, mum gay ê bó le, "Ben bonyii bô jemyi jεey, gee jεey ban, ben teeyi me nje la?"

¹⁹Ben eto bô bigew bì ben ké no laanke shile dvú é me en'yen." E bó to bô danali, nya ê wvú.

20 Ɛ Jisos bife ê bó le, “Ɛkolɛ kin kè nu yî dvú le nu ke yɛɛ le? Ɛ diee nu di yɛɛ le?”

21 Ɛ bó tfuse le, “È nu ke Kaysa le, ɛ diee nu ke ten diew.” Ɛ wvú mum gay ê bó le, “Ben emum enyaà le ê Kaysa fiɛ fi è nu fi Kaysa le, nyaà ê Nyo' fi è nu fi Nyo' le.”

22 Ɛ bó yuw nonɛn, ɛ diuw yum lo bó. Ɛ bó mum cinɛ wvú le nɛ no gene.

Ɛ bó tele Jisos ɛkumɛ mbuy wvu yî kpwe le

(Mak 12:18-27; Luk 20:27-40)

23 Kɛ ɛbvubwɛ, ɛ Bosadusii nɛ to fô Jisos e. Bosadusii nu ŋgoo bonyii bò to ké no duu le kɛ bonyii nu ke ebuy yî kpwe le kɛ. No bó toɛ, mum bife ê Jisos le,

24 “Wee n'yɛɛyi, Muses to nu ɛ gay le, ‘É wee kpwe lo sɛ wan, tu waa bwee kɛŋke keegɛ kpweɛ é bô wvú eboo boom ê diee di ŋkfu waa bwee wvudvu le.’

25 Keseen, boom bo wee mvu le to cee bee bó jan bosooshwiɣ. Ɛ wvu ŋgaywee ke jo kpwoon, ke ghan kpwe ɛ bô wvú baa kɛŋke wan kɛ, cinɛ kpweɛ le ê ejimɛ kew.

26 Ɛ fí kooy kɛ nonɛn bô ejimɛ kew noo ejimɛ ke wvuwe le, gen buy yî wvu bosooshwiɣ e.

27 Ɛjim jodvu, ɛ kpwoon wvudvu ten kpwe.

28 Nonɛn keseen no bó bocii bosooshwiɣ to nu ɛ jo kpwoon wvudvu, è nu ke edioo enu seke bonyii buyte yî kpwe le, é kpwoon wvudvu enu kpweɛ yɛɛ?”

29 Ɛ Jisos tfuse ê bó le, “Ben nu ɛ jay baay, ɛ è nu njefo kɛ ben kee fiɛ fi bó saŋ ê Nwa' Nyo' le kɛ. Ɛ ben yaa kee ten mvuŋgay mvu Nyo' le kɛ.

30 Ben ekeè le è nu ke enu seke bonyii buyte yî kpwe le, kɛ bolemɛ bô bokɛnɛ bɛɛ ke ebvuu etaashi bvujen kɛ, ɛ bonyii yaa bɛɛ ke ebvuu enyaa boom ɛ bó taashi bvujen kɛ. Bó nu ke enu wase kɛ diɛwɛ bonceendaa bo Nyo' le fowe.

31 È dioo nu fi ɛkumɛ mbuy wvù bonyii nu ke ebuy yî kpwe le, ben ke baa taŋ wase Nwa' Nyo' yuw fiɛ fi wvú jemyi ê ben e? Nyo' to nu ɛ gay le,

32 ‘È nu me Nyo' Aba'am bô Nyo' Aysik noo Nyo' Yakow.’ Fí nu le kɛ Nyo' nu Nyo' boŋkfu kɛ, è nu Nyo' bonyii bò nu dvú.”

33 Ɛ kebombom kè to leeme fó yuw ntfuse wvù Jisos nya, ɛ diuw yum lo bó bô n'yɛɛyi we.

Nci wvù fele bonci bocii

(Mak 12:28-34; Luk 10:25-28)

34 Ɛ Bofalasii ke dioo yuw le Jisos nu ɛ baŋ lo diuw Bosadusii, ɛ bó mum baance ye to fô wvú le.

35 Ɛ wee mvu bó le wvù to looci kee bonci bo Nyo' le, mum tele wvú bô mbife mvu le,

36 “Wee n'yɛɛyi, nci wvù kuuke fele bonci bocii nu wvù la?”

37 Ɛ Jisos tfuse ê wvú le, “Nci wvù kuuke nu wvù gayte le, ‘È kooṅkè Tata wvù Nyo' wo bô fitele fiuw ficii, enya ekole kuw ê wvù kecii, egeε bvufee bwuw yî ye le bvucii.’

38 Wvuwvun nu nci wvu fwe wvù kuuke fele bonci bocii.

39 Ɛ wvù bii wvú le nu ke diewe wvuwe le. Ɛ wvú nu le, ‘È kooṅkè waa bwoo no wo kooṅke ekole kuw.’

40 Mwεem mvunciim mvù nu ê Nwa' bonci le, noo mvù nu ê Bonwa' bo bonyii bo ntum Nyo' le, leeme ε è nu yî bonci bo bofεε ban e.”

Mboyse wvù Nyo' to kawεε nu waa yeε?

(Mak 12:35-37; Luk 20:41-44)

41 No Bofalasii to nu ε bó taashe fó, ε Jisos mum ne bife mbife mvu ê bó le,

42 “Ben kpwaake le la ekume Mboyse wvù Nyo' to kawεε? Ben kpwaake le è nu waa yeε?” Ɛ bó tfuse ê wvú le, “È nu waa Nfon Dawe.”

43 Ɛ Jisos kase bife ê bó le, “No è nu waa Nfon Dawe, ε fí ghan neε ε Keyoy ke Yuule se ge ε Dawe no teṅe wvú le Tata wen? Dawe to nu ε jeme le,

44 ‘Tata Nyo' to nu ε gay ê Tata wem le wvú eshii ê ebo kew ke εceey e, egen ebuy seke wen ke ejike bonyii bew bo bvuban e é wvú etome bikaa biew yî bó le.’

45 É Dawe fen teṅe wvú le Tata wen, é wvú ebvuu eghan neε se no nu waa we?”

46 No Jisos jeme nen, ε wee faṅe yaa nu dvú mwaan wvù etfuse fiεε ê wvú ke. Ɛ kew ten ebvubwe le, ε wee faṅe yaa ke ebvuu emom lo ebife fiεε ê wvú ke.

Mat 23

Ɛ Jisos ceεye kenyi ke bonyii bò duṅci bonci noo ke Bofalasii le

(Mak 12:38-39; Luk 11:43, 46; 20:45-46)

1 Ɛ Jisos mum ne jeme ê kebombom ke bonyii le bô boom bew bo ṅgoo le le,

2 “Bonyii bò duṅci bonci bô Bofalasii nu bonyii bò nu ε jo kentaw ke Muses e.

3 Fí ε mum ε no nu le, ben eyuukè fiεε ficii fi bó seṅe ê ben, mum geè. Geenεn, fo ben egeè fiεε fi bó gee ke, njefo bó fewci jεey, gee jεey.

4 Bó nen'yi yile bvujite ε bvú fele mvuṅgay mvu bonyii le yike bonyii dvú, ε è yaa nu naa lo é bó keβεε emom keelaw ke naa lo kpwan ebo keefice bó ke.

5 Mwεem mvù bó gee mvunciim nu ke keege le bonyii eyenè bó le. Mvunṅkuw mvubole mvu Nwa' Nyo' le nu naa mvù kukene. Ɛ mvunjεεṅken mvu ṅgem ndvú yibo le nu naa mvù dewkene.

6 Bó ké gene fô ṅkaw e no kooṅke keeshii ke ε è nu fô bonyii ewvumte bó, ké gen yéw bunle le no kooṅke ke keeshii ε è nu yî bintaw bi fwe le.

⁷Bó ké no koonke ten keelene ê way ε bonyii gayte bó le, bvuu koonke le bonyii etenè bó le Bolabay.

⁸Geenen, fo wee ebenè ε bonyii teje wvú le Labay ke, njefo ben kenke Wee N'yeyi ke mwaan maan, ε ben bocii nu boom bo bwee wan e.

⁹Fo ben etenè wee mvu yí nshε le fen le è nu icee wene ke, njefo ben kenke Icee wene mwaan wvù nu fowe.

¹⁰Fo wee ebenè ε bó teje wvú le Cee Ekole ke, njefo Cee Ekole wene nu ke mwaan wvù è nu Klistu.

¹¹Wee wvu baay ê ben entelen kenke keenu wee wvù lemte lo ben e.

¹²Naa yεε wvù bensee ekole kew, nu ε Nyo' nu ke eshike lo wvú, ε naa yεε wvù shiwse ekole kew, nu ε Nyo' nu ke ebense lo wvú.

ε Jisos tooshe bonyii bò duñci bonci bô Bofalasii

(Mak 12:40; Luk 11:39-42, 44, 52; 20:47)

¹³Ngew wvu baay nu wene ben bonyii bò duñci bonci noo ben Bofalasii. Ben nu bonyii bò jemyi jεεy, gee jεεy! Ben leeme ejise jo bonyii banji je yì leyte bvunfon bvú fowe le. Ke ben koonke keeley bvú le ke, ε bvuu ε no baanke je fo bonyii bò koonke keeley e.

[¹⁴Ngew wvu baay nu wene ben bonyii bò duñci bonci noo ben Bofalasii. Ben looci shiwse lo boka' bo bonkfu le, gee dibunle di dewkene keeduunke ye. Ben ekeè le wene ηgew nu ke efo lo.]

¹⁵Ngew wvu baay nu wene ben bonyii bò duñci bonci noo ben Bofalasii. Ben nu bonyii bò jemyi jεεy, gee jεεy! Ben nen'yi len won tfuu bvuu lente jóo yi baay baay ke le ben gomte wee mwaan wvù ebanke etu wee wene mbee. É wvú ké tu wase wee wene mbee, ε ben kase ge ε fiew mese fo lo, ε wvú no nu wase wee ηguy wvu baay ke diεwε ben e.

¹⁶Ngew wvu baay nu wene. Ben nu binfefe duu le ben duñci je ê bonyii! Ben nu bonyii bò duu le, 'É wee jeme fiεε, ε kan diee di yew ncese le, tu ke è nu fiεε ke. Geenen, é wee jeme fiεε ε kan ε è nu diee di ketwaa ke bigew e kè yεεle ke yew ncese le, tu wvú kenke keege no wvú jeme ε kan.'

¹⁷Binfefe bin! Ben nu biyuj! Fiεε fi kuuke fele fimew nu fi la? È baay kuuke ketwaa ke bigew e kè yεεle, nuu yew ncese yì gee ε ketwaa kedvu se nu fiεε fi è nu fi Nyo' le le?

¹⁸Ben jemyi ten le, 'É wee jeme fiεε ε kan diee di ketan ke ncese le, tu ke è nu fiεε ke. Geenen, é wee jeme fiεε ε kan ε è nu diee di fiεε fi wee nya ncese dvú, tu wvú kenke keege no wvú jeme ε kan.'

¹⁹Binfefe bin! Fiεε fi kuuke fele fimew nu fi la? È baay nnya yidvu kuuke, nuu ketan ke ncese le kè gee ε nnya yidvu se nu fiεε fi è nu fi Nyo' le le?

20 Fiεε fi nu, nu le é wee kan diee di ketaη ke ncese le, tu wvú kan nonen ε kan noo mwεem mvunciim mvu yî dvú le.

21 É wee kan diee di yew ncese le, tu wvú kan nonen ε kan noo Nyo' wvù cee dvú.

22 É wee kan woη wvu we, tu wvú kan ε è nu kawla Nyo' noo wvú wvù Nyo' wvù shiile yî dvú le.

23 Ngew wvu baay nu wene ben bonyii bò duηci bonci noo ben Bofalasii. Ben nu bonyii bò jemyi jεey, gee jεey! Ben ké no nyaa keba kemwaan ê Nyo' ente jo biba yuufe bi mbáse yicii yî ben keeke naa noo mwεem jεey jεey mvù ben keeke gεele ê mbáse le le yí eshumte, geenen laaηke fiεε fi jite fi nci jemyi ekumε fí le ben egeè, fi è nu keegeε mwεem leη fô bonyii le, camte shen fô bonyii le noo keeese fitele yî Nyo' le. Ben be keηke keegeè mwεem mvudvu mvunciim yaa cin'yi fimew e κε.

24 Binfeεe bì duηci je ê bonyii! Ben kuηyi yeεguu bvuuεe ê mbvuum e, geenen kaa mii nyam yi baay eshem!

25 Ngew wvu baay nu wene ben bonyii bò duηci bonci noo ben Bofalasii. Ben nu bonyii bò jemyi jεey, gee jεey! Ben cuke mvuηkom bô shúw ye le, geenen ε mwεem mvù nu ε yiηsen jó nu mvù ben loci ê bonyii noo mvù ben yeεle εjise dvú.

26 Binfeεe bi Bofalasii le, ben eyaw ecuke mvuηkom bô shúw ente, wvu le mvú emum eyuule ten ye le.

27 Ngew wvu baay nu wene ben bonyii bò duηci bonci noo ben Bofalasii. Ben nu bonyii bò jemyi jεey, gee jεey! Ben nu diεwε jém yî bó nu ε seyse ε yefe yí ε no baa yen'yi εjise jee, geenen ε ente jodvu nu ε jó ε yiηsen bô bikufe bi biηkpwe bi bonyii le noo mwεem mvunciim mvu nyene.

28 È nu κε leηleη no ben yen'yi εjise le ben nu bonyii bo teytey, geenen ε ente nu ε ben ε yiηsen bô kenleεma noo gee di befe.

(Luk 11:47-51)

29 Ngew wvu baay nu wene ben bonyii bò duηci bonci noo ben Bofalasii. Ben nu bonyii bò jemyi jεey, gee jεey! Ben bomte jém bonyii bo ntum Nyo' le, feele ten jém bonyii bò to keηke nce wvu teytey seyse ε yí jee.

30 Ben gee nonen gayte le, 'É bese to bee nu wase dvú kefew ke bo'iceε bosεε le, tu bese to baa leem fisεε fô fiεε fi bó to gee keeyuwyi bonyii bo ntum Nyo' le κε.'

31 Ben jemyi nonen, jemyi ε è nu ekumε bikuu binen mum tomte bô dew yene le ben nu naa boom bo bonyii bò to yuwyeε bonyii bo ntum Nyo' le.

32 Ben emum egeη lo fwe emεεε lemme di bo'iceε bonen to κεwεε!

33 Yó yin! Eηgokε ke yó le kin! Ben kpwaake le ben nu ke enu sε bó ε lese ben ηguy wvu baay e?

³⁴ No fí nu nonen, me ε mum ε no ntumte bonyii bo ntum Nyo' le fô ben e noo bonyii bo bvufee le bô bonyii bô duŋci bonci. Ben nu ke eyuwye bomew, etawye bomew yî bintam e, etam bomew yéw yene bunle le, ebone bikaa ê bomew ejim bilaante bicii bì bó gene bí le.

³⁵ Ben nu ke egeè nonen wvu le ελεμε ke bonyii bocii bô to cee nce wvu teyey yî nshε le bô bó yuwye enù fô ben εfa. Ελεμε kin nu ke enù fô ben εfa ε κew yî ke Abel wvù bó yue σε wvù κηηke jay e, ε to ε buy yî ke Sakalia wvù waa Belekaya wvù ben to yue entelej jo yew ncese bô ketaη ke ncese le.

³⁶ Έ me ensee ê ben keceey λε, lon mwεem mvun mvunciim nu ke ekoo εηγοκε ke keseen kin.”

ε Jisos bεm bonyii bo Jelusalεm

(Luk 13:34-35)

³⁷ No Jisos jeme nen, mum bεm λε, “εβεey Jelusalεm! εβεey Jelusalεm! Wo wvù yuwyi bonyii bo ntum Nyo' le, bvuu tumyi bonyii bô Nyo' tumte fô wo le bô εta! Έ nu wase bokaη bomεε no me mom keembaance boom buw ke diewe no bweeshie ké baance boom bew kfuke ê bibe biew e, wo ε faη?

³⁸ Taa eyen, bó nu ε laη wase yew yo, ε yí nu etu binffuy.

³⁹ Me nseηe lo ê wo λε ke wo bεε ke ebvuu eyen me le κε, egen ebuy kefew kè wo ke egay λε, ‘Nyo' nu ε laη kembonen yî wee wvù too ê diee di Tata Nyo' le.”

Mat 24

ε Jisos see λε bó nu ke ebvuw yew ncese

(Mak 13:1-2; Luk 21:5-6)

¹ ε Jisos ke buy yew ncese le, ke dioo gene, ε boom bew bo ηgoo le bence to mbew ye le no duŋci yéw yi fô yew ncese le ê wvù.

² Geenεn, ε Jisos jeme ê bó λε, “Ben yene yéw yin e? Έ me ensee ê ben keceey λε ke te dimwaan nu ke eshεε yî dimew e σε bó ε base fokuse κε.”

(Mak 13:3-13; Luk 21:7-19)

³ ε Jisos ke dioo gen ben shii yî Kum Bite bi Olif e, ε boom bew bo ηgoo le bence to εbonεbon fô wvù le bife λε, “Ke see ê bese kefew kè fiεε fidvu fin nu ke ekooy, noo nciise wvù nu ke eduηce kefew kè wo nu ke ekase eto noo λε woη kaa wase?”

⁴ ε Jisos tfuse ê bó λε, “Ben eyenè fo wee ke elεε ben é ben ejay je.

⁵ Ben ekeè le bonyii nteen nu ke etoo joo diee diem tεεke fojise, ε wee duu λε è nu wen wvù Mboyse wvù Nyo' to kawεε. Έ bó dioo gee nonen emum elεεle bonyii nteen ε bó jayte je.

⁶ Ben nu ke eyuuke λε bó tumte jem, bvuu yuuke ten bosaaka λε jem nu enu. Fo ben ke dioo eyuuke nonen, ε finteem no buyte ben κε. Mvumvun nu mwεem mvù κηηke keeke ekooy. Geenεn ε mvù yaa mum duŋci λε woη kaa wase κε.

- 7 Ketum nu ke etumte jem bô kemew, ε nfon mvu tumte jem bô wvumvu. Jen nu ke ekoole, ε nshe shiike mondvuum e mondvuum e.
- 8ε mvumvun mvunciim bæε ke lo mvun'yaŋ ke diewe seke kpwoon ε kew lume.
- 9 Bonyii nu ke enya ben é bó enyewle bô ben, eyuwye ben. Bitum bicii nu ke ebane ben nje diee diem.
- 10 Nonen é bonyii nteen emum etfuw bikaa ê me ejim, banene, geese bikuu bibole.
- 11 Ε bonyii nteen bô mbiayte le è tum Nyo' bó nu ke ebuynen emum elæle bonyii nteen.
- 12 No kebefε nu ke eduule ke gene lo fwe, nu ε fí nu ke ege é keŋkoŋen ke bonyii le nteen emum ewεε.
- 13 Geenεn, wee wvù nu ke ekuu shém egen ebuy fokemεse nu wvù nu ke eboy.
- 14 Ε bó keŋke ke keeke efewce saaka wvù jee wvun wvu ekumε bvunfon bvυ Nyo' le egen ebuy yî ekole ke nshe le kecii é bitum bicii eyuw, nonen é woŋ se keeke eka.

N'yεεyi ekumε keŋew wvu baay e

(Mak 13:14-23; Luk 21:20-24)

- 15 Nonen seke ben ε yen ε kemaante ke fiεε le kè nulo ejiŋ bvudvuu kè wee ntum Nyo' wvù Dania to jemyεε ekumε kí, ε kí leeme wase yew ncese le, (wee wvù taanke ŋwa' wvun eyuw fin ntay,)
- 16ε bonyii bô nu Judea mum fεε ben yî dikum e.
- 17 Fo wee wvù nu ê yew we dioo ε shii bvuu ley keejo fiεε fi nu yew ke.
- 18Fo wvù nu wene ebvuu ekfulε le wen egen ejo ndvu ye yi bulεen ke.
- 19Ŋgεw wvu baay εdiuw yoya le nu ke enu wvu bokεne bô nu bô difue, noo bô yamsee boom e.
- 20Ben ebunleè le fo kenlewte kin ke enu ε è nu kefew ke nffum e, keŋεε diuu di mbam e ke,
- 21 njefo ŋgεw wvu baay nu ke enu kefew kekie le, ε kfuu wvuwe ŋgεw ke baa yuu nu wase ε kew no woŋ to kewεε ε to ε buy keseen e, ε ke kfuu wvuwe bæε ke ebvuu eyuu enu dvú ke.
- 22É Nyo' to baa fafe εdiuw ε ŋgεw wvudvu, tu ke wee wvu wum mwaan bee ke eboy ke. Geenεn Nyo' nu ε fafe εdiuw yodvu nje bonyii bew bô wvú nu ε caw.
- 23 È nu ke edioo enu sekekíε wee é jeme ê ben le, 'Ben etaa eyen, Mboyse wvù Nyo' to kawεε wvun fen!' Keŋεε le, 'Wvuwe fofe!' Fo ben ebee ke.
- 24 Ben ekeè le bonyii nu ke etoo mbiayte le bowen nu bomboyse bô Nyo' to kawεε, ε bomew duu le bowen nu bonyii bo ntum Nyo' le, emum egee mwεεm

mvù tɛmyi mvù duŋci mvuŋgay mvubole, egee ten mwɛɛm mvu diuw wvù yumɛɛn e wvu lɛ bó elɛɛ bonyii é bó ejay je, lɛɛ naa noo bonyii bò Nyo' nu ɛ caw, fɛn é je nu dvú.

²⁵Ben eyekɛ eyuw, me nu ɛ nsee wase mwɛɛm mvun ê ben é mvú sɛ keeke ekooyi.

²⁶Nonɛn, é bonyii nɛ ɛ no gayte ê ben lɛ, 'Ben etaa eyɛn, Mboyse wvù Nyo' to kawɛɛ wɛ ŋkpwaante,' fo ben egeɛn jó kɛ. Kɛnɛɛ lɛ, 'Ben etaa eyɛn, wvuwe yew ente,' fo ben ebee bó lɛ kɛ.

²⁷Ben ekeè lɛ no jaɛn ké lawte wɛ ê keba ke diuu sane lɛ, ba geɛn buy jò diuu seeyi, nu kɛ lɛɛɛɛn no nto wee wvù diee nu Waawee nu ke enu.

²⁸'Naa fɛɛ fò kɛɛkpwe ke fiɛɛ lɛ nu, nu kɛ fò fò boɛguluɛ nu etaashi.'

Ɛkumɛ no Jisos nu ke eto

(Mak 13:24-27; Luk 21:25-28)

²⁹Kaɛn mwaan seke kefew ke ŋgɛw wvu baay wvun e ɛ to wase ɛ fey, é diuu nɛ esɛsɛ ejimɛ, kpwee saa ebvuu ebaa kɛ, é jón enɛ fowe egbwɛkɛn, é mwɛɛm mvu fowe mvunciim mvù kɛɛke mvuŋgay eshiike.

³⁰É nciise wee wvù diee nu Waawee emum ebuynɛn yí ɛbulɛ lɛ. É bitum bicii bi yí nshɛ lɛ emum ekɛw effule lo bó kpwe. Bonyii nu ke eyɛn no wee wvù diee nu Waawee shiile too ê kembɛw e fowe bó mvuŋgay noo bvukukɛ bvɛ baay.

³¹Soɛn yi baay nu ke edioo ɛ jeme fowɛɛwɛ, é wvú emum eciinse bonceendaa bew é bó egeɛn ɛbuw ɛ woɛn yo ɛna lɛ noo fowe, ebaance bonyii bew bò wvú nu ɛ caw.

(Mak 13:28-31; Luk 21:29-33)

³²Ben eyɛɛyi fiɛɛ yí kɛɛgvum e. Tíɛw ye ké boci, é bibɛ ekɛw etɛɛke yí dvú lɛ, é ben mum kiɛɛ lɛ ekfuɛn kumene wase.

³³È nu kɛ lɛɛɛɛn no ben nu ke edioo ɛ yeɛn mwɛɛm mvun e mvunciim, é ben emum ekieɛ lɛ wvú nu wase nceencee naa wase é yew fwese.

³⁴É me ensee ê ben keceɛy lɛ kɛ ɛɛgokɛ ke keseen kin nu ke eka sɛ mwɛɛm mvun mvunciim ɛ kooy wase kɛ.

³⁵ɛbulɛ bó nshɛ nu ke eka, geenɛn kɛ diɛw yeɛn nu ke eyuu eshiw kɛ.

Kɛ wee nu dvú wvù kee diuu di Jisos nu ke eto kɛ

(Mak 13:32-37; Luk 17:26-30, 34-36)

³⁶Kɛ wee nu dvú wvù kee diuu didvu kɛnɛɛ kefew kɛ. Kɛ naa bonceendaa bo Nyo' lɛ bo fowe kɛnɛɛ Waa Nyo' kee ten kɛ. È kee kɛ Nyo' Ice wvú embeɛn.

³⁷Kɛ lɛɛɛɛn no fí to nu kefew ke Noa' lɛ nu kɛ no fí nu ke enu seke wee wvù diee nu Waawee kaase too.

38 È to nu ε joo baa yiηsen wase yî ekole ke nshε le, ε bonyii nu fibole diekene bvuu wukene, ε bokene bô bolemse taashi bvujen, ε bonyii nyaa boom ε bolemse taashi bvujen bô bó, ke gen buy diuu di Noa' to leyεε ê ηguw e,

39 ε bonyii bodvu yaa kee fiεε fi nu ekooy ke, gen buy seke joo to yiηsenεε yî nshε le, kuu bó bocii gen dvú. È nu ke ληληη no fí nu ke enu diuu di wee wvù diee nu Waawee nu ke eto le.

40 Bolemse bofεε nu ke enu wene, é bó ejo mwaan é mwaan eshεε.

41 ε bokene bofεε nu ke egooke bvulem fodien, é bó ejo mwaan é mwaan eshεε.

42 Nonen, ben emum ecεytè njefo ke ben kee diuu di Tata wene nu ke eto ke.

43 Ben ekeè λε é cee yew kee kefew kè cooη nu ke eto εntaη, é wvú ecεyte, wvú saa ke ecine é bó eto ηηgoy yew ye ke.

44 Fí ε mum ε no nu λε, ben ten keηke keecεytè njefo wee wvù diee nu Waawee nu ke eto ê kefew kè ben yaa kee ke le.

N'yeεyi ekume waa lemme wvu kecεεy noo wvù yaa nu ke wvu kecεεy

(Luk 12:41-48)

45 Waa lemme wvù nu wvu kecεεy bvuu keηke bvufee nu wvù la? Ke è nu wvuwe wvù cee ekole we nu ε gee wvú λε wvú etaalè fô yew ye le, λε kefew ke edioo ε kocen, ε wvú nya mwεem mvudien mvu boom bo lemme le ê bó le?

46 Njoη wvu baay nu ke enu wvu waa lemme wvuwe wvù cee ekole we nu ke edioo etoo eyen ε wvú gee lemme ληληη no wvú bee keegee.

47 É me ensee ê ben kecεεy λε cee ekole we nu ke ebense wvú é wvú etaale fô mwεem mwew e mvunciim.

48 Geenεn é waa lemme wvudvu ne ε no nu wvù keηke keηge kè befe, ε jeme ê ekole kew λε, 'Ke cee ekole wem nu ke eyaηsen ekase eto ke',

49 ε mum ε kew ε no suuηke boom bo lemme le bomew bô bó lemte, diekene bvuu wukene bô bonyii bô wuwte mbvuum,

50 tu cee ekole we nu ke ene esεε ebuyneη diuu dimew di wvú yaa be kpwaake le noo ê kefew kè wvú yaa be kee le ke.

51 Wvú nu ke edioo ε buyneη nonen, emum enya ηgew ê waa lemme wvudvu, eciinse wvú é wvú egeη enu ηgoo bonyii bô jemyi jεεy, gee jεεy e, ε è nu fó fò bonyii nu ke ebeele ηgeci bigew."

Mat 25

Ŋgan ekume ηgón bokene bomew yuufe

1 "È nulo é bó emum efewsεη bvunfon bvυ fowe bô ηgón bokene bomew yuufe bô to joε bin'yeese bibole, buy keegeη efiisen cee bvujen mvu.

- ²Bó to nu nonen ε bo botin nu biyuη, ε bo botin feefene.
- ³Fì nu le bò to nu biyuη to dioo jo bin'yeese bibole faηe yaa jo mεem momew ke,
- ⁴geenen ε bò to feefene jo bibole bin'yeese jo mεem momew mbew yî dvú le.
- ⁵Ε bó gen no ceyte cee bvujen wvudvu, ε wvú no dvuyte keeto, ε nyii mum ne no yεεke bó, ε bó mum lefe.
- ⁶Ε è ke no nu entaη enteleη, ε bó ne yuw ε wee wvule le, 'Eeeee, ben etaa eyen, cee bvujen wvun εεε! Ben ebuy eto efiisen wvú læε.'
- ⁷Ε ηγόν bokene ba bocii mum ja we bense bin'yeese bibole.
- ⁸Ε ηγόν bokene bò to nu biyuη ba gay ê bò to feefene ba le, 'Ben enya ke bese bô mεem monen momew. Bin'yeese bisese shiile wa lo.'
- ⁹Geenen ε bò to feefene ba tfuse le, 'Κε è nelo é mó ekocen fô beene le bocii ke. Ben egen ε è nu fô bonyii bò geese le, eguy monen.'
- ¹⁰No bó to gene keeguy, ε cee bvujen mum shεε fεse. Ε ba bò to nu ε seyse wase ye ε no ceyte, mum gen ley bô wvú yew ηkaw bvujen e, ε bó mum faa kembuη.
- ¹¹Εjim jodvu ε ηγόν bokene bomew ba bò to genεε keeguy mεem fεse, leem ê yew fwese no gayte le, 'Cee ekole, cee ekole, yene kembuη é bese eley.'
- ¹²Geenen, ε wvú tfuse ê bó le, 'É me ensee ê ben keceey le ke me ηkee ben ke.'
- ¹³Fí ε mum ε no nu le, ben eseyse ye, eceytè, njefo ke ben yaa kee diuu kenεε kefew kè me nu ηke ηkase nto ke.

Ngan ekumε boom bo lemme le botεte

(Luk 19:11-27)

- ¹⁴Kefew kedvu nu ε fí nu ke enu diewe wee mvu wvù to nu keegen ghane, tee boom bew bo lemme le gεε kpawaw we can yibole.
- ¹⁵Wvú to nu ε nya mvu waa lemme bikele bi bigew e bitin, nya mvu bikele bifεε, nya mvu ekεle ke bigew e kemwaan. Wvú to nyaa ke bii no mvuηgay mvu wee le nu. No wvú nyae nonen, mum laa ghane diew.
- ¹⁶Ε waa lemme wvù to fie bikele bi bigew e bitin mum gen lo kaη mwaan ge way dvú, die sεw bikele bitin.
- ¹⁷Ε wvù to fie bikele bifεε ge ten way, die sεw bikele bifεε.
- ¹⁸Geenen, ε waa lemme wvù to fie ekεle kemwaan we, gen fiew cim fokuse nyile bigew bi cee ekole we le bidvu fó.
- ¹⁹Ε cee ekole boom bo lemme le bodvu ke laa ghane die, gen ce jó baay. Ε wvú ke dioo kase to, mum tee boom bew bo lemme le le bô bó ekpwanηsen mwεem.

²⁰Ɛ waa lemme wvù to fiε bikele bi bigew e bitin mum to wase bô bikele yuufe, gay le, ‘Cee ekole, wo to nya me bikele bi bigew e bitin, taa eyen me nu ε nshεε ε ηγε way dvú, ε ηκηηκε bimew bikele bitin ê we jodvu.’

²¹Ɛ cee ekole we gay ê wvú le, ‘Keyoone baay. Wo nu waa lemme wvù jee bvuu nu wvu kecεεy! Wo se nu ε shεε ε kieε keetaa fô fiεε fi caan e ntay. Nonen, me nu enγεε wo keseen é wo etaale wase ε è nu fô fi baay e. Leye le ente jo bvujonke bu cee ekole wo le.’

²²Ɛ waa lemme wvù biew bigew to nu bikele bifεε to ten, gay le, ‘Cee ekole, wo to nya me bikele bi bigew e bifεε. Taa eyen, me nu ε nshεε ε ηγε way dvú, ε ηκηηκε bimew bikele bi bigew e bifεε ê we jodvu.’

²³Ɛ cee ekole we gay ê wvú le, ‘Keyoone baay. Wo nu waa lemme wvù jee bvuu nu wvu kecεεy! Wo se nu ε shεε ε kieε keetaa fô fiεε fi caan e. Nonen, me nu enγεε wo keseen é wo etaale wase ε è nu fô fi baay e. Leye le ente jo bvujonke bu cee ekole wo le.’

²⁴Ɛ waa lemme wvumvu we wvù to fiε ekele ke bigew e kemwaan to ten, gay le, ‘Cee ekole, me ηkee le wo nu wee wvù temyi ejim. Wo ké no gbweci ε wo baa jewe ke, baanci εγιη ε wo baa le ke.

²⁵Nonen me nse ε mum ε nfan ε ηγεν ε nyile bigew biuw fokuse. Taa eyen, bigew biuw bin, jicε.’

²⁶Ɛ cee ekole we tfuse ê wvú le, ‘Wo nu waa lemme wvù befe, nu kenkpwen! Wo se kee le me ηké no ηgbweci ε me mbaa njewe ke, mbaanci εγιη ε mbaa nle ke.

²⁷No wo se kee nonen, tu wo se bee egεε bigew biem ntfu wvu le seke me ε ηkase enfi bigew biem bidvu bô sεw ê we jodvu.’

²⁸No wvú gay nonen, mum gay le bó efi ekele ke bigew e kedvu ê wvú, enya ê wvù kenke bikele bi bigew e yuufe.

²⁹Le bó ekeè le wee wvù kenke nu ε bó nu ke ebise é wvú ekenke nteen. Geenε ε wee wvù baa kenke, nu ε naa fi caan fi wvú kenke nu ε bó nu ke efi lo ê wvú.

³⁰No wvú gay nonen mum gay le, ‘Ben etfume kenεε ke waa lemme le kin ê ejiiwe le ekfuη, fô bonyii nu ke ebeele ηgeci bigew.’

N'γεγi εκumε nsaw wvu fokemεse

³¹È nu ke edioo enu kefew kè wee wvù diee nu Waawee kaase too ê bvukuke bwew e, ε wvú too bô bonceendaa bo Nyo' le bocii, é wvú emum eshii yî kawla we bvukuke le.

³²Bitum bicii bi yî ekole ke nshε le nu ke ebaance ê wvú fwe, é wvú emum egaw bó diεwe no wee ncey ké gaw njée bvuse ê bίε tewe le.

³³Wvú nu ke egεε njée εbo εcεεy, γεε bίε tewe εbo ηηkonko.

³⁴Wvú wvù Nfon nu ke emum egay ê ba bò nu εbo εεεy le, 'Bonyii bò Icem nu ε laη kembonen yî bó le, ben eto ekeηke bvudvuu ente jo bvunfon bvù wvú to seyseε fô ben e ε kew no bó to bomεε woη,

³⁵ηjefo jeη to yuu me, ε ben nya me bô mwεem mvudien. Kendoη to yumte me, ε ben nya me bô fiεε ε me η'wu. Me nto nu tolo, ε ben fiisen me.

³⁶Me nto nu kenyi kencimte, ε ben jise ndvu yî yem e. Me nto ncεmte ε ben to gay me le. Me nto nu yew ncaw e, ε ben to gay me le.'

³⁷Wvú nu ke edioo ε gay nonen, é bonyii bo teytey bodvu emum ebife ê wvú le, 'Tata, è nu seke la wvù bese to yενεε wo le ε jeη yuu wo, ε bese nya mwεem mvudien ê wo, kenεε seke la wvù kendoη to yumte wo ε bese nya fiεε ε wo wu?

³⁸È nu seke la wvù bese to yενεε wo le ε wo nu tolo, ε bese fiisen wo, kenεε kenyi kencimte, ε bese jise ndvu yî yo le?

³⁹È nu seke la wvù bese to yενεε wo le ε wo cεmte kenεε nu yew ncaw e, ε bese to gay wo le?'

⁴⁰Nfon nu ke emum etfuse ê bó le, 'É me ensee ê ben keεεy le no ben to gee mwεem mvun, ke naa fô wee wvu caan boom bo bwεem e ban e, nu ε ben to ge ε è nu fô me le.'

⁴¹Nonen, wvú nu ke emum egay ê ba bò nu εbo ηηkoηko le, 'Ben bò lon nu ε koo, ben enε lo ê me εjise, egeη eley ηguy wvù mey lo wvù bó to seyseε fô dεwle bô bonceendaa bew e,

⁴²ηjefo jeη to yuu me, ε ben faηe yaa enya me bô fiεε fidien ke. Kendoη to yumte me, ε ben faηe yaa enya me bô fiεε é me η'wu ke.

⁴³Me nto nu tolo, ε ben faηe yaa efiisen me ke. Me nto nu kenyi kencimte, ε ben faηe yaa ejise ndvu yî yem e ke. Me nto ncεmte, mbvuu no nu yew ncaw e, ε ben faηe yaa eto egay me le ke.'

⁴⁴Bó ten nu ke emum bife ê wvú le, 'Tata, è nu seke la wvù bese to yενεε wo le ε jeη yuu wo, kenεε ε kendoη yumte wo, kenεε ε wo nu tolo, kenεε kenyi kencimte, kenεε cεmte, kenεε yew ncaw e, ε bese faηe yaa efi wo ke?'

⁴⁵Wvú nu ke emum etfuse ê bó le, 'É me ensee ê ben keεεy le, no ben to baa ege mwεem mvun, ke naa fô wee wvu caan boom bo bwεem e ban e, nu ε ben to baa ege ε è nu fô me le ke.'

⁴⁶Boba bonyii nu ke emum egeη eley ηgew wvù mey lo le. Geenεn, é ba bò nu teytey egeη eley fibole ε è nu nshii wvù mey lo le."

Mat 26

Ε bó kaa mvunanη ê Jisos ejim
(Mak 14:1-2; Luk 22:1-2; Jon 11:45-53)

- ¹ E Jisos ke jeme mwεem mvun mvunciim mεse, gay ê boom bew bo ηgoo le le,
- ² “Ben ekeè le è shεete wase εdiuw εfaa, é emum enu Nkaw Danɣefey, ε bó nu ke emum enya wee wvù diee nu Waawee can bonyii le é bó eta yî kentam e.”
- ³ Ke kefew kedvu le, ε bocee ncese bo baay baay bô bonyii bô saake woη mum gen baance ye ê ntow Kayfas wvù to nu εkolε ke bocee ncese le,
- ⁴ mum cu ntaη no bó nu ke ewεentεn sε koo Jisos, eyu.
- ⁵ E bó dioo cu nonεn, gay le, “Fo beene emom fiεε fin kefew ke Nkaw e ke, njefo é beene mom lo, é fí eto bô diuw ê bonyii εnteleη.”

ε kpwoon mvu yefe Jisos bô nfiey wvù shfuunƙene Bεtani

(Mak 14:3-9; Jon 12:1-8)

- ⁶ E Jisos ke no nu ntεw wvù Bεtani le, yew dvu Semon wvù wee ntun wvu baay.
- ⁷ E bó ke shii no diekene, ε kpwoon mvu nε ley bô fikaa fimew ε bó kene bô tε, ε è nu fi nfiey mvu wvù shfuunƙene le, ε wvú lumte naa baay, mum fuce yî εkolε ke Jisos e.
- ⁸ E boom bo Jisos e bo ηgoo le yen nonεn ε fiεε fidvu ton'ye lo bó. E bó gay le, “Wvú nyεw bô nfiey wvun nεn nje la?”
- ⁹ Bó be nεlo egese nfiey wvun bigew nteen, enya bigew bidvu ê bonyii bo kefufe le.”
- ¹⁰ Geenεn, ε Jisos kieε ηkpawace wvubo, gay ê bó le, “Ben nyaa ηγεw ê kpwoon wvun nje la? Wvú nu ε ge ε è nu fiεε fi jee fô me le.
- ¹¹ Ben ekeè le bonyii bo kefufe le nu ke enu ke ben ε bó sekecii, geenεn ke me nu ηke enu beene sekecii ke.
- ¹² Wvú fuci nfiey wvun yî yεm e nεn seysee lo me no bó nu ke edwey me.
- ¹³ É me ensee ê ben keceey le naa fεε fô bó nu ke efewci saaka wvù jee wvun yî εkolε ke nshe le kecii nu ε fiεε fi kpwoon wvun ge nu ε bó nu ke eseηε ten, keekumyi wvú.”

ε Judas gese Jisos

(Mak 14:3-9; Jon 12:1-8)

- ¹⁴ E wee mvu ηgoo boom bo ηgoo le bo Jisos e bo yuufe ncow bofεε wvù bó to teηε le Judas Iskaliot mum nε gen fô bocee ncese bo baay baay,
- ¹⁵ bife ê bó le, “É me nya Jisos can yene le, é ben enya la ê me?” E bó mum taη bigew mbaanshe bì bó kene bô ketwaa kè baa, nya ê wvú.
- ¹⁶ E kew sekekie le, ε wvú mum kew no gomte je yî wvú nu enya Jisos jó can yibole.

ε Jisos bô boom bew bo ηgoo le die Nkaw Danɣefey

(Mak 14:12-21; Luk 22:7-13, 21-23; Jon 13:21-30)

17 Ɛ è ke dioo nu diuu di fwe di Nkaw Blæed wvù bó baa gæ Fintuŋlæen jó, Ɛ boom bo ŋgoo le bo Jisos e to fô wvù le, bife ê wvù le, “Wo gomte le bese egen eseyse fô wo nu edie Nkaw Daŋefey Ɛ è nu fæe?”

18 Ɛ wvù tfuse ê bó le, “Ben egen elaanthe, eyen key e, egay ê wvù le, ‘Wee N'yæyi gayte le kefew kewene nu Ɛ kocen wase. Wen nu edie le Nkaw Daŋefey bô boom bowene bo ŋgoo le Ɛ è nu ê wvù yew.’”

19 Ɛ boom bo ŋgoo le bodvu gen ge ke no Jisos be gay ê bó, mum seyse mwæem mvudien mvu Nkaw Daŋefey e dvù.

20 Ɛ è ke no nu ekiëguu, Ɛ wvù shii bô boom bew bo ŋgoo le bo yuufe ncow bofæe keediekene.

21 Ɛ bó dioo diekene, Ɛ wvù ne gay ê bó le, “É me ensee ê ben kecey le, wee mvu ben e nu egese me.”

22 No wvù gay nonen, Ɛ boom bew bo ŋgoo le ne no nu yii yii baay, mum kew no biwci ê wvù mwaan mwaan le, “È nu me le Tata?”

23 Ɛ wvù tfuse ê bó le, “Wee wvù nu egese me nu wvù nu Ɛ lese ebo ê shuw e bee wvù.

24 Wee wvù diee nu Waawee nu ke egen ke no bó to saŋæe ekumæ wvù. Geenæn, ŋgæw wvu baay nu fô wee wvù gese wee wvù diee nu Waawee le. Fí to bee ejee fô wvuwe wee le baay fen é bó to baa eboo wvù ke.”

25 Ɛ Judas wvù to nu keegese Jisos bife ten ê wvù le, “È nu me le Wee N'yæyi?” Ɛ Jisos gay ê wvù le, “Wo nu Ɛ jeme bô diuw wo.”

Ɛ Jisos bô boom bew die ntaashæ

(Mak 14:22-26; Luk 22:14-20; 1Kol 11:23-25)

26 No bó to diekene, Ɛ Jisos ne jo blæed, nya keyoone ê Nyo', mum guushæ nya ê boom bew bo ŋgoo le gay le, “Ben eko edie, fin nu ye yem.”

27 Ɛ wvù mum jo ten fiko, nya keyoone ê Nyo' mum nya fiko fidvu ê bó gay le, “Ben ewu bocii.

28 Fin nu elæmæ kem kè Nyo' gbwo moŋkan dvù kí Ɛ buy nje wee nteen, wvu le wvù elæshæ bibefæ bibole.

29 É me ensee ê ben le ke me mbæe ŋke embvuu eŋ'wu mbvuum mo tweŋ kete kè lane le man Ɛ kew keseen e, Ɛ gen Ɛ buy diuu di me nu ŋke eŋ'wu mó monfæm beene ente jo bvunfon bvu Icæm e ke.”

30 Ɛ Jisos bô boom bew bo ŋgoo le ke mæse, yem ŋkiee mbense, mum buy ben gen yî Kum Bite bi Olif e.

Ɛ Jisos gay le Bitæ nu ke ema wen

(Mak 14:27-31; Luk 22:31-34; Jon 13:36-38)

31 No Jisos bô boom bew bo ηgoo le to gene, ε wvú ne gay ê bó le, “Entañ jo eben nu ε ben bocii nu ke etfuw bikaa ê me ejim nje fiε fi nu ke ekooy bô me. Ê nu no bó nu ε saη ε Nyo' gayte le, ‘Me nu eηke en'yu ncey njée é ηgoo njée esaηken.’

32 Geenεn, seke Nyo' ε bvuse me yî kpwe le, é me ensa fwe jo ben Galilee.”

33ε Bita mum gay lo fiew ê wvú le, “É bonyii bocii cim tfuw lo bikaa ê wo ejim nje fiε fi nu ke ekooy bô wo, tu ke è nulo é me ηke en'yuu entfuw bikaa ê wo ejim ke.”

34 ε Jisos gay ê wvú le, “É me ensee ê wo keceey le entañ jo eben jan, nu ε nyimshie nu ke enu le yí etoη, ε wo ε ma wase me bokaη botete.”

35ε Bita gay ê wvú le, “É è cim nu naa le me nu eηkpwe lo bee wo, tu ke è nulo é me en'yuu ma wo ke.” No wvú gay nonεn, ε boom bo ηgoo le bo Jisos e bomew ba bocii gay ke ten nonεn.

ε Jisos bunle Gεεmane

(Mak 14:32-42; Luk 22:39-46)

36 ε Jisos bô boom bew bo ηgoo le ke gen ley fô wεε ketaη wvumew e, ε bó teje le Gεεmane, ε Jisos gay ê boom bew bo ηgoo le le, “Ben eshii fen é me en'wawce eceη nene embunle.”

37ε wvú jo Bita bô boom bo Sebεdee le bo bofεε, ε bô bó gen. ε wvú kew no nu yii yii, ε fitele fiew buuke.

38ε wvú mum gay ê bó le, “Fitele fiem nu yii yii baay naa fi me eηkpwe lo. Ben eshεε fen é beene eceyte.”

39 No wvú gay nonεn, mum bence gen fwe caan, gbwe tum bvushiw fokuse mum bunle le, “Icem, é je nu dvú yì è nulo é wo ege é fiko fi ηgew e fin efey se me ε η'wu, é wo ge. Geenεn, fo wo ege no è shieele me ke, gee no è shieele wo.”

40ε wvú ke ne kase tu jim fô boom bew bo ηgoo le, yen ε bó leete. ε wvú bife ê Bita le, “Fí nu le ke è nulo é ben eshii we ebuy ntam kefew mwaη e?”

41 Ben enù we, bunleè fo mmom ke eto fô ben e, eghaw ben. È nu keceey le fitele kooηke lo, geenεn ε nyam ye wεεyi.”

42ε wvú bvuu kase gen yî bokaη bofεε le bunle le, “Icem, é è fen nu le ke fiko fin nulo efey se me ε η'wu, é wo ge ke no wo kooηke.”

43ε wvú dīoo ekase etu jim bvuu yen ε boom bew bo ηgoo le leete njefo nyii to nu ê bó ejise.

44 ε wvú bvuu cine bó le, kase gen bvuu bunle yî bokaη e botete, bunlee jemyi ke ε è nu fiε fi wvú be shee jemyi wase.

45 Ɛ wvú bvuu kase tu jim fô boom bew bo ηgoo le gay ê bó Ɣ, “Ben fɛn bæe ke leete læetene finɛn e? Ben etaa eyɛn, kefew nu Ɣ kocɛn wase. Bó nu Ɣ gese wase wee wvù diee nu Waawee ê bonyii bò befe.

46 Ben enɛ we é beene egeɛnè. Ben etaa eyɛn, wee wvù gese me wvun Ɣ wvú too wase.”

Ɣ bó koo Jisos

(Mak 14:43-50; Luk 22:47-53; Jon 18:3-12)

47 Ke no Jisos to bæe jemyi nonɛn, Ɣ Judas wvù to nu wee ηgoo boom bo Jisos e bo yuufe ncow bofɛɛ mum buynɛn. Wvú to too bô kebombom ke bonyii le ke baay, Ɣ bó keɛke nyó bô bibuse, Ɣ è to tum bocee ncese bo baay baay noo bonyii bò saake woɲ.

48 È to nu Ɣ wee wvù to gesɛɛ Jisos to seyse wase nciise bô bonyii bodvu gay Ɣ, “Wee wvù me nu ηke eɲgay wvú le, embam eɲocɛ, nu wvú, é ben emum ekoo.”

49 No bô bó toɛ, Ɣ wvú mum gen lo fô Jisos e kaɲ mwaanɲ gay wvú le Ɣ, “Me ηgayte wo le Wee N'yɛɛyi.” No wvú gay nonɛn, mum bam wvú ηocɛ.

50 Ɣ Jisos gay ê wvú Ɣ, “Nsaa yɛm, geɛ lo fiɛɛ fi wo to keege.” Ɣ bonyii ba mum gen lo fô Jisos e koo wvú, gheɲ.

51 Ɣ fí kooy Ɣ wee mvu wvù to nu bô Jisos to nu Ɣ mum dvun nyo ye jem, cun kentunɲun ke nfwa ekolɛ ke bocee ncese le dvú, sum.

52 Ɣ Jisos gay ê wee wvudvu Ɣ, “Kase etfuse nyo yo jim fô bvudvuu bwew e. È keè le wee tfuu wvù cawse nyo we, nu ke ekpwe yí nyo le.

53 Wo kpwaake Ɣ ke è nulo é me eɲgay é Icɛm eciinse bonceendaa bew fɛn kaɲ mwaanɲ bontfuke le, Ɣ bó fele ηgóo yuufe ncow fɛɛ le?

54 Geenɛn, é me nɛ Ɣ ηge nonɛn, é fí ke eghan nɛɛ sɛ kooy no bó saɲ ê Nwa' Nyo' le Ɣ fí keɛke keenu?”

55 Sekekiɛ, Ɣ Jisos mum bife ê kebombom kiɛ Ɣ, “Ben to keekoo me Ɣ no too bô nyó noo bibuse ke diɛwɛ ben too keekoo Ɣ è nu cooɲ e? Me nse nshee no diuu nu, Ɣ me Ɣ nshii yew ncese le n'yɛɛyi bonyii sɛ ben koo me nje la?

56 Geenɛn, fifin ficii jo bvudvu keege Ɣ fí eto ekocɛn ke no bonyii bo ntum Nyo' le to saɲɛ.” Ɣ boom bo Jisos e bo ηgoo le bocii mum laɲ wvú fó, fɛɛ lo.

Ɣ Jisos leem yew nsaw e

(Mak 14:53-65; Luk 22:54-55, 63-71; Jon 18:13-14, 19-24)

57 Ɣ bonyii bò to koolɛɛ Jisos mum jo wvú gen bô wvú fô Kayfas wvù cee ekolɛ ke bocee ncese le. Ɣ bonyii bò duɲci bonci bo Nyo' le bô bonyii bò saake woɲ to taashe wase fó.

58 Bó to gene bô Jisos e Bita bii lo ejim ncejole. E wvú gen buy naa lakfulɛɛɛn ekole ke bocee ncese le, mum ley gen shii bô bonyii bò to ceyte la didvu keeyen no fí nu ke eghan eleem.

59 E bocee ncese bo baay baay bô bonyii bocii bò saake bonsaw mum no gomte fiɛɛ fi mbiay e fi bó etey yí Jisos e wvu le bó eyu wvú.

60 Geenen, faɲe yaa keɲke fiɛɛ ke, naa no bonyii nteen to cim too fwe bene jim nsaw mbiay. E fí ke ghan nen, e bonyii bomew bofɛɛ to leem fwe,

61 gay le, “Mbwe wvun se gayte le wen nulo esâw yew ncese Nyo' ekase ebom yí ediuw e eta.”

62 E ekole ke bocee ncese le mum ja we bife ê Jisos le, “Ke wo keɲke fiɛɛ keetfuse le? Wo yuuke ke mwɛɛm mvù bonyii ban jemyi yí yo le?”

63 E Jisos mey diuw tfu. E ekole ke bocee ncese le kase gay ê wvú le, “Ê diee di Nyo' wvù keɲke nshii le, é wo fen nu Mboyse wvù Nyo' to kawɛɛ wvù Waa Nyo', é wo see ê bese.”

64 E Jisos tfuse le, “Fí nu no wo gay. Geenen é me ensee ê wo le, ejim jo kefew kin nu e ben nu ke eyen wee wvù diee nu Waawee le, e wvú e shii ê ebo ke eceey ke Wee wvù keɲke Mvungay e, ke ebvuu eyen no wvú too ê kembew e fowe.”

65 E ekole ke bocee ncese le yuw nonen, mum saaye ndvú ye le, gay le, “Wvú joo bvudvuu bvú Nyo' le. Shiee nu dvú wvù beene ebvuu egomte wee le wvú eleem fen ejeme fiɛɛ le? Ben nu e yuw wase no wvú joo bvudvuu bvú Nyo' le.

66 Ben e sumten le la?” E bó tfuse le, “È nu wee wvù bó eyu lo.”

67 E bó mum kɛw no cuyte nɛɲ yí bvushiw bvú Jisos e, kfunɛ wvú bô mvuɲko, suuɲke bô can gayte ê wvú le,

68 “Wo wvù nu Mboyse wvù Nyo' to kawɛɛ, ke geɛ kewee ntum Nyo' kuw keseen fô bese le. Ke see wee wvù suɲ wo.”

E Bitá ma Jisos

(Mak 14:66-72; Luk 22:56-62; Jon 18:15-18, 25-27)

69 È to nu e Bitá e shii ekfuɲ lakfulɛɛɛn e. E wan kpwoon mvu wvù to lemte fó, nɛ to mbew ye le gay ê wvú le, “Wo ten bee ben e Jisos wvu Galilee wvudvu.”

70 Geenen, e Bitá tun fwe dvu bonyii bocii gay le, “Ke me ɲkee fiɛɛ fi wo jemyi ke.”

71 E Bitá mum nɛ buy gen no nu diuw kebuw e. E wvumvu wan kpwoon wvù to lemte ten fó, yen wvú le, mum jeme ê bonyii bò to leemene fó le, “Wee wvun bee bô Jisos wvu Nasalet wvudvu.”

72 E Bitá bvuu tun, lew lo gay le, “Ke me ɲkee wee wvudvu ke.”

⁷³Ɛ kefew ke dīoo bvuu gence caan, ɛ bonyii bō to leemene fō bence gen mbew Bitā le gay ê wvú le, “Kecɛɛy, kecɛɛy wo nu ten wee mvu bó le, njefo njeme wo gene diewe wvubole.”

⁷⁴Ɛ Bitā mum kan, tee lon yî ekole kew e gay le, “Ƙe me ŋkee wee wvun ke.” Kan mwaan ɛ nyimshie mum toŋ.

⁷⁵ Ɛ Bitā kume njeme wvù Jisos be jeme ê wvú le, “Nyimshie ke enu le yî etoŋ, ɛ wo ɛ ma wase me bokaŋ botete.” Ɛ wvú ne fō buy ekfuŋ, bee kpwe baay.

Mat 27

Ɛ Judas shiim

(Mak 15:1; Luk 23:1-2; Jon 18:28-32)

¹Ɛ ekfuŋ ke dīoo yuule too, ɛ bocee ncese bo baay baay bō bonyii bō saake woŋ, shii cu ntaŋ ekume Jisos keeyu wvú.

²Ɛ bó mum kay wvú, jo gen nya can Baylet wvù wee sa' wvu ê keba kedvu le.

³ Ɛ Judas wvù to gesɛɛ Jisos ke dīoo yen le bó nu ɛ leke le bó nu eyu wvú, ɛ wvú kumen fitele fiew, jo bigew bi mbaanshe biɛ kase gen dvú keetfuse ê bocee ncese bo baay baay bō bonyii bō saake woŋ.

⁴No wvú gen, gay ê bó le, “Me nu ɛ ŋge kebefɛ keɛŋgese wee ɛ wvú baa keŋke jay ke.” Ɛ bó tfuse ê wvú le, “Fifiɛ keŋke la keege bō bese? È kee wo fifiɛ.”

⁵Ɛ Judas mwase bigew bidvu fokuse yew ncese le, mum buy, gen shiim.

⁶ Ɛ bocee ncese bo baay baay tace bigew bidvu gay le, “Bin nu bigew bi elɛmɛ le, ɛ nci baa bee le bó egɛɛ bibin ntfu wvu yew ncese le ke.”

⁷Ɛ bó shii cu ntaŋ, gen guy gbwen wee mvu wvù bomte nsháan dvú le bó ke edweyte botolo fō.

⁸È nu fiɛ fi bó teŋe gbwen wvudvu ɛ to ɛ buy eben e le, “Gbwen elɛmɛ.”

⁹ Fí to kooy nonɛn ɛ fiɛ fi wee ntum Nyo' wvù Yelimia to jemɛɛ mum to kocɛn no wvú to gayɛɛ le, “Bó to nu ɛ jo bigew bi mbaanshe bi è to nu kpaw we no boom bo Islael to seɛɛ yî ekole kew e,

¹⁰guy gbwen wee wvù bomte nsháan dvú, ke no Tata Nyo' to gayɛɛ ê me.”

Ɛ Jisos leem fwe dvu Baylet wvù wee sa' bala wvu Lum

(Mak 15:2-5; Luk 23:3-5; Jon 18:33-38)

¹¹ No Jisos to leemɛɛ fwe dvu Baylet wvù wee sa', ɛ Baylet bife ê wvú le “È nu wo wvù Nfon Bojuu le?” Ɛ Jisos tfuse le, “È nu no wo gay.”

¹² Geenɛn, ɛ bocee ncese bo baay baay bō bonyii bō saake woŋ ke dīoo kew keeteyte mwɛem yî ye le, ɛ wvú faŋe yaa bvuu tfuse fiɛ ke.

13 Ɛ Baylet mum bife ê wvú le, “Ƙe wo yuuke kfuu mwεem mvun mvù bó jemyi yí yo le le?”

14 Geenen, ɛ Jisos faɲe yaa tfuse fiεε ê wvú naa ke fimwaaɲ ê mvù bó teyεε yí ye le ke. Ɛ wee sa' wvudvu taa nen ɛ diuw yum wvú baay.

(Mak 15:6-15; Luk 23:13-25; Jon 18:39–19:16)

15 Ê to ké dīoo nu kefew ke Ŋkaw Daɲefey e, ɛ wee sa' wvun bvuse wee mwaan yew ncaw e wvù bonyii gomte le wvú ebvuse.

16 Ê to nu kefew kedvu le, ɛ wee mvu nu yew ncaw e, ɛ bó ké no kee wa lo wvú yí gee di befe le, ɛ diee diew nu le Balabas.

17 Ɛ bonyii ke dīoo to tase, ɛ Baylet bife ê bó le, “Ben gomte le me embvuse ɛ è nu yεε yew ncaw e? Ben gomte le me embvuse Balabas, nuu Jisos wvù bó teɲe le è nu Mboyse wvù Nyo' to kawεε le?”

18 Wvú to biite nonen njefo wvú to kee lo le bó to nya Jisos can wen e ɛ è nu njefo bó to bene kendoɲ bô wvú.

19 Ɛ keebvu bise fó nu ɛ seke wvú to shiileε wase fô bó ké no saake bonsaw, ɛ kpwεε tum ntum fô wvú le gay le, “Fo wo ege fiεε bô wee wε ke. Ê nu wee wvu teytey. Me njemyi nen njefo εfile nu ɛ njiɲsen bô me entaɲ eben baay ekume wvú.”

20 No Baylet bifεε nonen, ɛ bocee ncese bo baay baay bô bonyii bô saake wonɲ beyse bonyii le bó egay le wvú ebvuse ɛ è nu Balabas, elese lo Jisos.

21 Ɛ wee sa' bvuu nε bife ê bó le, “Wee wvù ben gomte le me encine ente jo bonyii bo bofεε ban nu wvù la?” Ɛ bó tfuse le, “Balabas.”

22 Ɛ Baylet bvuu bife ê bó le, “É me ndīoo ɛ ncine nonen, eɲge nεε bô Jisos wvú bó teɲe le Klistu?” Ɛ bó bocii gay le, “Bó eta lo wvú yí kentam e.”

23 Ɛ wvú kase bife le, “Bó eta wvú nje la? Fiεε fi befe fi wvú ge nu la?” Ɛ bó bvuu no wamte gene ke lo fwe le, “Bó eta lo wvú yí kentam e.”

24 Ɛ Baylet ke dīoo yen le ke je nu ke, le é wen lumtene bô fiεε fin, é diuw ke ene ebuy. Ɛ wvú fi joo, cuke can ye dvú fwe dvu kebombom ke bonyii le gay le, “Ƙe εbo kem nu fô kpwe wee wvun e ke. Ê kee ben dvú.”

25 Ɛ bonyii bocii tfuse ê wvú le, “Ɛε, cine é εleme kew enu yí bikuu bisese le noo yí boom bosese le.”

26 Ɛ Baylet mum bvuse Balabas no bó to gomte, gay ɛ bó tam Jisos, mum nya le bó egen eta yí kentam e.

Ɛ bonyii bo nci le no sεwse Jisos

(Mak 15:16-20; Jon 19:2-3)

27 Ɛ bonyii bo nci le bo wee sa' le mum jo Jisos ley dvú entow we le fô bó to teje le Bletolium, mum kum kebese ke ηgoo bonyii bo nci le kecii ε kí tase gem Jisos keεkeε.

28 Ɛ bó baaye ndvú ye, jo ndvu bvunfon yí yeεle shfuse yí ye le,

29 mum lu kefo ke bvunfon e ε kí nu bíay bíay bon ê wvú efa, mum nya ηkêw ê ebo kew ke εεεy e le è nu ketoome. Ɛ bó mum no too ηgvuumene ê wvú fwe sewse wvú gayte le, “Biaa kemaan! Nfon Bojuu!”

30 No bó gee nonen, no cuyte nceη yí ye le, fii ηkêw we shele wvú dvú fofa.

31 Ɛ bó ke sewse wvú nonen mese, mum baa ndvu bvunfon ye, jise wase ε è nu ndvú ye yí ye le, mum jo wvú keegen eta yí kentam e.

Ɛ bó ta Jisos yí kentam e

(Mak 15:21-32; Luk 23:26-43; Jon 19:17-27)

32 No bó to gene, buynen yí wee mvu wvu ê kelaante kè Selin e ε diee diew nu le Semon. Ɛ bó kan wee wvun ε wvú tuu kentam ke Jisos e.

33 Ɛ bó ke gen buy bvudvuu bvumew e ε bó teje le Golgota, (ε diee din nu le Ngbwow Ekole,))

34 Ɛ bó mum nya mbvuum ê wvú ε bó ε fiysen bô fiεε fimew ε fí cewcewe diewe lele le wvú ewu. Geenen ε wvú dīoo mom, faj keewu.

35 Ɛ bó mum ta wvú yí kentam e, jo ndvú ye tum kaη dvú keegaw ê bikuu bibole.

36 No bó ge nonen mum shii fó no cεyte wvú.

37 Ɛ bó saη ηwa' wvú duηci fiεε fi bó tae wvú yí kentam e nje fí, mum ta yí kentam e ê we jo ekole kew ε wvú nu le, “Wvun nu Jisos, Nfon Bojuu.”

38 Ɛ bó ta ten bocooη bofεε yí bintam e bô bo Jisos, wvumvu ebo εεεy, wvumvu ebo ηkooηko jo Jisos.

39 Ɛ bonyii no fele yene Jisos e mεεke lo bikuu, baale wvú bô boncun,

40 gayte le, “Wo wvú se nu keeke esâw yew ncese ekase eyoo yí ediuw e eta, ke fi le ekole kuw! É wo fen nu Waa Nyo', é wo shii yí kentam kie le.”

41 Ɛ bocee ncese bo baay baay bô bonyii bô duηci bonci noo bonyii bô saake woη no sewse ten wvú gayte le,

42 “Wvú se fii bonyii bomew se wvú nulo efi kew ekole ηkuuη. Ke wvú nu Nfon bonyii bo Israel. Wvú eshii le yí kentam e keseen é bese emum ebee wvú le.

43 Wvú se gεεle ekole yí Nyo' le. É Nyo' fen kooηke wvú, é wvú fi le wvú keseen no wvú se duu le wen nu Waa Nyo'.”

44 Ɛ bocooη ba bô bó to tae yí bintam e bô bo Jisos, no baale ten wvú bô boncun ke nonen.

Ɛ Jisos kpwe

(Mak 15:33-41; Luk 23:44-49; Jon 19:28-30)

- 45 Ɛ diuu ke ben leke, Ɛ ɛkfuŋ nɛ jiim woŋ tfuu gen buy didiuu ditɛte ɛmvunsheeŋ.
- 46 Ɛ è ke no nu ke diɛwɛ didiuu ditɛte le, Ɛ Jisos nɛ fuŋ foweɛwe le, “Ɛli, Ɛli, lama sabaktani.” Fì nu le, “Nyo' wɛm, Nyo' wɛm, wo laŋ me nɛn nje la?”
- 47 Ɛ bonyii bomew bò to leeme fó dioo yuw, gay le, “Wee wvudvu teje Ɛlayja.”
- 48 Ɛ wee mvu bó le mum lewte lo kaŋ mwaan jo kuca, ffum ê mbvuum mo ngbwayngbwayi le, bon yî fite le nɛke le wvú ewu.
- 49 Ɛ Geenen Ɛ bomew bonyii gay le “Ɛ ke leem nɛn é beene eyen laa Ɛlayja nu eto efi wvú le!”
- 50 Ɛ Jisos bvuu wam foweɛwe, Ɛ keyoy kew mum buy.
- 51 Ɛ fí nɛ kooy le, ndvu yì to gawsene yew ncese ente to nu Ɛ sɛle entelen kew fowe bow buy fokuse biba bifɛɛ. Ɛ nshɛ shiw, Ɛ eta wamkɛn,
- 52 Ɛ jém ten yene ye Ɛ bonyii bò è to nu bo Nyo' le nteen bò to kpwekɛnɛ wase mum kase buy yî kpwe le.
- 53 Ɛ Jisos ke dioo buy yî kpwe le, Ɛ bonyii bodvu nɛ gen ê kelaante kè yuule le Jɛlusalɛm, Ɛ bonyii nteen yen bó le.
- 54 Ɛ cee ɛkolɛ bonyii bo nci le bô bonyii bò bô bó to nu fó cɛyte Jisos ke dioo eyen no nshɛ shiw, bô fiɛɛ ficii fì to kooyɛɛ, Ɛ nfan koo bó baay. Ɛ bó gay le, “Ɛkeɛɛy, keɛɛy wee wvun se nu Waa Nyo'.”
- 55 Ɛ Bokɛnɛ nteen to leeme ten fó nɛmndwee taale. Ɛ bokɛnɛ ban nu bò to nɛn'yɛɛ Galilee no bii Jisos e fici wvú.
- 56 Ɛ Ngoo bó le to nu Maalia Magdalen noo Maalia wvù bwee Jɛm bô Yosɛw, noo bwee boom bo Sɛbɛdee le.

Ɛ bó dwey Jisos

(Mak 15:42-47; Luk 23:50-56; Jon 19:38-42)

- 57 Ɛ è ke no nu ɛkiɛguu, Ɛ cee kpaw mvu wvu Alimatia nɛ to Ɛ diee diw nu le Yosɛw. Wvú ten to nu wee ngoo Jisos mvu.
- 58 Ɛ wvú gen yen Baylɛt e lɛkɛ le wvú enya gvune di Jisos e ê wen é wen egen edwey. Nonɛn Ɛ Baylɛt mum gay le bó egen enya ê wvú.
- 59 Ɛ Yosɛw fi gvune didvu mum kule ê ndvu yì yuule le,
- 60 Ɛ mum gen jike ê jem yi ye le Ɛ yí bɛɛ fiɛ, Ɛ wvú to cow jem yidvu yî kɛmbaan e, mum biŋse kebwee ke tɛ le baŋ diuw jem yidvu dvú, mum nɛnɛ.
- 61 Ɛ Maalia Magdalen bô Maalia wvumvu wɛ to nu fó, Ɛ bó Ɛ shii mbew jem yidvu le keba keki.

Ɛ bó no cɛyɛ jem Jisos

⁶²Ɛ ekfuɲ buy yuu, ɛ diuu di bó to ké no seysee mwɛɛm mvu mbam wvubole ɛ fey wase, ɛ bocee ncese bo baay baay bô Bofalasii gen yen Baylet e,

⁶³ gay ê wvú le, “Wee wvu baay, bese kumyi fiɛ fi wee mbiay wɛ to jemyɛɛ seke wvú to bɛɛ dvú. Wvú to nu ɛ gay le, è nu ke edioo ɛ buy ɛdiuw ɛta é wen ekase ebuy yî kpwe le.

⁶⁴ No fí nu nonɛn, gayɛ é bonyii egen ecɛyɛ jem egen ebuy ɛdiuw ɛta, njefo bese fane le è nelo é boom bew bo ɲgoo le ke enɛ egen ecoɲ gvune diew enɛnɛ dvú emum eseɲɛ ê bonyii le, ‘Wvú nu ɛ buy yî kpwe le.’ É bó ge nonɛn, é yiyin mbiay yi keseen efo efey lo yi fwe.”

⁶⁵Ɛ Baylet gay ê bó le, “Ben ejo bonyii bo nci le é ben ɛ bó egen, é ben egay é bó ecɛyɛ jem yidvu ntay no è nulo é ben ecɛyɛ.”

⁶⁶Nonɛn ɛ bó mum gen loocɛ fen diuw jem, mum ge nciise yî tɛ di bó to baɲɛ diuw jem dvú, mum gɛɛ bonyii bo nci le bô ecɛyɛ.

Mat 28

Ɛ Jisos buy yî kpwe le

(Mak 16:1-10; Luk 24:1-12; Jon 20:1-10)

¹Ɛ diuu di mbam e ke fey, ɛ ekfuɲ ke no gbwekene too, ɛ è nu diuu di fwe yî kema le, ɛ Maalia Magdalen bô Maalia wvumvu wɛ gen keetaa jem.

²Ɛ fí kooy le, nshɛ to nu ɛ nɛ shiw bô mvuɲgay, njefo nceendaa Tata to nu ɛ shii we to biɲse kebwee ke tɛ diɛ di bó to baɲɛ diuw jem dvú mum shii yî dvú le.

³Nceendaa wvudvu nu ɛ bvushiw bwew to lawkene diɛwɛ jaɲ e, ɛ ndvú ye baa nen bvuuu.

⁴Ɛ bonyii bô to cɛyɛ jem ba yen wvú le fan baay, ciɲ nɛn kikikiki, gbweken fokuse no jiiɛne diɛwɛ biɲkpwe bi bonyii le.

⁵Ɛ nceendaa Nyo' wvudvu gay ê bokɛnɛ ba le, “Fo ben efanè kɛ. Me ɲkee lo le ben gomte ɛ è nu Jisos wvù bó se tɛɛ yî kentam e.

⁶ Kɛ wvú bɛɛ fen kɛ, wvú nu ɛ buy wase yî kpwe le no wvú to gayɛɛ. Ben eto eyɛn fô wvú se jiime.

⁷ Ben emum egen cekey esee ê boom bew bo ɲgoo le le wvú nu ɛ buy wase yî kpwe le, le wvú nu ɛ sa wase fwe dvunen Galilee. Ben nu ke eyɛn wvú le jó. Ben eyekɛ eyuw, ben nu ɛ yuw wase no me nseɲɛ ê ben.”

⁸Ɛ bokɛnɛ ba mum ja fô jem cekey cekey bô nfan, geenɛn kɛɲke tɛn njoɲ wvu baay, no lewte gene keegen see ê boom bo Jisos e bo ɲgoo le.

⁹No bó to gene, ɛ fí kooy le bô bo Jisos to nu ɛ tasɛn, ɛ wvú gay bó le le, “Me ɲgayte ben e.” Ɛ bó mum to mbew ye le, gbwe bam bikaa biew, wvum wvú.

10 Ɛ Jisos gay ê bó le, “Fo ben efanè ke. Ben egen egay ê boom bo bwæem e le bó egenè Galilee eyen me le jó.”

Ɛ bonyii bò to cɛyɛ jem see fiɛ fi to kooyɛ

11 Ɛ bokɛɛ ba ke nɛ dioo egene, ɛ fí kooy le bonyii bo nci le bò to cɛyɛ jem bomew to nu ɛ nɛ gen ɛlaante gen see fiɛ ficii fi to kooyɛ ê bocee ncese bo baay baay.

12 Ɛ bocee ncese bo baay baay bodvu mum kum bonyii bò saake woŋ ɛ bô bó shii cu ntaŋ, mum baŋ diuw bonyii bo nci le ba bô bigew nteen,

13 gay ê bó le, “Ben egaytè ê bonyii le ben se leete boom bew bo ŋoo le ɛ se ɛ to ɛ coŋ gvune diew ɛ gen dvú.

14 Ɛ ben seŋe nonɛn, fí ɛ ley bitem bi wee sa' le, wvú ɛ no gomte keenya ŋɛw ê ben, ɛ bese eseyse wvú, wvú saa ebvuu enya ŋɛw ê ben ke.”

15 Nonɛn ɛ bó mum fi bigew bidvu mum no seŋe ke no bó to gayɛ ê bó. Kenfe kedvu kin ɛ mum ɛ lam ente jo Bojuu ɛ to ɛ buy ɛben e le bó to coŋ lo gvune di Jisos e.

Ɛ Jisos tum bonyii bew yí woŋ e tfuu

(Mak 16:14-18; Luk 24:36-49; Jon 20:19-23; Lem 1:6-8)

16 Ɛ boom bo ŋoo le bo Jisos e bo yuufe ncow mwaanɛn mum nɛ gen Galilee, ben gen yí kum wvú Jisos to gayɛ ê bó le.

17 Ɛ bó dioo yen wvú le, wvum wvú. Geenɛn ɛ bomew no maŋene wvú.

18 Ɛ Jisos bence to gay ê bó le, “Bó nu ɛ nya wase mvuŋgay mvunciim mvu fowe noo mvu fokuse ê me.

19 Nonɛn, ben egen le bitum e bicii, egeè ɛ bonyii nu bonyii bem bo ŋoo le, eleeè bó ê joo ê diee di Nyo' Ice bô Wan noo Keyoy ke Yuule le.

20 Ben eyɛyɛi bó le bó egeè fiɛ ficii fi me nu ɛ n'yɛyɛi ben dvú. Ben eyeke eyuw, me nu enu beene sekicii eŋgen embuy naa kefew kè woŋ nu ke eka.”

Mak

Mak 1

Saaka wvù Jon Nleseejoo to fewci

(Mat 3:1-12; Luk 3:1-18; Jon 1:19-28)

- 1 Wvun nu saaka wvù jee wvu ekumε Jisos Klistu wvù Waa Nyo'.
- 2 Wvú to kew ke no Yesaya wvù wee ntum Nyo' to saηεε ε Nyo' gayte le, “Yeke eyuw, me nu ηke enciinse wee wem ntum é wvú esa fwe dvu wo, wvù nu egen eseyse je yo.
- 3 Diεw wee fuunke ηkpwaante le bó eseyse je Tata, enele é yí enù teyteny.”
- 4 Nonεn, ε wee mvu wvù bó to teηe le Jon Nleseejoo ke mum nε buynεn ηkpwaante, no fewci ê bonyii le bó ekumen mvuntelem mvubole, é wen elese bó ê joo wvu le Nyo' elεεshe bibefe bibole.
- 5 E bonyii mum no buyte ê bontεw bo woη wvù Judea le tfuu noo ê kelaante kè Jelusalem e kecii gene fô Jon e, seηe bibefe bibole, ε wvú mum leese bó ê joo ê Joo Joodan e.
- 6 Jon to jiise ndvú ε bó kene bô yvúw nyam mi yí bó teηe le kamel, seenke kecaw cin ε bó kene bô jew nyam, diee ε è nu cúma bô ndoη.
- 7 Wvú to fewci, gayte le, “Wee mvu too ê me ejim kuuke fele me, ε me mbaa ncim ejkocεn keηgvuwce fokuse enfay laba we ke.
- 8 Me nleese ben ε è nu ê joo, geenεn, ε wvú nu ke elese fiew ben ε è nu can Keyoy ke Yuule le.”

No bó to lesεε Jisos ê joo bô no Satan to momte wvú

(Mat 3:13–4:11; Luk 3:21-22; 4:1-13)

- 9 Ke εdiuw yoya le, ε Jisos nε Nasalet ê keba ke woη e kè Galilee le, to ε Jon lese wvú ê joo ê Joo Joodan e.
- 10 Ke no Jisos to buyte ê joo nen, mum yen ε εbule yene ye, ε Keyoy ke Yuule no shiile too yí ye le diewe εbembe le.
- 11 E diεw jeme fowe le, “Wo nu Waa wem, nu fitele fiem, ε me n'yuuke njoη bô wo baay.”
- 12 E Keyoy ke Yuule mum ge lo kaη mwaan ε Jisos gen no cee ηkpwaante.
- 13 E wvú no nu jó yí εdiuw e mbaanyε, ε Satan momte wvú. Wvú to nu jó nonεn bô nyám yi ηkpwaante, ε bonceendaa bo Nyo' le taale fô wvú le.

E Jisos tee bonyii bonεw le bó enù boom bew bo ηgoo le

(Mat 4:12-22; Luk 4:14-15; 5:1-11)

- 14 E bó ke nε koo Jon lese yew ncaw e. E è no nu ejim jodvu, ε Jisos gen Galilee, no fewci saaka wvù jee wvù wvu Nyo' jó.

15 Ɛ wvú no fewci, gayte Ɣ, “Kefew nu Ɣ to wase Ɣ kocɛn, Ɣ bvunfon bvú Nyo' le nu wase nceencee. Ben ekumen mvuntelem mvunen, ebee saaka wvù jee wvun e.”

16 Ɛ Jisos ke no fele mbew Mamase yì Galilee le, yen Semon bô waa bwee wvù Andulu le Ɣ bó laaŋke kensaŋ ê mamase le, no ŋkieŋ wvubo to nu byé yì koolɛn.

17 Ɛ Jisos gaytê bó Ɣ, “Ben ebii me le é me enge é ben ekoole wase Ɣ è nu bonyii.”

18 Kaŋ mwaan, Ɣ bó mum cine binsaŋ bibole, no bii wvú le.

19 Ɛ Jisos ke dīoo keŋci gene fwe, yen Jem bô waa bwee wvù Jon e, bô to nu boom bo Sebɛdee le, Ɣ bô bó nu ê kekoŋ e tumci binsaŋ.

20 Ɛ Jisos mum tee lo ten bó. Ɛ bó cine icee bó le ê kekoŋ e bô bonyii bô bó to jœ é bó elemte bó le, mum no bii wvú le.

Ɛ Jisos bvuse keyoy kè yiile yì wee le

(Luk 4:31-37)

21 Ɛ bô bo Jisos nɛ gen ê kelaante kè Kafana'um. Ɛ è ke no nu diuu di mbam e, Ɣ Jisos mum gen lo yew bunle le no yɛɛyi bonyii dvú.

22 Ɛ bonyii no yuuke keŋke lo ŋghaw yì n'yɛɛyi we le, njefo wvú to yɛɛyi diewe wee wvù keŋke mvuŋgay mvu n'yɛɛyi le. Ke wvú to yɛɛyi diewe no bonyii bô duŋci bonci bo Nyo' le to ké no yɛɛyi ke.

23 Ke sekedvu, Ɣ wee mvu nɛ fɛse yew bunle yidvu le, Ɣ è to nu wee Ɣ keyoy kè yiile nu yì ye le.

24 No wvú ley dvú, mum wam Ɣ, “Jisos wvu Nasalet, wo fii la ê bese? Wo to keelɛse bese le? Me ŋkee naa wo. È nu wo wvudvu wvù yuule wvù nɛ fô Nyo' le.”

25 Ɛ Jisos kan keyoy kè yiile kedvu, gaytê Ɣ, “Baŋ lo, buy yì wee wvun e.”

26 Ɛ keyoy kedvu mum ge Ɣ wvú gbwe fokuse no taake, Ɣ kí fuŋ foweewe, mum buy yì ye le.

27 Ɛ bonyii yen nonen, Ɣ diuw yum bó, Ɣ bó no ghayte ebonebon biite Ɣ, “Fin nu la? È nu n'yɛɛyi mvu wvu fwe le? Wee wvun keŋke mvuŋgay kane naa noo biyoy bi yiile Ɣ bí yuuke wvú le.”

28 Kaŋ mwaan, Ɣ saaka wvu ekume Jisos saanŋen gen bontɛw bocii bo ê keba kè Galilee le.

Ɛ Jisos fɛ bonyii bo bincɛm e nteen

(Mat 8:14-17; Luk 4:38-41)

29 Ɛ Jisos ke buy yew bunle yidvu le, gen yew dvu Semon bô Andulu, Ɣ Jem bô Jon nu bô bó.

30 È to nu Ɣ mwese Semon jiime, cɛmte bô ken'ya'. Ke no Jisos ley yew, Ɣ bó mum see lo ê wvú ekume kpwoon wvudvu.

31 Ɛ Jisos gen fô wvú to jiime, jice wvú le yî kebo le, cake wvú we. Ɛ ken'ya' kedvu mum cine wvú le, ɛ wvú ja we, taa fiɛɛ ɛ bó die.

32 Ɛ è ke no nu ekiɛguu ebvubwɛ no diuu to seeyi, ɛ bó no too bô bonyii bocii bô to cemkene noo bonyii bô bonceendaa bo dɛwle le to njiɛsene bô bó fô Jisos e.

33 Ɛ kelaante kedvu kecii tase ê fwese.

34 Ɛ wvú fɛ bonyii nteen bô to kɛɲke bincɛm jɛɛy jɛɛy, bvuu bvuse bonceendaa bo dɛwle le nteen yî bonyii bomew e. Ɛ wvú dīoo bvūuse, saa ebee le bonceendaa bodvu ejemyi lo kɛ, njefo bó to kee wee wvù è nu wvú.

Ɛ Jisos fewcɛ diɛw Nyo' Galilee

(Luk 4:42-44)

35 Ɛ è ke no nu kebitele, ɛ Jisos ja we, buy gen bvudvuu bvumew e wvú embeɲ no bunlee.

36 Ɛ Semon bô bonyii bô bô bó to nu, shɛɛ buy gen keegom wvú.

37 Ɛ bó yen wvú le, gay ê wvú le, “Bonyii bocii nu ɛ shɛɛ ɛ no gomte wo.”

38 Ɛ Jisos tfuse fiew ê bó le, “Beene edaɲsen egen bontɛw bomew e wvu le è nulo é me enfewcɛ ten diɛw Nyo' jó. È nu fiɛɛ fi me nto nje fí.”

39 Ɛ wvú mum no ghane keba kè Galilee le kecii fewci diɛw Nyo' yéw bunle yibole, bvūuse bonceendaa bo dɛwle le yî bonyii le.

Ɛ Jisos fɛ wee ɛ wvú cɛmte bô ntun wvu baay

(Mat 8:1-4; Luk 5:12-16)

40 Ɛ wee mvu wvù to cɛmte bô ntun wvu baay ke nɛ to, tum envuw ê Jisos ejise, lɛkɛ wvú gay le, “Wo nulo efɛ me é me en'yuule, é wo fɛn kooɲke lo.”

41 Ɛ shen koo Jisos, ɛ wvú nɛke kebo kum wvú le, gay ê wvú le, “Me ɲkooɲke lo, bonɛn le, eyuule.”

42 Kaɲ mwaan, ɛ ntun wvu baay wvudvu mum cine wvú le, ɛ wvú bonɛn mum no yuule.

43 Ɛ Jisos mum gay le wvú egenè lo, loocɛ ciise lo ê wvú,

44 gay le, “È yenè fo wo esee ê wee kɛ. Geenen, gene eduɲcɛ ekolɛ kuw ê cee ncese, emum enya nnya yî Muses to gayɛɛ le wee kɛɲke keenya keeduɲcɛ ê bonyii le wen nu ɛ bonɛn wase yî ntun wvun e ɛ no yuule.”

45 No Jisos ciise nonɛn, ɛ wee wvudvu kaa no gene bwaashi lo fiɛɛ fidvu. Ɛ saaka wvudvu saanɲen, ɛ je faɲɛ yaa bvuu nu dvú yì è nulo é Jisos eley kelaante le endan kɛ. Ɛ wvú mum mɛy kɛ wase no nu ɲkpwaante, ɛ bonyii nen'yi mondvuum e mondvuum e, too fô wvú le.

Mak 2

Ɛ Jisos fɛ wee ɛ wvú ɛ kpwe keba kemwaan

(Mat 9:1-8; Luk 5:17-26)

- ¹Ɛ ediuw ke dioo genci, ɛ Jisos kase tu jim Kafana'um. Ɛ bonyii yuw le wvú nu wase fô yew e,
- ²Ɛ bó mum to tase fô nteen, ɛ je faɲe yaa nu dvú fó yì è nulo é wee tome ekale naa noo ê yew fwese ke. Ɛ wvú no fewci diew Nyo' ê bó.
- ³Ɛ bonyii bomew ke ne no too bonew bô wee mvu fô wvú le ɛ bó ɛ shfume ê fikɛy e, ɛ wvú ɛ kpwe wase keba kemwaan.
- ⁴Ɛ fí ghaw keeley gen bô wvú fô wvú le njefo bonyii to faci baay. Ɛ bó mum ben ɛ è nu ê yew we, too keyey. No bó toleɛ nonen, mum shike wee wvudvu ê fiɛ fi wvú to jiime jó le.
- ⁵ Ɛ Jisos yen no bó nu ɛ lese fitele yî ye le, ɛ wvú mum gay ê wee wvú to nu ɛ kpwe keba kemwaan we le, “Nsaa yem, me nu ɛ nleeshe wase bibefe biuw.”
- ⁶Ɛ bonyii bomew bô to duɲci bonci bo Nyo' le bô to nu fó yuw nonen, mum no wvukene ê mvuntelem e, biite le,
- ⁷“Wee wvun jemyi nen neɛ le? Wvú joo bvudvuu bvú Nyo' le. È nu yee dvú wvú nulo eleeshe bibefe efey Nyo' maan?”
- ⁸Ɛ Jisos mum kieɛ lo ê fitele fiew e fiɛ fi bó to kpwaake, mum bife ê bó le, “Ben se keɲke kfuɛ ban bonkpawce ê mvuntelem mvunen e nen nje la?”
- ⁹Fi cekey keegay ê wee wvun nu fi la? Keegay le me nu ɛ nleeshe wase bibefe biew, nuu le wvú ejo fikɛy fiew egene le?
- ¹⁰ Geenen, me nu enge é ben ekieɛ le wee wvú diee nu Waawee keɲke mvungay fokuse fen keeleeshe bibefe.” Ɛ wvú mum gay ê wee wvú to nu ɛ kpwe keba kemwaan we le,
- ¹¹“Me njemyi ê wo, ja we ejo fikɛy fiuw egene fô yew e.”
- ¹²Ɛ wvú mum ja we, jo no buyte ɛ bonyii bocii taale wvú. Ɛ bó taa nen, ɛ diuw yum bó, ɛ bó no tumte monkum mo Nyo' le, gayte le, “Bese ke baa yen wase kfuɛ fin fiɛ le ke.”

Ɛ Jisos tee Lɛwe le wvú enù waa we ɲgoo

(Mat 9:9-13; Luk 5:27-32)

- ¹³Ɛ Jisos ke bvuu ne gen mbew mamase le, ɛ kebombom ke bonyii le to fó, ɛ wvú no yeɛyi bó.
- ¹⁴ Ɛ wvú ke ne dioo gene, yen Lɛwe wvú waa Alfiyus e, ɛ wvú ɛ shii fô bvudvuu bwew bvú lemme le, ɛ no fii shile. Ɛ Jisos gay ê wvú le, “È biì me le.” Ɛ wvú mum ne we no bii wvú le.

15 Ɛ Jisos bô boom bew bo ηgoo le ke gen no diekene yew dvu Lewe bô bonyii bô to fii shile noo bonyii bomew bô befe ten. Kfuu ban bonyii to ké no bii wvú le naa nteen.

16 Ɛ Bofalasii bô to duŋci bonci bo Nyo' le yen no Jisos diekene bô bonyii bô befe noo bô to fii shile, mum bife ê boom bew bo ηgoo le le, “È nu nje la wvù wvù diekene bô bonyii bô fii shile noo bonyii bô befe bomew?”

17 Ɛ Jisos yuw no bó bife, gay ê bó le, “Ƙe bonyii bô temyi ké no gomte wee efuwe ƙe. È ké no gomte bô cemkene. Ƙe me nto keentee bonyii bô nu teytoy ƙe. Me nto keentee ε è nu bô befe.”

Ɛkumε keebamte mwεem mvudien

(Mat 9:14-17; Luk 5:33-39)

18 Ɛ è ke no nu, ε boom bo Jon e bo ηgoo le, noo bo Bofalasii le bamte mwεem mvudien. Ɛ bonyii bomew mum to bife ê Jisos le, “È nu nje la wvù boom bo ηgoo le bo Jon e, noo bo Bofalasii le bamte mwεem mvudien, ε boom buw bo ηgoo le yaa bamte ƙe?”

19 Ɛ Jisos tfuse ê bó le, “È nulo é bó ebe bonyii bô bvujen é bó egen ebvuu ebamte mwεem mvudien ε cee bvujen nu bô bó? Ƙe è nulo é bó ebamte mwεem mvudien ε wvú nu bô bó ƙe.

20 Geenen, kefew nu ke eto kè bó nu ke eloo cee bvujen wvudvu ê bó, é bó emum ekew eshee mbam mwεem mvudien kefew kedvu le.

21 Ƙe wee nulo ejo njaw ndvu yi fie, etumce ndvu yi yvum dvú ƙe. É wvú ge nonen, é njaw ndvu yidvu ke emese esaa lo ndvu yi yvum yidvu, é kebuw kè nu fó emese ekuw efey lo no kí be shee nu.

22 Ƙe è nulo ten é wee ejo mbvuum mo monfem, egεε ê gham mbvuum wvù bó kene bô jew nyam e, ε wvù ε yvumen wase ƙe. É wvú ge nonen, é mbvuum mo monfem modvu ke ekoo, esawye gham wvu yvum wvudvu, é mbvuum bô gham ela εcici. Fi leŋ nu le, bó ƙeŋke keεεε mbvuum mo monfem ƙe ε è nu ê gham wvu fwε le.”

Ɛkumε diuu di mbam e

(Mat 12:1-8; Luk 6:1-5)

23 È to nu diuu di mbam e dimew, ε Jisos bô boom bew bo ηgoo le no lene fele wεε egiŋ wvumew e. Ɛ boom bew bo ηgoo le ƙew no sumyi bicεε diee.

24 Ɛ Bofalasii yen, bife ê Jisos le, “Tata, taa eyen, è nu nje la wvù boom buw bo ηgoo le gee fieε fi nci baa bee le wee ege diuu di mbam e?”

25 Ɛ Jisos bife ten ê bó le, “Ben ke baa taŋ wase ê Nwa' Nyo' le no jeŋ to yuu Nfon Dawe bô ηgoo ye ε wvú ge le?”

²⁶È to nu kefew kè Abiata to nu ekolè ke bocee ncese le, ε Dawe ley yew Nyo' le jo blèed wvù bó to gee ncese dvú fô Nyo' le, die bvuu nya ten ηgoo ye dvú, ε è to nu nci fo wee edie blèed wvudvu efey bocee ncese.”

²⁷ Ε Jisos mum mèse gay ê bó le, “Nyo' to γεke diuu di mbam e nje wee. Wvú to baa bom wee nje diuu di mbam e ke.

²⁸Nonen, wee wvù diee nu Waawee nu Cee Ekolè naa noo wvu mbam.”

Mak 3

Ε Jisos fε wee ε kebo kew ε kpwe

(Mat 12:9-14; Luk 6:6-11)

¹ Ε Jisos ke bvuu gen ley yew bunle le. Ε wee mvu nu dvú ε kebo kew ε kpwe.

²Ε bonyii bomew bò to nu dvú no gomte fiεε fi bó etey yî Jisos e, mum luη ejise yî ye le no taale laa wvú nu efε wee wvudvu diuu di mbam e le.

³Ε Jisos gay ê wee wvù kebo to nu ε kpwe wε le, “Ja we eto fen.”

⁴No wvú toε, ε Jisos bife ê bonyii le, “Fiεε fi nci nu ε bee le wee ege diuu di mbam e nu fi la? Keege fiεε fi jee, nuu fi befε le? Keeboyse wee, nuu keeyu lo le?” Ε bó cife.

⁵Ε Jisos ton'ye shém bô bó, taa bó bocii kenen, ε shen koo wvú yî mvuntelem mvubole mvù yiile le. Ε wvú gay ê wee wvù kebo to nu ε kpwe wε le, “Nεke kebo kuw.” Ε wvú nεke ε kí mum bonen.

⁶ Ε Bofalasii mum buy, gen lo kaη mwaan ε bô bo ηgoo bonyii bo Nfon 'Elod e jo nsey no è nulo é bó ege se yu Jisos.

Ε bonyii no nen'yi biba bicii too fô Jisos e

⁷Ε Jisos bô boom bew bo ηgoo le mum nε jó gen fô Mamase yî Galilee le. Ε kebombom ke bonyii le ke baay bi wvú le. Ε bomew bonyii to nε keba kè Galilee bô kè Judea le.

⁸Ε bomew to nε Jelusalem, bomew keba kè Idumea le, bomew Joo Joodan wvuke, bomew biba bì Taya bô Sidon e. Kebombom kedvu to to nonen njefo bó to yuuke mwεem mvù wvú to gee mvunciim.

⁹Ε Jisos nε gay le boom bew bo ηgoo le egom kekoη eseyse egεε é wen eley jó fo kebombom ke enε efεε wen.

¹⁰Wvú to gay nonen njefo wvú to nu ε fε wase bonyii nteen, ε bonyii bo bincem e bεε ke too keekum wvú le.

¹¹É bonyii bò biyoy bì yiile to nηnsene bô bó ké yen Jisos e mum no gbwekene fwe dvu wvú wamte gayte le, “Wo nu Waa Nyo'.”

¹²No bó wamte nonen, ε Jisos loocε ciise lo ê bó le fo bó ege é bonyii kiεε wen ke.

Ɛ Jisos baa bonyii yuufe ncow bofɛɛ lɛ ɛ nu boom bew bo ntum e

(Mat 10:1-4; Luk 6:12-16)

- 13 Ɛ wvú ke nɛ ben gen yí kum e, tee bonyii bò wvú to shieele ɛ bó to fô wvú le.
- 14 Ɛ wvú baa bonyii yuufe ncow bofɛɛ, tee bó lɛ boom bew bo ntum e, wvu lɛ bò bó enù, ɛ wen etumte bó ɛ bó ghane fewci diɛw Nyo',
- 15 bvuu kɛɲke mvuŋgay keebvuuse bonceendaa bo dɛwle le yí bonyii le.
- 16 Bonyii bodvu to nu: Semon, wvù wvú to nyɛ diee diɛw dimew lɛ Bitá.
- 17 Jɛm bò waa bwee wvù Jon bò to nu boom bo Sɛbɛdee le, bò wvú to nyɛ diee ɛ bó lɛ “Boanɛgɛs” dì nu lɛ, “Boom bo jaɲ yì baykene le.”
- 18 Ɛ bomew nu Andulu, Filew, Batolomu, Matio, Toma, Jɛm wvù waa Alfiyus, Tadio, Semon wvù to nu wee ŋgoo Boselot,
- 19 noo Judas Iskaliot wvù to ghanɛɛ gese Jisos.

Ɛ bonyii no duu lɛ Bɛlsebu wvù nfon bonceendaa bo dɛwle le nu yí Jisos e

(Mat 12:22-32; Luk 11:14-23; 12:10)

- 20 Ɛ Jisos ke nɛ gen fô wvú to cee, ɛ kebombom ke bonyii le bvuu tase fó, ɛ bò boom bew bo ŋgoo le faɲɛ yaa kɛɲke naa lo je keedieken kɛ.
- 21 Ɛ kfuu diɛw ke dioo yuw, mum gen keejo wvú njefo bonyii to duu lɛ wvú ghaanene lo.
- 22 Ɛ bonyii bò to duɲci bonci bo Nyo' le bò to nɛn'yɛɛ Jɛlusalem bow jó no gayte lɛ, “Bɛlsebu nu yí ye le, ɛ wvú bvuuuse bonceendaa bo dɛwle le nɛn ɛ ɛ nu bò mvuŋgay mvu nfon bonceendaa bodvu le.”
- 23 Ɛ Jisos ben bó, bife ɛ bó ɛ ŋgan e lɛ, “È nulo ɛ Satan ebvuu ebvuuse ekolɛ kew yí wee le nɛɛ le?”
- 24 Ɛ ketum nɛ ɛ gawsɛn ɛ no diuu ɛkinɛkin, kí saa ke eleem kɛ.
- 25 Yew ɛ nɛ ɛ gawsɛn ɛ no diuu ɛyinɛyin, yí saa ke eleem kɛ.
- 26 Nonɛn, ɛ Satan nɛ ɛ gawsɛn bò ŋgoo ye ɛ no diuu ɛbonebon, wvú saa ke eleem kɛ, ɛ emum enu kemɛɛse kew.
- 27 Geenɛn, ben ekeè lɛ kɛ wee nu dvú wvù nulo eley yew dvu ntɛmemvuŋgay, ekuu mwɛɛm mwew keceɛy elewte dvú, sɛ wvú ɛ yaw ɛ kay ntɛmemvuŋgay wvudvu ɛ sɛ kuu kɛ.
- 28 Ɛ me ensee ɛ ben keceɛy lɛ, Nyo' nulo elɛɛshɛ mwɛɛm mvù befe noo díɛw yì befe yicìi yì bonyii jemyi.
- 29 Geenɛn, ɛ wee jeme diɛw yì befe ɛkumɛ Keyoy ke Yuule, tu kɛ ɛ nu naa lo ɛ Nyo' elɛɛshɛ kɛ, njefo wvú nu ɛ ge kebefɛ ɛ ɛ nu kè mɛy lo.”
- 30 Jisos to jemyi nonɛn njefo bonyii bodvu to duu lɛ keyoy kè yiile nu yí ye le.

Bwee Jisos bô boom bo bwee Jisos e

(Mat 12:46-50; Luk 8:19-21)

- 31 E bwee Jisos bô boom bo bwee Jisos e mum fêse, leem ekfuɲ, tum wee le wvú etee wvú.
- 32 È to nu ε kebombom ke bonyii le ε shii ε gem wvú ε tase. E bó gay ê wvú le, “Bwoo bô boom bo bwoo le gomte wo ekfuɲ.”
- 33 E Jisos bife le, “Bwεem bô boom bo bwεem e nu baa?”
- 34 No wvú bife nonen mum jɲe bonyii bô to shilεε gem wvú ba, gay le, “Bwεem bô boom bo bwεem e ban.
- 35 Wee tfuu wvù gee fiεε fi Nyo' gomte, nu wvú wvù nu waa bwεem bô jεme yem noo bwεem.”

Mak 4

Ngan ekume wee wvù to tfumyi ngow

(Mat 13:1-9; Luk 8:4-8)

- 1 E Jisos ke bvuu kew no yεyi bonyii mbew mamase le, ε kebombom ke bonyii le ε tase fó nen ghemm. E wvú mum nε wase ley shii ε è nu ê kekoɲ e ê joo, ε kebombom kedvu no leeme ηgem joo le ê ηkpwaante.
- 2 E wvú no yεyi bó bô mwεem nteen ê bonɲan e. E wvú nε ma ngan mvu ê bó le,
- 3 “Ben eyekε eyuw, wee to nu ε laa keegen etfume ηgow.
- 4 E wvú ke dioo etfumyi, ε yimi gbweken ê je, ε mvunyiim to tace die.
- 5 E yimi ηgow gbweken fô bvudvuu bvυ εta le ε nshe yaa nu fó ntay ke. E yí mum yaɲsen buy njefo ke nshe to nu fó ntay ke.
- 6 E mvum ke dioo ekew ebaa, mum suɲ ηgow yidvu ε yí yowlen, njefo yí to baa cime geɲ ke.
- 7 E yimi ηgow gbweken ê bisafe le. E bisafe bidvu ke ku mum baɲ ηgow yidvu ε yí faɲe yaa eyum mvuntam ke.
- 8 E yimi ηgow gbweken ε è nu yí nshe yí jee le, ke buy, ku yum, duu fey no bó to tfumyεε, ε jise di ηgow e yumte ejise mbaanshe, dimew ejise mbaɲsoocaa, dimew ejise gbwee.”
- 9 No Jisos ma nonen mum mεse le, “Wee wvù keɲke bitem ε wvú yuw.”

Shiee wvù Jisos to jemyi ê bonɲan e

(Mat 13:10-17; Luk 8:9-10)

- 10 E Jisos ke dioo nu wase wvú embeɲ, ε bonyii bomew bô bô bó to nu noo boom bew bo ηgoo le bo yuufe ncow bofεε bife ê wvú ekume ngan wvudvu.

11 Ɛ wvú tfuse ê bó le, “È nu ê ben bò Nyo' nu ɛ duŋɛ wase kenyile ke bvunfon bwew e. Geenen, fô bonyii bomew e nu ɛ fiɛɛ ficii nu ke ɛ è nu ê boŋgan e,

12 wvu le bó ke etaale naa ntay, geenen yaa yene ke, ke eyeke naa ntay, yaa yuuke ke. Ɛ fí nu nonen wvu le fo bó ke ekumen mvuntelem mvubole, é Nyo' elɛshe bibefe bibole.”

Fiɛɛ fi ŋgan wvù Jisos to mæ duŋci

(Mat 13:18-23; Luk 8:11-15)

13 Ɛ Jisos ne bife ê bonyii ba le, “Fí nu le ben baa kieɛ fiɛɛ fi ŋgan wvun jemyi le? É ben baa kieɛ wvun, é ben ke ekieɛ bomew boŋgan neɛ le?”

14 Ɔgow yì wee wvudvu tfumyɛɛ nu diɛw Nyo'.

15 Ɔgow yì gbwee ê je nu bonyii bò yuuke diɛw Nyo', ɛ Satan mum to lo kaŋ mwaan bvuse diɛw yidvu fô mvuntelem mvubole.

16 Ɛ ŋgow yì gbwee fô bvudvuu bvu eta le nu bonyii bò yuuke diɛw Nyo', fiisen lo kaŋ mwaan bô njoŋ,

17 geenen, ɛ yí baa cime geŋ fô mvuntelem mvubole ke. Ɛ yí moocɛ ke fó caan, é ŋgɛw ke dioo ɛ to, kenɛɛ bonyii bon ɛ è nu bikaa ê bó ejim nje diɛw yidvu, ɛ bó mum tfuw lo bikaa kaŋ mwaan.

18 Ɛ ŋgow yì to gbwee ê bisafe le nu bonyii bò yuuke diɛw Nyo',

19 ɛ ken'yanjan ke ekume mwɛem mvu yí woŋ wvun e, bô shiee bvukuke noo shiee mwɛem mvumew mum tase baŋ diɛw yidvu ɛ yí laaye ɛcici.

20 Ɔgow yì gbwee yí nshɛ yì jee le ɛ mum ɛ no nu bonyii bò yuuke diɛw Nyo', fiisen, no gee no yí gomte gene lo fwe fwe, ke diɛwe ŋgow e fò yí ɛ yum ejise mbaanshe, yimi ejise mbansoocaa, yimi ejise gbwee.”

Ɛkumɛ ken'yeese

(Luk 8:16-18)

21 Ɛ Jisos ne bife le, “Wee ké leyte bô ken'yeese yew kfuke bô ŋkaa, kenɛɛ lese ɛgaaku le? Ke wee ké leyte dvú tome ɛ è nu yí fiɛɛ fi bó tomyi ken'yeese yí dvú le le?”

22 Ben ekeè le fiɛɛ ficii fi nu ê nnyile le nu ɛ bó to nyile le bó ke ege é fí eyene, é fi nu ejim ejim ficii é bó ege é fí ebuy emwa.

23 Wee wvù keŋke bitem, ɛ wvú yuw.”

24 Ɛ Jisos bvuu gay le, “Ben dioo yeke diɛw Nyo' no yeke ntay, ekeè le je yì wee yeke jó nu no Nyo' nu ke efew se nya ê mweten, ɛ wvú nu ke enya naa fesɛn lo.

25 Wee wvù keŋke fiɛɛ nu ɛ bó nu ke ebise. Ɛ wee wvù yaa keŋke ke fiɛɛ nu ɛ naa fi caan fi wvú keŋke nu ɛ bó nu ke efi lo é wvú.”

Ɔgan ɛkumɛ ŋgow no yí ké no kuu

- 26 Ɛ Jisos bvuu jeme le, “Bvunfon bvuu Nyo' le nu diewe ngow fò wee ɛ tfume wene.
- 27 Ɛ kɛ dioo nu entaŋ ɛ wvú no leete, ɛ ekfuŋ kɛ yuu ɛ wvú ne we. Ɛ ngow yidvu kɛ buy no kuu, ɛ wvú yaa cim kee laa yí gee nee se kuu le,
- 28 Ɛ è gee kɛ nshɛ ɛ yí se kuu. Ɛ yí kɛ ne yaw low, ne fò nya bikem, kɛ ne fò tum ejise.
- 29 Ɛ yó kɛ dioo ɛ be, ɛ wvú mum jo finyo ley wene, njefo kefew ke ngbwele le nu ɛ kocɛn wase.”

Ngan ɛkumɛ kfuu ngow fintam fimew

(Mat 13:31-32, 34; Luk 13:18-19)

- 30 Ɛ Jisos bvuu ne gay le, “È nulo ɛ beene efewsɛn bvunfon bvuu Nyo' le bô la? È nulo ɛ beene efewsɛn bô ngan wvù la?”
- 31 Bvú nu ke diewe kfuu ngow fintam fimew, fi hoynene ejise fele mvungoke mvunciim fokuse fɛn. Ɛ wee kɛ tfume wene,
- 32 ɛ yí ku, yiŋ fey bite bicii bì bó tfumyi wene, ɛ tíew ye faŋken no nyaa kendvuŋ, ɛ mvunyiim mvù bile we nulo eyoote yéw yí dvú le ɛ kendvuŋ kedvu le.”
- 33 È nee no Jisos to fewci diew Nyo' ɛ bonyii ɛ boŋgan e diewe ban e, ɛ je yí è nulo ɛ bó eyuw e.
- 34 Kɛ wvú to kɛ jeme fiɛɛ ɛ bó se è nu ɛ ngan e ke. Geenɛn, ɛ wvú kɛ dioo nu wase bô boom bew bo ngoo le ɛbonebon, mum mese yuuse boŋgan bodvu bocii ɛ bó.

Ɛ Jisos wam nffum

(Mat 8:23-27; Luk 8:22-25)

- 35 Ɛ Jisos yɛɛyi bonyii ɛbvubwe, ɛ è ke dioo nu fokieguu, ɛ wvú gay ɛ boom bew bo ngoo le le, “Beene elente mamase egen kewvu keki.”
- 36 Ɛ bó mum cine kebombom ke bonyii le kè to nu fò le, ley ɛ kekoŋ kè Jisos to nu wase jó kie le, ɛ bô bó no leenci, ɛ bikoŋ bimew bii bó le.
- 37 No bó to leenci, ɛ nffum wvu baay ne sese kaw no bvuyte joo ɛ yí leyte ɛ kekoŋ e gomte keeyiŋsɛn.
- 38 Jisos to nu ɛ kekoŋ e ejim leete, ɛ wvú ɛ jike ekole yí mbwaan e. Ɛ bó gen no kamsee wvú gayte le, “Wee n'yɛɛyi, kpwe gomte keejo beene nen ɛ wo yaa ghayte ke le?”
- 39 Ɛ Jisos kamse, wam nffum wvudvu, gay ɛ joo le, “È nù nyskeey.” Ɛ nffum wvudvu mum lu, ɛ mondvuum cife nen ndvumm.
- 40 Ɛ wvú mum bife ɛ boom bew bo ngoo le le, “Ben fane la? Ben baa lese wase fitele yí yem e le?”
- 41 Ɛ ye bɛm bó, ɛ bó no ghayte ɛbonebon le, “Wvun wee nu wvù nee, wvù naa nffum bô joo yuuke wvú le?”

Mak 5

Ɛ Jisos bvuse bonceendaa bo dewle le yí wee le

(Mat 8:28-34; Luk 8:26-39)

- ¹Ɛ Jisos bô boom bew bo ηgoo le lente mamase yidvu buy wvuke, keba ke bonyii bo Gelasan e.
- ²No wvú to buyte ê kekoη e, ε bô wee mvu tasen ε keyoy kè yiile njiηsene bô wvú, ε wvú buy ê ditfum di bó to dweyte bonyii jó le.
- ³Wee wvudvu to ké no cee ê ditfum didvu le. Ɛ wee yaa to nu dvú wvù nulo ebvuu ekay wvú ε è cim nu naa bô ncaw κε.
- ⁴Bokaη nteen nu ε bó to ké leese wvú ê difwaη e, kay can ye bô boncaw, ε wvú sumye boncaw bodvu, sawye difwaη. Ke wee to nu dvú wvù nulo ejice wvú le κε.
- ⁵Wee wvudvu to ké no kale ê ditfum didvu le bene buyte yí dikum e entaη bô emvunsheer, wamte, kaashi ye ye bô eta.
- ⁶No wvú yeneε Jisos e beε ncejole, lewte to tum envuw ê wvú ejise,
- ⁷ wam foweεwe le, “Jisos Waa Nyo', Nyo' wvù nu Ekole ke Mwεem Mvunciim e, wo fii la ê me? Me nlεke lo wo ê diee di Nyo' le le fo wo enya ηgew ê me κε.”
- ⁸Wvú to jemyi nonen, njefo Jisos to nu ε wam wase le, “Keyoy kè yiile kin, buye lo yí wee wvun e.”
- ⁹Ɛ Jisos bife ê wvú le, “Diee diuw nu yeε.” Ɛ wvú tfuse le, “Diee diem nu kebombom, njefo bese duule lo.”
- ¹⁰No wvú tfuse nonen, mum lεke Jisos shiee le le fo wvú ekuη bowen keba kedvu le κε.
- ¹¹È to nu ε ηgoo boηkunyam diekene yí mβεke le fó.
- ¹²Ɛ biyoy bì yiile bidvu mum lεke Jisos le, “Ciinse bese ε è nu ê boηkunyam boba le é bese eley yí bó le.”
- ¹³Ɛ Jisos bee. Ɛ biyoy bidvu mum buy yí wee wvudvu le, gen ley yí boηkunyam e. Ɛ ηgoo yidvu to nu boηkunyam diewe bontfuke bofeε le. Ɛ bó sen, bow ê ηkoη e, shii ê mamase yidvu le, le jó.
- ¹⁴Ɛ bonyii bò to ceyte boηkunyam bodvu ja fó, feε lo, gen see saaka wvudvu εlaante bô ê bontew bo jó le. Ɛ bonyii no yuuke, buyte keeto eyen fiεε fi to kooyε le.
- ¹⁵Ɛ bó to fô Jisos to nu, yen wee we wvù kebombom ke bonceendaa bo dewle le to shee njiηsene bô wvú, ε wvù ε shii fó, ε jise ndvú, ε bvufee bwew ε kase wase ε tu fó. Ɛ bó fan baay.

16 Ɛ bonyii bò to yenee fiɛ fi to kooyee le, mum no seɛ ɛ bó no fí to kooyee bô wee we noo ŋgoo boŋkunyam ba.

17 No bó yuw nonen, kew no leke Jisos le wvú ene gbwen bowene.

18 Ɛ Jisos dīoo leYTE ɛ kekoŋ e, ɛ wee wvù bonceendaa bo dɛwle le to buyee yí ye le we mum no leke Jisos le bô wen eɛne.

19 Ɛ Jisos tun, gay ɛ wvú le, “È genè ɛ è nu fô yew e, eɛn esee ɛ bonyii buw fiɛ fi Tata ge fô wo le, bô no wvú nu ɛ cam shen fô wo le.”

20 Nonen, ɛ wee wvudvu mum ne, gen no ghane woŋ wvudvu le tfuu wvù bó to teɛ le Bilaante bi Yuufe le, seɛ fiɛ fi Jisos ge fô wvú le. Ɛ bonyii no yuuke, keŋke lo ŋghaw.

Ɛkumɛ waa Jaylus noo kpwoon mvu wvù to kumɛ ndvu Jisos e bonen

(Mat 9:18-26; Luk 8:40-56)

21 Ɛ Jisos kase lente ɛ kekoŋ e tu kewvu keki no nu mbew mamase le, ɛ kebombom ke bonyii le bvuu tase fô.

22 Ɛ cee ekole yew bunle mvu mum ne to fô, ɛ diee nu Jaylus. No wvú yen Jisos e, gen gbwe ɛ wvú ejise,

23 leke wvú shīee le gay le, “Waa wem wvu caan wvù kpwoon kpwee lo. Kee wo, to ke ekum wvú le ɛ wvú ebonen fo wvú ekpwe.”

24 Ɛ Jisos mum ne ɛ bô wvú no gene, ɛ kebombom ke bonyii le shfumte bii faci Jisos.

25 Kpwoon mvu to nu ente jo kebombom kedvu ɛ wvú ɛ cem wase bô kencem ke bokene le bilum yuufe ncow bifɛɛ.

26 Wvú to nu ɛ yen wase ŋɛw can bonyii bo bifuu le nteen, jewse fiɛ fīci fi wvú to keŋke, ɛ mwɛem foo ke gene lo.

27 No wvú to nu ɛ yuw wase ekumɛ Jisos, ɛ wvú mum to ɛ wvú ejim ɛ kebombom ente, kum ndvu ye le,

28 njefo wvú to gayte fô fitele fiew e le, “É me nciɛ eŋkum ke naa ɛ è nu ndvu ye le, tu me ɛ mbonen wase.”

29 No wvú to kumɛ nonen, ɛ kencem kew mum semɛ lo kaŋ mwaan. Ɛ kpwoon wvudvu yuw ten ye ye le le wen nu ɛ bonen.

30 Ɛ Jisos dīoo yuw ye ye le le mvuŋgay nu ɛ buy yí wen e, ɛ wvú baŋke ye kaŋ mwaan, bife ɛ bonyii le, “È kum yee ndvu yem e?”

31 Ɛ boom bew bo ŋgoo le tfuse ɛ wvú le, “Wo yene ɛ kebombom ke bonyii le faci wo, ɛ wo bvuu biite wee wvù kum wo le le?”

32 Ɛ Jisos mɛy ke no taale kenene keeyen wee wvù kum wvú le.

33 Nonen, ε kpwoon wvudvu no wvú to kee fiεε fi to kooyεε bô wvú, ε wvú mum to, fane, ciĩjke, tum envuw ê Jisos ejise see keceεy kew kecii ê wvú.

34 Ε Jisos gay ê wvú le, “Waa wem, fitele fiuw fi wo lese yî yem e nu ε ge wase wo ε bonen. È genè ntay. Kencem kuw ka wa lo nen.”

35 Ke no Jisos to bæε jemyi ê kpwoon wvudvu nonen, ε bonyii bomew fεse fó ε bó nε fô yew e fo Jaylus wvù cee εkole yew bunle wε, gay ê wvú le, “Waa wo nu ε mεse wase. Wo bvuu shee nyaa ηgew ê wee n'yεεyi ε è nu wvù la?”

36 No bó gay nonen, ε Jisos yuw, geenen ge ke diewe wvú baa yuw ke, gay ê Jaylus le, “Fo wo efanè ke, lese ke ε è nu fitele yî yem e maaj.”

37 Ε bó no gene ke lo, ε Jisos faηε yaa bee le wee mvu ebi wen e efey Bita bô Jem noo Jon wvù waa bwee Jem ke.

38 Ε bó ke gen fεse fô yew e fo Jaylus, ε Jisos yen ε bonyii beele ffule lo fó, ε kpwe ghamte lo.

39 Ε wvú ley yew, bife le, “Ben beele, ffule mondvuum nen nje la? Wan baa kpwe ke, wvú leete lo.”

40 Ε bó no kieele lo wvú. Ε wvú nε bvuse bonyii bocii εkfuη, jo ke ε è nu cee wan bô bwee wan noo bonyii bew bo ηgoo le bo botete ba, ε bô bó ley gen fô wan wvudvu to jiime.

41 Ε wvú jice wan wvudvu le yî kebo le jeme ê díew yibole le, “Talita kum!” Fì nu le, “Wan kpwoon, me njemyi ê wo le, ja we.”

42 Kaη mwaaj nonen, ε wvú mum ja we no lene. Ε bó yen nonen ε diuw yum bó. Wan kpwoon wvudvu to nu bilum yuufe ncow bifεε.

43 Ε Jisos ciise lo ê bó le fo bó ege é wee ekieε fiεε fi be nu ke, mum gay le bó enya fiεε é wvú edie.

Mak 6

Ε bó ma Jisos ntεw we le

(Mat 13:53-58; Luk 4:16-30)

1 Ε Jisos ke nε fó, ε bô boom bew bo ηgoo le gen ntεw wvubole.

2 Ε è ke no nu diuu dibole di mbam e, ε wvú gen yew bunle le kew no yεεyi bonyii. Ε bonyii nteen no yuuke no wvú yεεyi keηke lo ηghaw. Ε bó mum nε no ghayte gayte le, “Wee wvun yεεyi mvun mwεem fεε nen? Wvú jo bvun bvufee fεε? Wvú ghan nεε ε se no gee bin biηghaw bi mwεem e?”

3 È nu ke wvú wε wvù kane bite wvù waa Maalia le? Ke è nu waa bwee Jem bô Yosεs noo Judas bô Semon e? Ε ke jéme ye nu jan beene ε bó le?” No bó ghay nonen mum ma wvú.

⁴ Nonen ε Jisos gay ê bó le, “Bó ké no wvumte wee ntum Nyo' naa mondvuum e monciim. Ê nu ke won we le bô ê kfuu diew e noo ê wvú yew dvù bó yaa ké no wvumte wvú ke.”

⁵No bó ma Jisos nonen, ε fí mum ghaw wvú keebvuu ege bi nghaw bi mwεem e jó nteen, efey ke le wvú to nu ε kum bonyii bo bincem e caan ε bó bonen.

⁶ε wvú kenke lo nghaw no bó to baa lese fitele yî ye le ke.

ε Jisos tum boom bew bo ηgoo le bo yuufe ncow bofεε

(Mat 10:5-15; Luk 9:1-6)

ε Jisos ke ne fó no ghane bontew bo jó le yεeyi bonyii.

⁷ε wvú ke ne tee boom bew bo ηgoo le bo yuufe ncow bofεε, no tumte bó ekfun bofεε bofεε, nyaa mvun gay ê bó mvù bó ebvuuuse biyoy bì yiile yî bonyii le dvù.

⁸ε wvú dioo tumte bó gay le fo bó ejo naa lo fiεε efey kembra ke. Fo bó ejo mwεem mvudien ke. Fo bó ejo ekeε kenεε bigew ê bicaw bibole ke.

⁹Bó elese bolaba, geenεn fo bó etfume bikum bifεε ke.

¹⁰ε wvú bvuu gay ê bó le, “Ben ke dioo ε gen ntew e, ε ley yew, no cee ke ε è nu dvù gen buy diuu di ben ke enε jó.

¹¹É ntew mvu tun keefiisen ben, eyuw fiεε fi ben jemyi, é ben nenε jó, dioo nen'yi kuce kebvu ke yî bikaa binen e, é enu nciise fiεε fi bó mom.”

¹²Nonen, ε bó mum ne gen no ghane fewci le bonyii ekumen mvuntelem mvubole.

¹³ε bó bvuu no bvuuuse ten bonceendaa bo dεwle le nteen yî bonyii le, yeefe bonyii bo bincem e nteen bô mεem ε bó bonene.

No bó to yuw Jon Nleseεjoo

(Mat 14:1-12; Luk 9:7-9)

¹⁴ε Nfon 'Elod ke yuw saaka wvu ekumε Jisos, no bonyii to yuuke wase diee diew mondvuum e monciim, ε bonyii bomew no gayte le, “Jisos wvun nu Jon Nleseεjoo ε wvú ε kase ε buy yî kpwe le. Ê nu fiεε fi ge wvú ε se no kenke mvun gay keεεe bi nghaw bi mwεem e bin nen.”

¹⁵ε bomew gayte le, “È nu Elayja ε wvú ε kase ε to.” Bomew le, “Wvú nu wee ntum Nyo' mvu ke diewe bo fwele fwele le.”

¹⁶ε 'Elod dioo yuw mwεem mvun nen gay fiew le, “È nu Jon Nleseεjoo wvù me nto mbvuseε ekole kew ε wvú ε kase ε buy yî kpwe le.”

¹⁷Jon nu ε 'Elod to tum bonyii ε bó gen koo wvú, kay fen yew ncaw e nje 'Elodia wvù kpweε Filew wvù waa bwee 'Elod, ε 'Elod to jo kpweε le.

¹⁸ε Jon no tune gayte ê wvú le, “Nci baa bee le wee ejo kpweε waa bwee kpweε le ke.”

- 19 No Jon to gayte nonen, ε 'Elodia mum no kenke wvú fô fitele le gomte keeyu wvú, geenen yaa kenke je ke,
- 20 njefo 'Elod to fane Jon le wvú nu wee wvu teyten bvuu nu wee Nyo'. Ε wvú mum no yene fo bó eyu wvú. 'Elod to ké dioo yeke fiεε fi Jon jemyi, ε fitele fiew no saake wvú baay, geenen ε wvú no yuuke ke njon keeyeke fiεε fi wvú jemyi.
- 21 Ε je ke mum yene fô 'Elodia le diuu dimew di 'Elod to gee nkaw bô bocee won noo bikuu bi nci le noo bonyii bo baay baay bo Galilee keekume diuu di bó to bokεε wvú.
- 22 Ε waa 'Elodia wvù kpwoon ke ley cen bine, ε fi jon 'Elod bô bonyii bew bo nkaw e. Ε wvú mum gay ê wan wvudvu le, “Bife naa fiεε fi wo koonke, é me enfene wo dvú.”
- 23 Ε wvú bvuu die kelew gay le, “É wo bife naa la ê me, ε è cim nu naa kenkawten ke won wem e, é me enya ê wo.”
- 24 Ε wan kpwoon wvudvu mum buy gen bife ê bwee le, “Me engay le bó efene me bô la?” Ε bwee tfuse le, “Gene egay le bó enya ekole ke Jon Nleseejoo le ê wo.”
- 25 Ε wvù mum yanzen tu jim kan mwaan, gay ê Nfon 'Elod le, “Me ngomte le wo enya ekole ke Jon Nleseejoo le ê me keseen ê juy e.”
- 26 Ε Nfon yuw nonen, ε ye keeshe wvú baay. Geen nje kelew kè wvú to diee wase fwe dvu bonyii bô to nu fô nkaw e, ε wvú fanje yaa egomte keebvuu ekumen diew ye yi wvú to jemyεε ê wan ke.
- 27 Ε wvú mum tum lo nceendaa kan mwaan le wvú egen eto bô ekole ke Jon e. Ε wvú mum gen yew ncaw e, bvuse ekole ke Jon e,
- 28 γεε ê juy e, to dvú nya ê wan wvudvu. Ε wvú fi, buy dvú gen nya ê bwee.
- 29 Ε boom bo ngoo le bo Jon e ke dioo yuw, mum gen jo gvune di Jon e dwey.

Ε Jisos nyaje bonyii bontfuke botin

(Mat 14:13-21; Luk 9:10-17; Jon 6:1-14)

- 30 Ε boom bo ntum e bo Jisos e ke ghan kase tu jim fô wvú le, see mwεem mvunciim mvù bó to gee bô mvù bó to yeεyeε bonyii dvú ê wvú.
- 31 Ε wvú mum ne gay ê bó le, “Ben eto ke ben ben é beene egen bvudvuu bvù bonyii yaa nu ke fó le, elεten caan.” Wvú to gay nonen njefo bonyii nteen to too fô bó to nu, é bomew dioo nen'yi, é bomew no too. Ε bó yaa cim kenke naa lo kefew keedieken ke.
- 32 Ε bô bó mum ley ê kekon e base ye εbonebon no gene fô bvudvuu bvù bonyii yaa nu ke le.

33 Geenen, ε bonyii nteen yen ke bó le no bó gene, kίεε bó, mum ne ê bilaante le bicii no lewte sumtene bó. Ε bó gen fese fó, ε Jisos bó boom bew bo ηgoo le se ke fese.

34 Ε Jisos ke dīoo fεese ê ηkpwaante, yen kebombom ke bonyii le nen ghemm, ε shen koo wvú bó bó, njefo bó to nu diewe njée yì nu se wee ncey e. Ε wvú mum kew no yeeyi bó, ke yeeyi bó bó mwεem nteen.

35 Ε diuu ke dīoo seeyi, ε boom bew bo ηgoo le bence gay ê wvú le, “Fen nu ηkpwaante ε kefew ε gen wase,

36 ke cine bonyii ban e é bó egen bontew bó ela yo nceencee le, eguy mwεem mvubole mvudien.”

37 Ε Jisos tfuse fiew le, “È nu enya ben fīεε é bó edie.” Ε bó bife ê wvú le, “Wo gomte le bese egom bodanali gee fεε eguy mwεem mvudien dvú eto enya ê bó?”

38 Ε Jisos bife ê bó le, “Ben keηke bontuw bo bleed e bomεε? Ben ke gen taa.” Ε bó gen taa, to see le, “Bontuw bo bleed e nu botin bó byé yifīεε.”

39 Ε Jisos mum gay le boom bew bo ηgoo le egay le bonyii eshiyen ηgóo le ηgóo le, yì ηkfunfun e.

40 Nonen, ε bonyii bodvu mum shiiyen fokuse ηgóo le gbwee gbwee bomew mbaanshen mbaanshen.

41 Ε Jisos jo bontuw bo bleed e bo botin ba bó byé yi yifīεε ye, taa we, nya keyoone ê Nyo', mum guushε nya ê boom bew bo ηgoo le, ε bó nya ê bonyii. Ε wvú gawce ten byé yi yifīεε ye ê bó bocii.

42 Ε bonyii bocii die ffuu.

43 Ε boom bo Jisos e bo ηgoo le baance bimbεke bi bleed e bó bi byé yì shεεεε le, ε bí yīnsen ηkáa yuufe ncow fīεε.

44 Bonyii bò to dieε mwεem mvudien mvudvu to nu bolemse bontfuke botin.

Ε Jisos len yì joo le

(Mat 14:22-33; Jon 6:15-21)

45 Ε Jisos mum gay le boom bew bo ηgoo le eley ê kekoη e kaη mwaanη esaa fwe Besayda é wen eshεε egay bonyii le é bó ekfuuyi.

46 Ε wvú ke shεε gay bó le, mum ne ben yì kum e keebunle.

47 Ε ekfun ke jiim, ε kekoη nu wase ê joo entelēη, ε Jisos bεε ke ηkpwaante wvú embeη.

48 Ε wvú yen no boom bew bo ηgoo le katene bó kekoη keekey, njefo fwefwe to too je fwe cile kí. Ε è ke no nu ke diewe en'yulem e ε wvú ne no too fô bó le, lene yì joo le. Ε wvú to too gomte keefey mbew bó le.

⁴⁹ Ɛ bó dīoo yɛn wvú le no wvú lɛne yî joo le, no kpwaake le è nu ñkfusay. Ɛ bó wam foweeɛwe,

⁵⁰ ñjefo bó bocii to nu ɛ yɛn wvú le ɛ kedvum gbwo bó. Kañ mwaan, ɛ Jisos mum jeme ê bó gay le, “Ben ejice mvuntelem mvunen e, è nu me. Fo ben efanè ke.”

⁵¹ No wvú gay nonen, mum ley shii ê kekoñ e bô bó, ɛ fwefwe wvudvu mum lu. Ɛ bó taa nen, ɛ diuw yum bó nen kaww,

⁵² ñje bvufee bvubole to kfufene lo, ɛ bó to baa cim kīeɛ ten fiɛɛ fi bontuw bo blɛɛd e ba to duñci ekumɛ Jisos ke.

Ɛ Jisos fɛ bonyii bo bincɛm e Genɛsalɛt

(Mat 14:34-36)

⁵³ Ɛ bó ke lente mamase buy keba kè Genɛsalɛt e, wow kekoñ ñgem joo le.

⁵⁴ No bó buyɛɛ ê kekoñ e, ɛ bonyii mum kīeɛ lo Jisos kañ mwaan,

⁵⁵ no lewte gene bontɛw bo jó le bocii, bvuse bonyii bo bincɛm e too bô bó ê mvuñkeɛy e naa fɛɛ fò bó to yuuke le Jisos nu fó le.

⁵⁶ Ê Jisos ké gen naa fɛɛ kenɛɛ wvú gen ntɛw e, kenɛɛ elaanɛ, kenɛɛ ñkpwaante, ɛ bonyii no gɛɛle ke bonyii bo bincɛm e fô bonyii ké no taashi. Ê Jisos ké dīoo fele, ɛ bó no lɛke le wvú ecīnɛ ê bó ekum ke naa ñgem ndvu ye le. Ɛ wee tfuu wvù to kumte, mum no bonene.

Mak 7

Bonci bo wee wvu wum e

(Mat 15:1-9)

¹ Dīuu dimew ɛ Bofalasii bô bonyii bomew bô to duñci bonci bo Nyo' le ne Jɛlusalɛm to tase mbew Jisos e.

² Ɛ bó ke nɛ yɛn ɛ boom bo ñgoo le bo Jisos e bomew diekene bô can yile, fi nu le bó to baa cukɛ can ke.

³ Bojuu bocii, sɛ bvuu ge Bofalasii to bii ke ɛ è nu nce woñ wvu bo'icee bobole bo fwele le, le ke è nulo é wee edie fiɛɛ sɛ wvú ɛ cukɛ can lɛñlɛñ no bó to ké cukɛ ke.

⁴ Ke è nulo ten é wee ke ekfulɛ fô way edie fiɛɛ sɛ wvú ɛ cukɛ ye ê yiyɛ je le ke. Ɛ bó bvuu gee mwɛɛm mvumew mvu nce woñ e nteen, ke diɛwɛ keecukɛ mvuñkom noo bibɛɛñ noo bonton.

⁵ Ɛ Bofalasii bô bonyii bô duñci bonci bodvu mum bife ê Jisos le, “È nu ñje la wvù boom buw bo ñgoo le yaa bii nce woñ bo'icee bosɛɛbeene bo fwele le ke? È nu ñje la wvù bó diekene bô can yile?”

⁶ Ɛ Jisos tfuse ê bó le, “Yɛsaya wvù wee ntum Nyo' to nu ɛ jeme keɛɛy le ben nu bonyii bô jemyi jɛɛy gee jɛɛy. Ben gee ke ɛ è nu fiɛɛ fi wvù to sañɛɛ le, Nyo' gayte

le, 'Bonyii ban wvumte me ke fomvu fomvu, e mvuntelem mvubole nu ncejole fô me le.

⁷Bó bunlee me e è nu ke ecici, njefo bó joo mwæem mvù è kpawci bonyii, yæyi le è nu diew yem.'

⁸È nu ke ten no ben cin'yi bonci bo Nyo' le, gæle e è nu bò è gæke bonyii."

⁹È Jisos gay ê bó le, "Ben looci naa kee keetun bonci bo Nyo' le wvu le ben ebii e è nu bonen e.

¹⁰Fí nu e Muses to gay le, 'Wvume ico bô bwoo.' Bvuu gay ten le, 'É wee nan lo ice kenæe bwee, é bó yu lo mweten.'

¹¹Geenen, ben e no gayte finen le, 'É wee kenke fiæ fi è be nelo é wvú efi ice kenæe bwee dvú, e ne e gay ê ice kenæe ê bwee le fiæ fidvu nu wase Koban,' fi nu le è nu wase fi Nyo' le,

¹²tu ben baa bvuu bee le wvú ejo fiæ fidvu efi ice kenæe bwee dvú ke.

¹³Ben gee nonen, gee e diew Nyo' tuu fiæ fi ecici nje nce wene woŋ wvù ben yæyi bonyii dvú. E mwæem mvumew bvuu nu ten dvú nteen diewe mvun e mvù ben gee."

Fie fi nulo ebefe bô wee

(Mat 15:10-20)

¹⁴È Jisos bvuu tee bonyii e bó to, e wvú gay ê bó le, "Ben bocii eyeke eyuw fiæ fi me njemyi, ekiee ntay.

¹⁵Ke fiæ fi wee diee e fí bow ê shem nulo ebefe bô wvú ke. È nu fiæ fi buyte diuw wee le fi beete bô wvú.

[¹⁶Wee wvù kenke bitem keeyuw, e wvú yuw.]"

¹⁷È Jisos ke cine bonyii bodvu le, ley yew, e boom bew bo ŋgoo le bife ê wvú ekume ŋgan wvudvu.

¹⁸È wvú tfuse ê bó le, "Ke ben ten kee mwæem e? Ke ben kee le fiæ ficii fi wee leese ê wvú emvu yaa nulo ebefe bô wvú ke le?

¹⁹Fí nu nonen, njefo fí ké leyte saa gen e è nu fô fitele fiew e ke, bow e è nu ê shem, ke mum ghan buy lo." (No Jisos to gayæe nonen, e fí mum no nu le mwæem mvudien mvunciim yuule lo.)

²⁰È wvú bvuu gen fwe gay le, "È nu fiæ fi buyte yî wee le fi beete bô wee,

²¹njefo mwæem mvù befe mvù wee gee nen'yi fô fitele fiew e. Mwæem diewe boŋkpawce bò befe, keejaŋ kenjaŋ, keecoŋ bvucoŋ, keeyu wee, keejo kpwee wee kenæe dwee wee,

²²keedewkene ejise yî mwɛɛm e, keebuwyi mwɛɛm, keelɛɛle kenlɛɛma, keege nnyɛn, keebene kendoŋ, keebeete bô ediee ɛ bonyii, keebense ye noo keeyuŋsene keyuŋsɛɛ.

²³Mwɛɛm mvù befe mvun mvunciim nen'yi ɛ è nu fô fitele fi wee le sɛ beete bô mwɛɛn.”

Fitele fi kpwoon mvu ɛ è nu wee ketum to lesɛɛ yî Jisos e

(Mat 15:21-28)

²⁴Ɛ Jisos ke nɛ jó, gen keba ke bilaante bì Taya bô Sidon e. No wvú gen jó, ley yew dvumew faŋɛ yaa gomte lɛ wee ekieɛ lɛ wen nu jó kɛ. Geenɛn, ɛ bonyii kieɛ kɛ lo.

²⁵Kpwoon mvu to nu jó ɛ keyoy kè yiile nu yî waa we wvù kpwoon e. Kaŋ mwaan no wvú yuw ekumɛ Jisos, mum to gbwe bikaa biew e.

²⁶Kpwoon wvudvu to nu wee Glek, kɛ è to nu wee Juu kɛ. Bó to boke wvú Fonishia woŋ wvù Silia le. No wvú gbwe nonɛn, mum lɛkɛ Jisos lɛ wvú ebvuse nceendaa dɛwle wvudvu yî waa wen e.

²⁷Ɛ Jisos tfuse ê wvú lɛ, “Cine é bó eyaw enyaŋe boom, njefo kɛ fí nu lɛŋ keejo ŋgu boom elan fô bwé le kɛ.”

²⁸Ɛ kpwoon wvudvu tfuse ê wvú lɛ, “È nu keɛɛy icɛm. Geenɛn, boom ké dioo diekene ɛ bwé no boŋyi kɛ tfúw yì gbwekene fokuse.”

²⁹Ɛ Jisos mum gay ê wvú lɛ, “Nje fieɛ fi wo tfuse fin, wo nulo egene fiuw, nceendaa dɛwle wvudvu nu ɛ cine wase waa wo le.”

³⁰Ɛ kpwoon wvudvu mum nɛ no gene fô yew e, dioo gen yen ɛ waa we jiime fontaw ɛ nceendaa dɛwle wvudvu ɛ buy wase.

Ɛ Jisos ge ɛ kencife no yuuke mwɛɛm jemyi

³¹Ɛ Jisos nɛ ê keba kè Taya le, fey Sidon bvuu fey keba kè Bilaante bi Yuufe le, mum tu je fô Mamase yì Galilee le.

³²Ɛ bonyii bomew ke nɛ to bô wee mvu ɛ è nu kencife ɛ wvú yaa kee keejeme kɛ. Ɛ bó lɛkɛ Jisos lɛ wvú egɛɛ can ye yî ye le, efɛ wvú.

³³ Ɛ Jisos mum jo wvú ɛ bô wvú buy ê kebombom ente no nu ɛbonebon. Ɛ wvú lese boom bew bo can e ê bintuŋtuŋ bi wee wvudvu le, cuy nɛŋ kum leme di wee wvudvu le dvú,

³⁴taa we, shom, jeme ê wvú lɛ, “Ɛfata,” fi nu lɛ, “Yene.”

³⁵Ɛ bintuŋtuŋ bi wee wvudvu le mum yene kaŋ mwaan, ɛ leme diw yaaten, ɛ wvú mum no jemyi naa ntay.

³⁶ Ɛ Jisos mum ciise lo ê bonyii lɛ fô bó ke esee ê wee kɛ. Geenɛn, no wvú to ciise, ɛ è kaa no nu kɛ no bó nu eseŋe gene dvú fwe fwe.

37 Ɛ diuw no yumte bonyii naa baay. Ɛ bó no ghayte, gayte le, “Jisos kee keege mwεem mvunciim naa ntay. Wvú gee Ɛ bincife yuuke mwεem, Ɛ bindvumem jemyi.”

Mak 8

Ɛ Jisos nyaŋe bonyii bontfuke bonεw

(Mat 15:32-39)

1 Ke Ɛdiuw yoya le, Ɛ kebombom ke bonyii le bvuu to tase nen ghemm. Ɛ è ke no nu Ɛ bó yaa bvuu keŋke mwεem mvudien ke, Ɛ Jisos tee boom bew bo ŋgoo le gay ê bó le,

2 “Me ŋkeŋke shen fô kebombom kin e, njefo bó nu wase bee bó Ɛdiuw eta, Ɛ fiε fi bó edie yaa bvuu nu ke.

3 Ɛ me ncine lo bó Ɛ no gene Ɛla Ɛbole, Ɛ bó egen egbwe jeŋ ê je no bomew bó le ne ncejole.”

4 Ɛ boom bew bo ŋgoo le tfuse le, “È nulo Ɛ wee ejo fεε mwεem mvudien ŋkpwaante jan keenyaŋe kfuu ban bonyii dvú?”

5 Ɛ wvú bife ê bó le, “Ben keŋke bontuw bo blæd e bomεε?” Ɛ bó tfuse le, “È nu bososhwiw.”

6 Ɛ Jisos mum gay le kebombom ke bonyii le kedvu eshii fokuse. Ɛ bó shii, Ɛ wvú jo bontuw bo blæd e bo bososhwiw ba, nya keyoone ê Nyo', guushε, nya ê boom bew bo ŋgoo le le bó egawce ê bó. Ɛ bó mum gawce.

7 Bó to keŋke ten mvubyetεε nen caan. Ɛ wvú bvuu jo, nya keyoone ê Nyo', gay Ɛ bó gawce ê bonyii bodvu.

8 Ɛ wee tfuu die ffuu. Ɛ bó baance bimbεke bì to shεεεε, Ɛ bí yiŋsen ŋkåa yisooshwiw.

9 Bonyii bò to dieε to nu diεwε bontfuke bonεw e.

10 Ɛ wvú mum cine bó le Ɛ bó no kfuuyi. Ɛ wvú ley lo ê kekoŋ e kaŋ mwaan bó boom bew bo ŋgoo le mum ne gen keba kè Dalmanuta le.

Ɛ Bofalasii no gomte le Jisos edunεε keŋhaw ke fiε le

(Mat 12:38-42; 16:1-4)

11 Ɛ Bofalasii ke ne to fô Jisos e, kew mbew bó wvú, gay le wvú ege fiε fi duŋci mvuŋgay mvù ne fowe. Ɛ bó to gayte nonen momte lo wvú.

12 Ɛ Jisos shom naa baay, gay le, “Ɛngoke kin gomte fiε fi duŋci mvuŋgay mvù ne fowe keege la dvú? Ɛ me ensee ê ben kecεεy le ke eŋgoke kin nu eyen fiε le ke.”

13 Ɛ wvú mum cine bó le, kase ley ê kekoŋ e, no gene kewvu keki.

Ɛ Jisos tefe boom bew bo ŋgoo le le bó eyene Ɛkumε gee di Bofalasii bó di 'Ɛlod e

(Mat 16:5-12)

14 Jisos to gene ε boom bew bo ηgoo le ε daaye keejo bleed, keηke ke ε è nu ntuw mwaan η kekon e.

15 Ε wvú no teete bó gayte le, “Ben eyenè, bvuu joo kefew yî fintunleen fi Bofalasii noo fi 'Elod e.”

16 Ε boom bew bo ηgoo le mum kew no jemyi εbonεbon ekume fiεε fidvu, gayte le, “Wvú jemyi fintunleen fin nen njefo beene baa keηke bleed ke.”

17 Ε Jisos kieε fiεε fi bó jemyi ekume fí, mum bife ê bó le, “Ben jemyi ε è nu ekume bleed wvú ben baa keηke ke nje la? Ke ben yene wase mwεem e kenεε kee mwεem e? Fí nu le bvufee bvunen baa yene wase le?”

18 Ben keηke ejise yaa yene mwεem e le? Ben keηke bitem yaa yuuke mwεem e? Ke ben kumyi mwεem e?

19 Seke me nto ηguushεε bontuw bo bleed e botin ε bonyii die bontfuke botin, ben to baanci bimbεke bì to sheεtεε ε bí yiηsen ηkáa yimieε?” Ε bó tfuse le, “Yuufe ncow fiεε.”

20 Ε wvú bvuu bife le, “Ekume bontuw bo bosooshwi y bò bonyii be die bontfuke bonεw, ben be baanci bimbεke bì be sheke bí ε yiηsen ηkáa yimieε?” Ε bó tfuse le, “Yisooshwi y.”

21 Ε wvú mum bife ê bó le, “Ke ben kee wase mwεem e?”

Ε Jisos yene ejise kenfefe nte w wvú Besayda le

22 Ε Jisos bô boom bew bo ηgoo le ke lente buy Besayda, ε bonyii bomew to bô kenfefe kemew fô wvú le leke le wvú ekum wvú le efe wvú.

23 Ε Jisos jice wvú le yî kebo le, jo ε bô wvú buysen nte w wvudvu. Ε wvú cuy nceη yî ejise eye le, gee can yî ye le mum bife ê wvú le, “Wo yene fiεε le?”

24 Ε kenfefe kedvu cake ejise we, taa gay le, “Me n'yene bonyii le jiwejiwe ε bó lene nu die wε bite le.”

25 Ε Jisos bvuu gee can yî ejise ε wee wvudvu le, ε wvú taa nen tunη, ε ejise eye mum yuu, ε wvú no yene mwεem mvunciim e ntay.

26 Ε Jisos mum gay ê wvú le, “È genè fô yew e, dioo gene fo wo ebvuu eley nte w e ke.”

Ε Bitá cεε le Jisos nu Mboyse wvú Nyo' to kawεε

(Mat 16:13-20; Luk 9:18-21)

27 Ε Jisos bô boom bew bo ηgoo le ne fó no gene bontεw bo keba kè Kaysalia Filibi le. Ε bó dioo gene, ε wvú bife ê bó le, “Bonyii duu le me nu yeε?”

28 Ε bó tfuse le, “Bonyii bomew duu le wo nu Jon Nleseεjoo, bomew le Elayja, ε bomew duu le wo nu wee ntum Nyo' mvu.”

²⁹ Ɛ wvú mum kase bife ê bó ƙe, “Ben duu finen ƙe me nu yee?” Ɛ Bita tfuse ƙe, “Wo nu Mboyse wvù Nyo' to kawee.”

³⁰ Ɛ Jisos mum ciise lo ê bó ƙe fo bó ƙe emom esee fifin ê wee ekume wen ƙe.

Ɛ Jisos jeme ekume kfuu kpwe yì wvú nu ke ekpwe

(Mat 16:21-28; Luk 9:22-27)

³¹ Ɛ wvú mum ƙew no yeyi boom bew bo ngoo le jemyi ekume ekole ƙew ƙe, “Wee wvù diee nu Waawee ƙeƙe keeke eyen bonƙew nteen, é bonyii bò saake woƙe bô bocee ncese bo baay baay noo bonyii bò duƙi bonci bo Nyo' le ema lo wvú. Bó nu ke emum eyu wvú, é ediuw ke ebuy eta é wvú ekase ebuy yì kpwe le.”

³² Wvú to jemyi mwem mvun ê bó endan. Ɛ Bita mum jo wvú ƙe bô wvú lewse ye, mum ƙew no saake wvú yì fiee fidvu le.

³³ Ɛ Jisos banƙe ye, taa boom bew bo ngoo le, wam Bita gay ƙe, “Ja ê me ejise Satan! Wo jewsee lo me njefo ƙe wo leeme ê keba ke Nyo' le ƙe. Wo leeme ƙe è nu ê ke wee wvu wum e.”

³⁴ Ɛ wvú mum tee kebombom ke bonyii le bô boom bew bo ngoo le, gay ê bó ƙe, “É wee gomte keenu wee wem, tu wvú ƙeƙe keetun ekole ƙew, etuu kentam ƙew ebii me le.

³⁵ Ben ekeè ƙe wee wvù bawci nshii we fo wvú elase, nu ke elase ƙe lo. Geenen, wee wvù lase nshii we nje me noo nje saaka wvù jee nu ƙe wvú ƙe bawce lo nshii wvudvu.

³⁶ É bó baanci naa woƙe wvun nen tfuu ƙe nya ê wee wvú ƙe die, ƙe ƙe lase nshii we, é sew wvudvu enu la?

³⁷ Fiee fi è nulo é wee esum keyoy ƙew dvú nu la?

³⁸ Ben ekeè ƙe é wee wuumene keebii me le noo diew yem e ente jo engoke kè buwyi mwem kin kè nu diewe kpwoon wvù nu ƙe cine wase dweese le ƙe no gee ƙe è nu nsake le, é wvú no keè ƙe wee wvù diee nu Waawee nu ke ewuumen ten mweten seke wvú ƙe kase ƙe to ente jo bvukuke bvu Ice bô bonceendaa bo Nyo' le bò yuule le.”

Mak 9

¹ Ɛ Jisos bvuu gay ê bó ƙe, “É me ensee ê ben keceey ƙe, bonyii bomew leeme fen ƙe bó yaa nu ke eyuw wvun kpwe se bó ƙe yen ƙe bvunfon bvu Nyo' le ƙe to bô mvungay mvumwew ƙe.”

Ɛ nfieesen Jisos kumen

(Mat 17:1-13; Luk 9:28-36)

² Ɛ ediuw ke fey esoocan, ƙe Jisos jo Bita bô jem noo Jon ƙe bô bó ben yì kum wvumew e ƙe wvú defe ewe, no nu fó ebonebon. Ɛ bó ƙe ne yen ƙe nfieesen ye ƙe kumen ê bó ejise,

- ³ε ndvú ye baa lawkene naa fele lo no è nulo é wee ecuke fokuse fen é yí ebaa.
- ⁴Ε bó ke ne yen ε Elayja bô Muses ε buynen fô bó le, ε no jemyi bô bo Jisos.
- ⁵Ε Bitá ne bvumten gay ê Jisos le, “Cee Ekole, fí jee no beene nu fen. Cine é bese eyoo cún she, é yimi enu yo, yimi yi Muses, ε yimi nu yi Elayja.”
- ⁶Wvú to jeme nonen njefo kedvum to nu ε gbwo bó baay ε wvú fañe yaa bvuu kieε fiεε fi wvú ejeme ke.
- ⁷Κε no wvú jeme nonen, ε kembew ne to ban bó, ε diew jeme ê kembew kedvu le le, “Wvun nu Waa wem, ε wvú nu fitele fiem. Ben eyuukè ε è nu wvú le.”
- ⁸Ε bó ne sese dioo taa fañe yaa bvuu yen bonyii ba le ke, yen ke wase ε è nu Jisos e maan.
- ⁹ Ε bó ke ne yí kum wvudvu le dioo booke, ε Jisos ciise ê bó le fo bó ke esee fiεε fi bó be yen e ê wee se wee wvú diee nu Waawee ε buy wase yí kpwe le ke.
- ¹⁰Ε bó yuw ke nonen gee ê bó eshem, geenen no ghayte ke ebonebon le laa mbuy wvu yí kpwe le wvun se nu la le.
- ¹¹ Ε bó ne bife ê Jisos le, “È nu nje la wvú bonyii bô dunçi bonci duu le Elayja keñke keeke eyaw eto é Mboyse wvú Nyo' to kawee se to?”
- ¹²Ε Jisos tfuse ê bó le, “È nu keceey le Elayja nu ke eyaw eto ekene mwεem mvunciim é mvú etu no mvú to nu. Geenεn, è no nu nje la wvú bó nu ε san le wee wvú diee nu Waawee keñke keeke eyen bonñew nteen, é bonyii ema wvú?”
- ¹³ Geenεn é me ensee ê ben le Elayja nu ε to wase, bonyii ε ge fiεε fi bó koonke bô wvú. Ε è nu ke no bó to sanee ekume wvú.”

Ε Jisos bvuse keyoy kè yiile yí wan mvu le

(Mat 17:14-21; Luk 9:37-43a)

- ¹⁴Ε Jisos bô boom bew bo ηgoo le ke bow to buy fô boom bew bo ηgoo le bomew to nu, yen ε kebombom ke bonyii le ke baay ε gem bó, ε bonyii bomew bô to dunçi bonci bo Nyo' le beeke mbew bô bó.
- ¹⁵Καη mwaan no kebombom kecii yεεε Jisos e, mum sese wvú baay, lewte gen gay wvú le.
- ¹⁶Ε wvú bife ê bó le, “Ben beeke mbew ε è nu ekume la?”
- ¹⁷Ε wee tfuse ê wvú ê kebombom ente le, “Wee n'yεeyi, me mbe ntoo bô waa wem fô wo le njefo keyoy kemew nu yí ye le, ε è nu kè ké ge ε wee tu kencife.
- ¹⁸Keyoy kedvu ké cuute wvú tufe fokuse, ε diffuw no buyte ê wvú emvu ε wvú ηgeci bigew, nen'yi taame. Me ε ηgay le boom buw bo ηgoo le ebvuse keyoy kedvu, bó ε mom ηkuuñ.”

19 Ɛ Jisos yuw nonen, gay ê bó le, “O oo! Ɛngokε kε baa lese fitele yí Nyo' le kin. Me nu ηke enu beene engen embuy nεε? Me nu ηke enkuu shém bô ben engen embuy nεε? Ben eto bô wan wvudvu fen enya ê me.”

20 Ɛ bó mum jo wan wvudvu no too bô wvú fô Jisos e. No keyoy kedvu yεnεε Jisos e, mum cufe wan wvudvu kaη mwaan ε wvú gbwe fokuse no biηlene fó, ε diffuw buyte emvu.

21 Ɛ Jisos bife ê cee wan wvudvu le, “Fieε fin to kew seke la?” Ɛ wvú tfuse le, “Fí to kew ε wvú bεε caan.

22 Keyoy kedvu nu ε tufe wase wvú bokaη e bokaη e ηguy e noo ê joo le gomte keeyu wvú. Ɛ wo nulo ege fieε, kee wo, é wo cam ke shen fô bese le, fi bese.”

23 Ɛ Jisos bife ê wvú le, “Le laa è nulo é me ege fieε le le? Nyo' nulo ege fieε ficii fô wee wvù nu ε lese fitele yí ye le.”

24 Kaη mwaan ε cee wan wvudvu mum fuη foweεwe le, “Me nu ε nlese fitele yí Nyo' le. Gee é me embvuu enlese enfey lo nonen.”

25 Ɛ Jisos dioo yen ε kebombom ke bonyii le lewte too taashi fô wvú to nu, ε wvú wam keyoy kε yiile kedvu gay le, “Wo, keyoy kε yiile kin kε gee ε wan wvun yaa jemyi ke yaa yuuke ten mwεem ke, me ηgayte ê wo, buyε yí wan wvun e, egen lo. Fo wo ke ebvuu eley yí ye le ke.”

26 Ɛ keyoy kedvu fuη foweεwe, bvuu cufe wan wvudvu, tufe ê je yì befε le, mum buy yí ye le. Ɛ wvú no jiime fokuse ke diεwe keηkpwe ke wee le. Ɛ wee nteen yen nonen, mum no duu le, “Wvú nu ε kpwe wase.”

27 Ɛ Jisos jicε wvú le yí kebo le cake ε wvú leem we.

28 Ɛ Jisos bô boom bew bo ηgoo le ke dioo gen ley yew, ε bó bife ê wvú ejim ejim le, “È nu nje la wvù bese be mom ηkuuη keebvuse nceendaa dεwle wvudvu?”

29 Ɛ wvú tfuse ê bó le, “Fieε fi nulo ebvuse kfuu wvun nceendaa nu ke bunle yì temyi maan. Ke è nulo é fieε fimew jεey ebvuse ke.”

Ɛ Jisos bvuu jeme εkumε kfuu kpwe yì wvú nu ke ekpwe

(Mat 17:22-23; Luk 9:43b-45)

30 Ɛ bó ke nε fó fey je yì Galilee le, ε Jisos yaa gomte le wee ekieε ke,

31 njefo wvú to lene yεeyi boom bew bo ηgoo le. Wvú to yεeyi bó le bonyii nu ke enya wee wvù diee nu Waawee can bonyii le é bó eyu wvú. Ɛ bó dioo ε yu wvú nonen, é ke edioo enu εdiuw εta, é wvú ebuy yí kpwe le.

32 No wvú gay nonen, ε bó faηε yaa kieε fieε fi wvú jemyi ke, geenen, no fane keebife.

Wee wvu baay nu yεε?

(Mat 18:1-5; Luk 9:46-48)

33 Ɛ bó ke gen buy Kafana'um, ke dīoo ley nu yew Ɛ Jisos bife ê bó le, “Ben be beeke mbew ê je Ɛ è nu ekume la?”

34 Ɛ bó mey diuw tfu, njefo bó to lene ê je beeke mbew ebonebon le laa wee wvu baay se nu yee le.

35 Ɛ Jisos shii fokuse, tee bó bo yuufe ncow bofee gay ê bó le, “É wee gomte keenu wee wvu fwe, tu wvú keŋke keejo ekole kew le wen nu kencilejime noo wee wvú lemte fô bonyii bocii le.”

36 No wvú gay nonen, mum jo wan caan leke ê bó enteleŋ, mum kase jo koyce gay ê bó le,

37 “É wee fiisene wan diewe wvun e ê diee diem e, tu wvú fiisene Ɛ è nu me. Wee é fiisen me, tu ke wvú fiisene Ɛ è nu ke me ke, tu wvú fiisene ten Ɛ è nu wee wvú tum me.”

É wee baa kicine wo, tu wvú tomte wo

(Luk 9:49-50)

38 Ɛ Jon gay ê wvú le, “Wee n'yeyi, bese se nu Ɛ yen wee mvu le Ɛ wvú teŋe diee diuw se bvuse bonceendaa bo dewle le yî bonyii le, bese Ɛ kan, njefo wvú baa nu wee wesebeene ŋgoo ke.”

39 Geen Ɛ Jisos tfuse ê bó le, “Fo ben ecilè kfuw wvuw Ɛ wee ke. Ben ekeè le é wee gee keŋghaw ke fiee le teŋe diee diem, tu ke è nulo é wvú ebvuu ejeme fiee fi befekume me ke.

40 É wee baa kicine beene, tu wvú tomte beene.

41 É me ensee ê ben keceey le, é wee nya ke naa fiko fi joo le ê ben njefo bó teŋe ben le bonyii bo Klistu le, tu ke è nu naa lo é wvú ke efufe mmawce we ke.”

Mwɛɛm mvù nɛlo egee Ɛ bonyii gee bibefe

(Mat 18:6-9; Luk 17:1-2)

42 Ɛ Jisos bvuu gay le, “É è nu le wee ege é wan mwaan ŋgoo boom bo caan ban bô nu Ɛ lese fitele yî yem e ege kebefe, é fí ejee fô wvuw Ɛ wee le le bó esheŋke kebwee ke diene le ke baay ê kendoŋ kew e, edomse wvú ê joo yi baay e.

43-44 Fí Ɛ bvuu è no nu le, é kebo kuw gee Ɛ wo gee kebefe, é wo sum kebo kedvu. Fí jee le wo eley nshii wvú mey lo le bô keŋkfuyte ke kebo le, efey keekeŋke can yicii egen ŋguy wvu baay e wvú fiee sekecii se njime.

45-46 É ekale kuw gee Ɛ wo gee kebefe, é wo sum ekale kedvu. Fí jee le wo eley nshii wvú mey lo le nu nteŋe, efey keekeŋke bika bicii é bó elan wo ŋguy wvu baay e wvú fiee sekecii se njime.

47 É jise diuw gee Ɛ wo gee kebefe, é wo min jise didvu. Fí jee le wo eley bvunfon bvū Nyo' le bô jise dimwaan, efey keekeŋke ejise ecii, é bó elan wo ŋguy wvu baay e.

48 Bvudvuu bvun nu bvù yín yí diee bonyii fó yaa ké kpweken ke, e nguy yaa ké jime fó ke.

49 Ben ekeè le bó nu ke eseyse wee tfuu bô nguy lenlen no bó ké seyse fiε bô nkauw.

50 Nkauw nu fiε fi jee, geenεn é yí nelo ε cife, é wo ebvuu ege nεε dvú é yí se ebvuu ekase eyeke? Ben enù diewe nkauw yí yeke le, é wee noo wee enù yí nyεkeey e.”

Mak 10

Ekume keekuj kpwoon

(Mat 19:1-12; Luk 16:18)

1 E Jisos ke ne jó, gen keba ke won e kè Judea le, lente Joo Joodan gen wvuke. E bibombom bi bonyii le bvuu no taashi too fô wvú le, ε wvú no yεeyi bó ke no wvú to ké no yεeyi.

2 E Bofalasii ke ne to keemom wvú, mum bife ê wvú le, “Nci nu ε bee le è nulo é wee ekuj kpweε?”

3 E Jisos kase bife ten ê bó le, “Muses to nya nci le ben egeè nεε?”

4 E bó tfuse le, “Muses to nu ε cine le è nulo é wee ekuj kpweε. É wvú dioo kuunke, saη ηwa' wvù duηci le wen nu ε kuη wase wvú nya ê wvú.”

5 E Jisos tfuse ê bó le, “È to nu nje bikuu binen bi temyεen wvù Muses to saηε nci wvun.

6 Geenεn, è to nu fonkew seke Nyo' to bomte mwεem, ε wvú bom ε è nu diemsen bô kpwoon. No wvú bom nonen gay le,

7 ‘È nu nje fife wvù diemsen nu ke ecine ice bô bwee le etaashε bô kpweε,

8 é bó bofεε emum etu wase wee mwaan.’ Nonen, ke bó bee bonyii bofεε ke, bó nu wase wee mwaan.

9 Fí ε mum ε no nu le, fiεε fi Nyo' nu ε taashε wase, fo wee emom egawsen ke.”

10 E Jisos bô boom bew bo ηgoo le ke dioo nu yew, ε bó bvuu bife ê wvú ekume fiεε fidvu.

11 E wvú tfuse ê bó le, “Naa yεε wvù kuη kpweε ε jo wvumvu, nu ε wvú ε ge kebefε ke diewe keejaη kpwoon mvu.

12 É kpwoon buy dweese le, ε gen ê diemsen mvu le, tu wvú nu ε ge kebefε fô dweese le keejim bô diemsen mvu.”

É Jisos laη kembonen yí boom bo caan caan e

(Mat 19:13-15; Luk 18:15-17)

13 Ɛ bonyii ke ne no too bô boom fô Jisos e le wvú ekum bó le, ɛ boom bew bo ηgoo le no saake lo bó.

14 Ɛ Jisos dioo yen nonen, ɛ shém ton'ye wvú, ɛ wvú gay ê bó le, “Ben ecine é boom bodvu etoo fô me le, fo ben ejewsè bó ke, njefo bvunfon bvú Nyo' le nu ɛ è nu fô bonyii diewe boban e.

15 É me ensee ê ben kecɛɛy le é wee baa efiisen bvunfon bvú Nyo' le ke diewe wan caan e, wvú saa ke eley bvunfon bvudvu le ke.”

16 No wvú gay nonen, mum no joo bó koyci, gɛele can yî bó le, laaŋke kembonen yî bó le.

Jisos bô cee kpaw

(Mat 19:16-30; Luk 18:18-30)

17 Ɛ Jisos ke ne le wen egene, ɛ wee mvu lewte to tum envuw ê wvú ejise bife ê wvú le, “Wee n'yɛɛyi, wo wvù wee wvù jee, fiɛ fi me ηkeηke keeηge nse ηkeηke nshii wvù mey lo nu la?”

18 Ɛ Jisos tfuse ê wvú le, “Wo teηe me le wee wvù jee nje la? Ke wee nu dvú wvù jee ke. É nu ke Nyo' maan wvù jee.

19 Ke wo kee bonci bò le, ‘Fo wo eyu wee, fo wo ejaη kpwee wee, fo wo econ bvucou, fo wo eben jim nsaw mbiay, fo wo efiw kenfiw, noo le è wvumtè ico bô bwoo?’”

20 Ɛ wee wvudvu tfuse ê Jisos le, “Wee n'yɛɛyi, bonci ban bocii nu ɛ me nto ηkew wase no ηgɛele naa ɛ me mbeɛ cuwee.”

21 Ɛ Jisos taa wvú nen tuηη, koη wvú, mum gay ê wvú le, “Tu fiɛ nu ɛ sheɛ fimwaaη fi wo beɛ ege. Gene egese mwɛem mvù wo keηke, egaw bigew bidvu ê bonyii bo kefufe le, é wo ke emum ekeηke ntfu ɛ è nu woη wvu we le. É wo dioo e ge nonen, emum eto ebii me le.”

22 No Jisos jeme nonen, ɛ wee wvudvu yuw ɛ bvushiw tfuse lo wvú, ɛ wvú baηke ye no gene nu lo shen shen, njefo wvú to keηke kpaw baay.

23 Ɛ Jisos ne baηke ye taa boom bew bo ηgoo le nen, gay ê bó le, “Fí nu ke etemyi baay fô bonyii bo kpaw e keeke eley bvunfon bvú Nyo' le.”

24 Ɛ njeme wvudvu ffumse boom bew bo ηgoo le. Ɛ Jisos bvuu gay ê bó le, “Boom bem, fí temyi baay fô wee le keeley bvunfon bvú Nyo' le!

25 Fí nu cekey fô nyambala le keeley ê jise di tase le fele fô wee kpaw e keeley bvunfon bvú Nyo' le.”

26 Ɛ bó yuw nonen ɛ fí ghaw bó baay, ɛ bó no ghayte le, “É è fen nu nonen, é ke eyuu eboy yeɛ?”

27 Ɛ Jisos kase taa bó nen, gay le, “Fifin nulo eghaw wee wvu wum, geenen yaa nulo eghaw Nyo' ke, njefo Nyo' nulo ege fiεe ficii.”

28 Ɛ Bitamum ne gay ê Jisos le, “Taa eyen, bese nu ε cine wase fiεe ficii le ε no bii wo le.”

29 Ɛ Jisos tfuse ê wvú le, “É me ensee ê wo kecεey le, ke wee nu dvú wvù nu ε cine yew e, kenεε boom bo bwee le, kenεε jéme ye le, kenεε bwee le, kenεε ice le, kenεε boom e, kenεε ηεε le, ε wvú cin'yi nje yem noo saaka wvù jee wvù wvu Nyo',

30 wvù nu ke enu se wvú ε kenke yéw noo boom bo bwee le, noo jéme, noo bobwee, noo boom, noo ηεε yí nshii wvu keseen e bokan gbwee ke. Ɛ bonyii nu ke ebone ten bikaa ê wvú ejim, é ke dioo enu kefew ke nshii wvù too le, é wvú ekenke nshii wvù mey lo.

31 Geenεn, bonyii nteen bò nu fwe keseen nu ke enu ejim, é nteen bò nu ejim keseen enu fwe.”

Ɛ Jisos bvuu jeme yí bokan e botεte ekumε kpwe ye

(Mat 20:17-19; Luk 18:31-34)

32 Ɛ Jisos bô boom bew bo ηgoo le ke ne jo je, no bene Jelusalem ε wvú saa fwe. Ɛ boom bew bo ηgoo le kenke lo nghaw. Ɛ bonyii bò to bii ten no kenke nfan. Ɛ Jisos bvuu jo boom bew bo ηgoo le bo yuufe ncw bofεε ε bô bó lewse ye ε wvú no seje ê bó fiεe fi nu ke ekooy bô wvú.

33 Ɛ wvú gay ê bó le, “Ben eyeke eyuw, beene bene wase gene Jelusalem, ε bó nu egen enya wee wvù diee nu Waawee can bocee ncese bo baay baay noo bonyii bò dunji bonci bo Nyo' le, é bó esaw wvú esumten le bó eyu wvú, emum enya wvú can bitum e,

34 é bó esεwse wvú, cuyte nceη yí ye le, suunke wvú, emum eyu wvú, é ke dioo enu ediuw εta, é wvú ebuy yí kpwe le.”

Ɛ Jεm bô Jon lεke bintaw bi baay baay ê Jisos

(Mat 20:20-28)

35 Ɛ Jεm bô Jon bò to nu boom bo Sebεdee le ne bence to fwe dvu Jisos gay ê wvú le, “Wee n'yεeyi, fiεε nu dvú fi bese gomte le wo ege fô bese le.”

36 Ɛ wvú bife ê bó le, “Ben gomte le me enge la fô ben e?”

37 Ɛ bó tfuse le, “Bese gomte le seke wo nu yí bvukuke bwuw e, é bese eshii yí bintaw bi baay baay e, wee mvu ê εbo kuw ke εcεey e, wvumvu ê εbo ke εηkoηko le.”

38 Ɛ Jisos tfuse ê bó le, “Ke ben kee fiεe fi ben biite ke. È nulo é ben ke ewu fiko fi ηgew e fi me nu ηke en'wu, kenεε eley kfuu ηgew wvu baay wvù me nu ηke enley wvú le?”

³⁹ Ɛ bó tfuse ê wvú le, “Bese nulo ke ege.” Ɛ Jisos gay ê bó le, “Ben nulo ewu fiko fi ɲgew e fi me nu ɲke eɲ'wu, eley ten kfuu ɲgew wvu baay wvù me nu ɲke enley e,

⁴⁰geenen ɛ keeshii ê ebo kem ke eceey e kenɛɛ ke eɲkoɲko le yaa nu bvudvuu bwem keenya ê wee ke. Mondvuum modvu nu fô bonyii bò bó nu ɛ seyse wase fô bó le.”

⁴¹Ɛ kebese ke boom bo ɲgoo le bo Jisos e bo yuufe dioo yuw ekume fiɛɛ fidvu mum no ton'yi shém bô Jem noo Jon.

⁴²Ɛ Jisos tee bó bocii ɛ bó to, ɛ wvú gay ê bó le, “Ƙe ben kee le bonyii bò è nu bò saake bitum ké no shiile lo yî bonyii bobole, ɛ bonyii bo baay baay bobole duɲci mvuɲgay mvubole ê we jo bó?”

⁴³Ƙe fifiɛ keɲke keenu ê ben enteleɲ ke. Wee wvù gomte keenu wee wvu baay ê ben enteleɲ keɲke keenu wvù lemte lo ben e.

⁴⁴Wee é no gomte keenu wee wvu fwe ê ben enteleɲ, tu wvú keɲke keenu nfwa wee tfuu.

⁴⁵Ben ekeè le ke wee wvù diee nu Waawee to to le bonyii elemte lo wvú le ke. Wvú to to keelem lo fô bonyii le, enya nshii we keesum wee nteen can kpwe le.”

Ɛ Jisos yene ejise Batimayus

(Mat 20:29-34; Luk 18:35-43)

⁴⁶Ɛ bó ke len to buy ntew wvù Jelikú le. Ɛ Jisos ke dioo nen'yi jó bô boom bew bo ɲgoo le noo kebombom ke bonyii le, ɛ kenfefe kemew ɛ shii diuw je le lɛke mwɛɛm ɛ diee nu le Batimayus, wvù waa Timayus.

⁴⁷Ɛ wvú dioo yuw le è nu Jisos wvu Nasalet, ɛ wvú mum kew no wamte foweɛwe le, “Jisos, Waa Nfon Dawe, came shen fô me le.”

⁴⁸Ɛ bonyii nteen ne kew no wamene wvú gayte le wvú ebaɲ lo. Geenen ɛ wvú bvuu mese wam lo foweɛwe le, “Waa Nfon Dawe, came shen fô me le.”

⁴⁹Ɛ Jisos leem, gay le bó etee wvú. Ɛ bó mum tee kenfefe kedvu gay le, “Ɛkole kuw ɛ joɲ wase, ja we, wvú teɲe wo.”

⁵⁰Ɛ kenfefe kedvu mum mwase ndvu ye fokuse, may we gen fô Jisos e.

⁵¹Ɛ Jisos bife ê wvú le, “Wo gomte le me eɲge la fô wo le?” Ɛ kenfefe kedvu tfuse le, “Wee N'yɛɛyi, me ɲgomte keen'yene mwɛɛm e.”

⁵²Ɛ Jisos mum gay ê wvú le, “È gene fiuw. Fitele fi wo lese yî yem e nu ɛ ge wase wo ɛ bonen.” Ƙaɲ mwaɲ nonen ɛ ejise eye mum yuu ɛ wvú no yene mwɛɛm e, mum no bii Jisos e jò wvú to gene.

Mak 11

Ɛ bó fiisen Jisos Jɛlusalɛm diɛwe Nfon e

(Mat 21:1-11; Luk 19:28-40; Jon 12:12-19)

¹Ɛ Jisos bô boom bew bo ηgoo le len ke dioo feηene Jelusalem, nu wase mbew ntew wvù Betfaj bô wvù Betani le bô nu mbew Kum Bite bi Olif e, ε wvù baa boom bew bo ηgoo le bofεε tum,

²gay ê bó le, “Ben egen ntew wvu fwe we le. Ben nu ke eleyte jó nen kan mwaan, eyen waa kembεεbey e ε bó ε suu, ε wee ke baa ben wase yî dvú le ke, é ben efay eto dvú.

³É wee bife ê ben laa ben fayte nje la le, é ben tfuse le Cee Ekole kεηke shiee wvudvu, ε wvù nu ekase etfuse jim ke keseen keseen.”

⁴Ɛ bó mum ne gen yen waa kembεεbey wvudvu le ε bó ε suu diuw fwese yew mi le diuw je le. Ɛ bó mum fay.

⁵Ɛ bó dioo fayte ε bonyii bomew bô to leeme fó bife ê bó le, “Ben gee ε è nu la? Ben fayte waa kembεεbey we nje la?”

⁶Ɛ bó mum see ê bó fiεε fi Jisos be gay. Ɛ bó mum cine ε bó no gene dvú.

⁷Ɛ bó to dvú fô Jisos e, yey ndvú yibo yî nyam yidvu le, ε Jisos mum ben.

⁸ Ɛ bonyii nteen no yeyte ndvú ê je, ε bomew faasshi tíew bite ηkpwaante, yeyte ten ê je.

⁹ Ɛ bonyii bô to gene fwe dvu Jisos noo bô to bii ejim no wvuuyi le, “Eeeee, mbense enù fô Nyo' le læε! Nyo' nu ε laη kembonen yî wee wvù too ê diee di Tata le læε!

¹⁰ Nyo' nu ε laη kembonen yî bvunfon bvu icee wesebeene wvù Dawe le bvù too le! Eeeee, mbense enù fô Nyo' wvu fowe le læε!”

¹¹Ɛ Jisos gen fεse Jelusalem, ley fô yew ncese le, taa no mwεem mvunciim nu. Ɛ wvù dioo mεse ε kefew ε gen wase ε bô boom bew bo ηgoo le bo yuufe ncow bofεε ne gen Betani.

Ɛ Jisos jiy kete kemew

(Mat 21:18-19)

¹²Ɛ ekfuη buy yuu ε Jisos bô boom bew bo ηgoo le ne Betani bvuu no gene Jelusalem, ε jeη no yuu wvú.

¹³ Ɛ wvù laη jise yen kete kemew e ncejole ε kí tæke ε bó ké no diee. Ɛ wvù mum no gene fó keeyen laa è nulo é wen ekoy fiεε yî dvú le edie le. Ɛ wvù dioo gen buy fó faηe yaa yen fiεε le yî dvú le ke, yen ke ε è nu bibε le maan, njefo è to baa nu kefew kè kí ké no yumte ke.

¹⁴Ɛ wvù mum gay ê kete kedvu le, “Fo wee bæε ke ebvuu eyuu edie fiεε yî yo le ke.” No wvù gay nonen ε boom bew bo ηgoo le yuw.

Ɛ Jisos kuη bonyii bo way e fô yew ncese Nyo' le

(Mat 21:12-17; Luk 19:45-48; Jon 2:13-22)

15 Ɛ bó ke gen fese Jelusalem, ɛ Jisos gen fô yew ncese le kew no kuunke bonyii bò to kamene way fó. Ɛ wvú no kuunke nonen baashi bidan bi bonyii bò to kumene bigew e, noo bintaw bi bonyii bò to geese bibembɛ le.

16 Ɛ wvú faɲɛ yaa bvuu bee ten ɛ wee etuu fiɛɛ elen edaɲsen dvú fô yew ncese le ke.

17 Ɛ wvú no yɛɛyi bó gayte ɛ, “Kɛ bó nu ɛ saɲ ɛ Nyo' gayte ɛ, ‘Yew wen nu ɛ bó nu ke eteɲɛ ɛ yew bunle fô bitum e bicii?’ Geenen ben ɛ baɲke ɛ tu tfum bocooɲ.”

18 Ɛ bocee ncese bo baay baay bô bonyii bò to duɲci bonci ke yuw mum no gomte je yì bó eyu wvú jó. Bó to keɲke nfan ekumɛ wvú njefo kebombom ke bonyii le to yuuke wase n'yɛɛyi we ɛ diuw yumte lo bó.

19 Ɛ è ke dioo nu fokieɲuu, ɛ Jisos bô boom bew bo ɲgoo le buy ê kelaante kedvu le.

N'yɛɛyi wvù nen'yi yî kete kè Jisos to jɲɛɛ le

(Mat 21:20-22)

20 Ɛ Jisos bô boom bew bo ɲgoo le ke buy no fele fontaɲentaɲ, yen kete kie le ɛ kí ɛ yowlɛn wase kecii ɛ shii ɛ buy yî geɲ e.

21 Ɛ Bita kume fiɛɛ fi se kooyɛɛ, jeme ê Jisos ɛ, “Wee N'yɛɛyi, yen no kete kie kè wo se jɲɛɛ ɛ yowlɛn wase.”

22 Ɛ Jisos jeme ê bó bocii ɛ, “Ben elese fitele yî Nyo' le.

23 Ɛ me ensee ê ben keceɛy ɛ, é wee gay ê kum wvun ɛ, ‘Mvuwe ye fen egen egbwe ê joo yi baay e’, ɛ wvú gayte nonen yaa maɲene ke ê fitele le, ɛ wvú ɛ bee le fiɛɛ fi wvú gay nu ekooy, é wvú emvuwe.

24 Nonen é me ensee ê ben ɛ, fiɛɛ ficii fi ben lɛke ê bunle le, ɛ ben ɛ bee le ben nu ɛ keɲke wase, nu ɛ ben nu ekeɲke.

25 Ben dioo leem ten keebunle, é è nu ɛ wee keɲke wee mvu fô fitele le, é wvú lɛɛshe nya ê wvú. Ben egeè nonen wvu ɛ Icee wene wvù nu fowe elɛɛshi ten binen bibefɛ.

[**26** Ɛ ben baa elɛɛshi bibefɛ bi bonyii bomew e, Icee wene wvù nu fowe saa elɛɛshi ten binen ke.]”

Ɛ bó bife fô mvuɲgay mvu Jisos e nɛ

(Mat 21:23-27; Luk 20:1-8)

27 Ɛ Jisos bô boom bew bo ɲgoo le bvuu gen ley Jelusalem. Ɛ wvú ke dioo ghanci fô yew ncese le, ɛ bocee ncese bo baay baay bô bonyii bò duɲci bonci bo Nyo' le noo bonyii bò saake woɲ nɛ to yen wvú le,

28 bife ê wvú ɛ, “Wo jo fɛɛ mvuɲgay ɛ sɛ no gee mwɛɛm mvun? È nya yɛɛ mvuɲgay mvudvu ê wo ɛ wo egeè mwɛɛm mvun?”

²⁹Ɛ Jisos gay ê bó le, “Me nu embife fiεε ê ben fimwaaŋ, é ben dīoo ε tfuse, é me emum ensee ê ben wee wvù nya mvuŋgay le me eŋgeè mwεεm mvun.

³⁰È to nya yεε mvuŋgay ε Jon sε no leese bonyii ê joo? È to nya Nyo' nuu wee wvu wum ε? Ben ke tfuse é me en'yuw!”

³¹Ɛ bó nε no keŋene εbonebon le, “É beene tfuse le è to nya Nyo', é wvú ebife ê beene le laa ε è ge la fo beene ebee Jon e le?”

³²Beene ε tfuse le è to nya wee wvu wum, é fí ecem jó?” Bó to fane bonyii njefo bonyii bocii to nu ε bee le Jon to nu naa wee ntum Nyo'.

³³Nonen, ε bó mum tfuse ê Jisos le, “Ke bese kee ke.” Ɛ Jisos mum gay ê bó le, “Tu ke me nu ensee ten ê ben wee wvù nya mvuŋgay ê me le me eŋgee mwεεm mvun ke.”

Mak 12

Ɔgan εkumε bonyii bò wee to tεεε wεε ê bó

(Mat 21:33-46; Luk 20:9-19)

¹ Ɛ Jisos mum nε no jemyi ê bó ê boŋgan e le, “Wee mvu to nu ε lem wεε mvuntam mvù bó keenci mbvuum dvú, gem bô ketaaŋ keεkeε, cim fò bó nu ke ekoyte mvuntam mvudvu somte ε mbvuum buyte, tum ketaale ke wee ncey e wene dvudvu, mum tεse wεε wvudvu ê bonyii, mum nε gen ketum kemew e.

²Ɛ kefew kè bó ké no koyte ke to kocen, ε wvú tum waa we lemme mvu fô bonyii bò wvú to tεεε wεε ê bó le le bó enya mvuwene mvuntam é wvú eto dvú.

³Ɛ wvú gen ε bó kaa koo lo suŋ, kuŋ ε wvú tu jim cancan.

⁴Ɛ wee wεε we bvuu tum wvumvu waa lemme, ε wvú gen ε bó bvuu suŋ kay εkole, shoose wvú.

⁵Ɛ wvú bvuu tum wvumvu, ε bó yu wvuwe. Ɛ wvú bvuu tum bomew mwaan mwaan ε bó duule lo, ε bó suŋ bomew, yuwyε bomew.

⁶ Ɛ wvú ke tum, ε è to ke wase wee mwaan shεε, ε wee wvun nu waa we, ε è nu fitele fiεw. Ɛ wvú mεse tum wvú fô bó le kpwaake le bó nu egen ewvum waa wen wvun.

⁷Ɛ wvú gen, ε bonyii bodvu jeme εbonebon le, ‘Wvun nu ndiela wee wεε wvun, ben eto é beene eyu wvú é bvushew bvudvu enu wase bvuseεbeene.’

⁸Ɛ bó mum koo wvú, yu, bvuse laŋ εkfuŋ jo ketaaŋ.”

⁹No Jisos jeme nen, mum bife le, “Fiεε fi è nulo é wee wεε wvun ege nu la? Wvú nu ke eto elεse lo bonyii bodvu, etεse wεε wvudvu ε è nu wase ê bonyii bomew.

¹⁰ Ben ke baa taŋ wase bvudvuu bvun ê Nwa' Nyo' le le? Bó nu ε saŋ le, ‘Tε didvu diε di bonyii bo kembom e to tunεε, to nu ε nε kase tu tε di buu di yew e.

11 Fifin nu ε è ge ke Tata, bonyii ε no taale keηke ηghaw.”

12 Ε bonyii ba yuw ηgan wvun, mum kieε le Jisos ma ε è nu ê bó. Ε bó mum no gomte keekoo wvú, se fan ε è nu kebombom ke bonyii le kè to nu fó. Ε bó mum cine wvú le ne no gene.

Ε bó tele Jisos ekume shile wvù lanxen

(Mat 22:15-22; Luk 20:20-26)

13 Ε bikuu bi woη e ke ne tum Bofalasii noo bonyii bomew bo ηgoo Nfon 'Elod e le bó egen etele Jisos ekoo wvú yî njeme we le.

14 Ε bó to, gay ê Jisos le, “Wee n'yεεyi, bese kee le wo ké no jemyi ke ε è nu keceey, njefo ke wo fane jise di wee le ke, kenεε mweten nu naa la. Wo yεεyi keceey ε è nu je yì yi Nyo'. Ke see ê bese laa nci nu ε bee le bó elaanke shile ê Kaysa, nuu wvú baa bee le?”

15 Beene elaanke, nuu fo bó elaanke le?” Ε Jisos kieε fieε fi bó to wεentene dvú, tfuse le, “Ben teeyi me nje la? Ben ke eto bô danali é me en'yen.”

16 Ε bó to dvú, ε wvú fi, bife le, “Ekole kin kè nu yî dvú le nu ke yeε le, ε diee din nu di yeε le?” Ε bó tfuse le, “È nu ke Kaysa le, ε diee nu ke ten diew.”

17 Ε Jisos mum gay ê bó le, “Ben enyaà fieε fi è nu fi Kaysa le ê wvú, nyaà fi Nyo' le ê Nyo'.” Ε bó yuw nonen, ε diuw yum lo bó ekume wvú.

Ε bó tele Jisos ekume kentaashe ke kpwoon bô diemsen e seke bó ε buy yî kpwe le

(Mat 22:23-33; Luk 20:27-40)

18 Ε Bosadusii bomew ke ne to keebife fieε ê Jisos. Bosadusii to nu bonyii bò to duu le ke bonyii nu ke ebuy yî kpwe le ke.

19 No bó to nonen, gay le, “Wee n'yεεyi, Muses to nu ε saη ê beene ê bonci le le, ‘É waa bwee wee kpwe ε gee kpwoon se wan, tu wee wvudvu keηke keegeε kpweε ηkfu é bô wvú eboo boom ê diee di ηkfu waa bwee wvudvu le.’

20 Nonen, wee mvu to keηke boom bolemε bosooshwiγ, ε wvu ηgaywee ke jo kpwoon, ke kpwe se bô wvú ε boo wan.

21 Ε ejime kew gee kpwoon wvudvu, ke kpwe ten se wan. Ε fí ke kooy ke ten lenlen bô ejime ke wvuwe le.

22 Ε bó ghan gee wvú bocii, ε wee faηe yaa nu dvú ente jo bonyii bo bosooshwiγ bodvu wvù eboo wan bô kpwoon wvudvu ke. Ejim jodvu ε kpwoon wvudvu kpwe ten.

23 No bonyii bo bosooshwiγ bodvu to nu ε jo kpwoon wvudvu bocii, è nu ke enu seke bonyii buyte yî kpwe le, é wvú enu kpweε yeε?”

24 Ɛ Jisos gay ê bó le, “Ben jemyi nen jayte lo njefo ke ben kee fiεε fi bó saŋ ê Nwa' Nyo' le ke, yaa kee ten mvuŋgay mvu Nyo' le ke.

25 Fiεε fi nu, nu le è nu ke enu seke bonyii ε buy wase yî kpwe le, ke bolemse bô bokene bεε ke ebvuu etaashi bvujen ke, ε bonyii yaa bεε ke ebvuu enyaa boom ε bó taashi bvujen ke. Bó nu ke enu wase ke diewe bonceendaa bo Nyo' le fowe.

26 Fiεε fi ekume le bonyii nu ke ebuyte yî kpwe le, ben ke baa taŋ wase bvudvuu ê Nwa' Muses e ekume kete kè to bæenci ε Nyo' jemyi ê Muses gayte le, ‘È nu me Nyo' Aba'am bô Nyo' Aysik noo Nyo' Yakow e?’

27 Fi nu le ke Nyo' nu Nyo' boŋkfu ke, è nu Nyo' bonyii bô nu dvú. Ben nu ε jay baay.”

Nci wvù fele bonci bocii

(Mat 22:34-40; Luk 10:25-28)

28 Ɛ wee mvu wvù to duŋci bonci bo Nyo' le ke to, dioo yuw no Jisos bô bonyii ba beeke mbew, bvuu yen no wvú nu ε tfuse fiεε fi bó bife ê wvú ê je yì jee le, ε wvú mum bife ten ê Jisos le, “Nci wvù fele bonci bocii nu wvù la?”

29 Ɛ Jisos tfuse ê wvú le, “Nci wvù fele bonci bocii nu wvun wvù duu le, ‘O bonyii bo Israel ben eyuw, Tata Nyo', wvù Nyo' wesebeene, Tata Nyo' wvudvu nu ke mwaan.

30 È kooŋkè Tata wvù Nyo' wo bô fitele ficii, enya ekole kuw ê wvú kecii, egeε bvufee bwuw yî ye le bvucii, elemte fô wvú le bô mvuŋgay mwuw mvunciim.’

31 Ɛ nci wvù bii wvun e nu le, ‘È kooŋkè waa bwoo no wo kooŋke ekole kuw.’ Ke wvumvu nci bvuu nu dvú wvù fele boban ke.”

32 Ɛ wee wvù to duŋci bonci bo Nyo' le we gay ê Jisos le, “Wee N'yεεyi, wo nu ε tfuse naa leŋ. Wo jemyi ε è nu keceey le Nyo' nu ke mwaan ε wvumvu yaa bvuu nu dvú efey wvú ke.

33 Ɛ keekooŋke wvú bô fitele ficii, gεεle bvufee yî ye le bvucii, lemte fô wvú le bô mvuŋgay mvunciim bô keekooŋke waa bwoo no wo kooŋke ekole kuw, nu ε fi fele naa lo keegeε boncese bô nyám yi toneen noo boncese bomew.”

34 Ɛ Jisos dioo yen no wvú tfuse dieweε wee bvufee le, ε wvú mum gay ê wvú le, “Ke wo nu ncejole keeley bvunfon bvú Nyo' le ke.” Ejim jodvu, ε wee faŋe yaa ke ebvuu emom eto keebife fiεε ê wvú ke.

Mboyse wvù Nyo' to kawεε nu waa yεε

(Mat 22:41-46; Luk 20:41-44)

35 Ɛ Jisos ke no yεεyi bonyii fô yew ncese le, ke ne bife ê bó le, “Bonyii bô duŋci bonci ghan neε le ε se no duu le Mboyse wvù Nyo' to kawεε nu waa Nfon Dawe?”

36 Ɛ Keyoy ke Yuule to ge wase ε Nfon Dawe wvun jeme ekume Mboyse wvudvu gayte le, ‘Tata Nyo' to nu ε gay ê Tata wem le wvú eshii ê εbo kew ke eceey e, egen ebuy seke wen ke ejike bonyii bew bo bvuban e

é wvú etome bikaa biew yî bó le.'

37É Dawe kebee teje wvú le Tata wen, é wvú ebvuu eghan nee se no nu waa we?" No Jisos to jemyi mwεem mvun nen ε kebombom ke bonyii le kè to nu fó, no yeke ε njoη yuu lo bó.

ε Jisos tooshε gee di bonyii bò duñci bonci bo Nyo' le

(Mat 23:1-36; Luk 20:45-47)

38 ε wvú dīoo yεeyi bonyii ne gay ê bó le, "Ben ejoò wεε ben ε bonyii bò duñci bonci bo Nyo' le. Bó ké no kooηke keetfumyi ndvú yi baay baay ghanci dvú mondvuum mò bó kamene diwaci le, le bonyii egaytè bó le bô n'wvum.

39É bó ké gen yéw bunle le, kenεε fô ηkaw e, caw ke ε è nu bintaw bi baay baay se shii yî dvú le.

40Bó shiwse lo mwεem mvu boke' bo boηkfu le, mum buwse bó bô dibunle di dewkene. Ngew wvubo nu ke eyuu ekuuke baay."

Nnya kpwεε ηkfu

(Luk 21:1-4)

41 ε Jisos ke ne gen shii keba keki fô fiηkuw fi nnya le fô yew ncese le, no taale no bonyii too gεεle bigew ê fiηkuw fidvu le. ε bonyii bo kpaw e nteen no too gεεle bigew jó ε bí duule.

42ε kpwεε ηkfu mvu ke ne to ε è nu wee kefufe, gεε mvunyinyi jó mvunfεem mvù gee jise di bigew e ε dí baa buy fiεε le ke.

43ε Jisos ben boom bew bo ηgoo le gay ê bó le, "É me ensee ê ben keceey le kpwεε ηkfu wvun wvù nu wee kefufe nen, nu ε nya ε fey bonyii bocii bò gεεle fiεε ê fiηkuw fi yew ncese le fin e.

44 Bonyii bocii bò be nyaa, be too ε è nu bô tfúw kpaw wvubo wvù nu ε yiηsen wase ε no fuci kuse. Geenεn wvú ε to bô kefufe kew kecii ε nya fiεε ficii fi wvú keηke, ε è nu fí fi wvú bee keecee yî dvú le."

Mak 13

Binghaw bi mwεem e bì nu ke ekooyi seke woη nu keeke eka

(Mat 24:1-2; Luk 21:5-6)

1ε Jisos ke dīoo nen'yi fô yew ncese le, ε waa we ηgoo mvu ghay ê wvú le, "Wee N'yεeyi taa eyen bibwee bi eta le bì nu yî yéw yin e. È nu naa lo binghaw bi yéw e!"

2 ε Jisos tfuse ê wvú le, "Wo yεne binghaw bi yéw e bin e? Ke te dimwaaη nu ke eshεε yî dimew e se bó ε base fokuse ke."

(Mat 24:3-14; Luk 21:7-19)

3ε Jisos ke gen ben shii yî Kum Bite bi Olif e ê keba kè taale yew ncese le, ε Bitā bô Jεm noo Jon noo Andulu gen εbonεbon bife ê wvu le,

⁴“Kε see ê bese kefew kè fiε fidvu fin nu ke ekooy, ebvuu esee nciise wvù nu ke eduŋce kefew kè mwεem mvudvu mvun mvunciim nu ke ekooy.”

⁵Ɛ Jisos mum gay ê bó ƙε, “Ben eyenè fo wee ke elεε ben é ben ejay je.

⁶Bonyii nteen nu ke etoo joo diee diem tεεke fojise, ε wee duu ƙε, ‘È nu me wvudvu.’ É bó dioo gee nonen emum elεεle bonyii nteen ε bó jayte je.

⁷Ben ke dioo ε yuw ƙε bó tumte jem kεnεε ƙε jem nu enu, fo finteem ebuytè ben ƙε. Mvumvun nu mwεem mvù kεŋke keeke ekooy. Geenεn ε mvú yaa mum duŋci ƙε woŋ kaa wase ƙε.

⁸ Ketum nu ke etumte jem bô kemew, ε nfon mvu tumte jem bô wvumvu. Nshε nu ke eshiike mondvuum e mondvuum e, ε jeŋ koole. Ɛ mvumvun mwεem bεε ƙε lo mvun'yaŋ ƙε diεwε seke kpwoon ε ƙεw lume.

⁹ Ben dioo nu no yenè. Ben ekeè ƙε bó nu ke enya ben can bonyii bô saake bonsaw e. Bó nu ke etamte ben yéw bunle ƙε. Ben nu ke eleemεn fwe dvu bonyii bô saake biba bi woŋ e, noo fwe dvu bonfon nje me, wvu ƙε ben ejeme ê bó ekumε me.

¹⁰Geenεn ε bó kεŋke ƙε keeyaw efewce saaka wvù jee wvù wvu Nyo' ê bitum bicii.

¹¹ Seke bó ε koo ben ε no gene dvú keenya yew nsaw e, fo εkolε ekfumtè ben ƙε laa ben nu ke egen ejeme ƙε la ƙε. Seke ben ε gen, no jemyi ƙε ε è nu fiεε fi buyte diuw wene ƙε kefew kekiε ƙε, njefo ƙε è bεε ƙε ejemyi ben ƙε. È nu ke enya Keyoy ƙε Yuule njeme diuw wene ƙε.

¹² Wee nu ke enε ejo waa bwee enya é bó eyu, é cee wan ejo waa we enya é bó eyu. Boom nu ke enε ebone bikaa ê bo'icee bobole ejim, gee ε bó yuwyi bó.

¹³ Bonyii bocii nu ke ebane ben nje diee diem. Geenεn, wee wvù nu ke ekuu shém egen ebuy fokemεse nu wvù nu ke eboy.

Ɛkumε mwεem mvù bεmte mvù nu ke ekooyi

(Mat 24:15-28; Luk 21:20-24)

¹⁴ (Wee wvù taŋke ŋwa' wvun eyuw fin ntay,) seke ben ε yen ε kemaante ke fiεε ƙε kè nulo ejin bvudvuu leeme wase fô kí yaa be kεŋke keenu ƙε, ε bonyii bô nu Judea mum fεε ben yî dikum e.

¹⁵ Fo wee wvù nu ê yew we dioo ε shii bvuu ley yew ƙε wen ejo naa lo fiεε elewte dvú ƙε.

¹⁶ Fo wee wvù nu wene ebvuu ekfulε ƙε wen too ejo ndvu ye yi bulεen ƙε.

¹⁷ Ngεw wvu baay εdiuw yoya ƙε nu ke enu wvu bokεnε bô nu bô difue, noo bô yamsee boom e.

¹⁸ Ben ebunleè ƙε fo fiεε fin ke ekooy ε è nu kefew ke nffum e ƙε.

19 Bonyii nu ke eyen ηgew ediuw yoya le, ε kfuu wvuwe ηgew ke baa nu wase dvú ε kew no Nyo' bomεε woη ε to ε buy keseen e κε. Ε κε kfuu wvuwe bεε ke ebvuu eyuu enu dvú κε.

20 Έ Tata to baa fafe ediuw ε ηgew wvudvu, tu κε wee wvu wum mwaanη bee ke eboy κε. Geenεn, nje bonyii bew bò wvú to cawεε wase gee, wvú nu ε fafe ediuw yodvu.

21 Έ wee ke egay lo ê ben ediuw yoya le le 'Ben etaa eyen, Mboyse wvù Nyo' to kawεε wvun fεn!' Kεnεε le, 'Ben eyen wvuwe fofe!' Fo ben ebee κε.

22 Ben ekeè le bonyii nu ke etoo mbiayte le bowen nu bomboyse bò Nyo' to kawεε, ε bomew duu le bowen nu bonyii bo ntum Nyo' le, emum egee mwεεm mvù duηci mvuηgay mvubole, gee ten mwεεm mvu diuw wvù yumεεn e, momte fεn é je nu dvú, keeλεε bonyii bò Nyo' nu ε caw é bó ejay je.

23 Ben eyenè. Me nu ε nsee wase mwεεm mvun mvunciim ê ben é mvú se keeke ekooyi.

No fí nu ke enu seke wee wvù diee nu Waawee kaase too

(Mat 24:29-31; Luk 21:25-28)

24 È nu ke edioo enu ediuw yoya le seke boηgew bodvu ε fey wase, é diuu ene esεε ejime, é kpwee saa bvuu baa ten κε,

25 Έ jón enen'yi fowe gbwekene, é mwεεm mvu fowe mvunciim mvù keηke mvuηgay eshiike.

26 Nonen é bonyii emum eyen no wee wvù diee nu Waawee shiile too ê kembew e keηke mvuηgay mvu baay noo bvukuke.

27 Έ wvú emum eciinse bonceendaa bew é bó egen εbuw ε woη yo εna le yí nshε le noo fowe, ebaance bonyii bew bò wvú nu ε caw.

(Mat 24:32-35; Luk 21:29-33)

28 Ben eyεεyi fiεε yí keηgvum e. Tίew ye ké boci, é bibε ekew etεεke yí dvú le, é ben mum kiεε le ekfuη kumene wase.

29 È nu κε leηleη no ben nu ke edioo ε yen ε mwεεm mvun kooyi, é ben emum ekiεε le wvú nu wase nceencee naa wase ê yew fwese.

30 Έ me ensee ê ben kecεεy le κε εηgoke ke keseen kin nu ke eka se mwεεm mvun mvunciim ε kooy wase κε.

31 Εbule bô nshε nu ke eka, geenεn κε diew yem nu ke eyuu eshiw κε.

(Mat 24:36-44)

32 Geenεn κε wee nu dvú wvù kee diuu didvu kεnεε kefew kedvu κε. Ke naa bonceendaa bo Nyo' le bo fowe kεnεε Waa Nyo' kee ten κε. È kee κε Ice wvú embeη.

³³Nonen ben eyenè bvuu cɛytè, njefo ke ben kee kefew kedvu ke.

³⁴Fí nu ke enu diewe wee fò wvú gene ghane, ε dīoo nen'yi, ε gee yew ye can boom bew bo lemme le, wee bô diew lemme, wee bô diew lemme, ε gay ê wee wvù cɛyte diuw ketaɲ le wvù esheε ecɛytè ntay.

³⁵Nonen ben emum ecɛytè, njefo ke ben kee kefew kè cee yew nu ke ekase eto ke. Ê nelo é wvù ke eto ekiεguu, kenεε entaɲ enteleɲ, kenεε seke nyimshie yi fwe le, kenεε entaɲentaɲ.

³⁶Fo wvù ke ene esεε ebuynen eyen ε ben leete ke.

³⁷Fīεε fi me njemyi ê ben fin nu ε me njemyi ten ê wee tfuu le, 'Wee wemen ecɛytè.'"

Mak 14

ε bonyii cu ntaɲ keekoo Jisos eyu

(Mat 26:1-5; Luk 22:1-2; Jon 11:45-53)

¹Ê to shεete wase εdiuw εfaa é emum enu diuu di Nkaw Daɲεfey noo Nkaw Blεεd wvù bó baa gee Fintuɲlεen jó ke. ε bocee ncεse bo baay baay noo bonyii bô duɲci bonci bo Nyo' le no gomte je yì bó ekoo Jisos jó ê kenyile le, eyu.

²ε bó cu ntaɲ εbonebon le, "Fo beene emom fīεε fin kefew kè bó gee Nkaw e ke, njefo é beene mom lo, é fí eto bô diuw ê bonyii enteleɲ."

ε kpwoon mvu yefe Jisos bô nfiey wvù shfuuɲkene

(Mat 26:6-13; Jon 12:1-8)

³ε Jisos ke no nu ntew wvù Betani le, yew dvu Semon wvù wee ntun wvu baay, ε bó ke shii no diekene, ε kpwoon mvu ne ley bô fikaa fi nfiey mvu wvù shfuuɲkene le. Nfiey wvudvu to lumte naa ntay, ε bó kene bô naad εwvunεwvun. No wvù ley, mum koy diuw fikaa fidvu fuce nfiey wvudvu yì εkolε ke Jisos e.

⁴ε bonyii bomew kaa ne no wvukene εbonebon gayte le, "Wvù nyew bô nfiey wvun nen nje la?"

⁵Ê be nelo é bó egese nfiey wvun é wvù efey lo bigew bodanali gee te, enya bigew bidvu ê bonyii bo kefufe le." ε bó mum no ɲasene lo yì ye le.

⁶Geenen, ε Jisos jeme ê bó le, "Ben ecine wvù le nyεkeey. Ben nyaa ɲgew ê wvù nje la? Wvù nu ε ge ε è nu fīεε fi jee fô me le.

⁷Ben ekeè le bonyii bo kefufe le nu ke enu ke ben ε bó sekecii. ε ben nulo efici bó seke ben koonke. Geenen, ke me nu ɲke enu beene sekecii ke.

⁸Kpwoon wvun nu ε ge ε è nu fīεε fi wvù nulo ege. Wvù yefe me bô nfiey wvun nen seysee ε è nu no bó nu ke edwey me.

⁹É me ensee ê ben keceey le, naa fεε fô bó nu ke efewci saaka wvù jee yì εkolε ke nshε le kecii nu ε fīεε fi kpwoon wvun ge nu ε bó nu ke eseɲe ten, keekumyi wvù."

Ɛ Judas gen keegese Jisos

(Mat 26:14-16; Luk 22:3-6)

10 Ɛ Judas Iskaliot wvù to nu wee ηgoo boom bo ηgoo le bo Jisos e bo yuufe ncow bofεε, mum ne gen fô bocee ncese bo baay baay e wvu le wen egese Jisos ê bó.

11 Ɛ bó dioo yuw nonen yuw njon baay, mum kaw wvú le bó nu enya bigew ê wvú. Ɛ wvú mum kew no gomte je yì wvú nu enya Jisos jó can yibole.

Ɛ Jisos bô boom bew dieken yî kemese le

(Mat 26:17-25; Luk 22:7-14, 21-23; Jon 13:21-30)

12 Ɛ diuu di fwe di Nkaw Blæed wvù bó baa gεε Fintuηλεen jó dì bó to ké no sεεle waa keyaw wvu Nkaw Daηefey ke to kocen, ε boom bo Jisos e bo ηgoo le bife ê wvú le, “Wo gomte le bese egen eseyse ε è nu fεε fò wo nu edie Nkaw Daηefey?”

13 Ɛ wvú mum tum boom bew bo ηgoo le bomew bofεε, gay ê bó le, “Ben egen εlaante, ben nu dioo gene, eyen wee le ε wvú ε tuu joo ê nshaan e, é ben ebi wvú le.

14 Seke wvú ε gen ε ley yew yì wvú ley dvú le, ε ben gay ε wee wvù keηke yew yidvu le Wee N'yεεyi biite le laa kebuw ke bonyii bo ghane le kewene kè bô boom bowene bo ηgoo le nu edie Nkaw Daηefey dvú nu fεε le?

15 Wvú nu ke emum eduηce kebuw ke baay yew yi εwe le ε bó ε looce wase ε seyse kí ε no nu lo, é ben emum eseyse mwεem mvudien dvú.”

16 Ɛ boom bo ηgoo le bodvu mum ne gen εlaante, gen yen mwεem e ke lenηη no Jisos to jemyεε ê bó. Ɛ bó mum seyse mwεem mvudien mvu Nkaw Daηefey e dvú.

17 Ɛ è ke no nu ekiεguu, ε Jisos bô boom bew bo ηgoo le bo yuufe ncow bofεε taashe dvú.

18 Ɛ bó ke shii no diekene, ε Jisos ne gay ê bó le, “É me ensee ê ben kecεey le wee mvu ben e nu egese me, ε wee wvun nu wvù diekene bee wvú.”

19 Ɛ bó yuw nonen, ne no nu lo yii yii, mum no biite ê wvú wee mwaanη mwaanη le, “È nu me le?”

20 Ɛ wvú tfuse le, “È nu ke wee mvu ben bo yuufe ncow bofεε le wvù bee wvú cuwte blæed ê shuw e.

21 Wee wvù diee nu Waawee nu ke egen ke no bó to saηεε ekumε wvú. Geenεn, ηgεw wvu baay nu fô wee wvù gese wee wvù diee nu Waawee le. Fí to bee ejee fô wvuwee wee le baay fen é bó to baa eboo wvú ke.”

Ɛ Jisos bô boom bew die ntaashe

(Mat 26:26-30; Luk 22:14-20)

22 No bó to diekene, ε Jisos ne jo blæed, nya keyoone ê Nyo', guushε, nya ê boom bew bo ηgoo le gay le, “Ben eko, fin nu ye yεm.”

23 Ɛ wvú mum jo ten fiko, nya keyoone ê Nyo', mum nya fiko fidvu ê bó, ɛ bó wu bocii.

24 Ɛ wvú gay ê bó ɛ, “Fin nu ɛɛɛ kem kè Nyo' gbwo monkan dvú kí ɛ buy nje wee nteen.

25 Ɛ me ensee ê ben kecɛɛy ɛ ke me mbɛɛ nke embvuu en'wu mbvuum mo twen kete kè lane le man ke ɛ gen ɛ buy diuu dì me nu nke en'wu mó monfɛm ente jo bvunfon bvú Nyo' le.”

26 Ɛ Jisos bô boom bew bo ngoo le ke mɛse, yem nkiee mbense, mum buy ben gen yí Kum Bite bi Olif e.

Ɛ Jisos gay ɛ Bitá nu ke ema wen

(Mat 26:31-35; Luk 22:31-34; Jon 13:36-38)

27 Ɛ Jisos ke nɛ gay ê bó ɛ, “Ben bocii nu ke etfuw bikaa ê me ejim. Ɛ nu no bó nu ɛ saɲ ɛ Nyo' gayte ɛ, ‘Me nu enke en'yu nɛɛ njée é njée esaɲken.’

28 Geenɛn, seke Nyo' ɛ bvuse me yí kpwe le, é me ensa fwe jo ben Galilee.”

29 Ɛ Bitá tfuse ê Jisos ɛ, “É bonyii bocii cim tfuw lo bikaa ê wo ejim, tu ke è nulo é me nke en'yu entfuw ke.”

30 Ɛ Jisos gay ê wvú ɛ, “É me ensee ê wo kecɛɛy ɛ entaɲ jo ɛben jan, nu ɛ nyimshie nu ke enu ɛ yí etoɲ bokaɲ bofɛɛ, ɛ wo ɛ ma wase me bokaɲ botete.”

31 Ɛ Bitá jeme teme lo gay ɛ, “É è cim nu ɛ me enkpwe lo bee wo, tu ke è nulo é me en'yu ema wo ke.” No wvú gay nonɛn, ɛ bó bocii gay ke ten lenlen no wvú gay.

Ɛ Jisos bunle Gɛɛɛmane

(Mat 26:36-46; Luk 22:39-46)

32 Ɛ bó ke gen ley fô wɛɛ ketaaɲ wvumew e, ɛ bó teɲe ɛ Gɛɛɛmane, ɛ Jisos gay ê boom bew bo ngoo le ɛ, “Ben eshii fɛn, é me enɲen embunle.”

33 Ɛ wvú mum jo Bitá bô Jɛm noo Jon, ɛ bô bó nɛ fó. Ɛ wvú nɛ no kpwaake mwɛɛm ɛ monlum koole wvú.

34 Ɛ wvú gay ê bó ɛ, “Fitele fiem nu yii yii baay naa fi me enkpwe lo. Ben eshɛ enù fɛn ɛyɛte.”

35 Ɛ Jisos nɛ fó bence gen fwe caan, gbwe fokuse, bunle ɛ é je be nu dvú, é kefew ke nɲew e kedvu efey ke lo.

36 Ɛ wvú bunle ɛ, “Abba, Icɛm, wo nulo ege fiɛɛ ficii. Cake fiko fi nɲew e fin fo me en'wu. Geenɛn, geɛ ke no wo kooɲke. Fo wo ege no me nkoonke ke.”

37 Ɛ Jisos kase tu jim fô bó le, yɛn ɛ bó leete. Ɛ wvú bife ê Bitá ɛ, “Semon, wo leete lo le? Ke è nulo é wo eɛy egen ebuy yí ntam kefew e ke mwaɲ e?”

38 Ben enù we bunleè fo mmom ke eto fô ben e eghaw ben. Ê nu keceey le fitele koonke lo, geenen e nyam ye weeyi.”

39 No wvú jeme nonen bvuu kase gen bunle ke no wvú be bunle wase.

40 E wvú dioo kase tu jim bvuu yen e boom bew bo ηgoo le leete njefo nyii to nu ê bó ejise baay. E bó faηe yaa kiee fiee fi bó etfuse ê wvú ke.

41 E wvú kase tu jim yî bokaη bo botete le, bife ê bó le, “Ben fen bæe ke leete lætene finen e? Dí nu e kocen. Ê nu wase kefew. Bó nu e gese wase wee wvù diee nu Waawee ê bonyii bò befe.

42 Ben ene we é beene egenè. Ben etaa eyen, wee wvù gese me wvun e wvú too wase.”

E bó koo Jisos

(Mat 26:47-56; Luk 22:47-53; Jon 18:3-12)

43 Ke no Jisos to bæe jemyi nonen, kaη mwaan e Judas wvù to nu wee ηgoo boom bo Jisos e bo yuufe ncow bofæe mum buynen. Wvú to too bô kebombom ke bonyii le e bó keηke nyó bô bibuse, e è to tum bocee ncese bo baay baay bô bonyii bò duηci bonci noo bonyii bò saake woη.

44 Ê to nu e wee wvù to gesæe Jisos to seyse wase nciise bô bonyii bodvu gay le, “Wee wvù me nu ηke eηgay wvú le, embam eηoce, nu wvú, é ben emum ekoo, ejo egene dvú eyenè fo wvú elewte.”

45 No Judas to nonen, mum gen lo kaη mwaan fô Jisos e, gay wvú le le, “Wee N'yæeyi.” No wvú gay nonen, mum bam wvú ηoce.

46 E bonyii ba mum koo Jisos, gheη wvú.

47 E wee mvu wvù to leeme bô bo Jisos mum dvun nyo ye jem, cun kentunηun ke nfwa ekole ke bocee ncese le dvú, sum.

48 E Jisos bife ê bonyii bodvu le, “Ben to keekoo me e no too bô nyó noo bibuse ke diæwe ben to keekoo e è nu cooη e?”

49 Me nse nshee nu beene no diuu nu fô yew ncese le, n'yæeyi bonyii se ben koo me nje la? Geenen, fifin kooyi keseen nen le fiee fi bó to saηæe ê Nwa' Nyo' le eto ekocen.”

50 E boom bo Jisos e bo ηgoo le bocii mum laη wvú fó, fæe lo.

51 E cuwee mvu no bii wvú le, e wvú baa tfume fiee ye le ke, e wvú bu ke e è nu waa ndvu ye le. E bó gen le bó koo ten wvú,

52 E ndvu yidvu fæye, e wvú cine dvú lewte kenye kencimte.

E bó saw nsaw Jisos

(Mat 26:57-68; Luk 22:54-55, 63-71; Jon 18:13-14, 19-24)

- 53 Ɛ bó mum jo Jisos, gen bô wvú fô ekolɛ ke bocee ncese le. Ɛ bocee ncese bo baay baay bô bonyii bô saake wonɔ noo bonyii bô dunɔi bonci nu ɛ bó to tase wase fô.
- 54 Bó to gene bô Jisos ɛ Bitá bii lo ejim ncejole. Ɛ wvú gen buy naa lakfulɛɛɛ yi ekolɛ ke bocee ncese le, mum shii bô bonyii bô to cɛyte la didvu no yosene ɛɔuy.
- 55 Ɛ bocee ncese bo baay baay bô bonyii bocii bô saake bonsaw mum no gomte fiɛɛ fi bó etey yí Jisos e, ege é bó eyu wvú. Geenen, faɛɛ yaa yen fiɛɛ le kɛ.
- 56 Ɛ bonyii nteen mum ben jim nsaw mbiay ekume Jisos. Geenen, ɛ wee no jemyi fiɛɛ ɛ fí yaa too kpwentene bô fi wee mvu le kɛ.
- 57 Ɛ bonyii bomew ke nɛ mum leem we, cu yibo mbiay yí ye le gay le,
- 58 “Bese se nu ɛ yuw ɛ wvú gayte le wen nu ke esâw yew ncese yin yi bó bom bô can, ejo ɛdiuw eta ekase bom yimi ɛ è yaa nu bô can kɛ.”
- 59 Naa no bó to jemyi nonen, ɛ njeme wvubo faɛɛ yaa etoo kpwentene kɛ.
- 60 Ɛ ekolɛ ke bocee ncese le mum nɛ leem we fwe dvu bonyii, bife ê Jisos le, “Kɛ wo kɛɔke fiɛɛ keetfuse le? Wo yuuke kɛ mwɛɛm mvù bonyii ban jemyi yí yo le?”
- 61 Ɛ Jisos mɛy diuw tfu, faɛɛ yaa tfuse fiɛɛ kɛ. Ɛ ekolɛ ke bocee ncese le bvuu bife ê Jisos le, “È nu wo Mboyse wvù Nyo' to kawɛɛ wvù Waa Nyo', Nyo' wvù bó bensee?”
- 62 Ɛ Jisos tfuse le, “È nu me. Ben nu ke eyen no wee wvù diee nu Waawee ɛ shii ê ebo ke ɛcɛɛy ke Wee wvù kɛɔke Mvunɔay e, ke ebvuu eyen no wvú shiile too we ê kembɛw e.”
- 63 Ɛ ekolɛ ke bocee ncese le yuw nonen, mum saayɛ ndvú ye le, bife le, “Shiie nu dvú wvù beene ebvuu egomte wee le wvú eleem fɛn ejeme fiɛɛ le?”
- 64 Kɛ ben nu ɛ yuw wase no wvú joo bvudvuu bvú Nyo' le? Ben ɛ gay le la?” Ɛ bonyii bocii mum sumten le wvú nu wee wvù bó eyu lo.
- 65 Ɛ bonyii bomew mum kɛw no cuyte ncɛɔ yí Jisos e, kay ejise eye, no kfone wvú bô mvunɔko, gayte le, “Kɛ geɛ kewee ntum Nyo' kuw keseen.” Ɛ bonyii bo nci le ke nɛ jo Jisos mum kɛw no suunɔke.

Ɛ Bitá ma Jisos

(Mat 26:69-75; Luk 22:56-62; Jon 18:15-18, 25-27)

- 66 No Bitá to nu je ɛkuɛku lakfulɛɛɛ e, ɛ wan kpwoon mvu ɛɔoo boom bokɛɛ bô to lemte ekolɛ ke bocee ncese le nɛ to mbew ye le.
- 67 No wvú yen Bitá le ɛ wvú yosene ɛɔuy, ɛ wvú taa wvú nen tunɔ, gay le, “Wo ten be nu ben ɛ Jisos Wee wvu Nasalet wɛ.”
- 68 Ɛ Bitá tun, gay le, “Kɛ me ɛkee fiɛɛ fi wo jemyi fin kɛ. Kɛ me ɛkee kɛ.” No wvú gay nonen, mum nɛ fô gen fô diuw ketaɔɔ e, ɛ nyimshie mum tonɔ.

⁶⁹Ɛ wan kpwoon we bvuu yen wvú le, gay ê bonyii bò to leeme fó le, “Wee wvun nu mvu bó le.”

⁷⁰Ɛ Bitá bvuu tun. Ɛ kefew ke dioo gence caan, Ɛ bonyii bò to leemene fó ba bvuu gay ê Bitá le, “È nu keceey le wo nu mvu bó le, njefo wo nu ten wee wvu Galilee.”

⁷¹Ɛ Bitá mum kan, tee lon yí ekole kew e gay le, “Ƙe me ñkee wee wvun wvù ben jemyi ekume wvú ke.”

⁷²Ƙaṅ mwaan Ɛ nyimshie bvuu toṅ le bokaṅ bofɛ. Ɛ wvú yuw mum kume njeme wvù Jisos be jeme ê wvú le, “Nyimshie ke enu le yí etoṅ bokaṅ bofɛ, Ɛ wo Ɛ ma wase me bokaṅ botete.” Ɛ wvú mum kese kpwe no beele.

Mak 15

Ɛ bó nya Jisos can Baylet wee sa' wvu Lum e

(Mat 27:1-2, 11-14; Luk 23:1-5; Jon 18:28-38)

¹Ɛ ekfuṅ ke gen le jó eyuule too nen, Ɛ bocee ncese bo baay baay bô bonyii bò saake woṅ noo bonyii bò duṅci bonci bo Nyo' le, bò è nu bonyii bocii bò saake bonsaw mum shii jo ntaṅ, kay Jisos, jo wvú gen nya can Baylet e.

² Ɛ Baylet bife ê Jisos le, “È nu wo wvù Nfon Bojuu le?” Ɛ Jisos tfuse ê wvú le, “È nu no wo gay.”

³ Ɛ bocee ncese bo baay baay mum kew no teyte mwɛem yí Jisos e nteen.

⁴Nonen Ɛ Baylet bvuu bife ê Jisos le, “Ƙe wo keṅke fiee keetfuse le? Wo yuuke ke mwɛem mvù bó cuci yí yo le?”

⁵Geenen Ɛ Jisos faṅe yaa ebvuu etfuse lo fiee ê wvú ke. Ɛ diuw yum Baylet.

(Mat 27:15-26; Luk 23:13-25; Jon 18:39–19:16)

⁶È to ké dioo nu kefew ke Ñkaw Daṅfey wvun e, Ɛ Baylet bvuse wee ncaw mwaan yew ncaw e wvù bonyii nu Ɛ leke.

⁷È to nu kefew kedvu le, Ɛ wee mvu nu yew ncaw e Ɛ diee nu Balabas, Ɛ wvú nu ṅgoo bonyii bò to nu yew ncaw e bò to kewɛ mvunlaa eiaante yuwye bonyii le.

⁸Ɛ kebombom ke bonyii le mum to kew no biite le Baylet ege no wvú to ké no gee fô bowen e.

⁹ Ɛ Baylet bife ê bó le, “Ben gomte le me embvuse Ɛ è nu Nfon Bojuu le?”

¹⁰Wvú to biite nonen njefo wvú to nu Ɛ kiee le bocee ncese bo baay baay to nya Jisos can wen e Ɛ è nu njefo bó to bene kendoṅ bô wvú.

¹¹ Geenen, Ɛ bocee ncese bo baay baay beyse kebombom ke bonyii le le bó egay le wvú ebvuse Ɛ è nu Balabas.

¹²Ɛ Baylet bvuu bife ê bó le, “É me ndioo Ɛ mbvuse nonen, enge nɛe bô wee wvun wvù ben teṅe le Nfon Bojuu?”

13 Ɛ bó mum wam lo foweewe le, “Bó eta lo wvú yî kentam e.”

14 Ɛ Baylet bife ê bó le, “Bó eta wvú nje la? Fiee fi befe fi wvú ge nu la?” Ɛ bó bvuu no wamte gene ke lo fwe le, “Bó eta wvú yî kentam e.”

15 Nonen Ɛ Baylet mum bvuse Balabas njefo wvú to gomte keege no kebombom shieele. Ɛ wvú gay Ɛ bó tam Jisos, mum nya le bó egen eta yî kentam e.

Ɛ bonyii bo nci le no sewse Jisos

(Mat 27:27-31; Jon 19:2-3)

16 Ɛ bonyii bo nci le mum jo Jisos ley gen dvú entow fò bó to teje le Bletolium. No bó ley, mum kum kebese ke ηgoo bonyii bo nci le kecii Ɛ kí tase.

17 Ɛ bó mum jo ndvu bvunfon shfuse yî ye le, bvuu lu kefo ke bvunfon e Ɛ kí nu bíay bíay bon ê wvú efa.

18 Ɛ bó mum kew no bune wvú gayte le, “Biaa kemaan. Nfon Bojuu.”

19 No bó gee nonen mum no suunke wvú bô kemaan yî ekole le, cuyte ncej yî ye le, too tumte envuw ê wvú ejise, bune wvú.

20 Ɛ bó ke sewse wvú nonen mese, mum kase baa ndvu bvunfon ye yî ye le, jise ndvú ye yî ye le, mum jo wvú no gene dvú keegen eta yî kentam e.

Ɛ bó ta Jisos yî kentam e

(Mat 27:32-44; Luk 23:26-43; Jon 19:17-27)

21 Ɛ bó dioo gene, Ɛ bô bo wee mvu tasen Ɛ wvú kfuuyi ηkpwaante Ɛ diee nu Semon, Ɛ è nu wee wvu Selin. Wvú to nu icee Eleksanda bô Lufus. Ɛ bó mum kan wvú Ɛ wvú tuu kentam ke Jisos e.

22 Ɛ bó no gene bô Jisos gen buy bvudvuu bvù bó teje le Golgota le, (Ɛ diee din nu le Njgbwow Ekole,)

23 mum nya mbvuum ê wvú le wvú ewu Ɛ bó Ɛ fiysen bô efuwe kemew Ɛ bó teje le meel. Geen Ɛ Jisos faηe yaa wu ke.

24 Ɛ bó mum ta wvú yî kentam e. Ɛ bó jo ndvú ye keegaw ê bikuu bibole mum tum kaη bô ndvú yidvu keekiee no wee nu ejo.

25 Kefew kè bó to ta Ɛ Jisos yî kentam e to nu didiuu bvuuke fontaηentaη.

26 Ɛ bó saη fiee fi bó ta Ɛ wvú yî kentam e nje fí Ɛ fí nu le, wvú nu, “Nfon Bojuu.”

27 Bó to nu Ɛ ta ten bocoη bofe Ɛ yî bintam e, wvumvu ê ebo ke Jisos e ke eceey e, wvumvu ê ebo kew ke eηkoηko le.

[**28** Ɛ fí mum kocen no bó to saηee wase ê Nwa' Nyo' le le, “Bó to nu Ɛ taη wvú ηgoo bonyii bô nu Ɛ buw mwem e.”]

29 Ɛ bonyii no fele yene Jisos e mæke lo bikuu, baale wvú bô boncun gayte le, “Eη'gheee! Wo wvù se nu keeke esâw yew ncese ekase eyoo yî ediuw e eta,

³⁰Ke fi le ekole kuw eshii yî kentam kie le.”

³¹Ɛ bocee ncese bo baay baay bô bonyii bô duŋci bonci bo Nyo' le no buu ten wvú ebonebon gayte le, “Wvú se fii bonyii bomew se wvú nulo efi kew ekole ŋkuuŋ.

³²Wvú wvù Mboyse wvù Nyo' to kawee, wvú wvù nu Nfon bonyii bo Islael ke eshii le yî kentam e keseen é bese eyen emum ebee wvú le.” Ɛ bonyii ba bô bó to tae yî bintam e bô bo Jisos no baale ten wvú bô boncun.

Ɛ Jisos kpwe

(Mat 27:45-56; Luk 23:44-49; Jon 19:28-30)

³³Ɛ diuu ke diao ben leke, Ɛ ekfuŋ ne jiim woŋ tfuu gen buy didiuu ditete emvunsheej.

³⁴Ɛ è ke no nu didiuu ditete, Ɛ Jisos ne fuŋ foweewe le, “Eloy, Eloy lama sabaktani,” fi nu le, “Nyo' wem, Nyo' wem, wo laŋ me nen nje la?”

³⁵Ɛ bonyii bomew bô to leeme fó diao yuw, gay le, “Ben eyeke eyuw, wvú teje Elayja.”

³⁶Ɛ wee mvu bó le ne lewte jo kusha, ffum ê mbvuum mo ŋgbwayŋgbwayi le, bon yî fite le neke le wvú ewu, mum gay le, “Ke leem nen é beene eyen laa Elayja nu eto eshike wvú yî kentam kin e le.”

³⁷Ɛ Jisos ne wam foweewe mum yoy n'yoy wvu fokemese.

³⁸Ɛ ndvu yì to gawsene yew ncese ente sele entelen kew fowe bow buy fokuse biba bifee.

³⁹Ɛ cee ekole bonyii bo nci le wvù to leeme fwe dvu Jisos diao yen je yì Jisos kpwe jó le, mum gay le, “Kecsee, wee wvun se nu Waa Nyo'.”

⁴⁰Bokene bomew to leeme fó ntamndwee taale. Ŋgoo bó le to nu Maalia Magdalen bô Maalia wvù bwee Jem wvu caan bô Yoses, Ɛ wvumvu nu Salome.

⁴¹Bokene ban nu bô to bii Jisos e Galilee fici wvú. Bó to nu fó bô bokene bomew ten nteen bô to bie Jisos e Ɛ bô bó to Jelusalem.

Ɛ bó dwey Jisos

(Mat 27:57-61; Luk 23:50-56; Jon 19:38-42)

⁴²Ɛ è ke no nu wase ekiegu ebvubwe, no è to nu Diuu di Nseyse le keeley yî diuu di mbam e,

⁴³Ɛ wee mvu wvu Alimatia wvù bó to teje le Yosew, kuu fitele gen yen Baylet e keeleke gvune di Jisos e egen edwey. Yosew wvun to nu ŋgoo bonyii bô saake woŋ e, Ɛ bonyii to wvumte naa wvú ntay. Ɛ wvú kebee to ceYTE ten kefew kè bvunfon bvú Nyo' le nu ke eto.

⁴⁴Ɛ Baylet yuw, Ɛ diuw yum lo wvú le Jisos be Ɛ kpwe wase. Ɛ wvú tee ekole ke bonyii bo nci le kie Ɛ kí to, Ɛ wvú bife é wvú laa Jisos be Ɛ kpwe wase le.

⁴⁵Ɛ wvú dīoo yuw ê ekolê ke bonyii bo nci le kedvu le Jisos be Ɛ kpwe wase, Ɛ wvú mum nya gvune didvu Ɛ Yosew.

⁴⁶Ɛ Yosew mum nê gen guy ndvu yî jee, gen shike gvune di Jisos e, baance jó, gen jike ê jem e Ɛ bó cow yî kemaan e, mum biñse kebwee ke tɛ le to bañ diuw jem yidvu dvú.

⁴⁷Ɛ Maalia Magdalen bô Maalia wvù bwee Yosēs yen bvudvuu bvù bó dwey Jisos fó le.

Mak 16

Ɛ Jisos buy yî kpwe le

(Mat 28:1-8; Luk 24:1-12; Jon 20:1-10)

¹Ɛ diuu di mbam e ke dīoo fey wase, Ɛ Maalia Magdalen bô Maalia wvù bwee Jem, noo Salome guy bonfey bô shfuunƙene wvu le bó egen eyefe gvune di Jisos e dvú.

²Ɛ è ke no nu Ɛ è bæe naa lo fontaŋtaŋ ke no diuu bæe san lo yî diuu di fwe yî kema le, Ɛ bó nê no gene fô jem.

³Ɛ bó dīoo gene nonen no jemyi ebonebon le laa è nu ke ebiñse yɛɛ tɛ di bó bañ diuw jem dvú é bó sɛ ley Ɛ?

⁴Geenen Ɛ bó dīoo laŋ jise, yen Ɛ bó Ɛ biñse wase tɛ didvu. Tɛ din to nu naa lo kebwee ke tɛ le.

⁵Ɛ bó dīoo ley gen ê jem, yen cuwee mvu le Ɛ wvú Ɛ shii ebo eceey Ɛ tfume ndvu Ɛ yî defe, baa. Ɛ ye kufe bó nen wuuu.

⁶Ɛ cuwee wvudvu gay ê bó le, “Fo diuw eyumtè ben ke. Me ŋkee lo le ben gomte Ɛ è nu Jisos wvu Nasalet wvù bó se tae yî kentam e. Ke wvú bæe fɛn ke. Wvú nu Ɛ buy wase yî kpwe le. Ben etaa eyen fô bó se jikɛɛ wvú.

⁷Ben egen esee ê boom bew bo ŋgoo le noo ê Bita le wvú nu Ɛ sa wase fwe dvenen Galilee. Ben nu ke eyen wvú le jó no wvú to gayɛɛ ê ben.”

⁸Ɛ bokene ba buy ê jem ciinƙe nen kikikiki, nê fɛɛ lo, Ɛ diuw Ɛ looce Ɛ yum bó nen kaww. Ɛ bó faŋɛ yaa jeme fiɛɛ ê wee ke, njefo bó to fane lo.

Ɛ Jisos duŋɛ ye ye ê bonyii

(Mat 28:9-10; Jon 20:11-18)

⁹Jisos to buy yî kpwe le diuu di fwe yî kema le Ɛ è bæe kebitele, yaw buynen Ɛ è nu fô Maalia Magdalen wvù wvú to bvuseɛ bonceendaa bo dɛwle le yî ye le bosoooshiy.

¹⁰Ɛ Maalia mum gen see ê bonyii bô bô bo Jisos to ké no nu. Bonyii ban to nu Ɛ shii beele soo bikuu.

¹¹Ɛ bó dīoo yuw no kpwoon wɛ gayte le wen be Ɛ yen Jisos e Ɛ wvú nu dvú, Ɛ bó faŋɛ yaa bee naa lo ke.

(Luk 24:13-35)

12 Ejim jodvu ε Jisos bvuu duɲɛ ye ye ê bonyii bew bomew bo ηgoo le bofεε ε bó gene ntew mvu le ε nfieesen ye ε kumen wase.

13 Ε bó tu jim, gen see ê kebese ke bonyii bo ηgoo le, ε bó faɲe yaa bee bó le ke.

(Mat 28:16-20; Luk 24:36-49; Jon 20:19-23)

14 Ejim jodvu ε Jisos duɲɛ ye ye ε è nu wase ê boom bew bo yuufe ncow mwaan e kebee ε bó diekene. Ε wvú saw bó, njefo bó to baa keɲke mbee ke, temyi bikuu keebē bonyii bò to yeneε wvú le seke wvú to buyεε yî kpwe le.

15 Ε wvú mum gay ê bó le “Ben egen woɲ e tfuu egen efewcì saaka wvù jee wvù wvu Nyo' ê bonyii bocii.

16 Wee wvù é bee saaka wvudvu le, bó ε lese wvú ê joo, é wvú ke eboy. Wee wvù ε faɲ keebē, nu ε wvú nu ke eley ηgew e.

17 Bonyii bò nu ε bee nu ke egee mwεem mvù duɲci mvuɲgay mvu Nyo' le diewe mvun e: bó nu ke ebvuse bonceendaa bo dεwle le yî bonyii le ê diee diem e. Bó nu ke ejemyi díew yi fiε.

18 Bó nu ke ejici yó le bô can. É bó cim wu lo njiw, wvú saa ege fiεε bô bó ke. Bó nu ke egεεle can yî bonyii bò cemkene le, ε bó bonene.”

Ε Jisos ben we

(Luk 24:50-53)

19 Ε Tata Jisos jeme ê bó nonen mese, ε Nyo' mum jo wvú ε wvú ben we shii ê ebo ke εεεy ke Nyo' le.

20 Ε boom bew bo ηgoo le ke mum buy no ghane fewci saaka wvù jee mondvuum e monciim. Ε Tata lemte bô bó tomte fiεε fi bó to fewci le è nu keεεy bô mwεem mvù duɲci mvuɲgay mvu Nyo' le mvù bó to gee.]

Luk

Luk 1

Kenkwese

¹Wee wvu baay wvù Teofilus, bonyii nteen nu ε mom wase keesan ekume mwεem mvù to koyee entelen jo bese.

²Bó to saanke mwεem ke lenlen mvù bese to yuwεe ê bonyii bò to yenεe bô ejise ebo bvuu no fewci saaka wvudvu no mvù to kewεe.

³No me nu ε njo wase kefew ε ntasse mwεem mvun mvunciim ε kew fonkew, ε mum ε n'yen le fí jee le me embaance ensan ten ê je yi len e ê wo.

⁴Me nge fin le wo ekiee kecεey ke mwεem mvù bó nu ε fewce wase ê wo le.

ε nceendaa Nyo' tefe le bó nu ke eboo Jon Nleseejoo

⁵Seke Nfon 'Elod to saake won wvù Judea, cee ncese mvu to nu ε bó teje le Sakalia. Wvù to lemte ê ngoo bocee ncese bo Abija le, ε bwee yew we to buy ten ê kfuu di Elon e, ε bó teje wvù le Elisaben.

⁶Bonyii bo bofεe ban to nu bonyii bo teyten ê Nyo' ejise, gεele bonci bo Tata le bocii, yaa kenke jay ke.

⁷Geenen, bó to baa kenke wan ke, njefo Elisaben to nu kase, ε bó bocii to nu ε bó ε lunken wase.

⁸ε kefew ke to kocen, ε ngoo Sakalia no lemte yew ncese Tata le. È to nu wvù cee ncese ê Nyo' ejise ebvubwe,

⁹ε bó to baa wvù bii no bó to ké no baale bocee ncese ê nce wvubole. ε wvù mum ley yew ncese le keeton jiin.

¹⁰ε kefew ke kocen keeton jiin, ε bonyii bocii bò to nu ekfuɲ no bunlee.

¹¹ε nceendaa Tata sεsε buynen ê wvù ejise leem ê ebo ke εcεey ke ketan ke jiin e.

¹²Seke Sakalia to yenεe wvù le, ε kedvum gbwo wvù, ε wvù kenke nfan baay.

¹³Geenen, ε nceendaa wvudvu gay ê wvù le, "Fo wo efanè ke. Nyo' nu ε yuw wase bunle yo. Bwee yew wo wvù Elisaben nu ke eboo wan diemsen é wo ecu diee le Jon.

¹⁴Wvù nu ke eto bô nlanlan fô wo le, ε bonyii nteen nu ke eyuuke njon nje boo diew.

¹⁵Wvù nu ke enu wee wvu baay ê Nyo' ejise. Fo wvù ke ewuù mbvuum ke, sε ge mò temyi. Keyoy ke Yuule nu ke eyinŋen yî ye le seke bó ε boo wvù.

¹⁶Wvù nu ke ege é bonyii bo Islael nteen ekumen mvuntelem mvubole ekase etu bô bo Tata wvù Nyo' wvubo.

17 Wvú nu ke egen fwe jo Tata bô fitele noo mvunḡay mvu Elayja le, keekumen mvuntelem mvu bocee boom e, é mvú enu yî boom bobole. Wvú nu ke ege é bonyii bô temyi bikuu ecine bikuu bî temyeen e, ekumen bonce bobole, ekenke bonkpwawce ε è nu bo bonyii bo leḡ e. Wvú nu ke ege nonen wvu le bonyii enù ε bó ε seyse keecyete Tata.”

18 Ε Sakalia bife ê nceendaa Nyo' le, “Fieε fi nu ke ege é me enkieε ε bee bwee yew wem nu ε bó ε lunken wase nen nu la?”

19 Ε nceendaa Nyo' tfuse le, “È nu me wvù Gabliya, ε me nleeme ê Nyo' ejise sekecii, ε è tum wvú me le me ento ensee saaka wvù jee wvun ê wo.

20 Taa eyen, no wo baa ebee saaka wvun e, ε kefew nu ke eto ekocen é fí ekenke keekooy, wo nu etu kencife, saa ejemyi ke, egen ebuy seke fieε fin nu ke ekooy.”

21 No fí to kooyi nonen, ε bonyii bô to nu ekfuḡ cyete Sakalia no kenke lo ḡhaw laa è se kooyi la fi wvú she dvú baay nen ε.

22 Seke wvú to buyee dvú, wvú to baa kieε keejeme ê bó ke. Ε bó mum kieε le Nyo' nu ε duḡce fieε fi ḡhaw e ê wvú dvú. Ε wvú mum no feeke lo mwεem ê bó bô can, yaa jemyi ke.

23 Ε Sakalia ke mese lemme diew yew ncese le mum kase tu jim fô yew e fo wvú.

24 Ε ediuw ke fey, ε kpweε wvù Elisaben leem bô fue, mum no nu ke ε è nu yew yî kee le tin.

25 Ε Elisaben mum gay le, “Keseen Tata nu ε koo wase shen fô me le, ε cake keḡ'wuumen yî ekole kem e.”

Ε nceendaa Nyo' tefe le bó nu ke eboo Jisos

26 Ε fue di Elisaben e ke buy kee soocan, ε Nyo' tum nceendaa we wvù Gabliya ntew mvu wvu Galilee le ε bó teḡe le Nasalet.

27 Wvú to gen bô ntum fô ḡgon kpwoon mvu le ε bó teḡe le Maalia, ε è bee wan wvu tfu. Wvú to nu ε bó ε seyse wase le wvú nu ke enu kpweε Yosew wvu ê kfuu di Nfon Dawe le.

28 Ε nceendaa Nyo' wvudvu gen yen Maalia le gay wvú le le, “Me ḡgayte wo le. Nyo' nu ε buw wase wo ε no nu ben ε wvú.”

29 Ε Maalia yuw ε fí ḡhaw wvú baay, ε wvú no maa laa kfuu wvun ḡgayma se nu wvù neε le.

30 Geenēn, ε nceendaa Nyo' gay ê wvú le, “Maalia fo wo efanè ke. Nyo' nu ε buw wase wo.

31 Taa eyen, wo nu ke eleem bô fue, eboo wan diemsēn, ecu diee le Jisos.

³² Wvú nu ke enu wee wvu baay, ε bó nu ke eteje wvú le Waa Nyo', Nyo' wvù nu Ekole ke Mwεem Mvunciim e. Tata wvù Nyo' nu ke eshike wvú yî kawla Nfon Dawe wvù icee kfuu dibole.

³³ Wvú nu ke esaake kfuu di Yakow e sekecii, ε ke bvunfon bwew nu ke ekeηke kemese ke.”

³⁴ Ε Maalia bife ê nceendaa Nyo' le, “Fifin nu ke eghan nεε le, ε me mβεε wan wvu tfu.”

³⁵ Ε nceendaa Nyo' tfuse ê wvú le, “Keyoy ke Yuule nu ke eto yî yo le, é mvuηgay mvu Nyo' wvù nu Ekole ke Mwεem Mvunciim e eyiηsen yî yo le. Nonen, wan wvù wo nu ke eboo nu ke enu wvù yuule, é bó emum eteje wvú le Waa Nyo'.

³⁶ Taa eyen, wayco wvù Elisaben wvù nu ε wvú ε looce wase ε lun ε bó se teje wvú le kase, nu keseen bó fue kee soocaa, ε wvú nu ke eboo wan diemsen.

³⁷ Ke fiεε nu dvú fi nulo eghaw Nyo' ke.”

³⁸ Ε Maalia mum gay le, “Me wvun fen wvù waa lemme Nyo'. Wvú ege é fí ekooy bó me no wo gay.” No wvú jeme nonen, ε nceendaa Nyo' mum nε.

Ε Maalia laa ghane ê Elisaben e

³⁹ Ke ediuw yodvu le, ε Maalia seyse nε no yaηsene gene ntεw mvu wvù won kum wvu Judea le,

⁴⁰ gen buy jó, ley yew dvu Sakalia gay bwee yew we wvù Elisaben e.

⁴¹ No Elisaben to yuwεε ηgayma wvu Maalia, ε wan sεsε ê wvú eshem baay. Ε Keyoy ke Yuule yiηsen yî ye le.

⁴² Ε wvú mum wvule foweεwe, gay le, “Kembonen ke Nyo' le nu yî yo le fele bokene bocii, ε kembonen kew nu yî wan wvù wo nu ke eboo le.

⁴³ Fin fiεε fi baay nen ghan nεε le, le bwee Tata wem nu ε laa ghane ê me le?

⁴⁴ Taa eyen, seke me mbe n'yuw ηgayma wo, wan ε sεsε ê me eshem bó nlanlan wvu baay.

⁴⁵ Njony wvu baay nu fô wo le, njefo wo nu ε bee le ηkawma wvù Nyo' to kawεε wo dvú nu ke eto ekocen.”

Ε Maalia bense Nyo'

⁴⁶ Ε Maalia gay le, “Fitele fiem bensee Tata Nyo',

⁴⁷ ε me n'yuuke njony nje Nyo' wvù nu Mboyse wem.

⁴⁸ Wvú nu ε kume me, ε me nu ke lo waa we lemme wvu nεw. Ε kew yî keseen e ε gen lo, ηgokε kecii nu ke egayte le, Nyo' nu ε lan kembonen yî yem e,

⁴⁹ njefo Nyo' Mvuηgay Mvunciim nu ε ge wase mwεem mvu baay baay nteen fô me le. Ke diee diew keηke kenfewsen ke.

- 50 Wvú camte shen fô bonyii bò wvumte wvú le. E shen yin nu yî engokε kecii le.
- 51 Wvú nu ε duŋce mvuŋgay mvu εbo kew e, ε tawse bonyii bò saale ye, bontaŋ bobole ε bvuy.
- 52 Wvú nu ε shwaw wase bonfon bo baay baay yî bokawla le, ε bense ε è nu bonyii bo ncεw.
- 53 Wvú nu ε nyaŋe wase bonyii bò jeŋ yuu bó, bó ε ffuu bô mwεem mvù jee, ε kuŋ bo kpaw e cancan.
- 54-55 Wvú nu ε ficε wee we lemme wvù Israeł, ε kume keecam shen fô Abła'am bô kfuu diew e, egen emεse ke no wvú to kawεε ê bo'icee cee bosεse.”
- 56 No Maalia jeme nonen, ce bô Elisabεn kee tε mum kase tu jim fô yew e.

ε Elisabεn boo Jon Nleseejoo

- 57 ε kefew kè Elisabεn ke eboo ke to kocεn, ε wvú boo wan diemsεn.
- 58 ε kfuu diew noo bonyii bò to cee keleŋ kedvu le yuw le Nyo' nu ε duŋce shen fô wvú le naa baay, ε bó mum no laŋlaŋe.
- 59 ε εdiuw ke to buy nyaŋ, ε bó to keetfuse wan yew, mum no gomte keecu diee le Sakalia ke diewe di ice le,
- 60 geenεn ε bwee ma lo, gay le bó eteŋè wvú le Jon.
- 61 ε bó gay ê wvú le, “Ke wee nu dvú ê kfuu dinεn e bô diee din ke.”
- 62 ε bó mum nε no feeke bô can ê cee wan, keekieε laa wvú be gomte le bó ecu diee di wan e le yeε le.
- 63 ε wvú mum few ten le bó eto bô fieε é wen esaŋ yî dvú le. E bó to dvú ε wvú mum saŋ le, “Diee diew nu Jon.” E bó yen nonen ε dew yum bó.
- 64 Kaŋ mwaan, ε diuw Sakalia mum yene ye, ε leme diew yaaten, ε wvú bvuu kase no jemyi. E wvú mum kew no tumte moŋkum mo Nyo' le.
- 65 ε bonyii bo ntεw wvudvu le keŋke ŋghaw baay. E saaka mwεem mvun mvunciim saanŋen gen woŋ kum wvu Judea wvudvu le tfuu.
- 66 ε bonyii bocii bò to yuwεε mwεem mvun mvunciim keŋke ŋghaw mum no biite laa wvun wan nu ke enu wvù nεε le, njefo fı to looci duŋci le kembonεn ke Nyo' le nu yî ye le.

ε Sakalia tefe ntum Nyo'

- 67 ε Keyoy ke Yuule nε yiŋsen yî Sakalia wvù icee Jon e, ε wvú mum nε no jemyi ke diewe wee ntum Nyo' le, gayte le,
- 68 “Beene ebenseè Tata wvù nu Nyo' bonyii bo Israeł. Wvú nu ε to wase keesum bonyii bew yî ŋgew e.
- 69 Wvú nu ε gεε wase ntemmvuŋgay wvù nu ke eboyse beene, ε wvú buy ê kfuu di wee we lemme wvù Nfon Dawe le.

- 70** Fifin nu no wvú to kawε diuw bonyii bew bo ntum e bò yuule ε è bæε lo bvuyvuum e bò wvú to gεkεε,
- 71** le wen nu ke eboyse beene can bonyii bò gomte keefiwse beene le, noo bonyii bosεεbeene bo bvuban e.
- 72** Wvú to nu ε kaw le wen nu ke ecam shen fô bo'icee cee bosεεbeene le mum no shee kumyi kelew kew kè wvú wvù Nyo' to dieε.
- 73** Wvú to nu ε kaw ê icee bo'icee bosεεbeene wvù Abla'am lew le,
- 74** wen nu ke ebvuse beene can bonyii bosεεbeene bo bvuban e, wvu le è nulo é beene elemte wvú le sε nfan,
- 75** eceè nce wvù yuule bô wvu teytey ê wvú ejise εdiuw εcii yî nshii wesebeene le.
- 76** Ε wo waa wem nu ε bó nu ke eteje wo le wee ntum Nyo', Nyo' wvù nu Εkolε ke Mwεem Mvunciim e, njefo wo nu ke esa fwe dvu Tata keeseyse je ye.
- 77** Wo nu ke efewci ê bonyii bew je yì è nulo é bó ekeηke mboyma jó, wvù è nu nleεshe wvù Nyo' nu ke eleεshe bibefe bibole,
- 78** nje shen yi baay yì wvú koole fô bonyii le. Wvú nu ke eciinse Mboyse é wvú eshiile too we ke diewe diuu fò dí ε san e.
- 79** Wvú nu ke enya n'yuú ê bonyii bò nu yî ejiwε le noo bò nu diuw kpwe le, emum eleke beene ê je kembonen e.”
- 80** Ε waa Sakalia wvudvu mum no kuu yî nyam ye le, kuu ten ê keyoy e. Ke mum ne gen no cee ε è nu ηkpwaante, gen buy diuu di wvú to buyεε keeduηce ekole kew ê bonyii bo Israel.

Luk 2

Ε Maalia boo Jisos

(Mat 1:18-25)

- 1** È to nu kefew kekie le, ε sa' buy le bó etaη bonyii bocii bò nu yî bitum bi woη wvù Lum e. Yí to buy ê Kaysa Augustus wvù to nu Nfon wvu baay wvu jó.
- 2** Kentaη kin to nu ke fwe seke Kpwilinus to nu wee sa' wvu Lum saake keba ke woη e kè Silia.
- 3** Nonen, ε bonyii bocii mum no tuu jim bontεw bobole, le bó esaη εdiee εbo ebvuu etaη bó.
- 4** Ε Yosεw ten ne Nasalet ntεw mvu wvu Galilee le, ben gen Betele'em ê keba ke woη wvù Judea le jò bó to bokεε Nfon Dawe. Wvú to gen jó njefo wvú to nu wee kfuú di Nfon Dawe le.
- 5** Yosεw to gene bô Maalia wvù wvú to leyte le è nu ke enu kpweε, ε wvú nu bô fue.
- 6** No bó to geneε buy jó, ε kefew kè wvú eboo ke to kocen.

⁷Ɛ wvú boo waa we bvucile ɛ è nu wan diemsɛn, kule ê ndvu le, jike ê kekoŋ ke nyám e, njefo bó to nu ɛ tan fô nce yew bonyii bo ghane le.

Ɛ nceendaa Tata see boo ê boncɛy njée

⁸È to nu kefew kedvu le, ɛ boncɛy njée bomew nu mbew ntɛw wvudvu le, cɛyte njée yibo entaŋ.

⁹Ɛ nceendaa Tata nɛ sɛsɛ buynɛn ê bó ɛjise, ɛ n'yuu Nyo' ba fô bó to nu, ɛ bó keŋke nfan baay.

¹⁰Geenɛn, ɛ nceendaa Tata wvudvu gay ê bó le, “Fo ben efanè ke. Ben eyuw, me ntoo ɛ è nu bô saaka wvù jee fô ben e, ɛ wvú nu ke enya njoŋ wvu baay ê bonyii bocii.

¹¹Yí diuu di ɛben e nu ɛ bó ɛ boo Mboyse ê ntɛw Nfon Dawe le wvù è nu Klistu wvù Tata.

¹²Fin nu ke enu nciise keeduŋcɛ wan wvudvu ê ben. Ben nu ke egeɛn eyen wvú le ɛ bó ɛ kule ê ndvu le ɛ jike ê kekoŋ ke nyám e.”

¹³Ke nonɛn, ɛ bó nɛ sɛsɛ yen nceendaa Nyo' wɛ le bô ŋgoo bomew e nteen ɛ bó tumte moŋkum mo Nyo' le gayte le,

¹⁴ “Mbense enù fô Nyo' wvù nu fowe le

é kembonɛn enu fokuse fɛn fô bonyii bô Nyo' yuuke njoŋ bô bó le.”

¹⁵Seke bonceendaa bo Nyo' le ba to cin'yɛɛ bó le kase ben we, ɛ boncɛy njée bodvu jeme ê bikuu bibole le, “Beene egeɛn keseen wvun Betele'em, egeɛn eyen fieɛ fin fi kooy le fi Nyo' nu ɛ ge beene ɛ kieɛ.”

¹⁶Kaŋ mwaan, ɛ bó mum nɛ yaŋsɛn geɛn, geɛn yen Yosew bô Maalia le noo wan e, ɛ wvú jiime ê kekoŋ ke nyám e.

¹⁷No bó yen nonɛn, mum kew no fele mwɛɛm mvunciim mvù nceendaa Nyo' be seŋe ê bó ɛkumɛ wan wvudvu.

¹⁸Ɛ dew yum bonyii bocii bô yuwɛɛ mwɛɛm mvù boncɛy njée ba jemyɛɛ ê bó.

¹⁹ Geenɛn, ɛ Maalia yuw fiew geɛ fô fitele le no kpawci sekecii.

²⁰Ɛ boncɛy njée ba kase no tuu jim bensee Nyo' tumte moŋkum mew njefo bó to nu ɛ geɛn yen mwɛɛm mvunciim e ke leŋleŋ no nceendaa Nyo' to seŋɛɛ.

Ɛ bó geɛn nya wan wvù Jisos yew ncese le ê Nyo'

²¹ Ɛ wan wvudvu ke buy ɛdiuw nyaŋ, ɛ bó tfuse wvú yew, mum cu diee le Jisos, ɛ diee din nu ke dí dì nceendaa Nyo' to seŋɛɛ ê bwee ɛ wvú sɛ ke leem bô fue.

²² Ɛ kefew ke to kocɛn kè bó ege ncese keekfum bikuu bibole no nci Muses to gomte. Ɛ bó mum jo wan ben dvú Jelusalem keenya ê Nyo'.

23 Fifin nu no bó to saɲɛɛ ê Nwa' bonci bo Nyo' le le, “É wee boke waa bvucile ε è nu wan diemsɛn, é wvú nya ε è no nu wvu Nyo'.”

24 Bó to gen ten keege ncese wvun bô bibembɛ bifɛɛ, kɛnɛɛ bô boom bo nyiɲ e bofɛɛ bii no fí to nu ê Nwa' bonci bo Nyo' le.

25 È to nu kefew kedvu le, ε cee la mvu nu Jelusalem ε bó teɲɛ le Semeon. Wvú to nu wee wvu teytey gee no Nyo' gomte, ε wvú to cɛyte wee wvù ke eto elɛɛse mvuntelem mvu bonyii bo Islael e. Keyoy ke Yuule to nu yî ye le,

26 ε kí to ge wase ε wvú kieɛ le ke kpwe nu ke ejo wvú sɛ wvú ε yɛn Mboyse wvù wvu Tata wvù wvú to kawɛɛ le kɛ.

27 ε Keyoy ke Yuule ke nɛ ge ε Semeon gen yew ncese le. ε Yosɛw bô Maalia ke dioo to bô wan yew ncese le keege no nci gomte,

28 ε Semeon fi wan koyɛɛ mum kɛw no tumte moɲkum mo Nyo' le, gayte le,

29 “Tata, no wo nu ε ge wase ɲkawma wo ε to ε kocɛn, joo le wee wo lemme yî nyɛkeey e.

30 Ejiɛɛ eyɛm nu ε yɛn wase Mboyse

31 wvù wo ciinse le, ε bonyii bocii nu ke eyɛn wvú le.

32 Wvú nu ke enu ken'yeese fô bonyii bô yaa nu ke bo Islael e, wvu le bó ten ekee wo, ege é bó ecake diee di bonyii buw bo Islael e we.”

33 ε cee wan bô bwee wan yuw mwɛɛm mvù Semeon jemyi ê wan wvun we, ε dew yum bó.

34 ε wvú mum laɲ kembonɛn yî bó le, gay ê Maalia wvù bwee le, “Nyo' nu ε caw wase waa wo wvun, ε nto we nu ke ege é bonyii bo Islael nteen egbwekɛn, é bomew enɛɲkɛn lo we. Wvú nu nciise fieɛ ε bonyii nu ke ejemyi mwɛɛm yî ye le.

35 Nonɛn, é fifin emum eduɲci mwɛɛm mvù bonyii nyile ê mvuntelem mvubole. Mwɛɛm mvun mvunciim nu ke ege é fitele fiuw enu ke diɛwɛ bó bon bô finyo.”

36 È to nu ke kefew kedvu le, ε kpwoon mvu nu ε bó teɲɛ le Anna, ε è nu wee ntum Nyo'. Wvú to nu waa Fanuwɛl wvù wee kfuu di Ashɛl e. Kpwoon wvudvu to nu ε lun wase baay. Wvú to nu bô dweese kɛ bilum bisooshwiɲ mɛy, ε dweese mum kpwe.

37 ε wvú mum no nu ke wase fiew kpwɛɛ ɲkfu, shee yew ncese le bensee Nyo' ɛntaɲ bô ɛmvunsheɛɲ, bamte mwɛɛm mvudien, bunlee. Bilum biew to nu wase mbaɲ nyaɲ ncow binɛw (84).

38 Kɛ kefew kedvu kè bó to toɛ bô wan yew ncese le, ε kpwoon wvudvu to yɛn bó le, mum nya keyoone ê Nyo', jeme ɛkumɛ wan wvun ê bonyii bocii bô to cɛyte kefew kè Nyo' ke esum bonyii bo Jelusalem can ɲɛw e.

³⁹Seke Yosew bô Maalia to mɛsɛɛ mwɛɛm mvunciim no nci Nyo' to gomte, mum kase tu jim ntɛw wvubo wvù Nasalet e ê keba ke woŋ e kè Galilee le.

⁴⁰Ɛ wan mum no nu kuu kɛŋke mvuŋgay, ɛ wvú ɛ yiŋsɛn bô bvufɛe bvɛ baay, ɛ bonyii yɛnɛ kembonɛn ke Nyo' le yî ye le.

Ɛ Jisos ɣɛn shɛɛ yew ncese Nyo' le

⁴¹Icee Jisos bô bwee to ké no bene Jɛlusalɛm bilum bicii fô Nkaw Daŋɛfey e.

⁴²Ɛ Jisos ke buy bilum yuufe ncow bifɛɛ, ɛ bó bvuu ben fô Nkaw wvudvu le kɛ no bó to ké no bene.

⁴³No bó to dieɛ wase Nkaw mɛsɛ, dɛɔo tuu jim, ɛ wan wvù Jisos shɛɛ ɛjim Jɛlusalɛm, ɣɛnɛn ɛ ice bô bwee faŋɛ yaa kɛɛ kɛ.

⁴⁴Ɛ bó ke len diuu dicile, kpwaake kɛ lɛ wvú nu ɛntɛ jo ŋgoɔ bonyii bô bó to lenɛ le. Ɛ bó ke mum kɛw no gomte wvú ɛntɛ jo kfuu dibole bô nsán,

⁴⁵ke gom ŋkuuŋ, mum kase tu jim Jɛlusalɛm keegom wvú jó.

⁴⁶Ɛ è dɛɔo nu ɛjim jo ɛdiuw ɛta no bó to kɛwɛɛ keegomte, ɛ bó yɛn wvú le ɛ è nu fô yew ncese le, ɛ wvú ɛ shii fó bô bonyii bo n'yɛɛyi le, yeke bon'yɛɛyi, biwci bombife.

⁴⁷Ɛ bonyii bocii bô to yeke no kɛŋke ŋghaw baay njɛfo wvú to kee mwɛɛm baay bvuu tfuuse bombife lɛŋ.

⁴⁸No bwee bô ice yɛnɛɛ wvú le, ɛ dew loocɛ yum bó. Ɛ bwee ben wvú gay lɛ, “Wan wo njiŋsɛnɛ la bô bɛsɛ nɛn? Taa ɛyɛn, bɛɛ ico nu ɛ gom wase wo ɛ no wɛwte lo.”

⁴⁹Ɛ wvú tfuse lɛ, “Ben bɛ gomte mɛ nje la? Kɛ ben bɛ kee lɛ mɛ ŋkɛŋke keenu yew dvu Icɛm fɛn e?”

⁵⁰Ɛ ɣɛnɛn, ɛ bó faŋɛ yaa kɛɛ fiɛɛ fi wvú jɛmɛ kɛ.

⁵¹Ɛ wvú mum nɛ ɛ bô bó no booke Nasalet. Ɛ wvú ɣɛn no yuuke bó le ntay. No mwɛɛm mvun to kooyi nɛn, ɛ bwee ɣɛɛ fô fitele fiɛw e no kpawwci sekɛci.

⁵²Ɛ Jisos mum no kuu, kɛŋke bvufɛe bvɛ baay, ɛ Nyo' kooŋke wvú, ɛ bonyii tɛn kooŋke wvú.

Luk 3

N'yɛɛyi wvu Jon Nlɛsɛɛjoo

(Mat 3:1-12; Mak 1:1-8; Jon 1:19-28)

¹⁻²È to nu kɛfɛw kè Jon wvù waa Sakalia to nu ŋkpwaante, ɛ Nyo' tum wvú. Kelum kɛkɛ to nu ɛ Tibɛlius ɛ saw wase diɛwɛ Nfon wvu baay wvu Lum e bilum yuufe ncow bitin. Ɛ Bontus Baylɛt saake keba ke woŋ e kè Judea, ɛ 'Elod saake Galilee. Filew wvù waa bwee 'Elod to saake keba kè Itulea bô kè Telakoniti, ɛ Lisania saake Abilen. È to nu tɛn kɛfɛw kè Annas bô Kayfas to nu bikuu bi boɛɛ ncese le.

- ³ No Jon yuw ntum Nyo', mum ne gen biba bi won e bicii bì mbew Joo Joodan e, no fewci ê bonyii le bó ekumen mvuntelem mvubole, é wen elese bó ê joo wvu le Nyo' eléeshe bibefe bibole.
- ⁴ Fifin nu no Yesaya wvù wee ntum Nyo' to saṅee ê Nwa' we le le, “Diew wee fuunke ḡkpwaante le, bó eseuse je Tata, enele é yí enù teyey,
- ⁵ ekéeshe le dikum di baay baay bô di caan caan dicii, eyinṣen bilonḡe bicii, enele jé yì ḡgoonḡoo é yí enu teyey, eyinṣen bintuke é je enu nen femm,
- ⁶ é bonyii bocii emum eyen no Nyo' boyse bonyii.”
- ⁷ No Jon fewci nonen, e bibombom bi bonyii le mum no too le wvù elese bó ê joo. E wvù mum ne gay ê bo le, “Eḡgoké ke yó le, è tefe yee ben le ben elewtè shém Nyo' yì ffuuke yì wvù nu ke eduḡe é ben, e se no too nen?
- ⁸ Ben egeè mwεem mvù duḡci le ben nu e kumen wase mvuntelem mvunen. Fo ben emum ekew eduù ke lo é bikuu binen le Ablam nu icee wene ke. É me ensee é ben le è nulo é Nyo' ebanke eta eyan é yó etu boom bo Ablam e.
- ⁹ Ben ekeè le bó nu e gge wase teme é binyi bi bite le. Kete kecii kè baa yumte mvuntam mvù jee, nu e bó nu eḡbwo naa eley yì ḡeḡ e, eton lo.”
- ¹⁰ E bibombom bi bonyii le bie yuw, bife é Jon le, “Bese nu ege nee keseen?”
- ¹¹ E wvù tfuse le, “Wee wvù keḡke bikum bifee enya kemew é wee wvù yaa keḡke ke, é wvù keḡke mwεem mvudien egaw bô wee wvù yaa keḡke ke.”
- ¹² E bonyii bomew bô to fii shile to fô wvù le le wvù elese bó ê joo, bife é wvù le, “Wee n'yeyi, bese ege nee fisese?”
- ¹³ E wvù tfuse é bó le, “Fo ben efii shile fesene no nci gomte ke.”
- ¹⁴ E bonyii bo nci le to fô wvù le bife le, “Fisese nu e bese nu ege nee?” E wvù tfuse le, “Ben eyenè fo ben ebemseè bonyii lole bigew noo keegowtè mwεem yì bonyii le ecici ke. Ben eyuukè nḡon bô fiee fi bó laake ben dvù.”
- ¹⁵ No bonyii to nu ke wase ceyte Mboyse wvù Nyo' to kawee, e bó mum no ḡhayte mwεem mvu Jon e, bvuu no kpwaake le sekemew e è nu wvù wvù Mboyse wvudvu.
- ¹⁶ E Jon mum kiee gay é bó le, “Me nleese ben e è nu ke é joo le maan, geenen wee wvù kuuke fele me bee too ejim, e me mbaa nciḡ ḡkpwenten keeḡvuwce nfay bolaba bew ke. Wvù nu ke elese fiew ben e è nu can Keyoy ke Yuule le noo ḡguy e.
- ¹⁷ Wvù keḡke fiee fiew ebo fi wvù nu efεeten eḡiḡ dvù, eyese fò wvù fεetene, ebaance eḡiḡ eḡee é ḡwaw e, emum ekuu nyiim eton é ḡguy wvù fiee se njime le.”
- ¹⁸ È nee no Jon to fewci saaka wvù jee wvù wvu Nyo' é bonyii nen bvuu nyaa bó bô bontefe jé le nteen.

¹⁹ Geenen, ε wvú no jemyi ekumε 'Elod wvù wee sa' kaci lo, njefo 'Elod to nu ε jo 'Elodia wvù kpweε waa bwee kpweε le, bvuu no jemyi ekumε mwεem mvù befe nteen mvù 'Elod to buwyεε.

²⁰ Ε 'Elod ke mum mεse foose lo gee diew gay le bó ekoo Jon efen yew ncaw e.

Ε Jon lese Jisos ê joo

(Mat 3:13-17; Mak 1:9-11)

²¹ Seke Jon to bæε leese bonyii ê joo, ke lese diuu dimew mεse ε Jisos ten to ε wvú lese wvú ê joo. Ε Jisos dioo bunlee, ε ebule yene ye,

²² ε Keyoy ke Yuule shii to yî ye le fieesene ebembε. Ε diew jeme fowe le, “Wo nu Waa wem, nu fitele fiem, ε me n'yuuke njon bô wo baay.”

Kfuu di bo Jisos e

(Mat 1:1-17)

²³ Jisos to nu diewe bilum mbaanshe le seke wvú to kewεε lemme diew. Bonyii to kpwaake le wvú nu waa Yosew wvù waa Eli.

²⁴ Eli to nu waa Mata't, wvù waa Lewe, wvù to nu waa Nelki wvù waa Jannay, wvù to nu waa Yosew.

²⁵ Yosew wvun to nu waa Matatia, wvù waa Amos, wvù to nu waa Na'um, wvù waa Esli, wvù to nu waa Nagay.

²⁶ Nagay to nu waa Maat wvù waa Matatia, wvù to nu waa Semein, wvù waa Yosek, wvù to nu waa Joda.

²⁷ Joda to nu waa Joanan, wvù waa Lesa, wvù to nu waa Selubabel, wvù waa Shiltia, wvù to nu waa Neli.

²⁸ Neli to nu waa Nelki wvù waa Adi, wvù to nu waa Kosam, wvù waa Elmadam, wvù to nu waa El.

²⁹ El to nu waa Yoshua wvù waa Eliesa, wvù to nu waa Yolem wvù waa Mata't wvù to nu waa Lewe.

³⁰ Lewe to nu waa Semeon wvù waa Juda, wvù to nu waa Yosew, wvù waa Yonam, wvù to nu waa Eliakim.

³¹ Eliakim to nu waa Melia wvù waa Mena, wvù to nu waa Matata wvù waa Natan, wvù to nu waa Dawe.

³² Dawe to nu waa Jεese, wvù waa Obed, wvù to nu waa Boas, wvù waa Sala wvù to nu waa Na'shon.

³³ Na'shon to nu waa Aminada, wvù waa Admin, wvù to nu waa Alni, wvù waa Eslon, wvù to nu waa Beles wvù waa Judas.

³⁴ Juda to nu waa Yakow wvù waa Aysik, wvù to nu waa Abla'am, wvù waa Tela, wvù to nu waa Na'ol.

³⁵Na'ol to nu waa Selug wvù waa Leu, wvù to nu waa Beleg wvù waa Ebe, wvù to nu waa Shela.

³⁶Shela to nu waa Kaynan wvù waa Alfasad, wvù to nu waa Shem wvù waa Noa', wvù to nu waa Lamek.

³⁷Lamek to nu waa Metusela wvù waa Enok, wvù to nu waa Jaled wvù waa Ma'alalel, wvù to nu waa Kaynan.

³⁸Kaynan wvun to nu waa Enosh wvù waa Set wvù to nu waa Adam, e Adam nu wvù Nyo' to bomεε.

Luk 4

Ɛ dεwle no momte Jisos

(Mat 4:1-11; Mak 1:12-13)

¹ Jisos to nu ε ne fô Joo Joodan e, ε wvù ε yiηsen bô Keyoy ke Yuule. Ɛ kí ge ε wvù ne gen no cee ηkpwaante.

²Ɛ wvù no nu jó yî εdiuw mbaanye ε dεwle momte wvù. Wvù to nu jó nonen yaa diekene ke. Ɛ εdiuw yodvu ke fey, ε jeη no yuu wvù.

³Ɛ dεwle mum to gay ê wvù le, “É wo fen nu Waa Nyo', é wo gay ε te din tu bvulem.”

⁴ Ɛ Jisos tfuse ê wvù le, “Fí nu ε bó ε saη le, ‘Ke wee cee ke nje bvulem maη ke.”

⁵Ɛ dεwle jo wvù ben dvù bvudvuu bvumew e, duηce bitum bi yî ekole ke nshε le bicii ê wvù. Ɛ Jisos yen nen mwaηη.

⁶ Ɛ dεwle mum gay ê wvù le, “Bó nu ε nya wase ekole ke nshε le kin ê me kecii, ε è nulo é me nya ê naa yeε wvù me ηkooηke. Me nu nya é wo esaake, keηke bvukuke bô mvuηgay mvudvu mvunciim.

⁷Fí nu ke le wo egbwe ê me εjise ewvum me, é me emum enya fieε ficii ê wo.”

⁸ Ɛ Jisos tfuse ê wvù le, “Fí nu ε bó ε saη le, ‘È wvumtè Tata wvù Nyo' wo, elemtè ke ε è nu wvù le maη.”

⁹Ɛ dεwle mum jo wvù gen dvù ê kelaante kè Jelusalem e, leke fô kegoy ke yew ncese le, gay ê wvù le, “É wo fen nu Waa Nyo', é wo sele ekuse,

¹⁰ ηjefo fí nu ε bó ε saη le, ‘Nyo' nu ke egay é bonceendaa bew eεyεyε wo.’

¹¹Ɛ fí bvuu nu ε bó ε saη le, ‘Bó nu ke eka wo fo wo ekfun ekale yî te le.”

¹² Ɛ Jisos tfuse ê wvù le, “Nwa' Nyo' gayte ten le, ‘Fo wo emomtè Tata wvù Nyo' wo ke.”

¹³ Seke dεwle to meεεε wase jé yicii yì wvù to nulo emom Jisos jó, mum ne gen no ceYTE diuu dimew.

Ɛ Jisos keW lemme diew Galilee

(Mat 4:12-17; Mak 1:14-15)

14 Jisos to nu ε ne tu jim Galilee, ε wvú ε yiηsen bô mvuηgay mvu Keyoy ke Yuule le. Ε saaka wvu εκume wvú saanken gen biba bi woη e bì jó le bicii.

15 Wvú to nu ε no yeeyi bonyii yéw bunle le, ε bonyii bocii bensee wvú.

Ε bó ma Jisos ntew wvubo wvù Nasalet e

(Mat 13:53-58; Mak 6:1-6)

16 Ε Jisos ke mum ne gen ntew wvù Nasalet e jò wvú to kuε. Ε è ke no nu diuu dibole di mbam e, ε wvú gen yew bunle le ke no wvú to ké no gene. Ε wvú ke ne leem we keetaη Nwa' Nyo'.

17 Ε bó nya ηwa' wvù Yesaya wvù wee ntum Nyo' to saηεε ê wvú. Ε wvú fay taa bvudvuu bvumew bvù bó saηεε jó le,

18 “Keyoy ke Tata Nyo' le nu yî yeη e, ηjefo wvú nu ε yefe wase me le me ento enfewce saaka wvù jee ê bonyii bo kefufe le. Wvú nu ε tum me le me ento entefe ê bonyii bô nu yî ncaw e le bó nu ke ebvuse bó, embvuu entefe ê binfefe le bó nu ke eyene ejise εbo. Wvú tum ten me le me nto embvuse bonyii bô bó nyewle bô bó yî ncaw e,

19 embvuu enfewce le kelum kin, nu kè Tata Nyo' nu ke ebuw bonyii.”

20 No Jisos taη nen, kase kewe ηwa' wvudvu nya ê wee wvù to ké no gεεle mum shii fokuse. Ε bonyii bocii bô to nu yew bunle yidvu le luη ejise yî ye le.

21 Ε wvú mum kew no nyeyte ê bó le, “Fieε fin fi ben yuw ê Nwa' Nyo' le nu ε fí to wase ε kocen εben.”

22 Ε bonyii yeke ε fí joη bó le baay, ε bó keηke ηghaw yî njeme wvù jee wvù buyte diuw we le. Geenεn, kaa ne no ghayte, biite le, “Wvun nu ke waa Yosew nen e?”

23 Ε Jisos mum gay ê bó le, “Ke è nu kemaηen le ben nu ema ηgan ê me le, ‘Wee wvù fele bonyii, fele εκole kuw.’ Ben nu egay le me eηge ten mwεem fen mvù ben se yuuke le me ηgee Kafana'um.”

24 Ε Jisos bvuu gay ê bó le, “É me ensee ê ben kecεy le, ke è nulo é bó ewvum wee ntum Nyo' woη we le ke.

25 Yî kecεy e, é me nsee ê ben le è to nu kefew ke wee ntum Nyo' wvù Elayja le, jaη to nu ε mey we yî bilum e bitete bô kee soocan, ε jeη koo woη tfuu. Boke' bo boηkfu le to nu woη wvù Islael e kefew kedvu le nteen.

26 Geenεn, Nyo' to baa tum Elayja fô mvu bó le ke, tum fiew ε è nu fô kpwεε ηkfu wvù to nu Salafat, woη wvù Sidon e.

27 Ben ekumyì ten le, è to nu kefew ke wee ntum Nyo' wvù Elisha le, ε bonyii nu Islael nteen keηke ntun wvu baay, ke mvu bó le to nu ε bonen ke. È to mey ke Naaman wvú embeη wvu woη wvù Silia le wvù bó to feleε.”

28No Jisos jeme nonen, ε bonyii bocii bò to nu yew bunle le yuw, ε mvuntelem bente lo bó.

29Ε bó ja we, domtæn wvú, buy dvú εlaante jodvu, ben buy yí diuw ηκοη yì to nu yí kum ntæw wvubole, njefo bó to gomte keedomse wvú é wvú egbwe jó.

30Geenen, ε wvú fey ê bó enteleη no gene fiew.

Ε Jisos bvuse keyoy kè yiile yí wee le

(Mak 1:21-28)

31Ε Jisos ke mum ne bow Kafana'um, ntæw mvu wvu Galilee jodvu le. Ε è ke no nu diuu di mbam e, ε wvú gen no yæyi bonyii yew bunle le.

32 Ε bonyii bodvu bocii no yuuke keηke lo ηghaw yí n'yæyi we le, njefo n'yæyi we to keηke mvuηgay.

33Wee mvu to nu yew bunle yidvu le, ε keyoy kè yiile nu yí ye le. Ε wvú mum ne no wamte le,

34 “Abaay Jisos wvu Nasalet, wo fii la ê bese? Wo to keelæse lo bese le? Me ηkee naa wo. Ê nu wo wvudvu wvù yuule wvù ne fô Nyo' le.”

35Ε Jisos wam keyoy kè yiile kedvu, gay le, “Baη lo, ebuy yí wee wvun e.” Ε kí mum shiηen, bense wee wvudvu tum fokuse ê bonyii ejise, mum buy yí ye le, geenen faηe yaa lemse wvú ke.

36Ε bonyii taa, ε diuw yum bó. Ε bó no ghayte, biite le, “Wvun njeme nu wvù nee wvù wee wvun keηke? Wvú keηke mvuηgay kane biyoy bì yiile e ε bí buyte yí bonyii le.”

37Ε saaka wvu ekume Jisos len bontæw bocii bo ê keba ke jó le.

Ε Jisos fe bonyii nteen

(Mat 8:14-17; Mak 1:29-39)

38Ε Jisos buy yew bunle yidvu le, gen ley yew dvu Semon. Ε mwæse Semon cemte bô ken'ya'. Ε bó læke le Jisos efi wvú.

39Ε wvú gen fô wvú to jiime, leem ê wvú ê we, kan ken'ya' kedvu. Ε kí mum cine wvú le ε wvú bonen. Kaη mwaan, ε kpwoon wvudvu mum ja we taa fieε ε bó die.

40Ε diuu ke dioo seeyi, ε bonyii bò to keηke bonyii bò cemkene bô bincem jæy jæy mum no joo too dvú fô Jisos e. Ε wvú mum no kumte bó le bocii, ε bó bonene.

41 Bonceendaa bo dæwle le ten to buyte yí bonyii bomew e nteen wamte le, “Wo nu Waa Nyo'.” Geenen, ε Jisos kan le fo bó ejemyi ke, njefo bó to kee Jisos le è nu Mboyse wvù Nyo' to kawæe.

42Ε ekfuη ke buy yuu, ε Jisos buy gen bvudvuu bvumew e wvú embeη. Ε bonyii ke shee kew no gomte wvú. Ke dioo to yen wvú le, ε wvú gomte wase le wen ene ntæw wvudvu le. Ε bó mum no momte jé le wvú emey bô bó.

⁴³ Geenen, ε wvú tun gay le, “Me ηκηηκε keenfewce saaka wvù jee wvu ekume bvunfon bvú Nyo' le bontew bomew e ten, njefo è nu fiεε fi Nyo' tum me le me ento enge.”

⁴⁴ Ε wvú mum ne gen no ghane fewci saaka wvudvu yéw bunle le, woη wvudvu le tfuu.

Luk 5

Ε Jisos tee boom bew bo ηgoo le bo fwe

(Mat 4:18-22; Mak 1:16-20)

¹ È to nu diuu dimew, ε Jisos no leeme mbew Mamase yì Genesalet e, ε bonyii ε gem wvú ε face ε no yuuke diew Nyo'.

² Ε wvú ne yen bikoη e bifεε ηgem joo le, ε bonyii bò to keηηke ε buce wase jó ε no cuke binsaη bibole bi byé le.

³ Ε wvú gen ley ê kemew e, ε è nu ke Semon e, gay le wvú edomse é kí eley egen ê joo caan. Ε wvú domse, ε Jisos mum shii jó ε bonyii no nu ê ηkpwaante ε wvú yεεyi bó.

⁴ Ε wvú ke yεεyi mεse, mum gay ê Semon le, “Keyε kekoη eley egen ê joo fô shiiyine, é ben etfume binsaη binen ekoo byé.”

⁵ Ε Semon tfuse le, “Cee ekole, bese se ce lo we tfumyi binsaη bvú ε yuu, ε faηe yaa koo lo fiεε ke. Geenen, no è gay wo, me nu entfume ke lo.”

⁶ Ε bó gen tfume, koo byé jó nteen, dioo bvuuse, ε binsaη no gomte keesemken.

⁷ Nonen, ε bó lawce bonyii bobole bo ηgoo le ê kekoη kemew e le bó eto efice bó. Ε bó to bvuse byé yidvu ε yí yiηsen bikoη bibole, ε bí mum no gomte keeshiile ê joo.

⁸ Ε Semon Bitá yen fiεε fi kooy le, mum gen tum envuw ê Jisos εjise gay le, “Kee wo Tata, nεne fiuw fen ecine me le, me nu fiem wee wvù befe.”

⁹ Wvú to jeme nonen, njefo bò bonyii bew bo ηgoo le to nu ε yen byé yì bó to koolεε, ε ye bem bó.

¹⁰ Ε yí bem ten Jem bò Jon boom bo Sebεdee le bò to nu ten ηgoo Semon e. Ε Jisos gay ê Semon le, “Fo wo efanè ke. Ε kew yí keseen e ε gen lo, wo nu ke ekoole wase ε è nu bonyii.”

¹¹ No bó yuw nonen, mum bvuse bikoη bibole ê ηkpwaante, cine mwεem mvunciim e mum no bii Jisos e.

Ε Jisos fe wee ntun wvu baay

(Mat 8:1-4; Mak 1:40-45)

¹² Ε è ke no nu kefew kemew e, ε Jisos nu ê kelaante kemew e, ε wee mvu nu jó ε ntun wvu baay ε die wase lo wvú. Ε wee wvudvu yen Jisos e, to gbwe ê wvú εjise, leke wvú gay le, “Tata, wo nulo efe me é me en'yuule, é wo fen kooηke lo.”

13 Ɛ Jisos mum neke kebo kum wvú le gay le, “Me ηκοοηκε lo, bonen le eyuule.” Kaη mwaan, ɛ ntun wvu baay wvudvu mum cine wvú le.

14 Ɛ Jisos ciise lo ê wvú le, “È yenè fo wo esee ê wee. Geenen, gene eduηce ekole kuw ê cee ncese, emum enya nnya yì Muses to gayee le wee keηke keenya keeduηce ê bonyii le wen nu ɛ bonen wase yî ntun wvun e ɛ no yuule.”

15 No Jisos ciisee ê wee wvudvu nonen, ɛ saaka wvu ekume Jisos kaa bvuu saanken fey lo, ɛ bibombom bi bonyii le no baanci too keeyuuke n'yeeyi we, bô le wvú efelè bincem bibole.

16 Geenen, é Jisos ké ja cine bó le gen no bunlee ηkpwaante.

Ɛ Jisos fe wee ɛ wvú ɛ kpwe keba kemwaan

(Mat 9:1-8; Mak 2:1-12)

17 Ɛ è ke no nu diuu dimew ɛ Jisos yeeyi bonyii, ɛ mvuηgay mvu Nyo' le nu yî ye le, ɛ wvú fele bincem. Ɛ Bofalasi noo bonyii bô to duηci bonci bo Nyo' le ɛ shii fó, ɛ bó to buy bontew bocii bo Galilee le noo biba bi Judea bô Jelusalem e.

18 Ɛ fí kooy le bonyii bomew to nu ɛ ne no too ɛ bó ɛ shfume wee ê fikēey e, ɛ wvú ɛ kpwe wase keba kemwaan. Bó to too keeley dvú yew ejike fwe dvu Jisos.

19 Geenen, faηe yaa keηke je ke, ηjefo bonyii to faci baay. Ɛ bó mum ben ɛ è nu ê yew we, too keyey, shike wee wvudvu fwe dvu Jisos ê fiēe fí wvú to jiime jó le.

20 No Jisos to yenee le bonyii bodvu nu ɛ lese mvuntelem mvubole yî ye le, ɛ wvú mum gay ê wee we le, “Nsaa yem, me nu ɛ nleeshe wase bibefe biuw.”

21 Ɛ bonyii bô to duηci bonci bo Nyo' le bô bo ηgoo Bofalasi le ba, mum kew no wvukene gayte le, “Wvun se nu yee wvù joo bvudvuu bvú Nyo' le? È nu yee dvú wvù nulo elēeshe bibefe efey Nyo' maan?”

22 Ɛ Jisos kiee fiēe fí bó wvukene, bife ê bó le, “Ben se keηke kfuu ban boηkpawace ê mvuntelem mvunen e nen nje la?”

23 Fi cekey nu fí la, keegay le me nu ɛ nleeshe wase bibefe bi wee wvun e, nuu le wvú eja we elene le?

24 Geenen, me nu enduηce ê ben keseen le wee wvù diee nu Waawee keηke mvuηgay fokuse fen keelēeshe bibefe.” Ɛ wvú mum gay ê wee wvù to kpwee wase keba kemwaan we le, “È jemyi me ê wo, ja we, ejo fikēey fiuw egenè fô yew e.”

25 Kaη mwaan, ɛ wvú mum ja we leem ê bonyii ejise, mum jo fiēe fí wvú to jiime yî dvú le no gene fô yew e fo wvú, tumte moηkum mo Nyo' le.

26 Ɛ bonyii yen nonen, ɛ dew yum bó ɛ bó keηke ηghaw, no tumte moηkum mo Nyo' le gayte le, “Bese nu ɛ yen biηghaw bi mwēem e eben.”

Ɛ Jisos tee Lēwe

(Mat 9:9-13; Mak 2:13-17)

27 Ɛ Jisos ke ne buy fó no ghane. Ɛ wvú dīoo gene, yen wee mvu wvù to fii shile le Ɛ bó teje le Lewe, Ɛ wvú Ɛ shii fô bvudvuu bwew bvu lemme le. Ɛ Jisos gay ê wvú le, “È bì me le.”

28 Ɛ Lewe ne we, cine fieƐ ficii le mum no bii Jisos e.

29 Nonen, Ɛ Lewe ke mum ge nkaw wvu baay yew dvu wvú keekieekiee Jisos. Ɛ bonyii bò to fii shile ñeyte lo fó noo bonyii bomew Ɛ bô bó diekene.

30 Ɛ Bofalasii noo bonyii bobole bo ñgoo le bò to duñci bonci bo Nyo' le kew no wvukene, bife ê boom bo ñgoo le bo Jisos e le, “È nu nje la wvù ben diekene, wukene ben Ɛ bonyii bò fii shile noo bò befe bomew.”

31 Ɛ Jisos tfuse ê bó le, “Ke bonyii bò temyi ké no gomte wee efuwe ke. È ké no gomte bonyii bò cemkene.

32 Ke me nto keetee bonyii bò nu teytey ke. Me nto keentee Ɛ è nu bonyii bò befe le bó ekumen mvuntelem mvubole.”

Ɛ bó bife ê Jisos ekume mbam mwem mvudien

(Mat 9:14-17; Mak 2:18-22)

33 Ɛ bó ke ne ghay ê Jisos le, “Boom bo ñgoo le bo Jon e ké jaa no bamte mwem mvudien bvuu bunlee efonefon, Ɛ è nu ke no bo Bofalasii le ké no gee, geenen Ɛ buw nu ke fibole diekene lo wukene.”

34 Ɛ Jisos maw diew ê bó le, “È nulo é bó ebe bonyii bô bvujen é bó egen, é wee ebvuu ege é bó ebamte mwem mvudien Ɛ cee bvujen nu bô bó?

35 Geenen, kefew nu ke eto kè bó nu ke eloo cee bvujen wvudvu ê bó, é bó emum ekew embamte mwem mvudien kefew kedvu le.”

36 Ɛ wvú bvuu ma ñgan mvu ê bó le, “Ke wee nu dvú wvù nulo esaa ndvu yi fie etumce yi yvum dvú ke. É wvú ge nonen, tu wvú Ɛ befe wase bô ndvu yi fie yidvu. Ɛ ke è cim nulo é fincake fi fife fidvu egen lenlen bô ndvu yi yvum yidvu ke.

37 Ke è nulo ten é wee ejo mbvuum mo monfem, egee ê gham mbvuum e, Ɛ wvù Ɛ yvumen wase ke. É wvú ge nonen, é mbvuum mo monfem modvu ke ekoo, esawye gham wvu yvum wvudvu, é mbvuum bô gham ela ecici.

38 Fi len nu le, bó kenke keege mbvuum mo monfem ke Ɛ è nu ê gham wvu fwe le.

39 Ben kee ten le ke wee nu dvú wvù ké no wuu mbvuum m̀ nu Ɛ koo wase wvù nulo ebvuu ekoonke mo monfem ke. Wvú ké no bensee ke wase Ɛ è nu mo koo wa ma.”

Luk 6

Ɛ Jisos nele ekume diuu di mbam e

(Mat 12:1-8; Mak 2:23-28)

¹ È to nu diuu di mbam e dimew, ε Jisos bô boom bew bo ηgoo le no lene fele wεε egiη wvumew e. Ε boom bew bo ηgoo le nε kew no sumyi biceε diee.

² Ε Bofalasio yεn, bife λε, “È nu nje la wvù ben gee fiεε fi nci baa bee λε wee ege diuu di mbam e?”

³ Ε Jisos bife tεn ê bó λε, “Fí nu λε ben ke baa taη wase ê Nwa' Nyo' le no jeη to yuu Nfon Dawe bô ηgoo ye ε wvú ge?”

⁴ Wvú to nu ε ley yew Nyo' le jo blεed wvù bó to gee ncese dvú fô Nyo' le, die bvuu nya tεn ηgoo ye dvú, ε è to nu nci fo wee edie blεed wvudvu εfey bocee ncese.”

⁵ Ε Jisos mum mεse gay ê bó λε, “Wee wvù diee nu Waawee nu Cee Εkolε wvu mbam.”

Ε Jisos fε wee diuu di mbam e

⁶ Ε è ke bvuu no nu diuu di mbam e dimew, ε Jisos gen ley yew bunle mi le no yεeyi bonyii. Ε wee mvu nu dvú ε kebo kew ke εcεεy ε kpwe wase.

⁷ Ε bonyii bô to duηci bonci bo Nyo' le noo Bofalasio mum no gomte fiεε fi bó etey yí Jisos e. Ε bó mum bon εjise yí ye le no taale laa wvú nu efε wee diuu di mbam e λε.

⁸ Ε Jisos kieε fiεε fi bó fiεwsene bô fí, gay ê wee wvù kebo to nu ε kpwe wε λε, “Ja we, eto eleem fεn.” Ε wvú mum ja we leem.

⁹ Ε Jisos bife ê bó λε, “Me mbiite ε è nu ê ben, fiεε fi nci nu ε bee λε wee ege diuu di mbam e nu fi la? Keege fiεε fi jee, nuu fi befe λε? Keeboyse wee, nuu keeyu lo λε?”

¹⁰ Ε wvú taa bó εjise εjise kenεn, mum gay ê wee wε λε “Nεke kebo kuw.” Ε wvú neke, ε kí mum bonεn.

¹¹ Geenεn, ε fí kaa loocε ton'ye lo bonyii ba, ε bó mum kew no joo nsey no è nulo é bó ege bô Jisos.

Ε Jisos caw boom bew bo ntum e yuufe ncow bofεε

(Mat 10:1-4; Mak 3:13-19)

¹² Ε è no nu ke εdiuw yodvu le, ε Jisos nε ben yí kum e keegen bunle, ke ce bunlee Nyo' entaη jocii.

¹³ Ε ekfuη buy yuu, ε wvú tee bonyii bô to bii wvú le, ε bó to. Ε wvú cawcε bomew yuufe ncow bofεε tee bó λε boom bew bo ntum e.

¹⁴ Edieε ε bonyii bodvu to nu: Semon, wvù wvú to nyaε diee diew dimew λε Bita, bô Andulu wvù waa bwee Semon wvudvu. Ε bomew nu Jεm, Jon, Filew, Batolomu,

¹⁵ Matio, Toma noo Jεm wvù waa Alfiyus, Semon wvù to nu wee ηgoo Boselot,

¹⁶ Judas wvù waa Jεm noo Judas Iskaliot wvù to ghanεε gese Jisos.

Ε Jisos no yεeyi bvuu fele bonyii

(Mat 4:23-25)

17 No wvú cawεε bó nonen, ε bó bó bocii mum ne no booke. Ke bow, ε wvú leem yí bale le, ε bonyii bew bo ηgoo le to nu wase fó nteen noo kebombom ke bonyii le ε kí ta lo ye fó kè nen'yεε Judea bó Jelusalem. Bomew bonyii to nen'yi mondvuum mo mbew joo yi baay e ke diewe Taya bó Sidon e.

18 Bó to to keeyuw n'yεεyi wvu Jisos, é wvú ebvuu efe bincem bibole. Bonyii bò biyoy bì yiile to jewsee bó to too ten ε wvú bvuuuse biyoy bidvu.

19 Ε bonyii bocii mum no momte keekum wvú le, njefo mvuṅgay mvù to buyte yí ye le to fele bonyii bocii bò to kumte wvú le.

Bvujoṅke bó ηgew

(Mat 5:1-12)

20 Ε Jisos ke ne taa bonyii bew bo ηgoo le, gay le, “Njoṅ wvu baay nu wene, ben bò fuute, njefo bvunfon bvu Nyo' le nu fô ben e.

21 Njoṅ wvu baay nu wene, ben bò beele jeṅ keseen, njefo Nyo' nu ke ege é ben effuu. Njoṅ wvu baay nu wene, ben bò beele keseen, njefo ben nu ke ekpwaake dikie.

22 Njoṅ wvu baay nu wene, seke ben bii wee wvù diee nu Waawee le, ε bonyii bane ben, kuṅke ben, nan'yi ben bvuu nyaa ben εdiee yò befe.

23 Fí ke dīoo kooyi nonen, ε ben no laṅlaṅè, binè, yuukè njoṅ, njefo mmawcε wene wvù kuuke nu woṅ wvu we le. Ben ekeè le è nu ke no bo'icee cee bonyii boba to nyεwle bó bonyii bo ntum Nyo' le bo fwele.

24 Geenεn, ηgew wvu baay nu wene, ben bonyii bo bvukuke le, njefo kensamen kenεn ka ke wase ε è nu fεn.

25 Ngew wvu baay nu wene, ben bò εtew nu ε yiṅsεn keseen, njefo ben nu ke ebeele jeṅ. Ngew wvu baay nu wene, ben bò kieele keseen, njefo ben nu ke ebeele soo bikuu.

26 Ngew wvu baay nu wene, seke bonyii bocii bensee ben. Ben ekeè le è nu ke no bo'icee cee bonyii boba to bensee bonyii bo mbiay e bò to mbiayte le bó nu bonyii bo ntum Nyo' le.

Wee ekooṅkè wee we bvuban

(Mat 5:38-48)

27 Geenεn me ε no ηgayte ê ben ban bò yuuke fiεε fi me njemyi le, le ben ekooṅkè bonyii bonen bo bvuban e, egeè ε è nu mwεem mvù jee fô bonyii bò bone bikaa ê ben εjim e.

28 Ben elékè le Nyo' elaj ε è nu kembonεn yí bonyii bò bunlee le lon eto fô ben e, ebvuu ebunleè fô bonyii bò nvuwse ben e.

29 É wee suṅ wo yí kediew e, é wo banke kemew ε wvú mese suṅ. Wee é baa kekum kuw ke ekfuṅ, é wo cinε ε wvú jo ke ente fó.

30 É wee lɛke fiɛɛ ê wo, é wo nya. Wee é cim ε jo lo mwɛɛm mvuw, fo wo ebvuu eshe ebiite kɛ.

31 Naa la fi ben shieele lɛ bonyii egeè fô ben e, enù fí fi ben egeè ten fô bó le.

32 É ben kooŋke kɛ ε è nu bonyii bò kooŋke ben, é fiɛɛ fi bó ebensee ben yî dvú le enu la? Kɛ bonyii bò befe gee kɛ nonɛn e? Bó kooŋke kɛ ten ε è nu bonyii bò kooŋke bó.

33 É ben gee mwɛɛm mvù jee ε è nu kɛ fô bonyii bò gee ten fô ben e, é fiɛɛ fi bó ebensee ben yî dvú le enu la? Kɛ bonyii bò befe gee kɛ lɛŋlɛŋ e?

34 É ben foose bonyii bô mwɛɛm ε è nu kɛ ê bò ben taale lɛ bó nulo ekase etfuse, é fiɛɛ fi bó ebensee ben yî dvú le enu la? Kɛ bonyii bò befe ké no foose kɛ mwɛɛm ê nsáa yibo njefo bó kee lɛ bó nu ke ekase etfuse fiɛɛ ficii le?

35 Fí nu lɛŋ lɛ ben ekooŋkè bonyii bonɛn bo bvuban e, egeè ε è nu mwɛɛm mvù jee fô bó le, efoosè bonyii bô mwɛɛm yaa taale lɛ bó ke ekase etfuse kɛ. Nonɛn, é ben ke emum ekɛŋkɛ nlawma wvù kuuke ε è nu ê Nyo' wvù nu Ekole ke Mwɛɛm Mvunciim e, ebvuu enu boom bew, njefo è nu kɛ ten no Nyo' gee mwɛɛm mvù jee fô bonyii bocii bò yɛele ejise noo bò mvuntelem yiile le.

36 Ben ecamtè shen fô bonyii le kɛ lɛŋlɛŋ no Icee wene camte.

Fo wee elomtè gee di wee mvu le kɛ

(Mat 7:1-5)

37 Fo ben elomtè gee di bonyii bomew e, nonɛn Nyo' saa ke elom ten dinɛn kɛ. Fo ben ebonè bikaa ê bonyii ejim lɛ bó eley ŋgɛw e, nonɛn Nyo' saa ke ebon ten ê ben ejim kɛ. Ben elɛɛshì bibefe bi bonyii bomew e, é Nyo' ke elɛɛshɛ ten binɛn.

38 Ben enyaà nnya ê bonyii é Nyo' ke enya ten ê ben. Wvù nu ke edioo enyaa elooɔɔ efew ntay, eshiwɛ, ecince é fí eyiŋsɛn efuci fokuse. Fiɛɛ fi wee feeke fiɛɛ jó sɛ nyaa ê wee, è nu kɛ fí fi Nyo' nu ke efew jó sɛ nya ê mwɛɛn.”

39 E Jisos bvuu ma ŋgan mvu ê bó lɛ, “Kɛ kenfefe nulo eduŋci je ê kemew kɛ. É wvù mom lo, bó saa gbweken ê kentuke le bocii le?”

40 Ben ekee lɛ kɛ waa ŋwa' ké no fele wee wvù yɛɛyi wvù kɛ, geenɛn, ε è nu seke wvù ε yɛɛyi wase ε mɛsɛ, é wvù ekee kɛ diɛwɛ wee wvù yɛɛyi wvù le.

41 È nu nje la wvù wo ké no taale ε è nu sheshe yì nu ê waa bwoo jise, geenɛn yaa yɛne kekew kè nu ê diuw jise le kɛ?

42 È nulo é wo eghan nɛɛ sɛ no gayte ê waa bwoo lɛ, ‘Waa bwɛɛm, kɛ leem é me embvuse sheshe ê wo jise,’ geenɛn yaa yɛne kɛ kekew kè nu ê diuw jise le? Wo nu wee kenduŋɔɔ ye! Yawɛ ebvuse kekew kè nu ê diuw jise le sɛ looɔɔ eyɛn sheshe yì nu ê jise di waa bwoo le, emum ebvuse.”

Bó ké kiɛɛ kete yî mvuntam e

(Mat 7:16-20)

⁴³Ɛ Jisos bvuu gay le, “Ƙe è nulo é kete kè jee eyum mvuntam mvù befe ƙe. Ɛ ƙe è nulo ten é kete kè befe eyum mvuntam mvù jee ƙe.

⁴⁴Bó ké ƙiɛ kete ɛ è nu yî mvuntam mvù yumte yî dvú le. Ƙe è nulo é wee ekoy fimbi yî bisafe le ƙe, ɛ ƙe è nulo ten é wee ekoy woŋ yî ewante le ƙe.

⁴⁵Wee dioo nu wee wvù ƙeŋke ntfu mwɛem mvù jee ê fitele fiew e, ɛ wvú mum no bvuuɛ ɛ è nu mwɛem mvù jee. É dioo nu wee wvù we ntfu nu mwɛem mvù befe ê fitele fiew e, é wvú no bvuuɛ ƙe ɛ è nu mwɛem mvù befe. Fí nu nonɛn njefo fiɛ fi nu ɛ yiŋɛn fô fitele fi wee le nu ƙe fí fi ké no buyte diuw we le.”

Kenffuy kè jee bô kè befe

(Mat 7:24-27)

⁴⁶ Ɛ Jisos mum bife le, “È nu nje la wvù ben teŋe me le, ‘Tata, Tata’, yaa gee fiɛ fi me ŋgayte ƙe?”

⁴⁷Wee wvù too, eyuw n'yɛɛyi mum gen no gee no wvú gayte, nu ɛ me nu enduŋɛ ê ben keseen no wvuwe wee nu.

⁴⁸Wvú nu ƙe diewe wee wvù to nu keebom yew, yaw cim shii, gen kum kemaan e sɛ lese kenffuy, mum bom. Ɛ joo ke yiŋɛn, buy to kfun yew yidvu, ɛ yí faŋe yaa shiw ƙe, njefo wvú to nu ɛ looɛ bom ntay.

⁴⁹Geenɛn, wee wvù too, yuw n'yɛɛyi dioo gen faŋe yaa egee no wvú gayte, nu ƙe diewe wee wvù to nu keebom yew, taashe lo bvudvuu mum bom sɛ kenffuy. Ɛ joo ke buy to kfun yew yidvu, ƙaŋ mwaan ɛ yí shii nen wuuu, tawse lo.”

Luk 7

Ɛ cee ɛkolɛ bonyii bo nci le lese fitele yî Jisos e

(Mat 8:5-13)

¹ No Jisos to mɛsɛ wase yɛɛyi bonyii bô mwɛem mvun mvunciim, mum nɛ gen ê kelaante kè Kafana'um e.

²Ɛ ɛkolɛ ke ŋgoo mi bonyii bo nci le bo Lum nu jó ƙeŋke nƙwa we mvu, kooŋke wvú baay. Ɛ nƙwa wvudvu cɛmte nu wase diuw kpwe le.

³Ɛ ɛkolɛ kedvu dioo yuw ɛkumɛ Jisos, mum cooŋken bonyii bô saake woŋ Bojuu tum le bó egen eleke Jisos le wvú eto efe nƙwa wen.

⁴Ɛ bó mum gen yen Jisos e ku can ê wvú gay le, “Ƙee wo gene ƙe efi wee wese wvun, è nu wee wvù è nulo é wo efi wvú.

⁵Wvú kooŋke woŋ wesebeene baay, ɛ è nu wvú wvù to bomɛ yew yese bunle.”

⁶Ɛ Jisos mum nɛ ɛ bô bó no gene. Ɛ bó ke dioo feŋene wase yew cee ɛkolɛ ke bonyii bo nci le, ɛ wvú tum nsáa ye yimew le yí egen eci Jisos. Ɛ yí gen, ɛ bô bó tasɛn, ɛ yí tefe ê wvú le, “Tata, ɛkolɛ ke bonyii bo nci le gayte le fo wo eshe yenè ŋgew too ƙe. Le wen baa kocɛn wee wvù è nulo é wo eley ê wvú yew e ƙe.

⁷Ɛ è nu le fiε fi be ge ten le fo wen eto bô bikaa biwene eyen wo le. Geenεn, le wo ebvuse ke ε è nu diεw diuw wo le é nƿwa wen emum ebonεn.

⁸Le wen ten nu wee ê mvuŋgay mvu wee mvu le ekuse, ε bonyii bo nci le nu ten ê wen ekuse. É wen ké egay ê mvu le, ‘È genè,’ é wvú no gene lo, ké egay ê mvu le, ‘To,’ é wvú no too lo. É wen ké egay ten ê nƿwa wen le, ‘Geε nen,’ é wvú no gee lo.”

⁹Ɛ Jisos yuw ntum wvudvu nonεn, ε diuw yum lo wvú, ε wvú banke ye gay ê kebombom ke bonyii le kè to bii wvú le le, “É me ensee ê ben le me mbaa n'yεn wase wee le ke naa Israeε ε wvú ε lese kƿuu fin fitele yî yεm e nen ke.”

¹⁰Ɛ bonyii ba bô cee ekole ke bonyii bo nci le to tumεε dioo kase tu yew, yεn ε nƿwa wvudvu ε bonεn wase.

Ɛ Jisos yemmke cuwee yî kpwe le

¹¹Ɛjim jodvu, ε Jisos bô boom bew bo ηgoo le ne no gene ntεw mvu le ε bó teŋe le Nayin, ε kebombom ke bonyii le shƿumte ê wvú εjim.

¹²No bó to gene, dioo buy diuw ketaaη wvù to leyte ntεw wvudvu le, yεn ε bó ε tuu gvune di wee le ε no buyte dvú. Wee wvudvu to ka ke wvú can bwee le. Ɛ bwee to nu kpweε ηkƿu. Ɛ bó to buyte dvú nonεn, ε kebombom ke bonyii bo ntεw wvudvu le shƿumte bii bwee wan e.

¹³Ɛ Tata dioo yεn kpwoon wvudvu le, ε shen koo wvú, ε wvú gay ê wvú le, “Fo wo ebvuu bee ke.”

¹⁴No wvú gay nonεn, mum fey gen kum fikεy fi bó to tulεε gvune didvu jó. Ɛ bonyii bô to tulεε mum leem. Ɛ wvú gay le, “Cuwee, me njemyi ê wo, nenε we!”

¹⁵ Ɛ wvú mum ne we shii, kεw no jemyi. Ɛ Jisos jicε wvú le mum nya ê bwee.

¹⁶ Ɛ bonyii bocii yεn nonεn, ε diuw yum bó. Ɛ bó no tumte moηkum mo Nyo' le gayte le, “Wee ntum Nyo' wvu baay nu ε buynεn ê beene enteleη. Nyo' nu ε to wase keefi bonyii bew.”

¹⁷Ɛ saaka wvun wvu ekumε Jisos saanken gen woη wvù Judea le tfuu noo bitum bi mbew jó le.

Ɛ Jon Nleseejoo tum boom bew bo ηgoo le fô Jisos e

(Mat 11:2-19)

¹⁸Ɛ boom bo ηgoo le bo Jon e yuw ten mwεεm mvun mvunciim, gen see ê wvú. Ɛ wvú tee bomew bofεε,

¹⁹tum fô Jisos e le bó egen ebife ê wvú le laa è nu wvú wvù to nu keeke eto, nuu bó ecεytè wee mvu le.

²⁰Ɛ bó gen yεn Jisos e, gay ê wvú le, “Jon Nleseejoo nu ε tum bese keebife ê wo le laa è nu wo wvù to nu keeke eto, nuu bó ecεytè wee mvu le?”

21 Bó to biite nonen, ε Jisos nu sekedvu fele bincem bô bontun, bvuu bvuuuse biyoy bì befe yî bonyii le, yen'yi ejise ε binfefe nteen.

22 Ε Jisos tfuse ê bó le, “Ben ekase egen esee ê Jon mwεem mvù ben yen noo mvù ben yuw e. Binfefe yene wase mwεem e, ε bontεηε lene teytey, ε bonyii bô cemkene bô ntun wvu baay bonene. Bincife yuuke wase mwεem, ε bonyii bô kpweken kaase tuu dvú, ε bó bvuu fewci ten saaka wvù jee wvù wvu Nyo' ê bonyii bo kefufe le.

23 Njoη wvu baay nu wvu wee wvù baa maηene me ke.”

24 Ε bonyii bô Jon to tumεε ba ke ne, ε Jisos mum kaw no jemyi ê kebombom ke bonyii le ekume Jon biite le, “Ben se shee buyte gene ηkpwaante keegen eyen ε è nu la le? Gayi dì fwefwe fele shiike?

25 No è baa nu nonen, tu ben se buyte gene yene ε è nu la le? Wee ε wvú ε sufe ye bô ndvú yì bonene? Ben eyeke eyuw, bonyii bô suute ye bô ndvú yì lumte bvuu diee bikuu bibole ké no nu ε è nu ê bontow e.

26 Ben ε se ε no gene nonen keeyen ε è nu la le? Wee ntum Nyo' nuu? 'Eε, tu ben se nu ε yen. É me ensee ê ben le, wvú fele wee ntum Nyo'.

27 È nu wvú wvù bó saηεε ekume wvú ε Nyo' gayte le, ‘Yeke eyuw, me nu ηke enciinse wee wem ntum é wvú esa fwe dvu wo, wvù nu egen eseyse je yo é wo se no too.’

28 É me ensee ê ben le, ente jo bonyii bô nu ε no nu wase yî ekole ke nshε le ε to ε buy keseen e, nu ε ke wee nu dvú wvù kuuke fele Jon ke. Geenen, ε wee wvù nu naa wee wvu caan ente jo bvunfon bvυ Nyo' le nu ε wvú kuuke fele wvú.”

29 Ε bonyii bocii naa noo bonyii bô to fii shile yuw no Jisos jemyi le Jon to nu wee ntum Nyo' bense le bvunfon bvυ Nyo' le nu bvυ teytey, njefo bó ten to nu ε bee ε Jon lese bó ê joo.

30 Geenen, ε Bofalasii noo bonyii bô to looci kee bonci bo Nyo' le tun fibole ntaη wvù Nyo' to too dvú njefo bó to nu ε faη fo Jon lese bó ten ê joo.

31 Ε Jisos ne ghay le, “Fieε fi è nulo é me nfewsen εηgoke ke bonyii bo keseen e dvú nu la? Bó nu ke diewe la?

32 Me nu nsee ê ben fieε fi bó nu diewe fí. Bó nu ke diewe boom bo caan caan bô nu ε shiiyen mondvuum mo way e, ε bomew teηe bomew biite le, ‘Bese toηke ndoη se ben bine lo le? Nyaa ηkiee kpwe se ben beηe lo le?’

33 È nu ke no Jon Nleseεjoo se toε, shee jeη yaa wuu ke ten mbvuum, ben le wvú keηke nceendaa dewle yî ye le.

34 Wee wvù diee nu Waawee ε dioo to, diekene bvuu wukene, ben le bó etaa eyen, wvú ghane wuwte mwεem mvudien wuwte mbvuum, bvuu nu nsaa bonyii bô fii shile noo bonyii bô befe bomew.

35 Geenen, bonyii bocii bò bense bvufee bvù è nu bvù Nyo' le duŋci le è nu bvù leŋ."

Ɛ Jisos læshɛ bibefɛ bi kpwoon nsake le yew dvu wee Falasii

36 Ɛ wee Falasii mvu ke nɛ tee Jisos le wvù eto ediekɛn ê wen yew. Ɛ Jisos bee gen ɛ bó no diekene.

37 Ɛ kpwoon nsake mvu to nu ntɛw wvudvu le. Ɛ wvù yuw le Jisos diekene ê wee Falasii wvudvu yew, mum jo fikaa fi nfiey mvu wvù shfuunɛne le, gen dvù fó.

38 Ɛ wvù gen ley leem mbew Jisos e, nɛ kɛw no beele, ɛ misɛm cemceme yí bikaa bi Jisos e. Ɛ wvù mum ŋgvuwɛ, ŋgvuse ekole kew no shole bikaa bi Jisos e bò yvuw ekole, ŋoci mum yeefe bò nfiey wɛ.

39 Ɛ wee Falasii wɛ wvù to teŋɛ Jisos le wvù eto ediekɛn yɛn nonɛn, kpawɛ fô fitele fiew e le, "É wee wvun fɛn be nu wee ntum Nyo', tu wvù be ɛ kieɛ fieɛ fi è nu kpwoon wvun wvù kumte wvù le, le è nu kpwoon nsake."

40 Ɛ Jisos nɛ gay ê wee Falasii wvudvu le, "Semon, me ŋkɛŋke fieɛ keenjeme ê wo." Ɛ wvù tfuse le, "Wee n'yɛɛyi, jeme."

41 Ɛ Jisos mum kɛw le, "Wee mvu to nu ɛ foose bonyii bofɛe bò bigew, foose wee mvu bò bodanali gee tin, foose mvu bodanali mbaanshen.

42 Ɛ fí ke ghaw bó bocii keekase elaw, ɛ wvù mum cinɛ bigew bidvu le ê bó. Keseen, wo yene le ente jo bonyii bo bofɛe ban, wee wvù nulo ekooŋke wvù baay nu wvù la?"

43 Ɛ Semon tfuse le, "È nulo enu wee wvù bó to cin'yɛɛ fioo ye le ɛ yí duule." Ɛ Jisos bee le, "Wo nu ɛ jeme leŋ."

44 No wvù beŋe nonɛn, baŋke ye taa kpwoon wɛ, mum gay ê Semon le, "Wo nu ɛ yɛn kpwoon wvun e? No me mbe nto ê wo yew, wo be baa cim nya me joo ncuke bikaa kɛ. Geenen, kpwoon wvun nu ɛ cuke wase bikaa biem ɛ è nu bò misɛm, ɛ sho bò yvuw ye ekole.

45 Wo be baa gay me le ŋocɛ kɛ. Geenen, ɛ kɛw no me mbe nto fɛn, nu kɛ no kpwoon wvun ŋoci bikaa biem.

46 Ɛ wo be baa cim yefe ekole kem kɛ naa bò mɛɛm kɛ. Geenen, kpwoon wvun nu ɛ yefe wase bikaa biem ɛ è nu bò nfiey wvù shfuunɛne.

47 Nonɛn, é me ensee ê wo le, kpwoon wvun nu ɛ duŋcɛ keŋkoŋɛn ke baay njefo bó nu ɛ læshɛ wase bibefɛ biew bì duule baay. Geenen, ɛ wee wvù bó læshi bibefɛ biew ɛ bí nu caan duŋci keŋkoŋɛn ke caan."

48 Ɛ Jisos mum gay ê kpwoon wɛ le, "Bó nu ɛ læshɛ wase bibefɛ biuw."

49 Ɛ bonyii bò bò bó to diekene mum kɛw no diomene gayte le, "È sɛ nu yɛɛ wvun wvù mum læshi lo bibefɛ bi bonyii le?"

⁵⁰ E Jisos mum mese gay ê kpwoon wvudvu le, “È genè fiuw ntay, fitele fi wo lese yî yem e nu e ge wase wo e boy.”

Luk 8

Bokene bò to ghane bô bo Jisos fici wvú

¹Ejim jodvu, e Jisos ne no ghane ê bilaante bô ê bontew e fewci saaka wvú jee wvu ekume bvunfon bvú Nyo' le. Boom bew bo ngoo le bo yuufe ncow bofêe to bii wvú le,

²noo bokene bomew bò wvú to felee bontun bobole bô bomew bò wvú to bvusee biyoy bi befe yî bó le. Bokene ban to nu Maalia wvú bó to teje ten le Magdalen, wvú wvú to bvusee bonceendaa bo dæwle le yî ye le bosooshiwi.

³E è nu Joana wvú dweese to nu Cusa lemte 'Elod e, noo Susana bô bokene bomew nteen. Bó to ghane nonen, bvusee mwæem ê bikele bibole, fici Jisos bô boom bew bo ngoo le dvú.

Ngan ekume wee wvú to tfumyi ngow

(Mat 13:1-9; Mak 4:1-9)

⁴E bonyii ke ne bontew e bontew e no too fô Jisos e. E kebombom ke bonyii le ke yiŋsen fó, e wvú ma ngan ê bó le,

⁵“Wee to nu e laa keegen etfume ngow. E wvú ke dioo etfumyi, e yimi gbweken ê je, e bonyii lænce bô bikaa, e mvunyiim mvù bile we to tace die.

⁶E yimi gbwe fô bvudvuu bvú eta le, ke buy mum yowlæn njefo bvudvuu bvudvu to nu bvuyeem.

⁷E yimi ngow gbweken ê bisafe le, ke buy dioo kuu bô bisafe bidvu, e bí mum ban ngow yidvu fo yí eku.

⁸E yimi gbweken e è nu yî nshe yì jee le, ke buy, ku, e bó ke gbwele e yí buy bokaŋ gbwee fey no bó to tfumyee.” No Jisos ma nen, mum fuŋ le, “Wee wvú keŋke bitem, e wvú yuw.”

Shiee wvú Jisos jemyi ê bonŋan e

(Mat 13:10-17; Mak 4:10-12)

⁹E boom bew bo ngoo le ke ne bife ê wvú le laa ngan wvudvu duŋci le la le?

¹⁰E wvú tfuse le, “È nu ben ban bò Nyo' nu e ge wase le è nulo é ben ekiee mwæem mvu bvunfon bwew e mvù nu ê nnyile le. Geenæn, e bonyii bomew yuuke fibole ke le me maa e è nu bonŋan, wvu le fí enù no fí to nu wase le, ‘Bó nu ke etaale ke lo mwæem yaa yene ke, ke eyeke ke lo yaa yuuke fiee ke.’

Fiee fi ngan ekume wee wvú to tfumyi ngow duŋci

(Mat 13:18-23; Mak 4:13-20)

¹¹Ben eyuw le fiee fi ngan wvudvu duŋci. Ngow yidvu nu diew Nyo'.

12Ngow yì gbwee ê je, nu bonyii bò yuuke diew Nyo' ε dẽwle mum to bvuse saaka wvudvu fô mvuntelem mvubole, wvu le fo bó ebee ke eboy.

13ε ngow yì gbwee fô bvudvuu bvu eta le nu bonyii bò yuuke diew Nyo', mum fiisen bô njoŋ, geenen ε yí baa cime geŋ fô mvuntelem mvubole ke, ε bó beje ke fomvu fomvu. Ê mmom ke dioo ε to, ε bó mum tfuw bikaa.

14Ngow yì gbwee ê bisafe le nu bonyii bò yuuke diew Nyo', dioo gene, ε ken'yaŋyaŋ bô bvukuke noo njoŋ mwẽem mvu yí nshe le to yike diew yidvu ε yí laaye lo saa ku ke.

15Ngow yì gbwee yí nshe yì jee le, ε mum ε no nu bonyii bò keŋke mvuntelem mvù jee, bò yuuke diew Nyo', looce lese mvuntelem yí dvú le, mum kuu shém, no gee no yí gomte gene lo fwe fwe.

Ken'yeese kè bó ε kfuke bô ŋkaa

(Mak 4:21-25)

16Ke wee ké tfuuke ken'yeese bvuu jo ŋkaa kfuke dvú ke. Ε ke è nulo é wvú elese ten egaaku ke. Wvú ké tfuuke, tome ε è nu yí fiε fi bó tomyi ken'yeese yí dvú le, le bonyii dioo leyte yew eyene n'yuu le.

17Fiε ficii fi nu ê nnyile le nu ke eyene, é mwẽem mvu ejim ejim ebuy emwa.

18Nonen, ben dioo yeke diew Nyo' no yeke ntay, ekeè le wee wvù keŋke fiε nu ε bó nu ke ebise. Ε wee wvù yaa keŋke ke fiε nu ε naa fi caan fi wvú kpwaake le wen keŋke lo nu ε bó nu ke efi lo ê wvú.”

Bonyii bò nu kfuu di Jisos e

(Mat 12:46-50; Mak 3:31-35)

19No Jisos to yeeyi bonyii nonen, ε bwee Jisos bô boom bo bwee Jisos e ne to le bó eyen wvú le. Ε fí ghaw keeley njefo bonyii to duule dvú baay.

20ε wee gay ê wvú le “Bwoo bô boom bo bwoo le leeme ekfuŋ gomte keeyen wo le.”

21ε wvú tfuse fiew le, “Bwẽem bô boom bo bwẽem e nu bonyii bò yuuke diew Nyo' gee no yí gomte.”

Jisos keŋke mvuŋgay ê we jo nffum bô joo

(Mat 8:23-27; Mak 4:35-41)

22ε è ke no nu diuu dimew, ε Jisos gay ê boom bew bo ŋgoo le le, “Beene elente mamase egen kewvu keki.” Ε bó mum ley ê kekoŋ e no leenci.

23No bó to leenci, ε Jisos ne no leete. Ε nffum ne sese, shii no bvuyte joo bô mvuŋgay ε yí leyte ê kekoŋ e gomte keeyiŋsen, ε bó nu wa lo diuw kpwe le.

24ε bó gen no kamsee Jisos gayte le, “Cee ekole, Cee ekole, beene nu ekpweken.” Ε Jisos kamse wam nffum bô joo yì to bvuyte yidvu. Ε nffum wvudvu lu, ε joo mum cife nen ndvumm.

25 Ɛ wvú bife ê bó le, “Ben se lese fitele ɛ è nu yí yee le?” Ɛ ye bem bó, ɛ bó keŋke nfan no ghayte le, “Wvun wee se nu wee wvù nee wvù wamte naa nffum bô joo ɛ mvú yuuke wvú le?”

Jisos keŋke mvungay ê we jo bonceendaa bo dɛwle le

(Mat 8:28-34; Mak 5:1-20)

26 Ɛ bó lente mamase yidvu buy wvuke ê keba ke Gelasan e, ɛ bó ɛ cine wase keba ke woŋ e kè Galilee le.

27 Ɛ Jisos dīoo buyte ê kekoŋ e, ke le wen efɛese eŋkpwaante, ɛ bô wee mvu wvu ê kelaante ke jó le tasen ɛ bonceendaa bo dɛwle le njiŋsene bô wvú. Ɛ bó ɛ ce wase yí ye le baay ɛ wvú ghane kenyi kencimte, cee ɛ è nu ê ditfum e jò bó to dweyte bonyii. Ke wvú to bvuu cee fô yew e ke.

28 No wvú yenee Jisos e, mum san etale, gen gbwe ê wvú ejise, wam bô mvungay le, “Jisos, Waa Nyo', Nyo' wvù nu Ekole ke Mwɛem Mvunciim e, wo fii la ê me? Kee wo fo wo enya ŋgew ê me ke.”

29 Wvú to jemyi nonen njefo Jisos to nu ɛ wam wase keyoy kè yiile kedvu le kí ebuy yí wee wvudvu le. Kí to ké no cuute wvú bokaŋ e bokaŋ e ɛ bó koole lo, ké koo kay can noo bikaa bô ncaw se no ceyte. É bó ké ekay nonen, ɛ wvú sumye ke lo, ɛ keyoy kedvu mum cufe wvú ɛ wvú no lewte gene ŋkpwaante.

30 Ɛ Jisos mum bife ê wee wvudvu le, “Diee diuw nu yee?” Ɛ wvú tfuse le, “Diee diem nu kebombom.” Wvú to tfuse nonen njefo bonceendaa bo dɛwle le to nu ɛ cin lo yí ye le.

31 Ɛ bonceendaa bodvu leke Jisos le fo wvú eciinse bowen ɛ è nu ê kentuke kè shiile nen ŋooŋŋ e ke.

32 È to nu ɛ ŋgoo boŋkunyam diekene yí mbeke le fó, ɛ bonceendaa bo dɛwle le bodvu mum leke Jisos le wvú ecine é bowen egen eley ɛ è nu yí boŋkunyam bodvu le. Ɛ wvú bee.

33 Ɛ bó mum buy yí wee wvudvu le, danŋen gen ley yí boŋkunyam bodvu le. Ɛ bó sen, bow ê ŋkoŋ e, shii ê mamase yidvu le, le jó.

34 Ɛ bonyii bô to ceyte boŋkunyam bodvu yen fiee fi kooy le, ja fó, fɛe lo, gen see saaka wvudvu elaanthe bô ê bontew bo jó le.

35 Ɛ bonyii no yuuke, buci gene keeyen ten fiee fi kooy le. Ɛ bó to fô Jisos to nu, yen wee we le, ɛ bonceendaa bo dɛwle le ba ɛ cine wase wvú le, ɛ wvú ɛ shii mbew Jisos e, ɛ jise ndvú, ɛ bvufee bwew ɛ kase wase ɛ tu fó. Ɛ bó fan baay.

36 Ɛ bonyii bô to yenee fiee fi to kooyee le no seŋe ê bó no fí to ghanee é wee we wvù to keŋke bonceendaa bo dɛwle le se bonen.

37 Ɛ bonyii bocii bo ê biba bî Gelasan e keŋke nfan, mum leke Jisos le wvú ene egene. Ɛ Jisos mum ne fiew, ley ê kekoŋ e le wen egene,

38 ɛ wee wɛ wvù bonceendaa bo dɛwle le to buyɛɛ yî ye le mum no lɛke Jisos lɛ bô wvù egene. Ɛ Jisos tun, tfuse wvù jim gay lɛ,

39 “È genè ɛ è nu fô yew e, egen esee kenɣhaw ke fiɛɛ le kè Nyo' nu ɛ ge fô wo le.” Nonɛn, ɛ wee wvudvu mum tu jim gen no ghane ê kelaante kedvu le kecii, seɣe kenɣhaw ke fiɛɛ le kè Jisos ge fô wvù le.

Jisos kenke mvunɣay ɛwe jo bincɛm bô kpwe

(Mat 9:18-26; Mak 5:21-43)

40 Ɛ Jisos lente mamase kase tu jim keba keki. Ɛ kebombom ke bonyii le kè be she ɛɛyte wase wvù fó fiisen wvù.

41 Ɛ cee la mvu to fó ɛ bó teɣe lɛ Jaylus, ɛ è nu cee ɛkolɛ yew bunle yi jó. No wvù to, fey gen tum envuw ê Jisos ejise, kuu can lɛ wvù eto ke lɛ ê wen yew,

42 lɛ waa wen kpwee lo. Wvù to kenke wan ɛ è ka ke wvù, ɛ è nu wan kpwoon ɛ wvù nu bilum yuufe ncow bifɛɛ. Ɛ bô Jisos nɛ no gene ɛ kebombom ke bonyii le faci Jisos.

43 Ɛ kpwoon mvu nu ɛnte jodvu ɛ wvù ɛ cɛm wase bô kencɛm ke bokɛnɛ le bilum yuufe ncow bifɛɛ. Ɛ wvù ɛ jewse wase fiɛɛ ficii fi wvù to kenke can bonyii bo bifuu le, kí ɛ ghaw bó keefɛ.

44 Ɛ wvù bence to ejim jo Jisos, kum nɣem ndvu Jisos e. Kaɣ mwaan ɛ kencɛm kew mum semɛ.

45 Ɛ Jisos bife lɛ, “È kum yɛɛ me le?” Ɛ bonyii bocii maɣen lo. Ɛ Bita nɛ bife lɛ, “Cee ɛkolɛ, ke wo yene lɛ kebombom ke bonyii le faci wo le?”

46 Ɛ Jisos no duu ke lɛ, “Wee nu ɛ kum me le. Me nu ɛ n'yuw no mvunɣay nu ɛ buy yî yɛm e.”

47 Ɛ kpwoon wɛ yɛn lɛ ke je nu dvù yi è nulo é wen enyiim ke, mum ciɣciɣ gen gbwe ê Jisos ejise mum see ê bonyii bocii yuw fiɛɛ fi be ge wvù ɛ sɛ kum Jisos e, bvuu see no wvù be kum nonɛn kencɛm kew ɛ semɛ lo kaɣ mwaan.

48 Ɛ Jisos gay ê wvù lɛ, “Waa wɛm, fitele fiuw fi wo lese yî yɛm e nu ɛ ge wase wo ɛ bonɛn. È genè ntay.”

49 Ke no Jisos to bæɛ jemyi ê kpwoon wvudvu nonɛn, ɛ wee mvu fɛse fó nɛn'yi fô yew e fo Jaylus wvù cee ɛkolɛ yew bunle wɛ, gay ê wvù lɛ, “Waa wo nu ɛ mese wase. Fo wo ebvuu eshe enyaa nɣɛw ê wee n'yɛɛyi ke.”

50 Ɛ wvù dioo jeme nonɛn, ɛ Jisos yuw, gay ê Jaylus lɛ, “Fo wo efanè ke, lese ke ɛ è nu fitele yî yɛm e maan, é waa wo eluɣ.”

51 Ɛ bó mum nɛ no gene fô yew e fo Jaylus, ke gen fɛse fó, ɛ Jisos tun fo wee eley yew. Ɛ wvù jo ke ɛ è nu Bita bô Jɛm noo Jon noo cee wan bô bwee wan ɛ bô bó ley.

52 È to nu ε bonyii toḡene, ε kpwe ghamte lo fó. Ε Jisos gay λε, “Ben elu bô kpwe, wan baa kpwe κε, wvú leete lo.”

53 Ε bonyii nε no kieele lo wvú fó, njefo bó to kee ntaγ λε wan wvudvu nu ε kpwe wase.

54 Ε wvú gen fô wan wvudvu to jiime, jice yí kebo le tee λε, “Wan kpwoon, ja we!”

55 Ε wvú mum kase tu dvú, ja we kaḡ mwaan. Ε Jisos gay λε bó etaa fiεε é wvú edie.

56 Ε bwee bô ice yen fiεε fi kooy le, ε dew yum bó. Ε Jisos lew lo λε fo bó esee ê wee fiεε fi kooy κε.

Luk 9

Ε Jisos tum boom bew bo ηḡoo le bo yuufe ncow bofεε

(Mat 10:1-15; Mak 6:7-13)

1 Ε Jisos ke nε tee boom bew bo ηḡoo le bo yuufe ncow bofεε, ε bó baance to. Ε wvú nya mvuḡay ê bó mvù bó ebvuuse bonceendaa bo dεwle le yí bonyii le bvuu fele bincem dvú,

2 mum tum bó λε bó egen efewcì ê bonyii ekume bvunfon bvú Nyo' le bvuu fele bonyii bo bincem e.

3 Ε wvú bvuu gay ê bó λε, “Ben dioo gene, fo wee ejo fiεε κε. Fo wee ejo kemaḡ, kenεε ekele, kenεε fiεε fidien, kenεε bigew κε. Fo wee ejo bikum bifεε κε.

4 Ben dioo gen ε ley ntεw e, yew yì bó ε gεε ben dvú, ε ben no ceè κε ε è nu dvú gen buy seke ben ke nεnε ntεw wvudvu le.

5 É ntεw mvu tun keefiisen ben, é ben nεnε jó, dioo nen'yi kuce kebvu ke yí bikaa binen e, é ke enu nciise fiεε fi bó mom e.”

6 Ε bó mum nε no gene, gen no ghane bontεw e bontεw e, fewci saaka wvù jee wvu ekume bvunfon bvú Nyo' le, bvuu fele bonyii bo bincem e bocii.

Ε saaka wvu ekume Jisos ffumse 'Elod

(Mat 14:1-12; Mak 6:14-29)

7 Ε 'Elod wvù to saake keba ke woḡ e kè Galilee yuw mwεem mvunciim mvù to kooyi, ε mvú ffumse wvú njefo bonyii bomew to nen'yi duu λε Jisos wvun nu Jon Nleseejoo ε wvú ε kase ε buy.

8 Ε bomew duu λε è nu Elayja ε wvú kase ε to. Ε bomew duu fibole λε è nu wee ntum Nyo' wvu fwele mvu ε wvú ε kase ε buy yí kpwe le.

9 Ε 'Elod mum ghay λε, “Jon nu ε me se nu ε mbvuse wase ekole kew. Wvun wee ε bvuu ε no nu yeε keseen wvù me n'yuuke kfuu mvun mwεem ekume wvú?” Ε wvú mum no gomte le wen bee keeyen Jisos wvudvu le.

Ε Jisos nyaḡe bonyii bontfuke botin

(Mat 14:13-21; Mak 6:30-44; Jon 6:1-14)

10 Ɛ boom bo ntum e bo Jisos e ke ghan kase tu jim, see mwɛɛm mvunciim mvù bó gɛɛ ê wvù. Ɛ wvù mum nɛ jo bó ɛ bô bó lɛwse ye, buy gen je ê kelaante kè Bɛsayda le.

11 Ɛ Geenɛn, ɛ bonyii kɛɛ kɛ lo kuɛn bi wvù le, ɛ wvù fiɛn bó mum kɛw no fewci ɛkumɛ bvunfon bvù Nyo' le bvuu fele bonyii bo bincɛm e.

12 Ɛ diuu ke dɔo gen lɛ dí eɛeyi, ɛ boom bo Jisos e bo ɲoo le bo yuufe ncow bofɛɛ bence to gay ê wvù lɛ, “Gayɛ ê bonyii ban lɛ bó eɛn bontɛw bô ɛla yo nceencee le, egom mwɛɛm mvubole mvudien bô fò bó nu ece, njefo fɛn nu ɲkpwaante.”

13 Ɛ Jisos tfuse fiɛw lɛ, “È nu enya ben fiɛɛ é bó edie.” Ɛ bó gay lɛ, “Fiɛɛ fi bese kɛɲke mɛy kɛ bontuw bo blɛɛd e botin bô byé yifiɛɛ. Wo gomte lɛ bese eɛn eguy mwɛɛm mvudien to enya ê bonyii ban bocii le?”

14 Ɛ Bó to gayte nonɛn njefo bonyii to nu fò nteen, ɛ bolemɛɛ maanɲ nu bontfuke botin. Ɛ Jisos mum gay ê boom bew bo ɲoo le lɛ, “Ben egay é bonyii eshiyen fokuse mondvuum e mondvuum e, mbaanshen mbaanshen.”

15 Ɛ bó gay, ɛ bó shiiyen.

16 Ɛ Jisos jo bontuw bo blɛɛd e bo botin ba bô byé yi yifiɛɛ ye, taa we, nya keyoone ê Nyo', mum guushɛ nya ê boom bew bo ɲoo le lɛ bó egawɛɛ ê bonyii bodvu.

17 Ɛ bó gawɛɛ, ɛ bonyii bocii die ffuu, ɛ boom bo Jisos e bo ɲoo le baance bimbɛke bi shɛɛtɛɛ, ɛ bí yiɲɛn ɲkáa yuufe ncow fiɛɛ.

Ɛ Bitá cɛɛ lɛ Jisos nu Mboyse wvù Nyo' to kawɛɛ

(Mat 16:13-20; Mak 8:27-30)

18 Ɛ è ke no nu diuu dimew, ɛ Jisos no bunlee wvù embeɲ, ɛ boom bew bo ɲoo le nu mbew ye le. Ɛ wvù nɛ bife ê bó lɛ, “Bonyii duu lɛ me nu yeɛ?”

19 Ɛ bó tfuse lɛ, “Bonyii bomew duu lɛ wo nu Jon Nlɛɛɛjoo, bomew lɛ Ɛlayja, ɛ bomew duu lɛ wo nu wee ntum Nyo' wvu fwele mvu ɛ wvù ɛ kase ɛ buy yí kpwe le.”

20 Ɛ wvù mum bife ê bó lɛ, “Ben duu finɛn lɛ me nu yeɛ?” Ɛ Bitá tfuse lɛ, “Wo nu Mboyse wvù Nyo' to kawɛɛ.”

21 Ɛ Jisos mum loocɛ ciise lo ê bó lɛ fo bó ke emom lo eɛɛ finɛn ê wee kɛ.

Ɛ Jisos jeme ɛkumɛ bonɲɛw bew noo kpwe ye

(Mat 16:21-23; Mak 8:31-33)

22 Ɛ wvù mum no jemyi ê bó lɛ, “Wee wvù dieɛ nu Waawee kɛɲke keeke eyɛn bonɲɛw nteen, é bonyii bô saake woɲ bô bocee ncese bo baay baay noo bonyii bô duɲci bonci bo Nyo' le ema lo wvù. Bó nu ke emom eyu wvù, é ɛdiuw ke ebuy ɛta, é Nyo' ekase ebvuse wvù yí kpwe le.”

Kentam ke wee wvù bii Jisos e

(Mat 16:24-28; Mak 8:34-38)

23 E Jisos mum no jemyi wase ε è nu ê bonyii bocii le, “É wee gomte keenu wee wem, tu wvú kenke keetun ekole kew, etuulè kentam kew ediuw ecii bii me le.

24 Ben ekeè le wee wvù bawci nshii we fo wvú elase, nu ke elase ke lo. Geenèn, wee wvù lase nshii we nje me, nu ε wvú ε bawce lo nshii wvudvu.

25 É bó baanci naa woŋ wvun tfuu ε nya ê wee, wvú ε die, ε ke ε lase kenεε ε jim nshii we, é sew wvudvu enu la?

26 Ben ekeè le é wee wuumene keebii me le noo diew yem e, é wvú no kee le wee wvù diee nu Waawee nu ke ewuumen ten mweten seke wvú ε kase ε to ente jo bvukuke bwew bvuu nu ten bvú Nyo' Ice bô bonceendaa bew bò yuule le.

27 É me ensee ê ben keceey le, bonyii bomew leeme fen ε bó yaa nu ke eyuw wvun kpwe se bó ε yen no Nyo' saake bvunfon bwew ke.”

Ε nfieesen Jisos kumen

(Mat 17:1-8; Mak 9:2-8)

28 E è ke no nu ke diewe ediuw nyaŋ e, no Jisos jemyε mwεem mvun, ε wvú jo Bitá bô Jon noo Jem ε bô bó ben yî kum wvumew e le wen egen ebunle.

29 E wvú gen dīoo bunlee, ε nfieesen ye ne kumen, ε ndvú ye ten kumen no baa lawkene nen mwawmwawmwaw.

30 E fī kooy le bonyii bofεε, ε è nu Muses bô Elayja to nu ε ne buynen fó no jemyi bô bo Jisos.

31 E n'yuú Nyo' baa yî bó le. E bô bó jemyi ekumε kpwe yî Jisos to kenke keegen ekpwe Jelusalem keege é fī eto ekocen no Nyo' γεκεε.

32 Bó to jemyi nonen, ε Bitá bô Jon noo Jem nu ε nyii gooke lo bó. E bó dīoo kamse, yen no n'yuú Nyo' baa yî Jisos e, bvuu yen bonyii bo bofεε ba le ε bó leeme bô wvú.

33 E bonyii bo bofεε bodvu dīoo baase ekale, ε Bitá ne bvumten gay ê Jisos le, “Cee Ekole, fī jee no beene nu fen. Cine é bese eyoo cún she, é yimi enu yo, yimi yi Muses, ε yimi nu yi Elayja.” Wvú to jemyi nonen, yaa cim kee fiεε fī wvú jemyi ke.

34 Ke no wvú to bæε jemyi nonen, ε kembew ne to ê bó we banye bó. E bó no kenke nfan no bó nu ê kembew e.

35 E diew jeme ê kembew kedvu le le, “Wvun nu Waa wem wvù me nu ε ncaw. Ben eyuukè ε è nu wvú le.”

36 No diew yidvu jeme nonen ε mεse, ε bó ne yen ε Jisos leeme fó wvú embeŋ. E bó ke faŋe yaa see lo ê wee kefew kedvu le fiεε fī bó yenεε yî kum wvudvu le ke.

Ε Jisos bvuse nceendaa dεwle yî wan diemsen e

(Mat 17:14-21; Mak 9:14-29)

37 Ɛ ekfuŋ ke buy yuu, ɛ bô bo Jisos nɛ yî kum e no booke. Ɛ bó dioo bow, tasɛn bô kebombom ke bonyii le ke baay.

38 Ɛ wee mvu mum nɛ no wamte ê kebombom ɛnte lɛ, “Wee n'yɛɛyi, kee wo taa ke fô waa wɛm e. Ɛ ka ke waa wɛm nonɛn.

39 Keyoy kemew jaa cufe wvú tufe, ɛ wvú nu taake, dvûmte, ɛ diffuw buyte ɛmvu. Kí gene lo bô wvú, yaa beje lo lɛ wvú eyoy kɛ.

40 Me mbe ɛ nleke wase lɛ boom buw bo ŋgoo le ebvuse keyoy kedvu bó ɛ mom ŋkuuŋ.”

41 Ɛ Jisos yuw nonɛn, gay lɛ, “O oo! Ɛŋgokɛ ke ɛcici kè baa lese fitele yî Nyo' le kin. Me nu ŋke enu beene eŋgen embuy nɛɛ, eŋkuu shém bô ben eŋgen embuy nɛɛ?” Ɛ wvú mum gay ê cee wan wvudvu lɛ, “To bô waa wo fɛn.”

42 Ɛ wvú jo dioo too dvú, ɛ nceendaa dɛwle wvudvu bvuu cufe wan wvudvu tufe fokuse, ɛ wvú no taake. Ɛ Jisos kan keyoy kè yiile kedvu ɛ kí buy yî wan wvudvu le, ɛ wvú mum bonɛn. Ɛ Jisos mum nya wvú ê ice.

43 Ɛ bonyii bocii yɛn mvuŋgay mvu è nu mvu Nyo' le, ɛ diuw yum bó.

Ɛ Jisos bvuu jeme ɛkumɛ bonɣɛw bew bô kpwe ye

(Mat 17:22-23; Mak 9:30-32)

No bó to bɛɛ kɛŋke ŋghaw yî mwɛɛm mvunciim mvù Jisos to gee le, ɛ wvú nɛ gay ê boom bew bo ŋgoo le lɛ,

44 “Ben elooce enya bitem binɛn yî fiɛɛ fi me nu enjeme ê ben e. Wee wvù diee nu Waawee nu ɛ bó nu ke elese wvú can bonyii le.”

45 Ɛ wvú jeme nonɛn, ɛ bó faŋɛ yaa kiiɛ fiɛɛ fi wvú jeme kɛ, njefo fiɛɛ fimew to nu ɛ baŋɛ fo bó ekiiɛ, geenɛn ɛ bó no fane keebife ê wvú ɛkumɛ njeme wvudvu.

Ɛ nu yɛɛ wee wvu baay?

(Mat 18:1-5; Mak 9:33-37)

46 Ɛ bó ke nɛ kɛw mbew ɛbonebon lɛ laa bó sɛ nu nɛn ɛ wee wvu baay ê bó entelɛŋ nu yɛɛ lɛ.

47 Ɛ Jisos kiiɛ fiɛɛ fi bó kpawaci fô mvuntelem mvubole, mum jo wan wvu caan leke mbew ye le,

48 gay ê bó lɛ, “É wee fiisene wan diɛwɛ wvun e ê diee diem e, tu wvú fiisene ɛ è nu me. Wee é fiisɛn me, tu wvú fiisene ɛ è nu wee wvù tum me. Fí ɛ mum ɛ no nu lɛ, wee wvù joo ekole kew caan ê ben entelɛŋ nu wvú wvù nu wee wvu baay.”

Ɛ wee baa kicine wo, tu wvú tomte wo

(Mak 9:38-40)

49 Ɛ Jon mum nɛ tee Jisos, be wvú lɛ, “Cee ekolɛ, bese be ɛ yɛn wee mvu le ɛ wvú teŋ diee diuw sɛ bvuuɛ bonceendaa bo dɛwle le yî bonyii le, bese ɛ kan, njefo kɛ wvú yaa nu mvu ŋgoo yesebeene le kɛ.”

50 Ɛ Jisos tfuse le, “Fo ben ecilè kfuu wvuwe wee ke, njefo é wee baa ekicine ben, tu wvú tomte ben.”

Ɛ Jisos lese lo keegen Jelusalem, ɛ bonyii bo Samalia tun keefiisen wvú

51 Ɛ kefew kè Nyo' to nu ke ejo Jisos é wvú eben we ke no too wase keekocen, ɛ Jisos lese lo keegen Jelusalem, mum ne no gene.

52 Ɛ wvú dīoo ne, tum bonyii bomew fwe. Ɛ bó gen ley ntew mvu wvu Samalia le le bó eseyse bvudvuu jó ê wvú.

53 Ɛ bonyii bo jó ku wvú bô bvudvuu faɲe yaa fiisen wvú ke, njefo bó to kee lo le wvú fele gene ɛ è nu Jelusalem.

54 Ɛ Jem bô Jon bô nu boom bo Jisos e bo ngoo le ke yuw fiɛ fidvu, bife ê Jisos le, “Bese etee nguy we é wvú eshii elɛse bonyii bodvu?”

55 Ɛ Jisos kaa baɲke ye wam lo bó,

56 mum ne ɛ bô boom bew bo ngoo le mum no gene wase je ntew mvu le jɛɛy.

Fo wee ngoo Jisos etaalè ejim ke

(Mat 8:19-22)

57 Ɛ bô bó dīoo gene, ɛ wee mvu to gay ê Jisos le, “Me nu embii wo le naa fɛɛ fô wo gene.”

58 Ɛ Jisos tfuse ê wvú le, “Nyám yi ɲkpwaante keɲke bibuw bibole, ɛ mvunyiim mvù bile we keɲke yéw yibo, geenɛn ke wee wvù diee nu Waawee keɲke naa lo fô wvú ejike ekole kew ke.”

59 Ɛ Jisos ne gay ê wee mvu le, “È biì me le.” Ɛ wee wvudvu tfuse le, “Tata, yawe ecine é me enɲen endwey icem nse no mbii.”

60 Geenɛn ɛ Jisos tfuse ê wvú le, “Cine é bonyii bô nu le bó nu ɛ kpweken wase edweyte bonyii bô kpwekene, é wo egen fiuw efewcì ekume bvunfon bvū Nyo' le.”

61 Ɛ wee mvu bvuu gay le, “Tata, me nu mbii wo le, geenɛn yawe ecine é me enɲen enɲay kfuu diem e nse no mbii.”

62 Ɛ Jisos tfuse ê wvuwe wee le, “É wee ɲgvuume bô jiw keelem lemme, ɛ bvuu ɛ no lemte taale ejim, tu mwɛtɛn baa kpwentɛn keenu ente jo bvunfon bvū Nyo' le ke.”

Luk 10

Ɛ Jisos tum bonyii mbaɲsooshwiɲ ncow bofɛɛ

1 Ejim jodvu, ɛ Tata baaye bonyii bomew mbaɲsooshwiɲ ncow bofɛɛ tum fwe, bofɛɛ bofɛɛ le bó egen bontɛw e, egen eghan mondvuum mò wen nu ke efey mó le monciim.

²Ɛ wvú dīoo tumte bó gay ƙ, “Ngbwele duule baay, Ɛ bonyii bo ngbwele le nu caan. Nonen, ben ebunlè ƙ Tata wvú Cee wee eciinse bonyii bo ngbwele le wene dvu wvú.

³Ben egenè ƙ. Ben dīoo gene no kee ƙ me ntumte ben Ɛ ben nu egen enu diewe boom bo njée le ente jo bokuula.

⁴Ben dīoo gene, fo wee ejo bigew, ƙenƙe ekƙe, ƙenƙe bolaba bomew ƙ. Ben dīoo Ɛ buy ê je, fo ben eleemenè gayte bonyii le ƙ.

⁵Ben dīoo Ɛ gen Ɛ ley yew yì ben ley dvú le, yaw gay yew e ƙ, ‘Kembonen enù yew fən.’

⁶É wee wvú koonke kembonen nu dvú, é kembonen emey yî ye le. É wvú fən baa nu, é kembonen kedvu ekase etu jim ê ben.

⁷Seke ben Ɛ ley yew, mum no ceè ƙ Ɛ è nu dvú. Fo ben ekumenè yéw ƙ. Fiƙe fidien ficii fi bó nya ê ben, Ɛ ben die, ƙenƙe è nu fiwuun, Ɛ ben wu, njefo é wee lemte lemte, tu wvú ƙenƙe keekƙe nlawma we.

⁸É ben ley ntew e, bó Ɛ fiisen ben, Ɛ nya naa la ƙ ben edie, é ben no diee lo.

⁹Ben dīoo nu jó, no fèlè bonyii bo bincem e, ebvuu efewcì ê bonyii bocii ƙ bvunfon bvú Nyo' le nu wase nceencee fô bó le.

¹⁰Geenen, ben é ley ntew e, bó é faƙ keefiisen ben, é ben buy gen bifiaƙ bi jé le jaƙ ƙ,

¹¹‘Kebvu ke ntew wene le kè bese jo yî bikaa bisese le kin fən no bese kuci, Ɛ fiƙe ficii kaase tuu yî bikuu binen e. Geenen, ben ekeè ƙ bvunfon bvú Nyo' le nu wase nceencee.’

¹²É me ensee ê ben ƙ, è nu ke edīoo enu diuu di nsaw wvu fokemese le, é mwɛem ebonene fô kelaante kè Sodom efele kelaante kekɛ.”

Ɔgɛw bontɛw bò tunɛ keekumen mvuntelem mvubole

(Mat 11:20-24)

¹³Ɛ Jisos nɛ gay ƙ, “Ɔgɛw wvu baay nu wene ben bonyii bo Kolasen, Ɛ ngɛw wvu baay nu ten wene ben bonyii bo Besayda. Ben ekeè ƙ, é me nto ndīoo nge biƙhaw bi mwɛem e bì me nto nge jo ben Ɛ è nu Taya bô Sidon, tu bó to nu Ɛ jise wase bimbamkpwe, ƙfum taan ye le nceke keedunƙe ƙ bó nu Ɛ kumen wase mvuntelem mvubole.

¹⁴Ben ekeè ƙ è nu ke edīoo enu diuu di nsaw wvu fokemese le, é mwɛem ebonene fô bonyii bo Taya noo bo Sidon e fele ben.

¹⁵Noo ben bonyii bo Kafana'um, ben kpwaake ƙ bó nu ke ebense ben é ben eben we? 'Aay. Bó nu ke eshike lo ben é ben eshii egen woƙ boƙfu le.”

16 E Jisos mum gay ê bonyii bò wvú to tumεε ba le, “É wee yuw ben e, tu mweten yuw ε è nu me le. Wee é ma ben, tu wvú ma ε è nu me. Wee é ma me, tu mweten ma ε è nu wee wvù tum me.”

Fiεε fi wee ηgoo Jisos eyuukè njon yî dvú le

17 E bonyii bo mbansooshwiyy ncow bofεε ba ke ghan tu jim yuuke njon, mum gay ê Jisos le, “Tata, bese se teje diee diuw, ε è cim nu naa bonceendaa bo dεwle le, ε bó yuw ke bese le.”

18 E Jisos tfuse ê bó le, “Me nse nu ε n'yen ε Satan ε gbwe ke diewe jan fò yí ε law we ε ley fokuse.

19 Me nu ε nya wase mvunγay ê ben mvù è nulo é ben elεenci yó bô bongam dvú. E mbvuu ε nya mvunγay mvù ben eso mvunγay mvu Satan wvù wee bvuban e dvú mvunciim. Ke è nulo é fiεε eshiw ben ke.

20 Geenεn, fo ben eyuukè njon le bonceendaa bo dεwle le yuuke ben e ke. Ben eyuukè njon ε è nu le ediee eyene nu ε Nyo' ε saη wase ê ηwa' we le fowe.”

E Jisos yuw njon

(Mat 11:25-27; 13:16-17)

21 Ke sekedvu, ε Keyoy ke Yuule ge ε njon no yuu lo Jisos. E wvú mum gay le, “Me nyaa keyoone ê wo Icεm Nfon εbule bô nshe le wo nu ε nyile mwεεm mvun ê bogoyfee noo bonkiefiεε, ε duηce ε è nu ê mvunley mvu boom e. È nu no fí nu Icεm, njefo è nu no wo to shieele le fí enù.”

22 E Jisos bvuu jeme le, “Icεm nu ε nya wase mwεεm mvunciim ê me. Ke wee nu dvú wvù kee Wan wvù me ke, è mey ke Icεm wvù kee. E wee yaa nu dvú wvù kee Icεm ke, è mey ke me wvù Wan noo bonyii bò Wan nu ε caw keeduηce Ice ê bó.”

23 E wvú nε banke ye jeme wase ε è nu ê boom bew bo ηgoo le εbonebon le, “Njon wvu baay nu wene le εjise eyene yene mwεεm mvun e.

24 Ben ekeè le bonyii bo ntum Nyo' le nteen bô bonfon to shee beele keeyεn mwεεm mvù ben yene le, ke faηe yaa eyen ke. No beele ten keeyuw mwεεm mvù ben yuuke, ke faηe yaa eyuw ke.”

Ŋgan εkumε wee wvù jee wvu Samalia

25 E wee mvu wvù to looci kee bonci bo Nyo' le, ke nε to keemom Jisos, mum bife ê wvú le, “Wee n'yεeyi, fiεε fi me ηkeηke keeηge nse ηkeηke nshii wvù mey lo nu la?”

26 E Jisos bife ê wvú le, “Bó saη ê Ŋwa' Nyo' le le wee egeè nεε? Wo taηke yuuke le la?”

27 E wvú tfuse le, “Bó saη le, ‘È koonkè Tata wvù Nyo' wo bô fitele fiuw ficii, enya ekole kuw ê wvú kecii, elemtè fô wvù le bô mvunγay mwuw mvunciim, egeε

bvufee bwuw bvucii yî ye le, ebvuu ekooŋkè waa bwoo no wo kooŋke ekole kuw.”

28 E Jisos gay le, “Wo nu e tfuse leŋ. È geè nonen ke emum ekeŋke nshii wvù meŋ lo.”

29 E wee wvudvu mum ne wowlen bife ê Jisos le, “Waa bwæem nu ye?”

30 E Jisos tfuse e è nu ê ŋgan e le, “Wee mvu to nu e ne Jelusalem no booke Jeliku, dioo gene ley can bocoŋ e. E bó suŋ wvú, e wvú citen, e bó baaye ndvú ye jo bô mwæem mwew mvunciim, mum laŋ wvú fó lewtæ.

31 E fí ke ne kooy le wee mvu to booke ê je yidvu le e è nu cee ncese, yen wee wvudvu le, wem lo fey.

32 E wee mvu ten ke ne no too, e è nu wee wvu ê kfuu di Læwe le, ke to buy fó, yen wvú le, wem lo ten fey.

33 Geenæn, e wvumvu wee ke no læne ten too, e è nu wee wvu Samalia. E wvú ke to buy fó, yen wvú le e shen koo wvú.

34 E wvú gen mbew ye le, gee mbvuum bô mæem yî bilemte biew e, kuu bilemte bidvu bô ndvu, mum tuu wvú yî nyam yî wvú to læne yî dvú le, gen dvú yew bonyii bo ghane le no taale fô wvú le.

35 E bô wvú ce, e bvú buy yuu, e wvú bvuse bodanali bofæe nya ê wee yew yidvu gay ê wvú le, ‘Shæe etaalè fô wee wvun e. É wo sheke lo e jewse bigew bí e fesæn, é me ŋke endioo e ŋkase entfuse.”

36 No Jisos ma nonen, mum bife ê wee we wvù to looci kee nci le, “Ènte jo bonyii bo botete ban, wo yen fiuw le wee wvù to duŋceæ le wen nu waa bwee wee wvù bocoŋ to suŋæe nu wvù la?”

37 E wvú tfuse le, “È nu wee wvù to koolæe shen fô wee wvudvu le.” E Jisos mum gay ê wvú le, “È genè, egen egeè ten nonen.”

E Jisos bæe fô yew e fo Maata bô Maalia

38 E Jisos bô boom bew bo ŋgoo le ke ne no gene, gen ley ntæw mvu le e kpwoon mvu nu jó e bó teŋe le Maata. E wvú fiisen Jisos ê wvú yew.

39 Wvú to keŋke waa bwee mvu e bó teŋe le Maalia. No Jisos to geneæ ley dvú, e Maalia mum gen shii mbew ye le no yeke fiæe fi wvú yeeyi.

40 E Maata nu fiew buuke e è nu bô ntêw. E wvú ke ne to bife ê Jisos le, “Tata, wo yene le waa bwæem nu e cine me le me e no ntawtene me embeŋ se wo ghayte lo le? Gaye ke é wvú eto efice me.”

41 E Tata tfuse le, “Maata, Maata, wo buuke, baysee ekole kuw yî mwæem e nteen,

42 E fiæe fi nu shiee le baay nu ke fimwaan. Maalia nu e caw wase fifie, e ke wee yaa nu ke efi ê wvú ke.”

Luk 11

Ɛ Jisos yeyi no ɛ nulo ɛ bó ebunleè

(Mat 6:5-15)

¹ Ɛ to nu diuu dimew, ɛ Jisos no bunlee bvudvuu bvumew e, ke bunle mese, ɛ wee we ηgoo mvu to gay ɛ wvú le, “Tata, yeyi bese no ɛ nulo ɛ bese ebunlee, leηleη no Jon to yeyee bonyii bew bo ηgoo le no bó ebunlee.”

² Ɛ Jisos mum gay ɛ bó le, “Ben dioo bunlee no gaytè le, ‘Icee wese, gee ɛ bonyii ewvumtè diee diuw, ege ɛ bvunfon bwuw eto.

³ Ɛ nyaà bese mwεem mvudien ɛdiuw ɛcii,

⁴ Lεεshe bibefe bisese, no bese lεεshi bibefe bì bonyii bomew gee fô bese le. Fo wo ecine ɛ bese eley mmom yì eghaw bese le ke.”

⁵ No wvú gay nonen mum fewsen ɛ bó le, “Ben ejo le wee mvu ben e be ne ɛ gen ɛ kumce yew nsaa ye entaη enteleη ɛ gay le, ‘Nsaa yem, nene ke we efoose me bô bontuw bo bvulem e botete.

⁶ Nsaa yem yimi nu ɛ ne ɛ buynen gbwen ghane le, ɛ me n'yaa ηkeηke fiε fi me nu entêw wvú dvú ke.’

⁷ Bó ejo le nsaa yo yì wo be kumci ye ɛ kaa ɛ tfuse fiew yew le, ‘Fo wo ejewseè me ke. Bee boom bem nu ɛ bó ɛ jiim wase ɛ fen kembuη. Ke ɛ nulo ɛ me embvuu ene we le me ηgom fiε enya ɛ wo ke.”

⁸ No Jisos fewsene nonen, bvuu gay le, “Ɛ me ensee ɛ ben le ɛ wvú fen baa ene we enya bvulem bvù wo biite njefo wvú nu nsaa yo, tu wvú nu ke eghan ke ene we enya fiε ficii fi wo shieele seke wo ɛ mey ke fó ɛ no kumci.

⁹ Me ɛ no ηgayte ɛ ben le, ben ebiitè, ɛ Nyo' ke enya ɛ ben. Ben egomtè, ɛ Nyo' ke ege ɛ ben eyen. Ben ekumci kembuη, ɛ Nyo' ke eyene ɛ ben.

¹⁰ Ben ekeè le wee tfuu wvù biite, nu ke ekeηke, ɛ wee tfuu wvù gomte, nu ke eyen, ɛ wvù kumci kembuη nu ɛ bó nu ke eyene ɛ wvú.

¹¹ Ɛ nu cee wan wvù la ɛ ben enteleη wvù waa we bife bye, ɛ wvú enya ɛ ɛ nu yo ɛ wvú?

¹² Nu le ɛ wan be bife gee, ɛ wo enya ɛ ɛ nu ηgam ɛ wvú le?

¹³ Ɛ ben fen bò ɛ nu bonyii bò befe kee keenya mwεem mvù jee ɛ boom bonen, tu ke ɛ nulo ɛ Icee wene wvù nu fowe enya ten Keyoy ke Yuule ɛ bonyii bò biite ɛ wvù efey naa lo nonen e?”

Jisos bô Bεisebu

(Mat 12:22-30, 43-45; Mak 3:20-27)

14 Ɛ Jisos ke no bvuuse nceendaa dɛwle yî wee mvu le ɛ è nu kencife. No nceendaa dɛwle wvudvu to buyɛɛ, ɛ wee wvudvu mum kew no jemyi. Ɛ kebombom ke bonyii le yen no kɛŋke lo ŋghaw.

15 Ɛ bonyii bomew no duu le, “Wvú bvuuse bonceendaa bo dɛwle le nen ɛ è nu bô mvuŋgay mvu Belsebu wvù nfon bonceendaa bo dɛwle le.”

16 Ɛ bomew bonyii no teeyi keekoo wvú gayte le wvú ege fiɛɛ fi duŋci mvuŋgay mvù nɛ fowe.

17 Ɛ Jisos kiɛɛ boŋkpawcɛ bobole mum gay le, “É ketum nɛ ɛ gawsɛn ɛ no diuu ɛkinɛkin, kí saa ke eleem kɛ. Kfuu é nɛ ɛ gawsɛn ɛ no diuu ɛdinɛdin, tu dí ɛ bvun wase.

18 Ɛ nu kɛ lɛŋlɛŋ no Satan bô ŋgoo ye nɛ ɛ gawsɛn ɛ no diuu ɛbonebon, bvunfon bwew saa ke eleem tɛn kɛ. Me ŋgayte nonɛn njefo ben duu le me mbvuuse bonceendaa bo dɛwle le ɛ è nu bô mvuŋgay mvu Belsebu le.

19 Ɛ è fɛn nu le me mbvuuse bonceendaa bo dɛwle le ɛ è nu bô mvuŋgay mvu Belsebu le, tu bonɛn boom bvuuse ɛ è nu bô mvu yɛɛ le? Fiɛɛ fi boom bonɛn bodvu gee nu eduŋcɛ le ben nu ɛ gbwe wase nsaw.

20 Ɛ Geenɛn é me mbvuuse bonceendaa bodvu ɛ è nu bô kebo ke Nyo' le, tu bvunfon bvú Nyo' le nu ɛ to wase fô ben e.

21 Ben kee le é ntemmvuŋgay seyse mwɛɛm mwew mvu jem e ɛ shii ɛ no cɛyte la diew dvú, wee saa ke eshiw fiɛɛ fiew kɛ.

22 Ɛ Geenɛn, é ntemmvuŋgay mvu wvù fele wvú nɛ ɛ to ɛ diu ɛ so wvú, emum eloo mwɛɛm mwew mvu jem e mvù wvú se gɛɛle ɛkolɛ yî dvú le, ebvuu ekuu mwɛɛm mwew mvunciim egen dvú é bô nsáa ye egaw.

23 Ben ekeè le é wee kicine me, tu mwɛtɛn bone ɛ è nu bikaa ê me ɛjim. Wee wvù baa efici me keebaanci lo, tu wvú tawse lo.

24 Keyoy kè yiile ké buyte yî wee le mum gen ŋkpwaante no gomte fô kí ecee. Geenɛn ké dioo ɛ gom ŋkuuŋ, mum jeme ê ɛkolɛ kew le, ‘Me nu ɛŋkase entu ê me yew fô me nse mbuyɛɛ.’

25 Seke kí ɛ kase ɛ to ɛ yen ɛ yew nu ɛ bó ɛ yɛɛ ɛ seyse yí ɛ no yuule,

26 nonɛn ɛ kí mum kase gen, to bô biyoy bimew bisooshwiyy bì befe fele kí, ɛ bô bí mum to ley no cee dvú. Ɛ mwɛɛm mum mɛɛɛ fo yî mwɛtɛn e sekedvu fey no mvú se shee nu.”

Njoŋ wvu baay nu wvu baa?

27 No Jisos to bæɛ jemyi mwɛɛm mvun nen, ɛ kpwoon mvu nɛ sɛɛɛ ê kebombom ke bonyii le ente jeme le, “Njoŋ wvu baay nu wvù kpwoon wvù to bokɛɛ wo, bvuu yamse le.”

28 Ɛ Jisos tfuse fiew ƙe, “Njoŋ wvu baay nu Ɛ è nu wvu bonyii bò yuuke diew Nyo' gee no yí gomte.”

Ɛ bonyii no gomte keeyen kenghaw ke fiɛɛ le kè duŋci fô mvuŋgay mvu Jisos e ne
(Mat 12:38-42; Mak 8:12)

29 No bibombom bi bonyii le to taashi too mbew ye le, Ɛ wvú ne gay ƙe, “Ɛngokɛ ke keseen kin nu kè befe. Kí gomte keeyen kenghaw ke fiɛɛ le kè duŋci mvuŋgay mwem, Ɛ bó yaa nu eduŋɛ è kí ƙe. Geenen, Ɛ kenghaw ke fiɛɛ le baa fey ke wee ntum Nyo' wvù Jona le ƙe.

30 No fiɛɛ fi Jona to gee to nu kenghaw ke fiɛɛ le fô bonyii bo Ninive le, nu ke ƙe ƙe ƙe no fiɛɛ fi wee wvù diee nu Waawee gee nu ke enu kenghaw ke fiɛɛ le fô ƙe ƙe ke keseen kin e.

31 È nu ke enu diuw di nsaw wvu fokemese le, é Yaa wvù to saake ketum kè Sheba eleem bô ƙe ƙe keseen kin ege é bó elese kí ƙe ƙe e, njefo wvú to nu Ɛ ne ketum kew e è kendvuse ke woŋ e keeto eyuw bvufee bvu Nfon Saamun e. Geenen ben eyeke eyuw, wee mvu nu fɛn bô fiɛɛ Ɛ fí kuuke fele fi Saamun e.

32 Ɛ bonyii bo Ninive nu ke elomte ten ƙe ƙe keseen kin ebvubwe ƙe kí to nu Ɛ jay baay, njefo bó to nu Ɛ yuw fiɛɛ fi Jona to fewɛɛ, kumen mvuntelem mvubole. Wee mvu wvun fɛn bô fiɛɛ fi fele fi Jona le, Ɛ ben yaa kumene mvuntelem mvunen ƙe.

Ken'yeese ke ye le
(Mat 5:15)

33 Ƙe wee ké tfuuke ken'yeese lese ƙe ƙe. Ƙe è yaa nulo ten é wvú ebvuu ejo ƙe ƙe ekfuke dvú ƙe. Wvú ké tfuuke, tome Ɛ è nu yí fiɛɛ fi bó tomyi ken'yeese yí dvú le, ƙe bonyii dɔo leyte yew eyene n'yuu le.

34 Jise diuw nu ken'yeese ke ye yo le. É jise diuw yuule lo, é ye yo yicii enu Ɛ yí Ɛ yɔŋsen bô n'yuu. Geenen, é jise diuw baa yuule, é ye yo yicii enu Ɛ yí Ɛ yɔŋsen lo bô ejiwe.

35 Fí mum è no nu ƙe, wee etaalè ƙe laa wen ƙe ƙe Ɛ è nu ente jo n'yuu nuu ente jo ejiwe ƙe.

36 É wo ƙe ƙe ente jo n'yuu Ɛ keba kemew yaa nu è ejiwe le ƙe, é mwɛɛm mvunciim emum eyuule ƙe diewe no ken'yeese ké baa no nyaa n'yuu yí yo le.”

Ɛ Jisos tooshɛ Bofalasii bô bonyii bò duŋci bonci
(Mat 23:1-36; Mak 12:38-40)

37 Ɛ Jisos ke mɛse njeme we, Ɛ wee Falasii mvu tee wvú ƙe wvú eto é bô wen egen edieken. Ɛ Jisos mum gen, ley, shii Ɛ bó no diekene,

38 Ɛ wvú baa yaw ecuke can ƙe. Ɛ wee Falasii we taa Ɛ fí ghaw wvú.

³⁹Ɛ Tata kiiɛ fiɛɛ fi wvú kpawaci mum jeme ê wvú le, “Ben Bofalasiɛ cuke mvunɔkom bô shúw ye le, geenɛn ɛ mwɛɛm mvù befe bô ken'yɛɛ ejise ɛ cin lo fô mvuntelem mvunɛn e.

⁴⁰Biyunɔ bin! Ke Nyo' wvù to bomɛɛ ekfuɔ nu wvù to bomɛɛ ente ten e?

⁴¹ Fi ben bee keegeè nu le, ben enyaà mwɛɛm mvù ben kenɔke ê mwɛɛm mwe le ê bonyii bo kefufe le, é mwɛɛm mvunciim emum eyuule fô ben e.

⁴² Ngɛw wvu baay nu wene Bofalasiɛ. Ben nyaa keba kemwaaɔ ê Nyo' ente jo biba yuufe bi mbáse yì ben keeke naa noo mwɛɛm mvù ben keeke gɛɛle ê mbáse le le yì eshumte, geenɛn kaa cin'yi keegeɛ mwɛɛm mvu leɔ fô bonyii le bô keekooɔke Nyo'. Ben be kenɔke keegeè mwɛɛm mvudvu mvunciim yaa cin'yi fimew e ke.

⁴³ Ngɛw wvu baay nu wene Bofalasiɛ. Ben ké no kooɔke ke keeshiile ɛ è nu fwe yéw bunle le, bvuu kooɔke le bó egayte ben e ê way bô n'wvum.

⁴⁴ Ngɛw wvu baay nu wene, njefo ben nu ke diɛwe jém yì yaa yen'yi ke, ɛ bonyii lenɛ yì dvú le yaa kee ke.”

⁴⁵ No Jisos to jemyi nen, ɛ wee mvu wvù to looci kee bonci bo Nyo' le gay ê wvú le, “Wee n'yɛɛyi, wo kee ke le fiɛɛ fi wo jemyi nu ɛ kum bese le ten e.”

⁴⁶ Ɛ Jisos tfuse le, “Ngɛw wvu baay nu ten wene ben bonyii bô looci kee bonci bo Nyo' le. Ben nen'yi yike bonyii bô bvujite ɛ bvú fele mvunɔgay mvubole sɛ è nulo é ben elaw ke naa lo kpwan ebo keefice bó dvú ɔkuuɔ.

⁴⁷ Ngɛw wvu baay nu wene. Ben bomte jém bonyii bo ntum Nyo' le bô bo'icee cee bonɛn to yuwɛɛ.

⁴⁸ Fifin duɔci le ben tomte gee di bo'icee cee bonɛn e. Bó to nu ɛ yuwɛɛ bonyii bo ntum Nyo' le, ben ɛ mum ɛ shɛɛ ɛ no seysee bomte jém yiɔ.

⁴⁹ È nu fiɛɛ fi to gee ɛ Nyo' bô bvufɛɛ bwew sɛ jeme le, ‘Me nu ɔke enciinse bonyii bem bo ntum e fô bó le, é bó ke eyuwɛɛ bomew ebvuu ekuɔ bomew.’

⁵⁰ Nonɛn, Nyo' nu ke ebife ê ɛɔgokɛ ke keseen kin ekumɛ elɛmɛ ke bonyii bew bo ntum e bocii bô bó to yuwɛɛ ɛ kew no woɔ to kewɛɛ.

⁵¹ Wvú nu ke bife ɛ kew yì elɛmɛ ke Abel e egen ebuy yì ke Sakalia wvù bó to yue entelɛɔ jo ketaj ke ncese bô yew ncese le. Me nseɔe lo ê ben keceɛy le Nyo' nu ke ebife ê ɛɔgokɛ ke keseen kin ekumɛ kpwe bonyii bodvu ba bocii.

⁵² Ngɛw wvu baay nu wene ben bonyii bô looci kee bonci bo Nyo' le. Ben nu ɛ nyile ken'yene ke diuw fwese wvù è nulo é wee eley dvú sɛ kiiɛ fiɛɛ fi nu leɔ e. Ben nu ɛ tun keeley, ɛ bvuu ɛ no baaɔke bonyii bô gomte keeley fo bó eley.”

⁵³ Ɛ Jisos ke ja le wen egene, ɛ Bofalasiɛ bô bonyii bô to duɔci bonci bo Nyo' le kew no leeshi wvú bô díɛw biwci mwɛɛm ê wvú nteen nteen,

⁵⁴ Ɛ bó to gee nonɛn teeyi lo wvú keeyuw fiɛɛ diuw we le emum ekoo wvú.

Luk 12

Fo wee ejemyi jɛɛy gee jɛɛy kɛ

¹ No Jisos to jemyi, ɛ bibombom bi bonyii le no taashi fó bontfuke le bontfuke le faanene. Ɛ bomew læenci bikaa bi bomew e. Ɛ Jisos nɛ kɛw no jemyi ɛ è nu ê boom bew bo ŋgoo le gayte lɛ, “Ben ejòð kefew yî fintuŋlɛɛn fi Bofalasii le fi è nu gee dibole dî bó jemyi jɛɛy, gee jɛɛy e.

² Ben ekeè lɛ kɛ fiɛɛ nu dvú fi bó banɣi fi nu ke enu sɛ fí ɛ buy ɛmwa kɛ. Ɛ kɛ fiɛɛ nu dvú tɛn fi bó nyile fi nu ke enu sɛ bó ɛ kiɛɛ kɛ.

³ Ben ekeè lɛ fiɛɛ ficii fi ben jemyi ɛntaŋ nu ɛ bó nu ke eyuŋɛn ɛmvunsheeŋ. Ɛ fiɛɛ ficii fi ben ké faale yew sɛ no tfumtfume nu ɛ bó nu ke ejaŋ ɛ è nu fô ekolɛ ke yew e.

Wee wvù bó efanè

(Mat 10:28-31)

⁴ Nsáa yɛm, me ɛ no njemyi ê ben lɛ fo ben efanè bonyii bò nulo eyu kɛ ɛ è nu nyam ye maan sɛ è nulo é bó ebvuu ege fiɛɛ fimew kɛ.

⁵ Ben eyekɛ eyuw wee wvù ben efanè. Ben efanè ɛ è nu Nyo' njefo è nu wvù wvù kɛŋke mvuŋgay keeyu wee, ebvuu elese mwɛtɛn ŋguy wvu baay e. Me mbvuu ŋgayte ê ben lɛ ben efanè ɛ è nu wvù.

⁶ Kɛ ben kee lɛ bó ké no geese mvunsha mvuntin kɛ yî mvunyinyi le mvunfɛɛm maan? Geenɛn, kɛ finsha fimew nu dvú fimwaan fi Nyo' ké daaye ê fí le kɛ.

⁷ Finɛn nu ɛ Nyo' kee naa yvúw yicii yì nu ê ben ɛfa. Fo ben efanè kɛ. Ben fele lo mvunsha fó nteen.

Wee wvù beŋe bó wee wvù tune Jisos

(Mat 10:32-33; 12:32; 10:19-20)

⁸ É me embvuu ensee ê ben tɛn lɛ, é wee beŋe ê bonyii ɛjise lɛ wen kee me, tu wee wvù diee nu Waawee nu ke ebee tɛn mwɛtɛn ê bonceendaa bo Nyo' le fwe.

⁹ Geenɛn, é wee ma lo me ê bonyii ɛjise, tu me nu ŋke ema tɛn mwɛtɛn ê bonceendaa bo Nyo' le ɛjise.

¹⁰ Fí ɛ bvuu è no nu lɛ, Nyo' nu ke elɛɛshe díɛw yì befe yì wee jemyi ɛkumɛ wee wvù diee nu Waawee, geenɛn kɛ è nu naa lo é Nyo' ke eyuu elɛɛshe díɛw yì befe yì wee jemyi ɛkumɛ Keyoy ke Yuule kɛ.

¹¹ Seke bó ɛ koo ben ɛ ɣɛn dvú yéw bunle le, kɛnɛɛ fwe dvu bonyii bò saake won kɛnɛɛ fwe dvu bonyii bò kɛŋke mvuŋgay mvu sa' le, lɛ bó ɛɣɛn esaw ben, fo ekole ekfumtè ben lɛ laa ben nu ke ɛɣɛn etaŋe diuw egay lɛ la lɛ, kɛnɛɛ ejeme nɛɛ lɛ.

¹² È nu ke enu kefew kedvu le é Keyoy ke Yuule esee fiɛɛ fi ben ejeme.”

Ŋgan ɛkumɛ keyuŋ ke cee kpaw e

13No Jisos to teete boom bew bo ηgoo le nonen, ε wee mvu ne jeme ente jo kebombom ke bonyii le, gay ê wvú le, “Wee n'yεεyi, gayε ê waa bwεem le wvú egaw bvushew bvuseεbeewvu enya bwem.”

14ε Jisos bife ê wvú le, “Diemsen, è geke yεε me le me ensumentenè bonsaw bonen, mbvuu ηgaakè bvushew bvunen?”

15 No wvú bife nonen mum gay ê wee tfuu le, “Ben eyenè fo ben eyεelè ejise yí mwεem e, ηjefo ke nshii wee yaa nu nje mwεem mvù wvú kenke ke, wee ejo naa ε mweten kenke nεε.”

16No wvú jeme nonen, mum ma ηgan le, “Cee kpawaw mvu to kenke wεε we, ε mwεem ke jon dvú baay.

17ε wvú mum kew no kpawawci le laa wen nu ke ege nεε le? Wen nu ke egeε ηgu wen fεε le?

18ε wvú mum ne cu ntaη le, ‘Fiεε fi me nu ηge nu fin. Me nu ensaw bigone biem, ηjkase ηkuwse, emum ηgeε ηgu bô mwεem mwem dvú mvunciim.

19 É me ηke endioo ε ηge nonen, emum ηgay ê ekole kem le me nu wee keshi. Me ηkenke mwεem mvù me nu ηke endie embuy bilum e nteen. Ke me mbεε ebvuu embuuke ke. Me nu endiekene ke wase lo, mbvuu η'wukene n'yuuke njon.’

20No wvú seyse nonen, ε Nyo' mum tee wvú le, ‘Keyuη kin! Entaη eben nu ε me nu ηke ηjkase enjo keyoy kuw. Mwεem mvun mvunciim mvù wo seyse ε geε nu ke enu mvu yεε le?’”

21No Jisos jeme nen mum gay le, “È nu ke lenlen no fí nu ke enu fô wee wvù baanci bvukuke fô ekole kew e yaa kenke bvukuke ê keba ke Nyo' le ke.”

Bó elese mvuntelem ε è nu yí Nyo' le

(Mat 6:25-34)

22 ε wvú bvuu ne no jemyi wase ε è nu ê boom bew bo ηgoo le le, “Fo ben eyaηyaηè ekume nshii wene le laa ben nu ke edie la le, kenεε ekume ye yene laa ben nu ke ejise la le.

23Ben ekeè le keyoy ke wee le fele mwεem mvudien, ε ye wee fele ndvú.

24 Ben etaa eyen biηaηa, ke bí ké no jewyi bvuu gbweci ηgu ke. Ke bí yaa kenke bigone ke. ε Nyo' nyaηyi ke bí bicii. Ke ben kee le ben fele mvunyiim e?

25È nu yεε ê ben entelen wvù yaηyaηe, wvù nulo ebise ke naa kefew caan yí nshii we le?

26No è nu se è nulo é ben ege naa fi caan fin ηkuuη, è ge la wvù ben soo bikuu ekume mwεem mvumew?

²⁷ Ben etaa yen no fow ké no kuu nu. Ke fow ké no lemte kenée shile ndvú ke. Geenen, é me ensee ê ben le ke naa Nfon Saamun bô bvukuke bvucii bvù wvú to kenke to ké suute ye no nu ε wvú ε buy fô fow mvu le ke.

²⁸ É Nyo' suute egay yo ηkpwaante nen, egay yò kuu eben, buy ntfuu ε bó ε fwεε wase fotaη, tu ke è nulo é wvú esufe ben efey lo nonen e? O oo bonyii bo mbee wvù doose le!

²⁹ Fí mum è no nu le fo ben eyanyaηè, bvuu kpwaake le laa ben nu ke ediee la bvuu wuu la le,

³⁰ njefo mvumvun mwεem ké no kpawci ke bonyii bo yî nshe le bô yaa kee Nyo' ke. Ben ekeè le Icee wene kee lo le ben shieele mwεem mvun mvunciim.

³¹ Ben elese bvufee bvunen ε è nu yî bvunfon bvú Nyo' le, é wvú emum enyaa ten mwεem mvun mvunciim ê ben.

³² Ngoo yem, no ben nu caan nen, fo ben efanè ke, njefo Nyo' wvù Icee wene nu ε caw keenya bvunfon ê ben.

³³ Ben egese mwεem mvù ben kenke, egaw bigew bidvu ê bonyii bo kefufe le, egomtè bobuuncuu ε è nu bô yaa nulo esεeken ke. Ben egεelè kpaw wene ε è nu woη Nyo' le, fô è yaa nulo é wvú eka ke, ε cooη yaa nulo efey fó ke, ε shéw yaa nulo ekan ke.

³⁴ Ben ekeè le fò wee gεke kpaw we nu ke fó fò fitele fiew nu enu.

Bonyii bo Jisos e ecεytè wvú

(Mat 24:45-51)

³⁵ Ben ekay bicaw binen, etfuw bin'yeese ecεytè lemme,

³⁶ ke diewe boom bo lemme le bô cεyte cee εkolε wvubo ε wvú nu gbwen bvujen e. E wvú nu ke edioo ekaase ekumcε kembuη é bó eyene lo é wvú eley.

³⁷ Njoη wvu baay nu ke enu wvu boom bo lemme le bô cee εkolε wvubo nu ke edioo efεese eyen ε bó nu we cεyte. É me ensee ê ben kecεey le wvú nu ke esen ndvu ye é bó shiiyen fokuse é wvú eto bô mwεem mvudien egawcε ê bó.

³⁸ Njoη wvu baay nu ke enu wvu boom bo lemme le bô wvú nu ke edioo efεese eyen ε bó nu cεyte. Kenée wvú nu ke eto entaη enteleη, kenée seke nyimshie ε toη.

³⁹ Ben ekeè le é cee yew kee kefew kè cooη nu ke eto, é wvú ecεytè. Wvú saa ke ecine é bó enγoy yew ye ke.

⁴⁰ Ben ten kenke keecεytè, njefo wee wvù diee nu Waawee nu ke ekase eto ε è nu ê kefew kè ben yaa kee ke le.”

⁴¹ E Bitamum nε bife ê wvú le, “Tata, wo ma ηgan wvun ε è nu ê bese, nuu ê bonyii bocii le?”

42 Ɛ Tata tfuse le, “Waa lemme wvù nu wvu keceey bvuu keŋke bvufee nu wvù la? Ke è nu wvuwe wvù cee ekole we nu ɛ gee wvù le wvù etaalè fô yew ye le, é kefew ke dioo ɛ kocen ɛ wvù nya mwɛem mvudien mvu boom bo lemme le é bó le?”

43 Njon wvu baay nu ke enu wvu waa lemme wvuwe wvù cee ekole we nu ke edioo etoo eyen ɛ wvù gee lemme leŋleŋ no wvù bee keege.

44 É me ensee ê ben keceey le cee ekole we nu ke ebense wvù é wvù etaale fô mwɛem mwew e mvunciim.

45 Geenɛn, é waa lemme wvudvu nɛ ɛ jeme ê ekole kew le, ‘Ke cee ekole wɛm nu ke eyaŋsen ekase eto ke’, ɛ mum ɛ kew ɛ no suŋke boom bo lemme le bò bolemse noo bò bokɛɛ, diekene bvuu wuu mbvuum ɛ mó koole wvù,

46 tu cee ekole we nu ke enɛ esese ebuynɛn diuu dimew dî wvù yaa be kpwaake le ke noo ê kefew kè wvù yaa be kee le ke. Wvù nu ke edioo ɛ buynɛn nonɛn, emum enya ŋgew ê waa lemme wvudvu, eciinse wvù é wvù egen enu bô bonyii bô yaa jemyi keceey ke.

47 Waa lemme wvù kee fieɛ fi cee ekole we gomte le wvù egeè, ɛ faŋe yaa eseyse egee, nu ɛ bó nu ke etam wvù boŋgbwan nteen.

48 Ɛ waa lemme wvù yaa kee ke fieɛ fi cee ekole we gomte le wvù egeè, ge fieɛ fi è nulo é bó etam wvù boŋgbwan nteen, nu ɛ bó nu ke ewewce ke lo wvuwe caan. Wee wvù bó nu ɛ nya mwɛem ê wvù nteen nu ɛ bó nu ke eshieele nteen ê wvù. Ɛ wee wvù bó nu ɛ gee mwɛem can ye le nteen nu ɛ bó nu ke ebife ê wvù nteen.”

Jisos to bô keŋgawsɛn

(Mat 10:34-36)

49 Ɛ Jisos bvuu gay ê boom bew bo ŋgoo le le, “Me nto keenfwɛɛ ɛ è nu ŋguy yî nshɛ le. Wee ejo ɛ wvù be beenci wase.

50 Me ŋkeŋke kfuu ŋgew wvu baay keenley wvù le, ɛ fitele fiem nu ke elɛɛten ke seke me ɛ nley wase wvù le.

51 Ben kpwaake le me nto ɛ è nu bô nyɛkeey yî nshɛ le fɛn e? Naa lo. Ben ekeè le me nto ɛ è nu bô keŋgawsɛn.

52 Ɛ kew yî keseen e, yew yî nu bonyii botin nu ke egawsɛn. Bonyii bo botɛte nu ke egawsɛn bô bo bofɛɛ, é bo bofɛɛ egawsɛn bô bo botɛte.

53 Cee wan nu ke egawsɛn bô waa we wvù diemsɛn, é wan wvù diemsɛn egawsɛn bô ice. Bwee wan nu ke egawsɛn bô waa we wvù kpwoon, é wan wvù kpwoon egawsɛn bô bwee. Bwee diemsɛn nu ke egawsɛn bô kpwɛɛ waa we, é kpwɛɛ wan egawsɛn bô bwee dweese.”

Bonyii kee kefew

(Mat 16:2-3)

54 Ɛ Jisos gay wase ɛ è nu ê kebombom ke bonyii le le, “Ben ké yene seke kembew bene je ekueku, ɛ ben mum no duu le, ‘Jaŋ nu ke egbwe.’ Ɛ yí ke mum gbwe.

55 Ɛ ben ké yen ten ɛ fwefwe ɛ banke wase ye ɛ no booke lo je ewewe, é ben mum no duu le, ‘Keŋkfum ke baay nu ke enu.’ Ɛ kí mum ke no nu.

56 Ben bonyii bò jemyi jɛy, gee jɛy ban, no ben taale ebule bô nshɛ mum kiɛ no ekfuŋ nu ke enu, ke è nulo ten é ben ekiɛ mwɛɛm mvù Nyo' duŋci yí kefew kin e nje la?

57 Ɛ ke è nulo ten é ben ekpwawce fiɛ fi leŋ fi è nulo é ben egeè le?

58 Ɛ wee jo wo ɛ no gene dvú yew nsaw e, é wo mom ɛ ben ɛ wvú seyse ɛ è bæɛ ê je, fo wvú ke egufe wo egen efese can wee wvù saake bonsaw e, é wvú efese wo can nci le é bó efen wo yew ncaw e.

59 Ɛ me ensee ê wo le ke wo nu ke ebuy dvú se wo ɛ mɛse ɛ law finyinyi ficii fi bó shieele ke.”

Luk 13

Wee tfuu ekumen fitele fiew fo wvú ke ekpwe

1 Ɛ to nu kefew kedvu le, ɛ bonyii bomew ke ne be Jisos kumte bonyii bo Galilee bomew bò to genɛ keege ncese fô Nyo' le, ɛ Baylet tum bonyii ɛ bó gen gbwoce bó, ɛ bilɛm bibole taashe bô bi nyám yì bó to gee ncese dvú.

2 Ɛ Jisos yekɛ nen, bife ê bó le, “Ben kpwaake le bonyii bodvu to kpwe kfu yiyɛ kpwe nonen njefo bibefe bibole to fele bi bonyii bo Galilee bomew e nuu?

3 Ke è nu nonen ke. Ɛ me ensee ê ben le, é ben baa ekumen mvuntelem mvunen, é ben bocii ke ekpweken ke nonen.

4 Ben kumyi bonyii bo yuufe ncaw nyaŋ bò yew yì defe ê we to kesɛ Siloam yuwye bó? Ben kpwaake le bonyii bodvu to kpwekene nonen njefo bibefe bibole to fele bi bonyii bo Jerusalem bomew e nuu?

5 Ke è nu nonen ke. Ɛ me ensee ê ben le, é ben baa ekumen mvuntelem mvunen, é ben bocii ke ekpweken ke nonen.”

Ɔgan kete kè yaa to yumte mvuntam ke

6 Ɛ Jisos mum ma ŋgan mvu ê bó le, “È to nu kefew kemew e, ɛ wee mvu yee kete kemew ê wvú wene. Ɛ kefew ke kocɛn, ɛ wvú to keekoy, faŋe yaa yen ɛ mvuntam ɛ yum yí dvú le ke.

7 Ɛ wvú mum gay ê wee wvù to taale fô wɛɛ we le le, “Taa eyen, è nu wase bilum bitete keseen no me ntoo keekoy mvuntam yí kete kin e, n'yaa yene fiɛ le yí dvú le ke. Gbwolɛ lo. Kí banji bvudvuu ecici.’

8 Ɛ wee we lemme wvudvu tfuse le, ‘Cee ekolɛ, ke bvuu cine ke dvú kelum kin, é me encɛwce kenyi kedvu engeɛ binfo fó.

⁹É è ke edioo enu kelum kè too le kí ε yum, é fí ejon, kí ε fan keeyum ee, é me emum egbwo.”

ε Jisos fe kpwoon mvu diuu di mbam e

¹⁰ε è ke no nu diuu di mbam e dimew, ε Jisos no yεeyi bonyii yew bunle mi le.

¹¹ε kpwoon mvu nu dvú ε keyoy kemew nu yî ye le, ε è nu kè ké ge ε wee tu wee gon. Kí to nu ε ge wase wvú ε cem bilum yuufe ncow nyañ jim ε ngvuse, ε è yaa nulo é wvú ebvuu eleem we teytey ke.

¹²ε Jisos yen kpwoon wvudvu le, tee wvú ε wvú to. ε wvú gay ê wvú le, “Bwεem, wo nu ε boy wase ebo jo ntun wo wvun.”

¹³No wvú gay nonen, mum neke kebo kum wvú le. Kan mwaan, ε jim ye kase nele ye, ε wvú leem we teytey, mum no tumte moñkum mo Nyo' le.

¹⁴ε cee ekole yew bunle yidvu yen no Jisos fe kpwoon wvudvu ε è to nu diuu di mbam e, ε fieε fidvu ton'ye wvú baay. ε wvú mum no saake bonyii gayte le, “Eduw ε lemme nu esooaan. Ben etoð ε bó fele bincem binen ε è nu ediuw yoya le. Fo wee ebvuu emom eto diuu di mbam e ke.”

¹⁵ε Tata tfuse ê wvú le, “Ben bonyii bò jemyi jεey, gee jεey ban. È ké dioo nu diuu di mbam e, wee saa ejo na' we kenεε kembεebey kew egen enya joo dvú?”

¹⁶Kpwoon wvun ε no nu waa Abl'am, ε Satan ε lese wase yî ncaw e bilum yuufe ncow nyañ, tu ke fí baa jee le bó ebvuse wvú yî ηgew e diuu di mbam e?”

¹⁷No Jisos jeme nonen, ε bonyii bew bo bvuban e wuunen, ε bonyii nteen no lanlanε lo fibole nje biñghaw bi mwεem e bicii bì Jisos to gee.

Ngan ekumε ηgow fintam fimew

(Mat 13:31-32; Mak 4:30-32)

¹⁸ε Jisos ne ghay le “Bvunfon bvú Nyo' le nu ke diewe la? Fieε fi è nulo é me enfewsen dvú nu la?”

¹⁹Bvú nu ke diewe ηgow fintam fimew fi wee to tfumyεε wene dvu wvú, ε yí ke buy, ku yiñ tu kete ε mvunyiim mvù bile we no yoote yî dvú le.”

Ngan ekumε fintuñλεen

(Mat 13:33)

²⁰ε wvú bvuu ne ghay le, “È nulo é me embvuu enfewsen bvunfon bvú Nyo' le bò la?”

²¹Bvú nu ke diewe fintuñλεen fi kpwoon to fewεε mvuum ê bintee bi baay baay e bitete jo fiysen dvú, tow gee, ε fí mum ge ε mvuum modvu ben.”

Diuw fwese wvu fiasaa

(Mat 7:13-14, 21-23)

²²ε Jisos ke mum ne no gene Jεlusalēm. No wvú to gene no fele ê bilaante bò ê bontεw e yεeyi bonyii.

- 23** Ɛ wee mvu nɛ bife ê wvú lɛ, “Tata, è nu kɛ bonyii caan bò nu ke eboy e?” Ɛ Jisos mum tfuse wase ê bonyii bocii lɛ,
- 24** “Ben elumtè ntay keeley ɛ è nu fô diuw fwese wɛ wvù nu fiasaa le. Ben ekeè le bonyii nteen nu ke egomte keeley yaa kɛŋke je kɛ.
- 25** Kefew nu ke ekocɛn, é cee yew eja we efaa kembuŋ. Wvú nu ke edioo ɛ faa, é ben emɛy ɛkfuŋ ekumci kembuŋ lɛke lɛ, ‘Cee ekolɛ, yene kɛ yew é bese eley.’ É wvú emum etfuse ê ben lɛ, ‘Kɛ me n'yaa ŋkee jò ben nɛ kɛ.’
- 26** É ben emum ekɛw etaŋyi lɛ, ‘È nu bese bò beene se shee diekene bvuu wukene. Ɛ wo se ghane yɛɛyi bonyii bontɛw bosɛsɛ le.’
- 27** É wvú ebvuu ekase etfuse kɛ lɛ, ‘Me nseŋe lo ê ben lɛ kɛ me n'yaa ŋkee ben kɛ. Ben enɛnɛ lo ê me ɛfwese ben bò ghane buwyi mwɛɛm ban.’
- 28** Ben nu ke eyɛn Ablam' am bô Aysik noo Yakow noo bonyii bo ntum Nyo' le bocii ente jo bvunfon bvuu Nyo' le, ɛ ben nu ɛ bó ɛ baŋ ɛkfuŋ, é ben emum ebeele ŋgeci bigew.
- 29** Bonyii nu ke enɛ biba bicii ɛ kɛw jò diuu sane ɛ gen ɛ buy jò dí seeyi noo ɛweɛwe bô ɛkuɛku jo woŋ, eto eshii ediekene ente jo bvunfon bvuu Nyo' le.
- 30** Ben ekeè le bonyii bomew bò nu ɛjim keseen nu ke enu bo fwe, ɛ bomew bò nu fwe keseen nu ke enu bo ɛjim.”

Ɛ Jisos bɛm Jɛlusalɛm

(Mat 23:37-39)

- 31** Ɛ è no nu kɛ kefew kedvu le, ɛ Bofalasii to gay ê Jisos lɛ, “Buy fiuw jan egen keba kemew e njefo Nfon 'Elod gomte keeyu wo.”
- 32** Ɛ Jisos tfuse ê bó lɛ, “Ben egen egay ê dikfuu didvu lɛ me mbvuuse bonceendaa bo dɛwle le yí bonyii le ɛben, mbvuu nfele bincɛm, ɛ è nu kɛ no me nu embuy engee ntfuu, é ke edioo enu foɛshentfuu, é me emum emɛsɛ lemme diem.
- 33** Geenen, ɛ me nu enkɛw lɛne diem di Jɛlusalɛm ɛben, embuy enlɛn ntfuu engen embuy foɛshentfuu. Kɛ fí baa kocɛn lɛ bó eyu wee ntum Nyo' bvudvuu bvumew e sɛ è nu Jɛlusalɛm kɛ.”
- 34** No Jisos jeme nɛn, mum bɛm lɛ, “Ɛbɛɛy Jɛlusalɛm! Ɛbɛɛy Jɛlusalɛm! Wo wvù yuwyi bonyii bo ntum Nyo' le, bvuu tumyi bonyii bò Nyo' tumte fô wo le bô ɛta. È nu wase bokaŋ bomɛɛ no me mom keembaancɛ boom buw kɛ diɛwɛ no bweeshie ké baancɛ boom bew kfukɛ, wo ɛ faŋ?
- 35** Taa eyɛn, yew yo nu ke etu binffuy. É me ensee ê ben lɛ kɛ ben nu ke ebvuu eyɛn me le kɛ, egen ebuy kefew kè ben ke egay lɛ, ‘Nyo' nu ɛ laŋ kembonɛn yí wee wvù too ê dieɛ di Tata le.”

Luk 14

Ɛ Jisos bvuu fe wee diuu di mbam e

¹ Ɛ è ke no nu diuu di mbam e dimew, Ɛ Jisos gen keediekɛn yew dvu wee wvu baay mvu. Ɛ wee wvudvu to nu wee Falasii. Ɛ bonyii bò to nu fó no gbwetene Jisos keeyɛn fiɛɛ fi wvú nu ege.

² È to nu Ɛ wee mvu leeme fó Ɛ Jisos ejise cɛmte bò ntun Ɛ wvú Ɛ ge wase can bò bikaɛ Ɛ mvuwkɛn.

³ Ɛ Jisos bife ê Bofalasii noo bonyii bò to looci kee bonci bo Nyo' le, bò to nu fó le, “Nci wesebeene nu Ɛ bee le è nulo é bó efe wee diuu di mbam e?”

⁴ Ɛ bó faɲe yaa tfuse fiɛɛ kɛ. Ɛ Jisos jice wee wvudvu le, fe wvú, mum gay le wvú egene.

⁵ Ɛ Jisos mum kase bife ê bonyii ba le, “É wee mvu ben e kɛɲke wan kɛɲɛ na', wvú Ɛ gbwe ê fwɛɲ diuu di mbam e, mwɛtɛn saa ebvuse lo kaɲ mwaɲ e?”

⁶ Ɛ bó ma fiɛɛ fi bó etfuse.

Wee ejoo ekolɛ kew caan

⁷ Ɛ Jisos ke taa yɛn no bonyii too cawci Ɛ è nu mondvuum mo fwe sɛ shiiyine fó, Ɛ wvú maw díew ê bó le,

⁸ “Seke bó Ɛ see wee bò ɲkaw bvujɛn, wvú Ɛ gen, fo wvú eshii Ɛ è nu fô bvudvuu bvu fwe le kɛ, njefo è nɛlo enu Ɛ bó Ɛ see tɛn wee mvu wvu baay wvù fele wvú dvú.

⁹ É cee bvujɛn wvù se sɛɲɛ bó dvú bocii ke enɛ eto emum egay ê wvú le, ‘Nɛɛ we enya bvudvuu bvun ê wee wvu baay wvun.’ É wvú emum enɛ bò kɛɲ'wuumɛn egeɲ shii wase Ɛ è nu ejim.

¹⁰ Seke bó Ɛ see wee bò ɲkaw bvujɛn, wvú Ɛ gen, shii Ɛ è nu ejim, wvu le cee bvujɛn ke enɛ eto egay lo ê wvú le, ‘Nsaa yɛm, nɛɛ we fɛn egeɲ shii Ɛ è nu fwe.’ Nonɛn, é wvú emum ekɛɲke n'wvum fwe dvu bonyii bocii fó.

¹¹ È nu kɛ lɛɲlɛɲ no wee tfuu wvù benseɛ ekolɛ kew nu Ɛ bó nu ke eshike lo wvú. Ɛ wee wvù shiwse ekolɛ kew nu Ɛ bó nu ke ebense lo wvú.”

Wee etaalè Ɛ è nu fô bonyii bo ɲgɛw e

¹² Ɛ Jisos mum nɛ kase gay ê cee yew wvù to tɛɲɛ wvú yew dvu wvú le, “Seke wo gomte keetee bonyii le bó eto ediekɛn, fo wo etee Ɛ è nu nsáa yo bò boom bo bwoo le noo kfuu diuw kɛɲɛ bonyii bo kpaw e bo ntɛw wo le kɛ. É wo tɛɲɛ boba bonyii, é bó ke ekase tɛn etee wo yéw yibole, é fí emum enu le bó nu Ɛ tfuse wase kebo kuw.

¹³ Seke wo gee ɲkaw, tee Ɛ è nu bonyii bo kefufe le, boɲkɛwle bò bontɛɲɛ noo binfefe.

14É wo ge nonen, é wo emum ekenke kembonen, njefo ke boba bonyii kenke fiεε fi è nulo é bó ekase etfuse ê wo ke. É ke enu Nyo' wvù nu ke elaw wo diuu dì bonyii bew nu ke ebuyte yî kpwe le.”

Ŋgan εkume ηkaw wvu baay

(Mat 22:1-10)

15 No Jisos jeme nonen, ε wee mvu wvù bô bó to diekene mum gay ê wvú le, “Njon wvu baay nu wvù wee wvù nu ke ediekεn εnte jo bvunfon bvu Nyo' le.”

16ε Jisos mum fe ê wvú le, “È to nu kefew kemew e, ε wee mvu seyse ηkaw wvu baay, be bonyii nteen.

17ε diuu ke to kocεn, ε wvú tum waa we lemme le wvú eghan esee ê bonyii bocii bò wvú to beε le bó etoð, le mwεεm mvunciim nu ε bó ε seyse wase.

18ε waa lemme wvudvu mum gen yen bó le, ε bó kew no camte ye mwaan mwaan. ε wee wvu fwe wvù wvú to yenεε gay ê wvú le, ‘Me nse nu ε ηguy wεε wεm wvu fwe, ε me ηkenke keεngen etaa. Kee wo, fo ben eεyτè me ke.’

19ε wvú bvuu yen wvumvu le, ε mwετεn gay le, ‘Me nse nu ε ηguy bona' bem bo lemme le yuufe, ε me ηgene keseen keemom bó. Kee wo, fo ben eεyτè me ke.’

20ε wvú yen wee mvu le, ε wvú gay fiew le, ‘Me nse nu ε ηkooy bwee yew, ε ke kefew yaa nu dvú kè è nulo é me ento ke.’

21No bó tfuse nonen, ε waa lemme wε mum tu jim gen see fiεε ficii ê cee εkolε we. ε cee ηkaw wvudvu yuw, ε fitele bente lo wvú. ε wvú mum kase tum waa we lemme wε gay le, ‘Buy cekey, egen εlaante eghan ntasen jé bô mvujetele mvunciim e, ekum bonyii bo kefufe le, bontεnε, bô binfefe noo bonkewle eto dvú.’

22ε wvú gen kase to gay le, ‘Cee εkolε, me nu ε ηge wase no wo be gay, geenεn, yew baa yiηsen ke.’

23ε cee εkolε we gay ê wvú le, ‘Buyε keseen egen ghan jé le bô mvujetele le mvunciim, ekan wa lo bonyii é bó eto, é yew yεm eyiηsen.

24 È keè le ke wee mwaan εnte jo bonyii ba bò me nse n'yawεε mbe nu ke emom lo fiεε fiem fidien ê wvú εmvu ke.”

No è nulo é wee eseyse se ley ηgoo Jisos e

(Mat 10:37-38; 5:13; Mak 9:50)

25ε Jisos bvuu nε no gene, ε bibombom bi bonyii le shfumte bii wvú le. ε wvú ke nε banke ye gay ê bó le,

26 “Kε è nulo é wee enu wee wεm ηgoo se wvú koonke me fele bwee bô ice, bvuu koonke me fele kpwεse bô boom noo boom bo bwee le bô jéme ye ke. ε wvú kenke naa ten keekoonke me fele no wvú koonke εkolε kew.

27 Kε è nulo ten é wee enu wee wεm ηgoo se wvú nu ε tuu kew kentam ε no bii me le ke.

28 È nu yee ê ben enteleŋ wvù gomte keebom yew yì defe ê we, wvù saa eyaw eshii ekpwawce le laa wen keŋke bigew e bí e kocen bì wen nu ke ebom dvù emese le?

29 È wvù baa eyaw ege nonen ŋkuuŋ é wvù ke ene elese kenffuy é yew eghaw wvù keebom. É bonyii edioo efele emum ebuu wvù gayte le,

30 'Kenene kin se nu e kew yew yí e ghaw wvù keemese.'

31 Ke leŋleŋ ten, è nu nfon wvù la wvù gomte keetum jem bô nfon mvu, wvù saa eyaw eshii fokuse ekpwawce le laa è nulo é wen bô bonyii bowene bo jem e bo bontfuke yuufe etum jem bô nfon wvumvu we bô bew bonyii bo jem e bô nu bontfuke mbaanfíe le?

32 Wvù e kpwawce e yen le fí nu ke eghaw, é wvù emum etum bonyii bew bomew é bó egen eyen nfon wvumvu we le e wvù bæe ncejole, eleke wvù le nyekēy enù ê bô wen enteleŋ.

33 Fí mum è no nu le, é wee baa ecine mwεem mwew e mvunciim, wvù saa enu wee wem ŋgoo ke.

34 Ŋkauw nu fiεe fi jee. Geenēn, é yí nelo e cife, é bó ebvuu ege nεe dvù é yí se ebvuu ekase eyeke?

35 Ke tu yí e la wase εici. E ke shíee yaa bvuu nu dvù wvù bó elese wene, kenεe yí binfo le ke. Yí nu ke wase le bó elan lo. Wee wvù keŋke bitem keeyuw e wvù yuw."

Luk 15

Ŋgan ekumε njee yì to lae

(Mat 18:10-14)

1 Bonyii bô to fii shile noo bonyii bô befe bomew to too fô Jisos e keeyeke fiεe fi wvù to yεeyi.

2 E Bofalasi bô bonyii bô to duŋci bonci bo Nyo' le kew no wvukene, gayte le, "Wee wvun fiisene bonyii bô befe bvuu diekene bô bó."

3 Nonen, e Jisos ma ŋgan wvun é bó le,

4 "È nu yee ê ben enteleŋ wvù keŋke njée gbwee, yimíaaŋ e la, é wvù ke elaame? Wvù saa eyaw ecine yi mbaŋ bvuuke ncow bvuuke le ŋkpwaante egen egomte yimíaaŋ yidvu egen ebuy seke wvù ke eyen yí le?

5 Wvù é gom e yen yí le, emum eyuuke njoŋ, etuu fô gbwew,

6 ekfuuyi dvù fô yew e. É wvù dioo e kfulε dvù, emum ekum nsáa ye bô bonyii bô cee mbew ye le gay le, 'Ben eto é beene elanlan njee yem e yí be e la, me e ŋkase e n'yen yí le.'

7 É me ensee ê ben le, è nu ke leŋleŋ no nlanlan wvu baay nu ke enu woŋ wvu we le, nje wee wvù befe mwaan wvù nu e kumen fitele fiew. Bó nu ke elanlaje

wvuwε wee fele bonyii bo mbaŋ bvuuκε ncow bvuuκε bô nu teytey yaa shieele ŋkumεn κε.

Ŋgan εkumε jise di bigew e di to laε

⁸Nuu la è nu kpwoon wvù la wvù κεηκε bigew yuufe, jise ε la fó é wvú ke elaame? Wvú saa etfuw ŋguy eyeese, eyese yew, elooce etasse egen ebuy seke wvú ke eyen e?

⁹Wvú é tasse ε yen, emum ekum nsáa ye bô bonyii bô cee mbew ye le egay la, 'Ben eto é beene elanlan jise diem di bigew e, ε dí be ε la, me ε ŋkase ε n'yen.'

¹⁰É me ensee ê ben la, è nu κε ληληη no bonceendaa bo Nyo' le lanlane nje wee wvù befe mwaan wvù nu ε kumεn fitele fiew."

Ŋgan εkumε wan wvù to laε

¹¹ Ε Jisos bvuu jeme la, "Wee mvu to κεηκε boom bolemσε bofεε.

¹²Ε wvu ejim ke mum νε gay ê wvú la, 'Icem, gawε bwem bvushew enya ê me keseen.' Nonen, ε ice mum gaw bvushew bvudvu ê bó.

¹³ Ε wan wvu ejim wvudvu fi bwew bvushew, ε è ke dioo nu ejim jo εdiuw caan, ε wvú baance bvucii gese mum laa bala woŋ wvumew e ncejole, mum gen no gbwayte bvuuκe bigew bidvu yî nce wvu εcici le.

¹⁴Ε wvú ke dioo bvuw ε bi ka, ε jeŋ yî temyi νε koo woŋ wvudvu le, ε wvú no tane fieε fidien.

¹⁵Nonen, ε wvú mum gen gom lemme fô wee mvu wvu woŋ wvudvu le keelemte wvú le. Ε wee wvudvu mum ciinse wvú la wvú egen ecεyte boŋkunyam bew.

¹⁶Ε wvú mum gen no cεyte, ε wee yaa nu dvú wvù enya wvú bô fieε fi wvú edie κε. Ε wvú mum no κεηκε shiee la wen bee edieε mwεεm mvudien mvù boŋkunyam ké no diee.

¹⁷Ε wvú ke νε kew no kpawwci mwεεm, tee bvufee bwew jim, mum gay la, 'Bonyii bo lemme le bo icem e κεηκε mwεεm mvudien nteen ε mvú ghaake bó, ε me nu fen ŋkpwee jeŋ.

¹⁸Me nu enε we, eŋgen fô icem e, eŋgay ê wvú la, "Icem, me nu ε ηγε kebefε fô Nyo' le noo fô wo le.

¹⁹Me mbaa mbvuu ŋkocεn la bó eteŋe me la waa wo κε. Joo κε wase me diewe wee wo lemme le."

²⁰Nonen, ε wvú mum νε no tuu jim fô ice le. Ε wvú ke dioo too buyte wase mbew la la, ε ice lan jise yen wvú le. Ε shen koo wvú bô wan, ε wvú ja we, lewte gen, bam wvú, bvuu ηocε.

²¹Ε wan wvudvu mum gay ê wvú la, 'Icem, me nu ε ηγε kebefε fô Nyo' le noo fô wo le. Me mbaa mbvuu ŋkocεn la bó eteŋe me la waa wo κε.'

²²Geenen, ε ice kaa tee lo bonyii bew bo lemme le gay le, 'Ben egen cekey, egom kekum naa kè jee ntay, eto etfume yî ye le, ebvuu elese fincaw yî ebo kew e noo bolaba yî bikaa biew e.

²³Ben egen ekoo waa na' wvù fañ, sεε é beene ediee lanlanye,

²⁴njefo waa wem wvun se nu ε kpwe wase ε kase ε tu dvú. Wvú se nu ε la, ε kase ε yene.' Nonen, ε bó mum kew no lanlanye.

²⁵Fieε fin to kooyi, ε wan wvu ηgaywee nu ηkpwaante. Ε wvú ke dioo kfuuyi, ke to buy mbew yew e, yuw no bine gbwee.

²⁶Ε wvú tee wee lemme mvu bife laa bó sε bine ε è nu la le.

²⁷Ε wvú tfuse ê wvú le, 'Waa bwoo nu ε tu jim eben. Nonen, icen ε sεε waa na' wvù fañ, njefo wvú be ε yen waa bwoo le ε wvú nu dvú bvuu temyi.'

²⁸Ε wvú yuw nonen ε shém kaa ton'ye lo wvú, ε wvú mum fañ keeley yew. Ε ice buy gen no booyi wvú le wvú eley ke yew.

²⁹Geenen, ε wvú tfuse ê ice le, 'Taa eyen, me nse nlemte fô wo le diewe nfwa le yî bilum bin e bicii, ε me ηke mbaa nfañ wase keenge fieε fiuw fimew ke. Wo ke baa nya wase me ke naa bô waa bie le me enlanlan dvú bee nsáa yem ke.

³⁰Waa wo wvun wvù se genεε bvuw bvushew bô bokene bo nsake le ε dioo to, wo mum ε koo lo waa na' wvù fañ ε sεε nje ye.'

³¹Ε ice tfuse ê wvú le, 'Waa wem, bee wo se nu fen sekecii, ε fieε ficii fi me ηkenke nu ke fiuw.

³²Geenen, fí be jee keelanlanye njefo waa bwoo wvun se nu ε kpwe wase, ε kase ε tu dvú, wvú se nu ε la, ε kase ε yene.'"

Luk 16

Waa lemme wvù to fiwεε kenfiw

¹Ε Jisos bvuu jeme ê boom bew bo ηgoo le le, "Wee kpaw mvu to kenke waa we lemme wvù wvú to gekεε le wvú etaale fô kpaw we le. Ε wvú ke ne yuw le waa we lemme we bvooke lo bigew biew.

²Ε wvú mum tee waa we lemme wvudvu bife ê wvú le, 'Fin fi me n'yuuke ekume wo nu la? Baance boñwa' bocii bô wo saanke kpaw wem jó eto etfuse ê me. Ke wo yaa bεε ebvuu elemte me le ke.'

³Ε waa lemme we gen shii kpawce le, 'No cee ekole wem kuunke wase me fô lemme le, me nu enge nεε? No me nu se me ηkenke mvungay keenlem bô jiw, ε me mbvuu η'wuumene keenleke elekeε.'

⁴Ε wvú mum ne kpawce le, 'Me nu ε ηkieε wase fieε fi me nu enge, wvu le seke bó ε kuñ me fô lemme le, é me enkenke nsán yì nulo efiisene me yéw yibole.'

⁵Nonen, ε wvú mum tee bonyii bò to kɛɲke fioo cee ekolε we mwaan mwaan. Ε wvu fwe to ε wvú bife ê wvú le, 'Wo laake cee ekolε wem nεε?'

⁶Ε wvú tfuse le, 'È nu bokolo bo mεem e bo baay baay gbwee.' Ε wvú gay le, 'Ko ηwa' wo fioo wvun eshii fokuse cekey, ekumen esaη le mbaanshen.'

⁷Ε wvú kase bife ê wvumvu le, 'Wo laake yo nεε?' Ε wvú tfuse le, 'È nu bikele bi εgiη e gbwee.' Ε wvú gay le, 'Ko ηwa' wo fioo wvun ekumen saη le bikele mbaηnyaη.'

⁸ Ε cee ekolε waa lemme wvun ke yen no wvú fiwse wvú nonen, kaa bense lo wvú le wvú nu ε feefen baay." Ε Jisos mum mεse le, "Bonyii bo fokuse fen feefene yî mwεem mvù bó gee le fele no bonyii bo n'yuule feefene yî mvubole mvu n'yuule.

⁹Nonen, me ε no ηgayte ê ben le, ben ejò kpwaw wene wvu fokuse fen koole nsán dvú, wvu le seke wvú ε ka, é Nyo' efiisen ben ê wvú yew fô ben nu ke enu sekecii.

¹⁰ Wee wvù nulo ekieε keetaa fô fieε fi caan e ntay, nulo ekieε keetaa ten fô fi kuuke le. Ε wee wvù fiike kenfiw yî fieε fi caan e, nulo efiw ten yî fi kuuke le.

¹¹É ben nu sε ben nulo ekieε keetaa fô kpwaw wvu fokuse fen e, é ke enya yεε ê ben kpwaw wvù kpwaw?

¹²É ben nu sε ben nulo ekieε keetaa fô fieε fi wee mvu le ntay, é ke enya yεε ê ben finen?

¹³Κε è nulo é waa lemme elemte bocee ekolε le bofεε κε. É wvú lemte nonen, é wvú ebane wvumvu, kooηke wvumvu, kenεε eyuuke wvumvu le ntay, joo wvumvu ekuse. Κε ben nulo elemte Nyo' le bvuu lemte bigew e κε."

¹⁴No Jisos jeme nonen, ε Bofalasii yuw ne no buu lo wvú, njefo bó to kooηke bigew baay.

¹⁵ Ε Jisos mum gay ê bó le, "È nu ben ban bò duηci ye le ben nu bonyii bò jee fwe dvu bonyii, geenεn ε Nyo' kee mwεem mvunciim mvù nu ê mvuntelem mvunen e. Ben ekeè le mwεem mvù bonyii bensee le è nu mwεem, nu mvù Nyo' taale ε mvú bεmte lo fô wvú le."

Nci bô bvunfon bvú Nyo' le

¹⁶Ε Jisos bvuu gay le, "È to nu fwele ε bó fewci ε è nu bonci bo Muses e bô mwεem mvù bonyii bo ntum Nyo' le to saanηke. Geenεn, ε kew no Jon to toε, nu ε bó fewci wase ε è nu saaka wvù jee wvu ekume bvunfon bvú Nyo' le. Wee tfuu ε mum ε no taanηke keeley ente jo bvunfon bvú Nyo' le bvudvu le.

¹⁷Fí nu cekey fô εbulε bô nshe le keeka, efey fo fijise fi ηwa' le ela εcici ê Nwa' bonci le.

18 Fí ε no nu le, é wee kuη kpwe, ε jo wvumvu, tu wvú nu ε ge kebefε ke diewe keejaj kpwoon mvu. Wee é jo kpwoon wvú buy wase ê wee yew, tu mweten nu ε jo kpweε wee.”

Laasalus bô wee kpaw

19ε Jisos ke bvuu ne gay le, “Wee kpaw mvu to nu dvú, suute ye bô ndvú yì jee, diee ekole kew ediuw ecii.

20ε wee kefufe mvu nu ten dvú, ε diee nu Laasalus. ε biηkoken ε kooye wvú ye yicii. ε bó to gee ε wvú no shee jiime diuw fwese wee kpaw we le,

21cεyte le laa wvú nu ke edioo ediekene é fieε eshεete ε wen boηci diee le. No wvú to jiime fó nonen, ε bwé bvuu mεese too laci biηkoken biew.

22ε è ke no nu kefew kemew e, ε wee kefufe wvudvu kpwe, ε bonceendaa bo Nyo' le to tuu wvú gen gee bvudvuu bvu njoη e mbew Ablam e. ε wee kpaw we ke kpwe ten ε bó dwey wvú.

23ε wvú gen ε è nu woη boηkfu le no nu fó yì ηgew wvu baay e. ε wvú ke ne laη jise, yen Ablam e ncejole bô Laasalus mbew ye le.

24ε wvú tee le, ‘Icem Ablam, koo shen fô me le eciinse Laasalus é wvú elese kpwan ebo kew ê joo le eto læese leme diem dvú. Me nu lo yì monlum mo baay e ηguy wvun e.’

25ε Ablam tfuse fiew le, ‘Waa wem, kume seke wo to bæε cee yì nshε le. Wo to keηke mwεem mvù jee mvunciim sekekε, ε Laasalus yene fiew ε è nu ηgew. Keseen nu ε Laasalus nu yì njoη e ε wo nu yì monlum e.

26Ke è mey ke fifin ke. È keè ten le kenseen ke baay nu ε bó ε seyse wvu le fo è nulo é wee ene fen edaηsen eto fò wo nu ke, ε è yaa nulo ten é wee ene fò wo nu edaηsen eto fen ke.’

27ε wee kpaw we bvuu lεke le, ‘Kee wo icem, ciinse ke Laasalus fô yew e fosese.

28Me ηkeηke boom bo bwεem e botin, é wvú egen etefe bó le bó eyenè fo bó ke eto ten fô bvudvuu bvu ηgew e bvun e ke.’

29 ε Ablam tfuse fiew le, ‘Boom bo bwoo le bodvu keηke boηwa' bô Muses bô bonyii bo ntum Nyo' le to saηε, bó eyuukè mwεem mvù bó gayte.’

30ε wee kpaw we tun gay le, “Aay icem Ablam, é è be buy wee mvu yì kpwe le ε gen ε fewce ê bó, é bó se yuw ekumen mvuntelem mvubole.’

31ε Ablam tfuse ê wvú le, ‘É bó tun keeyuw fieε fi Muses bô bonyii bo ntum Nyo' le gayte, bó saa ke eyuw naa lo ten fi è gayte wee wvú buy yì kpwe le ke.’”

Luk 17

N'yεεyi Jisos ekumε kebefε bô mbee noo lemme

¹Ɛ Jisos gay ê boom bew bo ηgoo le le, “Ƙε mweem mvù teeyi bonyii ε bó gee bibefe nu ke eyuu enu se mvú nu lo ƙε. Geenen, ηgew nu dvú fô wee wvù teeyi bonyii le bó egeè bibefe le.

²Fí nu ke ejee fô wvuwe wee le le bó esheηke kebwee ke diene le ê kendonj kew e, edomse wvú ê joo yi baay e, efey fo wvú egeè ε boom ban gee bibefe.

³Ben edioo nu no yenè.

É waa bwoo ge fiε fi befe, é wo jeme ê wvú. Wvú é kumen, é wo læshe nya ê wvú.

⁴É wvú cim ge mweem mvù befe fô wo le bokaη bosooshwiyy yî diuu le, ké ge kase ƙε to ku can le wen nu ε jay, tu wo ƙεηke ƙε keefoose wvú.”

⁵Ɛ boom bo Tata le bo ntum e ke ne gay ê wvú le, “Geε é mbee wese etemyi ntay.”

⁶Ɛ Tata tfuse le, “É me ensee ê ben kecεεy le, é ben be ƙεηke mbee ε wvú nu ke naa diewe shem nsusu le, tu è nulo é ben egay ê kete ke baay kin le kí emvuw ye fen egen eleem ê joo yi baay e, é kí emum eyuw lo ben e.

⁷Ben ejo le wee ηgoo yene le ƙεηke waa we lemme, wvú ε she lemte wene, ƙεεε wvú be taale ε è nu fô njée le, é wvú ke dioo ε ƙfulε, é wvú emum egay le waa we lemme wvudvu egen lo ejo mweem mvudien mwew eshii ediee le?

⁸Ƙε è nulo é fí enu nonen ƙε. Fiεε fi wvú nulo egay nu ƙε le wvú egen ekumen ndvú, eseyse mweem mvudien mvuwene eto dvú, emum ecεyte, é wen dioo ε dieken, ε wuken, é wvú ebaance mweem se gen edieken.

⁹Waa lemme wvudvu é ge mweem mvun mvunciim, é wvú ke eshe enyaa keyoone ê wvú?

¹⁰È nu ƙε læηlæη no finen nu. Ben ke dioo ε ge lemme di bó nya ê ben dí ε ka, é ben egay ƙε le, ‘Bese nu ƙε lo fisese boom bo lemme le, ε bese ge ƙε ε è nu lemme disese.”

Ɛ Jisos fe bonyii bo ntun wvu baay e yuufe

¹¹No Jisos to gene Jelusalem, no fele ê kedwee ke woη wvù Samalia bô wvù Galilee le.

¹²Ɛ wvú ke gen dioo eleyte ntew mvu le, ε bolemse bomew yuufe bô to cemte bô ntun wvu baay yen wvú le ncejole,

¹³mum tee bô diew yì temyi le, “Jisos cee bonyii, came ƙε shen fô bese le.”

¹⁴No Jisos yen bó le, gay le, “Ben egen eduηce bikuu binen ê bocee ncese.” No bó ne ε no gene mum bonen no yuule bæε ê je.

¹⁵Ɛ wee mvu ente jo bó yen le wen nu ε bonen wase, mum kase no tuu jim fô Jisos e bensee Nyo' foweewe.

16 No wvú to, mum gbwe ê Jisos ejise bæele wvú. E wee wvudvu to nu wee wvu Samalia.

17 E Jisos gay le, “Bonyii bee yuufe bò me mbe nfe bó e no yuule, bo bvuuke e fæe?”

18 Fí nu le wee baa nu dvú wvù eyen le wen ekase etu jim enya keyoone ê Nyo' efey ke tolo wvun e?”

19 E Jisos mum gay ê wvú le, “Ja we egeñè fiuw. Fitele fi wo lese yí yem e nu e ge wase wo e bonen.”

Bvunfon bvú Nyo' le bvú keseen bô bvú too

(Mat 24:23-28, 37-41)

20 E Bofalasii ke ne bife ê Jisos le laa bvunfon bvú Nyo' le nu ke ekew seke la le. E wvú tfuse le, “Ke nciise yaa nu dvú wvù nu ke eduñce seke Nyo' nu ke ekew esaake bvunfon bwew ke.

21 Ke wee yaa nu dvú wvù nu ke eduu le, ‘Ben etaa eyen, Nyo' wvun e wvú saake fen’, kenæ le, ‘Wvuwe e wvú saake fofe’ ke. Ben eyeke eyuw, bvunfon bvú Nyo' le nu ê mvuntelem mvu bonyii le.”

22 E wvú mum kase jeme wase e è nu ê boom bew bo ηgoo le le, “Kefew too lo kè ben nu ke egomte keeyen wee wvù diee nu Waawee le ke naa diuu dimwaan, saa eyen ke.

23 È nu ke enu kefew kekie le é bonyii bomew eduu le, ‘Ben etaa yen, wvuwe fofe’, kenæ le, ‘Ben etaa yen, wvuwwun fen.’ Bó dioo jemyi nonen fo ben egeñè keetaa ke.

24 Ben kee no jan ké lawte we nen mwaww, e ebuw e won yo ena ecii yuu nen mwaan, e bonyii bocii yen. È nu ke lenlen no bonyii bocii nu ke eyen wee wvù diee nu Waawee le diuu di wvú kaase too.

25 Geenen, no wvú ke egeñ, se kase eto, nu e wvú kenke keeyaw yen bongew nteen é ηgoke ke keseen kin ema lo wvú.

26 Ke lenlen no fí to nu kefew ke Noa' le nu ke no fí nu ke enu kefew ke Wee wvù diee nu Waawee le.

27 Bonyii to nu diekene, wukene, e bokene bô bolemse taashi bvujen, e bonyii nyaa boom e bolemse taashi bvujen bô bó, gen buy diuu di Noa' to leyee ê ηguw e e joo ke buy to lese bó bocii.

28 Fí nu ke enu ten lenlen no fí to nu kefew ke Lot e. Bonyii to diekene, wukene, kamene way, lemte ηee, bvuu bomte yéw.

29 E Lot ke dioo buy Sodom, e Nyo' mum shike ηguy we e wvú no shiile bæenci ke diewe mvuñkan e, shii mum lese bonyii bo Sodom bocii.

- 30** È nu ke no fí nu ke enu diuu dì wee wvù diee nu Waawee nu ke esese ebuynen e.
- 31** È nu ke edioo enu ebvubwe, fo wee wvù nu ê yew we ε mwεem mwew nu yew, ebvuu eshii eley yew le wen ejo se no lewte ke. Lεηλεη ten, fo wee wvù nu wene ebvuu ekfuuyi le wen egen ejo fiεε ke.
- 32** Ben ekume fiεε fi to kooyεε bô kpweε Lot.
- 33** Wee wvù gomte keebawci nshii we fo wvú elase nu ke elase ke lo. Ε wee wvù lase nshii we nu ε wvú bawce lo nshii wvudvu.
- 34** É me enγay ê ben le, è nu ke enu entaη jodvu, bonyii nu ke ejiime fontaw bofεε, é bó ejo mwaan é wvumvu eshεε.
- 35** Bokene bofεε nu ke egooke bvulem fodien, é bó ejo mwaan é wvumvu eshεε.
- 36** [Bolemse bofεε nu ke enu wene, é bó ejo mwaan é wvumvu eshεε.]”
- 37** Ε boom bew bo ηgoo le mum bife ê wvú le, “Tata, fiεε fidvu nu ke ekooy ε è nu fεε?” Ε wvú tfuse ε è nu ê ηgan e le, “Fô keηkpwe ke fiεε le nu, nu ke fó fò boηguluj nu etaashi.”

Luk 18

Ŋgan ekume kpweε ηkfu bô wee wvù saake bonsaw

- 1** Ε Jisos mum ma ηgan mvu keeyεyi boom bew bo ηgoo le le bó keηke keebunlee sekecii yaa doose ke.
- 2** Ε wvú gay le, “Wee wvù saake bonsaw mvu to nu ê kelaante kemew e, ε wvú yaa fane Nyo', yaa yene ten jise di wee le ke.
- 3** Ε kpweε ηkfu mvu nu ten ê kelaante kedvu le. É wvú ké no gene sekecii kule can ê wee wvù saake bonsaw we le wvú efi ke wen esumten nsaw wen bô wee wen bvuban.
- 4** Ε wee wvudvu yaa leese gvune entuηtuη ke, ε kpweε ηkfu we mey ke no cine fó. Ε fí ke ghaw, ε wee wvudvu gay le, ‘No me nu se me nfane Nyo', se me ncim n'yene jise di wee le,
- 5** geenen no kpweε ηkfu wvun too ke jewsee me nen, me nu en'yen le me nu ε nsumten nsaw we no wvú gomte, εfuw ke nonen, é wvú ke emey ke etoo jewsee me nen, é wee ke ene ekpwe lo ê wvú ebo.”
- 6** No Tata ma nonen, mum gay le, “Ben eyuw fiεε fi wee keηge ke εcici wvù saake bonsaw wvun to jemyεε.
- 7** No wvú to ficεε kpweε ηkfu we nen, tu ke Nyo' nulo efi ten bew bonyii bô wvú nu ε caw bô beele fô wvú le entaη bô emvunsheen e? È nulo é wvú ebvuu eguute lo ye?

⁸É me ensee ê ben le Nyo' nu ke esumten nsaw wvubo naa cekey. Geenɛn wee wvù diee nu Waawee nu ke edioo kaase too eyen ε bonyii nu dvú bò nu ε lese fitele yî Nyo' le fokuse fen nonen e?"

Ngan ekumε wee Falasii bô wee wvù fii shile

⁹É Jisos bvuu nε ma wvumvu ngan ε è nu ê bonyii bò to yene bikuu bibole le bowen nu bonyii bo teytey, mum nyensee lo bomew bonyii.

¹⁰É wvú gay le, "Bonyii bomew bofεε to nu ε ben gen yew ncese le keebunle. Wvumvu to nu wee Falasii, ε wvumvu nu wee wvù fii shile.

¹¹É bó gen ley, ε wee Falasii wε gen leem fiew wvú embeɲ bunle le, 'Nyo', me nyaa keyoone ê wo njefo ke me nu diewe bonyii bomew e ke. Ke me n'yεεle ejise yî mwεem e ke. Ke me nfiike kenfiw ke. Ke me njaanke bokεne bo bonyii le ke, ε ke me nu naa ke diewe wee wvù fii shile we le ke.

¹²Me ηké no mbamte mwεem mvudien εdiuw εfaa yî kema le. Me ηké no nyaa keba kemwaan ê wo ente jo biba yuufe bi mwεem mvunciim mvù me ηkeɲke le.'

¹³Geenɛn, ε wee wvù to fii shile wε leem fiew ncejole, faɲe yaa cim taa we ke, so' ekole, laɲ wem mum bunle le, 'O Nyo', me nu fiem wee wvù befe, came ke shen fô me le."

¹⁴No Jisos fe nen, mum gay le, "É me ensee ê ben le wee wvù to fii shile wε to buy no booke ê wvú yew nu teytey ê Nyo' ejise efey wee Falasii wε. Ê nu ke lenlen no wee tfuu wvù bensee ekole kew nu ε bó nu ke eshike lo wvú, ε wee tfuu wvù shiwse ekole kew, nu ε bó nu ke ebense lo wvú."

Jisos kooɲke boom bo caan caan

(Mat 19:13-15; Mak 10:13-16)

¹⁵É bonyii ke nε no too bô boom bo caan caan fô Jisos e le wvú ekum bó le. É boom bew bo ηgoo le yen nonen, no saake lo bó.

¹⁶Geenɛn, ε Jisos tee boom bodvu le bó etoò, mum jeme ê boom bew bo ηgoo le le, "Ben ecine é boom bo caan caan etoo fô me le. Fo ben ejewsè bó ke, njefo bvunfon bvú Nyo' le nu ε è nu fô bonyii diewe boban e.

¹⁷É me ensee ê ben kecεy le, é wee baa efiisen bvunfon bvú Nyo' le ke diewe wan wvu caan e, wvú saa ke eyuu eley bvunfon bvudvu le ke."

Jisos bô wee kpaw

(Mat 19:16-30; Mak 10:17-31)

¹⁸É wee wvu baay mvu bife ê Jisos le, "Wee n'yεeyi, wo wvù wee wvù jee, fiεε fî me ηkeɲke keeɲge nse ηkeɲke nshii wvù mey lo nu la?"

¹⁹É Jisos bife ê wvú le, "Wo teɲe me le wee wvù jee nje la? Ke wee nu dvú wvù jee ke. Ê nu ke Nyo' maan wvù jee.

20 Geenen, keetu jim yî fiε fi wo be bife le, wo kee ke bonci bô duu le, 'Fo wo ejaŋ kpweε wee, fo wo eyu wee, fo wo econ bvucŋ, fo wo eben jim nsaw mbiay', bô wvù le, 'È wvumtè ico bô bwoo' le?"

21 Ε wvù tfuse le, "Bonci ban bocii nu ε me nto ηkew wase no ηγεεle naa ε me mbεε cuwee."

22 Ε Jisos yuw nonen, gay ê wvù le, "Tu fiε nu ε shεε fimwaan fi wo bεε ege. Gene egeε mwεem mwuw mvunciim, egaw bigew bidvu ê bonyii bô fuute, é wo ke emum ekeŋke bvukuke ε è nu woŋ Nyo' le. É wo dioo ε ge nonen, emum eto ebii me le."

23 Ε wvù yuw nonen, ε ye keeshε lo wvù, njefo wvù to keŋke kpaw baay.

24 Ε Jisos taa wvù nen, gay le, "Fí temyi baay fô wee kpaw e keeley bvunfon bvu Nyo' le.

25 Ε fí temyi naa baay fô wee kpaw e keeley bvunfon bvu Nyo' le fele no fí temyi fô nyambala le keeley ê jise di tase le."

26 Ε bonyii bô to nu fó yuw nonen, mum bife le, "É è fen nu nonen, é ke eyuu eboy γεε?"

27 Ε Jisos tfuse le, "Ke fiε fi ghaake bonyii keege nulo eghaw Nyo' keege ke."

28 Ε Bitā gay ê wvù le, "Taa eyen, bese nu ε cine wase mwεem mvusese le, ε no bii wo le."

29 Ε Jisos tfuse ê bó le, "É me ensee ê ben keceey le ke wee yaa nu dvù wvù nu ε cine la diew e, keεε kpweε bô boom e, keεε boom bo bwεε le, keεε ice bô bwεε le nje bvunfon bvu Nyo' le,

30 wvù nu ke enu se wvù ε keŋke bonyii bô mwεem nteen yî nshii wvun e mvù fele mvù wvù cine le ke. Ε è nu ke edioo enu kefew ke nshii wvù too le, é wvù ekeŋke nshii wvù mey lo."

Ε Jisos bvuu jeme ekumε kpwe ye

(Mat 20:17-19; Mak 10:32-34)

31 Ε Jisos ke ne jo boom bew bo ηgoo le bo yuufe ncow bofεε ε bô bó base ye. Ε wvù gay ê bó le, "Ben eyeke eyuw, beene bene wase Jelusalem, ε beene nu eben ebuy jó é fiε ficii fi bonyii bo ntum Nyo' le to saŋεε ekumε wee wvù diee nu Waawee eto ekocεn.

32 Fí ε mum ε no nu le bó nu ke enya wvù can bitum e, é bó ebuu wvù, nan'yi wvù, cuyte ncεŋ yî ye le.

33 Bó nu ke etam wvù bô bongbwan, eyu wvù, é ke edioo enu εdiuw εta, é wvù ebuy yî kpwe le."

34 Ɛ Jisos jeme nonen, ɛ fí ffumse bó, ɛ bó faɲe yaa cim kɪɛ laa wvú jeme le la le, njefo fiɛɛ fimew to nu ɛ ge le fo bó ekiɛɛ ke.

Ɛ Jisos yene ɛjise kenfefe

35 Ɛ Jisos ke dioo feɲene kelaante kè Jɛliku, ɛ kenfefe kemew ɛ shii diuw je le lɛke mwɛɛm.

36 Ɛ wvú yuw no kebombom ke bonyii le kfune fele, mum bife le laa è sɛ nu la le.

37 Ɛ bó tfuse ê wvú le è nu Jisos wvu Nasalet ɛ wvú fele.

38 Ɛ wvú mum kew no wante le, “Jisos, Waa Nfon Dawe, came ke shen fô me le.”

39 Ɛ bonyii bò to saa fwe wam le wvú ebaɲ lo. Geenɛn ɛ wvú bvuu mɛse wam lo foweɛwe le, “Waa Nfon Dawe, came shen fô me le.”

40 Ɛ Jisos yuw, leem gay le bó eto bô wvú. Ɛ bó to bô wvú, ɛ Jisos bife ê wvú le,

41 “Wo gomte le me enɲe la fô wo le?” Ɛ wvú tfuse le, “Tata, gee é me en'yene mwɛɛm e.”

42 Ɛ Jisos mum gay ê wvú le, “È yenè le mwɛɛm e. Fitele fiuw fi wo lese yî yem e nu ɛ ge wase ɛjise ɛyo ɛ yene.”

43 Kaɲ mwaanɲ nonen, ɛ wvú mum kase kew no yene mwɛɛm e. Ɛ wvú mum nɛ no bii Jisos e tumte moɲkum mo Nyo' le. Ɛ bonyii bocii bò to nu fó yen, nya mbense ê Nyo'.

Luk 19

Jisos bô Sakio

1 Ɛ Jisos gen ley ê kelaante kè Jɛliku le, no fele.

2 Ɛ wee mvu to nu jó ɛ diee nu le Sakio, ɛ è nu cee ɛkole bonyii bò to fii shile, nu ten cee kpawaw.

3 Ɛ wvú no gomte keeyen Jisos e no wvú to fele. Geenɛn, ɛ fí ghaw njefo wvú to kfufene lo, ɛ kebombom ke bonyii le baɲyi wvú.

4 Ɛ wvú mum lewte gen fwe, gen ben yî kete kemew e le Jisos ke edioo efele é wen eyen wvú le.

5 Ɛ Jisos ke gen buy fó, laɲ jise yen wvú le fowe, tee le, “Sakio, shiile cekey eto, njefo me ɲkenke keence ê wo yew eɛen.”

6 Ɛ wvú mum son shii yî kete kɪe le, fiisen Jisos bô nlaɲlaɲ.

7 Ɛ bonyii bocii bò to yenɛɛ no Jisos to gene bô wvú mum kew no wvukene gayte le, “Wee wvun gene wase keegen ce bô wee wvù befe.”

8 Ɛ bó gen dīoo nu, Ɛ Sakio ke nƐ leem we gay ê Jisos lƐ, “Tata, taa eyen, me nu enƒaw mwƐem mwem entelenƒ enya ê bonyii bô fuute. Ê Ɛ nu lƐ me nƒke nu Ɛ nfiw wase wee, Ɛ me enƒkase entfuse bokaƒ bonƐw ê mweten.”

9 Ɛ Jisos yuw nonen, gay lƐ, “Eben nu Ɛ bonyii bo yew fen Ɛ boy wase, no cee la wvun nu ten waa Abl'am.

10 Wee wvù diee nu Waawee to to keegom bonyii bô nu Ɛ laken wase, eboyse bó.”

Ɖgan ƐkumƐ bigew

(Mat 25:14-30)

11 No bonyii to yeke no Jisos jemyi mwƐem mvun, Ɛ wvù ke nƐ ma nƒgan mvu ê bó, nƒfo Ɛ to shƐete wase caan Ɛ wvù eley Jelusalem, Ɛ bonyii kpwaake lƐ sekemew lƐ Ɛ shƐke wase caan Ɛ Nyo' ekew esaake bvunfon bwew.

12 Ɛ wvù gay lƐ, “Ê to nu kefew kemew e, Ɛ waa nƒon mvu nƐ wonƒ wvubole no gene wonƒ wvumew e nƒejole lƐ bó egen eghaa wvù nƒon e, Ɛ wvù sƐ kase eto esaake bvunfon bwew.

13 Ɛ wvù ke dīoo nen'yi, tee boom bew bo lemme le yuufe, gaw bigew ê bó Ɛkele Ɛkele, gay lƐ, ‘Ben eko eshƐe egeè way dvù fô me ntoo.’

14 Ɛ wvù mum nƐ, Ɛ bonyii bo wonƒ we le to bane wvù baay. Ɛ bó mum shƐe tum bonyii ê wvù Ɛjim lƐ bó egen egay lƐ ke bowen koonƒke wee wvudvu lƐ wvù enu nƒon bowen ke.

15 Ɛ bó ke gen ke ghaa wvù. Ɛ wvù ke tu jim, tee boom bew bo lemme le ba bô wvù to gawƐe bigew ê bó lƐ wen eyen laa bó se nu Ɛ shƐe Ɛ ge way Ɛ die sƐw Ɛ.

16 Ɛ wvu fwe to gay lƐ, ‘Cee ƐkolƐ, Ɛkele kuw ke bigew e kè wo to nyaƐ ê me nu Ɛ me Ɛ nshƐe Ɛ ndie sƐw jó bikele yuufe.’

17 Ɛ wvù yuw nƒon, bƐele wvù gay lƐ, ‘Wo nu waa lemme wvù jee. No wo se nu Ɛ shƐe Ɛ kieƐ keetaa fô fieƐ fi caan e ntay, me nu enƒƐe wo Ɛ wo esaakè bontƐw yuufe.’

18 Ɛ wvumvu ten to gay lƐ, ‘Cee ƐkolƐ, Ɛkele kuw ke bigew e kè wo to nyaƐ ê me nu Ɛ me Ɛ nshƐe Ɛ ndie sƐw jó bikele bitin.’

19 Ɛ wvù gay ê wvù lƐ, ‘Me nu enƒƐe wo Ɛ wo esaakè bontƐw botin.’

20 Ɛ wvumvu waa lemme to gay fiew lƐ, ‘Cee ƐkolƐ, Ɛkele kuw ke bigew e kin fen Ɛ me Ɛ nshƐe Ɛ nƒkule ê nƒaw ndvu le Ɛ nƒƐe.

21 Me nse nƒƐeke nƒfo wo temyi Ɛjim, Ɛ me nƒane wo. Wo ké nu sƐ wo nu Ɛ gƐe nƒkuuƒ, mum to no joo lo. Ê ké dīoo nu sƐ wo nu Ɛ jewe fieƐ, mum to no gbweci lo.’

22 Ɛ cee ƐkolƐ we gay ê wvù lƐ, ‘Wo nu wan wvù befe. Njeme wvù buy diuw wo le nu wvù me nu enjo ensaw wo dvù. Wo se kee lƐ me ntemyi Ɛjim, Ɛ me ndīoo nu sƐ

me ε ηγεε fiεε ηkuuη, mum nto no joo lo, ηké ndioo nu se me nu ε njewe fiεε mum nto no ηgbweci lo.

²³Wo se kee nonεn, ε se ε ge la fo wo ejo bigew biem egen egεε ntfu, wvu le seke me ε ηkase enfi bô sεw?’

²⁴Ε wvú mum gay ê bonyii bô to leeme mbew ye le le, ‘Ben efi εκελε ke bigew e kedvu ê wvú, enya ê wvù κεηke bikele bi bigew e yuufe.’

²⁵Ε bó kacε lo, gay le, ‘Cee εκολε, wvú κεηke wase bikele bi bigew e yuufe.’

²⁶ Ε wvú gay le, ‘É me ensee ê ben le wee wvù κεηke fiεε nu ε bó nu ke ebise. Geenεn ε wee wvù baa κεηke, nu ε naa fi caan fi wvú κεηke nu ε bó nu ke efi lo ê wvú.

²⁷Yî keseen e, bonyii ba bô se bane me, tune le fo me enu nfon wvubo κε, ben egen eto bô bó eyuwye ê me εjise.”

Ε bó fiεεn Jisos Jεlusalεm κε diεwε Nfon e

(Mat 21:1-11; Mak 11:1-11; Jon 12:12-19)

²⁸Εjim jodvu no Jisos to jemyεε mwεεm mvun, mum nε no saa fwe bene gene Jεlusalεm.

²⁹Ε wvú ke dioo feηene ntεw wvù Bεtfaj bô wvù Bεtani bô nu mbew Kum Bite bi Olif e, mum baa boom bew bo ηgoo le bomew bofεε tum,

³⁰gay le, “Ben egen ntεw wvu fwe we le. Ben nu ke edioo eleyte jó, eyen waa kembεεbey e ε bó ε suu ε wee ke baa ben wase yî dvú le κε, é ben efay eto dvú fen.

³¹É ben gen ε no fayte, wee ε no biite le laa ben fayte nje la le, é ben tfuse le Cee Εκολε κεηke shiee wvudvu.”

³²Ε boom bo ηgoo le ba gen yen fiεε ficii le κε ληληη no wvú to jemyεε.

³³Ε bó ke dioo fayte waa kembεεbey wvudvu, ε bonyii bô to κεηke bife le, “Ben fayte waa kembεεbey wε nje la?”

³⁴Ε bó tfuse le, “Cee Εκολε κεηke shee wvudvu.”

³⁵Ε bó mum jo to dvú fô Jisos e, yey bikum bibole yî kembεεbey kedvu le, mum bense Jisos yî dvú le.

³⁶ Ε wvú no gene, ε bonyii yeγte bikum bibole ê je, ε wvú fele yî dvú le.

³⁷Ε wvú ke gen le wen efεηene fô je booke yî Kum Bite bi Olif e, ε kebombom ke bonyii bew bo ηgoo le sεsε no wvuuyi bensee Nyo' foweεwe nje biηghaw bi mwεεm e bicii bì bó to yenεε.

³⁸ Ε bó no wvuuyi gayte le, “Nyo' nu ε laη kembonεn yî Nfon wvù too ê diee di Tata le. Nyεkeey nu fowe, ε bvukuke nu bvυ Nyo' wvu fowe le.”

³⁹ε Bofalasii bomew bò to nu ê kebombom ente mum ne gay ê Jisos le, “Wee n'yeyi, kane bonyii buw bo ηgoo le ban le bó eban lo.”

⁴⁰ ε Jisos tfuse le, “É me ensee ê ben le, é bó ecim eban lo, naa é eta eyan ewvuuyi.”

⁴¹ ε Jisos ke dīoo buy mbew Jelusalem e, taa jo nen, kese bō kpwe,

⁴² no taanke le, “O Jelusalem, é ben ban be kee ke naa fiε fi nulo eto bō nyεkeey fō ben e yī diuu di eben e. Geenεn keseen sε ben kee lo ηkuuη.

⁴³Nonεn, ben ekeè le kefew too lo kè bonyii bonεn bo bvuban e nu ke eto ebom ketaan egem ben dvú ekεεkεε, eban ben ente.

⁴⁴ Bó nu ke eley efīwse lo ben naa noo boom bonεn, ebvuw yéw yene, é tε saa eshεε yī dimew e ke. ε fī nu ke ekooy nonεn njefo ben to baa kieε kefew kè Nyo' to toε ê ben e ke.”

ε Jisos kuη bonyii bo way e fō yew ncese Nyo' le

(Mat 21:12-17; Mak 11:15-19; Jon 2:13-22)

⁴⁵ε Jisos ke gen fō yew ncese le, no kuuηke bonyii bò to geese mwεεm fō

⁴⁶ gayte ê bó le, “Fī nu ε bo ε san ε Nyo' gayte le, ‘Yew yem nu ke enu yew bunle.’ Geenεn ben ε banke ε tu ‘Tfum bocooη.’”

⁴⁷ ε Jisos no shee yeyi bonyii fō yew ncese le εdiuw εcii. ε bocee ncese bo baay baay bō bonyii bò to duηci bonci bo Nyo' le noo bonyii bo baay baay bo jó no wεentene keeyu wvú.

⁴⁸ Geenεn fanε yaa keηke je ke, njefo bonyii bocii to shee ke lo mbew Jisos e yaa gomte keesoy lo fiεε fimwaan fō mwεεm mvù wvú to yeyi le ke.

Luk 20

ε bonyii bo won e bife fō Jisos jo mvuηgay

(Mat 21:23-27; Mak 11:27-33)

¹ε è ke no nu diuu dimew ε Jisos no yeyi bonyii, bvuu fewci saaka wvù jee wvù wvu Nyo' ê bó fō yew ncese le. ε bocee ncese bo baay baay bō bonyii bò duηci bonci bo Nyo' le noo bonyii bò saake won to,

²bife ê wvú le, “Kε see ê bese wee wvù nya mvuηgay le wo egee mwεεm mvun? È nya yεε mvuηgay mvudvu ê wo?”

³ε Jisos tfuse le, “Me ten nu embife fiεε ê ben. Ben esee ê me keseen.

⁴Mvuηgay mvù Jon to leese bonyii dvú ê joo to nya Nyo' nuu wee wvu wum ε?”

⁵ε bó mum koo ntfum εbonebon le, “É beene tfuse le è to nya Nyo', é wvú ebife ê beene le laa ε è ge la fo beene ebee Jon e le?”

⁶ É beene tfuse le è to nya wee wvu wum, é bonyii etumyε beene bō eta, njefo bó nu ε bee cεy cεy le Jon to nu wee ntum Nyo'.”

⁷Nonen, ε bó mum tfuse le, “Ke bese kee wee wvù to nyaε ke.”

⁸Ε Jisos mum gay ê bó le, “Tu ke me nu ensee ten ê ben wee wvù nya mvunḡgay ê me le me enḡee mwεem mvun ke.”

Ḣgan εkumε bonyii bò bó to lesεε wene

(Mat 21:33-46; Mak 12:1-12)

⁹ Ε Jisos mum ne kew no maa ḡgan ê bonyii le, “Wee mvu to nu ε lem wεe mvuntam mvù bó keenci mbvuum dvù. Ke tεse wεe wvudvu ê bonyii, mum ne ḡen ketum kemew e, ḡen ce jó baay.

¹⁰ Ε kefew kè bó ké no kooyte ke to kocen, ε wvù tum waa we lemme le wvù eḡen efi mvuwene mvuntam. Ε wvù ḡen, ε bonyii bò wvù to tεσεε wεε ê bó, kaa suḡ lo wvù kuḡ ε wvù tu jim cancan.

¹¹Ε wee wvudvu bvuu tum wvumvu waa lemme, ε bó bvuu suḡ wvuwe, shoose wvù, kuḡ ε wvù tu jim cancan.

¹²Ε wvù bvuu tum wvumvu le botete, ε bó lemse wvù, tfume ekfuḡ.

¹³ Ε wee wvudvu kpawce le, ‘Me nu enḡe neε? Me nu ntum wase keseen ε è nu waa wem wvù nu fitele fiem. Sekemew é bó eḡen ewvum wvù.’

¹⁴Ε wan we ḡen ley wene, ε bonyii ba bò bó to tεσεε wεε ê bó yen wvù le, tfumtfum εbonebon le, ‘Wvun nu ndiela wee wεε wvun. Beene eyu wvù emum eyow wεε wvun.’

¹⁵Ε bó mum koo wvù, bvuse wene, yu.” No Jisos fe nonen, mum bife le, “Ben kpwaake le wee wεε wvudvu nu ke eto eḡe neε bô bonyii ba?

¹⁶ É me ensee ê ben le wvù nu ke eto elese lo bonyii bodvu, etese wεε wvudvu ε è nu wase ê bonyii bomew.” No bonyii yuw nonen, kace lo le, “Nyo' elewsè.”

¹⁷ Ε Jisos taa bó nen, bife le, “Tu fiεε fin fi bó saḡ ê Ḣwa' Nyo' le jemyi le la, fi nu le, ‘Te didvu die di bonyii bo kembom e to tunεε, to nu ε kase ne tu te di buu di yew e?’

¹⁸ Ε te didvu din nu, é wee gbwe yî dvù le ecaafie lo, é dí gbwe yî wee le, é mweten efoonce lo.”

Mbife εkumε shile

(Mat 22:15-22; Mak 12:13-17)

¹⁹ No Jisos ma ḡgan wvudvu nonen, ε bonyii bò to duḡci bonci bo Nyo' le bô bocee ncese bo baay baay mum no gomte le bó ekoo wvù ke fó. Bó to gomte keekoo wvù njefo bó to nu ε kieε le wvù ma ḡgan wvudvu ε è nu ê bó, geenen fan bonyii.

²⁰ Ε bó mum no bii bikaε biew e, kew bonyii, tum ε bó ḡen no keele wvù buwse le bó nu bonyii bò jee. Ε bó to gee nonen keeyuw fiεε diuw we le emum ekoo wvù enya can wee wvu Lum wvù saake keba kekie le.

21 Ɛ bonyii bodvu mum ne bife ê wvú le, “Wee n'yeyi, bese kee le mwem mvù wo jemyi noo mvù wo yeyi nu mvu leŋ, ɛ ke wo taale jise di wee le ke. Wo ké no yeyi kecey ɛ è nu fiɛ fi Nyo' gomte le bonyii egeè.

22 Bese ɛ mum ɛ no biite le laa nci nu ɛ bee le beene elaanke shile ê Kaysa Nfon wvu Lum ɛ?”

23 Ɛ Jisos kieɛ fiɛ fi bó wɛntene bô fí gay le,

24 “Ben ke eto bô danali mwaan é me en'yen.” Ɛ bó to dvú ɛ wvú bife le, “Ɛkole kin kè nu yí dvú le nu ke yee le, ɛ diee din nu di yee le?” Ɛ bó tfuse le, “È nu ke Kaysa le, ɛ diee nu ke ten diew.”

25 Ɛ Jisos mum gay le, “Ben emum enyaà le ê Kaysa fiɛ fi è nu fi Kaysa le, enyaà ê Nyo' fi è nu fi Nyo' le.”

26 Ɛ bonyii ba yuw ɛ fí ffumse bó, ɛ bó mey diuw tfu faŋe yaa keŋke fiɛ fi bó ekoo wvú yí dvú le ê bonyii ejise ente jo mwem mvù wvú to jemyi le ke.

Mbife ekumɛ mbuy wvu yí kpwe le

(Mat 22:23-33; Mak 12:18-27)

27 Ɛ bonyii bomew ŋgoo Bosadusii le ke ne to keebife fiɛ ê Jisos. Bosadusii ban to nu bonyii bô to duu le ke bonyii nu ke ekase ebuy yí kpwe le ke.

28 Ɛ bó to bife ê wvú le, “Wee n'yeyi, Muses to nu ɛ saŋ ê nci wesebeene le le, ‘É wee keŋke kpwoon ɛ ke ɛ kpwe se bô wvú nu ɛ boo wan, tu waa bwee keŋke keegɛ kpwoon wvudvu é bô wvú eboo boom ê diee di ŋkfu waa bwee le.’

29 Keseen, boom bo wee mvu le to nu bosooshwi, ɛ wvu ŋgaywee ke keŋke kpwoon, ke kpwe se bô wvú ɛ keŋke wan.

30 Ɛ ejime kew gɛɛ kpwoon wvudvu, ke kpwe ten se wan.

31 Ɛ ejime ke wvuwe le bvuu gɛɛ ten kpwoon wvudvu, ke kpwe ten se wan. Ɛ fí ke kooy ke nonen bô boom bo bosooshwi bodvu bocii, ɛ mvu bó le faŋe yaa boo wan bô kpwoon wvudvu ke.

32 Ɛjim jodvu ɛ kpwoon wvudvu kpwe ten.

33 No bonyii bo bosooshwi bodvu to nu ɛ jo kpwoon wvudvu bocii, è nu ke enu seke bonyii kaase buyte yí kpwe le, é wvú enu kpweɛ yee?”

34 Ɛ Jisos tfuse le, “Yí won wvu keseen e nu ɛ bolemse bô bokene taashi bvujen.

35 Geenen, ɛ bonyii bô nu ɛ kocen keeke ekeŋke bvudvuu yí won wvù too le seke bó ɛ kase ɛ buy yí kpwe le yaa nu ke etaashi bvujen ke, ɛ bonyii yaa bee ke enyaa boom ɛ bó taashi bvujen ke.

³⁶Κε bó bæε ke ebvuu ekpweken κε, njefo bó nu ke enu wase κε diewe bonceendaa bo Nyo' le. Bó nu ke enu wase boom bo Nyo' le, njefo bó nu ε kase wase ε buy yî kpwe le.

³⁷Κεεεy kedvu nu le Muses kebæε to nu ε yuuse le bonyii nu ke ekase ebuy yî kpwe le no wvú to saηεε ekumε kete kè wvú to yeηεε ε kí bæenci. Wvú teηε Tata ê bvudvuu bvυ ηwa' le bvudvu le wvú nu Nyo' Abla'am, nu Nyo' Aysik bvuu nu Nyo' Yakow.

³⁸É wvú teηε nonen, tu boηkfu ban nu bonyii ε bó nu dvú, κε Nyo' nu Nyo' boηkfu κε, è nu Nyo' bonyii bò nu dvú, njefo fô Nyo' le nu ε bonyii bocii nu boyuum.”

³⁹No Jisos jeme nonen ε bonyii bò to duηci bonci bo Nyo' le bense wvú gay le, “Wee n'yæeyi, wo nu ε looce ε tfuse leη.”

⁴⁰Κε nonen, ε wee faηε yaa ebvuu emom lo ebife fiεε ê wvú κε.

Mboyse wvù Nyo' to kawεε nu waa yεε

(Mat 22:41-46; Mak 12:35-37)

⁴¹Ε Jisos mum ne bife fiew ê bó le, “Bonyii ghan neε ε se no gayte le Mboyse wvù Nyo' to kawεε nu waa Nfon Dawe?

⁴²Κε ben kee le Dawe kebæε to nu ε saη ε Nwa' Mbense le le, ‘Tata Nyo' to nu ε gay ê Tata wem le wvú eshii ê ebo kew ke εεεy e,

⁴³egen ebuy seke wen ke ejike bonyii bew bo bvuban e

é wvú etome bikaa biew yî bó le diewe kedvuushεε ke bikaa biew e.’

⁴⁴É Dawe teηε wvú le Tata wen, é wvú ebvuu eghan neε se no nu waa we?”

Ε Jisos gay le bonyii eyenè ekumε bonyii bò duηci bonci

(Mat 23:1-36; Mak 12:38-40)

⁴⁵Ε Jisos mum ne no jemyi wase ε è nu ê boom bew bo ηgoo le ε bonyii bocii yuuke. Wvú to nu ε gay ê bó le,

⁴⁶“Ben eyenè ekumε bonyii bò duηci bonci bo Nyo' le. Bó kooηke keetfumyi bikum bì dewkene kale dvú, kooηke le bó egayte bó le ê way bô n'wvum. Ε bó bvuu kooηke keeshiile yî bintaw bi fwe le yéw bunle le. É bó ké egen fô ηkaw e, no kooηke κε keeshii ε è nu fwe.

⁴⁷Ε è bvuu nu κε bó bò shiwse bokε' bo boηkfu le, læεle bó fii mwεem mvubole, mum gee dibunle di dewkene keeduηci ye. Bonyii bodvu ban nu ε wvubo ηgew nu ke efo lo.”

Luk 21

Nnya kpweε ηkfu wvù wee kefufe

(Mak 12:41-44)

¹ E Jisos ke nɛ laŋ jise, yen no bonyii bo kpawaw e gɛele nnya yibo ê fiŋkuw fi nnya le fô yew ncese le.

² E wvú yen tɛn kpawɛ ɲkfu mvu le e è nu wee kefufe, e wvú e to e gɛɛ mvunyinyi mvunfɛɛm ê fiŋkuw fidvu le.

³ E wvú mum gay le, “É me ensee ê ben keceey le kpawɛ ɲkfu wvun wvù nu naa wee kefufe nɛn, nu e nya e fey bonyii bocii bò be nyaa.

⁴ Bonyii bocii bò be nyaa, be too e è nu bô tfúw kpawaw wvubo wvù nu e yiŋsen wase e no fuci kuse. Geenen e kpwoon wvun no wvú nu kefufe kefufe nɛn nu e wvú e nya naa fiɛɛ ficii fi wvú bee keecee yî dvú le.”

E Jisos see le bó nu ke ebvuw yew ncese

(Mat 24:1-2; Mak 13:1-2)

⁵ E boom bo Jisos e bo ɲgoo le bomew ke nɛ no kumte etale ekumɛ yew ncese, bensee eta yò jee yò bó to bomɛ dvú bô mwɛɛm mvù bonyii to nyaa e bó seyse dvú. E wvú gay ê bó le,

⁶ “Ben yene mwɛɛm mvun e? Diuu too lo dî ke tɛ dimwaan nu ke eshɛɛ yî dimew e sɛ bó e base fokuse ke.”

Bɔŋɛw bô bvuban

(Mat 24:3-14; Mak 13:3-13)

⁷ E bó bife le, “Wee N'yɛɛyi, fiŋ fiɛɛ nu ke ekooy seke la? E nciise wvù nu ke eduŋɛ le fí nu wase keekooy nu la?”

⁸ E Jisos tfuse le, “Ben eyenè fo wee ke elɛɛ ben é ben ejay je. Ben ekeè le bonyii nu ke etoo nteen, joo diee diem tɛɛke fojise, e wee duu le, è nu wen wvù Mboyse, e kefew too wase ncee. Bó dioo duu nonɛn, fo ben eyekè ke.

⁹ Seke ben e yuw e bó tumte jem mondvuum e mondvuum e, e bɔŋɛw nu woŋ e, fo ben efanè ke. Mwɛɛm mvun keŋke ke keeyaw ekooy. Geenen, e mvú yaa mum duŋci le woŋ nu eka sekedvu ke.”

¹⁰ E Jisos bvuu gay ê bó le, “Ketum nu ke etumte jem bô kemew, e nfon mvu tumte jem bô wvumvu.

¹¹ Biŋghaw bi mwɛɛm e nu ke ekooyi mondvuum e mondvuum e. Nshe nu ke eshiike bô mvuŋgay. Jeŋ nu ke ekoole, e bincɛm nu ke enu mondvuum e monciim. Bonciise bò bɛmte nu ke eduŋci ye yî ebule le nyaa nfan ê bonyii.

¹² Ben ekeè le é mwɛɛm mvudvu sɛ keeke ekooyi nu e bó nu ke ekooye ben, enyɛwle dvú. Bó nu ke egen bô ben, esaw yéw bunle le, eciinse ben yéw ncaw e. E bó nu ke ebvuu ejo ben egen dvú fwe dvu bonfon bô bonyii bò saake woŋ nje diee diem,

¹³ É sekekɛ emum enu kefew fô ben e keejeme ê bó ekumɛ me.

14 Seke bó ε jo ben nonen, ε ben lese lo le ke ben nu ebuuke le laa ben nu egen etaje diuw le la le,

15njefo è nu me wvù nu ke enya njeme diuw wene le, noo bvufee ê ben. Ke bonyii bonen bo bvuban e yaa nu ke eleem, ekicen ben ke.

16 Bonyii bò nu ke egese ben nu ke enu ke bo'icee bonen bô bo bwee bonen, noo boom bo bwee wene le, noo kfuu dinen bô nsáa yene. Ê nu ke enya ke bó ben é bó se yuwye ben bomew.

17Bonyii bocii nu ke ebane ben, nje diee diem.

18 Geenen, naa ke yvuw yimiaaη nu ke ela ê ben efa ke.

19 Ben ekuu ke ε è nu shém, é ben ke emum ekeηke nshii.

ε Jisos see le bô nu ke efiwse Jelusalem

(Mat 24:15-21; Mak 13:14-19)

20 Seke ben ε yen ε bonyii bo jem e ε gem wase kelaante kè Jelusalem ε tase, ε ben mum no kee le kefew nu ε kocen wase kè bó nu ke efiwse kí.

21Fí ke dīoo ε kooy nonen, ε bonyii bò nu Judea mum fεε ben yí dikum e, ε bò nu elaante jodvu buy. Fo wee wvù nu ηkpwaante ebvuu etoò keeley jó ke.

22 Ediuw yoya nu yò Nyo' nu ke elañ ηgew yí Jelusalem e nje gee dibole, keege é fí eto ekocen no bó nu ε saη ê Nwa' we le.

23Ngew wvu baay ediuw yoya le nu ke enu wvu bokene bò nu bô difue, noo bò yamsee boom e. Nyo' nu ke eton'ye shém bô bonyii ban, elañ ηgew wvu baay yí woη wvun e.

24Bó nu ke egbwocε lo bonyii bomew, ekooyε bomew egawcε é bó egen enu bonfaw bitum e. Bonyii bò yaa kee ke Nyo' nu ke eben lo yí Jelusalem e, egen ebuy no kefew kebole nu ke ekocen.

ε Jisos see bonciise bò nu ke enu seke wvú kaase too

(Mat 24:29-35; Mak 13:24-31)

25 Bonciise bò bemte nu ke eduηci ye yí diuu le bô yí kpwee le noo yí jón e. Fí yí nshε le nu ε bitum nu ke enu yí monlum e, ηgemtene no joo yi baay nu ke ekfune yole.

26Nfan nu ke ege é bonyii egule, ciηke nen kikikiki. Bó nu ke ekpwaake mwεem mvù bemte mvù nu ke ekooy yí nshε le, njefo mwεem mvu fowe mvunciim mvù keηke mvuηgay nu ke eshiike.

27Nonen é bonyii emum eyen no wee wvù diee nu Waawee shiile too ê kembew e keηke mvuηgay noo bvukuke bvū baay.

28Seke mwεem mvun ε kew ε no kooyi, ε ben leem we, cake bikuu we, njefo kefew kè Nyo' nu eboyse ben nu wase nceencee.”

- 29**No Jisos jeme nonen, mum fewsen le, “Ben eyeyi fiε yî kenɣvum bô bite bimew bi ké yeε le.
- 30**Bí ké keεke keecomte, ε ben mum kiε le ekfuɲ kumene wase.
- 31**È nu ke leɲleɲ no ben nu ke edioo ε yen ε mwεem mvun kooyi, é ben emum ekiε le bvunfon bvu Nyo' le nu wase nceencee.
- 32**É me ensee ê ben keceey le ke eɲgokε ke keseen kin nu ke eka sε mwεem mvun mvunciim ε jo bvudvuu ke.
- 33**Ebule bô nshe nu ke eka, geenen ke diεw yem nu ke eyuu eshiw ke.
- 34**Ben eyenè fo ben eghanè diee ε è nu bikuu binen, wukene jewte, leese bvufee ε è nu yî nshii wvu fokuse fen e, é diuu didvu ke ene esεε ekoo ben ke diεwε ketam e.
- 35**Fiε fi yî diuu didvu din e nu ke eto yî bonyii bocii bô nu yî ekole ke nshe le.
- 36**Ben emum eleemè temyi, ebunleè Nyo' sekecii, wvu le mvumvun mwεem ke edioo ekooyi, é wvú enya ben bô je yî ben elεw efey jó sε leem fwe dvu wee wvù diee nu Waawee.”
- 37** E Jisos mum no shee yeeyi bonyii yew ncese le εdiuw yoya le εcii. É ké dioo nu fokieɲuu, ε wvú ben gen ce yî Kum Bite bi Olif e.
- 38**É bonyii bocii ké buy saa bvutfuu mum gen fô yew ncese le no yuuke n'yeeyi we.

Luk 22

ε Judas bee keegese Jisos (Mat 26:1-5, 14-16; Mak 14:1-2, 10-11)

- 1** E kefew ke ɲkaw Blæd wvù bó baa gεε Fintuɲleεn jó, wvù bó teje le ɲkaw Daɲefey e, ke no too wase nceencee.
- 2** E bocee ncese bo baay baay bô bonyii bô to duɲci bonci bo Nyo' le, no gomte je yî bó eyu Jisos jó ε è nu ê nnyile le, njefo bó to fane bonyii.
- 3** E Satan ley ê fitele fi Judas wvù bó to teje le Iskaliot e, ε è nu wee ɲgoo boom bo Jisos e bo yuufe ncow bofεε.
- 4** E wvú mum gen fô bocee ncese bo baay baay e bô bikuu bi nci le bi to ceyte yew ncese. E bô bó mum seyse no wvú nu ke eghan sε gese Jisos ê bó.
- 5** E bó yuw njoɲ mum kaw keelaw wvù bô bigew.
- 6** E wvú bee, mum gen kew no gomte je yî wvú nu enya Jisos jó can yibole ê nnyile le seke bonyii yaa nu ke.

Nseyse ɲkaw Daɲefey (Mat 26:17-25; Mak 14:12-21)

7 Ɛ diuu di Nkaw Blɛɛd wvù bó baa gɛɛ Fintuŋlɛɛn jó dì bó ké no sɛɛle waa keyaw wvu Nkaw Daŋɛfey wvun e ke to kocɛn,

8 Ɛ Jisos mum tum Bitá bô Jon gay lɛ, “Ben egen eseyse mwɛɛm mvù beene nu ke edie Nkaw wvun dvú.”

9 Ɛ bó bife ê wvú lɛ, “Wo gomte lɛ bese egen eseyse ɛ è nu fɛɛ?”

10 Ɛ wvú tfuse lɛ, “Ben eyuw, seke ben leyte gene elaanɛ, ben nu ke eyen wee le ɛ wvú ɛ tuu joo ê nshaan e, é ben ebi wvú le yew dvù wvú nu egen eley e.

11 Ben dioo ɛ bi, gay ê cee yew wvudvu lɛ Wee N'yɛɛyi biite lɛ laa kebuw ke bonyii bo ghane le kè bô boom bowene bo ŋgoo le nu edie Nkaw Daŋɛfey dvú nu fɛɛ lɛ?

12 Wvú nu ke emum eduŋɛ kebuw ke baay yew yi ɛwe le ɛ bó ɛ loocɛ wase ɛ seyse, é ben emum eseyse mwɛɛm mvudien dvú.”

13 Nonɛn, ɛ bó ke gen yen mwɛɛm e ke lɛŋlɛŋ no Jisos to jemyɛɛ ê bó. Ɛ bó mum seyse mwɛɛm mvudien mvu Nkaw Daŋɛfey e dvú.

Ɛ Jisos bô boom bew die ntaashɛ

(Mat 26:26-30; Mak 14:22-26)

14 Ɛ kefew ke to kocɛn, ɛ Jisos to ɛ bô boom bew bo ntum e shii no diekene.

15 Ɛ wvú nɛ gay ê bó lɛ, “Me nse ŋkooŋke naa baay keendie Nkaw Daŋɛfey wvun beene nɛ n'yɛn ŋɛw wvù too le.

16 Ben ekeè lɛ ke me mbɛɛ ŋke endie Nkaw wvun ke eŋgen ebuy no fí nu ke ekocɛn seke Nyo' nu ke esaake bvunfon bwew.”

17 Ɛ wvú jo fiko, nya keyoone ê Nyo' gay lɛ, “Ben eko ewu ben bocii ekɛnɛn.

18 Me nseŋe lo ê ben lɛ ɛ kɛw keseen ɛ gen lo, nu ɛ ke me mbɛɛ ŋke embvuu eŋ'wu mbvuum mo tweŋ kete kè lane le man kɛ, egen ebuy seke bvunfon bvú Nyo' le nu ke eto.”

19 Ɛ wvú jo blɛɛd, nya keyoone ê Nyo', guushɛ nya ê bó gay lɛ, “Fin nu ye yɛm ɛ me ɛ nya nje ben. Ben egeè fifin keekumyi me.”

20 Kɛ lɛŋ nonɛn no bó mɛsɛɛ mwɛɛm mvudien, ɛ wvú jo fiko jeme lɛ, “Fiko fin nu fi moŋkan mo monfɛm mò Nyo' gbwo bô elɛmɛ kem kí ɛ buy nje ben.

21 Geenɛn, ben eyeke eyuw wee wvù nu egese me diekene fɛn bee wvú.

22 Ben ekeè lɛ wee wvù dieɛ nu Waawee nu ke egen kɛ no Nyo' to seysɛɛ. Geenɛn, ŋɛw wvu baay nu fô wee wvù gese wvú le.”

23 Ɛ bó mum kɛw no biite ê bikuu bibole lɛ laa wee wvù nulo ege nonɛn ê bó entelɛŋ nu yeɛ lɛ.

Ɛ Jisos yɛɛyi no bonyii bew kɛŋke keejò bikuu bibole

24 Ɛ bó ke ne kew mbew ebonebon le laa bó se nu nen ɛ wee wvu baay ê bó entelen nu yee le?

25 Ɛ Jisos gay ê bó le, “Bonfon bo fokuse fen kenke mvungay ê we jo bonyii bobole, ɛ bonyii bò saake won gayte le bó etenè bowen le bibaw bi bonyii le.

26 Geenɛn, ke è nulo é fí enu nonen bô ben ke. Wee wvu baay ê ben entelen ejò le wen nu wan wvu caan, ɛ wee wvù nu ekole nu diewe wee wvù lemte fô ben bocii le.

27 Wee wvu baay nu wvù la, wee wvù yeeme diekene lo, nuu wee wvù deele le? Ke è nu wee wvù yeeme diekene lo le? Geenɛn ɛ me nu ê ben entelen diewe wee wvù lemte fô ben e.

28 No me nshee n'yene bonɣew sekecii, è nu ke ben ban bò ké no nu beene.

29 Fí mum è no nu le, ke lenlen no Icɛm nu ɛ nya me bô bvunfon le me ensaake, nu ɛ me ɛ nya ten mvungay ê ben keesaake.

30 Me nya wvu le beene ke ediekene, wukene bvudvuu bvumwaan ê ntow wɛm e, é ben eshii yî bokawla le, esaake dikfuu di Islael di yuufe ncow difee.”

Ɛ Jisos see le Bita nu ke ema wen

(Mat 26:31-35; Mak 14:27-31; Jon 13:35-38)

31 Ɛ Jisos mum ja tee Bita le, “Semon, Semon è keè le Satan nu ɛ fi mvungay keecɛken ben bocii ebvuse bomew ke diewe no wee ké fɛeten egij bvuse nyiim.

32 Geenɛn me nu ɛ mbunle fô wo le, le fo fitele fiuw emum ebuy lo yî yɛm e ke. Seke wo ɛ kase ɛ tee bvufee bvuw jim, ɛ wo nya mvungay ê boom bo bwoo le.”

33 Ɛ Bita gay le, “Tata, é è cim nu keegen ncaw kenɛe keekpwe lo, tu me nu ke bee wo.”

34 Ɛ Jisos tfuse ê wvù le, “Bita, yuw é me ensee ê wo, nyimshie nu ke enu le yí eton eben, ɛ wo ɛ ma wase bokaŋ botete le ke wo kee me ke.”

Ɛ Jisos tefe no boom bew bo ngoo le eseyse mvuntelem

35 Ɛ wvù ne bife ê bó le, “Ben kumyi seke me nto ntumɛ ben se bigew, se bikele noo se bolaba, no ben to ghane, ben to nu ɛ tan fie le?” Ɛ bó tfuse le, “Aay, bese to baa tan fie ke.”

36 Ɛ wvù mum gay ê bó le, “Yî keseen e, é wee kenke bigew, kenɛe ekɛle, é wvù jo. É wee baa kenke nyo jem, é wvù gese kekum kew guy nyo.

37 Me njemyi fin njefo fie fi bó to saɣɛ ê Nwa' Nyo' le le, ‘Bó to nu ɛ taŋ wvù bô bonyii bò befe’, kenke keekooy bô me keseen. Ben ekeè le mwɛem mvù bó to saɣɛ ekumɛ me nu ɛ mvù too wase keekocɛn mvunciim.”

38 Ɛ bó mum sɛsɛ le, “Cee ekole, bese kenke nyó jem yifieɛ.” Ɛ wvù tfuse le, “Ben elu dvù nonen.”

Ɛ Jisos bunle yî Kum Bite bi Olif e

(Mat 26:36-46; Mak 14:32-42)

39 Ɛ Jisos ke nɛ buy ɛlaante bô boom bew bo ŋgoo le, mum kɛw no bene Kum Bite bi Olif e, ɛ è nu no wvú to ké no gee.

40 Ɛ bó ke ben buy fô bó to gene, ɛ wvú gay ê bó le, “Ben ebunleè fo mmom ke eto fô ben e, eghaw ben.”

41 No wvú gay nonɛn, mum bence gen buy kɛ no è nulo é wee etfume tɛ é dí egen ebuy, mum tum envuw fokuse bunle le,

42 “Icɛm, é fí fɛn nu ɛ kpwen wo le, é wo cake fiko fi ŋgɛw e fin fo me eŋ'wu. Geenɛn gee kɛ no wo kooŋke, fo wo ege no me ŋkooŋke kɛ.”

[43 No wvú bunle nonɛn, ɛ nceendaa Nyo' shii we to fô wvú le, nya wvú bô mvuŋgay.

44 Ɛ Jisos nu, ɛ fitele fiew buuke baay. Ɛ wvú bvuu bunle lo shiee le jimtene, ɛ njimtɛn cemceme fokuse kɛ diɛwɛ bitewtew bi ɛlɛmɛ le.]

45 Ɛ wvú bunle mɛse, tu jim fô boom bew bo ŋgoo le, yɛn ɛ yii ɛ ge wase bó ɛ dose ɛ no leete.

46 Ɛ wvú bife ê bó le, “Ben kaa leete lo le? Ben eja we ebunleè fo mmom ke eto fô ben e, eghaw ben.”

Ɛ bonyii bo woŋ e koo Jisos

(Mat 26:47-56; Mak 14:43-50; Jon 18:3-11)

47 Kɛ no wvú to bæe jemyi, ɛ ŋgoo bonyii buynɛn ɛ è kaa nu Judas wvù to nu wee ŋgoo boom bo Jisos e bo yuufe ncow bofɛɛ wvù to saa fwe wvudvu. Ɛ wvú gen mbew Jisos e keeŋocɛ wvú.

48 Geenɛn, ɛ Jisos bife ê Judas le, “Wo fɛn gomte keeŋocɛ wee wvù diee nu Waawee nɛn keeduŋcɛ le bó ekoo le?”

49 Ɛ boom bew bo ŋgoo le bô to nu mbew ye le yɛn fiɛɛ fi to nu keekooy e, bife le, “Cee ɛkolɛ, bese egbwoɛ bonyii ban e?”

50 Ɛ wee mvu bó le dioo gbwoo, mum cun kentuŋtuŋ ke ɛcɛɛy ke nƚwa ɛkolɛ ke bocee ncese le.

51 Ɛ Jisos kan le, “Fo wee ebvuu emom kɛ,” mum kum kentuŋtuŋ ke wee wvudvu le ɛ kí mum kase tu fô.

52 Bonyii bô to toɛ keekoo Jisos to nu bocee ncese bo baay baay bô bikuu bi nci le bì to cɛyte yew ncese noo bonyii bô saake woŋ. Ɛ wvú bife ê bó le, “Ben to keekoo me ɛ no too bô nyó noo bibuse kɛ diɛwɛ ben to keekoo ɛ è nu cooŋ e?”

53 Me nse nu beene no diuu nu fô yew ncese le sɛ ben ekum me le nje la? Geenen, keseen nu kefew ke mvuŋgay mvu ejiwɛ le kè Satan ké no saake, ɛ è nu kè è nulo é ben ege fiɛɛ.”

ɛ Bitá ma Jisos

(Mat 26:57-58, 69-75; Mak 14:53-54, 66-72; Jon 18:12-18, 25-27)

54 ɛ bonyii bodvu mum koo Jisos no gene bô wvú fô la di ekole ke bocee ncese le, ɛ Bitá bii ejim ntamndwee.

55 ɛ bó gen fwɛɛ ŋguy fontelɛŋ fo lakfulɛɛŋ shii no yosene. ɛ Bitá mum to shii bô bó.

56 No ŋguy to bæenci, ɛ wan kpwoon mvu wvù to lemte fô la didvu le ja yen Bitá le ɛ wvú ɛ shii. ɛ wvú taa wvú fojise ntay gay le, “Wee wvun bee bô wee wvudvu.”

57 ɛ Bitá mum kacɛ lo gay le, “Kpwoon wvun, ke me n'yaa ŋkee wee wvun ke.”

58 ɛ kefew dioo bence caan, ɛ wee mvu bvuu yen wvú le, bvuu gay le, “Wo ten nu mvu ŋgoo yibole.” Geenen ɛ Bitá gay le, “Diemsɛn, ke me nu mvu bó le ke.”

59 ɛ kefew bvuu gen buy ke diɛwɛ ntam kefew mwaan e, ɛ wee mvu bvuu taam le, “Kecɛɛy, kecɛɛy wee wvun bee bô wee wvudvu, njefo wvú nu ten wee wvu Galilee.”

60 ɛ Bitá bvuu tun gay le, “Diemsɛn wvun, ke me n'yaa ŋkee fiɛɛ fi wo jemyi ke.” Ke no wvú to bæe jemyi nonɛn, kaŋ mwaan ɛ nyimshie mum toŋ.

61 ɛ Tata banke ye ɛ ejise eye tasɛn bô yo Bitá. ɛ Bitá kume njeme wvù Jisos be jeme le, “Nyimshie ke enu le yí etoŋ ɛben, ɛ wo ɛ ma wase me bokaŋ botɛte.”

62 ɛ wvú nɛ fó buy ekfuŋ, bee kpwe baay.

ɛ bó no keɛŋke bvuu suuŋke Jisos

(Mat 26:67-68; Mak 14:65)

63 ɛ bonyii bò to jici Jisos e mum kaw no keɛŋke bvuu suuŋke wvú,

64 sùm bvushiw bwew bô ndvu, gay ê wvú le, “Ke gee kewe ntum Nyo' kuw. Ke see wee wvù suŋ wo.”

65 ɛ bó bvuu no baale wvú bô boncun nteen.

ɛ bó saw nsaw Jisos

(Mat 26:59-66; Mak 14:55-64; Jon 18:19-24)

66 ɛ bvú buy yuu ɛ bonyii bò saake woŋ bocii bô bocee ncese bo baay baay bocii noo bonyii bò duŋci bonci bo Nyo' le baance ye. No bó baanceɛ, mum jo Jisos gen bô wvú fô bó to ké no saake bonsaw.

67 No bó geneɛ bô wvú nonɛn, ɛ bó bife ê wvú le, “É è nu wo Mboyse wvù Nyo' to kawɛɛ, é wo see ê bese?” ɛ wvú tfuse le, “É me nseŋe lo ê ben, ben saa ebee ke.

68 É me mbife fiɛɛ ê ben, ben saa etfuse ke.

⁶⁹ Geenen, ε κew yî keseen e, wee wvù diee nu Waawee nu ke eshii ê ebo ke εceey ke Nyo' mvungay e.”

⁷⁰ Ε bó mum sεσε bocii le, “È fen nu wo wvù Waa Nyo'?” Ε wvú tfuse le, “Fí nu no ben gayte.”

⁷¹Ε bó mum gay le, “È nulo é bó ebvuu egomte wee wvù esee le la? Beene nu ε yuw wase fiεε fi wvú jeme bô diuw we.”

Luk 23

Ε Baylet bô 'Elod biwce mwεem ê Jisos

(Mat 27:1-2, 11-14; Mak 15:1-5; Jon 18:28-38)

¹No bonyii bô saake bonsaw jemyεε nonen, mum ja bocii jo Jisos no gene dvú fô Baylet e.

² No bó genεε buy fó, mum κew no cuci mwεem yî ye le, gayte le, “Wee wvun nen ghane bvunse woη wese, tune fo bonyii elaanke shile ê Kaysa Nfon wvu Lum, bvuu jemyi le wen nu Mboyse wvù Nyo' to kawεε, fi duηci le wvú nu nfon mvu.”

³Ε Baylet bife ê Jisos le, “È nu wo wvù Nfon Bojuu le?” Ε Jisos tfuse ê wvú le, “È nu no wo gay.”

⁴Ε Baylet mum ne jeme ê bocee ncese bo baay baay bô bonyii bô to nu fó le, “Me mbaa n'yen fiεε fi wee wvun jay e κε.”

⁵Ε bó bocii mum no taame κε le, “Wee wvun ghane yεeyi bonyii bocii, bεyse le bó etemyi bikuu. Wvú to κew Galilee, to ghan Judea jocii, ε no nu wase ê elaante jan keseen.”

⁶No Baylet yuw fin nonen, mum bife le, “Wee wvun nu wee wvu Galilee le?”

⁷ Ε bó bee, ε wvú mum ciinse Jisos fô Nfon 'Elod e, njefo è to nu wvú wvù to saake keba ke woη e kedvu, ε wvú to nu ten Jelusalem kefew kedvu le.

⁸ Ε bó gen bô Jisos, ε Nfon 'Elod yen wvú le yuw njoη, njefo wvú to shee yuuke wase ekume wvú, mum no κeηke shiee keeyen wvú le, shieele ten le sekemew é Jisos ege fiεε fi duηci mvungay mvu Nyo' le é wen eyen.

⁹Ε wvú she biwce mwεem ê Jisos nteen, geenen ε wvú faηε yaa etfuse fiεε κε.

¹⁰Wvú to biwci ε bocee ncese bo baay baay bô bonyii bô to duηci bonci bo Nyo' le leeme fó cuci mwεem mvù temyi yî Jisos e.

¹¹ Ε Nfon 'Elod bô bonyii bew bo nci le ke ja mum κew no κeεηke bvuu sεwsee wvú, tfume ndvu woη yî ye le, tfuse wvú ε bó no tuu dvú jim fô Baylet e.

¹²È to nu ε Baylet bô Nfon 'Elod banene. Ebvubwε, ε bó tu nsán.

Ε Baylet sumten nsaw no bonyii to koonke

(Mat 27:15-26; Mak 15:6-15; Jon 18:39–19:16)

13No bó tfuseε Jisos jim, ε Baylet kum bocee ncese bo baay baay noo bonyii bò to saake won, bvuu kum bonyii bocii.

14ε bó tase, ε wvú gay ê bó le, “Ben be to bô wee wvun fen le wvú gee ε bonyii temyi bikuu, me ε ndioo ntasse mwεem mvù ben taame dvú ê ben ejise, ben eyeke eyuw, ε ηfanε n'yaa n'yen le mwεem mvù ben cuci yî ye le nu ε wvú ε ge fimew ke,

15ε Nfon 'Elod be baa yen ten ke. È nu fiε fi be ge wvú ε kase ε tfuse wee wvun jim ê beene. Ben eyen ten le wee wvun baa jay fiε fi è nulo é bó eyu lo wvú ke.

16Me nu entam ke lo wvú, encine wvú le, é wvú egene.”

17[È to ké dioo nu kefew ke Nkaw Daηefey wvun e, ε Baylet no keηke keebvuse wee mwaan yew ncaw e enya ê bonyii.]

18 ε bonyii bocii mum ne kew no wamte lo gene dvú le, “Lεse lo wee wvun, ebvuse Balabas yew ncaw e enya ê bese.”

19Balabas wvun to nu yew ncaw e njefo wvú to nu ε kew mvunlaa εlaante bvuu yu wee.

20ε Baylet yuw nonen bvuu jeme ê bonyii bocii njefo wvú to gomte keecinε Jisos e.

21Geenen, ε bó no wamte ke le, “Bó eta lo wvú yî kentam e, bó eta lo wvú yî kentam e.”

22ε Baylet bvuu jeme ê bonyii yî bokaη bo botete le le, “Bó eta wvú nje la? Fiε fi befe fi wvú ge nu la? Me mbaa n'yen jay wvù wvú ge le wvù bó eyu lo wvú ke. Me nu entam lo wvú, encine wvú le.”

23ε bó mum mey no wamte lo bô mvuηgay le “Bó eta lo wvú yî kentam e.” ε n'wam wvubo ghaw Baylet.

24Nonen, ε Baylet sumten nsaw cine wvú le, le bó ege bô wvú no bó kooηke.

25ε wvú mum bvuse wee we yew ncaw e, ε è nu wvù bó to biite, wvù kewεε mvunlaa εlaante bvuu yu wee. No wvú bvuse, mum nya Jisos no bó to gomte.

ε bó ta Jisos yî kentam e

(Mat 27:32-34; Mak 15:21-32; Jon 19:17-27)

26ε bó mum jo Jisos no gene dvú. No bó to gene, ε bô bo wee mvu tasen ε wvú kfuuyi ηkpwaante ε diee diew nu Semon, ε è nu wee wvu Selin. ε bó koo wvú mum gεε kentam ke Jisos e fô wvú gbwew, ε wvú mum tuu no bii Jisos e.

27ε bô bó mum no gene, ε ηgoo bonyii bii wvú le. ε bomew nu bokεε bò to beele, taanηke boηgew bew.

28ε Jisos ke ne baηke ye gay ê bó le, “Bokεε bo Jelusalem, fo ben ebeelè fô me le ke. Ben ebeelè ε è nu fô bikuu binen e, noo fô boom bonen e.

- 29 Ben ekeè le kefew too lo kè bó nu ke egayte le, njoŋ wvu baay nu wvu bokene bò nu bokase bò ke baa boo wase wan, ε bó ke baa yamse wase wan ke.
- 30 È nu ke enu kefew kedvu le, é bonyii efuunke ê dikum di baay baay le, 'Ben egbweken yî yese le,' efuunke ê dikum di caan caan le, 'Ben ebaŋye bese'.
- 31 Bó nu ke efuunke nonen njefo é bonyii ge kfu fin fiεe bó kete kè bæe læe, é bó ke ege næe bó kè nu ε yum wase."
- 32 No bó to gene bó Jisos nonen, bó to keŋke bonyii bo ncaw e bofεe bó bó to gene keeyu ten.
- 33 Ε bó gen buy bvudvuu bvù bó teŋe le Ngbwow Ekole le, mum ta Jisos fó yî kentam e, mum ta ten bonyii bo ncaw e bo bofεe ba yî bintam e, wvù mwaan̄ ê ebo ke Jisos e ke εceey e, wvumvu ê ebo kew ke eŋkoŋko le.
- 34 Ε Jisos ke ne gay le, "Icem, læshe kebefε ke bonyii ban e, njefo ke bó kee fiεe fi bó gee ke." Ε bonyii bodvu jo ndvú Jisos tum kaŋ dvú keegaw ê bikuu bibole.
- 35 Mwεem mvun mvunciim to kooyi bó Jisos nonen, ε bonyii leeme fó taale. Ε bonyii bó to saake woŋ kaa ne fibole no buu lo wvú duu le, "Wvú se fii bonyii bomew, wvú efi le ekole kew keseen, é wvú fen nu Mboyse wvù Nyo' to kawεε, caw."
- 36 Ε bonyii bo nci le ten no sewsee wvú, nya mbvuum mo n̄gbwayn̄gbwayi ê wvú,
- 37 gay le, "É wo fen nu Nfon Bojuu, é wo fi ekole kuw."
- 38 Bó to nu ε saŋ n̄wa' ta ê we jo ekole ke Jisos e le, "Wvun nu Nfon Bojuu."
- 39 Ε wee ncaw mvu ba le bó to n̄jeyte yî bintam e fó, ne no nan'yi Jisos, gayte le, "È nu ke wo wvù Mboyse wvù Nyo' to kawεε le? Fi ekole kuw, efi ten bese."
- 40 Ε wvumvu we yuw fiεe fi wvú jeme, wamen wvú, bife le, "Ke wo fane Nyo' le? Wo nu yî n̄gew e diewe wvú le.
- 41 Bee wo kpwee ceey ceey fii ε è nu nlawma mwεem mvù befe mvù bee wo ge, geenen ε wee wvun kpwee fiew ε wvú baa jay fiεe ke."
- 42 Ε wee ncaw wvun mum gay le, "Jisos, ke ekumyì me seke wo nu ke esaake bvunfon bwuw."
- 43 Ε Jisos gay ê wvú le, "É me ensee ê wo keceey le eben nu ε bee wo nu ke enu bvudvuu bvu njoŋ e bvu Nyo' le."

Ε Jisos kpwe

(Mat 27:45-56; Mak 15:33-41; Jon 19:28-30)

- 44 Ε diuu ke ben wase dīoo lewse, ε ekfuŋ ne jiim woŋ tfuu gen buy didiuu ditete emvunsheen̄.
- 45 Ε ndvu yì to gawsene yew ncese ente mum seεe entelēŋ buy biba bifεe.

46 Ɛ Jisos no nu yî kentam e, ke ja wam foweewe le, “Icem, me n'ya keyoy kem can yo le.” No wvú gay nonen, mum yoy n'yoy wvu fokemese.

47 Ɛ cee ekole bonyii bo nci le wvù to leeme fó, dioo yen fiee fi to kooyee le, nya mbense ê Nyo' gay le, “Kecεεy, kecεεy, wee wvun se nu se jay.”

48 Ɛ bonyii bocii bò to nu ε tase fó keeyen fiee fi to kooyi le, mum ja kase no kfuuyi ela ebole ε bó ε laη wem.

49 Ɛ nsáa Jisos yicii to to fibole leem ε è nu ntamndwee no yene fiee fi kooyi le. Ɛ bomew to nu bokene bò to nen'yee Galilee no bii wvú le.

Ɛ bó dwey Jisos

(Mat 27:57-61; Mak 15:42-47; Jon 19:38-42)

50-51 Wee mvu to nu kefew kedvu le ε bó teηe le Yosew, ε è nu wee wvu ê kelaante ke Bojuu le kemew kè bó teηe le Alimatia. Wvú to nu wee wvù jee bvuu nu wee wvu teytoy ê Nyo' ejise, bvuu ceyte kefew kè Nyo' nu ke eto esaake bvunfon bwew. Wvú to nu ten wee ηgoo bonyii bò to saake bonsaw e. Geenεn, wvú to baa bee fiew fiee fi bó to seyseε ege bô Jisos ke.

52 Ɛ wvú gen fô Baylet e, lεke keegen ejo gvune di Jisos e.

53 Ɛ Baylet bee, ε wvú gen shike gvune didvu, baance ê ndvu le, gen jike ê jem e ε bó ε cow yî kembaan e, ε bó ke baa yuu lese wase wee jó ke.

54 È to nu Diuu di Nseyse le keeley diuu di mbam e, ε è to shεete wase caan é mbam wvudvu ekew.

55 Ɛ bokene ba bò to nen'yee Galilee bi Jisos e, bi Yosew e fô jem, gen yen no wvú jiwsee gvune di Jisos e ê jem.

56 Ɛ bó ke ne fó, mum tu jim ela ebole, gen seyse bonfey bò jee noo bò ké no shfuunkenε bò bó to ké no yeefe digvune dvú. Ɛ è no nu diuu di mbam e, ε bó she mbam no nci wvubo to gomte.

Luk 24

Ɛ Jisos buy yî kpwe le

(Mat 28:1-10; Mak 16:1-8; Jon 20:1-10)

1 Ɛ diuu di mbam e ke buy fey, ε bvú yuu diuu di fwe yî kema le. Ɛ bokene bodvu buy saa lo bvutfuu, jo bonfey bò bó to seyseε mum no gene dvú fô jem.

2 Ɛ bó dioo gen buy fó, yen ε bó ε biηse wase te di bó to baηεε diuw jem dvú.

3 Ɛ bó ley gen ê jem faηe yaa yen gvune di Tata Jisos e ke.

4 Ɛ bó mum leem fó ηgemten lo. Ɛ fí kooy le bolemse bofeε to nu ε ne to leem mbew bó le, ε bó ε tfume ndvú ε yí baa lawkene.

5 Ɛ bokene bodvu fan baay, mum tum bikuu fokuse. Ɛ bolemse ba bife ê bó le, “È nu nje la wvù ben gomte wee wvù bæε dvú ente jo bonkfu?”

⁶ Ke wvú yaa nu fɛn ke, wvú nu ε buy wase yí kpwe le. Ben ekume fiεε fi wvú to gayεε ê ben seke ben ε bó to nu Galilee.

⁷Wvú to nu ε gay le, ‘Wee wvù diee nu Waawee nu ε bó nu ke enya wvú can bonyii bò befe le, é bó ke eta wvú yí kentam e, é ke dioo nu ediuw eta, é wvú ebuy yí kpwe le.’”

⁸ε bó mum kume fiεε fi Jisos to jemyεε ê bó.

⁹ ε bó ke nε fô jem, kase tu jim gen see mwεem mvun mvunciim ê boom bew bo ηgoo le bo yuufe ncow mwaanη noo bonyii bocii bò to bii wvú le.

¹⁰Bokεε bò to seηεε fiεε fi to kooyεε fidvu ê boom bo ntum e bo Jisos e to nu Maalia Magdalen, Joana noo Maalia wvù bwee Jεm bô bokεε bomew.

¹¹ε bó yuw njeme wvudvu ke diewe è nu kenlamse, faηε yaa bee naa lo ke.

¹²Geenen, ε Bita nε ke we, lewte gen buy fô jem, ηgvuwce taa ê jem yen ke ε è nu ndvú yì bó to njimεε Jisos dvú. ε wvú mum nε no tuu jim fô yew e keηke ηghaw yí fiεε fi kooyεε le.

ε bonyii bomew yen Jisos e je yi εmayus e

(Mak 16:12-13)

¹³ε fí ke nε kooy ke εbvubwe le, bonyii bomew bofεε bò to ké no bii Jisos e to nu ε nε Jelusalem no gene ntew wvù εmayus e, wvù to nu diewe bomay bosooshwiη keegen buy jó le.

¹⁴ε bó no gene jemyi εbonebon ekume mwεem mvù to kooyi mvun mvunciim.

¹⁵No bó to lene jemyi ghayte nonen, ε Jisos kebεε bence to mbew bó le no lene bô bó.

¹⁶ε fiεε fimew ge le fo bó ekiεε wee wvudvu ke.

¹⁷ε Jisos mum ja bife ê bó le, “È se nu la fi ben lene jemyi ekume fí nen?” No wvú bife nonen, ε bó leemen bô yii yí monshim mobile.

¹⁸ε wee mvu bó le wvù diee to nu Kleofas bife ê wvú le, “È mey ke wo tolo Jelusalem wvù yaa kee ke mwεem mvù se kooyi jó ediuw eyan e?”

¹⁹ ε wvú bife le, “Mvù la?” ε bó tfuse le, “Mwεem mvù se kooyi bô Jisos wvu Nasalet. Wee wvun se nu wee ntum Nyo', ε mwεem mvù wvú se gee noo mvù wvú se jemyi se nu biηghaw. È se nu wee wvù kuuke baay fwe dvu Nyo' bô bonyii bocii.

²⁰Bocee ncese bo baay baay bô bonyii bò saake wonη wese ε se ε nya wvú le bó eyu. Bó se ε mum ε ta wvú yí kentam e.

²¹ Bese se leese fisese bvufee yí ye le le è nu wvú wvù nu ke esum bonyii bo Islael can ηgew e. Geenen, è nu wase ediuw eta no mwεem mvudvu se kooyεε.

- 22 Fimew nu ε bokene bomew ηgoo yese le ε be ε jeme fí ε nya lo bese ηghaw, le bó buy ε gen fô jem entaηentaη,
- 23 ε φαηε yaa yen gvune diew e κε. Bó ε dioo kase tu jim, ε see le bó be ε yen bonceendaa bo Nyo' le κε diewe bó yen ê εfile le, bó gay ê bó le Jisos nu dvú.
- 24 Bonyii bomew ηgoo yese le ε gen fô jem fodvu ε yen yí le κε lenληη no bokene bodvu be jemyi, geenen, ε φαηε yaa yen Jisos e κε.”
- 25 Ε Jisos jeme ê bó le, “O oo, biyuη bin, mvuntelem mvunen læε baay keebēe mwεem mvù bonyii bo ntum Nyo' le to saηεε.
- 26 Κε ben kee le Mboyse wvù Nyo' to kawεε to κεηκε keeyen ηgew σε ley yí bvukuke bwew e le?”
- 27 Ε Jisos mum κew nele ê bó mwεem mvunciim mvù bó to saηεε ê Nwa' Nyo' le εκυμε wvú ε κew yí mvù Muses to saηεε le, ε gen ε buy ten yí mvu bonyii bo ntum Nyo' le.
- 28 No bó toε wase buy mbew ntew wvù bó to gene jó le, ε Jisos ne no gee κε diewe wvú fele lo.
- 29 Ε bó læκε wvú shiee le gay le, “Beene egen ece. Kefew nu ε kí ε gen wase baay, ε εκfuη ε κew wase ε no jiime.” Ε wvú bee keegen ce bô bó.
- 30 Ε bó gen, ke dioo diekene, ε wvú jo ntuw blæed, nya keyoone ê Nyo', guushe nya ê bó.
- 31 Καη mwaanη nonen, ε ejise ebo yuu, ε bó mum kieε wvú. Ε wvú σεσε la ê bó ejise.
- 32 Ε bó shεε no ghayte εbonebon le, “Κε mvuntelem mvuseεbeewo be yvuwse seke wvú be neçi mwεem mvu ê Nwa' Nyo' le ê bee wo ê je le?”
- 33 Ε bó mum neνε καη mwaanη εκieguu jodvu no tuu jim Jelusalem. Ε bó dioo gen, yen ε boom bo Jisos e bo ηgoo le bo yuufe ncow mwaanη ε baance ye bvudvuu bvumwaanη bô bonyii bomew bô to ké no bii wvú le.
- 34 Ε bó jemyi le, “Kεceεy, Tata wesebeene nu ε buy yí kpwe le. Wvú be ε σεσε ε buynen ê Semon ejise.”
- 35 Ε bó mum see ten ê bó fieε fi be kooy bô bó ê je, bvuu nele no bó be kiente wvú seke wvú be guushi blæed.

Ε Jisos buynen enteleη jo boom bew bo ηgoo le

(Mat 28:16-20; Mak 16:14-18; Jon 20:19-23)

- 36 Κε no bó to bεε jemyi nonen, ε Jisos keβεε mum ja ne σεσε buynen ê bó enteleη mum gay bó le le, “Kembonen enù fô ben e.”
- 37 Ε kedvum gbwo bó, ε bó no fane, kpwaake le bó yene ε è nu ηκfusay e.
- 38 Ε wvú bife ê bó le, “Ben fane la? È ge la wvù ben maηene me?”

39 Ben etaa eyen can yem bô bikaa biem é ben emum ekiee le è nu naa me. Ben emomce ye yem emum ekiee, njefo ke nkufusay ké no kenke nyam ye bô bikufe no ben yene e me nkeneke ke.”

40 No wvú gay nonen, mum dunce can ye bô bikaa biew ê bó.

41 E bó taa Jisos, e njon yuwyé lo bó, e bó mum ngemten lo. E fí ghaw bó keebé le è nu wvú. E wvú ne bife ê bó le, “Ben kenke fiee fidien fan e?”

42 E bó jo kencim ke bye le e bó e dee, nya ê wvú.

43 E wvú fi die ê bó ejise.

44 E wvú mum gay ê bó le, “Mwëem mvun mvù ben yen eben nu mvù me nto njemyi ê ben ekume mvú e me mbëe beene. Me nto nduu le mwëem mvunciim mvù bó to sañee ekume me ê Nwa' Muses e, bô ê Boñwa' bo bonyii bo ntum Nyo' le noo ê Nwa' Mbense le, kenke keeto ekocen.”

45 E wvú mum yene bvufee bvubole, e bó kiee mwëem mvù nu ê Nwa' Nyo' le.

46 E wvú jeme le, “Bó nu e sañ le Mboyse wvù Nyo' to kawee kenke keeyen ngew ekpwe, é ke edioo enu ediuw eta, é wvú ebuy yí kpwe le.

47 E fí bvuu nu le bó nu ke ekew Jelusalem, efewci ê bitum bicii ê diee diew e le bonyii bocii ekumen mvuntelem mvubole, é Nyo' emum elëshe bibefe bibole.

48 È nu ke efewci ben ban bò nu e yen mwëem mvun e.

49 Ben eyeke eyuw, me nu nke enciense nya yí Icëm to kawee ben dvú. Nonen, ben emey elaanthe jan ecëyte mvungay mvù nu ke eshii fowe eto fô ben e.”

E Jisos ben we

(Mak 16:19)

50 E wvú jo bó buy bô bó elaanthe jodvu, e bô bó gen buy mbew ntëw wvù Betani le, e wvú cake can ye we, lañ kembonen yí bó le.

51 Ke no wvú to bëe laañke kembonen yí bó le nonen, mum ja no bene we, mum ben la.

52 E bó nya mbense wvu baay ê wvú, mum ja fó tu jim Jelusalem bô nlanlan fô mvuntelem mvubole.

53 E bó gen no shee yew ncese le, bensee Nyo' sekëcii.

Jon

Jon 1

Ɛ Diɛw tu wee wvu wum

- ¹ È to nu foŋkew ɛ Diɛw nu wase. Diɛw yidvu to nu bô Nyo', ɛ Diɛw yidvu to nu Nyo'.
- ² Wvú to nu wase dvú foŋkew bô Nyo'.
- ³ Nyo' to bom mwɛɛm mvunciim fele can ye le. Kɛ fiɛɛ nu naa lo dvú fimwaan fi Nyo' to bomɛɛ sɛ wvú kɛ.
- ⁴ Wvú kɛŋke nshii yî ye le, ɛ nshii wvudvu nu n'yuu fô bonyii le.
- ⁵ N'yuu wvudvu ɛ no baa ê ejiwɛ le, ɛ ejiwɛ kedvu yaa nulo ejimse naa lo wvú kɛ.
- ⁶ Wee mvu nu dvú wvù Nyo' to tumɛɛ ɛ dieɛ nu lɛ Jon.
- ⁷ Wvú to to keejeme ekumɛ N'yuu, eben jim nsaw we, wvu lɛ wen ege é bonyii bocii elese fitele yî N'yuu wvudvu le.
- ⁸ Kɛ wvú wvù Jon to nu N'yuu wvudvu kɛ. Wvú to to kɛ keeben ɛ è nu jim nsaw wvu N'yuu wvudvu.
- ⁹ N'yuu wvu keceɛy wvù duŋci n'yuu ê bonyii bocii to too yî woŋ wvun e.
- ¹⁰ Wvú to nu yî woŋ e, ɛ woŋ wvun nu ɛ Nyo' to bom fele can ye le, geenɛn ɛ bonyii bô è nu bo yî woŋ wvun e faŋɛ yaa ekieɛ wvú kɛ.
- ¹¹ Wvú to nu ɛ to woŋ we le, ɛ bonyii bo bew faŋɛ yaa efiisen wvú kɛ.
- ¹² Geenɛn, ɛ bonyii bocii bô to fiisenɛɛ wvú, lese fitele yî ye le, nu ɛ wvú to nya mvuŋgay ê bó lɛ bó enù wase boom bo Nyo' le.
- ¹³ Ɛ kɛ boom bo Nyo' le ban nu ɛ bó boke bii elɛmɛ ke kfuu le, kɛnɛɛ no wee shieele, kɛnɛɛ mboo wee wvu wum e kɛ. Bó boke bii ɛ è nu mboo wvù è nu wvu Nyo' le.
- ¹⁴ Diɛw yidvu to nu ɛ tu wee wvu wum no cee ê bese entelɛŋ, ɛ wvú ɛ yiŋsɛn bô mbuwma noo keceɛy. Ɛ bese yɛn bvukukɛ bwew e. Bvukukɛ bvù è nu bvu Wan wvù è mɛy kɛ wvú wvù nɛ fô Ice le.
- ¹⁵ Jon to nu ɛ ben jim nsaw ekumɛ wvú no fuuŋke gayte lɛ, “Wvun nu wee wvù me nto njemyi ekumɛ wvú ŋgayte lɛ, ‘Wee wvù too ê me ejim kuuke fele me, njefo wvú to nu wase ɛ me nse ŋke no nu dvú.’”
- ¹⁶ No wvú nu ɛ yiŋsɛn bô mbuwma, wvú ɛ mum ɛ no nyaa beene bocii mbuwma yî mbuwma le.
- ¹⁷ Beene kee lo lɛ Nyo' to nya bonci fele can Muses e. Geenɛn, mbuwma Nyo' bô keceɛy nu ɛ to fele can Jisos Klistu le.

18 Kε wee nu dvú wvù ke nu ε yuu wase yen Nyo' le κε. È nu κε Waa we wvù è mey κε wvù wvù nu mbew wvù wvù Ice le wvù nu ε ge beene ε κιεε wvù.

Wee wvù è to nu Jon Nlesejoo

(Mat 3:1-12; Mak 1:1-8; Luk 3:1-18)

19 Fin nu fiεε fi Jon to jemyeε seke bikuu bi Bojuu le bi Jelusalem to tumεε bocee ncese bô bonyii bo Lεwe le le bó ebife ê Jon le laa è nu wvù wvù yeε le.

20 Jon to baa tun keetfuse mbife wvubo κε. Wvù to nu ε jeme lo bô diuw we le, “Kε è nu me wvù Mboyse wvù Nyo' to kawεε κε.”

21 Ε bó bife ê wvù le, “Tu è nu wo wvù yeε? È nu wo wvù Elayja le?” Ε wvù tfuse ê bó le, “Kε me nu Elayja κε.” Ε bó bvuu bife le, “È nu wo wvù Wee Ntum Nyo' we le?” Ε wvù tun.

22 Ε bó bvuu bife ê wvù le, “Tu è nu wo wvù yeε? Wo gay le la ekume ekole kuw? Kε see é bese ekenke fiεε fi bese ekase egen etfuse ê bonyii bô tum bese?”

23 Ε Jon tfuse ê bó no Yesaya wvù wee ntum Nyo' to jemyeε le, “È nu me diew yì fuunke ηkpwaante le, ‘Bó enele je Tata é yì enù teytey.’”

24 Bonyii ban nu ε è to tum Bofalassii bó.

25 Ε bó bife ê Jon le, “É è baa nu wo wvù Mboyse wvù Nyo' to kawεε kenεε Elayja, kenεε Wee Ntum Nyo' we, wo ε no leese bonyii ê joo nje la?”

26 Ε Jon tfuse ê bó le, “Me nleese κε fiem bonyii ε è nu ê joo, geenεn wee mvu nu dvú ê ben ente ε ben yaa kee wvù κε.

27 È nu wvù wvù too ê me ejim, ε me mbaa ncim enkpwentεn keenfay laba we κε.”

28 Fiεε fin ficii to kooyi ε è nu Betani Joo Joodan kewvu keki fò Jon to leese bonyii ê joo.

Ε Jon dunce Waa Njee Nyo' ê bonyii

29 Ε ekfun buy yuu, ε Jon yen ε Jisot too, ε wvù mum gay le, “Ben etaa eyen, wvun nu Waa Njee Nyo' wvù cawsee bibefe bi yì nshe le!

30 È nu wvù wvù me nse njemyi ekume wvù ηgayte le, ‘Wee mvu too ê me ejim kuuke fele me, njefo wvù to nu wase, ε me nse ηke no nu.’

31 Kε me kebεε nto ηkee wvù κε. Geenεn, ε me nto nto no nleese bonyii ê joo wvu le bonyii bo Islael ekieε wvù.”

32 Jon to nu ε bvuu jeme keeben jim nsaw we gay le, “Me nto nu ε n'yen ε Keyoy shiile too fowe diewe ebembe le, to no nu yì ye le.

33 Kε me kebεε nto ηkee wvù κε. Geenεn, wee wvù to tumεε me le me ento enleesè bonyii ê joo to nu ε gay ê me le, ‘Wee wvù wo nu ke eyen ε Keyoy ε shii fowe ε to ε no nu yì ye le, nu wvù nu ke eleese bonyii ε è nu can Keyoy ke Yuule le.’

34 Fifin nu fiεε ε me nto nu ε n'yen, ε no nleeme jim nsaw wvudvu ηgayte le wee wvun nu Waa Nyo'."

Bonyii bô to yawεε no nu boom bo Jisos e bo ηgoo le

35 Ε εκfuη buy yuu, ε Jon bvuu no leeme fe fò wvú to leeme bô boom bew bo ηgoo le bofeε.

36 Ε wvú ne yen no Jisos lene fele, mum gay le, "Ben etaa eyen, wvun nu Waa Njee Nyo'."

37 Ε boom bew bo ηgoo le bo bofeε ba dīoo yuw no wvú gay nonen, mum ne no bii Jisos e.

38 Ε Jisos banke ye yen no bó bii, bife ê bó le, "Ben gomte ε è nu la?" Ε bó bife ê wvú le, "Labay, wo cee feε?" (Diee dī Labay din nu le, "Wee N'yεεyi wvu Baay.")

39 Ε Jisos tfuse ê bó le, "Ben eto eyen." Ε bó mum gen yen fô wvú to cee. Ε bô bó mum no nu ε εκfuη ghan jiim. Kefew kè bó to bie wvú le to nu wase ke diewe didiuu dinew e fokiεguu.

40 Wee mwaanη ηgoo bonyii bo bofeε bô to yuwεε no Jon jemyεε mum bi Jisos e to nu Andulu wvù waa bwee Semon Bitā.

41 Ε Andulu wvudvu mum gen lo gom waa bwee wvù Semon, see ê wvú le, "Bese nu ε yen wase Mboyse wvù Nyo' to kawεε le" (fi nu le Klistu).

42 Nonen, ε wvú mum jo Semon gen bô wvú fô Jisos e. Ε Jisos taa wvú nen tuηη, gay le, "È nu wo wvù Semon wvù waa Jon. Bó nu ke eteηe wase wo le Sefas." (Diee dī le Sefas din nu Bitā).

Ε Jisos tee Filew bô Natānial

43 Ε εκfuη ke buy yuu, ε Jisos yen le wen nu egen keba kè Galilee le. Ε wvú gen yen Filew e, gay ê wvú le, "È biī me le."

44 Filew wvun to nu wee wvu ê kelaante kè Besayda le. Ε kelaante kin nu ke bo Andulu bô Bitā le.

45 Ε Filew gen gom Natānial gay ê wvú le, "Bese nu ε yen wase wee wvù Muses to saηεε ê Nwa' bonci le ekume wvú bô wvù bonyii bo ntum Nyo' le to saηεε ten ekume wvú. Wee wvun nu Jisos wvu Nasalet wvù waa Yosew."

46 Ε Natānial tfuse ê wvú le, "Fiεε fi jee nulo ebuy Nasalet e?" Ε Filew gay ê wvú le, "To eyen."

47 Ε Jisos ke yen no Natānial too, jeme ekume wvú le, "Ben etaa eyen, wee wvun nu naa wee wvu Islael wvu kecεεy. Ke nce kenλεεma nu yī ye le ke."

48 Ε Natānial bife ê Jisos le, "Wo ghan neε ε se kiεε me?" Ε Jisos tfuse ê wvú le, "É Filew se keeke eto etee wo, nu ε me mbe ε n'yen wase wo le ê kenyi ke kete ke fig e kiε le."

49 Ɛ Nataniel tfuse ê wvú le, “Labay, wo nu Waa Nyo'! Wo nu Nfon wvu Isael!”

50 Ɛ Jisos gay ê wvú le, “Wo fɛn nu ɛ bee me le keseen ke njefo me nu ɛ ɲgay ê wo le me mbe ɛ n'yɛn wase wo le ê kenyi ke kete kie le? Wo nu ke eyɛn mwɛɛm mvù kuuke fele mvun e.”

51 Ɛ Jisos bvuu gay ê wvú le, “É me ensee ê wo kecɛɛy kecɛɛy le wo nu ke eyɛn ɛ ɛbulɛ ɛ yene, ɛ bonceendaa bo Nyo' le bene, booke yî wee wvù diee nu Waawee le.”

Jon 2

Ɛ Jisos banke joo ɛ è tu mbvuum

1 Ɛ ɛdiuw ke buy ɛta, ɛ bó no gee ɲkaw bvujen ê kelaante kè Kana wvu ê keba kè Galilee le, ɛ bwee Jisos nu fò.

2 Bó to nu ɛ be tɛn Jisos bô boom bew bo ɲgoo le bô ɲkaw wvudvu.

3 Ɛ mbvuum ke nɛ ka, ɛ bwee Jisos be wvú dvú gay le, “Kɛ bó bɛɛ kɛɲke mbvuum kɛ.”

4 Ɛ Jisos tfuse ê wvú le, “Kpwoon, wo bee me dvú nje la? Kefew kem baa kocɛn wase kɛ.”

5 Ɛ bwee gay ê bonyii bo gawe le le, “Fieɛ ficii fi wvú ɛ gay le ben ege, ɛ ben ge.”

6 È to nu ɛ nsháan leeme fò yisooaan ɛ bó kene bô ɛta. Nsháan yin nu yì Bojuu to ké no gɛɛle joo jó yì bó cuke ye dvú keeyuule ê Nyo' ɛjise. Nshaan miaaɲ to joo bibɛɛɲ bi joo le diwɛ mbaanfieɛ kenɛɛ mbaanshɛ le.

7 Ɛ Jisos ke nɛ gay ê bonyii bo gawe le bodvu le, “Ben etuke joo eyiɲsɛn nsháan yin dvú.” Ɛ bó mum tuke joo gɛɛ ê nsháan yidvu le ɛ yí yiɲsɛn.

8 Ɛ wvú mum gay ê bó le, “Ben esɛfe yimi keseen egeɲ dvú fô cee gawe le.” Ɛ bó sɛfe geɲ dvú.

9 Ɛ cee gawe fi, mom joo yidvu, yuw ɛ yí ɛ tu wase mbvuum. Ɛ wvú ma laa man mbvuum nɛ fɛɛ le. (Geenɛn, bonyii bo gawe le bô to sɛfɛɛ joo yidvu to kee fô mó nɛn'yɛɛ.) Ɛ cee gawe mum tee cee bvujen,

10 bife ê wvú le, “Bonyii ké yaw gaw fibole ɛ è nu mbvuum mò jee fô ɲkaw e, é bonyii ké dioo ɛ wu wase ɛ ffuu, ɛ bó sɛ gaw mo yaa jee kɛ. Wo ɛ kaa ɛ gɛɛ fiuw mbvuum mò jee ɛ no too dvú ɛ è nu keseen e?”

11 Fifin to nu fieɛ fi fwe fi duɲci bvukuke bvuu Jisos e fi wvú to gɛɛ ɛnte jo mwɛɛm mvù duɲci bvukuke bwew e. Ɛ wvú to ge fieɛ fin ê kelaante kè Kana wvu ê keba kè Galilee le. No wvú ge nonɛn, ɛ fí mum duɲcɛ bvukuke bwew, ɛ boom bew bo ɲgoo le mum lese fitele yî ye le.

12 Ejim jodvu, ε Jisos ne bow Kafana'um bô bwee noo boom bo bwee le bô bolemse noo boom bew bo ηgoo le, ε bô bó ce jó ediuw caan.

ε Jisos kuη bonyii bo way e fô yew ncese Nyo' le

(Mat 21:12-13; Mak 11:15-17; Luk 19:45-46)

13 Ε ediuw ε Νkaw Bojuu wvù bó teje le Daηefey ke no too wase nceencee, ε Jisos ne ben Jelusalem.

14 Ε wvú ke gen buy fô yew ncese le, yen bonyii bô to geese bona' bô njée noo bibembe noo bô to kumene bigew e ε bó ε shiiyen.

15 Ε wvú jo bokfuu kene ηgbwan dvú, kuη bó bocii dvú, kuη noo njée bô bona' bvuse yew ncese le. Ε wvú bvuu tawse bigew bi bonyii bô to kumene bigew e, baashe bidaη bibole,

16 gay ê bonyii bô to geese bibembe le, “Ben ejo mwεem mvun ene dvú fen. Fo ben ejo yew Icεm etfuse é yí etu yew way ke.”

17 No wvú gay nonen, ε boom bew bo ηgoo le mum kume fieε fi bó saη ê Νwa' Nyo' le ε wee mvu jemyi ê Nyo' le, “Shiee wvu baay wvù me ηkeηke fô yew yo le nulo eyu lo me.”

18 Ε bikuu bi Bojuu le mum bife ê wvú le, “Fieε fi duηci bvukuke bwuw fi wo nulo ege keeduηce ê bese le bó nu ε nya mvuηgay ê wo keege fin nu la.”

19 Ε Jisos tfuse ê bó le, “Ben esâw yew ncese yin, é me enjo ediuw εta eηkase enleke we.”

20 Ε Bojuu bodvu bife ê wvú le, “Fí to jo bilum mbaanye ncow bisooaan keebom yew ncese yin, ε wo nu ke ejo fiuw ε è nu ediuw εta eleke we?”

21 Geenεn, Jisos to jemyi yew ncese yin ε è nu yì è nu ye ye.

22 Nonen, seke wvú to buyεε wase yí kpwe le, ε boom bew bo ηgoo le mum kume le fin nu fieε fi wvú to gayεε. Ε bó mum bee fieε fi nu ê Νwa' Nyo' le, bvuu bee njeme wvù Jisos to jemyεε le.

23 No Jisos to nu Jelusalem fô Νkaw Daηefey wvun e, bonyii nteen to nu ε lese fitele yí ye le nje mwεem mvù duηci bvukuke bwew mvù wvú to gee.

24 Geenεn, Jisos to baa γεε fiew bvufee bwew yí bó le ke, njefo wvú to kee bonyii bocii no bó nu.

25 Wvú to baa shieele wee mvu wvù eshe eseηe lo ê wvú ekume wee wvu wum ke, njefo wvú keβεε to kee fieε fi wee wvu wum keηke ê wvú eshem.

Jon 3

ε Jisos jeme ê Nikodεmus ekume mboo wvu fwe

- 1 Wee ηgoo Bofalasio mvu to nu ε bó teje le Nikodemus, ε wvú nu wee ηgoo bikuu bi woη Bojuu le.
- 2 Ε wee wvun ke ne to fô Jisos e entaη gay ê wvú le, “Labay, bese kee le wo nu wee n'yεεyi wvù ne fô Nyo' le, njefo kee wee nu dvú wvù nulo egee kfuu mvun mwεem mvù duηci bvukuke bvu Nyo' le mvù wo gee mvun se Nyo' nu bô wvú ke.”
- 3 Ε Jisos tfuse ê wvú le, “É me ensee ê wo keceey keceey le, é bó nu se bó ε boo wee mboo wvu fwe le, mweten saa eyen bvunfon bvu Nyo' le ke.”
- 4 Ε Nikodemus bife ê Jisos le, “È nulo é bó ege nee se ebvuu eboo wee ε wvú ε taw wase? È nulo é wvú ebvuu ekase etu ê bwee eshem é wvú ebvuu eboo wvú?”
- 5 Ε Jisos tfuse ê wvú le, “É me ensee ê wo keceey keceey le, é wee nu se wvú ε keηke mboo wvù wvu joo noo Keyoy, tu ke è nulo é wvú eley bvunfon bvu Nyo' le ke.
- 6 Wee wvu wum boote wee wvu wum, ε Keyoy boote keyoy.
- 7 Fo diuw eyumte wo le me nu ε ηgay ê wo le bó keηke keeboe wee tfuu mboo wvu fwe le ke.
- 8 Fwefwe ké no fele no wvú kooηke, ε wo yuuke no wvú fele, geenεn ε wo yaa nulo esee laa wvú se ne fεε, gene fεε le. È nu ke leηleη no fí nu fô wee wvù nu ε keηke mboo wvù wvu Keyoy e.”
- 9 Ε Nikodemus mum ghay le, “È nulo é fifin eghan nee le?”
- 10 Ε Jisos tfuse ê wvú le, “Wo nu wee n'yεεyi bonyii bo Islael, yaa kee fin e?”
- 11 É me ensee ê wo keceey keceey le, bese jemyi fiεε ε è nu fi bese kee, leeme jim nsaw fiεε ε è nu fi bese nu ε yen wase, geenεn ε ben yaa beje fiεε fi bese jemyi le ke.
- 12 É me nseηe mwεem ê ben ε è nu mvu yí nshε le fen se ben beje lo, é ben ke eghan nee se bee fen ε me ε nsee wase ε è nu mvu woη Nyo' le?”
- 13 Ke wee nu dvú wvù ke nu ε ben wase woη Nyo' le ke. È mey kee wee wvù to nen'yεε fó to fokuse fen, ε wee wvun nu wee wvù diee nu Waawee.
- 14 No Muses to njeysεε yo yí bó fελεε bô ketwaa yí kete le ηkpwaante, nu ke leηleη no bó keηke keeke enjeyse wee wvù diee nu Waawee,
- 15 wvu le naa yεε wvù nu ε lese fitele yí ye le, é wvú ekeηke nshii wvù mey lo.
- 16 Nyo' to nu ε looce koη woη wvun baay, tum Waa we wvù mwaanη, wvu le è nu naa yεε wvù nu ε lese fitele yí ye le, mweten saa ela ke, é wvú ekeηke ε è nu nshii wvù mey lo.
- 17 Ke Nyo' to tum Waa we yí woη wvun e le wvú eto elese bonyii yí ηgew e ke. Wvú to tum le wen eboyse lo bó fele yí ye le.

18 Wee wvù nu ε lese fitele yî ye le nu ε wvú yaa nu ke eley ηgew e κε. Geenεn wee wvù baa elese fitele yî ye le nu ε wvú ε ley wase ηgew e, njefo wvú baa elese fitele yî Waa Nyo' wvù è mey κε wvú le κε.

19 Bó nu ke esumtεn nsaw ê yin je le, njefo n'yuun nu ε to yî woη e, bonyii ε kaa ε koη fibole ε è nu εjiwε efey n'yuun. Ε bó koηke nonεn njefo gee dibole nu di befε.

20 Wee tfuu wvù gee gee di befε ké no bane n'yuun, yaa nulo ebuy fô n'yuun nu κε, wvu le fo gee diwene ke eyenε εmwa κε.

21 Geenεn ε wee wvù gee fiεε fi leη ké no too fô n'yuun le, wvu le diwene gee eyen'yi le è nu di wee wvù nu bô Nyo' le.”

Ε Jon jeme le Jisos kuuke fele wen

22 Ejim jodvu, ε Jisos bô boom bew bo ηgoo le nε gen keba kemew ke Judea le. Ε bô bó gen no nu jô ε wvú leese bonyii ê joo.

23 Jon tεn to leese bonyii ê joo ntεw wvù εnon e mbew wvù Salim e njefo joo to nu fó ntay. Ε bonyii too ε wvú leese bó ê joo.

24 Fifin to nu ε bó baa lese wase wvú yew ncaw e κε.

25 Ε boom bo Jon e bo ηgoo le bomew bô wee Juu mvu ke nε kew mbew ekumε ye yi bó cuke keeyuule ê Nyo' ejise.

26 Ε boom bo ηgoo le bo Jon e nε gen fô Jon e, gay ê wvú le, “Labay, wee wε wvù to nu ben ε wvú Joo Joodan kewvu keki wvù wo to jemyeε naa baay ekumε wvú nen, yen le wvuwε ε wvú leese bonyii ê joo, ε bonyii bocii gene κε wase ε è nu fô wvú le.”

27 Ε Jon tfuse ê bó le, “Κε wee nulo enu fiεε se è ge Nyo' le wvú enù fí κε.

28 Ben kebεε nulo eben jim nsaw wεm le me nto nu ε ηgay le κε è nu me wvù Mboyse wvù Nyo' to kawεε κε. Geenεn ε bó to tum me le me ensa ê wvú fwe.

29 Cee bvujen nu wee wvù keηke jen. Ε nsaa cee bvujen wvù leeme mbew cee bvujen wvudvu le yuuke diεw ye, ké no lanlanε baay no wvú yuuke diεw ye. È nu κε leηleη no me nu keseen ε me ε n'yiηsen bô nlanlan.

30 Wvú keηke κε keeku egen lo fwe, é me entu lo jim.

31 Wee wvù nε fowe kuuke fele bonyii bocii. Ε wee wvu yî nshε le nu wee wvu yî nshε le, jemyi κε mwεεm ε è nu mvu yî nshε le. Wee wvù nε woη wvu we le kuuke fele bonyii bocii,

32 ε wvú leeme jim nsaw mwεεm ε è nu mvù wvú nu ε yen ε bvuu ε yuw e. Geenεn, ε wee yaa nu dvú wvù beηε fiεε fi wvú jemyi le κε.

33 Wee wvù beηε fiεε fi wvú jemyi nu wvù duηci le wen tomte fiεε fi le Nyo' jemyi keceey.

³⁴Wee wvù Nyo' nu ε tum ké no jemyi ke ε è nu diew Nyo', njefo Nyo' nu ε nya Keyoy kew ê wvú ε nfew yaa nu ke.

³⁵Icee Wan nu ε koŋ Wan, ε mum ε nya mwεem mvunciim can ye le.

³⁶Wee wvù nu ε lese fitele yî Wan e nu ε wvú keŋke nshii wvù mey lo. Wee wvù baa yuuke wvú le nu ε wvú yaa nu ke ekeŋke nshii ke. Wvuwe wee nu ε shém Nyo' ffuuke wase bô wvú.”

Jon 4

ε Jisos bô kpwoon mvu wvu Samalia tasen fô fwεŋ joo le

¹ε Jisos ke kieε le Bofalasii nu ε yuw wase le wen lemte ε bonyii bo ηgoo le too ε wen leese ê joo fele Jon.

²Geenen ke è to cim leese wvú bó ê joo ke, è to leese ke boom bew bo ηgoo le maan.

³ε wvú dīoo kieε nonen, mum ja ê keba ke woŋ e kè Judea kedvu le, no kaase tuu jim ê kè Galilee le.

⁴Wvú to keŋke keefey je keba kè Samalia le.

⁵ε wvú ke gen buy kelaante ke Samalia kemew e ε bó teŋe le Sika, ε kí nu mbew wεε wvù Yakow to nyaε ê waa we wvù Yosεw e.

⁶Fwεŋ joo wvù Yakow to cimεε to nu fô. No Jisos to nu ε len wase baay dose, ε wvú mum shii mbew fwεŋ joo wvudvu le. Kefew to nu wase diewe didiuu ncow difεε le εmvunsheεŋ.

⁷ε kpwoon mvu wvu Samalia jodvu ke ne to keetuke joo fô, ε Jisos gay ê wvú le, “Nya me bô joo é me eŋ'wu.”

⁸È to nu ε boom bo ηgoo le bo Jisos e ε gen εlaante keeguy mwεem mvudien.

⁹ε kpwoon wvudvu bife ê Jisos le, “Wo nu wee Juu, ε me nu wee wvu Samalia, wo ε ghan neε ε se no lεke joo ê me?” Kpwoon wvudvu to gayte nonen, njefo Bojuu to ké no nyensee lo bonyii bo Samalia.

¹⁰ε Jisos tfuse ê wvú le, “É wo be kee nnya yì è nu yi Nyo', noo wee wvù gayte ê wo le wo enya wen bô joo, tu wo be ε lεke ê wvú, é wvú enya wo bô joo yì booke sekecii.”

¹¹ε kpwoon wvudvu kase bife ê Jisos le, “Icem, wo nu se wo keŋke fieε fi wo etuke joo dvú, ε fwεŋ shiile nen, wo nu ke ejo fεε yiye joo yì booke sekecii?”

¹²Fí nu le wo kuuke fele icee wese wvù Yakow wvù to cimεε fwεŋ wvun gεε ê bese, ε wvú kebεε to nu ε wu joo jó, ε boom bew wu, ε nyám ye ten wu?”

¹³ε Jisos tfuse ê wvú le, “Wee tfuu wvù wuu joo yin nu ε kendoŋ bεε ke eyumte ke wvú.

- 14 Geenen, naa yee wvù nu ke ewu joo yì me nu ñke enya, nu e ke kendoñ bεε ke ebvuu eyuu eyum lo wvù ke. Joo yì me nu ñke enya ê wvù nu ke ene etu ntoñ joo yì buyte yì ye le sekeci, ke eghan enya wvù nshii wvù mey lo.”
- 15 E kpwoon wvudvu mum gay ê Jisos le, “Icem, nya me bô kfuu yiyin joo wvu le fo kendoñ ke ebvuu eyumte me e me ntoo fen keentuke joo ke.”
- 16 E Jisos gay ê wvù le, “Gene etee dwee wo é ben e wvù eto.”
- 17 E kpwoon wvudvu tfuse ê wvù le, “Ke me ñkenke diemsen ke.” E Jisos gay ê wvù le, “Wo nu e jeme leñ no wo gay le ke wo kenke diemsen ke.
- 18 Wo nu e kenke wase bolemse botin, e wvù ben e wvù nu keseen yaa cim nu dwee wo ke. Fiee fi wo jeme nu keceey.”
- 19 E kpwoon wvudvu gay ê Jisos le, “Icem, me nu e n'yen keseen le wo nu wee ntum Nyo'.
- 20 Bo'icee bosese to ké no bunlee Nyo' yì kum wvun e, e ben Bojuu duu finen le jò bonyii kenke keebunlee Nyo' nu ke Jelusalem.”
- 21 E Jisos tfuse ê wvù le, “Kpwoon, bee fiee fi me ñgayte fin. Kefew too lo kè ben nu ke ebunlee Nyo' Ice e è yaa bvuu nu yì kum wvun e kenεε Jelusalem ke.
- 22 Ben bonyii bo Samalia bunlee fiee yaa kee fí ke, e bese Bojuu bunlee kee fiee fi bese bunlee, njefo mboyma fele e è nu yì Bojuu le.
- 23 Geenen, kefew too lo, e kí e to wase kè bonyii bô bunlee Nyo' ceey ceey nu ke ebunlee Nyo' Ice ê keyoy e bô yì keceey e. È neε kfuu bonyii bô Nyo' Ice gomte le bó ebunlee wen.
- 24 Nyo' nu Keyoy, e bonyii bô bunlee wvù kenke keebunlee ê keyoy e bô yì keceey e.”
- 25 E kpwoon wvudvu gay ê Jisos le, “Me ñkee lo le Mboyse wvù Nyo' to kawεε too lo, wvù bó teñe le Klistu. E wvù nu ke edioo e to, emum enyey mwεem mvunciim ê bese.”
- 26 E Jisos gay ê wvù le, “Me wvun wvù jemyi ê wo nu wvù wvudvu.”
- 27 Ke sekedvu, e boom bo Jisos e bo ñgoo le mum kase to. E diuw yum lo bó le wvù jemyi bô kpwoon. Geenen, e wee mvu bó le fañe yaa bife lo ê wvù le laa wvù gomte la le, kenεε le laa Jisos jemyi bô kpwoon wvudvu nje la le.
- 28 E kpwoon wvudvu mum gεε nshaan ye joo fó, gen elaante, gen be bonyii le,
- 29 “Ben ke eto eyen wee mvu wvù nu e to e see lo fiee ficii ê me fi me ñke nu e n'yuw wase ñge. È nelo enu e wee wvun nu Mboyse wvù Nyo' to kawεε le?”
- 30 E bonyii buy elaante mum no gene fô Jisos e.

31 È to nu ε boom bo ηgoo le bo Jisos e ε shεε wase ε no lεke Jisos gayte ê wvú le, “Labay, dieken.”

32 Geenεn, ε Jisos tfuse ê bó le, “Me ηkenke mwεεm mvudien keendie ε ben yaa kee mvú κε.”

33 Ε boom bew bo ηgoo le mum ghay εbonεbon le, “Wee nu ε shεε ε to bô mwεεm mvudien ε nya ê wvú le?”

34 Ε Jisos gay ê bó le, “Mwεεm mvudien mwem nu le me enge fiεε fi wee wvù tum me shieele, emεse lemme diew dicii.

35 Κε ben duu finεn le é shεεte kee nε, é emum enu kefew ke ηgbwele le? É me enγay ê ben le, ben ecake εjise we etaa eyen no mwεεm nu ε be wase ηεε le le bó εgbweci.

36 Wee wvù gbweci kenke nlawma we, baanci ηgu gεεle yî nshii wvù mεy lo le, wvu le wee njewe bô wee ηgbwele ke elanlanε yî wee le mwaan.

37 Fifin duηci le ηgan wvun nu keceεy wvù gayte le, ‘Wee mvu ké jεwyi, ε wee mvu gbwele.’

38 Me ntum ben le ben egen εgbwele mwεεm mvù ben to baa lem κε. Bonyii bomew nu ε lem, ben ε ley bvujonke bvu lemme dibole.”

Ε bonyii bo Samalia nteen lese fitele yî Jisos e

39 Bonyii bo Samalia nteen ê kelaante kedvu le to nu ε lese fitele yî Jisos e nje fiεε fi kpwoon wvudvu to jemyεε ê bó le wvú be ε see lo fiεε ficii ê wen fi wen ke nu ε yuu wase ge.

40 Nonεn ε bó ke dioo to yen Jisos e, lεke le bô bowen ece. Ε wvú bee, ε bô bó ce εdiuw εfaa.

41 Ε bonyii nteen bvuu lese fitele yî Jisos e nje njeme we.

42 Ε bonyii bodvu gay ê kpwoon wε le, “Bese nu ε lese fitele yî ye le ε è yaa bvuu nu nje njeme wo κε. Bese nu ε yuw wase bô bitem bisεse, ε kiεε lo le wee wvun nu Mboyse won wvun keceεy.”

Ε Jisos fε waa wee wvu baay

43 Ε εdiuw yo εfaa yodvu ke fey, ε Jisos nε no gene Galilee.

44 Wvú kebεε to nu ε yuu gay wase le κε bó ké no wvumte wee ntum Nyo' won we le κε.

45 Geenεn, ε wvú ke dioo gen fεse Galilee, ε bonyii bo jó fiisen lo wvú njefo bó to nu ε yen mwεεm mvù wvú to gee fô ηkaw e Jelusalem, njefo bó ten to nu fô ηkaw wvudvu le.

46 Ɛ Jisos ke bvuu kase gen Kana wvu ê keba kè Galilee le jò wvú to βαηκεε joo Ɛ è tu mbvuum. È to nu Ɛ wee wvu baay mvu nu ê kelaante kè Kafana'um e, Ɛ waa we wvù diemsen cemte.

47 Ɛ wee wvu baay wvudvu dloo yuw le Jisos nu Ɛ ne wase Judea Ɛ to Galilee, Ɛ wvú gen fô wvú le, ku can le wvú ebow ke eto efe waa wen, le wvú nu wase diuw kpwe le.

48 Ɛ Jisos mum gay ê wvú le, “É ben nu se ben Ɛ yen mwεem mvù duηci bvukuke bvu Nyo' le, Ɛ yen ten mwεem mvu diuw wvù yumεen e, ben saa ke elese fitele yí yem e ke.”

49 Ɛ wee wvu baay wvudvu gay ê wvú le, “Icem, to ke é bó ebooke lo, fo waa wem ekpwe.”

50 Ɛ Jisos tfuse ê wvú le, “È genè, waa wo nu ebonen.” Wee wvudvu to nu Ɛ bee fieε fi Jisos jemyεε ê wvú, mum ne no gene.

51 No wvú to booke, Ɛ bô boom bew bo lemme le tasen, Ɛ bó see ê wvú le waa we nu Ɛ bonen wase.

52 Ɛ wvú mum bife ê bó kefew kè wvú se kewεε ebonene. Ɛ bó gay ê wvú le, “È se nu foguu ke diewe diuu dimwaan e fomvunsheen, ken'ya' kedvu Ɛ mum Ɛ cine wvú le.”

53 Ɛ cee wan wvudvu mum kume le è nu naa kefew kedvu kè Jisos to gayεε ê wen le, “Waa wo nu ebonen.” Ɛ wvú bô ekole kew naa noo yew ye yicii mum lese fitele yí Jisos e.

54 Fifin fieε fi duηci bvukuke bvu Jisos e to nu fi bokaη bofeε fi wvú to gee seke wvú to nen'yεε Judea to Galilee.

Jon 5

Ɛ Jisos fe wee Ɛ wvú Ɛ cem wase bilum mbaanshe ncow nyan

1 Ɛjim jodvu Ɛ ηkaw Bojuu mvu no nu Jelusalem, Ɛ Jisos ben jó.

2 Kentuke ke joo le kemew to nu jó Ɛ bó teηe ê díew Ibulu le le Betesda, Ɛ kí nu mbew Diuw Ketaη wvu Njée le. Bó to nu Ɛ bom dicile fó ditin,

3 Ɛ bonyii bo bincem e to ké no lone lo fó, bô nu binfefe bô bô nu bontεe noo bô nu Ɛ kpweken wase keba kemwaan. [Bó to ké no jii mene fó cεyte seke joo nu ke ene eshiike.

4 Nceendaa Tata mvu to ké no too ê kefew e ê kefew e, leyte shiike joo yidvu. Wee wvu fwe wvù Ɛ yaw Ɛ ley jó seke nceendaa wvudvu Ɛ shiw joo yidvu, tu wvú nu ebonen yí kencem kew e naa Ɛ kí cim nu neε.]

5 Wee mvu to nu fó Ɛ wvú Ɛ cem wase bilum mbaanshe ncow nyan.

6 Ɛ Jisos ke dīoo to fō yēn wvù le, kīēē le wvù to jīime wase fō ncejole, Ɛ wvù bife Ɛ wvù le, “Wo koonke keebonen e?”

7 Ɛ wee kencem wvudvu tfuse le, “Icem, ke me ŋkenke wee wvù nulo elese me Ɛ joo yin e seke yī Ɛ shiw ke. È nu seke yī Ɛ shiw, Ɛ me ndīoo ŋgene keenley, Ɛ è no nu Ɛ wee mvu Ɛ yaw wase Ɛ ley Ɛ me le.”

8 Ɛ Jisos gay Ɛ wvù le, “Nene we, ejo ghaam yo, egeñè.”

9 Kaŋ mwaan, Ɛ wee wvudvu mum bonen, jo ghaam ye no gene. È to nu Ɛ ebvubwe nu diuu di mbam e.

10 Ɛ Bojuu mum gay Ɛ wee wvù bó to fēlēē we le, “Eben nu diuu di mbam e Ɛ nci baa bee le wo etuu ghaam yo ke.”

11 Ɛ wvù tfuse Ɛ bó le, “Wee wvù be fe me be Ɛ gay le me enjo ghaam yem engene.”

12 Ɛ bó bife Ɛ wvù le, “È nu yee wvudvu wvù be gay Ɛ wo le wo ejo ghaam yo egene?”

13 Ke wee wvù bó to fēlēē wvudvu to cim kee wee wvù fēlēē wvù ke, njefo Jisos to nu Ɛ ne wase ley gen ente jo kebombom ke bonyii le kè to nu fō le.

14 Ɛ è ke no nu ejim jodvu, Ɛ Jisos yēn wvù le fō yew ncese le, gay Ɛ wvù le, “Taa eyen no wo nu Ɛ bonen wase. Fo wo ebvuu egee bibefe ke. É wo gee lo, é fiēē ke egbwe yī yo le fi nu Ɛ fo Ɛ fey fin.”

15 Ɛ wee wvudvu ne gen see Ɛ Bojuu le è nu Jisos wvù be fe wen.

16 Ɛ Bojuu mum kew no bone bikaa Ɛ Jisos ejim, njefo wvù to fe wee wvun Ɛ è nu diuu di mbam e.

17 Ɛ Jisos gay Ɛ bó le, “Icem ké no lemte sekecii, Ɛ me ten nlemte nonen.”

18 Ɛ njeme wvun ge Ɛ Bojuu mese lo no gomte baay keeyu wvù, njefo ke è to mey ke mbam wvù wvù to ŋgoyte maan ke. Wvù to teje ten Nyo' le Icee wen, fewsene ekole kew le wen nu lenlen bô Nyo'.

Mvungay mvù Nyo' nu Ɛ nya Ɛ Waa we

19 Ɛ Jisos ke ne gay Ɛ bó le, “É me ensee Ɛ ben keceey keceey le ke me wvù Wan nelo enge fiēē yī mvungay mwem e ke. Me ŋké no ŋgee ke Ɛ è nu fiēē fi me n'yene Ɛ Icem gee. Fiēē fi Icee Wan gee, nu ke fī fi Wan nu egee ten,

20 njefo Icee Wan wvudvu koonke Wan mum duŋci Ɛ Wan mwēem mvunciim mvù wvù wvù Icee Wan gee. Ɛ wvù bee ke ebvuu eduŋce mwēem mvù fele mvun Ɛ wvù, é wvù egeè Ɛ ben yene, Ɛ dew yumte lo ben.

21 No Icee Wan bvuse bonyii yī kpwe le nyaa nshii Ɛ bó, nu ke lenlen no Wan nyaa nshii Ɛ naa yee wvù wvù nu Ɛ koŋ.

- 22 Keebise fó nu ε Icee Wan yaa saake naa lo wee mvu κε. Wvú nu ε nya nsaw wemen ε è nu can Wan e,
- 23 wvu le è nulo é bonyii bocii ewvumte Wan κε ληληη no bó wvumte Ice. É wee nu σε wvú wvumte Wan, tu κε wvú wvumte Ice wvú tum wvú κε.
- 24 É me ensee ê ben kecεεy kecεεy le wee wvú nu ε yuw diew yem e, ε bee wee wvú tum me le, nu ε wvú κεηκε nshii wvú mey lo. Ke mweten bee ke ebvuu eκεηκε nsaw κε. Wvuwee wee nu ε buy wase can kpwe le, ε ley nshii le.
- 25 É me ensee ê ben kecεεy kecεεy le kefew too lo, ε kí ε to wase, kè bonyii bò nu ε kpweken wase nu ke eyuw diew Waa Nyo', é bó bodvu bò nu ke eyuw, nu ke eκεηκε nshii.
- 26 Ε fí nu nonen, njefo no nshii nen'yi yí Icee Wan e, nu κε ληληη no wvú nu ε nya mvuηgay mvudvu ê Wan le nshii enen'yi ten yí ye le.
- 27 Wvú nu ε nya ten mvuηgay ê Wan le wvú esumtenè bonsaw, njefo è nu Wan wvú nu wee wvú diee nu Waawee.
- 28 Fo diuw eyumtè ben yí fin e κε. Kefew too lo kè bonyii bocii bò nu jém e nu ke eyuw diew ye,
- 29 ebuce jém e, é bò se gee mwεem mvù jee ebuce eley nshii wvú mey lo le, é bò se gee mwεem mvù befe ebuce é bó esaw bó, é bó eley ηgew e.
- 30 Ke fiεε nu dvú fi me nulo eηge ê mvuηgay mwem e κε. Me nsaake nsaw mbii no me n'yuuke, ε je yí me nsumtene jó nu yi teyey, njefo κε me ηgomte keηgee ε è nu fiεε fi è shieele me κε. Me ηgee ε è nu fiεε fi wee wvú tum me shieele.

Mwεem mvù duηci wee wvú è nu Jisos

- 31 É me mbene jim nsaw wvu ekole kem, tu fiεε fi me njemyi yaa nu kecεεy κε.
- 32 Geenen, wee mvu nu dvú wvú bene jim nsaw wem, ε me ηkee lo le fiεε fi wvú jemyi ekume me nu kecεεy.
- 33 Ben to nu ε tum bonyii fô Jon e, ε wvú gen ben jim nsaw ekume kecεεy.
- 34 Ke è nu le me ηgomte le ejemyi wee wvu wum ekume wee wvú è nu me κε. Geenen, ε me njemyi nen wvu le ben nulo ke eboy.
- 35 Jon to nu diewe ken'yeele le ε bó ε tfuw kí ε no bæenci nyaa n'yu, ε ben no koonke keenu ê n'yu we le yí kefew e caan, lanlanηe.
- 36 Fiεε fimew nu dvú fi duηci wee wvú è nu me ε fí fele Jon. Fí nu le, lemme di Icεm nu ε nya le me enlem emese di è nu mwεem mvù me ηgee mvun duηci le è tum Icεm me.
- 37 Icεm wvú tum me nu ε wvú kebee ten nu ε ben jim nsaw wem. Ben ke baa yuw wase naa lo diew ye κε, ε ben ke baa yen wa naa lo no wvú nu κε.

- 38 Kε ben κενκε ten diew ye ê mvuntelem mvunen e κε, njefo ben baa lese fitele yî wee wvù wvú tum e κε.
- 39 Ben taasse Njwa' Nyo' njefo ben kpwaake le è nu jó jò ben nu ke ekenke fiεε fi nu ke ege é ben ekenke nshii wvù mey lo. Fiεε fi nu ê Njwa' wvudvu wvun e jemyi ε è nu ekume me.
- 40 Geenen, ben ε bvuu ε no tune keeto fô me le ekenke nshii.
- 41 Kε me nshieele mbense ε è nu wvù nen'yi ê wee wvu wum κε.
- 42 Geenen ε me ηkee ben. Me ηkee naa lo le κε ben κενκε κενκονεν ke Nyo' le ê mvuntelem mvunen e κε.
- 43 Me nu ε nto ê diee di Icεm e, ben baa fiisen me κε. É è be to wee mvu ê diew diee le, tu wvuε nu wvù ben nu emum efiisen.
- 44 È nulo é ben ege nεε sε bee me le, ε ben nu bò gomte mbense ε è nu wvù nen'yi fô bikuu binen e, yaa gomte mbense wvù nen'yi ε è nu fô Nyo' wvù è mey κε wvú le κε.
- 45 Fo ben ekpwaake le è nu me wvù nu ke elom gee dinen di befe ê Icεm κε. È nu Muses wvù ben leke bvufee yî ye le wvù lomte wase gee dinen ê Icεm.
- 46 É ben to nu ε bee Muses e keceεy, tu ben be ε bee me le njefo wvú to saη ε è nu ekume me.
- 47 Geenen no ben baa cim bee mwεεm mvù wvú to saηεε le, è nulo é ben ke eghan nεε sε bee fiεε fi me njemyi le?"

Jon 6

ε Jisos nyaje bonyii bontfuke botin

(Mat 14:13-21; Mak 6:30-44; Luk 9:10-17)

- 1 Ejim jodvu, ε Jisos ke nε gen lente Mamase yî Galilee, gen kewvu keki. Mamase yin nu yî bó teηe ten le yî Tibelias.
- 2 ε kebombom ke bonyii le shfum ê wvú ejim njefo bó to nu ε yen mwεεm mvù dunçi bvukuke bwew e mvù wvú to gee fô bonyii bo bincεm e no wvú to fele bó.
- 3 ε Jisos bò boom bew bo ηgoo le nε ben gen shii yî kum e.
- 4 È to nu sekekiε, ε Nkaw Bojuu wvu Daηεfey nu wase nceencee.
- 5 ε Jisos ke dīoo laη jise, yen no kebombom ke bonyii le too fô wvú le, ε wvú mum bife ê Filew le, "Beene nu eghan nεε sε guy mwεεm mvudien é bonyii ban edie?"
- 6 Wvú to biite nonen, momte κε lo Filew njefo wvú keβεε to kee wase fiεε fi wvú nu ege.
- 7 ε Filew tfuse ê wvú le, "Kε bodanali gee fεε nu ε cim ε kocen bò nulo eguy mwεεm mvudien mvù wee mwaan mwaan bó le ekenke κε naa caan κε."

⁸Ɛ waa we ηgoo mvu wvù diee to nu Andulu wvù è nu waa bwee Semon Bita mum gay ê wvú le,

⁹“Wan diemsen mvu nu fen kenke bontuw bo blæd e botin bô byé yifiε, geenen fifin nulo ege naa la fô kfuu ban bonyii le nteen nen?”

¹⁰Ɛ Jisos gay le, “Ben egay é bonyii eshiyen fokuse.” È to nu ε egay nu fó ntay, ε bó mum gay ε bó shiiyen, ε bolemse maan nu diewe bontfuke botin e.

¹¹ Ɛ Jisos mum fi bontuw bo blæd e ba, nya keyoone ê Nyo', mum gawce ê bonyii bô to shiiyenε ba. Ɛ wvú ge ke lenlen bô byé ye. Ɛ wee tfuu kenke naa no wvú to shieele.

¹²Ɛ bó ke die ffuu, ε wvú gay ê boom bew bo ηgoo le le, “Ben ebaance bimbεke wvu le fo fiε ela εcici ke.”

¹³Nonen, ε bó mum baance bimbεke bi bontuw bo blæd e bo botin ba bì to shæteε, ε bí yiηsen ηkâa yuufe ncow fiε.

¹⁴ Ɛ bonyii bodvu dīoo yen fiε fi duηci bvukuke bwew e fin fi wvú ge, mum gay le, “Wee wvun nu naa kecεy Wee Ntum Nyo' we wvù to nu keeke eto yî woη wvun e.”

¹⁵ Ɛ Jisos ke dīoo yen le bonyii bodvu gomte keeto ekoo wen mvuηgay e, eghaa Nfon wvubole, ε wvú mum lewse ye kase ben ê kum no nu jó wvú embeη.

Ɛ Jisos len yî joo le

(Mat 14:22-33; Mak 6:45-52)

¹⁶Ɛ è ke no nu ekiεguu, ε boom bew bo ηgoo le bow gen fô mamase le,

¹⁷ley ê kekoη e kew no leenci gene Kafana'um. È to nu sekekīε ε ekfuη ε jiim wase ε Jisos baa to wase fò bó to nu ke.

¹⁸Ɛ joo ke ne no bvuyte, njefo nffum wvu baay to fele lo.

¹⁹Ɛ bó no keyte kekoη leenci, ke gen wase buy ke diewe bomay botete kenεε bonεw e, ke ne yen Jisos e ε wvú lene yî joo le too wase mbew kekoη e. Ɛ kedvum gbwo bó.

²⁰Geenen, ε wvú gay ê bó le, “Fo ben efanè ke. È nu me.”

²¹Ɛ bó yuw nonen, mum no kooηke keejo wvú ê kekoη e. Le bó sεsε, ε kekoη ε fεse wase ηgem joo le fò bó to gene.

²²Ɛ ekfuη ke buy yuu, ε bonyii bô to shεkεε mamase kewvu keki kume le kekoη kè to nu fó to nu ke kemwaan, ε Jisos to baa ley ê kekoη kedvu le bô boom bew bo ηgoo le ke, le boom bew bo ηgoo le to ne gen ke bó embeη.

²³ Geenen, bikoη bimew to nu ε ne je Tibelias, lente to mbew bvudvuu bvù Tata to joε blæd nya keyoone ê Nyo' ε bonyii die le.

24 No bonyii bodvu to yenee le ke Jisos kenee boom bew bo ηgoo le nu fó ke, ε bó mum lece ê bikoη bidvu le, lente gen Kafana'um keegom Jisos.

Jisos nu mwεem mvudien mvù nyaa nshii

25 Ε bó dioo gen yen wvú le kewvu keki, bife ê wvú le, “Labay, wo to jan seke la?”

26 Ε Jisos tfuse ê bó le, “É me ensee ê ben kecεey kecεey le ke ben gomte me ε è nu nje mwεem mvù duηci bvukuke bwem mvù ben yene ε me ηgee ke. Ben gomte me ε è nu njefo ben se nu ε die bontuw bo blεed e ba ε ffuu.

27 Fo ben elemtè ke keekeηke ε è nu mwεem mvudien mvù nulo ebefe ke. Ben elemtè ε è nu keekeηke mwεem mvudien mvù nu ke emey enu dvú egen ebuy yí nshii wvù mey lo le. Mvumvun nu mvù wee wvù diee nu Waawee nu ke enya ê ben. È nu wvú wvù Nyo' Ice nu ε gee ebo kew yí ye le.”

28 Ε bó mum bife ê wvú le, “Mwεem mvù bese keηke keegee é fí emum enu le bese gee lemme di Nyo' le nu mvù la?”

29 Ε Jisos tfuse ê bó le, “Lemme di Nyo' le nu din dì nu le, ben elese fitele yí wee wvù wvú tum e.”

30 Nonen ε bó mum bife ê wvú le, “Fieε fi duηci bvukuke bwuw fi wo nulo ege wvu le bese eyen emum elese fitele yí yo le nu la? Fieε fi wo nulo ege nu la?”

31 Bo'icee bosese to nu ε die mana ηkpwaante, ε è nu no bó saη le, “Wvú to nu ε nya bó bô mwεem mvudien mvù nen'yi woη wvu we le ε bó die.”

32 No bó gay nonen, ε Jisos mum tfuse ê bó le, “É me ensee ê ben kecεey kecεey le ke è to nu Muses wvù to nyae mwεem mvudien mvù nen'yi woη wvu we le ê ben ke. È nu Icεm wvù nyaa mwεem mvudien mvù è nu mvu kecεey mvù nen'yi fowe.

33 Ben ekeè le mwεem mvudien mvu Nyo' le nu mvumwe mvù ne fowe ε shii ε to ε no nyaa nshii ê bonyii bo yí woη wvun e.”

34 Ε bó gay ê wvú le, “Tata, è nyaà bese bô mwεem mvudien mvun sekeci.”

35 Ε Jisos mum gay ê bó le, “È nu me mwεem mvudien mvù nyaa nshii. Ke wee wvù too fô me le bæ ke ebvuu eyuuke jeη ke. Ε wee wvù nu ε lese fitele yí yem e nu ε kendoη yaa bæ ke ebvuu eyumte wvú ke.

36 Geenεn me nu ε ηgay wase ê ben le ben nu ε yen me le, ε faηe yaa lese fitele yí yem e ke.

37 Bonyii bocii bô Icεm nu ε nya ê me nu ke etoo fô me le. Ε wee wvù too fô me le nu ε me n'yaa nu ηke eηkuη wvú ke.

38 Me ne fowe ε nto fokuse fen. Ε me n'yaa nto keeηge ε è nu fieε fi è shieele me ke. Me nto keeηge ε è nu fieε fi è shieele wee wvù tum me.

- 39 Ɛ fiεε fi wee wvù tum me shieele nu fin fi le, fo me enlase naa lo wee mwaan fô bonyii bô wvù nu ε nya ê me le ke, geenen le me ηke embvuse lo bó yî kpwe le diuu di fokemεse.
- 40 Ben ekeè le fiεε fi Icεm shieele nu fin fi le wee tfuu wvù nu ε yen Waa we le, ε lese fitele yî ye le, nu ke ekeηke nshii wvù mey lo, ε me nu ηke embvuse mwεten yî kpwe le diuu di fokemεse.”
- 41 Ɛ Bojuu mum kew no wvukene εkume wvù njefo wvù to nu ε gay le wen nu mwεem mvudien mvù ne fowe ε to fokuse fen.
- 42 Ɛ bó no wvukene nonen biite le, “Wvun nu ke Jisos wvù waa Yosew e? Ke ice bô bwee nu ε beene kee bó le? Fí ghan neε le keseen wvù ε se no duu le wen ne ε ε nu fowe?”
- 43 Ɛ Jisos tfuse ê bó le, “Fo ben ewvukenè ebenεben ke.
- 44 Ke wee nulo eto fô me le se è gufe Icεm wvù tum me le wvù eto ke. Ɛ me nu ηke embvuse mwεten yî kpwe le diuu di fokemεse.
- 45 Bonyii bo ntum Nyo' le to nu ε saη le, 'Nyo' nu ke eyεyi bó bocii.' Nonen wee tfuu wvù nu ε yuw fiεε fi Icεm yεyi ε kieε, nu ε wvù nu ke eto fô me le.
- 46 Ke me njemyi nen le wee nu dvù wvù nu ε yen wase Icεm e ke. È mey ke wvù wvuwe wvù ne fô Nyo' le wvù nu ε yen wase Ice le.
- 47 É me ensee ê ben keceey keceey le, wee wvù nu ε bee nu ε wvù keηke wase nshii wvù mey lo.
- 48 Me nu mwεem mvudien mvù nyaa nshii ê bonyii.
- 49 Bo'icee bonen to nu ε die mana ηkpwaante, geenen ke kpweken ke lo.
- 50 Mwεem mvudien mvun nu mvù ne fowe ε to wvu le é wee die lo mvù wvù saa ebvuu ke ekpwe ke.
- 51 È nu me mwεem mvudien mvù ne fowe mvù nyaa nshii ê bonyii. É wee die mwεem mvudien mvudvu mvun, é wvù ke emey enu dvù sekeci. Ɛ mwεem mvudien mvudvu mvù me nu ηke enya wvu le bonyii bo yî woη wvun e ke ekeηke nshii nu ye yem.”
- 52 Ɛ Bojuu mum ne kew no waale lo εbonebon biite le, “Wee wvun nulo eghan neε se nya ye ye le beene edie?”
- 53 Ɛ Jisos mum jeme ê bó le, “É me ensee ê ben keceey keceey le é ben nu se ben ε die ye wee wvù diee nu Waawee, ε wu ten εleme kew, ben saa ekeηke nshii yî yene le ke.
- 54 Wee wvù diee ye yem bvuu wuu εleme kem keηke nshii wvù mey lo. Ɛ me nu ηke embvuse wvù yî kpwe le diuu di fokemεse,

55njefo ye yem looci nu naa mwεem mvudien, ε ελεμε kem looci nu naa fieε fiwuun.

56 Wee wvù diee ye yem bvuu wuu ελεμε kem cee yî yem e ε me ten ncee yî ye le.

57Icεm wvù tum me keηke nshii, ε me nu dvú nje Icεm. Nonεn wee wvù diee ye yem nu ke enu ten dvú nje yem.

58Mvumvun mwεem mvudien nu mvù nε fowe ε to. Ke mvú nu diewe mwe mvù bo'icen to diee ke kpweken ke lo ke. Wee wvù diee mvumvun mwεem mvudien nu ke emεy nu dvú sekeci.

59Mwεem mvun nu ε Jisos to jemyi no wvú to yεeyi bonyii yew bunle le Kafana'um.

ε bonyii bo Jisos e bo ηgoo le nteen tfuw bikaa ê wvú ejim

60ε bonyii bo Jisos e bo ηgoo le nteen yuw n'yεeyi wvun nen gay le, “Wvun njeme ε teme baay! Ê nulo ebee yeε wvuwwun njeme?”

61Geenen, ε Jisos kieε le bonyii bew bo ηgoo le wvukene εbonebon ekume njeme wvun, mum bife ê bó le, “Fieε fi me njeme fin nu ε shiw mvuntelem mvunen e?”

62 Ê è fen nu nonεn, é ben ke ege nεε fen ε ben ε yen ε wee wvù diee nu Waawee kaase bene fô wvú to shee nu fwele?

63 Keyoy ke Nyo' le nu fieε fi nyaa nshii. Ke nyam ye keηke naa lo fieε keege ke. Njeme wvù me njeme ê ben nu wvu Keyoy, ε è nu fieε fi nyaa nshii.

64 Geenen ben bomew nu dvú ε bó baa bee njeme wvudvu le ke.” Jisos to jemyi nen njefo wvú to kee wase foηkew bonyii bò baa lese fitele yî ye le, kee ten wee wvù nu ke egese wvú.

65ε wvú bvuu gay ê bó le, “È nεε fieε fi me mbe ε njeme wase ê ben le ke wee nulo eto fô me le se Icεm nu ε nya je ê wvú ke.”

66Ejim jodvu, ε bonyii bew bo ηgoo le nteen mum tfuw bikaa ê wvú ejim faηe yaa bvuu lenε bô wvú ke.

67 ε Jisos nε bife ê boom bew bo ηgoo le bo yuufe ncow bofεε le, “Ben ten shieele keegen e?”

68ε Semon Bitā tfuse ê wvú le, “Tata, bese gene ê yeε le. Ê keηke wo njeme wvù nyaa nshii wvù mey lo,

69ε bese ε bee, bvuu kee le è nu wo wvuwe wvù yuule wvù nε fô Nyo' le.”

70ε Jisos gay ê bó le, “Ke è caw me ben bo yuufe ncow bofεε ban e? Geenen, ε wee mvu ben e nu dεwle.”

71 Jisos to jemyi nonen ε è nu ekume Judas wvù waa Semon Iskaliot. Wvú to nu ηgoo boom bo Jisos e bo yuufe ncow bofεε, ε è to nu wvú wvù to nu keeke eghan egese Jisos.

Jon 7

ε Jisos ben Jεlusalεm fô Nkaw Cún e

1 Ejim jodvu ε Jisos mey no ghane ke wase ε è nu keba kè Galilee le. Wvú to baa bvuu gen ê kè Judea le ke, njefo Bojuu to gomte keeyu wvú.

2 ε kefew ke Nkaw Bojuu wvù bó to teηe le Nkaw Cún e ke no too wase nceencee.

3 ε boom bo bwee Jisos e mum gay ê wvú le, “Nεε jan egen Judea wvu le bonyii buw bo ηgoo le eyen lemme dì wo lemte le.

4 É wee lemte lemme gomte le bonyii ekieε wvú, wvú saa elemte nyiime lo ke. No wo gee mwεem mvun, gene eduηce ekole kuw ê woη.”

5 Boom bo bwee le bodvu to jemyi nonen njefo bó to baa cim lese fibole fitele yí ye le ke.

6 ε Jisos tfuse ê bó le, “Kefew kem baa to wase ke. Fô ben e nu ε kefew kenεn ké no nu ke ε kí ε kocεn wase.

7 Ke bonyii bo yí woη wvun e nulo ebane ben ke. Geenεn, ε bó bane me njefo me njemyi ê bó le gee dibole nu dì befe.

8 Ben ebenè finen gene fô Nkaw e. Ke me nu emben jó ke. Kefew kem baa eto naa wase ekocεn ke.”

9 No wvú gay nonen, mum mey Galilee.

10 Geenεn seke boom bo bwee le to benεε wase fô Nkaw wvudvu le, ε wvú ke shεε ben ten jó. ε wvú dioo bene faηe yaa bene wvù bonyii eyene wvú le ke, ben fiew ε è nu ê kenyile le.

11 È to nu ε Bojuu to gomte wase wvú fô Nkaw wvudvu le biwci le, “Wvú se nu fεε le?”

12 ε bonyii ke nε no tfumtfume ekume wvú baay. ε bomew bensee le, “Wvú nu wee wvù jee.” ε bomew kaci lo le, “Wvú lεεle lo bonyii.”

13 Geenεn wee to baa nu dvú wvù ejeme ekume wvú ya le ke, njefo bó to fane bikuu bi Bojuu le.

14 ε εdiuw ε ηkaw ke gawnεn wase εnteleη, ε Jisos gen ley fô yew ncese le no yεεyi bonyii.

15 ε bikuu bi Bojuu le no yuuke keηke lo ηghaw, ghayte le, “Wee wvun ghan nεε ε se no kee mwεem nen se wvú ke nu ε gen wase ηwa'.”

- 16 Ɛ Jisos mum nɛ gay lɛ, “Ƙɛ n'yɛɛyi wvù me n'yɛɛyi wvun nu wɛm ƙɛ. Ɛ̀ nu wvu wee wvù tum me.
- 17 Ɛ̀ wee gomte keegeɛ ɛ ɛ̀ nu fiɛɛ fi Nyo' shieele, ɛ̀ wvù emum ekiɛɛ lɛ laa n'yɛɛyi wvun nɛn'yi ɛ ɛ̀ nu fô Nyo' le, nuu me n'yɛɛyi ɛ̀ mvuŋgay mwem e lɛ.
- 18 Wee wvù jemyi ɛ̀ mvuŋgay mwew e ƙɛ no gomte diee di kuuke ɛ ɛ̀ nu fô ɛkole kew e. Geenɛn ɛ wee wvù gomte diee di kuuke ɛ ɛ̀ nu di wee wvù tum wvù le ƙɛ no nu wee keceɛy ɛ kenlɛɛma yaa nu yî ye le ƙɛ.
- 19 Muses to nu ɛ nya ƙɛ bonci ɛ̀ ben e? Geenɛn ƙɛ wee mvu ben e gɛele bonci bodvu ƙɛ! Ben gomte keeyu me nje la?”
- 20 Ɛ bonyii bodvu tfuse ɛ̀ wvù lɛ, “Wo ƙɛŋke nceendaa dɛwle yî yo le. Wee wvù gomte keeyu wo nu yɛɛ?”
- 21 Ɛ Jisos gay ɛ̀ bó lɛ, “Me nto nu ɛ ŋge lemme dimwaaŋ ɛ ben no ƙɛŋke lo ŋghaw ɛkumɛ dí.
- 22 Muses to nu ɛ nya nci lɛ ben etfuusè boom yew. Ɛ ƙɛ nci wvun yaa to cim buy ɛ̀ Muses ƙɛ. Wvù to buy ɛ ɛ̀ nu ɛ̀ bo'icee bonɛn. Ben ɛ mum ɛ no tfuuse boom yew naa noo diuu di mbam e.
- 23 Ɛ̀ bó tfuuse wee yew diuu di mbam e wvu lɛ fo bó ƙɛ ebefe bó nci Muses, ben ɛ no yuuke nsase bó me lɛ me nto nu ɛ nfe wee ɛ wvù bonɛn ye yicii diuu di mbam e nje la?
- 24 Fo ben esaakè nsaw sumtene sɛ ben ɛ yaw ɛ tasse ɛ yen ƙɛ. Ben esaakè ɛ̀ je yi lɛŋ e.”

Ɛ bonyii no caŋene laa Jisos nu Mboyse wvù Nyo' to kawɛɛ lɛ

- 25 Ɛ bonyii bo Jelusalem bomew mum nɛ bife lɛ, “Wvun nu ƙɛ wee wvù bó gomte lɛ bó eyu?
- 26 Ben etaa eyɛn wvuwwun fɛn ɛ wvù jemyi endan nɛn sɛ wee jemyi fiɛɛ ɛ̀ wvù ŋkuuŋ. Ɛ̀ nɛlo enu lɛ bikuu bi woŋ e nu ɛ loocɛ wase ɛ ƙiɛɛ lɛ wee wvun nu Mboyse wvù Nyo' to kawɛɛ le?
- 27 Geenɛn, beene kee jò wee wvun nɛ. Ɛ seke Mboyse wvù Nyo' to kawɛɛ nu ke eto nu ɛ ƙɛ wee nu ke ekiɛɛ jò wvù nɛ ƙɛ.”
- 28 Nonɛn ɛ Jisos dioo yɛɛyi bonyii fô yew ncese le ƙɛ nɛ fuŋ fowɛɛwe lɛ, “Ben kee me, kee tɛn jò me nɛ. Geenɛn ƙɛ me nto fɛn ɛ̀ mvuŋgay mwem e ƙɛ. Wee wvù tum me nu wee keceɛy, ɛ ben yaa kee wvù ƙɛ.
- 29 Me ŋkee wvù njefo me nɛ fô wvù le, ɛ ɛ̀ nu wvù wvù tum me.”
- 30 No wvù jeme nonɛn, ɛ bonyii bomew mum no gomte keekoo wvù. Geenɛn ɛ wee faŋɛ yaa kum wvù le ƙɛ, njefo ƙɛfɛw kew to baa to wase ekocɛn ƙɛ.

31 Geenen ε bonyii nteen lese fitele yî ye le no gayte le, “Seke Mboyse wvù Nyo' to kawεε ε ke ε to, è nulo é wvú ke ebvuu ege mwεεm mvù dunji bvukuke bvù Nyo' le efey mvù wee wvun gee wase?”

ε bó tum bonyii bo nci le le bó egen ekoo Jisos

32ε Bofalassii ke dīoo yuw no kebombom ke bonyii le tfumtfume ekumε Jisos, ε bô bocee ncese bo baay baay mum tum bonyii bo nci le le bó egen ekoo wvú.

33 No bó gen, ε Jisos gay le, “Me nu enu beene ke yî kefew e nen caan, emum enkase entu jim fô wee wvù tum me le.

34 Ben nu ke eshεε gom me nen, saa eyen me le ke. Fò me ηgene nu ε ke ben nulo eto fó ke.”

35ε Bojuu jeme ê bikuu bibole le, “Wee wvun gomte keegen ε è nu ê nεε fò beene nu ke egom wvú saa eyen wvú le ke? Wvú gomte keegen bitum bì bonyii bosεεbeene nu ε tawse ε no cee bí le egen eyεyi bonyii bo bitum bidvu le le?”

36Fīεε fī wvú gayte le, ‘Ben nu ke egom me saa eyen me le ke, ε fò me ηgene nu ε è yaa nulo é ben eto fó ke,’ nu ε wvú gayte ε fī nu le la?”

ε Jisos kaw bonyii bô joo yî nyaa nshii

37 ε è ke no nu wase diuu di Nkaw e di fokemεse dī è to nu diuu di Nkaw wvudvu le di baay, ε Jisos ja leem we fuη le, “É kendoη yumte wee, é mwεten eto fô me le ewu fīεε.

38Wee wvù nu ε lese fitele yî yεm e nu ε fī nu ke enu ke no Nwa' Nyo' jemyi le, ‘Joo yî nyaa nshii nu ke ebuyte ê fitele fiew e booke nen kokokoko.”

39 Fīfin nu ε Jisos to jemyi ε è nu ekumε Keyoy kè bonyii bô to nu ε lese fitele yî ye le nu ke ekeηke. È to nu kefew kin e ε bó baa nya wase Keyoy kedvu ê bó ke, njefo Jisos to nu ε bó baa bense wase wvú é wvú eley bvukuke le ke.

ε bonyii bvunη ekumε Jisos

40 ε bonyii yuw fīεε fīn fī Jisos to jemyεε, ε bomew gay le, “Wee wvun nu naa Wee Ntum Nyo' wε.”

41ε bomew gay le, “Wvun nu Mboyse wvù Nyo' to kawεε.” Geenen, ε bomew bife fibole le, “Mboyse wvù Nyo' to kawεε to keηke keebuy ε è nu Galilee le?”

42 Ke Nwa' Nyo' jemyi le Mboyse wvudvu nu ke ebuy ε è nu ê kfuu di Nfon Dawe le, ê ntεw wvù Betele'em e, wvù è nu ntεw wvu Dawe le le?”

43No bonyii gay nonen, ε keηgawsen mum to entelēη jo bó ekumε Jisos.

44ε bonyii bomew bó le no gomte keekoo wvú, geenen ε wee faηe yaa kum wvú le ke.

ε bikuu bi Bojuu le ma Jisos

- 45 Ɛ bonyii bo nci le ba mum ne kase tu jim fô bocee ncese bo baay baay bô Bofalasii le, ɛ bó bife ê bonyii bo nci le bodvu le, “Ben baa eto bô wvú nje la?”
- 46 Ɛ bonyii bo nci le bodvu tfuse ê bó le, “Wee ke baa yuu jemyi wase diewe wee wvun e ke.”
- 47 Ɛ Bofalasii bife ê bó le, “Wvú nu ɛ gen wase ɛ læ ten noo ben fó le?”
- 48 Ben nu ɛ yen ɛ bikuu bi won e kenɛ Bofalasii ɛ lese fitele yî ye le?
- 49 Ê nu ke kebombom kin kè yaa kee ke nci Nyo'. Lon nu fô bó efa.”
- 50 Nikodemus wvù to nu wee mvu ngoo Bofalasii le, wvù to genɛ wase diuu dimew yen Jisos e to nu fó. Ɛ wvú bife ê bó le,
- 51 “Nci wesebeene nu ɛ bee le bó esumten nsaw wee se bó ɛ yaw wase ɛ yekɛ ɛ yuw fiɛ fi wvú jeme?”
- 52 Ɛ bó mum bife ê wvú le, “Wo ne ten Galilee le? Tasse Nwa' Nyo' ntay é wo eyen le ke wee ntum Nyo' mvu nulo ke ebuy Galilee ke.”
- 53 [Ɛ bó mum ne mwaan mwaan no gene yéw yibole.

Jon 8

Ɛ bó to bô kpwoon mvu fô Jisos e ɛ bó ɛ koo gbwen nsake le

- 1 Ɛ Jisos ne ben fiew ɛ è nu yî Kum Bite bi Olif e.
- 2 Ɛ ekfuɲ buy yuu, ɛ wvú bvuu kase gen fô yew ncese le. Ɛ bonyii bocii tase mbew ye le, ɛ wvú mum shii fokuse no yɛɛyi bó.
- 3 Ɛ bonyii bô to duɲci bonci bô Bofalasii ne to bô kpwoon mvu ɛ bó ɛ koo ɛ wvú jiime bô diemsen mvu. No bó to bô wvú, leke fwe dvu bó,
- 4 gay ê Jisos le, “Wee N'yɛɛyi, kpwoon wvun nu ɛ bó ɛ koo ɛ wvú jiime bô diemsen mvu.
- 5 Ê bonci le nu ɛ Muses to gay le wvu wvun kpwoon nu wvù bó etumye lo bô eta é wvú ekpwe. Wo ɛ gay fiuw le la?”
- 6 Bó to gee nonen teeyi lo Jisos wvu le wvú elowsen enjeme é bó emum ekenke fiɛ fi bó ecu yî ye le. Geenɛn, ɛ Jisos ngvuwcɛ no saanke fiɛ fokuse bô kpwan ebo.
- 7 Ɛ bó mey ke no leemene fó nyɛɛyi wvú. Ɛ wvú ne leem we gay ê bó le, “É wee nu dvú ê ben enteleɲ wvù yaa kenke kebefɛ ke, é wvú no nu wee wvu fwe wvù eyaw etum wvú bô tɛ.”
- 8 No Jisos gay nonen, bvuu kase ngvuwcɛ no saanke fiɛ fokuse bô kpwan ebo.

⁹ Ɛ bó yuw fiε fi Jisos gay, mum kew no tawsee mwaan mwaan keεke yí ngaybonyii le. Ɛ bó ke tawse, ε è shεε ke wase kpwoon wε no leeme fó bô Jisos maan.

¹⁰ Ɛ Jisos kase leem we, bife ê kpwoon wε le, “Kpwoon, bó ε fεε? Wee baa nu dvú wvú egay le wo keηke ke keekpwe le?”

¹¹ Ɛ wvú tfuse le, “Wee baa nu ke, Tata.” Ɛ Jisos mum gay le, “Ke è nulo é me engay ten le wo keηke keekpwe ke. È genè, geenεn fo wo ke ebvuu ege kebefe ke.”]

Jisos nu n'yuw wvu yí won e

¹² Ɛ Jisos bvuu jeme ê bonyii bodvu le, “È nu me n'yuw wvu yí won wvun e. Naa yεε wvú bii me le nu ε ke è nulo é wvú elene ê kejiwe le ke. Wvú nu ekeηke n'yuw wvú nyaa nshii ê bonyii.”

¹³ Ɛ Bofalasii mum gay ê wvú le, “Wo bene jim nsaw fô ekole kuw e. Fiε fi wo jemyi baa nu keceey ke.”

¹⁴ Ɛ Jisos tfuse ê bó le, “É me ncm mbene jim nsaw fô ekole kem e, tu fiε fi me njemyi nu keceey, njefo me ηkee fô me ne, ηkee ten fô me ηgene. Geenεn, ke ben kee fô me ne kenεε fô me ηgene ke.

¹⁵ Ben saake bonyii diewe bonyii bo boyuum e. Ke me nsaake fiem wee ke.

¹⁶ Geenεn, é me ncm nsaake wee, tu me nsaake ê je yi len e, njefo ke me nsaake me embeη ke. Me nsaake bee Icεm wvú tum me.

¹⁷ Ê ηwa' wene bonci le nu ε bó ε saη le, é bonyii ben jim nsaw yí fiε le bofεε, tu è nu keceey.

¹⁸ Me mbene jim nsaw fô ekole kem e, ε Icεm wvú tum me bene ten jim nsaw wεm.”

¹⁹ Ɛ bó mum bife ê wvú le, “Ico ε fεε?” Ɛ Jisos tfuse le, “Ke ben kee me kenεε Icεm ke. É ben be kee me, tu ben be kee ten Icεm.”

²⁰ Jisos to jemyi mwεεm mvun no wvú to yεeyi bonyii fô yew ncese le mbew fô bó to ké no nyaa bigew bi yew ncese le. Geenεn, ε wee faηe yaa koo wvú ke, njefo kefew kew to baa kocεn wase ke.

Ɛ Jisos duηε le wen ne fowe

²¹ Ɛ Jisos bvuu gay ê bó le, “Me nu ηke enge, é ben eshεε egom me eghan ekpwe ê bibefe binεn e. Fô me ηgene nu ε ke ben nulo eto fó ke.”

²² Ɛ Bojuu mum bife le, “Wvú nu ke eyu ekole kew e, no wvú gayte le fô wen gene nu ε ke beene nulo eto fó ke?”

²³ Ɛ Jisos gay ê bó le, “Ben ne fokuse fen, ε me ne fiem fowe. Ben nu bonyii bo yí won wvun e. Ke me nu wee wvu yí won wvun e ke.

24 Me nu ε ηgay wase λε ben nu ke ekpweken ente jo bibefe binen. Ben ekeè λε ben nu ke ekpweken ente jo bibefe binen fen é ben baa ebee λε è nu me wvudvu κε.”

25 Ε bó bife ê wvú λε, “È nu wo wvù yee?” Ε Jisos tfuse λε, “Me nu wee wvù me nse ηké no nseηe wase ekume wvù ê ben ε κew fonκew.

26 Me ηκεηκε mwεem nteen mvù è nulo é me enjeme ekume ben noo mwεem nteen mvù è nulo é me ensaw ben yî dvu le. Geenεn κε me n'yaa nu enge nonen κε. Fieε fi me nseηe ê woη nu fi me n'yuw ê wee wvù tum me, ε wvù nu wee keceey.”

27 No wvù gay nonen, ε bó faηe yaa kieε λε wvù jemyi ê bó ε è nu ekume Ice κε.

28 Nonen ε Jisos mum gay ê bó λε, “Seke ben ε ke ε njeysel wase wee wvù diee nu Waawee fowe, é ben emum ekieε λε è nu me wvudvu bó λε κε me ηgee fieε fimew ê mvuηgay mwem e κε, λε me njemyi nen ε è nu no Icem yeeyi me.

29 Wee wvù tum me nu bee wvù. Ke wvù baa cine me le λε me enu me embeη κε, njefo me ηké no ηgee fieε sekecii ε è nu fi jee wvù le.”

30 No Jisos jemyee mwεem mvun nen, ε bonyii nteen lese fitele yî ye le.

Keccey bvuse bonyii bvunfaw e

31 Ε Jisos mum gay wase ê Bojuu bò to leseε fitele yî ye le λε, “É ben meη ε no leeme κε yî diew yem e, é ben enu naa keceey bonyii bem bo ηgoo λε,

32 é ben ke emum ekieε keceey é keceey kedvu ege é ben ebuy bvunfaw e.”

33 Ε bó tfuse ê wvù λε, “Bese nu kfuu di Abl'am e, ε bese ke baa eyuu enu wase bvunfaw e can wee mvu le κε. Fí ghan neε le wo ε se no gayte λε bese nu ke ebuy bvunfaw e?”

34 Ε Jisos tfuse ê bó λε, “É me ensee ê ben keceey keceey λε wee tfuu wvù gee kebefε nu nfwá kebefε.

35 Ke nfwá ké meη no nu wee yew yì wvù nu yí le sekecii κε. È ké meη waa yew no nu wee yew yidvu sekecii.

36 Nonen, é Waa Nyo' bvuse ben yî bvunfaw e, tu ben nu ε buy wase bvú λε keceey.

37 Me ηkee naa λε ben nu kfuu di Abl'am e, geenεn ε ben gomte κε keeyu me njefo κε diew yem κεηke naa lo bvudvuu yî yene le κε.

38 Me njemyi ε è nu fieε fi me n'yen ê Icem, ε ben gee finen ε è nu fieε fi ben yuw ê icen.”

39 Ε bó tfuse ê wvù λε, “Icee wese nu Abl'am.” Ε Jisos gay ê bó λε, “É ben be nu boom bo Abl'am e, tu ben bee keegeη fieε ε è nu fi Abl'am to gee.

40 Me nu wee ε me nsee keceey kè me n'yuw ê Nyo' ê ben. Geenɛn, keseen nu ε ben gomte keeyu lo me, ε ke fifin nu fiε fi Abl'am to gee ke.

41 Ben gee ε è nu fiε fi icen gee." Ε bó gay ê wvú le, "Ke bese nu boom bò bó boke kuse ke. Bese keηke Icee wese mwaan, ε è nu Nyo'."

42 Ε Jisos gay ê bó le, "É Nyo' be nu icee wene, tu ben bee keekoηke me, njefo me ne ε è nu fô Nyo' le ε nse nto. Ke me nto yî mvuηgay mwem e ke. É tum wvú me.

43 È nu nje la wvù ben baa eyuuke fiε fi me njemyi le ke? Ke è nu njefo ben tune keeyuw diew yem e le?

44 Ben nu boom bo icee wene wvù dεwle le, ε fiε fi ben shieele nu keege fiε fi icee wene gomte. Wvú to nu wase wee wvù yuwyi bonyii ε kew lo fonkew. Ke wvú keηke fiε keege bó keceey ke, njefo ke keceey nu naa lo yî ye le ke. Wvú ké dioo mbiayte mbiay no jemyi ke no gee diew nu, njefo wvú nu wee mbiay nu cee mbiay.

45 Geenɛn, me nseηe fiem ε è nu keceey, è neε fiε fi ben baa bee me le ke.

46 È nu yεε ê ben enteleη wvù nulo eduηce fiε fi befe fi me ηge? No fiε fi me nseηe ê ben nu keceey, è ge la fo ben ebee me le?

47 Wee wvù è nu wee Nyo' ké no yuuke diew Nyo' le. Fiε fi ben yaa yuuke ke diew Nyo' le nu njefo ke ben nu bonyii bo Nyo' le ke."

Jisos to nu wase ε Abl'am se ke no nu

48 Ε Bojuu mum gay ê Jisos le, "Ke bese be ε see keceey le wo nu nen ε wo nu wee wvu Samalia ε nceendaa dεwle nu yî yo le le?"

49 Ε Jisos tfuse ê bó le, "Ke nceendaa dεwle nu yî yem e ke. Me n'wvumte fiem Icem, geenɛn ε ben yaa wvumte me ke.

50 Geenɛn ke è nu le me ηgomte diee di kuuke fô εkolε kem e ke. Wee nu dvú mwaan wvù gomte fifie, ε è nu wvú wvù sumtene bonsaw.

51 É me ensee ê ben keceey keceey le é wee yuuke diew yem e, wvú saa ke eyuu eyuw wvuη kpwe ke."

52 Ε Bojuu gay ê wvú le, "Bese nu ε kieε wase keseen le nceendaa dεwle nu yî yo le. Abl'am to nu ε kpwe, ε bonyii bo ntum Nyo' le kpweken ten, wo ε no duu le é wee yuuke diew yo le, wvú saa ke eyuu eyuw wvuη kpwe ke.

53 Wo fele icee wese wvù Abl'am wvù to kpweε, fele ten bonyii bo ntum Nyo' le bò to kpwekenε le? Wo kpwaake naa le wo nu la?"

54 Ε Jisos tfuse le, "É me mbensee εkolε kem, tu fifie nu εcici. È nu Icem wvù bensee me, ε è nu wvú wvù ben duu le è nu Nyo' wene.

55 Geenen ε ben yaa kee wvú κε. Ê kee κε me wvú. Ê me ne ε ηgay λε κε me ηkee wvú κε, tu me nu wee mbiay diewe ben e. Geenen, no fí nu, nu ε me ηkee wvú, n'yuuke diew ye le.

56 Icee wene wvú Abl'am to nu ε no lanlape λε wen nu ke eyen ediuw eyem e. Ε wvú ke yen, no yuuke njon.”

57 Ε Bojuu mum sese λε, “Wo nu se wo nu ε buy wase bilum mbaanshen ηkuuη, ε no nu ε wo to yen wase Abl'am e le?”

58 Ε Jisos tfuse ê bó λε, “Ê me ensee ê ben keceey keceey λε, ε Abl'am se keeke enu, nu ε me nu wase.”

59 Ε bó yuw nonen, mum jo eta λε bó etumye Jisos dvú. Ε Jisos nyiim mum buy yew ncese le.

Jon 9

Ε Jisos yene ejise wee ε bó to boke wvú ε wvú nu kenfefe

1 Ε Jisos ke dioo lene, yen diemsen mvu le ε bó to boke wvú ε wvú ε fefe wase.

2 Ε boom bew bo ηgoo le bife ê wvú λε, “Labay, è to ge yee kebefe ε bó se boo wee wvun ε wvú ε fefe wase? Ê to ge wee wvudvu nuu bwee bô ice λε?”

3 Ε Jisos tfuse ê bó λε, “Κε è nu λε wee wvun kenεε bwee bô ice to nu ε ge kebefe κε. Βó to boke wvú nonen wvu λε lemme di Nyo' le ke eduηce ye yí ye le.

4 Beene keηke keelemtè lemme di wee wvú tumεε me le ε è bεε emvunsheη. Etaη too lo ε è nu kefew kè wee yaa nulo elem fieε κε.

5 Ε gen ε buy naa seke la le no me nu yí woη wvun e, nu ε me nu n'yuu wvu yí woη wvun e.”

6 No Jisos jeme njeme wvun, mum cuy nceη fokuse, towce nshe dvú mum yefe ejise ε wee wvudvu dvú,

7 mum gay ê wvú λε, “Gene ecuke ê Ketfum ke Siloam e.” (Diee di Siloam nu λε, “Bó tum lo.”) Ε wvú mum gen cuke, kase no too yene wase mwεem e.

8 Ε bonyii bô to cee mbew ye le noo bonyii bô to ké no yene wvú le diewe wee ελεκεε le no ghaynene λε, “Wvun nu κε wee we wvú se ké no shiile lo lεke ελεκεε le?”

9 Ε bomew no gayte λε, “È nu wvú.” Bomew λε, “Aay wvú fieesene lo wvú.” Ε wee wvudvu gay λε, “È nu me wvudvu.”

10 Nonen ε bó mum bife ê wvú λε, “Ejise eyo ghan neε le ε se yene ye?”

11 Ε wvú tfuse λε, “Wee wvú bó teηe λε Jisos be ε towce nshe ε yefe ejise eyem dvú, ε gay λε me eηgen encuke Siloam. Me ε mum ε ηgen ε ncuke, ejise eyem ε mum ε yene ye.”

12 Ɛ bó bife ê wvú ɛ, “Wvú ɛ fɛɛ?” Ɛ wvú tfuse ɛ, “Ƙɛ me ŋkee ƙɛ.”

Ɛ ƙɛŋgawsɛn to ɛntɛɛŋ jo bikuu bi won ɛ ɛkumɛ mvuŋgay mvu Jisos ɛ

13 Ɛ bó mum nɛ jo wee wɛ wvù to shee nu ɛ wvú ɛ fefe gen bô wvú fô Bofalasii ɛ.

14 Diuu di Jisos to towɛ nshɛ bvuu yene ejisɛ wee wvudvu to nu diuu di mbam ɛ.

15 Ɛ Bofalasii bodvu bvuu bife tɛn ê wvú no wvú ghan ejisɛ eye ɛ sɛ yene ye. Ɛ wvú tfuse ê bó ɛ, “Wvú be ɛ yefe ejisɛ eyɛm bô nshɛ, me ɛ ŋgen ɛ ncukɛ ɛ mum ɛ no n'yene mwɛɛm ɛ.”

16 Ɛ Bofalasii mum gay ɛ, “Ƙɛ wee wvun nɛ fô Nyo' ɛ ƙɛ, njefo wvú lemte diuu di mbam ɛ.” Ɛ bomew gay fibole ɛ, “È nulo é wee wvù gee bibefɛ eghan nɛɛ sɛ no gee kfuu mvun mwɛɛm mvù duŋci bvukukɛ bvɛ Nyo' ɛ?” Ɛ ƙɛŋgawsɛn mum to ê bó ɛntɛɛŋ.

17 Ɛ bó bvuu kase bife ê wee wɛ ɛ, “Wo gay fiuw ɛ la ɛkumɛ wee wvudvu no wvú be ɛ yene ejisɛ eyo?” Ɛ wvú tfuse ɛ, “Wee wvudvu nu wee ntum Nyo'.”

18 Ƙɛ Bojuu to nu ɛ bee ɛ wee wvudvu to shee nu ɛ wvú ɛ fefe ɛ bó sɛ yene ejisɛ eye ƙɛ. Ɛ bó ƙɛ ghan tee bwee bô ice ɛ bó to.

19 Ɛ bó bife ê bó ɛ, “Wvun nu ƙɛ waa wene wvù ben duu ɛ bó to boke wvú ɛ wvú ɛ fefe wase? Wvú ghan nɛɛ ɛ sɛ no yene mwɛɛm ɛ keseen?”

20 Ɛ bwee bô ice tfuse ɛ, “Bese kee lo ɛ wvun nu waa wese ɛ bó to boke ɛ wvú ɛ fefe wase.

21 Geenɛn, no fí ghan wvú ɛ sɛ no yene mwɛɛm ɛ keseen nu ɛ ƙɛ bese kee ƙɛ. Ɛ ƙɛ bese kee tɛn wee wvù yene ejisɛ eye ƙɛ. Ben ebife ɛ è nu ê wvú. Wvú nu wase wee ɛ ejisɛ ɛ yuu. Wvú nulo ejeme fô ɛkolɛ ƙew ɛ.”

22 Bwee bô ice to gay nonɛn njefo bó to fane Bojuu, ɛ fí nu ɛ Bojuu to leke wase lo ɛ é wee mom lo ɛ jeme bô diuw we ɛ Jisos nu Mboyse wvù Nyo' to kawɛɛ, é bó ekuŋ lo mwɛtɛn yew bunle ɛ.

23 È nu fiɛ fi bwee bô ice to gayɛ ɛ wvú nu wase wee ɛ ejisɛ ɛ yuu, ɛ bó ebife ɛ è nu ê wvú.

24 Yí bokaŋ ɛ bofɛɛ, ɛ bó bvuu tee wee wɛ wvù to shee nu ɛ wvú ɛ fefe, gay ê wvú ɛ, “See fiɛ fi ƙɛɛɛy é mbense egen ê Nyo'. Bese kee fisɛɛ ɛ wee wvun nu wee wvù gee bibefɛ.”

25 Ɛ wvú tfuse ɛ, “Ƙɛnɛɛ wvú gee bibefɛ, tu ƙɛ me ŋkee ƙɛ. Fiɛɛ fimwaaŋ fi me ŋkee nu ƙɛ ɛ me nse nshɛ nu ɛ me ɛ nfefe, ɛ keseen nu ɛ me n'yene wase mwɛɛm ɛ.”

26 Ɛ bó bvuu bife ê wvú ɛ, “Wvú be ge nɛɛ bô wo? Wvú be ge nɛɛ ɛ sɛ yene ejisɛ eyo?”

27 Ɛ wvú tfuse ê bó ɛ, “Me mbe ɛ nsee wase ê ben, ben baa koonke keeyuw ƙɛ. Ben bvuu gomte keeyuw ege la dvú? Ben ten gomte keenu bonyii bew bo ngoo le le?”

28 Ɛ bó nan'ye lo wvú gay ɛ, “È nu wo wee we ngoo. Bese nu fisese bonyii bo ngoo le bo Muses e.

29 Bese kee lo ɛ Muses nu ɛ Nyo' to ké no jemyi bô wvú. Geenɛn wee wvun nu ɛ ƙɛ bese kee jò wvú buy ƙɛ.”

30 Ɛ wee wvudvu tfuse ɛ, “Abaay, fin nu lo kenghaw ke fiɛɛ le! Ben duu ɛ ƙɛ ben kee jò wvú buy e? Geenɛn ɛ wvú ɛ yene ejise eyem.

31 Beene kee lo ɛ ƙɛ Nyo' ké yuw bunle wee wvú gee bibefe ƙɛ. Geenɛn, é wee wvumte Nyo', gee fiɛɛ fi wvú shieele, é Nyo' eyuuke bunle ye.

32 Ɛ ƙɛw naa lo no woŋ to ƙɛwɛɛ nu ɛ bó ƙɛ baa eyuu eyuw wase ɛ wee nu ɛ yene ejise ɛ wee ɛ bó to boke ɛ wvú ɛ fefe wase ƙɛ.

33 É è be baa nu ɛ wee wvun nɛ fô Nyo' le, tu ƙɛ è be nulo é wvú ege fiɛɛ ƙɛ.”

34 Ɛ bó gay ê wvú ɛ, “Wo nu ɛ bó to boke wo wemɛn ê kebefɛ ente, wo ɛ no gomte keeyeyi bese le?” No bó gay nonɛn, mum ƙuŋ wvú ê bó enteleŋ.

Wee wvú nu kenfefe yí fiɛɛ fi Nyo' le

35 Ɛ Jisos ƙɛ yuw ɛ bó nu ɛ ƙuŋ wase wee wɛ ê bó enteleŋ, ɛ wvú gom yɛn wvú le, bife ê wvú ɛ, “Wo nu ɛ lese fitele yí wee wvú diee nu Waawee le?”

36 Ɛ wvú bife ɛ, “Wee wvudvu nu yɛɛ icɛm? Ƙɛ see ê me, wvú ɛ me enlese fitele yí ye le.”

37 Ɛ Jisos gay ê wvú ɛ, “Wo nu ɛ yɛn wase wvú le. Ɛ è nu wvú wee wvú ben ɛ wvú jemyi keseen.”

38 Ɛ wee wvudvu mum gay ɛ, “Tata me nu ɛ nlese.” No wvú gay nonɛn, mum tum envuw ê wvú fwe nya n'wvum ê wvú.

39 Ɛ Jisos gay ɛ, “Me nto yí woŋ wvun e wvú ɛ bó esaw bonyii, é bô yaa yene ƙɛ mwɛɛm e eyenè, é bô kpwaake ɛ bó yene mwɛɛm e, etu binfefe.”

40 No Jisos jeme nɛn, ɛ Bofalasi bô to nu mbew ye le yuw mum bife ê wvú ɛ, “Bese ten nu binfefe le?”

41 Ɛ Jisos gay ê bó ɛ, “É ben be nu binfefe, tu can yene be nu bvuyɛw ê keba ƙɛ kebefɛ le. Geenɛn keseen no ben duu ɛ ben yene mwɛɛm e, nu ɛ bibefe binɛn nu emɛy ƙɛ enu yí bikuu binɛn e.”

Jon 10

Jisos nu nɛy njée wvú jee

- ¹“É me ensee ê ben keceey keceey le, é wee leyte ê ketaañ ke njée le, ε fañe yaa eley ε è nu fô diuw ketaañ e, ε ben lo yî ketaañ e ε se ley, tu wvuwε wee nu cooñ, nu wee wvù lole mwεem mvuñgay e.
- ²Geenen wee wvù è ceyte wvú njée ké no leyte fiew ε è nu fô diuw ketaañ e.
- ³Wvuwε wee nu wvù wee wvù ceyte diuw ketaañ ké yene diuw ketaañ ê wvú, ε wvú ley mum tee njée yî è nu ye ê diee le, ε yí yuw diew ye, ε wvú mum jo buy dvú.
- ⁴Seke wvú ε bvuse wase njée ye yicii ekfuñ, mum no saa fwe teñe ε njée yidvu bii wvú le, njefo yí kee diew ye.
- ⁵È ké dioo nu wee wvu ncεw, yí saa ebi wvú le ke. E yí no lewte lo wvú, njefo ke yí kee diew wee wvu ncεw ke.”
- ⁶ E Jisos ma ñgan wvun ê bó nonen, ε bó fañe yaa kiee fiεε fi wvú jemyi ê bó ê ñgan wvudvu le ke.
- ⁷Nonen, ε Jisos bvuu gay ê bó le, “É me ensee ê ben keceey keceey le è nu me diuw ketaañ fò njée fele.
- ⁸ Bonyii bocii bò to saε ê me fwe to nu ke bocooñ noo bonyii bò lole mwεem mvuñgay e. Nonen ε njée fañe yaa eyeke fiεε fi bó jemyi ke.
- ⁹ È nu me diuw ketaañ. É wee fey yî yem e ε se ley, é wvú ke eboy. Wvú nu ke enu diewe njeε yî buyte gene diekene kaase tuu jim ê ketaañ e.
- ¹⁰Cooñ ké no too ke keecoñ lo, bô keeyu lo, noo keebefe lo bô fiεε. Me nto fiem le bonyii ekeñke ε è nu nshii, nshii ε è nu wvù nu ε looce ε yiñsen.
- ¹¹ È nu me ncεy njée wvù jee. Ncεy njée wvù jee ké nya nshii we keekpwe nje njée ye.
- ¹² Wee wvù bó jo ke lo wvú lemme le, se è nu wvú ncεy njée, ε njée yaa nu ke ye, ké yeε ε kuula too, ε wvú mum lañ njée fεε lo, ε kuula mum shεε kooyε njée ε yimi tawse.
- ¹³Wvú ké no lewte njefo bó jo ke lo wvú lemme le, ε wvú baa ekpwe fiεε fô njée le ke.
- ¹⁴ È nu me ncεy njée wvù jee. Me ñkee njée yî è nu yem, ε njée yem kee ten me,
- ¹⁵ leñleñ no Icεm kee me, ε me ñkee ten Icεm, ε me nu ε nya nshii wεm keeñkpwe nje njée yem.
- ¹⁶ Me ñkeñke ten njée yimi ε yí baa nu ñgoo yin e ke. E me ñkeñke keento bô yí ten é yí eyuuke diew yem e, é ñgoo njée emum enù mwaañ ε ncεy njée nu mwaañ.
- ¹⁷ Me nu ε nya nshii wεm keeñkpwe wvu le è nulo é me eñkase enfi nshii wεm jim. È nεε fiεε fi Icεm kooñke me.

18 Kε wee nu dvú wvù joo nshii wem κε. È nyaa me nshii wem ê ηκοη wvu wem e. Me ηκεηκε mvuηgay keenya nshii wem keeηkpwe, ηκεηκε mvuηgay keeηkase enfi nshii wem jim. Fifi nu fiε ε è gay Icεm le me eηge.”

19 Ε Jisos jeme mwεem mvun nen, ε κεηgawsen bvuu to entelen jo Bojuu.

20 Ε bonyii nteen bó le no gayte le, “Wvú κεηκε nceendaa dεwle, wvú jewte lo. Ben yeke la ê wvú le?”

21 Geenen ε bomew no gayte le, “Kε ban bonjeme nu bo wee wvù κεηκε nceendaa dεwle le κε. È nulo é nceendaa dεwle eyene εjise ε kenfefe?”

Ε Jisos duηce le wen nu Waa Nyo'

22 Ε è ke no nu kefew ke ηkaw mvu keekume no bó to kasεε yene yew ncese Jelusalem,

23 ε Jisos gen no ghanci fô yew ncese le, fô cile Saamun e. Sekekie to nu kefew ke kenton e.

24 Ε Bojuu ne to gem wvú tase, bife ê wvú le, “Wo nu ke ecine é bese emey eηgemtene nen egen ebuy neε? É è fen nu wo Mboyse wvù Nyo' to kawεε, é wo see lo ê bese teytey.”

25 Ε Jisos tfuse ê bó le, “Me nu ε nsee wase ê ben, ben ε faηe yaa bee κε. Dilemme di me ηgee ê diee di Icεm e nu ε dí duηci wee wvù è nu me.

26 Geenen ben baa bee, ηjefo κε ben nu ηgoo ηjée yem e κε.

27 Njée yem ké no yuuke diew yem e. Me ηkee yí, ε yí bii me le,

28 ε me nyaa nshii wvù mey lo ê yí. Kε yí nu ke eyuu ela κε. Ε wee yaa nu dvú wvù nu ke eyuu elo yí can yem e κε.

29 Icεm wvù nya ηjée yidvu ê me fele wee tfuu, ε wee yaa nu dvú wvù nulo elo yí can ye le κε.

30 Ε bee Icεm nu fiεε fimwaaη.”

31 Ε Bojuu bvuu jo eta keetumye wvú dvú.

32 Ε Jisos bife ê bó le, “Ben nu ε yen wase dilemme di jee nteen di Icεm gay le me eηgeè. È nu di la di ben gomte keetumye me nje dí?”

33 Ε bó tfuse ê wvú le, “Kε bese tumyi wo ε è nu nje lemme di jee di wo ge κε. Bese tumyi wo ε è nu ηjefo wo beete bô diee di Nyo' le. Wo nu κε lo wee wvu wum, duu le wo nu Nyo'.”

34 Ε Jisos tfuse ê bó le, “Kε fí nu ε bó ε saη ê ηwa' wene bonci le ε Nyo' jemyi jó le, ‘Me nu ε ηgay le ben nu bonyo’ le?”

35 Nyo' teηe bonyii bodvu le bonyo', ε è nu κε bó bodvu bô diew ye to gene fô bó le, (ε beene kee le κε fiεε fi nu ê ηwa' Nyo' le nulo ekumen κε.)

³⁶No fí nu nonen, è no nu nje la wvù ben gayte ê wee wvù Ice nu ε caw ε tum yí woŋ wvun e le wvú beete bô diee di Nyo' le ke njefo wvú nu ε gay le wen nu Waa Nyo'?

³⁷É me nu nse me ngee ε è nu dilemme di Icem e, fo ben ebee me le ke.

³⁸Geenen ε è nu le me ngee ε è nu dí, é ben baa cim bee me le, é ben bee dí le, é ben emum elooce ekieε ntay le Icem nu yí yem e, ε me nu yí Icem e.”

³⁹ε Bojuu bvuu no gomte keekoo wvú, geenen ε wvú lemten can yibole.

⁴⁰ε Jisos bvuu gen lente tu Joo Joodan kewvu keki fò Jon to yawεε eleese bonyii ê joo, no nu jó.

⁴¹ε bonyii nteen no too yene wvú le. ε bó ke ne gay le, “Jon to baa ge naa fieε fimew fí duŋci bvukuke bvú Nyo' le ke. Geenεn fieε ficii fí wvú to jemyi ekume wee wvun to nu naa keceey.”

⁴²Nonen ε bonyii nteen lese fitele yí Jisos e jó.

Jon 11

ε nsaa Jisos wvù Laasalus kpwe

¹Wee mvu wvù diee to nu Laasalus to nu ε ne no cemte. Wvú to nu wee wvu ntew wvù Betani le, cee jó bô jéme ye yí è to nu Maalia bô Maata.

²Maalia wvun wvù waa bwee wvù Laasalus to cemte, nu wvù to yefεε bikaa bi Tata le bô nfiey wvù shfuunƙene, sho bô yvuw ye ekole.

³No wvú to cemte nonen, ε jéme ye yidvu mum ciinse ntum fô Jisos e le, “Tata, we wvù è nu fitele fiuw cemte lo.”

⁴ε Jisos dīoo yuw ntum wvudvu, gay le, “Ke kencem kin nu ke kpwe le ke. Kí nu ke eduŋce ε è nu bvukuke bvù è nu bvú Nyo' le, wvu le Waa Nyo' nulo ekeŋke diee di kuuke nje kí.”

⁵Jisos to kooŋke Maata bô waa bwee wvù Maalia noo Laasalus baay.

⁶Geenen, seke wvú to yuwεε le Laasalus cemte lo, ε wvú bvuu ce fò wvú to nu ediuw efaa.

⁷εjim jodvu, ε wvú gay ê boom bew bo ngoo le le, “Beene ekase etu jim Judea.”

⁸ε bó bife ê wvú le, “Labay, è nu ke foguu foguu nen wvù Bojuu se gomte keetumye wo bô eta é wo ekpwe, wo ε bvuu ε no tuu jó le?”

⁹ε Jisos tfuse ê bó le, “Ke bontam bo kefew e nu ke yuufe ncow bofεε yí diuu le le? É wee lene emvunsheen, tu ke è nulo é wvú ebayten yí fieε le ke, njefo n'yuw wvu yí woŋ wvun e yeese wvú.

¹⁰Geenen, é wee lene entan, tu è nelo é wvú ebayten, njefo ke wvú kenke n'yuuké.”

¹¹No wvú jeme nonen, mum gay ê bó le, “Nsaa yesebeene wvù Laasalus nu ε lefe wase, geenen ε me nu engen enkamse wvú yî nyii didvu le.”

¹²ε boom bew bo ηgoo le gay ê wvú le, “Tata, é è fen nu le wvú nu ε lefe, tu wvú nu ke ebonen.”

¹³Jisos to jemyi ε è nu ekume kpwe Laasalus, geenen ε bó no yuuke le wvú jemyi ε è nu ekume nyii dî nyii.

¹⁴ε Jisos mum jeme lo ê bó teyten le, “Laasalus nu ε kpwe wase.

¹⁵Geenen ε me n'yuuke njon nje yene le ke me nse nu fó ke, wvu le ben elese fitele yî yem me. Beene egenè le jó.”

¹⁶ε Toma wvù bó to teje diee diew dimew le Emam, gay ê bomew boom bo ηgoo le le, “Beene egen ten wvu le beene nulo ekpweken beene ε bó.”

ε Jisos bvuse Laasalus yî kpwe le

¹⁷ε Jisos ke fese fó, yuw le Laasalus nu ε ce wase ê jem ediuw ena.

¹⁸Betani jan to nu mbew Jerusalem e ke diewe bomay bofε nen.

¹⁹ε Bojuu nteen to to fô Maata bô Maalia le keecam shen bô bó yî kpwe waa bwee bó le.

²⁰ε Maata ke dīoo yuw le Jisos too lo, ε wvú mum buy keegen é bô wvú etasen, geenen ε Maalia mey yew.

²¹ε Maata gen gay ê Jisos le, “Tata, é wo se bee enu fen, tu ke waa bwεem se nu ε kpwe ke.

²²Geenen, ε me ηkee le keseen wvun nu ε naa la fi wo ε lekε ê Nyo' nu ε wvú nulo enya ê wo.”

²³ε Jisos gay ê wvú le, “Waa bwoo nu ke ebuy yî kpwe le.”

²⁴ε Maata gay ê wvú le, “Me ηkee naa lo le wvú nu ke ekase ebuy diuu di fokemese dî bonyii nu ke ebuyte yî kpwe le.”

²⁵ε Jisos gay ê wvú le, “È nu me wvù bvuse bonyii yî kpwe le, ε è nu me nshii. Wee wvù nu ε lese fitele yî yem e nu ε wvú cim kpwe lo, é wvú ke enu dvú,

²⁶ε naa yεε wvù nu dvú keseen ε wvú ε lese fitele yî yem e, yaa nu ke ekpwe ke. Wo nu ε bee nonen e?”

²⁷ε wvú bee le, “εε Tata, me nu ε mbee le wo nu Mboyse wvù Nyo' to kawεε. Wo nu Waa Nyo' wvù to nu keeke eto yî woη wvun e.”

28 No Maata gayee nonen, mum gen tee Maalia wvù waa bwee, jeme ê wvù fokueku le, “Wee N'yeyi nu wase fen, e wvù tenje wo.”

29 No wvù yuwee nonen, mum cufe lo ye we keegen eyen wvù le.

30 Ê to nu e Jisos baa ley wase ntew e ke. Wvù to bee ke fó fò Maata to genee yen wvù le.

31 E Bojuu bò to nu bô bo Maalia camte shen dioo yen no wvù cufe ye e buy yew, e bó mum no bii wvù le kpwaake le wvù gene fô jem keegen ebeele fó.

32 E Maalia ke gen fese fò Jisos to nu, yen wvù le, mum gbwe bikaa biew e gay le, “Tata, é wo se bee enu fen, tu ke waa bwem se nu e kpwe ke.”

33 E Jisos ke dioo yen no wvù beele, e Bojuu bò to bie wvù le beele ten, e fiee fidvu shiw fitele fiew baay, e ye befe wvù.

34 E wvù ne bife le, “Ben dwey wvù fee?” E bó gay ê wvù le, “Tata, to eyen.”

35 E Jisos bee kpwe.

36 E Bojuu yen nonen gay le, “Ben etaa eyen no wvù se koonke wvù.”

37 Geen en e bomew kaa gay le, “Ke è se nulo é wvù wvù to yen'yee ejise kenfefe, etaŋ wee wvun fo wvù ekpwe le?”

38 E fitele fiew bvuu shiw baay. E wvù ne gen fese fô jem. Jem yin to nu tfum e bó e baŋ diuw wvudvu bô kebwee ke te le.

39 E Jisos gay le, “Ben ecake te die.” E Maata wvù jeme wee kpwe gay ê Jisos le, “Tata, keseen nu e wvù samte wase. Ê nu wase ediuw ena no wvù se kpwee.”

40 E Jisos bife ê wvù le, “Me mbe e ngay ke ê wo le é wo nu e lese fitele yî yem e, é wo ke eyen bvukuke bvù è nu bvù Nyo' le?”

41 Nonen, e bó mum cake te didvu. E Jisos cake ejise we gay le, “Icem, me nyaa keyoone ê wo no wo nu e yuw bunle yem.

42 Me nkee naa le wo ké no yuuke ke bunle yem sekecii. Geen en, me njemyi fin e è nu nje bonyii ban bò leemene fen, wvu le è nulo é bó ebee le è tum wo me.”

43 No wvù jeme nonen, fuŋ bô diew yì temyi le, “Laasalus, buye!”

44 E wee wvù to kpwee wase we mum buy, e can ye bô bikaa nu e bó e njim bô njaw ndvù, e njim ten bvushiw bwew bô njaw ndvù. E Jisos gay ê bó le, “Ben efay wvù, ecine é wvù egene.”

E bikuu bi won e jo nsey keeyu Jisos

(Mat 26:1-5; Mak 14:1-2; Luk 22:1-2)

45 E Bojuu nteen bò to toe ê Maalia le dioo yen fiee fi Jisos ge, mum lese fitele yî ye le.

- ⁴⁶Geenen, ε bomew kaa gen fibole yen ε è nu Bofalasii le, see ê bó fiε fi Jisos ge.
- ⁴⁷ Ε bocee ncese bo baay baay bô Bofalasii mum kum bikuu bi woη e jeme le, “Beene nu ege nεε? Wee wvun gee mwεem nteen mvù duηci bvukuke bvυ Nyo' le.
- ⁴⁸É beene cine lo wvú ε no gene dvú fwe, tu bonyii bocii nu ke eghan elese fitele yî ye le, é bonyii bo Lum ke enε eto ebvuw bvudvuu bvù yuule bvuseεbeene bô ketum kesεbeene.”
- ⁴⁹ Geenen, ε wee mvu bó le wvù diee to nu Kayfas, wvù to nu εkolε ke bocee ncese le kelum kekie le nε gay fiew ê bó le, “Kε ben kee naa lo fiε kε.
- ⁵⁰ Kε ben kee le fi jee fô ben e le wee mwaan ekpwe fô bonyii le bocii εfey fo ketum kecii ela lo le?”
- ⁵¹ Kε Kayfas to jemyi fiε fin bô bvufee bvù è nu bwew kε. Wvú diewe εkolε ke bocee ncese le kelum kekie le to jemyi nen teete ε è nu ntum Nyo' le Jisos to keηke keekpwe fô ketum ke Bojuu le.
- ⁵² Ε è yaa mey kε fô ketum kedvu le mey kε, wvú to keηke keekpwe keebaance boom bô è nu bo Nyo' le bocii bô nu bitum bimew e, é bó enù yî fiε le fimwaan.
- ⁵³ Ε kew εbvubwe le, ε bikuu bi woη e mum kew no joo nsey no bó nu ke eghan se yu Jisos.
- ⁵⁴ Nonen, ε Jisos faηe yaa ebvuu eghane ya le entelη jo Bojuu kε. Ε wvú nε fiew jó gen ketum kemew kè nu mbew woη monshεem e ε bô boom bew bo ηgoo le no cee jó kelaante kemew e ε bó teηe le Efelem.
- ⁵⁵ Ε Νkaw Bojuu wvu Daηefey ke no too wase nceencee, ε bonyii no nen'yi biba le bene Jelusalem ε diuu din se keetoo keekfum bikuu bibole.
- ⁵⁶ Ε bó gen kew no gomte Jisos biwci εbonεbon no bó to leemene fô yew ncese le gayte le, “Ben kpwaake le la? Kε wvú nu eto fô ηkaw wvun e le?”
- ⁵⁷ È to nu ε bocee ncese bo baay baay noo Bofalasii ε nya wase nci le é wee nu dvú wvù kee fô Jisos nu, é wvú ge ε bó kieε, wvu le è nulo é bó ekoo wvú.

Jon 12

Ε Maalia yefe Jisos Βetani

(Mat 26:6-13; Mak 14:3-9)

- ¹ Ε è ke no shεete wase εdiuw εsoocaaan é emum enu kefew ke Νkaw Daηefey e, ε Jisos nε gen ntew wvù Βetani le jò Laasalus wvù Jisos to bvuseε yî kpwe le to nu.
- ² No wvú gen jó, ε bó fe mwεem mvudien keetew wvú dvú. Ε Maata no nu wee gawe ε Laasalus nu wee mvu ηgoo bonyii bô to shiileε no diekene bô bo Jisos e.
- ³ Ε Maalia ke mum nε jo fikaa fi nfiey mvu wvù shfuunεene le, yefe bikaa bi Jisos e dvú, sho bô yvuw ye εkolε. Nfiey wvun to lumte naa baay, ε bó kene bô naad εwvunεwvun. No wvú yefe nonen, ε yew yidvu nε no shfuunεene lo ente yicii.

- ⁴ Ɛ Judas Iskaliot wvù to nu wee ηgoo boom bo Jisos e, (wvù to ghanεε egese wvù) kaa nε gay Ɣ,
- ⁵ “È be ge la fo bó egese lo nfiey wvun bodanali gee tε, enya bigew bidvu ê bonyii bò fuute?”
- ⁶ Ɛ Judas to jemyi nen Ɣ wen κηke shiee fô bonyii bò fuute le κε. Wvù to nu cooη ε è to nu wvù wee wvubo εκεε, ε wvù to ké no leese kebo jó fici εκοε kew dvù.
- ⁷ Ɛ Jisos gay Ɣ, “Cinε wvù le. Wvù be γεke nfiey wvun nen keeseyse ε è nu ndwey wεm dvù.
- ⁸ Bonyii bò fuute nu ke enu κε ben ε bó sekecii, geenεn κε me nu ηke enu beene sekecii κε.”
- ⁹ Ɛ kebombom ke Bojuu le ke yuw Ɣ Jisos nu jó, ε bó mum to jó. Κε bó to to κε ε è nu nje Jisos maan κε. Bó to to ten keeyen Laasalus wvù Jisos to bvuseε yî kpwe le.
- ¹⁰ Nonεn, ε bocee ncese bo baay baay no kaake Ɣ bó nu eyu ten Laasalus,
- ¹¹ njefo è to nu nje wvù wvù Bojuu nteen to cin'yi bó le leese wase fitele ε è nu yî Jisos e.

Ɣ Jisos ley Jεlusalεm diεwε Nfon e

(Mat 21:1-11; Mak 11:1-11; Luk 19:28-40)

- ¹² Ɛ εκfuη buy yuu, ε kebombom ke bonyii le kè to toε fô ηkaw e yuw Ɣ Jisos nu ê je too Jεlusalεm.
- ¹³ Ɛ bó mum jo bidaayεε buy keegen efiisen wvù ê je. Ɛ bó gen no wvuuyi gayte Ɣ, “Eεεε, mbense enù fô Nyo' le Ɣεεε! Nyo' nu ε Ɣη κεmbonεn yî wee wvù too ê diee di Tata le Ɣεεε! È nu wvù Nfon wvu Islael Ɣεεε!”
- ¹⁴ Ɛ Jisos gom waa κεmbεεbey, ben. Ɛ fí mum no nu no bó to saηεε Ɣ,
- ¹⁵ “Bonyii bo Sayon, fo ben efanè κε. Ben etaa eyen, Nfon wene too lo, ε wvù ε ben yî waa κεmbεεbey e.”
- ¹⁶ Κε boom bo Jisos e bo ηgoo le to nu ε κieε fieε fi fieε fin duηci foηkew κε. Ɛ Jisos ke dioo ley wase bvukuke bwew e, ε bó mum kume Ɣ bó to saη fieε fin ε è nu εκume wvù, ε fí ε kooy wase bô wvù κε no bó to saηεε.
- ¹⁷ Κεbombom kè to nu bô bo Jisos diuu dì wvù to teηεε Laasalus ê jem bvuse yî kpwe le to nu ε gen bô nsee no bó to yeηεε.
- ¹⁸ Ɛ shiee wvù kebombom kedvu to buyεε keegen efiisen wvù ê je to nu nje bó to nu ε yuw Ɣ wvù to nu ε ge fieε fin fi duηci bvukuke bvυ Nyo' le.
- ¹⁹ Ɛ Bofalasii yen nen mum no jemyi εbonebon Ɣ, “Κε ben nu ε yen? Κε fieε nu dvù fi è nulo é ben ebvu ege κε. Woη tfuu nu ε shfum wase ε bi wvù le.”

Ɣ Boglek bomew no shieele keeyen Jisos e

20 Bonyii bomew to nu ηgoο bonyii b̀̀ to benεε Jelusalem keebunle Nyo' kefew ke ηkaw e kin ε ὲ̀ nu Boglek.

21 Ε Boglek ban gen yen Filew wv̀̀ to nen'yεε ὲ̀ kelaante k̀̀ Besayda le ὲ̀ keba k̀̀ Galilee le, gay ὲ̀ wv̀̀ le, "N̄gaywee, bese shieele keeyen Jisos e."

22 Ε Filew mum gen be Andulu dv̀̀, ὲ̀ b̀̀ wv̀̀ mum gen see ὲ̀ Jisos.

23 Ε Jisos tfuse ὲ̀ b̀̀ le, "Kefew nu ὲ̀ kocen wase k̀̀ wee wv̀̀ diee nu Waawee nu ekeηke diee d̀̀ kuuke.

24 Ε me ensee ὲ̀ ben kecεεy kecεεy le, ὲ̀ ηgow fiεε baa egbwe ỳ̀ nshε le ekpwe, ὲ̀ ỳ̀ emey ke enu ỳ̀ embeη. Geenεn ὲ̀ ỳ̀ kpwe lo, ὲ̀ ỳ̀ ke eyum mvuntam nteen.

25 Wee wv̀̀ kooηke nshii we baay nu ke elase nshii wvudvu, ὲ̀ wee wv̀̀ bane nshii we ỳ̀ woη wvun e nu ὲ̀ wv̀̀ gεεle lo keeke ekeηke nshii wv̀̀ mey lo.

26 Ε wee lemte me le, tu wv̀̀ keηke keebii me le, ὲ̀ naa fεε f̀̀ me nu, ὲ̀ wee wem lemme eǹ̀ ten f̀̀. Ὲ̀ wee lemte me le, tu Icεm nu ke ebuw wv̀̀."

Ε Jisos jeme εkume kpwe ye

27 Ε Jisos nε gay le, "Keseen nu ὲ̀ fitele buuke lo me. Ὲ̀ nulo ὲ̀ me εηgay le la? Le Icεm ebvuse me ὲ̀te jo kefew ke ηgew e kin e? 'Aay, ὲ̀ nu nje kefew kedvu kin wv̀̀ me nto ntoε.

28 Icεm, gee ὲ̀ diee diuw ekuuke." No wv̀̀ jeme nonεn, ὲ̀ diεw shii fowe le, "Me nu ὲ̀ ηge wase d̀̀ ὲ̀ no kuuke, ὲ̀ me mbεε ηke embvuu εηge."

29 Ε kebombom k̀̀ to leeme f̀̀ dioo yuw diεw yidvu, gay fibole le, "Ὲ̀ baykene jaη." Ε bomew gay le, "Ὲ̀ jemyi nceendaa Nyo' ὲ̀ wv̀̀."

30 Ε Jisos tfuse le, "Diεw yin to nje yene. Ke ỳ̀ to nje yem ke.

31 Keseen nu wase kefew k̀̀ b̀̀ nu esaw woη wvun. Keseen nu ὲ̀ b̀̀ nu eshwaw nfon wv̀̀ saake woη wvun.

32 Geenεn ὲ̀ fiem nu ὲ̀ seke b̀̀ ὲ̀ ke ὲ̀ n̄yεse me fowe, ὲ̀ me εηgufe bonyii bocii ὲ̀ b̀̀ eto ỳ̀ yem e."

33 Jisos to jemyi nonεn duηci ὲ̀ ὲ̀ nu kfuu kpwe ỳ̀ wv̀̀ nu ke ekpwe.

34 Ε kebombom ke bonyii le tfuse ὲ̀ wv̀̀ le, "Bese yuuke ὲ̀ N̄wa' bonci le le Mboyse wv̀̀ Nyo' to kawεε nu ke efele. Wo ὲ̀ ghan nεε ὲ̀ se no duu le b̀̀ keηke keeke n̄yεse wee wv̀̀ diee nu Waawee fowe? Wee wv̀̀ diee nu Waawee wvudvu nu wv̀̀ la?"

35 Ε Jisos gay ὲ̀ b̀̀ le, "N'yuu nu enu ben ὲ̀ b̀̀ ke ỳ̀ kefew e caan. Ben emum eleǹ̀ no ben keηke n'yuu ben ὲ̀ b̀̀, fo kejiwε ke nε ebaη ben. Ke wee wv̀̀ lenε ὲ̀ ε̄jiwε le k̀̀ no kee f̀̀ wv̀̀ gene ke.

36 No ben kɛŋke n'yuu ben ε bó, ben ebee n'yuu wvun e, wvu le ben emum enu boom bo n'yuu le.”

Diɛw Jisos nu ke esaw wee wvù nu ε faŋ keefiisen diɛw yidvu

No Jisos jemyɛɛ mwɛɛm mvun nen, mum nɛ gen nyiim.

37 Naa no wvù to nu ε cim ge mwɛɛm nteen mvù duŋci bvukukɛ bwew ε bó yɛn, bó to baa lese fitele yî ye le kɛ.

38 Ε fí to nu nonɛn wvu le fí ekocɛn no Yesaya wvù wee ntum Nyo' to jemyɛɛ le, “Tata, è nu yɛɛ dvù wvù nu ε bee fiɛɛ fi bese jemyi le? Ε è nu ê baa wvù Tata nu ε duŋcɛ mvuŋgay mvu kebo kew e?”

39 Nonɛn kɛ è to nulo é bó elese fitele yî ye le kɛ, njefo Yesaya to nu ε bvuu jeme bvudvuu bvumew e le,

40 “Wvù nu ε baŋ ejise ebo, ε ge mvuntelem mvubole ε no læ, wvu le fo bó eyɛnɛ mwɛɛm e bô ejise ebo, ekeè mwɛɛm ê mvuntelem mvubole, ekase etu jim é me enfɛ bó.”

41 Yesaya to jemyi mwɛɛm mvun njefo wvù to nu ε yɛn wase bvukukɛ bvɛ Jisos e, mum no jemyi ekumɛ wvù.

42 Naa no bonyii to baa cim nu keelese fitele yî Jisos e, nu ε bonyii nteen bô to nu naa bikuu bi woŋ e to lese fitele yî ye le, geenɛn faŋɛ yaa nu keejeme bô dew yibo kɛ, njefo bó to fane Bofalasii le fo bó ke ekuŋ bó yew bunle le.

43 Ε bó to fane nonɛn njefo bó to kooŋke keekɛŋke mbense ε è nu wvù nen'yi fô bonyii le efey keekɛŋke ε è nu wvù nen'yi fô Nyo' le.

44 Ε Jisos nɛ fuŋ foweɛwe gay le, “Wee wvù nu ε lese fitele yî yɛm e, nu ε wvù yaa lese ε è nu yî yɛm e kɛ. Wvù lese ε è nu yî wee wvù tum me le.

45 É wee yɛn me le, tu wvù yɛn ε è nu wee wvù tum me le.

46 Me nu ε nto ê woŋ jan diɛwɛ n'yuu le wvu le naa yɛɛ wvù nu ε lese fitele yî yɛm e wvù saa ebvuu emɛy enu ê ejiwɛ le kɛ.

47 É wee yuw diɛw yɛm, ε faŋɛ yaa egɛɛ, me nsaa enlese wvù ŋɛw e kɛ, njefo kɛ me nto nto keenlese bonyii bo yî woŋ wvun e ŋɛw e kɛ. Me nto nto keemboyse lo bó.

48 Wee wvù nu ε ma me ε faŋ keefiisen diɛw yɛm kɛŋke fiɛɛ fi nu ke esaw wvù. Diɛw yì me nu ε njeme ê wvù nu fiɛɛ fi nu ke elese wvù ŋɛw e diuu di fokemɛɛ.

49 Fí nu nonɛn njefo kɛ me njemyi ε è nu ê mvuŋgay mwem e kɛ. Icɛm wvù tum me nu wvù wvù gay le me enjemyi, ε è nya wvù fiɛɛ fi me enjemyi, ε see no me enjemyi.

50 Ε me ŋkee le fiɛɛ fi wvù gay le me enjemyi nu fi nyaa nshii wvù mɛy lo. Nonɛn fiɛɛ fi me njemyi nu fi Icɛm nu ε gay le me enjemyi.”

Jon 13

Ɛ Jisos cuke bikaa bi boom bew bo ngoo le

- 1** Ɛ è ke no nu wase bvù ekfunu nu ebuy eyuu é emum enu Nkaw Danɛfey, Ɛ Jisos kiiɛ le kefew kè wen nu ecine won wvun e, ekase egen fô Icee wen e nu Ɛ kocen wase. No wvú to koonke bonyii bò è to nu bew yí won wvun e, Ɛ wvú kon bó gen mese.
- 2** Ɛ bó ke no diekene fokiegguu, Ɛ dawle Ɛ lese wase nkpwawce ê fitele fi Judas wvù waa Semon Iskalot e le wvú egese Jisos.
- 3** No Jisos to kee wase le Icee wen nu Ɛ nya wase mwɛɛm mvunciim can wen e, bò le wen to ne fô Nyo' le Ɛ wen kaase tuu jim fô Nyo' le,
- 4** Ɛ wvú mum ne ê we jo mwɛɛm mvudien, baaye bikum biew, jo ndvu yì bó shole ye dvú, seɲ yí mvuntem e,
- 5** mum tfuw joo ê nkaa le, kew no cuke bikaa bi boom bew bo ngoo le dvú, shole bò ndvu yì wvú to seɲɛ yí mvuntem e ye.
- 6** Ɛ wvú ke cuke to buy fô Semon Bita le, Ɛ wvú bife ê wvú le, “Tata, è nu ecuke wo bikaa biem e?”
- 7** Ɛ Jisos tfuse ê wvú le, “Ke fiɛ fi me ngee nu Ɛ wo nulo ekiiɛ keseen ke. Wo nu ke ekiiɛ Ɛ è nu ejim.”
- 8** Ɛ Bita gay ê Jisos le, “Ke è nulo é wo ke eyuu ecuke bikaa biem ke.” Ɛ Jisos tfuse ê wvú le, “É me mbaa encuke wo, wo saa ekeɲke fiɛ bee wo ke.”
- 9** Ɛ Semon Bita mum gay ê Jisos le, “Tata, é è fen nu nonen, tu ke wo nu ecuke ke Ɛ è nu bikaa biem maan ke. Wo nu ecuke ten can yem bò ekole kem fó.”
- 10** Ɛ Jisos gay ê wvú le, “Wee wvù nu Ɛ cuke wase ye nu Ɛ wvú yuule wase ye yicii, Ɛ shiee yaa bvuu nu keebvu ecuke efey bikaa ke. Ben nu Ɛ ben yuule wase, geenen ke è yaa nu ben bocii bò yuule ke.”
- 11** Jisos to jemyi nonen njefo wvú to kee wase wee wvù nu ke egese wvú. È nu fiɛ fi wvú to gayɛ le, “Ke ben yuule bocii ke.”
- 12** Ɛ Jisos ke mese cuke bikaa bibole, tfume bikum biew, kase gen tu fô bvudvu bwew e, mum bife ê bó le, “Ben nu Ɛ kiiɛ fiɛ fi me nge fô ben e fin e?”
- 13** Ben teɲe me le Wee N'yɛɛyi bvuu teɲe le Tata, Ɛ ben teɲe Ɛ è nu leɲ nonen njefo è nu fiɛ fi me nu.
- 14** É me wvù nu Tata wene bvuu nu Wee wene N'yɛɛyi nu Ɛ cuke bikaa binen, tu ben ten keɲke keecukè bikaa bi wee noo wee le.
- 15** Me nge nonen nduɲci lo ê ben le ben egeè ten no me nge fô ben e.

16 É me ensee ê ben keceey keceey le ke waa lemme ké no kuuke fele cee ekole we ke, e ke wee wvù bó tum lo ké no kuuke ten fele wee wvù tum wvú ke.

17 É ben kee mwεem mvun, e no gee mvú, é njonj wvu baay enu wene.

18 Ke me njemyi e è nu ekume ben bocii ke. Me ηkee bonyii bò me nu e ncaw. Geenεn, e fí nu le fiεε fi nu ê Nwa' Nyo' le keηke keeke eto ekocεn no bó to saηεε le, 'Wee wvù diee mwεem mvudien mwem nu e ne e no bii bikaa biem e.'

19 Me nseηe fiεε fin ê ben keseen é fí se keeke ekooyi, wvu le fí ke dioo e kooy, é ben emum ebee le è nu naa me wvudvu.

20 É me ensee ê ben keceey keceey le wee wvù nu e fiisen naa wee wvù la wvù è tum me, nu e wvú fiisene e è nu me. E wee wvù fiisene me fiisene e è nu wee wvù tum me."

E Jisos duηεe wee wvù nu egese wvú

21 No Jisos jeme mwεem mvun nen, e fitele ne no buuke wvú. E wvú ne jeme lo teytey gay le, "É me ensee ê ben keceey keceey le wee mvu ben e nu egese me."

22 E boom bew bo ηgoo le ne no taayine ye maa laa wvú jemyi e è nu wee wvù la le.

23 Wee mvu ηgoo boom bo Jisos e wvù Jisos to kooηke to yeeme diekene naa mbew ye le.

24 E Semon Bita kpwase wvú gay le wvú ebife ê Jisos le laa wvú jemyi e è nu yeε le.

25 Nonεn e wvú yeem gen yî Jisos e bife ê wvú le, "Tata, è nu yeε?"

26 E Jisos tfuse ê wvú le, "È nu wee wvù me nu eηguse blεed encuw ê nshew mbase le enya ê wvú." Nonεn e wvú mum cuw blεed ê nshew mbase le nya ê Judas wvù waa Semon Iskaliot.

27 Ke no Judas fi blεed wvudvu nen, e Satan mum ley yî ye le. E Jisos gay ê wvú le, "Yaηsen ege fiεε fi wo gomte keege."

28 Wee mvu ηgoo bó le to baa kieε fiεε fi wvú jemyi ê wvú nonεn ke.

29 Bomew to kpwaake le no Judas to nu wee wvù gεele ekele nu e Jisos jemyi ê wvú le wvú egen eguy mwεem mvù bó shieele keedie Nkaw dvú, keηεε le wvú egen enya fiεε ê bonyii bò fuute.

30 No Judas fi blεed wvudvu nonεn e die, mum buy lo kaη mwaaj gen. Sekekie to nu wase entaη.

E Jisos tefe kpwe ê boom bew bo ηgoo le

31 No Judas buyεε wase gen nonεn, e Jisos shεε gay le, "Keseen nu e bó nu ekew eyene bvukuke bvú wee wvù diee nu Waawee le, emum eyene ten bvukuke bvù è nu bvú Nyo' le yî ye le.

32 É bó yɛn bvukukɛ bvɔ Nyo' le yí ye le, tu Nyo' nu edunɛ tɛn bvukukɛ bvɔ Waa we le yí wvú wvù Nyo' le. Ɛ wvú nu edunɛ lo kaŋ mwaan.

33 Boom bem, me nu enu beene kɛ wase yí kefew e nen caan. Ben nu ke eshɛɛ egom me saa eyen kɛ. No me nto ŋgayɛɛ ê Bojuu, nu no me ŋgayte ê ben keseen le, 'Fô me ŋgene nu ɛ kɛ ben nulo eto fó kɛ.'

34 Me nyaa nci ê ben, ɛ è nu nci wvu fwe le ben dioo ɛ shɛɛ no koŋenè. Ben ekoŋenè kɛ naa leŋleŋ no me nu ɛ ŋkoŋ ben.

35 É ben shɛke ɛ no koŋene nonɛn, é fifin ege é bonyii bocii emum ekisɛ le ben nu boom bem bo ŋgoo le."

Ɛ Jisos gay le Bitá nu ke ema wen

(Mat 26:31-35; Mak 14:27-31; Luk 22:31-34)

36 Ɛ Semon Bitá mum bife ê Jisos le, "Tata, wo gene ɛ è nu fɛɛ?" Ɛ Jisos tfuse le, "Fô me ŋgene nu ɛ kɛ è nulo é wo ebi me le keseen kɛ. Wo nu ke eshɛɛ sɛ bi."

37 Ɛ Bitá kase bife ê wvú le, "Tata, kɛ è nulo é me mbi wo le keseen nje la? Me nu ŋke enya nshii wɛm keeŋkpwe nje yo."

38 Ɛ Jisos Bife ê wvú le, "Wo nulo enya nshii wo keekpwe nje me? É me ensee ê wo keɛɛy keɛɛy le kɛ nyimshie nu ke etoŋ sɛ wo ɛ ma wase me bokaŋ botɛte kɛ."

Jon 14

Jisos nu Je yí gene fô Nyo' le

1 Ɛ Jisos bvuu jeme ê boom bew bo ŋgoo le le, "Fo ben ecine é mvuntelem mvunen ebuuke kɛ. Ben elese fitele yí Nyo' le, elese tɛn fitele yí yɛm e.

2 Yew dvu Icɛm, nu ɛ bibuw nu dvú nteen. É fí be baa enu nonɛn, tu me mbaa ŋgayte le me ŋgene nseyse bvudvuu ê ben kɛ.

3 Ɛ me nu ndioo ɛ ŋgen ɛ nseyse bvudvuu ê ben, eŋkase ento enjo ben é beene enu, wvu le fò me nu, é ben enù tɛn fó.

4 Ɛ ben kee wase je yí gene fô me ŋgene."

5 Ɛ Toma mum gay ê wvú le, "Tata, kɛ bese kee fô wo gene kɛ. Bese nu eghan nɛɛ sɛ kisɛ je yidvu?"

6 Ɛ Jisos tfuse le, "È nu me je, ɛ è nu me keɛɛy, ɛ è nu me nshii. Kɛ wee nulo egen fô Icɛm e sɛ wvú ɛ fey yí yɛm e kɛ.

7 É ben be kee me, tu ben bee kee tɛn Icɛm. Ɛ kɛw yí keseen e nu ɛ ben ɛ kisɛ wase wvú ɛ bvuu ɛ yɛn wvú le."

8 Ɛ Filew gay ê wvú le, "Tata dunɛ Ico ê bese, é bese eyen emum effuu."

9 Ɛ Jisos tfuse ɛ wvú le, “Filew, beene nu ɛ ce wase baay nen se wo kee me le? Wee wvù nu ɛ yen me le, nu ɛ wvú ɛ yen wase Icɛm e. Wo nulo eghan nɛɛ le se ebvuu egayte le me enduɲɛ Icɛm ê ben?”

10 Wo baa bee le me nu yî Icɛm e, ɛ Icɛm nu yî yem le? Njeme wvù me njemyi ê ben nu ɛ ke me njemyi yî mvuɲgay mwem e ke. Icɛm wvù nu yî yem e nu wvù gee dilemme diew.

11 Ben ebee me le le me nu yî Icɛm e, ɛ Icɛm nu yî yem e. Ê ben baa bee me le nje fiɛɛ fi me ɲgayte, ê ben bee nje dilemme dî me ɲgee le.

12 Ê me ensee ê ben kecɛɛy kecɛɛy le wee wvù nu ɛ lese fitele yî yem e nu ke egee ten dilemme dî me ɲgee. Ɛ wvú nu ke ege dilemme efey naa dî me nu ɛ ɲge, njefo me ɲgene wase fô Icɛm e.

13 Naa la fi ben ɛ bife ê diee diem e, é me ɲge fí, wvu le Icee Wan nulo ekeɲke diee dî kuuke nje Wan.

14 Ê ben bife naa la ê diee diem e, é me ɲge fí.

Ɛ Jisos kaw bonyii bew bô Keyoy ke Yuule

15 Ê ben kooɲke me, é ben egɛɛlè bonci bem,

16 é me ɲke enleke ê Icɛm é wvú enya ben bô wvumvu Wee Nfi é wvú enu ben ɛ bó sekecii.

17 Wee wvun nu Keyoy ke kecɛɛy e. Ke wvú nu wee wvù è nulo é bonyii bò è nu bo yî woɲ wvun e efiisen wvú ke, njefo ke bó yene wvú le kenɛɛ kee wvú ke. Ben nu finen ɛ ben kee wvú, njefo wvú cee ben ɛ bó, ɛ wvú nu ke enu yî yene le.

18 Ke me nu ɲke encine ben e é ben enu diewe boom bo boɲkfu le ke. Me nu ɲke ɲkase ento enu beene.

19 È shɛɛte wase caan é bonyii bò è nu bo yî woɲ wvun e saa ebvuu eyen me le ke. Geenen, ben nu ke eyen me le. No me nu ɲke enu dvú, nu ɛ ben ten nu ke enu dvú.

20 È nu ke enu ebvubwe é ben ekieɛ le me nu yî Icɛm e, ɛ ben nu yî yem e, ɛ me nu yî yene le.

21 Wee wvù kee bonci bem gɛɛle, nu wvuwe wvù kooɲke me. Ɛ wee wvù kooɲke me nu ɛ Icɛm nu ke ekooɲke wvú. Ɛ me nu ɲke ɲkooɲke ten wvú, enduɲɛ ekole kem ê wvú.”

22 Ɛ Judas wvumvu (ɛ è yaa nu ke we wvù bó teɲe le Iskaliot ke) bife ê wvú le, “Tata, fí ghan nɛɛ le fi wo nu ke eduɲɛ ekole kuw ɛ è nu ê bese, ɛ è yaa nu ê bonyii bò è nu bo yî woɲ wvun e ke?”

23 Ɛ Jisos tfuse ê wvú le, “Ê wee kooɲke me, é wvú egɛɛlè njeme wɛm, é Icɛm ekooɲke wvú, é bee Icɛm ke eto fô wvú le ecee bee bó.

- ²⁴ Kε wee wvù baa kooŋke me ké no gæle njeme wem κε. Kε njeme wvù ben yuuke nu wem κε. Ê nu wvu Icem wvù tum me.
- ²⁵ Mwæem mvun nu ε me njemyi ê ben mbæe beene.
- ²⁶ Geenɛn, Wee Nfi wvù è nu Keyoy ke Yuule wvù Icem nu ke eciinse ê diee diem e nu ke eyeyi ben bô mwæem mvunciim ebvuu ege é ben ekumyi mwæem mvunciim mvù me nu ε njeme wase ê ben.
- ²⁷ Me nu ε ηγεε nyεkeey læ wvù enu ben ε bó. Me nyaa nyεkeey wvù è nu wvuwem ê ben. Kε me nyaa nyεkeey wvun ê ben no bonyii bô è nu bo yí woŋ wvun e ké no nyaa κε. Fo ben ecine é mvuntelem mvunen ebuuke kenεε keŋke jaŋ κε.
- ²⁸ Ben nu ε yuw wase no me ηgayte læ me ηgene wa lo, ε me nu ηke eŋkase ento enu beene. Ê ben be kooŋke me, tu ben bee elanlaŋe lo, njefo me ηgene ε è nu fô Icem e, no Icem kuuke fele me.
- ²⁹ Keseen nu ε me ε njeme wase fiεε fin ê ben é fí sε keeke ekooy, wvu læ fí ke dioo ε kooy, é ben emum ebee me le.
- ³⁰ Kε me mbæe embvuu enshe enjemyi beene baay κε, njefo nfon wvù saake woŋ wvun too wase. Kε è nu læ wvù keŋke mvuŋgay ê me ê we κε.
- ³¹ Geenɛn, me ηgee ε è nu no Icem nu ε gay læ me eŋgeè wvu læ bonyii bô è nu bo yí woŋ wvun e nulo ekieε læ me ηkooŋke Icem. Ben eja we é bó enε.”

Jon 15

Jisos nu kete ε bonyii bew nu tíew yidvu

- ¹ “È nu me tweŋ kete ke mvuntam e ke cæy cæy, ε Icem nu wee wvù seysee tweŋ wvudvu.
- ² Tíew yem yicii yì baa yumte mvuntam, nu ε wvù ke faashe bvuse, ε yì yumte mvuntam nu ε wvù ke seyse kpwεε wvu læ yí eyuule emum eyumte mvuntam nteen.
- ³ Njeme wvù me njeme wase ê ben nu ε ge wase ben ε no yuule.
- ⁴ Ben emey enù yí yem e, é me enu ten yí yene le. Kε tiεw nulo eyum mvuntam eyineyin sε yí nu yí kete le κε. Ê nu ke læŋlɛŋ no κε è nulo é ben ege fiεε sε ben nu yí yem e κε.
- ⁵ È nu me tweŋ kete ke mvuntam e, ε ben nu tíew yidvu. Wee wvù nu yí yem e ε me nu ten yí ye le, nu wvuwe wvù nu diεwe tiεw yì nulo eyumte mvuntam nteen e, njefo é me mbaa enu, wee saa ege fiεε κε.
- ⁶ Wee wvù nu sε wvù ε mεy ε no nu yí yem e nu diεwe tiεw yì bó efaŋe elan lo, é yí eyumten e. Kfuu yiye tíew nu ε bó nu ke ebaance elan ê ηguy e é yí efie lo.

- 7 É ben mey e no nu yí yem e e diew yem nu yí yene le, ben é bife naa la fi ben shieele, é bó ege fí fô ben e.
- 8 É ben nu diewe tíew yí yumte mvuntam nteen e, é fifin enyaa diee di kuuke ê Icem, emum eduñci le ben nu bonyii bem bo ηgoo le.
- 9 No Icem koonke me nu ke lenlen no me ηkoonke ben. Ben emum emey enu ente jo kenkonen kem.
- 10 É ben gæle bonci bem, é ben emey enu ente jo kenkonen kem, ke no me nu e ηgeε bonci bo Icem e e mey e no nu ente jo kenkonen kew.
- 11 Mwæem mvun nu e me njemyi ê ben wvu le njon wem nulo enu fô ben e, é ben emum ekenke njon wvù nu e yiñsen.
- 12 Nci wem nu wvun wvù nu le ben ekonenè ke no me ηkoonke ben.
- 13 Ke kenkonen kemew bvuu nu dvú kè kuuke fele kè le wee enya nshii we ekpwe nje nsáa ye ke.
- 14 É ben gee fiε fi me ηgayte le ben egeè, tu ben nu nsáa yem.
- 15 Ke me mbvuu nteje ben le boom bo lemme le ke, njefo ke waa lemme ké no kee fiε ficii fi cee ekole we gee ke. Me nteje wase ben le nsáa yem njefo fiε ficii fi me n'yuw ê Icem nu e me e ηge wase ben e kiεε.
- 16 Ke è to caw ben me ke. È to caw me ben, mbaa ηgeε le ben egen enu diewe tíew yí yumte mvuntam e, mvuntam e è nu mvù nu ke emey nu dvú le. É ben gee nonen, naa la fi ben e bife ê Icem ê diee diem e é wvú enya ê ben.
- 17 Nci wvù me nyaa ê ben nu ke wvun wvù le, ben ekonenè.

Ɛ Jisos gay le woñ wvun nu ke ebane bonyii bowene

- 18 É bonyii bò è nu bo yí woñ wvun e bane ben, é ben no kee le bó to yaw kew no bane e è nu me e se no bane ben.
- 19 É ben be nu bonyii bo yí woñ wvun e, tu bonyii bò è nu bo yí woñ wvun e be koonke ben diewe bonyii bobole. Geenεn, ke ben baa nu bonyii bo yí woñ wvun e ke. Me nu e ncaw wase ben e mbvuse ente jo bonyii bo yí woñ wvun e. È neε fiεε fi bonyii bò è nu bo yí woñ wvun e bane ben.
- 20 Ben ekume njeme wvù me nto njemyεε ê ben le ke waa lemme ké no kuuke fele cee ekole we ke. É bó bone bikaa ê me ejim, tu bó nu ke ebon ten ê ben ejim. É è be nu le bó yuuke njeme wem e, tu bó nu ke eyuw ten wene le.
- 21 Fin nu fiεε fi bó nu ke ege bô ben nje me, njefo ke bó yaa kee wvú wvù to tumεε me ke.
- 22 É è be baa nu le me nu e nto e njeme ê bó, tu bó be baa ekenke jay ke. Geenεn, keseen nu e ke bó kenke fiεε keetaje diuw dvú yí bibefe bibole ke.

23 Wee wvù bane me nu ε wvú bane Icem ten.

24 É è be baa nu le me nu ε ηge kfuu dilemme dì wee ke baa yuu ge wase enteleη jo bó, tu bó be baa ekeηke jay ke. Geenεn bó nu ε yen, ε no bane ke me noo Icem.

25 Fifin nu nonεn keege é diεw eto ekocεn no bó to saηεε ê Nwa' bonci bobole le, 'Bó ban me εcici.'

26 Geenεn, Wee Nfi wvù me nu ηke enciinse nu ke eto ε wvú ne fô Icem e. Wee Nfi wvun nu wvù è nu naa Keyoy ke keceey e kè nen'yi fô Icem e. Seke wvú ε to, wvú nu ke eben jim nsaw wεm.

27 Ben ten nu ke eben jim nsaw wεm, njefo ben nu ε no nu beene ε kew foηkew."

Jon 16

1"Me njemyi mwεεm mvun mvunciim ê ben wvu le fo ben ke egbwe yî mbee wene le ke.

2 Bó nu ke ekuη ben yéw bunle le. Yî keceey e, kefew too lo kè wee nu ke edioo yuu wee mvu ben e, eyuu kpwaake le wen gee ε è nu lemme dì jee fô Nyo' le.

3 Ε bó nu ke egee nonεn, njefo ke bó baa kiεε wase Icem kenεε me ke.

4 Me njemyi mwεεm mvun mvunciim ê ben nen wvu le seke kefew kedvu ε kocεn, é ben ekume le me nto nu ε njeme wase ê ben ekume mvú.

Lemme dì Keyoy ke Yuule nu ke eto egee

Me nto mbaa njeme mwεεm mvun ê ben foηkew ke, njefo me nto ηké no nu ke beene.

5Keseen nu ε me ntuu wase jim fô wvú wvù to tumεε me le. Geenεn, wee mvu ben e baa cim bife ê me le laa me ηgene fεε le.

6 Ben nu yii yii njefo me nu ε njeme wase mwεεm mvun ê ben.

7 Naa no fí cim nu nonεn, é me ensee ê ben keceey le, è nu lo fiεε fi jee fô ben e le me eηgen. É me nu se me ε ηgen, Wee Nfi wε saa eto fô ben e ke. Geenεn, é me ηgen lo, emum enciinse wvú fô ben e.

8 Ε wvú nu ke edioo ε to, etooshε bonyii bò è nu bo yî woη wvun e, ege é bó eyen kebefε kebole, ege é bó eyen fiεε fi è nu nce wvu teytey, ege ten é bó eyen fi è nu nsaw Nyo'.

9 Wvú nu ke ege é bó eyen kebefε kebole no bó baa lese fitele yî yεm e ke,

10 ege é bó eyen fiεε fi è nu nce wvu teytey no me ηgene wase fô Icem e, ε ben yaa bεε ke ebvuu eyen me le ke.

11 Ε wvú nu ke ege é bó eyen fiεε fi è nu nsaw Nyo' njefo nfon wvù saake woη wvun nu ε nsaw ε koo wase wvú.

12 Me mbɛɛ ɲkɛɲke naa mwɛɛm nteen keenjeme ê ben, geenɛn kɛ è nulo é mvú eley bitem binɛn e keseen nɛay kɛ.

13 Seke wvú wvù Keyoy ke keɛɛy e e to, efi ben é ben ekieɛ keɛɛy keɛii. Kɛ wvú yaa nu ke ejemyi e è nu yî mvunɲay mwew e kɛ. Fieɛ ficii fi wvú nu e yuw nu fí fi wvú nu ke ejemyi, mum seɲe ê ben mwɛɛm mvù nu ke eto.

14 Wvú nu ke eduɲɛ bvukukɛ bwem, no wvú nu ke ejoo e è nu fieɛ fi è nu fiem seɲe ê ben.

15 Fieɛ fi Icɛm e ficii nu fiem. È nɛɛ fieɛ fi me ɲgayte lɛ wvú nu ke ejoo e è nu fieɛ fi è nu fiem seɲe ê ben.

Yii boom bo ɲgoo le bo Jisos e nu ke etu nlanɲaɲ

16 È shɛɛte wase caan ben saa ebvuu eyɛn me le kɛ, dioo e moocɛ caan é ben ebvuu ekase eyɛn me le.”

17 No Jisos jeme nonɛn, e boom bew bo ɲgoo le bomew ghay ebonebon lɛ, “È sɛ nu la fi wvú gayte ê beene lɛ, è shɛɛte wase caan beene saa ebvuu eyɛn wen e kɛ, ke dioo e moocɛ caan ebvuu ekase eyɛn wen e, bô lɛ wen ɲɛne fô Icee wen e?”

18 Fieɛ fi wvú sɛ duu lɛ è shɛɛte wase caan sɛ nu naa lɛ la? Kɛ beene baa kieɛ fieɛ fi wvú jemyi nonɛn kɛ.”

19 E Jisos dioo kieɛ lɛ bó gomte keebife ê wen fieɛ fi wen jeme, mum bife lɛ, “Ben ghayte ebeneben ekumɛ fieɛ fi me ɲgayte lɛ, ‘È shɛɛte wase caan ben saa ebvuu eyɛn me le kɛ, ke dioo e moocɛ caan é ben ebvuu ekase eyɛn me le’ le?”

20 É me ensee ê ben keɛɛy keɛɛy lɛ, ben nu ke ebeele kpwe, fuunɲke e bonyii bô è nu bo yî woɲ wvun lanɲaɲe lo fibole. Ben nu ke enu yî yii le, geenɛn e yii yene yin nu ke enɛ etu nlanɲaɲ.

21 Kpwoon ké dioo nu yî lume le, no yuuke nsase, njefo kefew kew keeboo nu e kocɛn wase. É wvú ké dioo e boo wase wan, wvú saa ebvuu ekumyi nsase wvudvu kɛ, njefo wvú yuuke wase e è nu njoɲ lɛ wee wvu wum nu e to yî woɲ e.

22 È nu kɛ no fí nu fô ben e keseen. Ben nu yii yii, geenɛn e me nu ɲke endioo e ɲkase e n'yɛn ben e, é ben ekɛɲke wase e è nu nlanɲaɲ fô mvuntelem mvunɛn e, e wvuwe nlanɲaɲ nu ke enu wvù wee yaa nulo ke efi ê ben kɛ.

23 È nu ke enu kefew kekie lɛ, ben saa ebvuu ebife fieɛ ê me kɛ. É me ensee ê ben keɛɛy keɛɛy lɛ, é ben bife naa la ê Icɛm, é wvú enya fieɛ fidvu ê ben ê diee diem e.

24 E kew lo e to e buy keseen e, nu e ben ke baa bife wase fieɛ ê Icɛm ê diee diem e kɛ. Ben ebife, é ben ekɛɲke, wvu lɛ nlanɲaɲ wene eyiɲsɛn.

25 Me njemyi njeme wvun e è nu kɛ ê boɲgan e, geenɛn kefew too lo kè me n'yaa mbɛɛ ɲke embvuu enjeme ê ben ê boɲgan e kɛ. Me nu ɲke enjemyi wase ê ben e è nu endan ekumɛ Icɛm.

²⁶È nu ke enu kefew kekɛ le, é ben biite fiɛɛ ê Icɛm ê diee diem e. Kɛ me ŋgayte ê ben lɛ me nu ŋke enlɛkɛ fiɛɛ ê Icɛm ben e kɛ.

²⁷Icɛm kebɛɛ kooŋke ben, njefo ben nu ɛ koŋ me ɛ bvuu ɛ bee lɛ me nɛ fô wvú wvù Icɛm e.

²⁸Me nto nɛ fô Icɛm e nto yî woŋ wvun e, ɛ no nen'yi wase yî woŋ wvun e ntuu jim fô Icɛm e.”

²⁹No Jisos jeme nonɛn ɛ boom bew bo ŋgoo le bɛnse lo gay lɛ, “Aŋghaa! Wo jemyi naa keseen teyɛy ɛ è yaa bvuu nu ê boŋgan e kɛ!

³⁰Keseen nu ɛ bese ɛ yɛn wase lɛ wo kee mwɛɛm mvunciim yaa cɛyɛ lɛ wee ke ebife kɛ lo fiɛɛ ê wo kɛ. Fifin nu ɛ ge bese ɛ mum ɛ bee lɛ wo nɛ fô Nyo' le.”

³¹È Jisos tfuse ê bó lɛ, “Ben fɛn nu ɛ bee keseen e?

³²Kefew too lo, ɛ kí ɛ to naa wase, kè ben nu ke etawse mwaan mwaan é wee egene ê wvú yew, cinɛ me le me embɛŋ. Geenɛn kɛ me nu me embɛŋ kɛ, njefo Icɛm nu bee wvú.

³³Me njemyi mwɛɛm mvun ê ben wvu lɛ no ben nu yî yɛm e, ben emum ekeŋkè nyɛkeey. Yî woŋ wvun e nu ɛ ben keŋke boŋgɛw, geenɛn ben esakenè. Me nu ɛ nso wase woŋ wvun.”

Jon 17

È Jisos bunle fô bonyii bew e

¹È Jisos ke jeme njeme wvun mɛsɛ, mum nɛ cake ɛjisɛ taa we bunle lɛ, “Icɛm, kefew nu ɛ kocɛn wase. Duŋcɛ bvukukɛ bvuu Waa wo le wvu lɛ Wan tɛn nulo eduŋcɛ bwuw bvukukɛ.

²Wvú nulo eduŋcɛ njefo wo nu ɛ nya mvuŋgay ê wvú ê we jo wee wvu wum tfuu lɛ wvú enya nshii wvù mɛy lo ê boba bocii bò wo nu ɛ nya ê wvú.

³È nshii wvù mɛy lo wvun nu fin fi lɛ bó ekeè wo wvù è nu kɛ wo Nyo' wvu kecɛy, ebvuu ekeɛ tɛn me wvù Jisos Klistu wvù wo to tumɛɛ le.

⁴Me nu ɛ nduŋcɛ wase bvukukɛ bwuw yî nshɛ le no me nu ɛ mɛsɛ lemme di wo to nyaɛ lɛ me enlem e.

⁵Yî keseen e Icɛm, kase enya me bvukukɛ mbew yo le bvù me nto nshɛ ŋkeŋke fwele ɛ woŋ sɛ ke kɛw e.

⁶Me nu ɛ nduŋcɛ wase wo ê bonyii bò wo to baayɛɛ ê woŋ jan nya ê me le. Bonyii ban to nu buw, ɛ wo mum nya bó ê me. È bó nu ɛ yuw diɛw yo le.

⁷Bó nu ɛ kiɛɛ wase keseen lɛ fiɛɛ ficii fi me ŋkeŋke nu ɛ fí nɛ ɛ è nu fô wo le.

⁸Me njemyi nen njefo me nu ɛ nya wase diɛw yì wo to nyaɛ ê me ê bó, bó ɛ fiisɛn, ɛ mum ɛ kiɛɛ yî kecɛy e lɛ me nɛ fô wo le, ɛ bee tɛn lɛ è to tum wo me.

- ⁹Me mbunlee nen ε è nu fô boban e. Ke me mbunlee ε è nu fô boba bò è nu bo yî woŋ wvun e ke. Me mbunlee ε è nu fô boban bò wo nu ε nya ê me le, njefo è nu bonyii buw.
- ¹⁰Bonyii bocii bò me ηκηκε nu bonyii buw, ε bonyii bocii bò wo κηκε nu bem. È nu yî bó le wvù bvukuke bwem yen'yi.
- ¹¹Keseen nu ε me n'yaa mbεε ê woŋ jan ke. Geenen bó bεε ê woŋ jan, ε me ηkaase wase ntoo fô wo le. Icεm wvù yuule, gεεε bó ê diee diuw dî wo nu ε nya ê me le, wvu le bó nulo enù yî wee le mwaanη ke naa no bee wo nu yî wee le mwaanη.
- ¹²Seke me nto nu bee bó, me nto nu ε ηγεε bó ê diee diuw dî wo nu ε nya ê me le. Me nu ε ncεyεy bó wee mvu bó le baa la, efey ke wvuwe wvù to nu wase wee wvù nu ke ela le. E fifin to nu wvu le fiεε fi bó saηεε ê Nwa' Nyo' le eto ekocεn.
- ¹³Keseen nu ε me ηkaase wase ntoo fô wo le, ε mwεem mvun nu ε me njemyi mbεε yî woŋ wvun e wvu le è nulo é bó eκεηκε njoŋ wvu wεm ε wvú ε yiηsen yî bó le.
- ¹⁴Me nu ε nya wase diεw yo can yibole, bonyii bò è nu bo yî woŋ wvun e ε mum ε no bane bó njefo ke bó nu bonyii bo yî woŋ wvun e ke, ληληη no ke me nu wee wvu yî woŋ wvun e ke.
- ¹⁵Ke me mbunlee nen λε wo ebvuse lo bó yî woŋ wvun e ke. Me mbunlee ε è nu λε wo egεgem bó fo bó eley can wee kebefε wε le.
- ¹⁶Ke bó nu bonyii bo yî woŋ wvun e ke, ληληη no ke me nu wee wvu yî woŋ wvun e ke.
- ¹⁷Seyse bó egεε é bó eyuulè ente jo keceεy. Diεw yo nu keceεy.
- ¹⁸No wo to tumεε me yî woŋ wvun e, nu ke ληληη no me nu ε ntum bó yî woŋ wvun e.
- ¹⁹Me ε mum ε nseyse εkolε kem ε ηγεε nje bó, wvu le è nulo ten é bó eseyse bibole bikuu egεε yî keceεy.
- ²⁰Ke me mbunlee ke ε è nu fô bonyii ban e maanη ke. Me mbunlee ten fô bonyii bocii bò nu ke eyuw diεw yibole elese fitele yî yεm e.
- ²¹Me mbunlee λε bó bocii ke enu yî wee le mwaanη ke naa no wo wvù Icεm nu yî yεm e ε me nu yî yo le. Me mbunlee λε bó ten ke enu yî yese bee wo le wvu le bonyii bò è nu bo yî woŋ wvun e ebee λε è to tum wo me.
- ²²Bvukuke bvù wo to buwεε me dvú nu ε me ε nya wase ê bó wvu le bó nulo enù yî wee le mwaanη, ke naa no bee wo nu yî wee le mwaanη,
- ²³ε me nu yî bó le, ε wo nu yî yεm e. Λε bó elooci nù yî wee le mwaanη, nonen é bonyii bò è nu bo yî woŋ wvun e emum ekieε λε è tum wo me, ε wo kooηke bó ke naa no wo kooηke me.

24 Icɛm, me nshieele le boba bò wo nu ε nya ê me ke enu ten bee bó fô me nu, wvu le bó ke eyen bvukuke bvù wo to nyaε ê me nje kenkonen kuw fô me le ε woŋ wvun sε ke kεw e.

25 Eεy Icɛm wvu teytey, ke bonyii bò è nu bo yî woŋ wvun e kee wo ke, geenεn ε me ηkee wo, ε bonyii bem ban nu ε kieε le è tum wo me.

26 Me nu ε ηge wase bó ε kieε wo, ε me mbεε ηke engee ke ε bó kee wo, wvu le kenkonen kè wo nu ε koŋ me dvú nulo enu yî bó le, ε me ten nu yî bó le.”

Jon 18

ε bó tum bonyii bo nci le ε bó gen koo Jisos

(Mat 26:47-56; Mak 14:43-50; Luk 22:47-53)

1 E Jisos ke bunle mεse, ε bô boom bew bo ηgoo le ne fô, gen lente keloŋe kè bó teŋe le Kidlon, buy kewvu keki fô wεε ketaaŋ wvumew e, mum ley jó.

2 È to nu ε Judas wvù to gesεε Jisos kee ten bvudvuu bvudvu, njefo Jisos bô boom bew bo ηgoo le to ké no gene taashi fô εfonεfon.

3 Nonεn, ε Judas mum gen fô bô ηgoo bonyii bo nci le noo bonyii bomew bò to cεyte yew ncese. Bonyii ban nu ε è to tum bocee ncese bo baay baay noo Bofalasii bó. Bó to gene kenke bin'yεese bô diŋguci ε bó ε tfuw noo mwεεm mvu jem e.

4No Jisos to kee wase fiεε fi to nu keeke ekooy bô wvú, ε wvú mum bence to fwe, bife ê bó le, “Ben gomte ε è nu yεε?”

5ε bó tfuse ê wvú le, “Jisos wvu Nasalet.” E Jisos gay ê bó le, “È nu me wvudvu.” È to nu ε Judas wvù to gesεε wvú leeme bô bonyii bodvu.

6No Jisos gay ê bó le è nu wen wvudvu, ε bó kaa tu lo jim jim, gbweken fokuse.

7ε wvú bvuu bife ê bó le, “Ben gomte ε è nu yεε?” E bó tfuse le, “Jisos wvu Nasalet.”

8ε Jisos gay ê bó le, “Me nu ε nsee wase ê ben le è nu me wvudvu. É ben fen gomte ε è nu me, é ben cine ε bonyii ban no gene.”

9Wvú to gay nonεn keege é fi eto ekocen ê diεw yì wvú to jemyεε wase ê Nyo' le wen to baa lase wee mwaanŋ fô bò wvú to nyaε ê wen e ke.

10 Semon Bitā to kenke nyo jem. E wvú mum dvun ê ηku le, cun kentunŋun ke nfwā ekole ke bocee ncese le ke εcεεy dvú, sum. Dieε di nfwā wvudvu le to nu Malkus.

11 E Jisos gay ê Bitā le, “Kase etfuse nyo yo ê ηku le. Ke me nu en'wu fiko fi ηgew e fi Icɛm nu ε nya ê me le?”

ε bó jo Jisos gen dvú fô Annas e

12 Ɛ ekolɛ ke bonyii bo nci le bô ηgoo bonyii bo nci le noo bonyii bô to cɛyte yew ncese Bojuu mum gheη Jisos kay wvú bô bokfuu.

13 Ɛ bó yaw jo wvú gen dvú fô Annas e, njefo Annas to nu icee kpwe Kayfas wvù to nu ekolɛ ke bocee ncese le kelum kekɛ le.

14 Kayfas wvun nu wvù to nyaɛ wase ntefe ê Bojuu le fí jee le wee mwaan ekpwe fô bonyii le bocii.

Ɛ Bita tun le ke wen kee Jisos ke

(Mat 26:69-70; Mak 14:66-68; Luk 22:55-57)

15 No bó to gene bô Jisos nonɛn, Semon Bita bô waa ηgoo Jisos mvu to bii wvú le. No waa ηgoo Jisos wvun to nu ɛ ekolɛ ke bocee ncese le kee wvú, ɛ wvú mum bi Jisos e gen ley fô lakfulɛη ekolɛ ke bocee ncese le.

16 Ɛ Bita shɛɛ no leeme ekfuη mbew diuw ketaη e. Ɛ waa ηgoo Jisos wvudvu wvù ekolɛ ke bocee ncese le to kee, kase buy to jeme bô wan kpwoon wvù to cɛyte diuw ketaη, jo Bita ley bô wvú.

17 Ɛ wan kpwoon wvudvu bife ê Bita le, “Ƙɛ wo nu tɛn wee ηgoo wee wvun?” Ɛ Bita tfuse le, “Ƙɛ me nu ke.”

18 È to nu ɛ ekfuη lɛɛ, ɛ boom bo lemme le bô bonyii bô to cɛyte yew ncese ɛ fwɛɛ ηguy ɛ no leemene fô yosene. Ɛ Bita mum fey, gen no leeme bô bó yosene tɛn.

Ɛ ekolɛ ke bocee ncese le biwɛ mwɛɛm ê Jisos

(Mat 26:59-66; Mak 14:55-64; Luk 22:66-71)

19 Ɛ ekolɛ ke bocee ncese le mum no biwɛ mwɛɛm ê Jisos ekumɛ boom bew bo ηgoo le noo ekumɛ n'yɛɛyi we.

20 Ɛ Jisos tfuse ê wvú le, “Me ηké no njemyi ê woη tfuu endan. Me ηké no n'yɛɛyi bonyii yéw bunle le noo yew ncese le fô Bojuu bocii nu ɛ tase. Ƙɛ me ηke mbaa enjemyi wase fiɛɛ ê nnyilɛ le ke.”

21 Wo biwɛ mwɛɛm mvun ɛ è nu ê me nje la? È biwɛ ɛ è nu ê bonyii bô ké no yuuke no me n'yɛɛyi. Bó kee naa fiɛɛ fi me ηké no njemyi.”

22 No Jisos jeme nonɛn, ɛ wee mvu ηgoo bonyii bô to cɛyte yew ncese wvù to leeme fô nceencee tum ebo ê wvú entuηtuη, bife ê wvú le, “È yin nu je yì wo tfuuse fiɛɛ jó ê ekolɛ ke bocee ncese le?”

23 Ɛ Jisos bife ê wvú le, “É me fɛn nu ɛ njeme ɛ njay, é wo duηɛ jay wvudvu. É me fɛn njemyi ɛ è nu kecɛɛy, wo ɛ kaa ɛ suη lo me nje la?”

24 Ɛ Annas mum nɛ ciinse Jisos fô Kayfas wvù ekolɛ ke bocee ncese le. Ɛ Jisos to bɛɛ ke ɛ bó ɛ kay bô bokfuu.

Ɛ Bita bvuu tun le ke wen kee Jisos ke

(Mat 26:71-75; Mak 14:69-72; Luk 22:58-62)

25 No Semon Bita to bæe leeme yosene nguy, ε bonyii bife ê wvú le, “Kε wo nu mvu ngoo bonyii bew e?” Geenen ε Bita tun gay le, “Kε me nu mvu kε.”

26 Ε waa lemme ekole ke bocee ncese le mvu bvuu bife ê Bita le, “Me mbe mbaa n'yen wo le ben ε wvú ê wεε ketaaη we le?” Waa lemme wvudvu to nu wee kfuu di wee wε wvú Bita to sumεε kentunηη kew e.

27 Ε Bita bvuu tun. Kε sekedvu, ε nyimshie mum toη.

Ε bó γεν bó Jisos fô Baylet e
(Mat 27:1-2, 11-14; Mak 15:1-5; Luk 23:1-5)

28 Ε bonyii mum jo Jisos fô yew e fo Kayfas no gene dvú ê ntow wee wvu Lum wvú to saake jó le. Ê to nu ε è bæe lo entaηentaη. Ε bó dioo γεν φαηε yaa ley fibole γεν ê ntow wee wvudvu le kε, njefo é bó to ley lo, emum etuu ηkfum, saa ebvuu edie Nkaw Daηεfey kε.

29 Nonen ε Baylet mum buy to yen bó le bife ê bó le, “Fieε fi ben yen ε wee wvun ε jay nu la?”

30 Ε bó tfuse ê wvú le, “É wee wvun be baa buw fieε, tu bese baa too bó wvú keenya ê wo kε.”

31 Ε Baylet tfuse ê bó le, “Ben ejo wvú esaw bii no wene nci gomte.” Ε Bojuu gay ê wvú le, “Kε bese kηηke mvunηay keeyu wee kε.”

32 Ε njeme wvun mum to kocen ê diew yì Jisos to jemyεε wase duηci kfuu kpwe yì wvú to nu keeke ekpwe le.

33 Ε Baylet kase ley γεν ê ntow we le, tee ε bó to bó Jisos, ε wvú bife ê wvú le, “È nu wo wvú Nfon Bojuu le?”

34 Ε Jisos bife ê wvú le, “Wo jemyi fin ε è nu ηkpwawce wvuwo, nuu è jeme wee ê wo ekume me le?”

35 Ε Baylet bife ê wvú le, “Me nu wee Juu le? È nu bonyii buw bo woη e bó bocee ncese bo baay baay bò to bó wo ε nya ê me. Wo jay ε è nu la?”

36 Ε Jisos tfuse ê wvú le, “Kε bvunfon bwem nu diewe bvú yì woη wvun e kε. É bvunfon bwem be nu diewe bvú yì woη wvun e, tu bonyii bem bo lemme le be ε diu wvu le fo bó enya me can Bojuu le kε. Geenen kε bvunfon bwem nu bvú ne yì woη wvun e kε.”

37 Ε Baylet mum bife ê wvú le, “Kε tu wo nu Nfon?” Ε Jisos tfuse ê wvú le, “È nu no wo gay le me nu Nfon. Bó to boke me, ε me nto yì woη wvun e nje fin fi le me ento enjeme ekume keceey. Wee tfuu wvú bii keceey e ké no yuuke diew yem e.”

38 Ε Baylet ghay le, “Keceey nu la?” No wvú ghay nonen mum kase buy γεν yen Bojuu ba le gay ê bó le, “Me mbaa n'yen fieε fi wvú jay e kε.

³⁹Geenen ben kenke nce wene mvu le è ké dioo nu kefew ke Nkaw Danɛfey e, ε me mbvuse wee ncaw mwaan yew. Ben gomte le me embvuse ε è nu Nfon wene Bojuu le?”

⁴⁰ε Bojuu bodvu wam lo foweewe le, “Aay, ke bese gomte wee wvun ke, bvuse ε è nu Balabas!” Balabas wvun to nu ekufe ke coon e.

Jon 19

¹ε Baylet mum jo Jisos nya ε bó njin bô bongbwan.

²ε bonyii bo nci le lu kefo ke bvunfon e ε kí nu bíay bíay bon ê wvú efa, jo ndvu bvunfon ε yí yeele lo, shfuse yî ye le.

³ε bó mum no too fô wvú le bune wvú gayte le, “Biaa kembaan! Nfon Bojuu!” No bó gee nonen no njine wvú bô can.

⁴ε Baylet bvuu buy ekfun gay ê bonyii le, “Ben eyen, me nu embvuse wee wvun enya ê ben, wvu le ben ekieε le me mbaa en'yen fieε fi wvú jay e ke.”

⁵ε Jisos mum buy no too bô kefo ke bíay e efa noo ndvu bvunfon ye le. ε Baylet mum gay ê bó le, “Ben etaa eyen wee wvudvu wvun!”

⁶ε bocee ncese bo baay baay bô bonyii bô to ceyte yew ncese dioo yen wvú le nonen, mum no wamte lo le, “Ta lo wvú yî kentam e, ta lo wvú yî kentam e!” ε Baylet gay ê bó le, “Ben ejo wvú bô can yene eta yî kentam e, njefo me mbaa en'yen jay we le ke.”

⁷ε Bojuu bodvu tfuse ê wvú le, “Bese kenke nci wese, ε nci wvudvu dunji le wvú kenke keekpwe, njefo wvú nu ε ge ekole kew le wen nu Waa Nyo'.”

⁸ε Baylet dioo yuw njeme wvun bvuu kenke lo nfan baay.

⁹ε bô Jisos bvuu tu jim ê kebuw e, ε wvú bife ê Jisos le, “Wo ne fee?” Geenen ε Jisos fanε yaa tfuse fieε ke.

¹⁰ε Baylet bife ê Jisos le, “Ke wo nu ejeme ê me le? Ke wo kee le me nkenke mvungay keencine wo le mbvuu nkenke mvungay keengay é bó eta wo yî kentam e le?”

¹¹ε Jisos tfuse ê wvú le, “Ke wo bee ekenke mvungay ê me we se bó to nya mvungay mvudvu ê wo fowe ke. Nonen nje finin, wee wvù nya me can yo le nu ε wvú kenke kebefε ε kí kuuke fele kuw.”

¹²ε Baylet dioo yuw njeme wvun, mum kew no gomte je keecine wvú le. Geenen ε Bojuu wam lo foweewe le, “É wo mom lo ε cine wee wvun e, tu ke wo nu nsaa Kaysa wvù Nfon wvu baay wvu Lum ke. Wee tfuu wvù bense ekole kew le wen nu nfon nu wee bvuban wvu Kaysa.”

¹³ε Baylet dioo bvuu yuw wvun njeme, mum buy bô Jisos, shii yî kentaw ke nsaw e fò bó to teje le Bvudvuu bvù bó bom bô Eta, teje ê díew Ibulu le le Gabata.

14 È to nu wase Diuu di Nseyse wvu Nkaw Dañefey e, ε kefew to nu wase diewe didiuu yuufe ncow difee le. E Baylet jeme ê Bojuu le, “Ben etaa eyen Nfon wene wvun!”

15 E Bojuu bodvu no wamte lo le, “Gene lo bô wvú, gene lo bô wvú, ta lo wvú yí kentam e!” E Baylet bife ê bó le, “Me enta Nfon wene yí kentam e le?” E bocee ncese bo baay baay tfuse ê wvú le, “Ke bese kenke Nfon mvu efey Kaysa ke.”

16 E Baylet mum nya Jisos ê bó le bó egen eta yí kentam e.

E bó ta Jisos yí kentam e

(Mat 27:32-44; Mak 15:21-32; Luk 23:26-43)

17 E bó mum jo Jisos, buy bô wvú. E wvú tuu kentam kew no gene fô bó teje le Ngbwow Ekole, teje ê díew Ibulu le le Golgota.

18 E bó mum gen ta wvú fó yí kentam e, ta ten bonyii bomew bofee yí bintam e, wvumvu eceey, wvumvu eñkoñko, e Jisos no nu entelen.

19 E Baylet ten sañ fiee fimew e bó ta yí kentam ke Jisos e. Fiee fi wvú to sañee fidvu to nu le, “Jisos wvu Nasalet, Nfon Bojuu.”

20 Bojuu nteen to nu e tañ fiee fi wvú to sañee fidvu, njefo fò bó to tae Jisos yí kentam e to nu nceencee mbew kelaante le, e wvú to sañ fiee fin ê díew Ibulu bô yi Latin noo yi Glek e.

21 E bocee ncese bo baay baay bo Bojuu le gen gay ê Baylet le, “Fo wo esañ le, ‘Nfon Bojuu’ ke. Sañ e è nu le, ‘Wee wvun duu le wen nu Nfon Bojuu.’”

22 E Baylet tfuse ê bó le, “Fiee fi me nsañ nu e me e nsañ wase.”

23 No bonyii bo nci le to tae wase Jisos yí kentam e, mum jo ndvú ye gaw ê bikuu bibole mondvuun monem no bó to nu. Bó to nu e jo naa noo kekum kew. Geenen e kekum kin nu e bó to tum ke lo kenlaaten e e kew yí kendoñ e e bow e buy yí bikaa le.

24 Nonen e bó mum jeme ebonebon le, “Fo beene esaa kekum kin ke. Beene etum kañ, eyen wee wvù nu ekenke.” Fifi to kooyi keege é fí eto ekocen no bó to sañee ê Nwa' Nyo' le le, “Bó to nu e gaw ndvú yem fô bikuu bibole, tum kañ bô kekum kem.” Nonen bonyii bo nci le bodvu to nu e ge ke naa fiee fidvu fin.

25 Geenen, bokene bomew to leeme fó mbew kentam ke Jisos e. Bokene ban to nu bwee Jisos bô waa bwee bwee Jisos wvù kpwoon noo Maalia wvù kpwee Klobas noo Maalia Magdalen.

26 E Jisos ke dion ene eyen bwee le noo waa we ngoo we wvù wvú to koonke e bó leeme mbew ye le, e wvú gay ê bwee le, “Kpwoon, taa eyen, wvun nu wase waa wo.”

²⁷No wvú gay nonen kase gay ten ê waa we ηgoo we le, “Taa eyen, wvun nu wase bwoo.” E kew sekekie le e waa we ηgoo wvudvu mum jo bwee Jisos e wvú gen no cee wase e è nu yew dvu wvú.

E Jisos kpwe

(Mat 27:45-56; Mak 15:33-41; Luk 23:44-49)

²⁸Ejim jodvu no Jisos to kee wase le fiεε ficii nu e ka wase, e wvú mum ne jeme keege é fí eto ekocen no bó saηεε ê Nwa' Nyo' le le, “Kendoη yumte me.”

²⁹Nsefe mvu to leeme fó bô mbvuum mo ηgbwayηgbwayi jó e mó e yiηsen. E bonyii bo nci le bodvu mum ffum kusha jó bon yî fite fi isob e neke diuw we le.

³⁰E Jisos dīoo fi mbvuum modvu mum gay le, “Fí e ka wase.” No wvú gay nonen, ηgvuke ekole, e keyoy kew mum buy.

E bó bon dita di Jisos e

³¹No εbvubwe to nu wase Diuu di Nseyse le keeley diuu di mbam e, e Bojuu no gomte keege le fo εgvun yodvu ke emey enu yî bintam e diuu di mbam e ke, (tete e mbam wvudvu to nu wvu baay). E bó mum gen yen Baylet e leke le wvú egay é bó ηgoce bikaa bi bonyii bô to nu yî bintam e bodvu wvu le bó eyaηsen ekpweken é bó eshike, ecake.

³²Nonen e bonyii bo nci le mum to ηgoce bikaa bi wee wvu fwe le, ηgoce ten bi wvumvu we wvù bó to tae bô wvú le.

³³Geenen, e bó ke dīoo to buy fô Jisos e, yen le wvú be e kpwe wase, e bó faηe yaa bvuu ηgoce bikaa biew ke.

³⁴E wee mvu ηgoo bonyii bo nci le bon dita di Jisos e bô goo. No wvú bon nonen, kaη mwaη e εleme bô joo ta buy fó.

³⁵Wee wvù to yenεε mwεem mvun e nu e wvú e ben jim nsaw wvudvu, e njeme we nu keceey, e wvú kee lo le wen jemyi e è nu keceey wvu le ben nulo ebee.

³⁶Mwεem mvun to kooyi wvu le fiεε fi bó to saηεε ê Nwa' Nyo' le eto ekocen no bó saηεε le, “Ke ekufe kew kemwaη nu e bó nu ke ηgoy ke.”

³⁷E fí bvuu nu e bó e saη bvudvuu bvumew e ê Nwa' Nyo' le le, “Bonyii nu ke etaale wee wvudvu we wvù bó nu e bon bô goo.”

E bó dwey Jisos

(Mat 27:57-61; Mak 15:42-47; Luk 23:50-56)

³⁸Ejim jodvu e Yosew wvu Alimatia ne gen yen Baylet e leke le wvú ebee é wen ecake gvune di Jisos e. Yosew wvun to nu wee ηgoo Jisos geenen e è nu ke ejim ejim njefo wvú to fane Bojuu. E Baylet bee, e wvú mum gen keecake gvune didvu.

³⁹Nikodemus wvù to yawεε gen yen Jisos e entaη jomew to nu e to ten bô bifuu bimew bi shfuηkene e bó taashe e kene bô mεel noo alos e bvujite bvudvu nu ke diewe bokilu mbaanshe ncow botete le.

⁴⁰Ɛ bô wvú mum shike gvune di Jisos e njime bô ndvú Ɛ bó Ɛ yefe bô nfiey we no ndwey wee to ké no nu ê nce woŋ Bojuu le.

⁴¹Ê to nu Ɛ wee kentaan wvumew nu mbew fò bó to taƐ Jisos yî kentam e. Ɛ wee wvudvu nu Ɛ jem yi fie mi nu dvú Ɛ bó ke baa edwey wase wee jó ke.

⁴²Nonen no ebvubwe to nu wase Diuu di Bojuu le di Nseyse wvu diuu di Mbam e, Ɛ jem yidvu nu ten nceencee, Ɛ bó mum lese Jisos jó.

Jon 20

Ɛ bó gom gvune di Jisos e ŋkuuŋ

(Mat 28:1-8; Mak 16:1-8; Luk 24:1-12)

¹Ɛ è ke no nu diuu di fwe yî kema le, Ɛ Maalia Magdalen buy ja lo kebitele, gen fô jem, yen Ɛ bó Ɛ cake wase te di bó to baŋƐ diuw jem dvú.

²Nonen Ɛ wvú mum lewte gen yen Semon Bita le bô waa ŋgoo Jisos mvu we wvù Jisos to kooŋke le, gay ê bó le, “Bó nu Ɛ bvuse wase Tata ê jem, Ɛ bese yaa kee laa bó gƐke fƐe wvú le.”

³Ɛ Bita bô waa ŋgoo Jisos we mum buy no gene fô jem.

⁴Bó to gene lewte lo, geenen Ɛ waa ŋgoo Jisos we lewte fey Bita yaw fƐe fô jem.

⁵No wvú fƐe, ŋgvuwƐe taa, yen Ɛ ndvú yî bó njimee yî Jisos e jiime jó. Ɛ wvú taa nonen faŋe yaa ley jó ke.

⁶Ɛ Semon Bita bi wvú le fƐe fó, mum ley lo gen ê jem. No wvú ley, yen ke Ɛ è nu ndvú ye le Ɛ yî jiime,

⁷noo fincake fi ndvu le fi bó to njimee ekole ke Jisos e dvú, Ɛ fí yaa jiime bô yimi ndvú ye ke. Geen en Ɛ bó kewe Ɛ gƐe bwew bvudvuu le efinen.

⁸Ɛ waa ŋgoo Jisos mvu we wvù to yawe efƐe fô jem mum ley ten gen ê jem yen fie fin e mum bee.

⁹Ê to nu Ɛ bó baa cim kiee wase kenyi ke fie fi nu ê Nwa' Nyo' le le Jisos to keŋke keeke ebuy yî kpwe le ke.

Ɛ Jisos duŋƐ ekole kew ê Maalia Magdalen

¹⁰Ɛ boom bo ŋgoo le bo Jisos e ba kase kfule fô yew e.

¹¹Geenen Ɛ Maalia shƐe no leeme beele fô jem. No wvú to beele ke ne ŋgvuwƐe taa ê jem,

¹²yen bonceendaa bo Nyo' le bofƐe Ɛ bó Ɛ tfume ndvú yî baa Ɛ shii fò bó to jikee gvune di Jisos e, wvumvu fô ekole ke Jisos e to jiime, wvumvu fô bikaa biew to jiime.

13 Ɛ bonceendaa bo Nyo' le bodvu bife ê wvú le, “Ƙpwoon, wo beele la?” Ɛ wvú tfuse le, “Me mbeele njefo bó nu ɛ cake Tata wɛm ɛ nɛ dvú ɛ me n'yaa ŋkee fò bó gɛke wvú kɛ.”

14 No wvú gay nonɛn, dɔo baŋke ye yɛn ɛ Jisos leeme. Geenɛn ɛ wvú faŋɛ yaa kɛɛ le è nu Jisos kɛ.

15 Ɛ Jisos bife ê wvú le, “Ƙpwoon, wo beele la? Wo gomte ɛ è nu yɛɛ?” Ɛ Maalia mum no kpwaake le è nu wee wvú taale fô wɛɛ ketaaŋ wvudvu le. Ɛ wvú mum gay ê wvú le, “Icɛm, é wo fɛn nu ɛ tuu wvú ɛ nɛ dvú, é wo see fò wo gɛke wvú é me eŋɛn enjo ene dvú.”

16 Ɛ Jisos nɛ bɛn wvú le, “Maalia.” Ɛ wvú baŋke ye tee wvú ê díɛw yibo Ibulu le le, “Laboni,” fi nu le, “Wee n'yɛɛyi.”

17 Ɛ Jisos gay ê wvú le, “Fo wo ejicì me le kɛ, njefo me mbaa mben wase fô Icɛm e kɛ. Gɛnɛ ɛ è nu fô boom bo bwɛɛm e esee ê bó le me mbene wase fô Icɛm wvú è nu tɛn Icen e noo fô Nyo' wɛm wvú è nu tɛn Nyo' wene le.”

18 Ɛ Maalia Magdalen mum gɛn see ê boom bo Jisos e bo ŋgoo le le wen nu ɛ yɛn Tata le, bvuu see ê bó le wvú nu ɛ jeme mwɛɛm mvun ê wen.

Ɛ Jisos duŋɛ ɛkolɛ kew ê boom bew bo ŋgoo le

(Mat 28:16-20; Mak 16:14-18; Luk 24:36-49)

19 Ɛ è ke no nu fokieguu ɛbvubwɛ bvú è to nu diuu di fwe yî kɛmaa le, ɛ boom bo ŋgoo le bo Jisos e nu yew ɛ bó ɛ fen'ye bimbun, njefo bó to fane Bojuu. Ɛ Jisos ke nɛ buynɛn leem ê bó ɛntelɛŋ, gay bó le le, “Ƙembonɛn enù fô ben e.”

20 No wvú gay bó le nonɛn, mum duŋɛ can ye bô dita diɛw ê bó. Ɛ boom bo Jisos e bo ŋgoo le yuw njoŋ baay no bó yɛnɛ Tata le.

21 Ɛ Jisos bvuu kase gay ê bó le, “Ƙembonɛn enù fô ben e. No Icɛm to tumɛɛ me, nu kɛ lɛŋlɛŋ no me ntumte ben kɛseen.”

22 No wvú gay nonɛn, mum yoy yî bó le gay le, “Ben efiisɛn Keyoy ke Yuule.

23 É ben læshi bibefɛ bi wee le, tu Nyo' nu ɛ læshɛ wase. Ben é cinɛ sɛ ben ɛ læshɛ, tu bí ɛ mɛy wase.”

Ɛ Jisos duŋɛ ɛkolɛ kew ê Toma

24 È to nu seke Jisos to toɛ fô boom bew bo ŋgoo le, kɛ Toma wvú to nu ŋgoo boom bo yuufe ncow bofɛɛ le wvú bó to teŋɛ dieɛ diɛw dimew le Ɛmam to nu bô bó kɛ.

25 Ɛ kebɛsɛ ke boom bo ŋgoo le bo Jisos e ke mum gay ê wvú le, “Bɛsɛ be ɛ yɛn Tata le.” Geenɛn, ɛ wvú gay fiɛw ê bó le, “É me nu sɛ me ɛ ŋke ɛ n'yɛn dɛw bíɛn ye le yî can ye le, ɛ nlesɛ kpwan ebo ê dɛw bíɛn yidvu le, ɛ nlesɛ tɛn kebo kem yî dita diɛw e, me nsaa mbee naa lo kɛ.”

²⁶ Ε kema kum, ε boom bo Jisos e bo ηgoo le bvuu no nu yew ε Toma nu ten bô bó, ε dew fwese nu ε bó ε fen'ye. Geenεn, ε Jisos ne buynεn ê bó entelen, gay bó le le, “Kembonεn enù fô ben e.”

²⁷No wvú gay nonεn, mum gay ê Toma le, “Lese kpwan wo εbo yí can yεm e, eyen no yí nu, ebvuu elese ten εbo kuw yí dita diem e. Fo wo ekenkè kemaηεn κε, bee.”

²⁸Ε Toma mum tfuse lo le, “Tata wεm, noo Nyo' wεm.”

²⁹ Ε Jisos gay ê wvú le, “Wo fen nu ε bee keseen njefo wo nu ε yen me le? Njon wvu baay nu fô bonyii bô baa yen me le κε, geenεn ε bee le.”

Shiee ηwa' wvun

³⁰ Jisos to nu ε ge mwεεm nteen mvù dunçi mvuηgay mvu Nyo' le ε boom bew bo ηgoo le yen, ε bó baa saη ê ηwa' wvun e κε.

³¹ Geenεn ε mvun mvù bó nu ε saη nu keege le ben ebee le Jisos nu Mboyse wvù Nyo' to kawεε, nu Waa Nyo'. Ê ben beηe nonεn, é ben ke ekenkε nshii wvù mey lo nje diee diew.

Jon 21

Ε Jisos dunçe εkolε kew ê boom bew bo ηgoo le mbew mamase le

¹Εjim jodvu ε Jisos ke bvuu dunçe εkolε kew ê boom bew bo ηgoo le mbew Mamase yì Tibelias e. Fí to kooy ê yin je le:

²Semon Bitá bô Toma wvù bó to teηe le Emam, noo Nataniel wvu Kana keba kè Galilee le, noo boom bo Sebεdee le, noo boom bo ηgoo le bo Jisos e bomew bofεε to nu bvudvuu bvumwaaη.

³ Ε Semon Bitá ne gay ê bó le, “Me nu enlaa byé.” Ε bó gay ê wvú le, “Beene nu elaa.” Ε bô bó mum buy gen ley ê kekoη e. Geenεn ke ghan ce ê joo ε bó baa koo lo fiεε κε.

⁴ Ε εkfuη ke no yuule too, ε Jisos to leem ηgem joo le, ε boom bew bo ηgoo le faηe yaa kiεε le è nu wvú κε.

⁵Ε Jisos bife ê bó le, “Boom bem, ben nu ε koo κε byé?” Ε bó tfuse le, “Aay.”

⁶ Ε wvú gay ê bó le, “Ben elaη kensaη je εbo εcεεy jo kekoη é ben ekoo fiεε.” Ε bó mum laη, ε kí mum ne no ghaake bó keegufe, njefo bó to nu ε koo byé jó nteen.

⁷ Ε waa ηgoo Jisos wε wvù Jisos to kooηke dīoo yen nonεn mum gay ê Bitá le, “È nu Tata.” No Semon Bitá yuw le è nu Tata, mum jise ndvú ye njefo wvú to nu ye ye. No wvú jise nonεn mum sele ê joo no gene fô Jisos e.

⁸Geenεn ε bomew boom bo ηgoo le ba no bii ê kekoη e guute kensaη kiε ε kí ε yiηsen bô byé. Ke bó to bεε ncejole keebuy εηkpwaante κε. Bontam to shεke ke wase diewe ηkenkεη mbaanshen e.

⁹Ɛ bó gen fese ɛɲkpwaante yen ɲguy e ɛ wvú keyte lo yî bika le, ɛ byé nu yî dvú le, ɛ blæd nu tɛn fó.

¹⁰Ɛ Jisos gay ê bó le, “Ben eto bô byé yimi yî ben konte.”

¹¹ Nonɛn ɛ Semon Bitá gen ben ê kekoɲ e gufe kensaɲ buy dvú ɛɲkpwaante ɛ kí ɛ yiɲsen bô byé yî faɲken gbwee kecow mbaanshen ncow she (153). Naa no yî to cim nu nteen nen, kensaɲ to baa semken ke.

¹²Ɛ Jisos gay ê bó le, “Ben eto ediekɛn.” Wee mwaan boom bew bo ɲgoo le to baa cim mom naa lo ebife ê wvú le laa è nu wvú wvù yee le. Bó to nu ɛ kiee lo le è nu Tata.

¹³ Ɛ Jisos mum gen jo blæd we nya ê bó noo byé ye fó.

¹⁴ Fin to nu wase bokaɲ botete no Jisos to duɲɛɛ ekole kew ê boom bew bo ɲgoo le ɛ kew no wvú to buyee yî kpwe le.

Ɛ Jisos kase nya lemme ê Bitá

¹⁵ Ɛ bó ke dieken mese, ɛ Jisos ben Bitá bife ê wvú le, “Semon waa Jon, wo kooɲke me fele bomew ban e?” Ɛ wvú tfuse le, “Ɛɛ Tata, wo kee lo le me ɲkooɲke wo.” Ɛ Jisos gay ê wvú le, “È nyaɲyì boom bem bo njée le.”

¹⁶Ɛ Jisos bvuu ben wvú yî bokaɲ e bofɛɛ bife ê wvú le, “Semon waa Jon, wo kooɲke me?” Ɛ wvú tfuse le, “Ɛɛ Tata, wo kee lo le me ɲkooɲke wo.” Ɛ wvú gay ê wvú le, “È taalè fô njée yem e.”

¹⁷Ɛ Jisos bvuu ben wvú yî bokaɲ e botete bife ê wvú le, “Semon waa Jon, wo kooɲke me?” Ɛ Bitá yuw no Jisos bife ê wvú yî bokaɲ e botete le laa wvú kooɲke wen ɛ, ɛ fí ffumse lo wvú. Ɛ wvú gay ê Jisos le, “Tata, wo kee fiee ficii, wo kee lo le me ɲkooɲke wo.” Ɛ Jisos gay ê wvú le, “È nyaɲyì njée yem.”

¹⁸ É me ensee ê wo keɛɛy keɛɛy le, seke wo to bæɛ cuwee, è to ké kay wo kecow kuw no gene fô wo kooɲke. Geenɛn seke wo ɛ lun wase nu ɛ wo nu ke ecake can we é ekay wee mvu kecow yî yo le, ejo wo egen dvú fô wo yaa kooɲke keegen ke.”

¹⁹ Jisos to jemyi fin duɲci ɛ è nu kfuu kpwe yî Bitá to nu keeke ekpwe eto bô diee dî kuuke dvú fô Nyo' le. No Jisos jeme nonɛn mum gen gay ê wvú le, “È biì me le.”

²⁰ Ɛ Bitá dioo banke ye yen ɛ waa ɲgoo we wvù Jisos to kooɲke bii bó le. Waa ɲgoo wvun nu wvù to yeemɛɛ gen yî Jisos e seke bô bó to diekene ekiɛguu yî kemese le bife ê wvú le, “Tata, è nu yee wvudvu wvù nu ke egese wo?”

²¹No Bitá yeneɛ ɛ waa ɲgoo wvudvu bii bó le, ɛ wvú bife ê Jisos le, “Tata, fi wee wvun e nu le la?”

²²Ɛ Jisos tfuse ê wvú le, “É me ncim mbe nshieele le wvú emey enu egen ebuy no me ɲke ɛɲkase ento, é fifie ekeɲke la keege bô wo? È biì me le.”

²³No Jisos gayee nonen, e njeme ke mum no gene entelej jo bonyii bo mbee le le ke waa ηgoo Jisos wvun nu ke ekpwe ke. Geenen e Jisos to baa gayte le ke wvú nu ke ekpwe ke. Wvú to gay ke le, “É me ncim mbe nshieele le wvú emey enu egen ebuy no me ηke enkase ento, é fifie ekeηke la keege bô wo.”

Ekume wee wvú saη ηwa' wvun

²⁴Waa ηgoo wvudvu wvun nu wvú jemyi ekume mwεem mvun, e è nu wvú wvú nu e saη mwεem mvudvu, e bese kee lo le fiεε fi wvú jemyi ekume fí nu keεεy.

²⁵Mwεem mvumew nu ten dvú nteen mvú Jisos to gee, e è be nu le bó esaj mvunciim, é me en'yene le ke ekole ke nshε le kecii nulo ekeηke fò bó egee boηwa' bodvu ke.

Lem

Lem 1

- ¹ Cee la Teofilus, ê nwa' wvu fwe wvù me nto nsan̄ε fô wo le, me nto nu ε nsan̄ jó ekumε mwεem mvunciim mvù Jisos to gee noo mvù wvù to yεeyi bonyii dvù, ε kew no wvù to kewεε lemme diew,
- ² gen buy diuu dî Nyo' to joe wvù ε wvù ben we. É Nyo' se jo wvù é wvù eben we, wvù to nu ε bæε Keyoy ke Yuule tefe boom bew bo ntum e bò wvù to cawεε.
- ³ Seke wvù to buyεε yî kpwe le, wvù to nu ε duñce ekole kew ê bó yî ediuw e mbaanyε ê jé le nteen nteen yî duñci le wvù nu dvù. É wvù bvuu no jemyi ê bó ekumε bvunfon bvù Nyo' le.
- ⁴ No bô bó to nu nonen, ε wvù gay ê bó le, “Fo ben ke ene Jelusalem ke. Ben ecεytε nnya yî Icεm to kawεε ben dvù yî ben to yuwεε ε me njemyi ekumε yí.
- ⁵ Ben ekeè le Jon to leese bonyii ê joo, geenεn ejim jo ediuw caan nu ε Nyo' nu ke elese ben ε è nu can Keyoy ke Yuule le.”

É Jisos ben we

- ⁶ É Jisos bô boom bew bo ntum e ke no nu kefew kemew e, ε bó bife ê wvù le, “Tata, kefew nu ε kocεn wase kè wo nu ege é bonyii boσεεbeene bo Islael ekase esaake bvunfon bvubole le?”
- ⁷ É wvù tfuse ê bó le, “Kefew kè fí nu ke ekooy nu ε è seyse Icεm bô mvuñgay mwew, ε ke è nu bvudvuu bvunεn keekieε ke.
- ⁸ Fî ben ekeè nu le Keyoy ke Yuule nu ke eto eyiñsen yî yene le, é ben emum ekeñke mvuñgay, ekew eseñe ekumε me Jelusalem noo biba bì Judea bô Samalia le bicii, egen ebuy ebuw ε woñ yo εna le.”
- ⁹ Ke no wvù jeme nonen, ε Nyo' jo wvù ε wvù no bene we ε bó taale no wvù bene, ben ε kembew bañ wvù, ε wvù la ê bó ejise.
- ¹⁰ No bó luñεε ejise we etaale no wvù bene, ε fí kooy le bolemσε bofεε to nu ε ja sεσε buyneñ ε bó ε tfume ndvù ε yí baa, leem mbew bó le,
- ¹¹ bife ê bó le, “Bolemσε bo Galilee, ben leeme taale la we? Jisos wvun wvù Nyo' jo ê ben enteleñ wvù ε ben we nu ke ekase eto ke lañleñ no ben be yen ε wvù bene we.”

É Matiaa jo bvudvuu bvù Judas e

- ¹² É boom bo ntum e bo Jisos e mum ne fô Kum Bite bi Olif e no tuu jim Jelusalem, ε è to nu ke diwε keñgawten ke may e keegen buy jó.
- ¹³ No bó ley jó, mum ben gen ê kebuw ke yew e ke εwe fò bó to ké no gene bæεle. Bonyii ban to nu Bitā, Jon, Jεm noo Andulu, Filew bô Toma, Batolomu bô Matio,

Jem wvù waa Alfiyus, Semon wvù to nu wee ηgoo Boselot noo Judas wvù waa Jem.

14 É bô bokene bomew noo Maalia wvù bwee Jisos bô boom bo bwee Jisos e ké no taashi yî fiε le fimwaan keebunlee sekecii.

15 Ε è ke no nu ediuw yoya le, ε boom bo ηgoo le bo Jisos e taashε. Bó to nu fó wee diεwε gbwee kecow mbaanfίεε le (120). Ε Bita ja we jeme ê bó le,

16 “Boom bo bwεem e, fiεε fi Nwa' Nyo' jemyi to keηke ke keekooy. È nu fiεε fi Keyoy ke Yuule to gee ε Dawe jeme ε è bæε lo ekumε Judas wvù to joε fwe ε bó se koo Jisos.

17 Ben kee le Judas wvun to nu wee mvu ηgoo yesebeene le, keηke diεw lemme ê beene ente.”

18 (É Bita se no jemyi nonen nu ε Judas to jo wase bigew bì bó to nyae ê wvú yî fiεε fi wvú to buwεε le, guy bvudvuu dvú. Bvudvuu bvun nu fò wvú to gbwee ncine ε tee bvuyε, ε bvulew buy bvucii.

19 Ε bonyii bo Jelusalem bocii yuw, mum no teηe bvudvuu bvudvu ê díεw yibole le Akeldema, fi nu le, “Gbwen Ελεμε.”)

20 Ε Bita bvuu gay le, “Dawe to nu ε saη ê Nwa' Mbense le le, ‘Bó ecine é la diεw etu binffuy, é wee saa ebvuu eceè fó ke.’ Fí bvuu nu ε wvú ε saη le, ‘Wee mvu keηke keejo bvudvuu bwew bvu lemme le.’

21-22 No fí nu nonen, wee mvu keηke keebene bese le, é bee bó efewcì le Tata Jisos to nu ε buy yî kpwe le. Wvuwε wee keηke keenu wee wvù to lene bee bó sekecii kè Jisos to ghane bee bó ε kew yî kefew kè Jon to leese bonyii ê joo le, ε gen ε buy diuu di Nyo' to joε Jisos ê bese ente ε wvú ben we le.”

23 No wvú jeme nonen, ε bó cu bonyii bofεε. Wvumvu to nu Yosεw wvù bó to teηe le Basabas bvuu teηe le Justus, ε wvumvu nu Matiaa.

24 No bó cu nonen, mum bunle le, “Tata, wo kee mvuntelem mvu bonyii bocii le. Nonen, duηce ê bese wee wvù wo nu ε caw entelen jo bonyii bo bofεε ban,

25 le wvú enù waa ntum Jisos wvù ejo bvudvuu bvu Judas e bvu lemme le, bvù wvú to cin'yεε gen fò wvú nu fó le.”

26 No bó bunle nonen, mum saη ediee εbo, jem, ε di Matiaa le buy gbwe. Ε bó mum bise wvú ηgoo boom bo ntum e bo Jisos e bo yuufe ncow mwaan e.

Lem 2

Ε Keyoy ke Yuule to

1 Ε diuu di Nkaw mvu wvù bó to teηe le Bentekos e ke to kocen, ε bonyii bocii bò to nu ε lese fitele yî Jisos e ε taashε bvudvu bvumwaan.

²Ɛ bó ke ne sese yuw e fiεε dvûmte shiile we ke diewe keeke le. Ɛ fí shii, ley yiŋsen yew yí bó to nu dvú le.

³Ɛ bó dioo taa, yen fiεε fimew e e fí nu ke diewe leme di ŋguy e, e fí mum saanŋen gen yí bó le wee mwaan mwaan.

⁴Ɛ Keyoy ke Yuule mum yiŋsen yí bó le bocii, ge e bó no jemyi díew bitum jεy jεy.

⁵Ɛ to nu kefew kekíe le, e Bojuu bò to nu e looce e lese fitele yí Nyo' le nu Jelusalem, e bó ja bitum bicii bi yí ekole ke nshε le.

⁶No bó yuw nonen, mum tase to nteen fô bonyii bò to nu e lese fitele yí Jisos e to nu. Ɛ bonyii bò to lese fitele yí Jisos e bodvu no jemyi, e wee mwaan mwaan yuuke ê díew yibole. Ɛ fí ffumse bó.

⁷Ɛ diuw yum bó, e bó no ghayte, gayte le, “Ɛ bonyii bò jemyi ban bocii nu bonyii bo Galilee le?”

⁸Fí ghan neε le beene e se no yuuke e bó jemyi ê díew bitum bisεεbeene le?

⁹Beene bomew ne Baatia, bomew e ne Medes bô Elam, bomew e ne Misobotemia bô Judea noo Kafadosia, bomew e ne Bontus bô Esia.

¹⁰Beene bomew e ne Fligia bô Bamfilia, bomew Ijiw bô biba bi Libia le, bi nu mbew kelaante kè Selin e. Beene bomew e ne Lum, e è nu Bojuu bô bonyii bò banke lo e tu bonyii bo mbee Bojuu le.

¹¹Beene bomew e ne Klet bô Alebia. Beene e no yuuke ê díew bitum bisεεbeene le jεy jεy no bonyii ban jemyi biŋghaw bi mwεem e bi Nyo' ge.”

¹²Ɛ diuw yum bó, e bó no ghayte εbonebon le laa fifin fiεε lo se duŋci le la le.

¹³Ɛ bomew bonyii no sewsee lo fibole gayte le, “Bonyii ban nu e mbvuum e koo bó.”

Ɛ Bita jeme ê bonyii

¹⁴Nonen, e Bita bô kebese ke boom bo ntum e bo Jisos e bo yuufe ncow mwaan mum leem fó. Ɛ Bita mum kew no jemyi ê kebombom ke bonyii le foweewe le, “Ben Bojuu noo bonyii bocii bò cee Jelusalem, ben enya bitem ntay ê fiεε fi me nu enjeme ê ben.

¹⁵Mbvuum baa koo bonyii ban no ben kpwaake ke. Keseen beε ke lo didiuu bvooke fontaŋentaŋ.

¹⁶Fiεε fi kooyi fin keseen nu fi Juεl wvù wee ntum Nyo' to jemyεε wase le,

¹⁷‘Nyo' gayte le, è nu ke edioo enu yí ediuw yo fokemese le,

é wen etfuw Keyoy kewene yí bonyii bocii le. Nonen, é boom bonen bò bolemse noo bò bokene eyuuke mwεem mvù wen jemyi, seŋe ê bonyii,

é mwεem diewe bifile le etoo fô cubonyii bonen e,
 é bifile elamte ηgaybonyii bonen.

18 È nu ke edioo enu εdiuw yoya le,

é wen etfuw Keyoy kewene yî bonyii bo lemme le bowene bocii, bô bolemse noo
 bô bokene,

é bó eyuuke mwεem mvù wen jemyi, seηe ê bonyii.

19 Wen nu ke ege mwεem mvu diuw wvù yumεen e we, ebvuu ege mwεem mvù
 duηci mvuηgay mvuwene yî nshe le. Elεme bô ηgyu noo njiim yì bemte nu ke enu.

20 Diuu nu ke ejiim,

é kpwee ene eyεele diewe elεme le,

é diuu di baay di Tata le di keηghaw e se keeke eto.

21 Nonen, é naa γεε wvù nu ke elεke Tata, ke eboy.”

22 E Bita bvuu gay le, “Bonyii bo Islael, ben eyeke eyuw ntay fiε fi me njemyi.
 Jisos wvu Nasalet to nu wee ε Nyo' to looce duηce ê ben le è tum wen wvù no wvù
 to gee é Jisos egee mwεem mvù duηci mvuηgay mvu Nyo' le bô mvu diuw wvù
 yumεen e noo biηghaw bi mwεem e ê ben enteleη. Ben kee naa mwεem mvun
 ntay.

23 Jisos wvun nu wee wvù bó to nyae ê ben, ε è to seyse ke Nyo' ε fí ke no kooyi ε
 wvù to kee wase. E ben mum yu wvù no ben to nyae wvù can bonyii bô befe le, ε
 bó ta yî kentam e.

24 Geenεn, ε Nyo' kase bvuse wvù yî kpwe le, ε wvù boy can kpwe le njefo ke è to
 nulo é kpwe emey ejici wvù le ke.

25 Dawe to nu ε jeme ekume Jisos wvun gayte le, ‘Me n'yene Tata Nyo' le ε wvù nu
 bee wvù sekecii
 ê εbo kem ke εcεey e, ε è yaa nulo é fiεε eshiw me ke.

26 Nonen, fitele fiem ε mum ε no yuuke njoη, ε me njemyi bô nlaηlaη. Me nu wee ε
 me nu ηke eηkpwe ke lo, geenεn ε me ntaale ke fwe,

27 njefo ke wo wvù Nyo' nu ke ecine keyoy kem e woη boηkfu le ke. E ke wo nu ke
 ecine Waa wo lemme wvù Yuule le é wvù efo ê jem ke.

28 Wo nu ε duηce wase me je yì è nulo é me enfey jó nse mboy. Me nu ηke
 enlaηlaηe no me nu ηke enu ê wo fwe.”

29 E Bita bvuu gay le, “Boom bo bwεem e, è nulo é me enjeme ê ben se kemaηen le
 icee cee wesebeene wvù Nfon Dawe to nu ε kpwe, ε bó dwey wvù, ε jem ye nu fen
 ε to ε buy eben e.

30 Wvù to nu wee ntum Nyo' bvuu kieε ηkawma wvù Nyo' to kawεε wvù dvù lew
 le wen nu ke egeε wan wvu ê kfuu diew e yî kawla we le.

31 Ɛ wvú mum yanŋen yen fiε fi Nyo' to nu keeke ege le, mum jeme le Mboyse wvù Nyo' to kawεε nu ke ebuy yî kpwe le. È nu fiεε fi wvú to gayεε le, 'Wvú to baa emey woŋ boŋkfu le ke, ε ye ye to baa efo ê jem ke.'

32 Jisos wvun nu ε Nyo' to bvuse wvú yî kpwe le, ε bese bocii bò nu bonyii bew bo ηgoo le to nu ε yen wvú le.

33 Nyo' nu ε bense wase wvú ε shike ê ebo kew ke εεεy e, ε nya Keyoy ke Yuule ê wvú no wvú to kawεε. Fiεε fi ben yene bvuu yuuke keseen nu Keyoy kedvu ε Jisos ε nya ê bese.

34 Ke è yaa nu Dawe wvù to benεε we ke. Dawe kebεε to nu ε gay fiew le, 'Tata Nyo' to nu ε gay ê Tata wem le, shiile ê ebo kem ke εεεy e,

35 egeŋ ebuy seke me nu ηke enshike bonyii buw bo bvuban e ê wo εjise, é wo etome bikaa biuw yî bó le diεwε kedvuushεε ke bikaa biuw e.'

36 Nonεn, bonyii bocii bo Islael emum ekeè lo ntay le Jisos wvun wvù ben to tae yî kentam e nu wvú wvù Nyo' nu ε gee wase le è nu Tata bvuu nu Mboyse wvù wvú to kawεε."

37 No bonyii bodvu yuwεε nonεn, ε njeme wvudvu koo bó. Ɛ bó mum bife ê Bita bô kebese ke boom bo ntum e bo Jisos e le, "Boom bo bwee wese le, bese nu ege nεε keseen?"

38 Ɛ Bita tfuse ê bó le, "Wee mwaan mwaan ekumen fitele fiew, é bó elese wvú ê joo ê diee di Jisos Klistu le wvu le Nyo' elεεshe bibefe biew ebvuu enya wvú bô nnya ye yî è nu Keyoy ke Yuule.

39 Nkawma wvudvu wvun nu fô ben e, noo fô boom bonεn e, bvuu nu fô bonyii bocii bò nu fonfwan e. Wvú nu fô bonyii bocii bò Tata wvù Nyo' wesebeene teŋe ε bó too fô wvú le."

40 Ɛ Bita bvuu jeme mwεem nteen, tefe bó, leke le bó efi bikuu bibole yî ηgew wvù nu keeke eto yî εηgokε kè befe kin e.

41 Ɛ bonyii yuw njeme Bita wvun, ε nteen bee, ε bó mum lese bó ê joo. Ɛbvubwε ε bonyii bise ηgoo bonyii bo Jisos e diεwε bontfuke botete (3,000) le.

42 Ɛ bó mum nya bikuu bibole no yuuke mwεem ε è nu mvù boom bo ntum e bo Jisos e to yεyi. Ɛ bô bó no nu yî kentaashe le, guutene blεεd, bvuu bunlee yî kentaashe le.

Nce ηgoo bonyii bo mbee le

43 Ɛ boom bo ntum e bo Jisos e no gee mwεem mvu diuw wvù yumεen e bô mwεem nteen mvù duŋci mvuηgay mvu Nyo' le, ε bonyii yene, ε fí ghaake lo bó.

44 Ɛ ηgoo bonyii bo mbee le bocii no nu yî wee le mwaan, keŋke fiεε fibole fimwaaŋ.

⁴⁵É bó ké ne gese mondvuum mobole bô mwεem mvubole, gaw bigew bidvu ebonebon no ηgew wee nu.

⁴⁶É bó no shee taashi yew ncese le εdiuw εcii, diekene yî kentaashe le εla le bô nlanlan fô mvuntelem mvubole, yaa yεεle εjise κε,

⁴⁷bensee Nyo'. Ε bonyii no yene nonen, bensee bó. Ε Tata no boysee bonyii εdiuw εcii, biise ηgoo yibole.

Lem 3

Ε Bita bô Jon fe ηκewle

¹ Ε ε ke no nu diuu dimew, ε Bita bô Jon ne no bene fô yew ncese le κε diewe didiuu ditete le fomvunsheen, ε ε to nu kefew ke bunle le.

² Κε kefew kedvu le, ε bonyii ε tuu wee mvu ε no too dvú, to shike diuw ketaan wvù bó to teje le wvù Jee le wvù to leyte fô yew ncese le. Wee wvudvu nu ε bó to boke wvú ε ε nu ηκewle, é bonyii ké no tuule wvú εdiuw εcii too shiwse fó ε wvú leke bigew ê bonyii bò fele leyte yew ncese le.

³Ε wvú yen Bita bô Jon e ε bó fele keeley fó, mum no leke bigew ê bó.

⁴Ε bó lun εjise yî ye le. Ε Bita gay ê wvú le, “Taa bese!”

⁵Ε wvú mum taa bó, kpwaake le bó nu enya fiεε ê wen.

⁶Ε Bita gay ê wvú le, “Κε me ηκεηκε naa lo bigew κε, geenen fiεε fi me ηκεηκε nu ε me nu enya ê wo. Me ηgayte ê wo ê diee di Jisos Klistu wvu Nasalet e, ja we elenè!”

⁷No wvú gay nonen, mum jice wvú le yî kebo ke εεεy e, cake we. Kan mwaan, ε bikaa bô mvun̄koko mvu wee wvudvu le mum tεme.

⁸ Ε wvú sele we leem, mum κεw no lene. Ε bô bó gen ley fô yew ncese le, ε wvú no ghane fó maymayi, bensee Nyo'.

⁹Ε bonyii bocii bò to yenεε no wvú ghane bensee Nyo',

¹⁰κιεε le ε nu wee wvù se shee leke ελεκεε diuw ketaan we wvù bó teje le wvù Jee le wvù leyte fô yew ncese le. Ε εjise jiiim bó, ε bó no κεηκε ηghaw yî fiεε fi kooy bô wvú le.

Ε Bita jeme ê bonyii fô yew ncese le

¹¹ Ε wee wvudvu ηεεm lo yî Bita bô Jon e. Ε bonyii yen ε diuw yum bó, ε bó no lewte gene bεwse bó le fô bvudvu bvù bó to teje le cile Saamun e.

¹²Ε Bita yen no bonyii tase ε to, mum jeme ê bó le, “Bonyii bo Israel, ε nu nje la wvù diuw yumte ben εκume fiεε fin ε ben taale bese nen? Ben kpwaake finen le ε ge mvun̄gay mvusεse wee wvun ε se no lene le? Nuu ben kpwaake ten le ε ge nce wese wvù yuule le? Κε ε nu nonen κε.

13 Fí nu le Nyo' Abl'am bô Aysik noo Yakow, wvù nu Nyo' bo'icee cee bosεεbeene bocii to nu ε bense wase Jisos wvù wee we lemme gεε mbew ye le. Jisos wvun nu wvù ben to tunεε jo nya ê bonyii bo nsaw e, ε Baylet no gomte keecine wvú le, ε ben faη.

14 Jisos to nu wee wvù yuule, nu teytey, ε ben tun wvú, gay le bó ebvuse ε è nu wee wvù to yuwyεε bonyii, enya ê ben.

15 Ε ben ge nonen mum yu wee wvù nyaa nshii ê bonyii, geenen, ε Nyo' kase bvuse wvú yî kpwe le, ε bese yen wvú le ε mum ε no seηe.

16 È ge mvuηgay mvu diee di Jisos wvudvu le ηkewle wvun wvù ben yene, kee, ε se no lene. Fí kooyi nonen njefo bese nu ε lese fitele yî Jisos e, fitele fi bese lese yî ye le ε mum ε ge wee wvun ε no temyi ntay nen no ben yene.

17 Keseen boom bo bwεem e, me ηkee le fiεε fi ben ε bikuu bi woη e to gee bô Jisos nu ε ben ε bó to ge yaa kee ke.

18 Fí to kooyi ê yiyin je le keege é fí eto ekocεn no Nyo' to gee wase ε bonyii bew bo ntum e jeme ε è bεε lo le Mboyse we wvù wvú to kawεε nu ke eyen ηgew.

19 Nonen, ben ekumen mvuntelem mvunen ekase etu jim fô wvú le, wvu le wvú elεεshe bibefe binen,

20 emum ege é shém elεeten ben, eciinse Jisos wvù Mboyse wvù wvú to balεε fô ben e.

21 Jisos wvun keηke keeke emey fowe egen ebuy kefew kè Nyo' ke eseyse mwεem mvunciim é mvú ekase etu mvunfem, no wvú to jemyεε diuw bonyii bew bo ntum e bô yuule le ε è bεε lo bvuyvuum e.

22 Muses to nu ε yuu gay le, 'Tata Nyo' nu ke ebvuse wee we ntum mvu ê boom bo bwee wene le ente, eciinse fô ben e ke no wvú to bvusεε me, ε ben keηke keeke eyuukè fiεε fi wvú jemyi ê ben e.

23 Wee wvù nu ke enu se wvú yuuke wee ntum wvudvu le, nu ε bó nu ke ebvuse wvú ηgoo bonyii bo Nyo' le, elεε lo.'

24 È nu ke ten no bonyii bo ntum Nyo' le bocii ε kew yî Samwel e noo bô to toe ejim jo wvú to jemyεε wase ekume mwεem mvù kooyi ediow eyan e.

25 Mwεem mvunciim mvù Nyo' to kawεε dew bonyii bew bo ntum e ban nu mvunen, ε kelew kè Nyo' to diee bô bo'icee cee bonen nu ten fô ben e. È nu no Nyo' to jemyεε ê Abl'am le, 'Me nu ηke embuw bonyii bocii yî ekole ke nshε le nfele yî kfu diuw e.'

26 Ε Nyo' mum caw wee we lemme yaw tum ε è nu fô ben e le wvú eto elan kembonen yî yene le, ege é ben ecine jé yene yî befe le."

Lem 4

Ɛ Bitá bô Jon tãje diuw

- 1** Kε no Bitá bô Jon to bæε jemyi ê bonyii nonεn, ε bocee ncese bomew bô εkolε ke bonyii bo nci le bô to cεyε yew ncese noo Bosadusii bomew sele fô.
- 2** Bô to ton'yi shém njefo Bitá bô Jon to yεεyi bonyii, fewci λε no Jisos to buyεε yî kpwe le nu ε bonkfu nu ke ebuy tεn yî kpwe le.
- 3** Ɛ bó mum koo bó gen fen no è to nu wase fokieguu, λε bvú ke edioo ε yuu, é bó sε no yuuke.
- 4** Geenεn, bonyii nteen bô to yuwεε n'yεεyi Bitá bô Jon, to nu ε bee, ε ηgoo yibo bise, ε bolemse no nu wase diewe bontfuke botin e (5,000).
- 5** Ɛ bvú ke buy yuu, ε bocee woη bô bonyii bô saake woη noo bonyii bô to duηci bonci bo Nyo' le, tase bvudvuu bvumwaaη Jelusalem.
- 6** Ɛ Annas wvù εkolε ke bocee ncese le bô Kayfas noo Jon bô Aleksanda noo bonyii bomew bô to nu tεn kfu di εkolε ke bocee ncese le nu fô.
- 7** Ɛ bó mum leke Bitá bô Jon ê bó εjise, bife ê bó λε, “Ben se jo fεε mvuηgay ε sε fε weε wvun? Ben se fε ê diee di yεε le?”
- 8** Ɛ Keyoy ke Yuule yηnsen yî Bitá le, ge ε wvú tfuse ê bó λε, “Bocee woη bô bonyii bô saake woη,
- 9** bese leeme fen εben keetaηe diuw ekumε lemme di jee di bese se gee fô ηkεwle le, wvú ε sε no λene. No ben gomte keekieε no fí se ghanεε,
- 10** ben noo bonyii bocii bo Israel ekeè λε weε wvun leeme ê ben εjise keseen temyi nεn, ε è nu nje mvuηgay mvu diee di Jisos Klistu wvu Nasalet e. Jisos wvudvu wvun nu wvù ben to joε ta yî kentam e ε wvú kpwe, geenεn ε Nyo' kase bvuse wvú yî kpwe le.
- 11** Wvú nu tε di Nwa' Nyo' jemyi ekumε dí λε, “Tε di ben bonyii bo kembom e to tunεε nu ε dí nε wase ε tu tε di buu di yew e.’
- 12** È mεy ke Jisos maanη wvù boysee bonyii. Kε diee di weε mvu le bvuu nu dvú fokuse fen di Nyo' nu ε gee λε è nulo é dí eboyse beene kε.”
- 13** Ɛ bonyii bô to saake ba, yuw no Bitá bô Jon jemyi yaa fane kε, bvuu yεn λε è nu bonyii bo ncεw, ε bó baa kee ηwa' ntay kε, ε diuw yum lo bó. Ɛ bó mum kieε λε fí nu nonεn, njefo è nu bonyii bô to ghane bô bo Jisos.
- 14** Ɛ bó faηε yaa bvuu keηke fieε fí bó ekicεn Bitá bô Jon yî dvú le kε, njefo bó to yεne weε wvù bó to fελε le, ε wvú leeme bô bó.
- 15** Ɛ bonyii bô to saake bodvu nε yaw bvuse bó ekfuη, mum shεε no cuu bontaη εbonebon gayte le,

16“Beene nu ege nɛɛ bô bonyii ban? Bonyii bocii bo Jelusalem nu ɛ bó ɛ kiiɛ wase ekumɛ fiɛɛ fi duŋci mvuŋgay mvu Nyo' le endan fin fi bó ge, ɛ ke è nulo é beene etun ke.

17 Geenen, keege le fo saaka wvudvu wvun ebvuu esaan̄kenè genè fwe, beene ekan bonyii ban le fo bó ebvuu emom lo ejeme fiɛɛ ê wee ekumɛ diee di Jisos wvun e ke.”

18 ɛ bó tee Bita bô Jon ɛ bó kase ley. ɛ bó mum lew lo ê bó le fo bó ke ebvuu emom lo ejeme, kenɛɛ eyɛɛyi wee ekumɛ diee di Jisos e ke.

19 ɛ Bita bô Jon tfuse fibole le, “Ben ke kpawwɛ le laa fiɛɛ fi nu len̄ fô Nyo' le nu le bese eyuw ɛ è nu ben e, nuu wvú wvù Nyo' le le?”

20 Ke è nulo é bese elu keejemyi ekumɛ mwɛɛm mvù bese nu ɛ yen ɛ bvuu ɛ yuw e ke.”

21 ɛ bonyii bô to saake bodvu bvuu loocɛ lew lo tɛme, mum cine bó le ɛ bó no gene. ɛ bó to tan ɛ è nu fiɛɛ fi bó elese bó dvú yî ngɛw e, njefo bonyii bocii to bensee Nyo' yî fiɛɛ fi to kooyɛ le,

22 sɛ bvuu ge ɛ wee wvudvu wvù bó to gee fiɛɛ fi duŋci mvuŋgay mvu Nyo' le fin keefe wvú to nu ɛ wvú ɛ fey wase bilum mbaanye.

ɛ bonyii bo mbee le lɛke mvuŋgay ê Nyo'

23 No bó cin'yɛɛ Bita bô Jon e nonen, ɛ bó kase tu jim fô bonyii bobole bo ngoo le, see ê bó fiɛɛ fi bocee ncese bo baay baay bô bonyii bô saake won̄ be jeme.

24 ɛ bó yuw, mum baance ye lɛke ê Nyo' yî wee le mwaan̄ le, “Tata wvù Cee Ekole, è to bom wo ebule bô nshɛ bô jóo noo mwɛɛm mvunciim mvù nu mondvuum man e.

25 Wo to nu ɛ ge ɛ icee bo'icee bosese wvù Dawe, wvù to nu waa wo lemme jeme yî mvuŋgay mvu Keyoy ke Yuule le le, ‘È nu nje la wvù bonyii bô yaa nu ke Bojuu ffuuke bô fiɛɛ shém e, ɛ bonyii cuu bontan̄ sɛ bó nu ke elem ŋkuuŋ?’

26 Bonfon bo fokuse fɛn seysee jem, ɛ bonyii bô saake won̄ taashi keediu Tata bô wee we wvù wvú nu ɛ yefe le è nu Mboyse.’

27 È nu ke len̄len̄ fiɛɛ fi to kooyɛ elaaante jan. Nfon 'Elod bô Bontus Baylet to nu ɛ taashe bô bitum noo bonyii bo Islael die mvunan̄ ejim jo Jisos wvù Waa wo lemme wvù yuule wvù wo to yefe le è nu Mboyse.

28 Bó to taashi keege ɛ è nu mwɛɛm mvù wo to nu ɛ seyse wase ncejole bô mvuŋgay mwuw le wo koon̄ke le mvú ke ekooy.

29 Nonen, yî keseen e Tata, taa eyen je yî bonyii ban bemsee bese jó. Nya bese bonyii buw bo lemme le bô mvuntelem mvù tɛmyi keefewci diw yo yaa fane naa lo ke.

30 Nya bese bô mvungay mwuw keefele bonyii bvuu gee mwεem mvù dunçi mvungay mwuw bô mwεem mvu diuw wvù yumεen e dvú ê diee di Jisos wvù Waa wo lemme wvù yuule le.”

31 No bó mεse ε bunle, ε nshε shiw fò bó to nu. Ε Keyoy ke Yuule yiηsen yî bó le, ε bó mum no fewci diew Nyo' yaa fane κε.

Ε ηgoo bonyii bo mbee le no κηke fiεε fibole fimwaan

32 Ε ηgoo bonyii bo mbee le no nu fitele fimwaan, nu yî wee le mwaan, ε wee yaa teηe fiεε fimew le è nu fiwene wen εmbeη κε. Ε fiεε fi wee le nu fi bonyii bocii le.

33 Ε Nyo' nya mvungay mvu baay ê boom bo ntum e bo Jisos e, ε bó bvuu no fewci κε ê bonyii temyi lo le Tata Jisos to nu ε buy yî kpwe le. Ε bó no nu ε Nyo' ε buw bó bô nfi we baay.

34 Κε wee yaa to nu dvú wvù fuute ê bó entelεη κε, njefo bonyii bò to κηke ηεε κενεε yéw to ké gese, to bô bigew bidvu,

35 nya can boom bo ntum e bo Jisos e, ε bó mum gaw ê bonyii bocii no ηgew wee to nu.

36 Wee mvu to nu ε bó teηe le Yosew, ε boom bo ntum e bo Jisos e ε cu diee diew dimew le Banaban, (dì nu le, Wee N'yvuwse Mvuntelem). Wvú to nu wee wvu ê kfuu di Lεwe le, ε bó to boke wvú Sayblus.

37 Ε wvú mum gen ten gese we wεε, to nya bigew bidvu can boom bo ntum e bo Jisos e.

Lem 5

Ananias bô Safilia

1 Ε wee mvu wvù bó to teηe le Ananias bô kpweεe wvù Safilia gese ten kecew ke wεε le.

2 Ε bô kpweεe seyse kaa fafe lo bigew bidvu, ε wvú mum jo kebεse gen nya can boom bo ntum e bo Jisos e.

3 No wvú nya nonen, ε Bita bife ê wvú le, “Ananias, è ge la fi wo cine Satan ε ley ê fitele fiuw e ε ge le wo embiay mbiay ê Keyoy ke Yuule, wo ε mum ε fafe bigew bì wo gese wεε dvú?”

4 Wo dīoo gese wεε ε è nu wo, ε bigew nu κε biuw, wo ε ghan nεε ε se ge kfuu fin fiεε? Wo baa mbiay ε è nu ê bonyii κε, wo mbiay ε è nu ê Nyo'.”

5 Kaη mwaan no Ananias yuw njeme wvun nonen, mum gbwe kpwe. Ε bonyii bocii bò yuwεε saaka wvudvu fan baay.

6 Ε cubonyii ley baance wvú ê ndvu le, jo buy dvú gen dwey.

⁷Ɛjim jo bontam bo kefew e diewe botete, ɛ kpwee ley, yaa kee fiɛ fi be kooy bô dweese kɛ.

⁸Ɛ Bita bife ê wvú lɛ, “Ƙɛ see ê me, bin nu bigew bicii bì ben ɛ dwee wo gese wɛɛ dvú?” Ɛ wvú tfuse lɛ, “Ɛɛ, è nu bí nɛn bicii.”

⁹ Ɛ Bita bvuu bife ê wvú lɛ, “Ben ɛ dwee wo ghan nɛɛ ɛ sɛ seyse keemom Keyoy ke Tata le? Yekɛ eyuw, ncin bonyii bô be gen ɛ dwey dwee wo nu wase ê yew fwese, ɛ bó nu eley etuu tɛn wo ebuy dvú egen edwey.”

¹⁰No Bita jeme nonɛn, kaɲ mwaan ɛ Safilia mum gbwe ê wvú ɛjise kpwe. Ɛ cubonyii ba dɔo ley yɛn ɛ wvú ɛ kpwe wase, ɛ bó mum tuu wvú buy dvú gen dwey mbew dweese le.

¹¹Ɛ kentaashɛ ke bonyii bo mbee le kecii noo bonyii bomew bô to yuwɛɛ saaka wvudvu fan baay.

Mwɛɛm mvù duɲci mvuɲgay mvu Nyo' le bô mwɛɛm mvu diuw wvù yumɛɛn e

¹² Ɛ boom bo ntum e bo Jisos e no gee mwɛɛm mvù duɲci mvuɲgay mvu Nyo' le bô mwɛɛm mvu diuw wvù yumɛɛn e nteen ê bonyii ente. Ɛ bonyii bo mbee le bocii ké no taashi fô kebuw ke Saamun e yew ncese le.

¹³Ƙɛ wee wvu nɛw to ké mum taashɛ lo bô bó kɛ. Geenɛn ɛ bonyii to ké no bensee naa bó ntay.

¹⁴ Ɛ bolemɛ bô bokɛnɛ nteen bô to leese fitele yî Tata le no biise ɲgoo bó le.

¹⁵ Ɛ mwɛɛm mvù boom bo ntum e bo Jisos e to gee, ge ɛ bonyii no tuule bonyii bo bincɛm e jiwse mbew jé le yî bintaw e noo yî dighaam e wvu le Bita ké dɔo fele, ɛ è cim nu kenjinjin kew é kí egbwe yî wee le.

¹⁶Ɛ bibombom bi bonyii le no nɛn'yi bilaante bi mbew Jɛlusalɛm e too bô bonyii bo bincɛm e noo bô kɛɲke biyoy bì yiile yî bó le, ɛ bó fele bó bocii.

Ɛ bó no ghɛɛke boom bo ntum e bo Jisos e

¹⁷ Ɛ ɛkolɛ ke bocee ncese le bô ɲgoo ye yì è to nu Bosadusii ke ja kew no ghɛɛke boom bo ntum e bo Jisos e,

¹⁸mum tum bonyii ɛ bó gen koo bó fen yew ncaw e.

¹⁹ Geenɛn, ɛ è ke no nu ɛntaɲ ɛ nceendaa Tata to yene dew fwese yew ncaw bvuse bó. No wvú bvuse bó, mum gay lɛ,

²⁰“Ben egen yew ncese le, egen efewcì fiɛ ficii ê bonyii ɛkumɛ nce wvu fwe wvun.”

²¹No bó yuw nonɛn, mum gen. Ɛ ɛkfuɲ ke dɔo eyuule, ɛ bó ley fô yew ncese le, mum kew no yɛɛyi bonyii. Ƙɛ kefew kedvu le, ɛ ɛkolɛ ke bocee ncese le bô bonyii bew bo ɲgoo le, kum bonyii bo Islael bô saake woɲ bocii ɛ bô bó shii, mum tum bonyii bo nci le lɛ bó egen yew ncaw e, eto bô boom bo ntum e bo Jisos e.

- 22 Ε bó gen buy fóm gom bó ηkuuη mum tu jim to see le,
- 23 “Bese gen ε buy yew ncaw e, ε yen ε dew fwese nu ε bó ε looce ε fen, ε bonyii bo nci le leeme fóm ceyte. Bese ε dioo yene yew ley ε fanε yaa eyen wee le dvú κε.”
- 24 Ε εκολε ke bonyii bo nci le bò to ceyte yew ncese bô bocee ncese bo baay baay, yuw nonen, ε fí ffumse bó, ε bó no ghayte laa bó nu ke etu fεε bô fin fiεε le.
- 25 Ε wee nε ley gay ê bó le, “Ben eyuw, bonyii ba bò ben se fenεε yew ncaw e, boba wase fô yew ncese le yεεyi bonyii.”
- 26 No bó yuw nonen, ε εκολε ke bonyii bo nci le bô ηgoo ye mum buy gen jo bó, no too bô bó. Geenεn, bó to baa joo bó kane lo bó κε, njefo bó, bonyii bo nci le bodvu to fane fo bonyii etumye bó bô εta.
- 27 Ε bó to bô boom bo ntum e bo Jisos e, ley bô bó leke fwe dvu bonyii bò saake woη. Ε εκολε ke bocee ncese le no biwci mwεεm ê bó gayte le,
- 28 “Bese nu ε looce wase ε lew lo le fo ben ebvuu emom eyεεyi wee εκυμε diee di wee wvun e κε. Geenεn, ben eyen fiεε fi ben mom! Ben nu ε ge wase n'yεεyi wene ε saanken Jelusalem jocii. Ε ben gomte keege é fí eduηci le bese kee fiεε fô kpwe ye le.”
- 29 Ε Bita bô ηgoo boom bo ntum e bo Jisos e tfuse le, “Bese κεηke keeyuw ε è nu Nyo' le, εfey keeyuw wee le.
- 30 Ben to nu ε ta Jisos yî kentam e ε wvú kpwe. Ε Nyo' bo'icee cee bosεεbeene bvuse wvú yî kpwe le,
- 31 bense wvú, shike ê εbo kew ke εcεεy e le wvú enù Cee Εκολε noo Mboyse, wvu le bonyii bo Islael ekumen mvuntelem mvubole, é wvú wvù Nyo' elεεshe bibefe bibole.
- 32 Bee bo Keyoy ke Yuule kè Nyo' nyaa ê bonyii bò yuuke wvú le ε mum ε no fewci mwεεm mvun.”
- 33 No bonyii bò to saake woη yuw njeme wvun nonen, ε mvuntelem bente lo bó. Ε bó mum no gomte keeyuwye boom bo ntum e bo Jisos e.
- 34 Geenεn, ε wee mvu ηgoo bonyii bò to saake woη e wvù diee to nu Gamalia, ε è nu wee Falasii bvuu nu wee wvù duηci bonci bo Nyo' le, ε bonyii bocii wvumte wvú ntay, nε we. No wvú nε we, gay ε bó yaw bvuse boom bo ntum e bo Jisos e ekfuη.
- 35 Ε wvú shεε jeme ê bonyii bò to saake woη le, “Bonyii bo Islael, ben ejo wεε bô fiεε fi ben gomte keege bô bonyii ban.
- 36 Ben ekume le è to nu kefew kemew e, ε wee mvu ja fen ε bó teje le Teodas no duηci le wen nu wee wvu baay. Ε bonyii shfum ê wvú ejim κε diεwε gee nε le. Ε bó ke yu wvú ε ηgoo ye tawse, ε fiεε fi wvú to too dvú laaye ecici.

³⁷ Ɛ wvumvu wee ke bvuu ja kefew kè bó to taan̄ke bonyii le Ɛ bó teŋe le Judas, Ɛ è nu wee wvu Galilee. Ɛ wvú gufe bonyii nteen ê wvú ejim. Ɛ bó ke yu ten wvú, Ɛ ŋgoo ye saan̄ken.

³⁸ Yí fin e, me Ɛ no nteete ben le fo ben ege fiee bô bonyii ban ke. Ben ecine je yibole. Ê è fen nu le fiee fi bó too dvú bvuu yeyi bonyii dvú fin kew wee wvu wum, tu fí nu ke elaaye ecici.

³⁹ Ê no nu le fiee fidvu kew Nyo', tu ke è nulo é ben ke eso bó ke. Ê ben baa eyene, é fí ke ene ebuy le ben diuu Ɛ è nu ben Ɛ bo Nyo'."

⁴⁰ No Gamalia jeme nonen, Ɛ bonyii bô to saake woŋ yuw ntefe we, kase tee boom bo ntum e bo Jisos e Ɛ bó ley. No bó ley nonen, Ɛ bó tam bó, ciise lo le fo bó ke ebvuu emom lo eyeyi wee ekume diee di Jisos e ke, mum cine bó le Ɛ bó no gene.

⁴¹ No bó buyee dvú no gene fibole yuuke Ɛ è nu njoŋ le bowen nu Ɛ bó Ɛ kocen bonyii bô bó eshoose bó nje diee di Jisos e.

⁴² Ɛ bó gen nonen, bvuu no yeyi ke bonyii ediuw ecii fô yew ncese le noo ela le, fewci saaka wvù jee wvù le Jisos nu Mboyse wvù Nyo' to kawee.

Lem 6

Ɛ bó baaye bonyii bo lemme le bosooshwi

¹ Ɛ è ke no nu kefew kemew e, no ŋgoo bonyii bo mbee le to kuu gene fwe, Ɛ Bojuu bô to jemyi ke Ɛ è nu díew Glek ne kew no wvukene Bojuu bô to jemyi díew woŋ le bó gawte mwem ê boké' bo bon̄kfu le ediuw ecii nyaa mvu bo bowen e caan.

² Nonen, Ɛ boom bo ntum e bo Jisos e bo yuufe ncow bofee mum kum ŋgoo bonyii bo mbee le bocii gay ê bó le, "Ke fí jee le bese ecine kefewci díew Nyo' egen shii Ɛ è nu yí kecyte le ke.

³ Boom bo bwee wese le, fí jee le ben ebaaye bonyii bosooshwi ê ben ente, é bese enya lemme din can yibole. Ben dioo baayi taa Ɛ è nu bonyii bô keŋke nce wvù jee, Ɛ bó Ɛ yiŋsen bô Keyoy ke Yuule bvuu keŋke bvufee.

⁴ Nonen, é bese emum enya wase bikuu bisese Ɛ è nu yí bunle bô yí lemme di díew Nyo' le."

⁵ Ɛ bonyii bocii yuw ntaŋ wvudvu, Ɛ wvú joŋ bó le. Ɛ bó mum baa Tefan Ɛ è nu wee Ɛ mbee we Ɛ looce Ɛ yiŋsen, Ɛ wvú Ɛ yiŋsen ten bô Keyoy ke Yuule. Ɛ bomew no nu Filew bô Blukolus, Nikano bô Timon, Balmenas bô Nikolaus wvù to nu wee wvu Antiok Ɛ wvú to ban̄ke lo tu wee mbee Bojuu.

⁶ Ɛ bó mum jo bonyii ban leke fwe dvu boom bo ntum e bo Jisos e, Ɛ bó bunle fô bó le, mum gee can yí bó le.

7 Ɛ diew Nyo' mum no saan̄kene gene. Ɛ ŋgoo bonyii bo mbee le yi Jelusalem no kuu gene fwe. Ɛ bocee ncese nteen lese ten fitele yî Jisos e.

Ɛ bó no teyte mwɛɛm yî Tɛfan e

8 Ɛ Nyo' buw Tɛfan ntay, ɛ wvú no keŋke mvuŋgay, gee mwɛɛm mvu diuw wvù yumeɛn e bô mwɛɛm mvù duŋci mvuŋgay mvu Nyo' le ê bonyii ente.

9 Ɛ bonyii bomew ke ne kew mbew bô bo Tɛfan. Bonyii bodvu to nu Bojuu bô to nen'yɛɛ Selin bô Aleksandia noo Silishia bô Esia. Ɛ è to nu bonyii bo yew bunle yî bó to teŋe le yi Bonfaw bô Boy wase le.

10 No bó to bewci nonen, ɛ Keyoy ke Yuule nya Tɛfan bô bvufee ɛ wee faŋe yaa nu dvú wvù eso wvù ke.

11 Ɛ bó mum ne beyse bonyii bomew ejim ejim le bó embiyatè le bó nu ɛ yuw ɛ Tɛfan jemyi díew yî befe ekume Muses bô Nyo'.

12 No bó ge nonen, mum shiw mvuntelem mvu bonyii le, bô mvu bonyii bô saake woŋ e, noo mvu bonyii bô duŋci bonci bo Nyo' le. Ɛ bó mum ley yî Tɛfan e, jo wvù gen bô wvù fwe dvu bonyii bo woŋ e bô saake bonsaw.

13 Ɛ bonyii ba bvuu to bô bonyii bomew bô eben jim nsaw mbiay, ɛ bó no teyte mwɛɛm yî Tɛfan e gayte le, “Ƙe wee wvun ké no nu se wvù jemyi díew yî befe ekume yew ncese yin bô bonci bo Muses e ke.

14 Bese nu ɛ yuw wase ɛ wvù jemyi le Jisos wvu Nasalet we nu ke ebvuw yew ncese yin, ebvuu ekumen nce wesebeene woŋ wvù Muses to yɛyɛɛ beene dvú.”

15 Ɛ bonyii bocii bô to nu yew nsaw e luŋ ejise yî Tɛfan e, ne yen ɛ bvushiw bwew ɛ baŋke wase ye ɛ no fieesene bvu nceendaa Nyo' le.

Lem 7

Ɛ Tɛfan taŋe diuw fwe dvu bonyii bô saake woŋ

1 Ɛ ekole ke bocee ncese le bife ê Tɛfan le, “Mwɛɛm mvù bó jemyi mvun nu keceɛy e?”

2 Ɛ Tɛfan tfuse le, “Bo'icɛm bô boom bo bwɛɛm e, ben eyeke eyuw. Nyo' bvukuke to nu ɛ buynen fô icee wesebeene wvù Ablam e ɛ wvù bee cee Misobotemia, ɛ wvù se ke ne gen no cee 'Alan,

3 gay ê wvù le, ‘Cine kfuu diuw e, ebuy woŋ wene le, egen woŋ wvù me nu ŋke enduŋce ê wo le.’

4 Nonen, ɛ wvù mum ne Kaldia jodvu, gen no cee 'Alan. Ɛ ice ke dioo kpwe, ɛ Nyo' ge ɛ wvù ne to jan jò beene cee keseen.

5 Ɛ wvù no nu jan ɛ Nyo' faŋe yaa ecim enya wvù ke naa bô kpweŋ ke, geenen, kaw le wen nu ke enya woŋ wvun é enu we bô engoke kew. Ɛ Nyo' to kaake nonen ɛ Ablam baa cim keŋke wase wan ke.

- 6 Ɛ Nyo' bvuu gay ê wvú le, 'Ɛngoke kuw nu ke enu botolo won mvu le, ke elemte bvunfaw jó, Ɛ bó nvuwse bó yí bilum e gee ne (400).
- 7 Ɛ me nu nke enlan ngew yí won wvudvu le,
 é Ɛngoke kuw ke ebuy jó eto ebunlee me jan.'
- 8 Ɛ Nyo' bvuu die kelew bô Ablam, Ɛ nciise kelew kedvu nu le Ablam nu ke etfuuse boom bew yew. Ɛ Ablam ke boo Aysik, Ɛ è ke dioo nu ediuw nya Ɛ wvú tfuse wvú yew. Ɛ Aysik ke boo Yakow tfuse ten wvú yew. Ɛ Yakow ke tfuse ten boom bew bo yuufe ncow bofɛɛ yew bô è nu bo'icee cee boɛɛbeene fô kfuu disɛɛbeene to sanɛɛ.
- 9 Ɛ bo'icee cee boɛɛbeene bodvu ke ne no bene kendon bô Yosɛw wvú waa bwee bó mum gese wvú, Ɛ wvú gen no nu nfa won wvú Ijiw e. Geenɛn, Ɛ Nyo' no taale ke fô wvú le,
- 10 fii wvú yí bonɛw bew e bocii. Ɛ Nyo' bvuu nya wvú bô bvufɛɛ, Ɛ Felo, Nfon wvu Ijiw no koonke wvú, mum gɛɛ wvú Ɛ wvú no nu wee we kebay bvuu nu wee wvú taale fô kfuu diew e.
- 11 Ɛ jɛn ke ne koo Ijiw jocii noo Kanaan, Ɛ bonyii yen ngew baay. Ɛ bo'icee cee boɛɛbeene fanɛ yaa kenke fiɛɛ fidien ke.
- 12 Ɛ Yakow ke yuw le mwɛɛm mvudien nu Ijiw, mum tum boom bew bô è nu bo'icee cee boɛɛbeene Ɛ bó gen jó yí kan wvu fwe le.
- 13 Ɛ bó ke dioo kase gen jó yí bokan bo bofɛɛ le, Ɛ Yosɛw mum ge Ɛ boom bo bwee le kieɛ wvú. Ɛ wvú mum duɛɛ ten bó ê Felo.
- 14 Ɛ Yosɛw mum ciinse ntum fô Yakow wvú ice le, le wvú bô kfuu dicii eto Ijiw. Kfuu di Yakow e to nu sekedvu wee mbansooshwi y ncow botin (75).
- 15 Ɛ Yakow yuw nonɛn, mum jo kfuu diew dicii bow dvú Ijiw. Ɛ wvú bô bo'icee cee boɛɛbeene ke kpweken jó bocii.
- 16 Ɛ bó ke tuu egvun ebo kase to dvú jan, to dwey Shekem ê jem yí Ablam to guyɛɛ ê boom bo Amol e.
- 17 Ɛ kefew ke dioo kocine kè Nyo' to nu keeke ege fiɛɛ fi wvú to kawɛɛ Ablam dvú, Ɛ bonyii boɛɛbeene duule wase Ijiw baay.
- 18 Ɛ bonyii bo jó ke ghaa nfon mvu Ɛ wvú yaa kee Yosɛw ke.
- 19 Ɛ Nfon wvudvu mum no wɛɛntene, sene bonyii boɛɛbeene, kane le bo'icee cee boɛɛbeene elaanke mvunley mvu boom e ekfuɛ Ɛ bó kpwekene.
- 20 È nu kefew kekin e kè bó to bokɛɛ Muses, Ɛ è to nu wan Ɛ wvú jee baay fô Nyo' le. Ɛ bó kenke wvú yew kee te,

- 21mum jo gen γεε εκφυ. Ε waa Nfon Felo wvù kpwoon ke gen bohye wvù, ley diewe waa we le.
- 22Ε bó mum yeyi Muses bô bvufee bvü bonyii bo Ijiw e bvucii, ε wvù no nu wee wvù kee njeme bô keege fiεε ntay.
- 23 Ε wvù ke dïoo nu ke diewe bilum mbaanye le, ke ne kpawce le wen nu egen eyen no boom bo bwee wen e bô è nu bonyii bo Israel nu.
- 24Ε wvù dïoo gene, yen ε wee wvu Ijiw nvuwse wee wvu Israel mvu. Ε wvù ley fó le wen etfuse envuke, mum yu lo wee wvu Ijiw wvudvu.
- 25Wvù to kpwaake le boom bo bwee wen e nu ekieε le è tum Nyo' wen le wen eto ebvuse bó yî ηgew e. Geenεn, ε bó faηε yaa kieε ke.
- 26Ε bvù ke buy yuu, ε Muses bvuu no gene, buynen yî bonyii bo Israel e bofεε ε bó ne ε no diuu. Ε wvù ley fó keegawsen bvudiuw bvudvu, bife ê bó le, 'Boom bo bwεem e, ben nu wee bô waa bwee, è ge la ben ε se no diuu ebenεben?'
- 27Ε wee wvù to nvuwse waa bwee kaa domse lo Muses, bife ê wvù le, 'È γεke γεε wo le wo esaakè bese, sumtene bonsaw bosese?'
- 28Wo fen bvuu gomte keeyu me no wo se yue wee wvu Ijiw wε foguu le?'
- 29 Ε Muses yuw nonen, mum fan ne woη wvù Ijiw e, fεε gen no nu woη wvù Midian e, ke boo boom bolemse bofεε jó.
- 30 Ε è ke no nu ejim jo bilum mbaanye, ε nceendaa Nyo' buynen fô Muses e ê ηgyu e, ε wvù bænci yî kete le ηkpwaante mbew kum wvù Sinay e.
- 31Ε Muses yen ε fï ghaw wvù, ε wvù bence nceencee keetaa ntay. No wvù benci, yuw ε Tata Nyo' jeme ê wvù le,
- 32'È nu me wvù Nyo' bo'icee cee wene, Nyo' Abl'am bô wvu Aysik noo wvu Yakow.' Ε Muses yuw nonen, no ciηke bô nfan, faηε yaa ebvuu emom lo etaa ke.
- 33Ε Tata Nyo' bvuu jeme ê wvù le, 'Baaye bolaba buw, ηjefo fen fò wo leeme fó nu bvudvuu bvù yuule.
- 34Me nu ε nlooce wase ε n'yen no bó nvuwse bonyii bem Ijiw, ε mbvuu ε n'yuw no bó cone, ε mum ε nshii ε nto keembvuse bó yî ηgew wvudvu le. Yekε eyuw, me nu entum wo Ijiw keseen.'
- 35 Muses wvun nu wvù bó to yawεε wase tun, bife ê wvù le, 'È γεke γεε wo le wo esaakè bese, sumtene bonsaw bosese?' È nu wvù wvù Nyo' to tumεε le wvù egen enu wee sa' wvubo, ebvuse bó yî ηgew e. Ε Nyo' to tum ε è nu nceendaa we ε wvù to yî kete kè to bænci kie le tefe ntum wvudvu ê wvù.
- 36 Ε Muses mum gen Ijiw, ge mwεem mvu diuw wvù yumεen e bô biηghaw bi mwεem e, bvuse bó jó. Ε wvù ge mvumew fô Joo yi Baay yî Yεεle le, bvuu ge mvumew ηkpwaante jò bó to lenεε yî bilum e mbaanye.

- 37 Ɛ è nu Muses wvudvu wvù to gayee ê bonyii bo Islael le, 'Nyo' nu ke ebvuse wee we ntum mvu ê boom bo bwee wene le ente, eciinse fô ben e ke no wvù to bvusee me.'
- 38 Ɛ è bvuu nu ke wvù wvù Muses wvù nceendaa Nyo' to jemyee ê wvù yî kum wvù Sinay e, kefew kè kentaashe ke bonyii bo Islael e to nu ñkpwaante bô bo'icee cee bosesebeene, Ɛ Nyo' nya díew yî nyaa nshii le wvù efese ê beene.
- 39 Geenen, Ɛ bo'icee cee bosesebeene kaa fañ keeyuw Muses e, banke jim ê wvù le, mum no koonke le bowen bee ekase etu jim Ijiw.
- 40 Ɛ bó mum gay ê Elon le, 'Bome bonyo' ê bese bô nu esaa fwe dvusebeene, njefo bese baa bvuu kiee fiee fi kooyi bô Muses we wvù bvusee beene won wvù Ijiw e ke.'
- 41 Ɛ bó mum kene fimooso Ɛ fí fieesene waa na', seeye nyám ge ncese dvú ê fí, mum no lanlaje yî fiee le Ɛ è kene bó bô can yibo.
- 42 No bó ge nonen, Ɛ Nyo' mum banke jim ê bó le, Ɛ bó mum no bunlee wase Ɛ è nu diuu bô kpwee noo jón. Ɛ è nu no bó to sañee ê Nwa' bonyii bo ntum Nyo' le Ɛ Nyo' jemyi le, 'Bonyii bo Islael, ben to seele nyám ñkpwaante yî bilum e mbaanye, ceese Ɛ è nu me dvú le?
- 43 Ben to ghane tuule cun Ɛ è nu yî nyo' wvù bó teje le Molok, bvuu tuule jon Ɛ bó Ɛ kene le è nu yî nyo' wvù diee nu Lefan, Ɛ è nu mvumooso mvù ben to keencee keebunlee mvú. Nje fifin, me nu ñke ebvuse ben é ben ebuy egen efey lo Babilon.'
- 44 Bo'icee cee bosesebeene to lene ñkpwaante keñke cun yî duñci le Nyo' nu bô bó, Ɛ è to fe Muses cun yidvu, bii ke lenlen no yî Nyo' to duñcee ê wvù to nu.
- 45 Ɛ boom bo bo'icee cee bosesebeene le ke fi, ke tuu to dvú jan kefew kè bô bo Yoshua to lole nshe ê bitum bì to nu jan e, Ɛ è to gene Nyo' fwe kuñke bitum bidvu. Ɛ cun yidvu no nu jan to buy kefew kè Nfon Dawe to saake won wvun e.
- 46 Ɛ Nyo' no koonke wvù ntay, Ɛ wvù mum lèke le Nyo' ebee é wen ebom yew enya é wvù wvù Nyo' Yakow eceè dvú.
- 47 Ɛ è ke kaa ghan Saamun bom yew Nyo' yidvu.
- 48 Geenen, Ɛ Tata Nyo' wvù nu Ekole ke Mwem Mvunciim e yaa ké no cee yéw yî è bom bonyii le ke. È nu ke lenlen no wee ntum Nyo' mvu to sañee wase Ɛ Nyo' gayte le,
- 49 'Fowe nu kawla wem, Ɛ nshe yin nu kedvuushe ke bikaa biem e. Yew yî è nulo é wee ebom le è nu yem nulo enu nee? Nuu le bvudvuu nu dvú bvù è nulo é me enshii fó le?
- 50 Ke è fe me mwem mvun mvunciim e?'"

51 Ɛ Tɛfan mum nɛ gay lɛ, “Ben tɛmyi bikuu baay, ɛ mvuntelem mvunen bô bitem nu naa lo nttfuse. Ben ɛ bo'icee cee bonɛn nu kɛ lɛŋlɛŋ. Ben tune sekecii keeyuuke Keyoy ke Yuule le.

52 Wee ntum Nyo' mvu nu dvú wvù bo'icee cee bonɛn to baa ebone bikaa ê wvú ejim e? Bó to nu ɛ yuwɛ bonyii bo ntum Nyo' le bô to jemyɛ wase lɛ Wee Lemme Nyo' wvu Teytey nu ke eto. Ɛ wvú ke to, ɛ ben gese wvú bvuu yu wvú.

53 Ɛ è bvuu nu kɛ ben bô Nyo' to tumɛ bonceendaa bew ɛ bó nya bonci bew ê ben, ɛ ben tun keebii bó le.”

Ɛ bó tumɛ Tɛfan bô eta

54 No bonyii bô to saake woŋ yuw fiɛ fi Tɛfan jeme, ɛ mvuntelem bente lo bó, ɛ bó no ŋgeci bigew.

55 Ɛ Keyoy ke Yuule yiŋsɛn yî Tɛfan e, ɛ wvú no taale fiew ɛ è nu we, nɛ yɛn n'yuu wvù è nu wvu Nyo' le, bvuu yɛn Jisos e ɛ wvú leeme ê ebo ke ɛɛɛy ke Nyo' le.

56 Ɛ Tɛfan nɛ gay lɛ, “Ben etaa eyɛn, me nu ɛ n'yɛn ɛ fowe ɛ yene, ɛ wee wvù dieɛ nu Waawee leeme ê ebo ke ɛɛɛy ke Nyo' le.”

57 Ɛ bó yuw fifiɛ, mum jine bintuŋtuŋ bô can, no wamte foweɛwe, mum sɛn bocii ley yî Tɛfan e,

58 gufe wvú buy dvú ɛlaante, gɛn no tumte bô eta. Ɛ bonyii bô benɛɛ jim nsaw baayɛ bikum bibole, nya ê cuwee mvu ɛ bó teŋe lɛ Saul, sɛ no tumte.

59 No bó to tumte Tɛfan bô eta nonɛn, ɛ wvú bunle lɛ, “Tata Jisos, fiisɛn keyoy kem.”

60 Ɛ wvú mum nɛ tum envuw fokuse, fuŋ foweɛwe lɛ, “Tata, fo wo etaa ê fiɛ fi befe fin fi bonyii ban gee le kɛ.” No wvú gay nonɛn, mum kpwe.

Lem 8

1 No bó yu Tɛfan, ɛ Saul tom.

Ɛ Saul nya ŋɛw ê kentaashɛ ke bonyii bo mbee le

Kɛ ɛbvubwɛ, ɛ bó kɛw no nyaa ŋɛw wvù tɛmyi ê kentaashɛ ke bonyii bo mbee le ke Jɛlusalɛm. Ɛ kí saanɛn kecii buy jó, gɛn biba bi Judea bô Samalia le, ɛ è shɛɛ ke boom bo ntum e bo Jisos e.

2 Ɛ bolemɛ bomew bô to nu ɛ loocɛ lese fitele yî Nyo' le, to jo gvune di Tɛfan e dwey, bee wvú baay.

3 Ɛ Saul nu fiew looci gene lo bô kentaashɛ ke bonyii bo mbee le, danɛsɛn yéw e kooyi bonyii bo mbee le bô bolemɛ noo bô bokɛnɛ ciinɛ yew ncaw e.

Ɛ Filew fewɛɛ diɛw Nyo' Samalia

4 Ɛ bonyii bô to saanɛnɛ ba no gene mondvuum e monciim fewci diɛw Nyo'.

- 5** Ɛ Filew bow fiew gen ê kelaante kè Samalia le, no fewci saaka jó wvu ekume Mboyse wvù Nyo' to kawee.
- 6** Ɛ bonyii nteen yuw bvuu yen mwεem mvù duŋci mvuŋgay mvu Nyo' le mvù wvú to gee, mum nya bitem ê wvú ntay.
- 7** Biyoy bì yiile to buyte yí bonyii le, wamte foweewe, ε bonyii nteen bò to nu ε kpweken keba kemwaan noo bontεε bonene ten.
- 8** Nonen, ε nlanlan wvu baay no nu εlaante jodvu.
- 9** Wee mvu to nu εlaante jodvu ε diee nu Semon, ε wvú to shee wase duŋci nfim ye ε kew lo, ε bonyii bo Samalia bocii yene ε diuw yumte bó. Ɛ wvú to bvuu duu le wen nu wee mvu wvu baay.
- 10** Ɛ bonyii bocii bo εlaante jodvu naa noo bo baay baay nya bitem ê wvú no gayte le, “Wee wvun nu mvuŋgay mvu Nyo' le mvù bó teje le Mvuŋgay mvu Baay.”
- 11** Bó to nya bitem ê wvú nonen, njefo wvú to shee wase duŋci nfim ye ε kew lo ncejole ε bonyii yene ε diuw yumte bó.
- 12** Geenen, ε Filew ke dīoo eto efewci saaka wvù jee wvu ekume bvunfon bvū Nyo' le noo ekume diee di Jisos Klistu le, ε bokεε bō bolemse bee ε wvú lese bó ê joo.
- 13** Ɛ Semon wε kebεε bee ten ε bó lese wvú ê joo. Ɛ wvú mum mεy ke wase no nu mbew Filew e yene biŋghaw bi mwεem e bi baay baay bō mwεem mvù duŋci mvuŋgay mvu Nyo' le mvù wvú to gee, ε diuw yumte wvú.
- 14** Ɛ boom bo ntum e bo Jisos e ke yuw Jelusalem le bonyii bo Samalia nu ε fiisen wase diew Nyo', ε bó mum tum Bitā bō Jon fō bó le.
- 15** Ɛ bó gen buy jó, bunle fō bonyii bo mbee le bodvu le le bó ekenke Keyoy ke Yuule,
- 16** njefo Keyoy ke Yuule to baa to wase yí mvu bó le ke. Bó to bεε lese ke lo bó ê joo maan ê diee di Tata Jisos e.
- 17** Ɛ Bitā bō Jon bunle, gεε can yí bó le, ε bó mum kenke Keyoy ke Yuule.
- 18** Ɛ Semon dīoo yen le boom bo ntum e bo Jisos e gεεle can yí bonyii le ε Keyoy ke Yuule too yí bó le, ε wvú mum no nyaa bigew ê Bitā bō Jon,
- 19** gayte le, “Ben enya me bō mvuŋgay mvun ten, wvu le naa yεε wvù me ε ηgεε can yem yí ye le, é wvú ekenke Keyoy ke Yuule.”
- 20** Ɛ Bitā tfuse ê wvú le, “Ben ε bigew biuw bidvu egen lo ηguy e. Wo ghan nεε ε se no kpwaake le è nulo é bó eguy nnya yì è nu yi Nyo' bō bigew?”
- 21** Ke wo yaa kenke naa lo keken ente jo lemme din ke, njefo ke fitele fiuw yuule fō Nyo' le ke.

22 Kumɛn fitele fiuw yî fiɛ fi befe fi wo gomte keege fin e, ebunlee laa è nulo é Tata Nyo' elɛɛshɛ boŋkpawwɛɛ bò befe ban bò wo keŋke fô fitele le le.

23 Me n'yene le wo nu ε yiŋsen wase bô ken'yɛɛ ejise, ε tu nƿwa kebefɛ.”

24 Ε Semon lɛkɛ Bita bô Jon le, “Kee, ben ebunle ê Tata le fo fiɛ fimew ente jo mwɛɛm mvù ben jemyi mvun e ekooy bô me kɛ.”

25 Ε Bita bô Jon ke mɛse fewɛɛ diɛw Nyo', see mwɛɛm mvù bó kee ekumɛ Jisos, mum nɛ no tuu jim Jelusalem. No bó to tuu jim, no fele bontɛw bo Samalia bomew e, fewci saaka wvù jee wvù wvu Nyo' jó.

Ε Filew lese wee wvu Itofia ê joo

26 Ε nceendaa Tata ke nɛ gay ê Filew le, “Nɛnɛ ebow je ekueku, egen ê je yì nɛn'yi Jelusalem fele ŋkpwaante gene Gasa le.”

27 Ε Filew mum nɛ no booke. Ε wee wvu baay mvu wvu Itofia nu ê je yidvu le. Wvù to nu wee ε bó ε bvuuɛ, ε è nu wee wvù to taale fô kpaw Yaa Kanda wvù to saake woŋ wvù Itofia le. Wee wvudvu to nɛ Jelusalem jò wvù to genɛ keebunle Nyo',

28 no tuu jim woŋ e ê kekoto kemew kè è guute nyám e, ε wvù ε shii jó, taanke fiɛ ê Nwa' wvù Yesaya wvù wee ntum Nyo' to saŋɛ le.

29 Ε Keyoy ke Yuule gay ê Filew le, “Bence egen mbew kekoto keki le.”

30 Ε Filew lewte gen mbew yî dvù le, yuw ε wee wvudvu taanke ê Nwa' Yesaya le. Ε wvù bife ê wvù le, “Wo taanke nɛn yuuke fiɛ fi wvù gayte?”

31 Ε wvù tfuse le, “È nulo é me en'yuw nɛɛ le sɛ wee ε nele ê me?” Ε wvù mum gay le Filew eben é bô wvù eshii ê kekoto le.

32 Bvudvuu bvù wvù to taanke ê Nwa' wvudvu le to jemyi le, “Wvù to nu diɛwe njee yì bó gene keesɛ le, bvuu nu diɛwe waa njee wvù bó ké dioo mvuu yvúw ye, wvù saa beele kɛ. È nu kɛ ten no wvù to nu diuw tfu.

33 Bó to nu ε shoose wvù, tun keesaw nsaw we leŋ. È nu ke eyuu ejemyi yɛɛ ekumɛ boom bew, ε bó ε sum wase nshii we fokuse fɛn?”

34 Ε wee wvu baay wvudvu mum lɛkɛ Filew gay le, “Kee wo, kɛ see ê me, wee ntum Nyo' wvun jemyi ε è nu ekumɛ yɛɛ? Wvù jemyi ekumɛ ekole kew nuu ekumɛ wee mvu le?”

35 Ε Filew mum kew kɛ bô bvudvuu bvù Nwa' le bvudvu, no nɛci saaka wvù jee wvu ekumɛ Jisos ê wvù.

36 Ε bô wvù no gene kɛ ê je, ke gen buy bvudvuu bvumew e ε joo nu fó. Ε wee wvu baay wvudvu gay le, “Taa eyɛn, joo nu fɛn, è nulo é ebvuu etun la fo wo elese me ê joo?”

[³⁷Ɛ Filew tfuse ê wvú le, “É wo fɛn nu ɛ bee Jisos Klistu le bô fitele fiuw ficii, é me enlese wo ê joo.” Ɛ wvú tfuse le, “Me nu ɛ mbee le Jisos Klistu nu Waa Nyo'.”]

³⁸Ɛ wee wvu baay wvudvu mum gay ɛ bó leke kekoto. Ɛ bô Filew shii, ley gen ê joo, ɛ Filew lese wvú ê joo.

³⁹No bó buyɛɛ ê joo, ɛ Keyoy ke Tata le cun Filew fó, ɛ wee wvu baay wɛ faɲɛ yaa ebvuu eyen wvú le kɛ. Geenɛn, no gene kɛ fiew laɲlaɲɛ.

⁴⁰Ɛ Filew nɛ buynɛn ɛ è nu wase Asotus, mum nɛ no gene, fele ê bilaante bicii le, fewci saaka wvù jee wvù wvu Nyo', gen buy ê kelaante kè Kaysalia le.

Lem 9

Ɛ Saul kumɛn lese fitele yî Jisos e

¹È to nu kefew kekɛ le, ɛ Saul bæɛ kɛ ffuuke, bæmsee bonyii bo ɲgoo le bo Tata le le wen nu eyuwɛ bó. Ɛ wvú mum gen fô ɛkolɛ ke bocee ncese le,

²leke le wvú enya boɲwa' é wen egen dvú yéw bunle yi Damaskus e, bô duɲci le é wen yen ɛ bonyii nu jó bô bii Je Tata le kɛnɛɛ è nu bokɛnɛ, kɛnɛɛ bolemɛɛ, é wen ekooyɛ bó ekay, eto bô bó Jɛlusalem.

³Ɛ wvú nya, ɛ Saul mum nɛ no gene Damaskus, ke dioo feɲene kelaante kedvu, ɛ n'yuun mvu nɛ sɛsɛ law fowe, shii to yî ye le.

⁴Ɛ wvú gbwe fokuse, yuw ɛ diɛw jeme ê wvú le, “Saul, Saul, wo bone bikaa ê me ɛjim nɛn nje la?”

⁵Ɛ wvú bife le, “Tata, è nu wo wvù yɛɛ?” Ɛ diɛw yidvu tfuse le, “È nu me wvù Jisos, ɛ è nu me wvù wo bone bikaa ɛjim jodvu.

⁶Yî keseen e, ja we, eley egen ɛlaante, é bó esee ê wo fiɛɛ fi wo kɛɲke keege.”

⁷Ɛ bonyii bô to lenɛ bô bo Saul leem fó ɲgɛmtɛn, no bó to yuuke diɛw yidvu yaa yɛnɛ wee le kɛ.

⁸Ɛ Saul ke ja we fokuse, dioo yɛnɛ ɛjise, faɲɛ yaa ebvuu eyɛnɛ mwɛɛm e kɛ. Ɛ bó mum jice wvú yî kebo le, no cɛɲɛ gene bô wvú Damaskus.

⁹Ɛ wvú gen no nu yî ɛdiuw e ɛta yaa yɛnɛ mwɛɛm e kɛ. Ɛ wvú nu nonɛn, yaa dieɛ fiɛɛ kɛ, yaa wuu tɛn fiɛɛ kɛ.

¹⁰Wee mbee mvu to nu Damaskus jodvu ɛ dieɛ diɛw nu Ananias. Ɛ Tata Jisos nɛ tee wvú ê fiɛɛ diɛwɛ ɛfile le le, “Ananias.” Ɛ wvú bee le, “Tata, me wvun fɛn.”

¹¹Ɛ Tata gay ê wvú le, “Nɛnɛ, egenè ê je yî bó tɛɲɛ le Tɛyɛy e, dioo buy fô yew e fo Judas, bife wee mvu wvu Taasus ɛ bó tɛɲɛ le Saul. Yekɛ eyuw, wvú nu fó bunlee,

¹²ɛ wvú be ɛ yɛn wase wee le ê fiɛɛ diɛwɛ ɛfile le ɛ bó tɛɲɛ le Ananias, ɛ wvú ɛ to ɛ gɛɛ can yî ye le, le wvú ekase eyɛnɛ mwɛɛm e.”

13Geenen, ε Ananias gay le, “Tata, me nu ε n'yuw wase ê bonyii nteen ekume wee wvun no wvú gee mwεem mvù befe fô bonyii bò è nu bo Nyo' le Jelusalem.

14ε wvú too nen, ε wvú ε fi mvuᅅgay ê bocee ncese bo baay baay, le wen eto ekooye bonyii bocii jan bò bunle teᅅe diee diuw.”

15 ε Tata tfuse ê wvú le, “Gene ke lo. Me nu ε ncaw wase wee wvudvu wee wem lemme le, le wvú efewcì diee diem ê bonyii bò yaa nu ke Bojuu bô bonfon bobole, noo ê bonyii bo Islael.

16 Me kebee nu ηke enduᅅce ê wvú no wvú keᅅke keeke eyen ηᅅew nje diee diem.”

17 Nonen, ε Ananias mum gen, ley yew dvudvu, gee can ye yî Saul e, tee le, “Saul waa bwεem, è tum Tata Jisos me. Ê nu wvú wvù Jisos wvù wo se yenee ê je seke wo se too jan. Wvú tum me nen, le me ento eᅅge é wo ekase eyenè mwεem e, é Keyoy ke Yuule eto eyiᅅsen yî yo le.”

18Ke no wvú jeme nonen, ε fiεe fimew diewe ηᅅáw e ne yî ejise Saul e gbwe fokuse, ε wvú mum kase no yene mwεem e. ε wvú ja we, ε bó mum lese wvú ê joo.

19ε wvú ke dieken, ε mvuᅅgay kase tu yî ye le.

ε Saul fewce saaka Jisos Damaskus

ε Saul ce Damaskus bô ηᅅoo bonyii bo mbee le yî ediuw e caan,

20 mum kew lo kaᅅ mwaan no ghane yéw bunle le, fewci le, “Jisos nu Waa Nyo'.”

21 ε bonyii bocii bò to yuuke no ghayte le, “Wvun nu ke wee wvù se ghane gene lo bô bonyii bò bunlee teᅅe diee diem Jelum e? ε ke wvú to jan nen ε è nu keekooye bò nu jan ekase eᅅen dvú, enya can bocee ncese bo baay baay e le?”

22 ε Saul no fewci ke fiew ekume Jisos temyi lo, duᅅci le Jisos nu Mboyse wvù Nyo' to kawεε. ε Bojuu bò to nu Damaskus ma lo fiεe fi è nulo é bó etfuse ê wvú.

23 ε ediuw ke dīoo fey nteen, ε Bojuu bodvu shii, cu ntaᅅ keeyu Saul.

24ε bó mum no shee, ceyte wvú diuw ketaan ke Damaskus e, le wvú ke dīoo fele, keᅅεε è nu entaᅅ keᅅεε emvunsheᅅ, é bó eyu wvú. Geenen, ε Saul kieε ntaᅅ wvubo.

25ε bonyii bew bo ηᅅoo le ke jo wvú entaᅅ, lese ê ηkaa le, bvuse fô ntoo ketaan e, shike wvú fokuse wase ekfuᅅ.

ε Saul gen Jelusalem

26 ε Saul tu jim Jelusalem, dīoo gomte keetaashe bô ηᅅoo bonyii bo mbee le, ε bó no fane lo wvú, njefo ke bó to beᅅe le wvú looci nu wee wvubo ηᅅoo ke.

27 Geenen, ε Banaban jo wvú, ε bô wvú gen fô boom bo ntum e bo Jisos e. Ε wvú see ê bó no Saul to yeneε Tata le ê je ε bô wvú jeme, bvuu see ê bó no wvú to fewci εκume Jisos Damaskus yaa fane κε.

28 Nonen, ε Saul mum no nu bô bó ghane mondvuum monciim Jelusalem, fewci ekume Jisos, yaa fane κε.

29 Ε wvú ke no jemyi ten ê Bojuu bò to jemyi díew Glek, beeke mbew bô bó, ε bó mum ne no gomte keeyu wvú.

30 Ε bonyii bo mbee le kieε le bó gomte keeyu wvú, mum jo wvú bow dvú ê kelaante kè Kaysalia le, ciinse wvú ε wvú gen Taasus.

31 Yî kefew kekin e, ε kentaashe ke bonyii bo mbee le læten yî ηgew e ê biba bi won e bì Judea bô Galilee noo Samalia le. Ε Keyoy ke Yuule ge ε kentaashe kedvu ciim, bvuu no tomte ηgoo ε yí kuu. Ε bó no cee, wvumte κε ε è nu Tata.

Ε Bita gen ntew wvú Lida noo wvú Jofa le

32 Ε Bita no ghane, gene fô bonyii bò è nu bo Nyo' le mondvuum e monciim, ke ghan gen buy fô bó Lida le.

33 No wvú to nu jó, yen wee mvu le ε wvú ε kpwe keba kemwaan, ε diee nu Enias ε wvú ε ηgey wase entaw bilim nyan.

34 No Bita yen wvú le, tee le, “Enias, Jisos Klistu fele wase wo. Ja we eseyse kentaw kuw.” Kaη mwaan ε Enias mum ja we.

35 Ε bonyii bo Lida noo bo yî bale di Shalon e bocii yen no wee wvudvu nu ε bonen wase, ε bó lese fitele yî Tata Jisos e.

36 È to nu ε kpwoon mvu nu ê kelaante kè Jofa le, ε è nu wee mbee, ε diee nu Tabita, di nu ê díew Glek e le Dokas. Wvú to ké no gee mwæem mvù jee sekecii, fii bonyii bò fuute.

37 Ε è no nu ediuw yoya le, ε kpwoon wvudvu gbwe kencem, mum kpwe. Ε bó cuke gvune diew, ben gee ê kebuw ke yew e ke ewe le.

38 No Jofa to nu mbew Lida le, ε ηgoo bonyii bo mbee le ke yuw le Bita nu Lida, mum tum bolemse bofeε fô wvú le. Ε bó gen leke wvú, le kee wvú, le wvú eto ke ncin e.

39 Ε Bita mum ne κε nonen ε bô bó no gene. Ε wvú gen buy fó, ε bó jo wvú ben bô wvú ê kebuw ke yew e ke ewe kie le. Ε boke' bo boηkfu le bo jó bocii gem wvú tase no beele, duηci ndvú yì Dokas to gee seke wvú to bæε dvú.

40 Ε Bita bvuse bó εκfuη bocii, tum envuw fokuse bunle, ne baηke ye gay ê gvune didvu le, “Tabita ja we.” Ε wvú mum yene ejise, taa Bita, mum ja shii we.

41 Ε Bita jice wvú le yî kebo le, ε wvú leem we. Ε wvú kase tee bonyii bò è nu bo Nyo' le bô boke' bo boηkfu le ba, duηce wvú ê bó, ε wvú ε kase wase ε tu dvú.

⁴²Ε saaka wvudvu saan̄ken gen Jofa jocii. Ε bonyii nteen lese fitele yî Tata le.

⁴³ Ε Bita no nu Jofa yî ediuw e nteen, cee bô wee mvu wvù to seysee jéw ε diee nu Semon.

Lem 10

Ε fiεε diεwε εfiλε le to fô Konεyu le

¹ Wee mvu to nu ê kelaante kè Kaysalia le ε bó teje le Konεyu, ε è nu εkolε ke ngoo mi bonyii bo nci le bo Lum, yî bó to teje le yi Itali.

² Ε wvú to nu wee ε bô bonyii bocii bo ê wvú yew ε loocε ε lese fitele yî Nyo' le. Ε wvú wvumte bvuu bunlee Nyo' sekecii, nyaa nnya ntay ê Bojuu bò to fuute.

³ Ε è ke no nu diuu dimew ke diεwε didiuu ditete le fomvunsheεη, ε fiεε diεwε εfiλε le nε to fô wvú le, ε wvú loocε yen nceendaa Nyo' le ê fiεε fidvu le. Ε nceendaa wvudvu to ley tee wvú le, “Konεyu”.

⁴ Ε Konεyu fan, luη εjise yî ye le bife le, “Cee εkolε, è nu la?” Ε nceendaa wvudvu tfuse le, “Nyo' nu ε yuw wase bunle yo, ε bvuu ε yen nnya yî wo nyaa ê bonyii bò fuute, ε kume wo.

⁵ Yî keseen e, tumε bonyii Jofa é bó egen etee wee mvu wvù diee nu Semon, ε dimew nu Bita.

⁶ Wvú nu ε to ε no cee bô Semon mvu wvù ké no seysee jéw wvù la diεw nu mbew joo yi baay e.”

⁷ No nceendaa Nyo' wvudvu jeme nonen mum nε. Ε Konεyu shεε tee bonyii bew bo lemme le bofεε, bvuu tee ten wee nci mvu wvù to ké no cεyte wvú, ε è to nu wee ε wvú ten ε loocε ε lese fitele yî Nyo' le.

⁸ Ε bó to, ε wvú see fiεε ficii fi be kooy ê bó, mum tum bó Jofa.

Ε Nyo' duηcε fiεε fi ηghaw e ê Bita

⁹ Ε εkfuη buy yuu, ε è ke no nu ke diεwε εmvunsheεη enteleη e, ε bó fεεse wase ê kelaante kedvu le. Ε Bita nε ben ê yew we keebunle.

¹⁰ Ε jeη ke nε no yuu wvú, ε wvú no shieele keediekεn, ε bó bεε dεεle lo mwεεm mvudien. Ε fiεε diεwε εfiλε le nε to fô wvú le.

¹¹ Ε wvú yen ê fiεε fidvu le, ε εbulε ε yene, ε fiεε fimew shiile fowe nu diεwε εkolε ke ndvu le, ε bó jici yî εbuw yo εna le.

¹² Ε dikfuu di nyám e dicii, yî lene, bô yî sone lo, noo mvunyiim mvù bile we, nu ê ndvu yidvu le.

¹³ Ε diεw nε gay ê wvú le, “Bita, nεnε we εεεyε edie.”

¹⁴ Ε Bita tfuse le, “Tata, ke è nulo é me emom ke, njefo me ηke mbaa ndie wase fiεε fi ncewncew kεnεε fi nu se fí yuule lo ke.”

15 Ɛ diew yidvu bvuu jeme ê wvú le, “Fo wo enyensè fiεε Ɛ Nyo' Ɛ ge wase fí Ɛ no yuule ke.”

16 Ɛ fí kooy nonen buy bokaŋ botete, Ɛ bó mum kase bense fiεε fidvu we.

17 Ɛ fiεε fidvu fí toε diewe εfile le ffumse Bita Ɛ wvú no maa laa fí duŋci le la le. Ke sekedvu Ɛ bonyii bò Koneyu to tumεε ba Ɛ to wase Ɛ biwce fò la di Semon wvù seysee jéw e nu, Ɛ no leeme diuw ketaaŋ e,

18 teŋe, biite le, “Wee ghane mvu nu fen Ɛ diee nu Semon Bita le?”

19 No Bita to bæε kpawwci ekumε fiεε fidvu fí toε fò wvú le, Ɛ Keyoy ke Yuule ne gay ê wvú le, “Taa eyen, bonyii botete gomte wo.

20 Nεε we ebow é ben Ɛ bó egene ekale kemwaaŋ. Fo wo ecimcim ke, è tum me bó.”

21 Nonen, Ɛ Bita mum ne bow, gay ê bonyii bodvu le, “È nu me wvù ben gomte. Ben to le la?”

22 Ɛ bó tfuse le, “Koneyu wvù nu ekole ke ŋgoo mi bonyii bo nci le bo Lum nu Ɛ tum bese. Wvú nu wee wvu teyey, fane Nyo', Ɛ Bojuu bocii bensee wvú. Nceendaa Nyo' wvù yuule mvu se nu Ɛ gay le wvú eciinse ntum é wo eto ê wvú yew, é wvú eyuw fiεε fí wo nu ejeme ê wvú.”

23 No bó tfuse nonen, Ɛ Bita mum gay Ɛ bó ley Ɛ bô bó ce.

Ɛ Bita gen ntum Nyo' yew dvu Koneyu

Ɛ ekfuŋ buy yuu, Ɛ wvú ne Ɛ bô bó no gene. Ɛ bonyii bo mbee le bomew bo Jofa bi wvú le.

24 Ɛ bó len ce, Ɛ bvú buy yuu Ɛ bó fese Kaysalia. Ɛ Koneyu bô bonyii bew bo kfuu le noo nsáa ye shém yì wvú to bæε to ceyte wase bó.

25 No Bita to leyte gene yew, Ɛ bô Koneyu tasen. Ɛ Koneyu gbwe ê wvú ejise wvum wvú.

26 Geenεn, Ɛ Bita cake wvú we gay le, “Nεε we, me nu ke ten fiem wee wvu wum diewe wo le.”

27 Ɛ wvú no jemyi bô Koneyu leyte gene yew, ke dioo ley, yen Ɛ bonyii Ɛ njim lo yew.

28 Ɛ wvú jeme ê bó le, “Ben kee ntay le nci wese baa bee le wee Juu elaa ghane kenεε etase nsan bô wee wvù yaa nu ke wee Juu. Geenεn, Nyo' nu Ɛ duŋce ê me le ke me ŋkenke keenteŋe wee mvu nduu le wvú nu wee wvu ncεw kenεε le ke wvú yuule ke.

29 Nonen, ben Ɛ dioo ciinse ntum le me ento, me Ɛ mum Ɛ nto, me mbaa ŋkicine ke. Me Ɛ mum Ɛ no mbiite ê ben le laa ben teŋe me le la le?”

30 Ɛ Koneyu tfuse le, “Ɛben nu wase ediuw ena no me nto nu yew dvu me ke diewe kefew ke keseen e didiuu ditete fomvunsheen mbunlee. Ɛ wee mvu ne sese buynen fwe dvu me Ɛ wvú Ɛ tfume ndvú Ɛ yí lawkene.

31 Ɛ wvú gay ê me le, ‘Koneyu, Nyo’ nu Ɛ yuw wase bunle yo Ɛ bvuu Ɛ yen nnyá yí wo nyaa ê bonyii bo kefufe le, Ɛ kume wo.

32 Nonen, tume bonyii Jofa é bó egen etee wee mvu Ɛ diee diew nu Semon, Ɛ dimew nu Bita. Wvú nu Ɛ to Ɛ no cee bô Semon wvù seysee jéw wvù la diew nu mbew joo yi baay e.’

33 Kaŋ mwaan nonen, Ɛ me mum nciinse ntum le wo eto. Wo Ɛ to nen, fí Ɛ jon baay. Bese Ɛ mum Ɛ no nu fen ê Nyo’ ejise keeyuw fiee fi Tata tum wo le wo eto ejeme ê bese.”

Ɛ Bita jeme ê bonyii bò yaa nu ke Bojuu ekume Jisos Klistu

34 Ɛ Bita mum kew no jemyi gayte le, “Yí keceey e, me nu Ɛ n’yen le ke Nyo’ dunji kejeey jey ke.

35 Wee tfuu wvù fane wvú bvuu gee fiee fi nu len nu Ɛ wvú fiisene wvú yaa taale laa mweten buy fee le.

36 Ben kee ntum wvù Nyo’ to ciinsee fô bonyii bo Israel e, fewci saaka wvù jee le Jisos Klistu to to wvu le nyekyey nulo enu entelen jo Nyo’ bô bonyii. Ɛ Jisos Klistu wvun nu Cee Ekole bonyii bocii.

37 Ben kee fiee fi to kooyee won wvù Judea le tfuu, Ɛ fí to kew Galilee ejim jo kefew kè Jon to fewci leese bonyii ê joo.

38 Ɛ ben kee ten no Nyo’ to tfuwee lo Keyoy ke Yuule yí Jisos wvu Nasalet e, bvuu nya mvungay ê wvú, no nu bô wvú. No Nyo’ to nu bô wvú, Ɛ wvú mum no lene mondvuum monciim gee lemme di jee bvuu fele bonyii bò dewle nvuwse.

39 È nu bese bò to yenee mweem mvù wvú to gee won Bojuu le tfuu, noo mvù wvú to gee ê kelaante kè Jerusalem e. Bó to nu Ɛ ta wvú yí kentam e Ɛ wvú kpwe.

40 Geen, Ɛ è ke dloo nu ediuw eta, Ɛ Nyo’ bvuse wvú yí kpwe le, ge Ɛ bonyii yen wvú le.

41 Ɛ ke Ɛ yaa nu bonyii bocii bò to nu Ɛ yen wvú le ke. È to yen ke bese bò wvú wvù Nyo’ to cawee le bese efewci ekume Jisos. Ɛ bese to nu Ɛ dieken bvuu wuken bee bo Jisos seke wvú to buyee yí kpwe le.

42 Ɛ wvú gay le bese ke efewci diew Nyo’ ê bonyii, bvuu seŋe ê bó le è nu wen wvù Nyo’ nu Ɛ baa le wen ke esaw bonyii bò bee dvú noo bò kpweken wase.

43 Jisos wvun nu wvù bonyii bo ntum Nyo’ le bocii to jemyi ekume wvú le è nu naa yee wvù nu Ɛ lese fitele yí ye le, é Nyo’ eléeshe bibefe biew fele yí diee diew e.”

Ɛ Keyoy ke Yuule to yí bonyii bò yaa nu ke Bojuu le

44 Kε no Bita to bæe jemyi mwæm mvun nen, ε Keyoy ke Yuule ne shii, to yî wee tfuu wvù to yeke njeme wvudvu le.

45 E diuw yum bonyii bo mbee le bò è nu Bojuu bò to bie Bita le, no bó yeneε ε Nyo' ε nya ten nnya ye yì è nu Keyoy ke Yuule ê bonyii bò yaa nu ke Bojuu.

46 E Bojuu ba no yuuke ε bó jemyi díew yì bó yaa kee ke, bensee Nyo'. E Bita mum bife le,

47 “No Keyoy ke Yuule nu ε to wase yî bonyii ban e læŋlæŋ no kí to toε yî yese beene le, è nulo é wee ebvuu etun fo bó elese bó ê joo le?”

48 No Bita bife nonen, mum gay le bó elese bó ê joo ê diee di Jisos Klistu le. Ejim jodvu, ε bonyii bodvu læke le wvù ece bô bó yî εdiuw e caan se nenε.

Lem 11

E Bita see fiε fi to kooyε yew dvu Konεyu

1 E boom bo ntum e bo Jisos e noo bonyii bo mbee le Judea jocii ke yuw le bonyii bò yaa nu ke Bojuu nu ε fiisen wase ten diεw Nyo'.

2 E Bita ke dīoo kase ben Jelusalem, ε bonyii bo mbee le bomew mum no saake wvù. Bonyii ban nu bò to ké no leeme ke le bó keŋke keetfuse wee wvù yaa nu ke wee Juu yew, é mwetεn se no nu wee Nyo'.

3 E bó no saake wvù biite le, “Wo se ghan neε ε se laa ghane ê bonyii bò bæe ntffuse le, ε bvuu ε mεse ε diεken ben ε bó?”

4 E Bita mum looε nyey fiεε ficii fi to kooyεε, gay ê bó le,

5 “Me nto nu ê kelaante kè Jofa le mbunlee, ε fiεε diεwε εfile le ne to fô me le. E me n'yen ê fiεε fidvu le, ε fiεε fimew shiile fowe nu diεwε εkolε ke ndvu le, ε bó jici yî εbuw yo εna le. E fí shii, leem ê me εjise.

6 E me ndīoo ntaa jó, n'yen nyám e dikfuu le dikfuu le, ε yimi nu yi fô yew e, yimi yi ŋkpwaante bô yì sone, noo mvunyiim mvù bile we.

7 E me ne n'yuw ε diεw gay ê me le, ‘Bita, nenε we esεεye edie.’

8 E me ntfuse le, “Tata, ke è nulo é me emom ke. Ke fiεε fi ncεwncεw kenεε fi nu se fí yuule lo ke nu ε ley wase ê me εmvu ke.’

9 E diεw yidvu bvuu jeme we le, ‘Fo wo enyensè fiεε ε Nyo' ε ge wase fí ε no yuule ke.’

10 E fí kooy nonen buy bokaŋ botete ε bó mum kase gufe fiεε fidvu ficii ε fí ben we.

11 Kε sekedvu, ε bonyii botete fεse fô yew e fò me nto ncee, ε bó ne Kaysalia, ε bó tum le bó eto etee me.

12 Ɛ Keyoy ke Yuule gay ê me le fo me enyaw keenḡen bee bonyii bodvu ke. Ɛ boom bo bwee wesebeene le bo Jofa bo bosooaan ban bi me le, Ɛ bee bó bocii ḡen ley yew dvu wee wvudvu.

13 No bese ley, Ɛ wvú see ê bese no wvú to yenee nceendaa Nyo' le ê wvú yew, Ɛ wvú gay le wen etum wee Jofa é wvú eḡen etee wee mvu Ɛ bó teje le Semon Bitá.

14 Wee wvudvu nu ke eto bô saaka wvù bô bonyii bocii bo ê wen yew nu ke eboy yí dvú le.

15 Ɛ me ḡke ndioo ḡkew keenjemyi, Ɛ Keyoy ke Yuule ne shii to yí bonyii bodvu le ke leḡleḡ no kí to toe yí yese beene le foḡkew.

16 Ɛ me n'yen nonen, mum ḡkume fiƐ fi Tata to jemye le, 'Jon to leese bonyii ê joo, geenen, Nyo' nu ke elese ben Ɛ è nu can Keyoy ke Yuule le.'

17 No Nyo' to nu Ɛ nya bonyii bodvu bô nnya Ɛ è nu ke yí yí wvú to nyae ê beene seke beene to lese fitele yí Tata Jisos Klistu le, é me enu yeƐ wvù etunè fiƐ fi è gee Nyo'?"

18 Ɛ bonyii bodvu yuw no Bitá jeme nonen, faḡe yaa ebvuu esaake wvú ke. Ɛ bó mum ne no tumte Ɛ è nu moḡkum mo Nyo' le gayte le, "É è fen nu nonen, ke tu Nyo' nu Ɛ nya wase ten je ê bonyii bô yaa nu ke Bojuu, le bó ekumen mvuntelem mvubole ke ekeḡke nshii wvù meḡ lo."

Ɛ bonyii nteen bô yaa nu ke Bojuu lese fitele yí Tata Jisos e Antiok

19 Bonyii bô to saanḡenee no ḡḡew to kewee seke bó to yue Tefan to nu Ɛ gen mondvuum e mondvuum e, gen buy Fonishia, Ɛ bomew gen Sayblus, bomew Antiok. No bó genee nonen, no fewci diew Nyo' Ɛ è nu ke ê Bojuu maanḡ.

20 Geenen, Ɛ bomew bonyii bo mbee le bô to nen'yee Sayblus noo Selin, gen Antiok no fewci ten saaka wvù jee wvu ekume Tata Jisos ê bonyii bô yaa nu ke Bojuu.

21 Ê mvuḡgay mvu Tata Nyo' le, Ɛ bó ge Ɛ bonyii nteen lese fitele yí Tata Jisos e, kumen tu bô wvú.

22 Ɛ saaka wvudvu wvun ley bitem bi kentaashe ke bonyii bo mbee le Jelusalem. Ɛ bó mum tum Banaban Antiok jodvu.

23 Ɛ wvú gen buy jó, yen no Nyo' nu Ɛ buw bó bô mboyma, Ɛ wvú yuw njoḡ, mum no teete bó le bó ebii Tata le bô mvuntelem mvubole mvunciim.

24 Banaban wvun to nu wee wvù jee, Ɛ wvú Ɛ yiḡsen bô Keyoy ke Yuule bvuu keḡke mbee ntaḡ. Nonen, Ɛ wvú ge Ɛ bonyii nteen jó lese fitele yí Tata le.

25 Ɛ Banaban ke mum ne gen Taasus keegom Saul.

²⁶ Ɛ wvú ke gom yen wvú le, jo ɛ bô wvú tu jim Antiok. Ɛ bô wvú no nu jó yî kelum e kecile bô kentaashe ke bonyii bo mbee le, yɛɛyi bonyii nteen. Ê nu Antiok jodvu jò bó to kewɛ keeteŋe ŋgoo bonyii bo mbee le le bonyii bo Klistu le.

²⁷ Ɛ è ke no nu ke kefew kedvu le, ɛ bonyii bomew bò ké no seŋe mwɛem mvù bó yuuke ɛ Nyo' jemyi, ne Jelusalem bow gen Antiok jodvu.

²⁸ Ɛ Keyoy ke Yuule ge ɛ mvu bó le wvù diee to nu Agabus ke ne leem we, tefe le jeŋ yî tɛmyi nu ke ekoo woŋ tfuu. Jeŋ yidvu to nu ɛ ghan koo kefew kè Klawdius to nu Nfon wvu Lum.

²⁹ Ɛ ŋgoo bonyii bo mbee le bo Antiok yuw nonɛn, seyse le wee tfuu esuw bigew no wvú keŋke, é bó efi boom bo bwee bó le bò nu Judea dvú.

³⁰ Ɛ bó mum suw, tum Banaban bô Saul dvú le bó egen enya ê bocee kentaashe ke bonyii bo mbee le.

Lem 12

Ɛ Nfon 'Ɛlod nya ŋɛw ê bonyii bo mbee le

¹ Ɛ è no nu kefew kedvu le, ɛ Nfon 'Ɛlod kew no nyaa ŋɛw ê bonyii bomew bo kentaashe ke bonyii bo mbee le.

² Ɛ wvú gay ɛ bó gbwo Jɛm wvù waa bwee Jon ɛ wvú kpwe.

³ Ɛ wvú ke dioo yen le fí nu ɛ joŋ Bojuu le, ɛ wvú mum gen fwe gay ɛ bó koo ten Bitá. Bó to kole wvú ɛ è nu ediuw ɛ Nkaw Blɛɛd wvù bó baa gee Fintuŋleen jó le ke.

⁴ No bó koole ɛ wvú, mum fen yew ncaw e, gee ŋgóo bonyii bo nci le nye le bó eɛyɛte wvú bonɛw bonɛw. Ɛ 'Ɛlod to geke Bitá nonɛn le Nkaw Daŋɛfey ke dioo ɛ fey, é wen ebvuse wvú eleke ê bonyii fwe é bó esaw wvú.

⁵ Ɛ Bitá mum no nu ke yew ncaw e. Geenɛn, ɛ kentaashe ke bonyii bo mbee le no bunlee Nyo' fô wvú le shiee le.

Ɛ nceendaa Nyo' bvuse Bitá yew ncaw e

⁶ Ɛ è ke dioo nu entaŋ wvù ekfuŋ nu ebuy eyuu é 'Ɛlod ebvuse Bitá é bó esaw wvú, ɛ Bitá no leete enteleŋ jo bonyii bo nci le bofɛɛ ɛ bó ɛ kay wvú bô boncaw bofɛɛ, ɛ no ɛyɛte. Ɛ bonyii bo nci le bomew ɛyɛte yew ncaw ê fwese.

⁷ Ɛ fí kooy le nceendaa Tata to nu ɛ ne sɛsɛ buynɛn, ɛ n'yu ba yew ncaw yidvu le. Ɛ nceendaa wvudvu kum Bitá yî kebɛnɛ le, ɛ wvú kamse. Ɛ wvú gay ê wvú le, “Ja we cekey.” No wvú gay nonɛn, ɛ boncaw ba mum feyken can Bitá le gbweken fokuse.

⁸ Ɛ wvú bvuu gay ê wvú le, “Tɛmɛ ndvu yo, elese bolaba buw.” Ɛ Bitá ge nonɛn. Ɛ nceendaa wvudvu bvuu gay le, “Bulɛ ndvu yo ebì me le.”

⁹Ɛ Bita bu, mum no bii wvú le ekfuṅ. Ke wvú to cim kee le fiε fi nceendaa wvudvu gee nu kecεεy ke. Wvú to kpwaake le è nu fiε diewe εfile le ε fí too fô wen e.

¹⁰Ɛ bô wvú len fey bvudvuu bvú fwe fô bonyii bo nci le to cεyte, bvuu fey bvú ejim, mum fεse diuw ketaaṅ wvù buyte gene εlaante le, ε bó ε fe bô ketfu. Ɛ diuw ketaaṅ wvudvu yene ke εwvunεwvun, ε bó buy. No bó buy nonen, no lene booke ke ê je, ε nceendaa Tata Nyo' wvudvu mum ne la ê wvú ejise.

¹¹Ɛ Bita shεε, ε bvufee tu wvú fó, ε wvú gay le, “Keseen nu ε me ε ηkίεε wase le è nu kecεεy le è be tum Tata nceendaa we le wvú eto ebvuse me can 'Elod e, é me emboy yí ηgew wvù Bojuu se cεyte le bó nu ke enya ê me le.”

¹² No wvú kiente nonen, mum ne no gene fô yew e fo Maalia wvù bwee Jon Maaku, ε bonyii nu ε bó ε tase fó nteen ε no bunlee.

¹³Ɛ wvú gen buy fó, kumcε diuw ketaaṅ, ε wan kpwoon mvu ε diee nu Loda wvù to lemte fô yew e fodvu to keeyene.

¹⁴Ɛ wvú dioo yuw ε è nu diew Bita, ε njoṅ yu wvú, ε wvú faṅε yaa yene ketaaṅ ke, kaa ne lewte kase ley gen yew, see ê bonyii le, “Bita nu diuw ketaaṅ e.”

¹⁵Ɛ bó tfuse ê wvú le, “Wo jewte lo.” Ɛ wvú no taame ke le è nu Bita. Ɛ bó mum ne gay le “È nulo enu nceendaa Nyo' we.”

¹⁶No bó to jemyi nonen, ε Bita mey ke no kumci. Ɛ bó dioo yene, yen kecεεy ε è nu wvú, ε diuw yum bó.

¹⁷Ɛ wvú few bô can ε bó lu bô diuw, mum see ê bó no Tata be bvuse wvú yew ncaw e, bvuu gay le bó esee ê Jem noo bonyii bo mbee le bocii. No wvú gay nonen, mum ne gen keba kemew e.

¹⁸ Ɛ ekfuṅ buy yuu, ε bvufee no bvuuṅke lo bonyii bo nci le le laa è se kooy la bô Bita le.

¹⁹Ɛ 'Elod bvuse bonyii le bó eghan egom wvú. Ɛ bó gom, gom ηkuuṅ. Ɛ wvú mum tee bonyii bo nci le bô to cεyte Bita ba, biwce mwεem ê bó, mum ne gay le bó jo bó gen lεse. Ejim jodvu, ε 'Elod ne ê keba ke woṅ e kè Judea le, bow gen no nu ê kelaante kè Kaysalia le.

Kpwe Nfon 'Elod

²⁰È to nu kefew kedvu le ε Nfon 'Elod ton'yi shém bô bonyii bo Taya noo bo Sidon. Ɛ bonyii bodvu ke mum baance ye keegen eku can le nyεkeey enu dvú, njefo woṅ wvubo to keṅke mwεem mvudien ε è nu woṅ we le. Ɛ bó gen, yaw koo nsan bô Blastus wvù to nu cee ntow.

²¹Ɛ diuu ke to kocen, ε Nfon 'Elod tfume ndvú woṅ, shii yí kawla le, mum no nyaa sa' ê bonyii bodvu.

²² Ɛ bó nɛ no wvuuyi lo, bensee wvú gayte le, “Wvun njeme nu wvu nyo', ke è nu wvu wee wvu wum ke.”

²³ Ɔaŋ mwaan, ɛ nceendaa Tata mum tum kencem yî Nfon 'Elod e, njefo wvú to baa efese mbense wvudvu ê Nyo' ke. Ɛ ngeŋse mum die wvú, ɛ wvú kpwe.

²⁴ Geenen, ɛ diew Nyo' no leyte ê mvuntelem mvu bonyii le, saanjkene gene lo fwe fwe.

²⁵ Ɛ Banaban bô Saul ke mese fieɛ fi bó to tumɛɛ bó Jelusalem dvú, mum kase tu jim Antiok. Ɛ bó dīoo etuu jim, jo Jon Maaku.

Lem 13

Ɛ bó tum Banaban bô Saul

¹ Bonyii bomew to nu ê kentaashɛ ke bonyii bo mbee le Antiok, ɛ è nu bô seje mwɛɛm mvù bó yuuke ɛ Nyo' jemyi, bvuu yɛɛyi bonyii. Bonyii bodvu to nu Banaban bô Semeon wvù bó to teje le Wvù Yiile, noo Lushus wvu Selin bô Saul noo Manɛɛn wvù bó to leyɛɛ wvú bô 'Elod wvù wee sa'.

² Ɛ è ke dīoo nu ɛ bó bamte mwɛɛm mvudien bunlee Nyo', ɛ Keyoy ke Yuule nɛ gay ê bó le, “Ben ebaa Banaban bô Saul egɛɛ, é bó elemtè lemme dī me nu ɛ ntee bó le bó elemtè.”

³ Ɛ bó yuw nonɛn, bvuu no bamte ke mwɛɛm mvudien bunlee, ke nɛ gɛɛ can yî bó le, mum ciinse bó ɛ bó no gene.

Ɛ Banaban bô Saul gen Sayblus

⁴ Ɛ Banaban bô Saul mum no gene no Keyoy ke Yuule to tumɛɛ bó. Ɛ bó nɛ bow ê kelaante kè Selusia le, ley ê nguɔw wvu ê joo le, no leenci, gene woŋ wvù Sayblus e.

⁵ No bó lente, buy ê kelaante kè Salamis e, mum no ghane fewci diew Nyo' yéw bunle Bojuu le, ɛ Jon Mak ghane bô bó, fici bó.

⁶ Ɛ bó ke len woŋ wvu ê joo enteleŋ wvudvu le, danɛn gen buy naa ê kelaante kè Bafos e. No bó gen buynɛn yî wee Juu mvu le jó, ɛ è nu wee nfim ɛ diee nu Bal Jisos, ɛ wvú to ké no mbiayte le wen nu wee wvù seje mwɛɛm mvù wen yuuke ɛ Nyo' jemyi.

⁷ Wvú to ké no shee bô Segus Baulus wvù wee sa' wvu woŋ wvudvu le. Wee sa' wvudvu to keŋke bvufɛɛ baay. Ɛ wvú ke tee Banaban bô Saul njefo wvú to gomte keeyuw diew Nyo'.

⁸ Ɛ bó to, geenen ɛ Elimas wvù wee nfim wɛ no diee diew nu ê díew Glek e, mum no kicine bó, momte keege le fo wee sa' wvudvu elese fitele yî Jisos e ke.

⁹ Ɛ Keyoy ke Yuule yiŋsɛn yî Saul e, wvù diee diew dimew to nu le Baul, ɛ wvú luŋ ejise yî wee nfim wvudvu le,

10 gay ê wvú le, “Wo nu waa dɛwle, ε wo nu wee wvù bane fiεε ficii fi nu leŋ. Kenlɛɛma bô mbiay nu ε cin fô fitele fiuw e. Ke è nulo é wo enu nen se wo kumene keceey ke Nyo' le le kí etuù mbiay e?”

11 Yeke eyuw, keseen nu ε kebo ke Nyo' le nu egbwe yî yo le é wo efefe, é fí ke ejo kefew é wo se ebvuu eyen ke naa diuu le.” Kaŋ mwaan nonen, ε fiεε fimew shii ke diewe kembew e, baŋ ejise Elima. E wvú mum ne no ghaale lo mondvuum, gomte wee wvù ecɛŋseè wvú.

12 E wee sa' we yen nonen, mum lese fitele yî Jisos e, no wvú to keŋke ŋghaw yî mwεem mvù bó to yɛyɛi ekume Tata Jisos e.

ε Baul bô Banaban gen Antiok wvu Bisidia le

13 E Baul bô ŋgoo ye ley ê ŋguw e Bafos, lente joo yi baay buy ê kelaante kè Belga le woŋ wvù Bamfilia le. No bó buy jó, ε Jon Mak cine bó le, tu jim Jelusalem.

14 E bó ne jó, fey gen ê kelaante kè Antiok wvu Bisidia le. E è ke no nu diuu di mbam e, ε bó gen ley shii yew bunle le.

15 E bonyii ke ne taŋ ê Nwa' bonci bo Muses e noo ê wvu bonyii bo ntum Nyo' le mese, ε bocee ekole yew bunle yidvu mum tum ntum fô bo Baul e le, “Boom bo bwee wese le, é ben keŋke fiεε keetefe bonyii dvú, é ben jeme.”

16 E Baul mum ne we, ci bonyii bô kebo mum kew no jemyi le, “Bonyii bo Islael noo bonyii bò yaa nu ke Bojuu bò wvumte ten Nyo', ben eyeke eyuw.

17 Nyo' bonyii bo Islael to nu ε caw bo'icee cee bosese, ge ε kfuu dibole no kuuke seke bó to nu botolo woŋ wvù Ijiw e. E wvú ke mum bvuse bó jó bô mvuŋgay mwew,

18 kuu shém bô bó, no taale ke fô bó le ŋkpwaante yî bilum e mbaanye.

19 E wvú ke ge ε bó shike bitum bisooshwi y woŋ wvù Kanaan e, mum nya woŋ wvudvu ε è no nu wvubo.

20 Mwεem mvun mvunciim to nu ε jo diewe bilum gee ne kecow mbaanshen e (450). No wvú nyaε woŋ wvudvu ê bó, mum gεε bonyii bò esaakè bó. E bó saw gen buy yî kefew kè wee ntum we wvù Samwel to saake le.

21 Ke yî kefew kekɛ le ε bó ke ne lɛke keekɛŋke ε è nu nfon, ε Nyo' mum nya Saul, waa Kish wvu ê kfuu di Benjamin e. E wvú saw bvunfon yî bilum e mbaanye.

22 E Nyo' ke shwaw wvú, gεε Dawe Nfon wvubole. Nyo' to nu ε jeme ekume Dawe wvun le, ‘Me nu ε n'yen ε Dawe wvù waa Jεese nu fitele fiem. Wvú nu ke egee fiεε ficii fi me ŋgomte.’

23 È to nu ê kfuu di Nfon Dawe wvun e di Nyo' to bvuseε Mboyse, nya ê bonyii bo Islael no wvú to kawεε. E Mboyse wvun nu Jisos.

- 24 É Jisos wvun sɛ keeke ekew lemme diew nu ε Jon to fewci wase ê bonyii bocii bo Islael le bó ekumen mvuntelem mvubole é wen elese bó ê joo.
- 25 Ε Jon ke no nu wase keemɛɛse lemme diew, ke nɛ bife ê bonyii le, ‘Ben kpwaake le me nu yɛɛ? Kε me n'yaa nu wee wvù ben cɛyte kε. Wee wvudvu too ejim jo me, ε me mbaa encim enkocɛn keengvuwce mbaaye bolaba bew kε.’”
- 26 Ε Baul gen fwe jeme le, “Boom bo bwɛɛm e bò è nu kfuu di Abla'am e noo ben bonyii bocii bò yaa nu kε Bojuu bò wvumte tɛn Nyo', Nyo' to ciinse ntum wvun wvù è nulo é bonyii eboy yî dvú le ε è nu ê beene.
- 27 Geenɛn, ε bonyii bo Jɛlusalɛm bô bonyii bobole bò saake won, faɲɛ yaa jo Jisos diewe Mboyse le kε. Ε bó bvuu faɲɛ yaa kieɛ kenye ke mwɛɛm mvù bonyii bo ntum Nyo' le to saɲɛɛ ekumɛ wvú kε. Ε è nu kε mvú mvù bó to shee taɲke ediuw ε mbam e ecii. Ε bó ke dioo gay le bó eyu wvù nonɛn, ε fifin mum ge ε fí to kocɛn no bonyii bo ntum Nyo' le to jemyeɛ.
- 28 Naa no bó to baa cim yen jay wvù è nulo é bó eyu wvù yî dvú le kε, ε bó gen kε fwe gay ê Baylet le bó eyu wvù.
- 29 Ε bó ke ge fiɛɛ ficii no Nwa' Nyo' to jemyeɛ ekumɛ Jisos, ε bó shike wvù yî kentam e gen lese wvù ê jem.
- 30 Geenɛn, ε Nyo' kase bvuse wvù yî kpwe le.
- 31 Ε wvù ghan yî ediuw e nteen duɲce ekole kew ê bonyii bò bô bó to nen'yɛɛ Galilee gen Jɛlusalɛm. È nu bó bò fewci ekumɛ wvù keseen ê bonyii bo Islael.
- 32 Nonɛn, bese ε no nu tɛn fɛn keseen keefewce saaka wvù jee wvudvu ê ben. Saaka wvudvu nu le, fiɛɛ fi Nyo' to kawɛɛ bo'icee cee bonyii bo Islael dvú,
- 33 nu ε wvù ε ge wase fí ε to ε kocɛn keseen kefew kesɛɛbeene le, beene bò nu boom bobole. Fifin kocine no Nyo' to bvuseɛ Jisos yî kpwe le. Bó to nu ε saɲ wase ekumɛ fiɛɛ fin ê Nwa' Mbense le biba bifɛɛ, ε Nyo' jemyi le, ‘Wo nu Waa wɛm, ε me nu wase Ico ɛben.’
- 34 Ekumɛ mbvuse wvù Nyo' to bvuseɛ Jisos yî kpwe le le fo wvù efo kε, Nyo' to nu ε jeme ê yin je le le, ‘Me nu nke enya ê ben kembonɛn kè è nu kem, kè me nto nkawɛɛ Dawe dvú, nlew.’
- 35 Fí nu ε bó ε bvuu ε saɲ bvudvuu bvumew e ê Nwa' Mbense le ε Dawe gayte le, ‘Kε wo nu ke ecinɛ Waa wo lemme wvù Yuule le, é wvù efo ê jem kε.’
- 36 Fi ekumɛ Dawe nu ε wvù to lem lemme diew di Nyo' to nyaɛ ê wvù yî kefew kew e, ke kpwe ε bó dwey wvù mbew bo ice le, ε wvù fo.
- 37 Geenɛn, ε wee wvun wvù Nyo' to bvuseɛ yî kpwe le to baa fo ê jem kε.
- 38 Nonɛn, boom bo bwɛɛm e, ben emum ekeè ntay le saaka wvun wvù bó fewci le Nyo' læshi bibefe bi bonyii le nu ε wvù læshi nje Jisos wvun.

39 Wee wvù nu ε lese fitele fiew yî Jisos e, nu ε wvú ε boy wase yî bibefe biew e bicii, ε è nu fiεε fi è nulo nci Muses saa ege κε.

40 Nonen, ben eyenè fo fiεε fi bó saηεε ê Njwa' bonyii bo ntum Nyo' le ke ekoo ben. Bó jemyi jó le,

41 'Ben eyeke eyuw ben bò wεysee Nyo'. Diuw nu ke eyum ben, é ben ekpweken. Me nu ηke emom fiεε yî kefew kenen e, ε è nu fi wee be jeme lo ê ben, ben saa ebee κε.”

42 Ε Baul bô Banaban ke dioo ebuyte yew bunle yidvu le, ε bonyii bodvu no lεke le bó ke ebvuu eto κε bvυ mbam wvù too le ejeme mwεem mvun.

43 Ε bonyii ke dioo buy yew bunle le, ε bonyii nteen bò to nu Bojuu bô bonyii bò to baηκεε lo tu bo mbee Bojuu le, no bii Baul bô Banaban e. Ε bó no jemyi teete bonyii bodvu le bó eyuukè κε ε è nu Nyo' le wvù nu ε buw bó bô nfi we.

44 Ε è ke no nu bvυ mbam wvù bie wvuwe le, ε kelaante no gomte keebuy lo kecii keeto eyuw diew Nyo'.

45 Ε Bojuu yen no kebombom ke bonyii le tase nonen, mum no bene kendon, kicine fiεε fi Baul jemyi, nan'yi wvú.

46 Ε Baul bô Banaban no jemyi lo yaa fane κε, gayte le, “Fí nu leη le bese bee keeyaw efewce diew Nyo' ε è nu ê ben Bojuu. No ben nu ε ηwase lo, ε jo bikuu binen le ben baa kocen keeke ekeηκε nshii wvù meη lo, tu bese nu ebaηke fisese efewci ε è nu ê bonyii bò yaa nu κε Bojuu.

47 È nu no Nyo' nu ε gay ê bese, no wvú to jemyεε le, ‘Me nu ε ntome wo le wo enu ken'yεese ke bonyii bò yaa nu κε Bojuu le, é wo ege é bonyii bo εbuw ε woη e ecii ke eboy.”

48 Ε bonyii bò yaa nu κε Bojuu yuw nonen, mum no yuuke njon, bensee diew yì yi Tata. Ε bonyii nteen bee saaka wvudvu le, ε è nu bò Nyo' to nu ε baa wase le bó nu ke ekeηκε nshii wvù meη lo.

49 Ε diew yì yi Tata mum len woη wvudvu le tfuu.

50 Geenen, ε Bojuu mum ne beyse bocee ntew bô boke' bo bonyii bo baay baay e, ε bokεε ban nu bò to ké no too yew bunle le, ε bó no bane Baul bô Banaban, mum kuη bó le bó ene jó.

51 Ε bó dioo nen'yi nonen, kuce kebvu ke yî bikaa bibole le è nu nciise fiεε fi bó mom, mum gen ê kelaante kè Ikonium e.

52 Ε ηgoo bonyii bo mbee le shεε no nu fibole yuuke njon baay, ε Keyoy ke Yuule ε yiηsen yî bó le.

Lem 14

Ε Baul bô Banaban fewce saaka wvù jee εκumε Jisos Ikonium

- ¹ No Baul bô Banaban genε Ikonium, bvuu ge ke lenlen no bó to gee Antiok, keeley yew bunle Bojuu yi jó le, efewci saaka wvù jee dvú. E bó looce fewce, e Bojuu noo bonyii bô yaa nu ke Bojuu bee nteen.
- ² Geenεn, e Bojuu bô to fanεε keebee ne beyse bonyii bomew bô to yaa nu ke Bojuu, befe bô mvuntelem mvubole le bó eton'yi shém bô bonyii bo mbee le.
- ³ E Baul bô Banaban mey ke jó e kefew defε, no fewci yaa fane ke ekume Tata. E Tata nya bó bô mvunɣay keegeε mwεem mvù duŋci mvunɣay mvu Nyo' le bô mwεem mvu diuw wvù yumεen e mvù duŋci le fiεε fi bó fewci ekume Tata no wvù nu e buw bonyii bô mboyma nu keceey.
- ⁴ E bonyii bo ê kelaante kedvu le gawsen. E bomew tu ê keba ke Bojuu bô to fanεε keebee ba le, e bomew tu ê keba ke boom bo ntum e bo Jisos e.
- ⁵ E Bojuu ba bô bonyii bô yaa nu ke Bojuu noo bikuu bi woŋ e tase, cu ntaŋ keenyewle bô boom bo ntum e bo Jisos e, etumye bó bô eta é bó ekpweken.
- ⁶ E bó kieε ntaŋ wvudvu, mum lewte gen woŋ wvù Likonia le, no ghane ê bilaante bi Lista bô Delbi le noo ê bontew bô mbew jó le,
- ⁷ fewci saaka wvù jee jó.

E Baul bô Banaban fe nkewle Lista

- ⁸ Wee mvu to nu Lista, e wvú to ké no shee ke fokuse, e è yaa nulo é wvú elen ke, njefo bó to boke wvú e è nu nkewle. E è ke no nu diuu dimew,
- ⁹ e wvú shii no yeke fiεε fi Baul to yeyi. E Baul luŋ ejise yî ye le, yen e wee wvudvu kenke mbee le Nyo' nulo efe wen,
- ¹⁰ mum gay ê wvú foweεwe le, “Ja eleem we.” E wvú mum sele we, kew no lene.
- ¹¹ E kebombom ke bonyii le yen fiεε fi Baul ge, mum no sane etale, jemyi ê díew yi Likonia le le, “Bonyo' nu e tu bonyii e shii e to ê beene le.”
- ¹² E bó mum no teŋe Banaban le Siyus, mum teŋe Baul le Emis no è to ké no yamte ke wvú jemyi.
- ¹³ È to nu e yew ncese nyo' wvù bó teŋe le Siyus wvun nu mbew kelaante kedvu le. E cee ncese wvu fó mum jo bona' bô bolemse noo fow no too dvú diuw ketaaŋ e le bô bonyii ege ncese dvú ê Banaban bô Baul.
- ¹⁴ E boom bo ntum e bo Jisos e ban kieε fiεε fi bô bonyii bodvu to gomte keege, saaye ndvú ye le, lewte ley ê bonyii bodvu ente, no kayte le,
- ¹⁵ “Bonyii ban, ben gee e è nu la fin? Bese nu ke bonyii lenlen diewe ben e, e bese to fan keefewce saaka wvù jee wvù nen'yi fô Nyo' le le ben ecine bonyo' bo ecici ban e, ebii e è nu Nyo' wvù Nyo' le. Nyo' wvun nu wvù to bomεε ebule bô nshe noo jóo yi baay baay bô mwεem mvunciim mvù nu mondvuum man e.
- ¹⁶ È to nu fwele, e wvú cine bonyii le bitum e bicii, e bó no gee no bó kooŋke.

¹⁷Geenen, ε wvú no gee ke mwεem mvù jee fô bonyii le keeduŋci le wen nu dvú. Ε wvú no nyaa bó bô jaŋ, ε bó keŋke ηgu ê kefew ke leŋ e, diee yuuke njoŋ.”

¹⁸Naa no Banaban bô Baul jemyεε mwεem mvun ê bó nen, ke ge lo le ce', ε bó se lu keege ncese ê bó.

¹⁹ Ε Bojuu bomew ke ne to jó, ε bó ne Antiok bô Ikonium, beyse bonyii nteen ε bó tumye Baul bô eta. No bó tumyεε, mum gufe buy bô wvú elaanke kpwaake le wvú nu ε kpwe wase.

²⁰Geenen, ε ηgoo bonyii bo mbee le ke to tase ê wvú we, ε wvú kase ne we, tu elaanke jodvu. Ε bvú ke buy yuu, ε bô Banaban mum ne jó, no gene ê kelaante kè Dεlbi le.

²¹No Baul bô Banaban ley Dεlbi, fewce saaka wvù jee ekume Jisos, keŋke bonyii bo mbee le jó nteen. Ε bó ke ne jó kase no tuu jim, fele ê bilaante bì Lista bô Ikonium noo Antiok wvu Bisidia le.

²² Ε bó no fele nonen, yvuwse mvuntelem mvu bonyii bo mbee le, teete bó le bó emey ke eleemè ntay yí mbee wvubole, keè le bô bowen keŋke keeke eyen boŋgew nteen se keeke eley bvunfon bvú Nyo' le.

²³ Ε bó bvuu no baayi bocee bintaashe bi bonyii bo mbee le, gεele ê bintaashe bi bonyii bo mbee le bicii. É bó dioo gεele no bamte mwεem mvudien bunlee mum nya bó can Tata Jisos wvù bó beŋe wvú le.

Ε Baul bô Banaban tu jim Antiok wvu Silia le

²⁴Ε Baul bô Banaban ke fey woŋ wvù Bisidia le, danŋen gen wvù Bamfilia le,

²⁵fewce diew Nyo' ê kelaante kè Belga le, mum bow gen ê kelaante kè Atalia le.

²⁶ No bó bow jó, ley ê ηguw wvu ê joo le, mum kase no tuu jim Antiok. Ε Antiok jan nu jò bó to nyae bó can Nyo' le ε wvú buw bó bô nfi we ε bó se mum no ghane gee lemme din dì bó to meεε.

²⁷ No bó fese jó, baance kentaashe ke bonyii bo mbee le, see fiεε ficii ê bó no Nyo' se lemεε bô bó, bô no wvú se yen'yεε mvuntelem mvu bonyii bô yaa nu ke Bojuu le, é bó elese fitele yí Jisos e.

²⁸Ε Baul bô Banaban ce bô ηgoo bonyii bo mbee le bodvu ε kefew defε.

Lem 15

Ε bonyii bo mbee le shii nshii Jelusalem

¹ Ε bonyii bomew ke ne Judea, bow to Antiok, mum no yeεyi bonyii bo mbee le le ke è nulo é Nyo' eboyse wee se bó nu ε tfuse mweten yew no nci Muses duŋci ke.

² Ε Baul bô Banaban ma lo n'yεεyi wvudvu, ε bô bonyii bodvu she bew mbew yí dvú le ε è yaa nu wvu wεε ke. Ε fí ke ghaw, ε kentaashe ke bonyii bo mbee le ke Antiok baa Baul bô Banaban noo bonyii bo mbee le bomew, tum le bó eben

Jelusalem eyen boom bo ntum e bo Jisos e bô bocee kentaashe ke bonyii bo mbee le ke jó le, le bó elese diuw fô fiεε fidvu le.

³Nonen, ε kentaashe ke bonyii bo mbee le ke Antiok mum ciinse bó, ε bó no gene fele biba bì Fonishia bô bì Samalia le seŋe ê bonyii bo mbee le bo jó le bonyii bò yaa nu ke Bojuu nu ε kumen wase. Ε bonyii bocii no yuuke nonen, lanlaje baay.

⁴Ε bó ke ben gen fεse Jelusalem, ε kentaashe ke bonyii bo mbee le bô boom bo ntum e bo Jisos e noo bocee kentaashe ke jó fiisen bó. Ε bó see fiεε ficii ê bó no Nyo' se lemεε can yibole.

⁵Geenen, ε bonyii bo mbee le bomew bò to nu ten ê ηgoo Bofalasii le, ja we gay le, “Bó keŋke ke keetfuusè bonyii bò yaa nu ke Bojuu yew, gaytè ε bó gεele bonci bo Muses e.”

⁶No bó gay nonen, ε boom bo ntum e bo Jisos e bô bocee kentaashe bvuu shii keeley ente jo fiεε fidvu.

⁷Ε bó ke she jeme gen ncejole, ε Bita ne leem we gay le, “Boom bo bwεem e, ben kee le è to nu fwele ε Nyo' baa me ê ben ente le è nu diuw wem e wvù bonyii bò yaa nu ke Bojuu nu ke eyuuke saaka we wvù jee, beŋe wvú le.

⁸Ε Nyo' wvù kee mvuntelem mvu bonyii le, duŋce le wen nu ε fiisen bonyii bò yaa nu ke Bojuu, nya bó bô Keyoy ke Yuule lenlen no wvú to nyaε ê beene.

⁹Wvú to baa duŋci kejeey jεey beene ε bonyii bodvu ke. Wvú to nu ε ge ε mvuntelem mvubole no yuule njefo bó to nu ε lese fitele yî Jisos e.

¹⁰No fí nu nonen, ben ε ghan neε ε se no gomte keeshiike fitele fi Nyo' le, joo bvujite gεele yî ηgoo bonyii bo mbee le, ε bvujite bvun to ghaw wase beene noo bo'icee cee boseεbeene?

¹¹Fí baa nu len ke. Beene nu ε bee le Nyo' boysee beene ε è nu nje mboyma wvù Tata Jisos nu ε buw beene dvú. Ε è nu ke ten lenlen no wvú boysee bonyii bò yaa nu ke Bojuu.”

¹²No Bita jeme ε mese, ε bonyii bocii cife, mum no yeke no Banaban bô Baul fele no bó se ghane gene fô bonyii bò yaa nu ke Bojuu le, ε Nyo' nyaa bó bô mvuŋgay le bó egeè mwεem mvù duŋci mvuŋgay mvu Nyo' le bô mwεem mvu diuw wvù yumεen e dvú.

¹³Ε bó jeme mese, ε Jem mum gay le, “Boom bo bwεem e, ben eyeke eyuw.

¹⁴Semon be ε see wase ê beene no Nyo' to kewεε duŋce ten shiee we fô bonyii bò yaa nu ke Bojuu le, caw bomew ê bó ente le è nu bew bonyii.

¹⁵Ε fiεε fi bonyii bo ntum Nyo' le to saŋεε lene ke ekale kemwaan bô fi Nyo' to gee. Bó to saŋ le,

16 'Kefew too lo kè me nu ñke enkase ento, enseyse yew Dawe yì nu ε gbwe wase. Me nu ñke en'yoo binffuy bidvu, é yí ekase eleem we.

17 Nonen, é kebese ke bonyii le emum egomte Tata, ε bonyii ban bocii nu bò yaa nu ke Bojuu bò me nu ε ncaw le è nu bem bonyii.

18 Fifin nu ε è jemyi Nyo', ε wvú to ge wase ε bonyii kiese ε è bεε lo bvuyvuum e.'

19 Me ε no n'yene fiem le fo beene enyaà ñgew ê bonyii bò yaa nu ke Bojuu bò nu ε lese fitele yí Nyo' le ke.

20 Beene esañ ke ε è nu ñwa' fô bó le, egay le fo bó edieè mwεem mvù bonyii nu ε ge bintañe dvú fô bonyo' le ke, njefo è nu mwεem mvu nnyen e. Fo bó ekeñkè fiεε keege bô kenjañ ke. Fo bó edieè nyam yì nu se bó sele lo ελεμε ε buy ke. Fo bó edieè ελεμε ke nyam e ke.

21 Bó sañ nonen, njefo bonci bo Muses e ban nu ε bó to yεeyi wase ncejole mondvuum monciim ε bonyii yuuke, ε è nu ke bó bò bó tañke eben yéw bunle le ediuw ε mbam e εcii."

ε bó sañ ñwa' fô bonyii bo mbee le bò yaa nu ke Bojuu

22 Nonen, ε boom bo ntum e bo Jisos e bô bocee kentaashe noo kentaashe ke bonyii bo mbee le kecii bee fifie, mum yen le fí jee le bó ebaa bonyii ê bó ente etum é bô bo Banaban noo Baul egen Antiok. ε bó mum baa Judas wvù diee diew dimew to nu le Basabas, bvuu baa ten Silas. Bonyii bo bofee ban to nu bikuu ente jo bonyii bo mbee le.

23 ε bó sañ ñwa' wvù bó nu etum bó dvú ε wvú nu le: "Bese boom bo bwee wene le bò nu boom bo ntum e bo Jisos e bô bocee kentaashe gayte ben e bonyii bo mbee le bocii bò yaa nu ke Bojuu, bò nu ê kelaante kè Antiok e bô bò nu keba kè Silia le noo bò nu ê kè Silishia le.

24 Bese nu ε yuw le bonyii bomew nu ε buy ê bese ente ε to ε no nyaa ñgew, bvunse bvufee bvunen bô n'yεeyi mvu se è tum bese bó ñkuuñ.

25 Nonen, bese ε mum ε shii bocii ε bee le bó ebaa bonyii bomew etum fô ben e, é bó etoò bô bo Banaban noo Baul bò nu nsáa yese shém.

26 Bonyii ban nu ε bó ε yefe wase kpwe ye le nje lemme di Tata wesebeene wvù Jisos Klistu le.

27 Bese ε mum ε tum Judas bô Silas le bó eto ebvuu ejeme ten bô diuw fiεε fi nu ê ñwa' wvun e.

28 Bee bo Keyoy ke Yuule nu ε yen le fí baa jee keeyike ben bô bvujite bvumew efey bonci bo shiee le ban bò nu le:

29 Fo ben edieè mwεem mvudien mvù bó nu ε ge bintañe dvú fô bonyo' le ke. Fo ben edieè ελεμε ke nyam e ke. Fo ben edieè nyam yì nu se bó sele lo ελεμε ε buy

ke. Fo ben ekeṅkè fiε keege bô kenjaṅ ke. É ben lewte mwεem mvun, tu ben gee leṅ. Bó ε sheε wase.”

30 Ε bó saṅ nonen mum tum bonyii ba dvú ε bó bow dvú Antiok. Ε bó gen, kum kentaashe ke bonyii bo mbee le ke jó kecii, nya ṅwa' wvudvu ê bó.

31 Ε bó taṅ ṅwa' wvudvu, ε saaka wvudvu læese mvuntelem mvubole, ε bó yuw njoṅ baay.

32 Ε Judas bô Silas bô to nu bonyii bô seṅe mwεem mvù bó yuuke ε Nyo' jemyi, nya bontefe nteen ê bonyii bo mbee le, ge ε bó no keṅke mvuṅgay ê mvuntelem e.

33 Ε bó bosen ce jó ntay. Ε bonyii bo mbee le ke ciinse bó ε bó no kaase bô nyεkeey tuu jim fô bonyii bô to tumεε bó le.

34

35 Ε Baul bô Banaban bosen ce Antiok ntay, ε bô bonyii bomew yεeyi bvuu fewci diεw Tata.

Ε Baul bô Banaban gawsen

36 Ε kefew ke dioo gence, ε Baul gay ê Banaban le, “Bee wo ekase etu jim eghan bilaante bì bee wo se fewci diεw Tata bí le, eyen laa bonyii bo mbee le bo jó gee neε le.”

37 Ε Banaban mum no gomte keejo Jon Mak le bô bó eghane.

38 Geenεn, ε Baul faṅe yaa ekoṅke le bó ejo wvú ke, njefo wvú to nu ε cine bó le Bamfilia faṅe yaa mese lene di bô bó to keṅke ke.

39 Ε Baul bô Banaban ke she kicen baay, mum gawsen. Ε Banaban jo Maaku, ε bô wvú ley ṅguw wvu ê joo, gen Sayblus.

40 Ε Baul caw fiew ε è nu Silas. Ε bô wvú dioo nen'yi, ε bonyii bo mbee le nya bó can Tata le ε wvú buw bó bô nfi we.

41 Ε bó gen je biba bì Silia bô bì Silishia le, no ghane yvuwse mvuntelem mvu bintaashe bi bonyii bo mbee le.

Lem 16

Ε Timatio ley ṅgoo Baul bô Silas e

1 Ε Baul ghan gen buy ê kelaante kè Delbi le, ke ne gen ê ke Lista le. Wee ṅgoo Jisos mvu to nu Lista jodvu ε diee nu Timatio, ε bwee nu wee Juu, nu ten wee mbee, geenεn ε ice to nu wee Glek.

2 Timatio wvun to nu wee ε bonyii bo mbee le bocii bo Lista noo bo Ikonium bensee wvú.

³ Ɛ Baul no gomte keejo wvú le bô wvú eghanè, mum tfuse wvú yew. Ɛ wvú to tfuse wvú yew nonen, njefo Bojuu bocii bô to cee biba bidvu le to kee lo le icee Timatio to nu wee Glek.

⁴ Ɛ bó mum no ghane, gene ê bilaante le, dioo gene no seje ê bonyii bo mbee le bonci bô boom bo ntum e bo Jisos e noo bocee kentaashe ke Jelusalem to shilee bee le bó egeelè.

⁵ Nonen, Ɛ bintaashe bi bonyii bo mbee le bidvu mum no tɛmyi gene fwe fwe yí mbee le. Ɛ bonyii no biise bó le ediuw ecii.

Ɛ fiɛɛ diɛwɛ ɛfilɛ le to fô Baul e Towas

⁶ Ɛ Baul bô ngoo ye ne le bó egen efewɛɛ diɛw Nyo' woŋ wvú Ɛsia le, Ɛ Keyoy ke Yuule tun. Ɛ bó mum len wase fey Ɛ è nu je keba kè Fligia bô kè Galeshia le.

⁷ Ɛ bó ke dioo gen buy mbew woŋ wvú Misia le no gomte keeley gen keba kè Bitinia le, Ɛ Keyoy ke Jisos e bvuu tun.

⁸ Nonen, Ɛ bó mum fey woŋ wvú Misia le, danŋen gen ê kelaante kè Towas e.

⁹ Ɛ è ke no nu entaŋ, Ɛ fiɛɛ diɛwɛ ɛfilɛ le ne to fô Baul e. Ɛ wvú yen ê fiɛɛ fidvu le Ɛ wee mvu wvu Masedonia leeme leke wvú le, “Kee wo, lente ke eto Masedonia jan efi bese.”

¹⁰ No fiɛɛ fidvu to fô Baul e nonen, Ɛ bee bó mum yen le Nyo' nu Ɛ duŋɛɛ ê bese le bese egen efewɛɛ saaka we wvú jee woŋ wvú Masedonia le. Kaŋ mwaan, Ɛ bese mum seyse keegen jó.

Ɛ Lidia lese fitele yí Jisos e Filibi

¹¹ Ɛ bese ne Towas, lente teytey ê nguw wvu ê joo le, buysen Samotes. Ɛ bvú buy yuu Ɛ bese gen fwe buy Niabolis.

¹² Ɛ bese ke ne fó len gen Filibi, Ɛ è nu kelaante ke ê keba ke fwe le Masedonia. Kelaante kedvu to nu wase ke bala bo Lum e. Ɛ bese ce jó yí ediuw e.

¹³ Ɛ è ke no nu diuu di mbam e, Ɛ bese buy ɛlaante jodvu, gen diuw joo le fô bese to kpawwci le bvudvuu bvú Bojuu le bvú bunle le nu enu. No bese gen, Ɛ bokene bomew to tase wase fó, Ɛ bese mum shii no jemyi ê bó.

¹⁴ Kpwoon mvu to nu fó yuuke ten Ɛ diee nu Lidia, Ɛ wvú to ké no wvumte Nyo'. Wvú to buy ê kelaante kè Tayatila le, Ɛ wvú to ké no geese kfu ndvú yimi, Ɛ yí nu ke yí yeɛle lo, lumte. Ɛ Tata yene fitele fiew, Ɛ wvú bee fiɛɛ fi Baul to jemyi le.

¹⁵ Ɛ bó ke lese wvú bô bonyii bo ê wvú yew ê joo, Ɛ wvú mum leke bese gay le, “Kee ben, é ben fen nu Ɛ yen le me nu Ɛ nlese fitele fiem ficii yí Tata le, é ben to ke gen ce ê me yew.” Ɛ wvú mey ke no nyɛɛyi nonen, Ɛ bese ke ghan bee gen.

Ɛ bó fen Baul bô Silas yew ncaw e Filibi

- 16 Ɛ è ke no nu diuu dimew Ɛ bese dīoo egene fô bvudvuu bvū bunle le, taseɛ bee bo wan kpwoon mvu Ɛ è nu nƳwa. Wvú to keɛke keyoy kemew yî ye le, Ɛ è nu kè ké ge Ɛ wee no nu wee diam. Bonyii bô to keɛke wan kpwoon wvudvu to kawte bigew yî ye le naa ntay nje wvú to ké no seɛe mweem mvù nu ke ekooy.
- 17 Ɛ wan kpwoon wvudvu dīoo yen bee bo Baul e, mum no bii bese le wamte, gayte le, “Bonyii ban nu bonyii bo lemme le bo Nyo' wvù nu Ɛkolé ke Mwεem Mvunciim e, Ɛ bó duɛi je yì è nulo é ben eghan jó se boy.”
- 18 Ɛ wvú ke ge nonen buy ediuw nteen, Ɛ fí ke ne ton'ye Baul, Ɛ wvú banke ye wam keyoy kedvu gay le, “Me ηgayte ê wo ê diee di Jisos Klistu le, buye yî wan wvun e.” Ɛ kí mum buy yî ye le ke sekedvu.
- 19 Ɛ bonyii bô to keɛke nƳwa wvudvu yen le je bowen yi bigew nu Ɛ yí Ɛ ka wase, Ɛ bó mum koo Baul bô Silas gufe gen bô bó fwe dvu bocee woɲ ya le fô bó to ké no saake bonsaw.
- 20 No bó gen bô bó, leke fwe dvu bala bo Lum bô to saake bonsaw gay le, “Bonyii ban nu Bojuu, Ɛ bó nyaa ηgew ê kelaante kesese le.
- 21 Bó yeɛyi bonyii bô nce wvù nci wese baa bee ke. Bese nu bonyii bo Lum, Ɛ è yaa nulo é bese ebii nce wvudvu le ke.”
- 22 Ɛ kebombom ke bonyii le kè to nu fô mum tom bó, fente yî Baul bô Silas e. Ɛ bonyii bô to saake bonsaw ba mum saaye ndvú yî Baul bô Silas e, gay le bó etam bó.
- 23 Ɛ bó looce tam bó ntay, jo bó gen lese yew ncaw e, gay ê wee wvù to ceɛte yew ncaw le wvú eceɛtè bó ntay.
- 24 No wvú yuw nonen, mum jo bó gen fen naa ê kebuw ke ente le yew ncaw e, fen bika bibole ê difwan e.
- 25 Ɛ è ke no nu ke diewe entaɲ enteleɲ e, Ɛ Baul bô Silas bunlee yemte bensee Nyo', Ɛ bonyii bo ncaw e yeke,
- 26 Ɛ nshe ne sese shiw bô mvuɲgay, Ɛ yew ncaw shiw gen buy yî kenffuy e. Kan mwaan, Ɛ dew fwese yicii yene ye, Ɛ boncaw feɲken yî bonyii bo ncaw e bocii.
- 27 Ɛ wee wvù to ceɛte yew ncaw yidvu kamse, dīoo yen Ɛ dew fwese nu ye, Ɛ wvù mum no kpwaake le bonyii bo ncaw e nu Ɛ bó Ɛ lewte wase. Ɛ wvù mum baa nyo ê ηku le le wen eyu ekole kew dvú.
- 28 Ɛ Baul wam foweewe gay le, “Fo wo eyu ekole kuw ke. Bese nu fen bocii.”
- 29 Ɛ wee wvù to ceɛte yew ncaw wvudvu tee Ɛ wee to bô ken'yese, Ɛ wvù lewte ley yew, gen tum envuw fwe dvu Baul bô Silas ciɛke bô nfan.
- 30 Ɛ wvù ne jo bó, buy bô bó ekfuɲ, bife ê bó le, “Bo'icem, è nulo é me eɲge nee nse mboy.”

31 Ɛ bó tfuse ê wvú le, “Lese fitele yî Tata Jisos e, é ben ɛ bonyii bo ê wo yew ke emum eboy.”

32 Ɛ bó mum fewce saaka wvu ekume Tata ê bô bonyii bo ê wvú yew.

33 Ɛ wvú ke jo bó ke entaŋ jodvu, cuke bilemte bibole. Kaŋ mwaan, ɛ bó mum lese wvú bô bonyii bocii bo ê wvú yew ê joo.

34 Ɛ wvú mum jo bó, ɛ bô bó ben ê wvú yew, ɛ wvú nya mwɛem mvudien ɛ bó die. Ɛ bô bonyii bocii bo ê wvú yew mum no laŋlaŋe le bó nu ɛ lese wase fitele yî Nyo' le.

35 Ɛ ekfuŋ ke buy yuu, ɛ bala bo Lum ba bô to saake bonsaw tum bonyii bo nci le le bó egen egay ê wee wvù ceyte yew ncaw we le wvú ebvuse bonyii ba é bó egenè.

36 Ɛ wee wvù to ceyte yew ncaw wvudvu mum gen yen Baul e, gay ê wvú le, “Bala nu ɛ ciinse ntum le me embvuse ben, é ben egenè yî nyekkey e.”

37 Geenɛn, ɛ Baul gay ê bonyii bo nci le ba le, “Bó se nu ɛ tam bese ya le se bó nu ɛ yaw wase ɛ saw nsaw wese ŋkuuŋ, ɛ bese nu ke ten bonyii bo Lum, ɛ bvuu ɛ fen bese yew, ɛ no duu keseen le bó ebvuse bese ejim ejim nɛɛ le? Ke è nulo é fí ekooy ke. È nu ke eto ke bala bodvu fen se bvuse bese.”

38 Ɛ bonyii bo nci le ba kase tu jim see ê bala bo Lum ba no Baul jeme. Ɛ bó yuw le Baul bô Silas nu ten bonyii bo Lum, mum no fane.

39 Ɛ bó mum to ku can ê bó, bvuse bó yew ncaw e, ciinse bó, leke le bó ene elaante jodvu.

40 Ɛ Baul bô Silas buy yew ncaw e, gen yew dvu Lidia ɛ bonyii bo mbee le nu dvú, ɛ bó tefe bó mum nɛɛ jó.

Lem 17

Ɛ Baul bô Silas gen Tesalonika

1 Ɛ Baul bô Silas mum no gene, fey ê bilaante bì Amfibolis bô Abolonia le, danŋen gen buy Tesalonika. Ɛ yew bunle Bojuu to nu jó.

2 Ɛ Baul mum gen ley yew bunle le ke no nce we to ké no nu, no too jemyi ê bonyii dvú yî ediuw ɛ mbam e eta, duŋci fiɛɛ ficii ê Nwa' Nyo' le.

3 Ɛ wvú no duŋci jó, cɛɛyi le Mboyse wvù Nyo' to kawɛɛ to keŋke keeke eyen ŋgɛw, ekase ebuy yî kpwe le. Ɛ Jisos wvun wvù wen fewci ekume wvú nu Mboyse wvudvu.

4 Ɛ bonyii bomew yuw nonɛn, bee bene Baul bô Silas e. Ɛ Boglek bomew bô to wvumte Nyo' noo bokɛɛ bo baay baay bomew bee ten nteen.

5 Geenɛn, ɛ Bojuu bomew mum no bene kendoŋ bô Baul noo Silas, kum bonyii bomew bô to gbwayte ecici ɛ bô bó taashe kebombom e, kew diuw elaante. Ɛ bó

mum nɛ ɣɛn ɣgoy yew Jason ɛ bɔ gomte Baul bɔ Silas keebvuse enya ɛ bonyii ɛkfuɣ.

⁶ ɛ bɔ dioo gom ɣkuuɣ, mum gufe Jason bɔ bonyii bo mbee le bomew ɣɛn bɔ bɔ fwe dvu bocee ntɛw, no wante gayte ɛ, “Bonyii ban nu bɔ ghane banse won ɛ wvú tuu ncine, ɛ bɔ ɛ to wase ɛ buy jan,

⁷ Jason ɛ fiisen bɔ ɛ ɣɛɛ yew dvu wvú. Bɔ bocii ɣgoyte bonci bo Nfon wvu Lum e, duu ɛ Nfon wvumvu nu dvú ɛ diee nu ɛ Jisos.”

⁸ ɛ bocee ntɛw bɔ bonyii yuw nonɛn, nɛ no wɛwte lo.

⁹ ɛ bɔ mum kan ɛ Jason bɔ bonyii bo mbee le nya bigew ɛ ɛ fí ke bvuu kooy lo, bɔ saa etfuse bigew bidvu ɛ bɔ kɛ. ɛ bɔ mum cine bɔ le ɛ bɔ no ɣɛne.

ɛ Baul bɔ Silas ɣɛn Bɛlia

¹⁰ ɛ ɛkfuɣ ke dioo jiim, ɛ bonyii bo mbee le jo Baul bɔ Silas ciinse ɛ bɔ no ɣɛne ɛ kelaante kɛ Bɛlia le. No bɔ ley jó, ɣɛn yew bunle Bojuu le.

¹¹ Bojuu bo jó to nu bonyii ɛ bɔ kee fiɛ fele bo Tesalonika, njefo bɔ to nu ɛ looce fiisen n'yɛɛyi bɔ shiee, no taasse Nwa' Nyo' ɛdiuw ɛcii keeyɛn laa mwɛɛm mvú Baul yɛɛyi bɔ dvú nu kɛɛɛy ɛ.

¹² ɛ bɔ mum bee diɛw Nyo' le nteen. ɛ bokɛnɛ bo baay baay nteen bɔ to nu Boglek noo bolemɛ nteen bɔ to nu tɛn Boglek bee tɛn.

¹³ ɣɛnɛn, ɛ Bojuu bo Tesalonika ke yuw ɛ Baul nu ɛ ɣɛn wase ɛ no fewci diɛw Nyo' Bɛlia, ɛ bɔ mum ɣɛn tɛn jó, beyse kebombom ke bonyii le ɛ bɔ kɛw mvunlaa.

¹⁴ ɛ bonyii bo mbee le mum gay lo ɛ Baul kan mwaan ɛ wvú ɣɛn diuw joo yi baay e. ɣɛnɛn, ɛ Silas bɔ Timatio shɛɛ Bɛlia.

¹⁵ ɛ bonyii bɔ to ɣɛnɛ keeciinse Baul, ɣɛn buy Aten mum cine wvú le. ɛ bɔ dioo tuu jim, ɛ Baul tum bɔ le bɔ eɣɛn tefe ɛ Silas bɔ Timatio ɛ bɔ emom kɛ le ebi wen e cekey.

ɛ Baul no nu Aten

¹⁶ ɛ Baul mum no ɛyɛte Silas bɔ Timatio Aten. ɛ wvú ke dioo ghane jó, yɛn ɛ kelaante kedvu ɛ yiɣɛn lo bɔ mvumooso. ɛ fí shiw fitele fiew.

¹⁷ ɛ wvú mum ɣɛn yew bunle Bojuu le, jeme bɔ bɔ noo bonyii bɔ to yaa nu kɛ Bojuu bɔ to bunlee tɛn Nyo' dvú. ɛ wvú bvuu no jemyi tɛn ɛdiuw ɛcii ya le bɔ bonyii bɔ to kɛ nɛ to fɔ.

¹⁸ ɛ bonyii bo n'yɛɛyi le bomew bɔ bɔ to tɛɣɛ ɛ ɛbikolian noo bɔ bɔ to tɛɣɛ le Sitoyik ke nɛ to keebew tɛn mbew bɔ bo Baul. No Baul to fewci ɛkumɛ Jisos noo mbuy wvu yí kpwe le, ɛ bomew mum no biite le, “Keyuɣ kin sɛ kumte diuw le la le?” ɛ bomew no duu fibole le, “Fí yɛn'yi nɛn kɛ diɛwɛ wvú fewci ɛkumɛ bonyo' bo bonyii bomew e.”

- 19**Nonen, ε bó mum jo Baul ε bô bó gen fô nshii wvù bó teje le Aleobagus e, gay ê wvú le, “Bese gomte keebvuu eyuw ekume n'yeyi wvu fwe wvun wvù wo too dvú laa wvú nu le la le.
- 20**Wo jemyi mwεem mvumew ε bese ke baa yuw wase ke. Nonen, bese ε no gomte keekieε kenya kedvu.”
- 21**(Bonyii bo Aten noo botolo bo jó to ké no nu ke fibole keeshee yuuke ε è nu mwεem mvu mvunfem, jemyi ekume mvú.)
- 22**ε Baul mum leem fwe dvu nshii Aleobagus wvudvu, gay le, “Bonyii bo Aten, me n'yene le ê jé le yicii nu ε ben wvumte bonyo' baay.
- 23**Me njemyi nen, njefo me nse nghane elaante jonen, ε ndioo ntaale mondvuum mò ben bunlee bonyo' mó le, ε n'yen ketaη ke ncese le kemew e ε bó ε saη yî dvú le le, ‘Fô nyo' wvù bó baa kee le ke.’ Nyo' wvudvu wvù ben bunlee, wvù bó baa kee ke, nu wvú wvù me nu enfewce ê ben keseen.
- 24**Nyo' wvudvu wvun nu wvù to bomεe woη wvun bô mwεem mvunciim mvù nu yî dvú le. È nu wvú Nfon εbule bô nshε, ε ke wvú ké no cee yéw ncese yî è bom bonyii le ke.
- 25**Ke wvú tane fieε fimew fi wvú taale le wee elem fô wvú le ke, njefo è nu wvú wvù gee ε bonyii bocii yoyte, nu dvú, keηke fieε ficii fi bó shieele.
- 26**Wvú to nu ε ge ε dikfuu di bonyii le dicii buy yî wee mwaη e no nu yî ekole ke nshε le. È wvú se ge nonen, nu ε wvú to seyse wase kefew kè bó nu ke enu dvú, noo bidwee bi mondvuum mò bó nu ke eceè mó le.
- 27**Wvú to ge nonen, wvu le bonyii ke eghaale, gomte wvú laa bó nu ke eyuu eyen wvú le le. Geenεn, ε ke Nyo' yaa cim nu ncejole fô wee mvu beene le ke.
- 28**Fifin nu ke leηleη no wee mvu to jemyεε wase le, ‘È nu wvú wvù gee ε beene se cee, lene, bvuu nu no beene nu.’ ε wee wene binfe mvu to jeme wase ten le, ‘Beene nu naa boom bew’.
- 29**No beene nu boom bo Nyo' le nonen, fo beene ekpwaakè le Nyo' fieesene fieε fi è seyse wee bô bvufee bwew, ε tfuy bô ketwaa ke bigew e, kenεε ε kene lo bô te ke.
- 30**È to nu kefew kè bonyii to bæε kenjiwe le, gee mwεem mvù befe mvun, ε Nyo' cin'yi dvú. Geenεn, keseen nu ε wvú gayte le bonyii bocii ekumen mvuntelem mvubole.
- 31**Bó ekumen njefo wvú nu ε gee diuu di wvú nu ke esaw woη tfuu bii keceey e. Wvú nu ε baa wase wee we wvù nu ke esaake. Fifin nu ε wvú dunce wase ê bonyii bocii le è nu keceey no wvú to bvuseε wee wvudvu yî kpwe le.”

³²No Baul jeme nonen, ε bó yuw ε wvú ε ben ekume mbuy wvu yí kpwe le, ε bonyii bomew ne no kiele lo wvú. Ε bomew gay fibole le, “Bese gomte keeke ebvuu eyuw ekume fiεε fi wo jemyi fin.”

³³Nonen, ε Baul mum buy cine bó le.

³⁴Geenen, ε bonyii bomew bee fiεε fi wvú to jemyi le, bene wvú le. Wee mvu bó le to nu Dionisius wvú to nu wee nshii Aleobagus, ε mvu nu kpwoon ε diee nu Damalis noo bonyii bomew ten.

Lem 18

Ε Baul γεν Kolen

¹Εjim jodvu, ε Baul ne Aten γεν ê kelaante kè Kolen e.

²No wvú γεν jó, ε bô wee Juu mvu tasen ε diee nu Akpwila, ε bó to boke wvú Bontus. Akpwila bô Blisilia wvú kpwe to bee ne ke lo Itali, njefo Klawdius wvú Nfon wvu Lum to nu ε bvuse sa' le Bojuu bocii ebuy jó. Ε Baul ke laa ghane ê bó le,

³dioo yen le bó seysee jéw yì bó saanke cún dvú, ε è to nu ke ten lemme di wvú wvú Baul to cee nje dí, ε wvú mum no cee fó, ε bô bó lemte.

⁴É ké dioo nu ediuw ε mbam e ecii, ε wvú no gene yew bunle le, jemyi bô Bojuu noo Boglek dvú, momte keege le bó ebee fiεε fi wvú to yeyi le.

⁵ Ε Silas bô Timatio ke dioo ne Masedonia to, ε Baul mum jo kefew kew kecii no fewci ε è nu diew Nyo', duñci ê Bojuu le Mboyse wvú Nyo' to kawεε nu Jisos.

⁶Geenen, ε Bojuu bodvu ke ne no kicine fiεε fi wvú to jemyi, nan'yi wvú. Ε wvú mum yewse ndvú ye gay ê bó le, “Kpwe yene enù can yene le. Ke me ηκηηke εbo fó ke. Ε kew yí keseen e, me nu enjenè wase ε è nu ê bonyii bô yaa nu ke Bojuu le.”

⁷Ε wvú mum cine bó le, buy γεν no cee wase ε è nu bô wee mvu ε è yaa nu wee Juu ke, ε wee wvudvu to ké no wvumte Nyo'. Diee diew to nu Titius Justus, ε la diew nu mbew yew bunle le.

⁸ Ε Klisbus wvú cee ekole yew bunle bô bonyii bocii bo ê wvú yew ke lese fitele yí Tata le. Ε bonyii bo Kolen nteen no yuuke no Baul fewci ekume Jisos, beje, ε bó mum leese bó ê joo.

⁹ Ε è ke no nu entañ jomew, ε Tata jeme ê Baul ê fiεε diewe efile le le, “Fo wo efanè ke, è fewci ke diew yem gene dvú. Fo wo ke elu dvú ke,

¹⁰njefo me nu bee wo, ε ke wee yaa nu naa dvú wvú nulo ege fiεε bô wo ke. Bonyii bem nu ê kelaante kin e nteen.”

¹¹Nonen, ε Baul mum no nu jó yí kelum e kecile bô kenğawten, yeyi bonyii bô diew Nyo'.

¹²No Baul to nu jó, ε Galio ke dioo nu wee sa' wvu ê keba kè Akeya le, ε Bojuu baance ye koo wvú gen bô wvú yew nsaw e,

¹³jeme ê Galio le, “Wee wvun momte keebaŋse bonyii ε bó bunlee Nyo' ê je mi le jæy se è nu no nci gomte.”

¹⁴ε Baul ke ne le wen ejemyi, ε Galio ne jeme ê Bojuu ba le, “Bojuu ben eyuw, é fiεε fin be nu fiεε fimew fi befe ε wee wvun ε ge, keεε nci mvu ε wvú ε ηgoy, tu me mbe ε ηkuu shém ε n'yekε fiεε fi ben jemyi.

¹⁵Geenen, no fiεε fin nu ke mbew ekumε díew bô ediee noo bonci bonen, ben eseysel ebeneben. Ke è yaa nulo é me ensaw fifin fiεε ke.”

¹⁶No wvú jeme nonen, mum kuη bó ε bó buy yew nsaw e.

¹⁷ε bó bocii mum ne ley yî Sostenes wvù to nu cee ekole yew bunle le, mum suη wvú fwe dvu yew nsaw. ε Galio faηe yaa kpwe lo fiεε fó ke.

ε Baul tu jim Antiok

¹⁸εjim jodvu, ε Baul bvuu ce Kolen bô bonyii bo mbee le yî ediuw e nteen, ke mum ne cine bó le ε bô bo Blisilia noo Akpwila ley ê ηguw wvu ê joo le keegene Silia. É bó se ne Seηklia fò bó to leyεε ê ηguw e, ε Baul mvu ekole nje ηkawma wvù wvú to gee fô Nyo' le.

¹⁹ε bó no gene, ke gen buy Efesus, ε Baul cine Blisilia bô Akpwila le jó, yaw gen fiew ε è nu yew bunle Bojuu le, jeme ê Bojuu dvú.

²⁰ε bó ke lεke le wvú ebvuu ece ke bô bó ediuw nteen, ε wvú tun.

²¹Geenen, ε wvú ke dioo nen'yi, gay ê bó le, “Me nu ηke enkase ento ê ben e é Nyo' fen ε bee.” No wvú gay nonen, mum ley ê ηguw e ne Efesus.

²²ε ηguw ke gen buy Kaysalia, ε Baul buy, ben gen gay kentaashe ke bonyii bo mbee le Jelusalem, mum ne bow Antiok.

²³ε wvú ke ce jó ε kefew gence, mum kase ne no lene fele ê biba bì Galëshia bô Fligia le, yvuwse mvuntelem mvu bonyii bo mbee le bo jó.

ε Abolos fewce diew Nyo' Efesus

²⁴ε wee Juu mvu ke ne to Efesus ε diee diew nu Abolos, ε bó to boke wvú Aleksandia. È to nu wee ε wvú kee njeme, bvuu kee Nwa' Nyo' ntay.

²⁵Bó to nu ε yeeyi wase wvú bô Je yî Tata duηci, ε wvú mum no fiεε lo bô n'yeeyi wvu ekumε Jisos, yeeyi bonyii leη. Geenen, wvú to kee ke ε è nu fiεε fi Jon to fewci leese bonyii ê joo.

²⁶No wvú to toε Efesus, mum kew no yeeyi bonyii yew bunle le yaa fane ke. ε Blisilia bô Akpwila ke yuw no wvú yeeyi nonen, mum jo wvú, gen bvuu yuuse wvú ntay ekumε Je yî Nyo' duηci.

²⁷ε Abolos ke ne kpawwce le wen enu elente egen keba kè Akeya le. ε bonyii bo mbee le bo Efesus mum fice wvú, saŋ ŋwa' ê ŋgoo bonyii bo mbee le bo Akeya, tomte le wvú ke dīoo ε fese ε bó fiisen wvú. ε wvú ke gen jó, fi bonyii bo mbee le ntay, ε bonyii ban nu bò Nyo' to nu ε buw bó bô mboyma, ε bó lese fitele yî Jisos e.

²⁸ ε wvú no beeke mbew bô Bojuu ya le ε è yaa nu wvu wee ke, soo bó, duŋci ê Ŋwa' Nyo' le le Jisos nu Mboyse wvù Nyo' to kawee.

Lem 19

ε Baul gen Efesus

¹È to nu seke Abolos to nu Kolēn, ε Baul ke jo je yi ente ente ê biba bì wvú to lene jó le, fese Efesus. No wvú fese jó, yen ŋgoo bonyii bo mbee le bomew e,

² bife ê bó le, “Keyoy ke Yuule to nu ε to yî yene le seke ben to leseε fitele yî Jisos e?” ε bó tfuse le, “Bese ke baa yuw wase le fiεε fimew nu Keyoy ke Yuule ke.”

³ ε Baul bife le, “É è fen nu nonen, tu bó to lese ben ê joo nje la?” ε bó tfuse le, “Bó to lese bese ê joo bii no Jon to fewci.”

⁴ε Baul mum gay ê bó le, “Jon to leese bonyii ê joo, keeduŋce le bó nu ε kumen mvuntelem mvubole, ε wvú to gayte le bó ebee ε è nu wee wvù too ê wen ejim e, ε wee wvù wvú to gayte nu Jisos.”

⁵ε bonyii bodvu yuw no Baul gay nonen, ε bó mum lese bó ê joo ε è nu wase ê diee di Tata Jisos e.

⁶ ε Baul gee can yî bó le, ε Keyoy ke Yuule mum to yî bó le. ε bó mum ne no jemyi díew yì bó yaa kee ke, bvuu seŋe ê bonyii mwεem mvù bó yuuke ε Nyo' jemyi.

⁷Bonyii bodvu to nu wee diewe yuufe ncow bofεε le.

⁸ ε Baul mum no nu ke Efesus, gene yew bunle le yî kee le te, jemyi ê bonyii dvú yaa fane ke. ε bô bó no beeke mbew, ε wvú momte keege le bó ebee fiεε fi wvú jemyi ekume bvunfon bvù Nyo' le.

⁹ ε bonyii bomew teme bikuu faŋ keebēe, mum no jemyi díew yì befe ê bonyii ejise ekume Je Tata. ε Baul mum cine bó le, jo ŋgoo bonyii bo mbee le, ε bô bó gen wase ε è nu yew n'yeyi yi Taylanus e, no jemyi ê bó dvú ediuw ecii.

¹⁰ ε Baul ge nonen yî bilum e bifεε. Nonen, ε Bojuu noo Boglek bocii bo won wvù Esia jodvu le yuw diew Tata.

ε boom bo Sikεfa le no beŋene Baul

¹¹ ε Baul no nu, ε Nyo' gee, ε wvú gee biŋghaw bi mwεem e ε è nu lo bi diuw wvù yumεen e.

¹²Bó to ké joo ke naa fiεε fiεw fi ye le diewe fincake fi ndvu le, kenεε ndvu ye lemme, egen ekum wee kencem e dvú, ε wvú mum bonen lo, é è nu wvù keŋke keyoy kè befe yî ye le, ε kí buy.

13 Ɛ Bojuu bomew bò to ké no ghane bvuuse biyoy bì befe yî bonyii le, ke mum ne no momte keeteŋe diee di Tata Jisos e se bvuuse biyoy bidvu. Ɛ wee ké ne mum gay ê keyoy kè befe le, “Me mbvuuse wo ê diee di Jisos wvù Baul fewci le.”

14 Bonyii bò to momte fieƐ fidvu to nu bosooshwiƳ, Ɛ è to nu boom bo Sikɛfa wvù ekole ke bocee ncese Bojuu le.

15 Ɛ keyoy kè befe ke bife ê bó le, “Me ŋkee Jisos, ŋkee ten Baul, ben nu finen baa?”

16 Ɛ wee wvù keyoy kè befe kedvu to nu yî ye le mum fente lo yî bonyii bodvu le, gowse bó kuse, Ɛ bó fɛƐ lo buy yew dvu wee wvudvu nu wase binyi bincimte bô bilɛmte ye le.

17 Ɛ Bojuu bô Boglek bocii bò to cee Ɛfɛsus yuw ɛkumɛ fieƐ fidvu, no fane. Ɛ bonyii mum no wvumte diee di Tata Jisos e fesene lo.

18 Ɛ bonyii nteen bò to nu wase bonyii bo mbee le no too seŋe bvuu bwaashi mwɛɛm mvu ɛjiwe le mvù bó to gee.

19 Ɛ bomew nteen bò to gee nfim, baance boŋwa' bobole bo nfim e, to dvú, ton ê bonyii ejise. Ɛ bó taŋ kpaw boŋwa' bodvu bocii, Ɛ wvú buy ejise bigew bontfuke mbaanshen (50,000).

20 Nonɛn, Ɛ mwɛɛm mvun ge Ɛ diɛw Tata no leyte ê mvuntelem mvu bonyii le bô mvungay, saanƷkene gene lo fwe fwe.

Ɛ bonyii kɛw mvunlaa Ɛfɛsus

21 Ɛ è ke no nu ejim jodvu, Ɛ Baul yɛn le wen nu egeŋ Jɛlusalɛm, Ɛ wen nu dioo gene, efey je biba bì Masedonia bô Akɛya le. Ɛ wvú bvuu no gayte le, “Me nu ŋke endioo Ɛ ŋgeŋ Ɛ mbuy Jɛlusalɛm, eŋkeŋke keeŋgeŋ ten embuy Lum.”

22 Ɛ wvú mum yaw tum bonyii bofɛƐ, Timatio bô Elastus bò to fici wvú, Ɛ bó gen fwe Masedonia. Ɛ wvú sheƐ bvuu ce Ɛsia caan.

23 Ɛ è no nu ke kefew kedvu le, Ɛ mvunlaa ne kɛw Ɛfɛsus ɛkumɛ Je Tata Ɛ è yaa nu mvu weƐ ke.

24 Cee elame mvu to nu jó, Ɛ diee nu Demitiyus, Ɛ wvú to ké no tfuyte mwɛɛm mvù fieesene yew ncese nyo' wvù bó teŋe le Atemis. Lemme didvu din to ké no too bô bigew fô bonyii bò tone elame le Ɛ è yaa nu bi weƐ ke.

25 Ɛ Demitiyus mum kum bonyii bò to tone elame bocii noo bonyii bò to lemte kfuu didie lemme, Ɛ bó tase. Ɛ wvú gay ê bó le, “Boom bo bwɛɛm e, ben kee lo le lemme din nu Ɛ beene ŋole bigew yî dvú le.

26 Ben Ɛ no yene bvuu yuuke fieƐ fi fimbwe fi Baul fin gee. Wvú ghane gayte le ke bonyo' bò bó kene lo bô can yaa nu bonyo' ke. Wvú nu Ɛ ge wase nonɛn, Ɛ baŋke bvufee bvu bonyii le nteen Ɛfɛsus jan, Ɛ no baŋse wase ten bvu bonyii bo Ɛsia le bocii Ɛ bó beŋe wvú le.

27 Me n'yene le lemme disεεbeene din nu ekeηke diee di befe. E ke ε mey nonen ke, yew ncese nyo' wvu baay wvù kpwoon wvù Atemis nu ke etu fiεε fi εcici. É fí kooy lo nonen, tu bó ε shoose wase nyo' wvu baay wvun wvù nu ε bó wvumte Esia jocii, ε ekole ke nshe le kecii wvumte ten.”

28 No bonyii bodvu yuw nonen, ε mvuntelem bente lo bó. E bó mum kew no wamte, gayte le, “Atemis wvu Efesus nu nyo' wvu baay.”

29 E kelaante kedvu kecii mum bvuj. E kebombom ke bonyii le kè to taseε mum ley yí Gayus bô Alistakus e, ε è to nu bonyii bo Masedonia bò to lene bô bo Baul, gufe gen bô bó yew nshii noo bondvum e.

30 E Baul no gomte keeley gen fwe dvu kebombom kedvu, ε bonyii bo mbee le tun.

31 E bonyii bomew bo baay baay bo jó bò keηke woη bò to nu nsáa ye, bvuu ciinse ntum fô wvú le lekε le fo wvú emom lo etome ekale dvú ke.

32 E kebombom kè to taseε kedvu mum ne bvuj no wamte ke lo ncew ncew. E bomew wamte fin fiεε, ε bomew wamte fifi. Ke bonyii nteen to cim kee fiεε fi bó to taseε fó nje fí ke.

33 E Bojuu mum jo Eleksanda fese fwe dvu kebombom ke bonyii le, ε bonyii bomew yen mum no kpwaake le wvú kee fiεε fó. E wvú mum no cici bonyii bô kebo keetaηe diuw we.

34 E bonyii bodvu ke dīoo kieε le Eleksanda nu wee Juu, ε bó bvuu mese no wamte lo gene fwe yí wee le mwaan, gayte le, “Atemis wvu Efesus nu nyo' wvu baay.” E bó ke wam nonen, gen buy bontam bo kefew e bofεε.

35 E wee nsan wvu εlaante jodvu ke ne ci bó, ε bó lu bô diuw. E wvú bife é bó le, “Bonyii bo Efesus, wee nu dvú wvù maa le ke è keηke beene bo Efesus jan yew ncese nyo' wvù Atemis noo te di nyo' le di to gbweε fowe le?”

36 No wee nu se wvú nu dvú wvù nulo ekicen fifin, tu ben bee keelaame, saa eyuηsene nen ke.

37 Ben ε to bô bonyii ban fen se bó nu ε coη fiεε yéw bonyo' le, keηεε ε jeme díεw yi befe ekumε nyo' wesebeene wvù kpwoon wvun ηkuuη.

38 É Demitius bô bonyii bew fen keηke nsaw bô wee, tu εdiuw ε nsaw nu dvú yò è nulo é bó egen eyen bonyii bò saake bonsaw e, é bô bó esaw.

39 É fiεε fimew fen bvuu nu dvú fele fin fi ben gomte, tu bó nu ke etaa ente jodvu fô nshii bocee ntεw e.

40 Me njemyi nen, njefo me n'yene le fiεε fi eben fin nu elese beene diuw e le beene nu ε kew mvunlaa. E fí kooy nonen, beene saa ekeηke fiεε fi leη fi bó etfuse ke.”

41 No wvú jeme nonen, mum gay ε kebombom kedvu tawse.

Lem 20

Ɛ Baul gen Masedonia noo Gleees

¹ Ɛ mvunlaa mvù to nu Ɛfesus ke læeten, ɛ Baul tee ŋgoo bonyii bo mbee le, tefe bó mum gay bó le no gene Masedonia.

² Ɛ wvú gen, ghan biba bi jó le, yvuwse mvuntelem mvu bonyii bo mbee le ntay, mum danŋen gen Gleees,

³ ce jó kee tɛ. Ɛ wvú ke nɛ no nu læ wen nu egen eley ŋguw wvu ê joo egen Silia, mum yuw læ Bojuu nu ɛ gbwe wvú ê je. Ɛ wvú mum yen læ è jee læ wen ekase etu jim je Masedonia.

⁴ Wvú to lene bô bô Sobata wvù waa Bilus wvu Belia, noo Alistakus bô Sekundus bo Tesalonika, noo Gayus wvu Delbi, noo Timatio, noo Tikikus bô Toofimus bô to nu bonyii bo Ɛsia.

⁵ Ɛ bonyii ban mum gen fwe no cɛyte bee bo Baul Towas.

⁶ Ɛ Ŋkaw Blæed wvù bó baa gɛɛ Fintuŋlɛen jó ke fey, ɛ bese ley ŋguw Filibi, jo ediuw etin bene bó le Towas, ɛ bee bó ce jó ediuw esooshwiɣ.

Ɛ Baul bvuu ghan kentaashe ke Towas

⁷ Ɛ è ke no nu diuu di fwe yî kema le, ɛ bee bo kentaashe tase fokieguu keeguuten blæed. No Baul to nu keebuy nɛ fò bvú ɛ yuu, ɛ wvú mum kɛw no jemyi ê bó, ke jeme gen buy entaŋ entelɛŋ.

⁸ Bee bó to nu ɛ è nu ê kebuw ke yew e ke ewe le, ɛ bin'yeeese baa dvú nteen.

⁹ Ɛ cuwee mvu wvù diee to nu Yutikus ɛ shii yî ntoo yew e. Ɛ wvú ke nɛ kɛw no leete no Baul to jemyi ke gene lo. Ɛ nyii ke dioo gooke wase lo wvú, ɛ wvú mum nɛ fó gbwe ekuse, ɛ fó to nu biŋkente bi yew e bitete ɛ kɛw fokuse. Ɛ bó gen jo ɛ wvú ɛ kpwe wase.

¹⁰ Ɛ Baul shii gen ŋgvuum ê wvú ewe, bam wvú gay ê bonyii læ, “Wvú bee dvú, fo ben ebuukè kɛ.”

¹¹ Ɛ Baul ke kase ben ê kebuw ke ewe kie le, guse blæed die, se bvuu kɛw no jemyi, ke jeme ɛ bvutfuu ghan yuu ɛ wvú mum nɛ.

¹² Ɛ bonyii ke jo cuwee wɛ kfulɛ bô wvú fô yew e ɛ wvú nu wum, ɛ mvuntelem læeten bó baay.

Ɛ Baul nya ntefe ê bocee kentaashe ke Ɛfesus

¹³ Ɛ bese ke ley ŋguw wvu ê joo, gen Asos, no Baul to seysɛɛ wase læ è nu jó jò bese nu ke ejo wen. Wvú to gay nonɛn, njefo wvú to gomte keelen fokuse.

¹⁴ Ɛ wvú ke kooce bese le Asos, ɛ bese mum jo wvú ê ŋguw e, ɛ bee bó gen buy Mitilin.

- 15 Ɛ bese ke nɛ fɔ̂ ê ŋguw e, ɛ bvú buy yuu, ɛ bese fɛse mbew Kios e, fey, ɛ bvú bvuu buy yuu, ɛ bese fɛse Samos, bvuu fey, ɛ bvú bvuu buy yuu, ɛ bese ley Miletus.
- 16 Bese to lɛne nonɛn, wɛmte lo Ɛfesus njefo kɛ Baul to gomte keejewse kefew Ɛsia kɛ. Wvú to gene cekey cekey laa è nulo é wen ke enu Jelusalem diuu di Nkaw Bɛntekos e lɛ.
- 17 No bese ley Miletus, ɛ Baul ciinse ntum fô bocee kentaashɛ ke bonyii bo mbee le ke Ɛfesus e lɛ bó eto eyɛn wen e.
- 18 Ɛ bó ke to, ɛ wvú jeme ê bó lɛ, “Ben kee no nce wɛm to nu beene ɛ kɛw yî diuu di fwe di me nto ntomyɛɛ ekalɛ yî nshe yi Ɛsia le.
- 19 Me nto nu ɛ nshike ekolɛ kem, no nlemte fô Nyo' le bô misɛm ɛjise. Ɛ me mbvuu n'yɛn bonjɛw ê jé le nteen no Bojuu to bone bikaa ê me ɛjim.
- 20 Ɛ ben bvuu kee no me nto n'yɛɛyi ben ya le, mbvuu ŋghane n'yɛɛyi yéw e. Me nto mbaa nyilɛ fiɛɛ fimew fi è nulo é fí efi ben kɛ.
- 21 Me nto nfewci kɛ ɛ è nu fiɛɛ fimwaaŋ ê Bojuu noo ê bonyii bô yaa nu kɛ Bojuu, ŋgayte lɛ bó ekumen mvuntelem mvubole, etu bô bo Nyo', elese fitele yî Tata wesebeene wvù Jisos Klistu le.
- 22 Keseen, ben eyeke eyuw, me ŋgene Jelusalem ɛ è nu no Keyoy ke Yuule gay ê me, ɛ me n'yaa ŋkee lɛ laa è nu eɛn ekooy la bô me jó lɛ.
- 23 Fiɛɛ fi me ŋkee nu kɛ lɛ mondvuum monciim mò me nfele mó le, nu ɛ Keyoy ke Yuule seɛ ke ê me lɛ ncaw bô ŋɛw cɛyte me fwe.
- 24 Geenɛn, kɛ me n'yɛne nshii wɛm e lɛ è nu fiɛɛ kɛ, ɛfey lɛ me emɛse lemme di Tata Jisos nu ɛ nya ê me di nu lɛ me enfewci saaka wvù jee wvu ekumɛ no Nyo' nu ɛ buw bonyii bô mboyma.
- 25 Yî keseen e, ben eyeke eyuw, me ŋkee lɛ kɛ wee mvu ben e wvù beene ɛ bó se nu, ɛ me nfewci ekumɛ bvunfon bvú Nyo' le bɛɛ ke ebvuu eyɛn bvushiw bwem e kɛ.
- 26 Me ɛ mum ɛ no nlooci njemyi ê ben ɛben lɛ é wee mvu ben e la lo keseen, tu kɛ me ŋkɛŋke ebo fɔ̂ kɛ,
- 27 njefo me nse mbaa nyilɛ keensee fiɛɛ ficii ê ben fi Nyo' shieele kɛ.
- 28 Ben dioo ɛ shɛɛ, no taalè fô bikuu binɛn e noo fô ŋgoo bonyii bo mbee le bô nu diɛwɛ njée le, bô Keyoy ke Yuule nu ɛ gɛɛ ben ê bó we le. Ben enù boncɛy njée bo kentaashɛ ke bonyii bo Nyo' le kè wvú to sumɛɛ bô ɛlɛmɛ ke Waa we le.
- 29 Me ŋkee lo lɛ me nu ŋke endioo ɛ mbase ekalɛ, é bokuula eto eley ŋgoo yene le, saa ecawte wee wvù bó ekoo kɛ.

30 Bonyii bomew nu ke ebuy ke naa ê ben ente, elæle ηgoo bonyii bo mbee le, guute ε bó tuu ê ηgoo yibole.

31 Nonen, ben eyenè, kumyì le yì bilum e bitete nu ε me ε n'yæyi ben bocii entaη bô emvunsheen bô misem ejise.

32 Me ε mum ε no nyaa ben keseen can Nyo' le noo yì diew ye yì nu ekumε nfi wvù Nyo' nu ε buw bonyii dvú. Diew yin nu yì nulo ege é ben ekuu, wvu le ben ke ekeηke keleη fô bvudvuu bvù Nyo' nu ε gee ê bonyii bô wvú nu ε ge le è nu naa bew e.

33 Me nto mbaa njeηke bigew bi wee le kenε ndvú wee ke.

34 Ben kee ntay le è nu can yem yin yì to lemte fiε ficii fi bee ηgoo yem to shieele.

35 Yì mwεem mvunciim e nu ε me nto nduηci ê ben le wee keηke keelemtè ntay emum efii bonyii bo ηgew e, kumyì no Tata Jisos to jemyε le, 'Njoη wvu baay nu wvu wee wvù nyaa lo, fele wee wvù fii lo le.'"

36 No Baul mεse ε jeme nonen, ε bô bó mum tum envuw fokuse bocii, bunle.

37 Ε bó nε kεse bô kpwe no beele, bamte Baul ηoci le bó ε sheε wase.

38 Fiε fi to gee é bó se no beele baay nen, nu diew yì Baul to jemyε le ke bó bee ke ebvuu eyen bvushiw bvuwene ke. Ε bó mum ciinse wvú gen buy fô wvú nu eley ηguw wvu ê joo.

Lem 21

Ε Baul gen Jεlusalεm

1 Ε bee bo Baul gay bó le, mum nε fó lente ê ηguw e teytey, fεse Kos. Ε bvú buy yuu, ε bese gen Lodes, ke nε fó, gen Batala.

2 No bese buy jó, yen wvumvu ηguw wvu ê joo wvù to gene Fonishia le, mum ley jó no gene.

3 Ε bese ke yen Sayblus e, cine εbo eηkoηko, mum fey gen buy Taya, woη wvù Silia le fô ηguw to nu keebvuse mwεem.

4 Ε bese gom bonyii bo mbee le, ε bee bó ce εdiuw εsooshwiw. Ε Keyoy ke Yuule ge ε bó tefe Baul le fo wvú emom egen Jεlusalεm ke.

5 Ε bee bó ke ce, ε diuu ke to kocen di bese ene, ε bese mum jo je. Ε bó bocii bô bokε' bobole noo boom, ciinse bese buysen kelaante kedvu gen buy diuw joo yi baay e, ε bee bó tum envuw fokuse, bunle mum gaynen.

6 Ε bese ley ê ηguw e, ε bó no tuu jim fô yew e.

7 Ε bese mum nε Taya, jo je, gen buy Tolεmay. Ε bee bo boom bo bwee wese le bo mbee le gaynen, ce diuu dimwaan.

⁸ Ɛ bvú buy yuu, ɛ bese nɛ, ɣɛn fɛsɛ Kaysalia, ɣɛn yew dɔv Filew wvù to ghane fewci diɛw Nyo', ɛ bee bó cɛ. Filew wvun to nu wee mwaan ɣgoo bonyii bo bosooshwiɔ bò bó to baayɛ ba le.

⁹ Wvú to kɛɣke boom bokɛnɛ bonɛw, ɛ bó baa kee wase bolemɛ kɛ, ɛ bó to ké no seɣe ê bonyii mwɛɛm mvù bó yuuke ɛ Nyo' jemyi.

¹⁰ Ɛ bese no nu jó yî ɛdiuw e nteen, ɛ wee mvu wvù to ké no seɣe mwɛɛm mvù wvú yuuke ɛ Nyo' jemyi ke nɛ Judea bow to jó ɛ dieɛ nu Agabus.

¹¹ Ɛ wvú ke to yɛn bese le, jo kecaw ke Baul e, kay bikaa biew bi wvú wvù Agabus e noo can ye dvú, mum tefe le, “Keyoy ke Yuule gayte le è nɛɛ no Bojuu bo Jelusalem nu ke ekay wee wvù kɛɣke kecaw kin nɛn, enya wvú can bonyii bò yaa nu ke Bojuu le.”

¹² Ɛ bese yuw nonɛn, ɛ bee bo bonyii bocii bò to nu fó no lɛke Baul le fo wvú eɣɛn Jelusalem kɛ.

¹³ Ɛ wvú tfuse le, “Ben gee ɛ è nu la fin nɛn? Ben kee kɛ le ben beele nɛn shiike fitele fiem e? Me nu ɛ nseyse ɛ è yaa nu kɛ keenley ncaw Jelusalem maan kɛ. Me nu ɛ nseyse tɛn naa kɛɣkpwe lo jó nje dieɛ di Tata Jisos e.”

¹⁴ No je to baa nu dvú keege é wvú ekumɛn ɣkpawwɛ we, ɛ bese mum lu, gay ke wase le, “Fí enù kɛ no Tata gomte.”

¹⁵ Ɛ ɛdiuw fey, ɛ bese baance mwɛɛm mvusɛsɛ, mum no bene Jelusalem.

¹⁶ Ɛ bonyii bo mbee le bomew bo Kaysalia ben bee bó, ke jo bese ɛ bee bó ɣɛn yew dɔv Menason dvù bese to nu keeke eceɛ. Ɛ Menason wvun to nu wee wvu Sayblus, ɛ è to nu wee mvu ɛnte jo bonyii bò to yawɛɛ lese fitele yî Jisos e.

Ɛ Baul laa ghane ê Jɛm bô boceɛ kentaashɛ ke bonyii bo mbee le

¹⁷ No bese to fɛsɛɛ Jelusalem, ɛ bonyii bo mbee le bo jó fiɛn bese nɛy.

¹⁸ Ɛ ɛkfuɣ buy yuu, ɛ bee bo Baul laa ghane ê Jɛm e, ɛ boceɛ kentaashɛ to nu tɛn fó bocii.

¹⁹ Ɛ Baul gay bó le, mum nyɛy fiɛɛ ficii ê bó fi Nyo' to gee fô bonyii bò yaa nu ke Bojuu le fele yî lemme di wvú to lemte le.

²⁰ Ɛ bó yuw nonɛn, mum kɛw no tumte moɣkum mo Nyo' le. Geenɛn, ke nɛ gay ê Baul le, “Waa bwee wese, taa eyɛn no Bojuu nu ɛ bó ɛ lese wase fitele yî Jisos e bontfuke le bontfuke le. Geenɛn, bó nu nonɛn bɛɛ kɛ leeme yî bonci bo Muses e tɛmyi,

²¹ Ɛ bó ɛ see wase ê bó ɛkumɛ wo le wo ghane yɛyɛi Bojuu bò cee bitum bimew e le bó ecinɛ bonci bo Muses e, jemyi le fo bó etfuusè boom yew kɛ, bô le fo bó ebii nce woɣ e kɛ.

²² No fí nu ɛ bó nu ke ekieɛ kɛ le wo nu ɛ to, è nulo é beene ege nɛɛ keseen?

23 Bese nu esee fiεε fi wo nu ege. Bese keŋke bonyii fεn bonεw ε bό ε ge ηkawma fō Nyo' le.

24 Joo bό, ε ben ε bό egen ekfum bikuu binen, ε wo elaw fiεε ficii fi bό keŋke keelaw wvu le bό egen emvu bikuu bibole. Ε wo ge nonen, ε bonyii bocii emum ekieε le wo gεele ten bonci bo Muses e, ε mwεem mvunciim mvù bό jemyi ekume wo yaa nu keceεy ke.

25 Fi ekume bonyii bo mbee le bό yaa nu ke Bojuu nu ε bese to jo ntaŋ saŋ ηwa' ciinse fō bό le le fo bό edieε mwεem mvudien mvù bό nu ε ge bintaje dvù fō bonyo' le ke. Fo bό edieε elεme ke nyam e ke. Fo bό edieε nyam yì nu se bό sele lo elεme ε buy ke. Fo bό ekeŋkè fiεε keege bō kenjaŋ ke.”

26 Nonen, ε Baul mum jo bonyii bodvu, ε ekfuŋ ke buy yuu ε bō bό gen kfum bikuu bibole. Ε Baul mum gen yew ncese le, see diuu dì εdiuw ε ηkfum nu ke edioo ε ka, ε bό emum ege ncese fō bό le wee mwaanŋ mwaanŋ.

Ε bό gheŋ Baul fō yew ncese le

27 Ε εdiuw yodvu ke dioo ekaa, ε yό to nu εsooshwiŋ, ε Bojuu bomew bό to nen'yεε Esia yen Baul e fō yew ncese le, mum beyse kebombom ke bonyii le, koo wvù,

28 no sane εtale gayte le, “Bonyii bo Islael, ben efi bese. È nu wee wvun wvù ghane yεeyi mwεem mvù befe ε bonyii mondvuum monciim ekume woŋ wesebeene bō bonci bo Muses e noo ekume yew ncese yin. Wvù nu ε mεse ε jo bonyii bό yaa nu ke Bojuu, ε to bō bό yew ncese le fεn, ε befe bō bvudvuu bvù yuule bvun.”

29 Bό to jemyi nonen, njefo bό to nu ε yen ε Baul ghane εlaante bō Toofimus wvù wee wvu Efesus. Ε bό mum no kpwaake le Baul nu ε ley bō wvù fō yew ncese le.

30 Ε εtale kedvu ge ε kelaante kecii shiw, ε bonyii no lewte too fó. Ε bό gheŋ Baul, gufe buy bō wvù yew ncese le, kaŋ mwaanŋ, ε bό mum faaye dew fwese.

31 Ε bό mum no gomte keeyu Baul, ε saaka ley bitem bi cee ekole bikuu bi bonyii bo nci le bo Lum e le Jelusalem jocii bvuuŋke lo.

32 Ε wvù mum ne lo kaŋ mwaanŋ, jo bonyii bo nci le bō bikuu bimew bi ηgόo bonyii bo nci le, ε bō bό lewte bow fó. Ε bonyii dioo yen nci le, ε cee ekole bikuu bi nci le nu fó, ε bό mum lu keesuŋke Baul.

33 Ε cee ekole nci wvudvu mum to koo Baul, gay ε bό kay wvù bō boncaw bofεε. Ε wvù bife ε bό le, “Wvun nu yεε? Wvù jay ε è nu la?”

34 Ε fó ne no yole lo, ε ban wamte fin, ε boba wamte fifi. Ε wvù faŋe yaa elooce eyuw laa è se be kooy la le. Ε wvù mum ne gay le bό ejo Baul eben bō wvù fō la di bonyii bo nci le.

35 Ε bonyii bo nci le mum jo wvù, ke dioo bene fō je nu ε bό ε sewyε lo, mum ne wa tuu lo Baul no kebombom to ffuuke ke ε wvù εjim.

36 Ɛ kí to bii nonen wamte, gayte le, “Bó elɛse lo wvú.”

Ɛ Baul taɲe diuw

37 Ɛ bó ke dioo leyte wase bô Baul fô la di bonyii bo nci le, ɛ wvú lɛkɛ ê cee ɛkole bikuu bi nci le le, “È nulo é me enjeme fiɛɛ ê wo?” Ɛ wvú yuw nonen, bife ê Baul le, “Fí nu le wo kee díɛw Glek e?”

38 È baa nu wo wee wvu Ijiw wɛ wvù to kɛwɛɛ mvunlaa bô bikuu bi woɲ e kefew kemew e, gufe ɲgoo bonyii bontfuke bonɛw (4,000) bô to yuwyi bonyii, ɛ bô bó gen no nu ɲkpwaante le?”

39 Ɛ Baul tfuse le, “Me nu wee Juu, ɛ bó to boke me Taasus woɲ wvù Silishia le, ɛ ke Taasus nu kelaante ke nɛw kɛ. Kee wo, nya kɛ me bô je é me enjeme ê bonyii ban.”

40 Ɛ cee ɛkole bikuu bi bonyii bo nci le wvudvu mum nya je le wvú ejeme. Ɛ Baul mum leem fô bó to sɛwyɛɛ fɛ, ci bonyii bô kebo. Ɛ bó lu bô diuw, ɛ wvú gay ê bó ɛ díɛw Ibulu le le,

Lem 22

1 “Bo'icɛm bô boom bo bwɛɛm e, ben eyeke é me entaɲe diuw wɛm fwe dvunen.”

2 Ɛ bó dioo yuw no wvú jemyi ɛ è nu ê díɛw yibo Ibulu le, ɛ bó mɛse cife nen ndvumm. Ɛ Baul gay le,

3 “Me nu wee Juu, ɛ bó to boke me Taasus woɲ wvù Silishia le, geenɛn ley me Jelusalem jan, ɛ me n'yɛɛyi ɲwa' can Gamalia le. Ɛ wvú looce yɛɛyi me bô bonci bo bo'icee bosɛɛbeene le, ɛ me mum no nleeme yí fiɛɛ fi Nyo' le ntɛmyi ntay kɛ díɛwɛ ben bocii bô nu fɛn ɛben e.

4 Me nto ɲké no mbone bikaa ejim jo bonyii bô bii Je Tata le, ɲgee ɛ bó yuwyi bó, ɲkoole bokɛnɛ bô bolemɛ nciinse yew ncaw e.

5 Fin nu fiɛɛ ɛ ɛkole ke bocee ncese le bô bonyii bô saake woɲ kee baɲɲ. È to nya bó boɲwa' le me eɲgen dvú fô boom bo bwɛɛ wesebeene bô nu Damaskus e. Ɛ me mum no ɲgene keenkooye bonyii bô bii Je Tata le, eɲkay, ento bô bó Jelusalem é bó enya ɲgɛw ê bó.

Ɛ Baul see no wvú to ghanɛ sɛ lese fitele yí Jisos e

6 Ɛ me ɲke ndioo nfeɲene Damaskus kɛ díɛwɛ ɛmvunsheɲ entelɛɲ e, ɛ n'yuu mvu wvu baay nɛ sɛsɛ law fowe, shii yí yɛm e.

7 Ɛ me ɲgbwe fokuse, n'yuw ɛ díɛw jeme ê me le, ‘Saul, Saul, wo bone bikaa ê me ejim nen nje la?’

8 Ɛ me mbife le, ‘Tata, è nu wo wvù yɛɛ?’ Ɛ díɛw yidvu tfuse le, ‘È nu me wvù Jisos wvu Nasalet, ɛ è nu me wvù wo bone bikaa ejim jodvu.’

⁹Bonyii bò to nu bee bó to nu ε yen n'yuu wvudvu le, geenen faɲe yaa yuw diew wee wvù to jemyi bee wvù le ke.

¹⁰ε me mbvuu mbife le, 'Tata, è nulo é me enge nεε?' ε wvù tfuse ê me le, 'Ja we, eley gen Damaskus, é bó esee ê wo jó lemme dicii di Nyo' nu ε seyse le wo elem.'

¹¹ε me ηke nja fó, ε n'yuu we ε ge wase me ε nfefe, ε bonyii bò bee bó to lenε mum cεɲse wa lo me, ley gen bô me Damaskus.

¹²Wee mvu to nu Damaskus jodvu, ε diee nu Ananias, ε wvù to looci wvumte Nyo', gεεle bonci bosεεbeene, ε Bojuu bocii bò to nu jó bensee wvù.

¹³ε wvù ke to yen me le, leem mbew yem e gay ê me le, 'Saul waa bwεεm, kase eyenè mwεεm e.' Ke sekedvu nonen, ε me mum ηkase no n'yene mwεεm e, mum n'yen ten wvù wvù Ananias e.

¹⁴ε wvù gay ê me le, 'Nyo' bo'icee bosεεbeene nu ε baa wase wo le wo ekiεε fiεε fi wvù shieele, bô le wo eyen Wee we Lemme wvu Teytey e, eyuw njeme wvù buyte diuw we le.

¹⁵Wo nu ke enu wee wvù efewci ekume wvù, seɲè ê bonyii bocii fiεε fi wo yen bô fi wo yuw e.

¹⁶No fí nu nonen keseen, wo bvuu ceyte la? Nεε we é bó elese wo ê joo, ecuke bibefe biuw, no wo leke ê Tata.'

ε Baul see no Jisos to tumεε wvù fô bonyii bò yaa nu ke Bojuu le

¹⁷ε me ηke ntu jim Jelusalem, ηke ndioo mbunlee yew ncese le, ε fiεε diewe εfile le nε to fô me le.

¹⁸ε me n'yen Tata le ε fiεε fidvu le, ε wvù gay ê me le, 'Yaɲsen nε Jelusalem jan cekey njefo ke bonyii bo jan nu ke ebee fiεε fi wo fewci ekume me ke.'

¹⁹ε me nfuse ê wvù le, 'Tata, bó kee naa ntay le me nto ηké no nleyte yéw bunle le, ηkooyi bonyii bò nu ε lese fitele yí yo le, nsuunke.

²⁰Seke bó to yuu Tεfan wvù to fewci ê bonyii ekume wo, nu ε me nto nu naa fó ntomte. ε è nu me wvù bonyii bò to yuu wvù to baayεε ndvù yibo, nya ε me no ηkeηke.'

²¹ε Tata bvuu gay ê me le, 'Nεε jan, njefo me nu entum wo naa ncejole fô bonyii bò yaa nu ke Bojuu le.'"

²²No Baul to jemyi ε bonyii yeke, ε wvun njeme ke dioo buy diuw we le, ε bó kew no wamte lo foweεwe, gayte le, "Bó elese lo kfuw wvun wee yí nshε le. Ke è nu wee wvù enu dvù ke."

²³ε bó no wamte nonen, yεwsee ndvù yibo we, tfumyi kebvu we.

²⁴ Ɛ cee ɛkolɛ bikuu bi bonyii bo nci le mum nɛ gay lɛ nci ejo Baul egen bô wvú fô la dibole, lɛ bó dɔo ɛ gen tam wvú, biwɛ mweem ê wvú, é wvú esee fiɛ fi ge Bojuu ɛ sɛ no wamte wvú nɛn.

²⁵ Ɛ bó mum gen bô wvú kay, nɛ lɛ bó etamte, ɛ Baul bife ê ɛkolɛ ke ɲgoo bonyii bo nci le kemew kè to leeme fô lɛ, “Nci nu ɛ bee lɛ bó etam wee wvu Lum sɛ bó ɛ saw nsaw we le?”

²⁶ Ɛ ɛkolɛ ke ɲgoo bonyii bo nci le kedvu yuw nonɛn, mum gen yɛn cee ɛkolɛ wvubole, gay ê wvú lɛ, “Wo gomte keemom ɛ è nu la? Ê kèè lɛ wee wvun nu wee wvu Lum.”

²⁷ Ɛ cee ɛkolɛ wvudvu yuw nonɛn, mum gen yɛn Baul e bife ê wvú lɛ, “Kɛ see ê me, wo nu wee wvu Lum e?” Ɛ wvú bee.

²⁸ Ɛ cee ɛkolɛ wvudvu gay ê wvú lɛ, “Me nto ɲguy bigew nteen, nɛ no nu wee wvu Lum.” Ɛ Baul tfuse ê wvú lɛ, “Me nu fiem wee wvu Lum bootɛn.”

²⁹ Ɛ bonyii ba bô to nu keebiɛ mweem ê wvú mum tfuw bikaa. Ɛ cee ɛkolɛ wvubo no fane tɛn, njefo wvú to nu ɛ gay ɛ bó kay Baul ɛ è nu wee wvu Lum.

Ɛ Baul tɛɲɛ diuw fwe dvu bonyii bô saake woɲ Bojuu

³⁰ Ɛ cee ɛkolɛ wvudvu no gomte kɛ keelooɛ kɛɛ fiɛ fi Bojuu to teyte yî Baul e. Ɛ bvú buy yuu, ɛ wvú gay ɛ bó fay Baul, tee bocee ncese bo baay baay noo bonyii bocii bô saake woɲ, ɛ bó to, ɛ wvú leke Baul ê bó fwe.

Lem 23

¹ Ɛ Baul luɲ ejise yî bonyii bô saake woɲ e, gay lɛ, “Boom bo bwɛem e, yî nce wɛm e ɛ to ɛ buy ɛbɛn e, nu ɛ me ɲké no ɲgee kɛ ɛ è nu mweem mvù me ɲkee lɛ mvú nu lɛɲ ê Nyo' ejise, ɛ kɛ fiɛ yaa nu dvú fi saake me fô fitele fiem e kɛ.”

² Ɛ Ananias wvù to nu ɛkolɛ ke bocee ncese le gay ê bonyii bô to leeme mbew Baul e lɛ bó ekfun lo diuw we.

³ Ɛ Baul tfuse ê wvú lɛ, “Nyo' nu ke ekfun tɛn wo. Wo fieesene kembew kè bó nu ɛ yefe kí ɛ no baa. Wo shile fɛ lɛ wo saake me bii nci le, ɛ bvuu ɛ no ɲgoyte nci wvudvu gayte lɛ bó ekfun me le?”

⁴ Ɛ bonyii bô to leeme mbew Baul e bife ê wvú lɛ, “Wo nan'yi ɛkolɛ ke bocee ncese Nyo' le le?”

⁵ Ɛ wvú tfuse lɛ, “Boom bo bwɛem e, kɛ me mbe ɲkee lɛ è nu ɛkolɛ ke bocee ncese le kɛ. Bó nu ɛ saɲ lɛ, ‘Fo wee ejeme diɛw yî befe ê wee wvù saake bonyii kɛ.”

⁶ Ɛ Baul ke dɔo taa yɛn lɛ bonyii bô to nu fô nu ɛ bomew nu Bosadusii ɛ bomew nu Bofalasii, ɛ wvú mum jeme bô diɛw yî tɛmyi ɛntelɛɲ jo bonyii bô saake woɲ ba lɛ, “Boom bo bwɛem e, me nu wee Falasii, nu waa Bofalasii. Me nu fɛn yî nsaw e njefo me ntaale fwe, ɲkee lɛ boɲkfu nu ke ebuy yî kpwe le.”

⁷No wvú jeme nonen, ε Bosadusii bô Bofalasii mum ne kew waa, ε nshii wvudvu mum bvuj.

⁸Bó to waale nonen, njefo Bosadusii to ké no duu le ke bonkfu nu ke ebuy yí kpwe le ke, bvuu duu le ke fiεε fimew nu dvú diewe bonceendaa bo Nyo' le kenεε biyoy ke. Geenen, ε Bofalasii beje le mvumvun mvunciim nu lo.

⁹ε waa ne teme lo fó, ε bonyii bomew bô to duñci bonci bô to nu ηgoo Bofalasii le, leem fó jeme teme lo, gay le, “Bese baa yen fiεε fi wee wvun jay e ke. È nelo enu ε keyoy kemew kenεε nceendaa Nyo' ε jeme ê wvú.”

¹⁰ε waa wvudvu ke mum ne no gomte wase keetu bvudiuw, ε cee ekole bikuu bi bonyii bo nci le no fane le sekemew é bó ene esaaye lo Baul fó biba le. ε wvú mum gay le nci ebow fó, eloo Baul can yibole, ekase eben bô wvú fô la di nci le.

¹¹ε è ke no nu entañ, ε Tata to leem mbew Baul e, gay ê wvù le, “Kuu shém. No wo nu ε see wase ê bonyii ekume me Jelusalem, è nu ke lenlen no wo nu ke esee ten Lum.”

ε bonyii bomew jo nsey keeyu Baul

¹²ε ekfunj buy yuu, ε Bojuu bomew koo ntfum, die kelew le ke bó nu ke edie fiεε kenεε ewu fiεε se bó ε yu Baul ke.

¹³Bonyii bodvu bô to koolεε ntfum, die kelew to fele wee mbaanyε.

¹⁴ε bó mum gen fô bocee ncese bo baay baay e, noo bonyii bô saake woñ, gay ê bó le, “Bese nu ε looce ε die kelew le ke bese nu ke elese lo fiεε emvu se bese ε yu Baul ke.

¹⁵Yí keseen e, ben ε bo bonyii bocii bô saake woñ eciinse ntum fô cee ekole bikuu bi bonyii bo nci le, ebuwse wvú le wvú ebvuu ebowse Baul é wvú eto ê ben fwe, le ben gomte keebvuu etasse nsaw we ntay. Nonen, é bese emum egbwe wvú ê je, é bó dioo booke bô wvú, é bese emum eyu ε è beε ê je.”

¹⁶No bó to koolεε ntfum yidvu nonen, ε waa jeme Baul wvù diemsen yuw, mum gen fô la di bonyii bo nci le, see ê Baul.

¹⁷ε wvú mum tee ekole ke ηgoo bonyii bo nci le kemew gay ê kí le, “Joo cuwee wvun egen bô wvú fô cee ekole bikuu bi bonyii bo nci le, wvú kenke fiεε keesee ê wvú.”

¹⁸ε wvú mum jo, gen bô wvú fô cee ekole bikuu bi nci le, gay ê wvú le, “Baul wvù wee ncaw nu ε tee me, ε gay le me enjo cuwee wvun ento bô wvú fô wo le, le wvú kenke fiεε keesee ê wo.”

¹⁹ε cee ekole wvudvu mum jice wvú le yí kebo le, ε bô wvú lewse ye, ε wvú bife ê wvú le, “È nu la fi wo gomte keesee ê me?”

20 Ɛ cuwee wvudvu tfuse le, “Bojuu bomew nu ɛ jo ntaŋ le bó nu egay é wo ebowse Baul é wvú eto fwe dvu bonyii bò saake woŋ ntfuu, le bó gomte keetasse nsaw we ntaŋ, ɛ bó gee nonen buwsee lo wo.

21 Fo wo ke ebee ke, njefo bonyii nu dvú fele wee mbaanyɛ bò nu egbwe wvú ê je, ɛ bó die kelew le ke bó nu ke edie fiɛɛ kɛnɛɛ ewu fiɛɛ sɛ bó ɛ yu Baul ke. Bó nu keseen ɛ bó ɛ seyse wase ye, ɛ no cɛyte ke wase ɛ è nu fiɛɛ fi wo nu jeme.”

22 Ɛ cee ekole bikuu bi bonyii bo nci le wvudvu mum gay le cuwee wvudvu egenè, ciise ê wvú le fo wvú dīoo gene ge ɛ wee kiɛɛ le wvú nu ɛ see fiɛɛ fidvu ê wen ke.

Ɛ bó ciinse Baul Kaysalia fô Fɛlew wvù wee sa' le

23 Ɛ cee ekole bikuu bi bonyii bo nci le wvudvu mum tee bikuu bi ŋgóo bonyii bo nci le bifɛɛ gay ê bí le, “Ben eseyse bonyii bo nci le gee fɛɛ (200) bô bo nyámbala le mbaŋsooshwiŋ (70) noo bo egoŋ e gee fɛɛ (200), é ke edīoo enu didīuu bvuuke entaŋ, é bó egen Kaysalia.

24 Ben eseyse ten nyámbala ê Baul, ejo wvú egen bô wvú fô Fɛlew wvù wee sa' le ɛ fiɛɛ baa kooy bô wvú ê je ke.”

25 No wvú gay nonen, mum saŋ ŋwa' ɛ wvú jemyi le,

26 “È nu me wvù Klawdius Lisias. Me nsaŋke ŋwa' wvun fô wo le wee wvu baay wvù Fɛlew wvù wee sa'. Me ŋgayte wo le.

27 Bojuu se nu ɛ koo wee wvun ɛ no gomte keeyu. Me ɛ n'yuw le è nu wee wvu Lum, bee bonyii bem bo nci le ɛ se ɛ mum ɛ ley fó ɛ loo wvú can yibole.

28 Me ɛ nse ɛ no ŋgomte keen'yuw fiɛɛ fi bó teyte yî ye le, ɛ mum ɛ mbow bô wvú fô bonyii bobole bò saake woŋ e.

29 Bó ɛ se ɛ dīoo tasse, me ɛ n'yɛn le mwɛɛm mvù bó teyte yî ye le nu ke mbew wvu ekumɛ bonci bobole, ɛ wvú baa ge fiɛɛ fi bó eyu lo wvú kɛnɛɛ elese wvú yew ncaw e ke.

30 Wee ɛ se ɛ dīoo see ê me le Bojuu bomew nu ɛ koo ntfum keeyu wee wvun, me ɛ mum ɛ nciinse wvú fô wo le kaŋ mwaŋ. Me nu ɛ ŋgay ten ê bonyii bò teyte mwɛɛm yî ye le le bó eto eyɛn ɛ è nu wo le, esee fiɛɛ fi bô bó keŋke.”

31 Ɛ bonyii bo nci le ke mum ge ke no cee ekole wvubo to gayɛɛ, jo Baul entaŋ, ɛ bô bó gen buy Antibati.

32 Ɛ ekfuŋ ke buy yuu, ɛ bonyii bo nci le bò to lenɛ bô bikaa cinɛ Baul e can bò to lenɛ yî nyámbala le le bó egenè bô wvú fwe, mum kase tu jim fô la dibole.

33 Ɛ bó ke gen fɛse Kaysalia, mum nya ŋwa' we ê wee sa' bvuu nya ten Baul can ye le.

34 Ɛ wvú fi ŋwa' wvudvu taŋ, bife laa Baul buy ê keba ke la le le. Ɛ wvú dīoo yuw le Baul nu wee wvu Silishia,

³⁵mum gay ê wvú le, “Me nu ñke en'yeke nsaw wo seke bonyii bò ben ε bó keñke nsaw ε fese fen.” Ε wvú mum gay le bó ejo Baul egen egεε wvú ê ntow 'Elod e, eceytè wvú.

Lem 24

Ε bó jike nsaw Baul fwe dvu Fεlew

¹ Ε εdiuw ke buy εtin, ε Ananias wvù εkolε ke bocee ncese le, bô bonyii bomew bò saake woñ, noo Tetulus wvù to nu ε wvú ε looce ε yεeyi nci, bow gen Kaysalia. Ε bó mum gen yen Fεlew wvù wee sa' le, jike nsaw wvubo wvu ekume Baul fwe dvu wvú.

²Ε bó tee Baul, ε Tetulus mum kew keeteyte mwεem yî ye le, gay ê Fεlew le, “Wee wvu baay, nyεkeey nu ε no nu dvú woñ wvun e ε to ε buy yî keseen e, ε è nu nje sa' yo yî jee, ε boñkumen bò jee nu dvú nteen woñ wvun e can yo le.

³Bonyii bocii yuuke njoñ baay bvuu fiisene sa' yo mondvuum monciim sekecii.

⁴Κε me ñgomte keenjewsee kefew kuw baay κε, me nleke le wo eyεke κε caan, eyuw fiεε fi bese nu ejeme.

⁵Bese nu ε yen le wee wvun nu wee fiεε. Wvú ghane shiike mvunlaa entelen jo Bojuu yî εkolε ke nshε le kecii. Ε è bvuu nu wvú cee εkolε ñgoo yî bó teñe le yi Nasalet.

⁶⁻⁷Wvú to gomte ten keebefe bô yew ncese ε bese koo wvú.

⁸É wo biwci lo mwεem ê wee wvun, é wo eyuw ê wvú mwεem mvun mvunciim mvù bese jemyi ekume wvú.”

⁹No Tetulus jeme nonen, ε Bojuu tom, bense le mwεem mvun mvunciim nu keceey.

Ε Baul taje diuw fwe dvu Fεlew

¹⁰Ε wee sa' wε few ê Baul le wvú ejeme. Ε wvú mum jeme le, “Me ñkee le wo nu ε saw wase bonsaw woñ wvun e yî bilum e nteen. Me ε mum ε no n'yuuke njoñ keenleem ntaje diuw wem ê wo ejise.

¹¹É wo ne lo ε no biwci, é wo eyuw le εdiuw baa efey wase yuufe ncow εfaa no me nto mbenεε Jelusalem keebunle Nyo' κε.

¹²Bojuu to baa eyen ε me mbeeke mbew bee wee κε, ε bó to baa eyen ten ε me mbeysee bonyii yew ncese le kenεε yéw bunle le, kenεε bvudvuu bvumew e εlaante κε.

¹³Κε bó yaa keñke naa lo fiεε fi duñci le me nto nu ε ñge mwεem mvun mvù bó teyte yî yem e κε.

14 Me nu ε mbee fin fwe dvu wo, λε me mbunlee Nyo' bo'icee bosese mbii Je le yi bó teje λε è nu yi befe. Ε me mbeje ε è nu mwεem mvunciim mvù nu ê Nwa' bonci bo Muses e noo mvù nu ê Bojwa' bo bonyii bo ntum Nyo' le.

15 Me ntaale ke fwe yî Nyo' le læŋlæŋ no bó tæŋ taale, λε bonyii bocii bò jee bò bò befe nu ke ebuy yî kpwe le.

16 Nonen, me ε mum ε no momte ntay sekecii keencee nce wvu læŋ fwe dvu Nyo' noo bonyii, wvu λε fo fiεε enu dvú fi esaakè me fô fitele le ke.

17 È nu wase bilum nteen no me næn'yεε Jelusalem, ε me nse ηkase ε ηgen jó keenya bigew ê bonyii bem bo woŋ e, noo keeŋge ncese.

18 È nu fiεε fin fi bó se yεnεε me le yew ncese le ε me ηgee, ε me ε ηkfum wase ekole kem. Ε ke bonyii keεε diuw wvu kumεen se nu fó ke.

19 Bojuu bomew bo Esia se nu fó, ε bó be keŋke keenu fæn ejeme ê wo fiεε fi bó keŋke ekumε me, ε è fæn nu λε fiεε nu dvú.

20 È è baa nu nonen, é ban bonyii see λε fiεε fi bó se yεnεε λε me nu ε njay seke me nse nleemεε fwe dvu bonyii bò saake woŋ,

21 efey fiεε fi me nse njemyεε bò diew yi temyi ê bó λε, me nu ê bó fwe yî kefew kekie le yî nsaw e njefo me nu ε mbee λε boŋkfu nu ke ebuy yî kpwe le.”

22 No Baul jeme nonen, ε Felew yekε næn, ε è to nu wee ε wvú looci kee wase ekumε Je Tata, mum leke nsaw gay λε, “Seke Lisias wvù cee ekole bikuu bi bonyii bo nci λε ε bow ε to, ε me nse nsumtæn nsaw wene.”

23 Ε wvú mum gay λε ekole ke ηgoo mi bonyii bo nci λε ejo Baul egen elese yew, eceytè. Geenen, λε bó enya ke naa wvú bò je, ecine é nsáa ye etoo fici wvú.

Ε Felew leke nsaw Baul yî bilum e bifεε

24 Ε εdiuw ke dioo gence, ε Felew bò Dusila wvù kpwεε wvù to nu wee Juu gen tee Baul ε wvú to, ε bó no yeke fiεε fi wvú jemyi ekumε keelese fitele yî Klistu Jisos e.

25 Ε wvú ke dioo jemyi ekumε no è nulo é wee enù wee wvù jee, bò no è nulo é wee ekemsenè bò ekole kew, noo no Nyo' nu ke esaw bonyii, ε Felew yuw nonen, ε fí bemse wvú. Ε wvú mum gay ê Baul λε, “È nulo é wo egene keseen, é me ηke endioo ε ηkeŋke kefew nse mbvuu entee wo.”

26 Wvú to jeme nonen, keŋke ηkpawwεε λε sekemew é Baul ekew wen. Ε wvú ké mum no teje Baul εfonεfon ε bò wvú fele kenfe.

27 Ke nonen, ke nonen, ε bilum kum bifεε. Ε bó dioo gεε Bolsius Festus yî kentaw ke Felew e, ε Felew no gomte λε wen ege é Bojuu ekooŋke wen, mum cine Baul e yew ncaw e.

Lem 25

Ɛ Baul jo nsaw we keegen dvú fwe fô Nfon wvu Lum e

¹Ɛ è ke dioo nu ediuw eta no Festus kewee keesaake keba ke woŋ e kè Judea, Ɛ wvú ne Kaysalia ben Jelusalem.

²Ɛ bocee ncese bo baay baay bô bikuu bi Bojuu le bi woŋ e mum to yen wvú le, jike nsaw wvù bó kenke bô Baul ê wvú ejise, no lèke wvú le,

³wvú efi ke le bowen, ege é bó eciinse Baul é wvú eto Jelusalem. Ɛ bó to gee nonen, Ɛ bó Ɛ seyse wase le bó nu ke egbwe wvú ê je, eyu.

⁴Ɛ Festus tfuse ê bó le, “Baul nu yew ncaw e Kaysalia, Ɛ me kebee nu enkaase ntuu jó ediuw eyan.

⁵Bonyii bô kenke mvungay mvu sa' le bomew ebi me le Kaysalia, ejeme fiƐ fi wvú jay Ɛ è nu jó Ɛ è fen nu le fiƐ nu dvú.”

⁶Ɛ Festus ke ce bô bó gen buy ke diewe ediuw nyaŋ kenƐ yuufe le, mum kase tu jim Kaysalia. Ɛ ekfuŋ buy yuu, Ɛ wvú gen shii yew nsaw e, gay le bó eto bô Baul.

⁷No Baul fese, Ɛ Bojuu bô to nen'yee Jelusalem bow jó, mum leemen gem wvú, no teyte mwƐem yí ye le nteen Ɛ fi wƐe yaa nu ke. Geenen, Ɛ fiƐ yaa nu dvú fi bó nulo esee fi duŋci le wvú nu Ɛ ge fimew ke.

⁸Ɛ Baul taŋe diuw we gay le, “Me mbaa njay naa lo nci Bojuu, kenƐ wvu yew ncese, kenƐ wvu Nfon wvu Lum ke.”

⁹Geenen, Ɛ Festus no gomte le wen ege é Bojuu ekooŋke wen, mum bife ê Baul le, “Wo kooŋke keeben Jelusalem é me kebee ensaw nsaw wo jó yí mwƐem mvun e?”

¹⁰Ɛ Baul tfuse le, “Me nleeme wase fen ê kebee ke nsaw e, Ɛ è nu ke Nfon wvu Lum e. Ɛ è nu fen fò bó bee keesaw nsaw wem. Wo kebee kee naa ntay le me mbaa njay fiƐ bee Bojuu ke.

¹¹É è fen nu le me nu Ɛ ngoy nci, Ɛ njay fiƐ fi è nulo é bó eyu lo me, me nsaa entune keeŋkpwe ke. Geenen, é è nu le mwƐem mvù bó teyte yí yem e nu mbiay, tu ke wee nu dvú wvù nulo enya me can Bojuu ban e ke. Me nu nleke le nsaw wem egen fwe fô Nfon wvu Lum e.”

¹²Ɛ Festus yuw nonen, Ɛ bô bonyii bew bô bó to saake bonsaw tfumtfum. Ɛ wvú mum gay ê Baul le, “No wo nu Ɛ lèke wase le nsaw wo nu egen fô Nfon wvu Lum e, tu wvú nu egen fó.”

Ɛ Festus be Nfon Aglifa bô nsaw Baul

¹³Ɛ è ke no nu kefew kemew e ejim jodvu, Ɛ Nfon Aglifa bô Benis laa ghane ê Festus e Kaysalia keegay wvú le.

¹⁴Ɛ bó ke dioo nu wase jó yí ediuw e nteen, Ɛ Festus ne be Nfon bô nsaw Baul gay le, “Wee mvu nu fen wvù Felew to cin'yee yew ncaw e,

- 15 Ɛ me ηke ndioo ηgen Jelusalem, Ɛ bocee ncese bo baay baay bô bonyii bô saake wonj Bojuu jike nsaw we ê me ejise le me ηgay le wvú nu Ɛ gbwe nsaw.
- 16 Ɛ me ηgay ê bó le, ke nce bonyii bo Lum nu Ɛ bee le bó esumten le wee nu Ɛ gbwe nsaw se bó nu Ɛ nya wase je wee wvudvu Ɛ leem ê keβeη ke nsaw e fwe dvu bonyii bô bô bó keηke nsaw Ɛ taηe diuw we yî mwεem mvù bó teyte yî ye le ke.
- 17 Ɛ bó ke dioo to fen, Ɛ me ηfaηe n'yaa moocε lo ke. Ɛ ekfuη buy yuu, Ɛ me ηgen nshii yew nsaw e ηgay Ɛ bó to bô wee wvudvu.
- 18 Ɛ bonyii bô bô bó to keηke nsaw ke dioo leem we, faηe yaa duηce jay wvù me nto ηkpwaake le è nulo é bó esee yî ye le ke.
- 19 Ɛ bó kaa no jemyi Ɛ è nu mwεem mvu mbew e yî ye le ekume je yî bó bunlee Nyo' jó, noo ekume wee mvu wvú bó teηe le Jisos Ɛ wvú to kpwe wase, geenε Ɛ Baul leeme ke le wvú nu dvú.
- 20 No me nto mbaa ηkieε no è nulo é me enley ente jo mwεem mvun, Ɛ me mum mbife ê Baul laa wvú kooηke keeben Jelusalem é bó esaw nsaw we jó ekume mwεem mvun Ɛ.
- 21 Ɛ wvú tfuse le wen nu emey yew ncaw e, é ke esumten Nfon wvu Lum nsaw wen. Ɛ me mum ηgay le bó egεε wvú yew, eceytè egen ebuy no me ηke enciinse wvú ê Nfon wvu Lum.”
- 22 Ɛ Aglifa yekε nen, gay ê Festus le, “Me kebεε ηkooηke keen'yuw mwεem mvun diuw wee wvudvu le.” Ɛ Festus tfuse le, “Wo nu ebuy eyuw ntfuu.”
- 23 Ɛ ekfuη buy yuu, Ɛ Aglifa bô Benis no lene too bô bvuwee bvu baay. Ɛ bô bocee bikuu bi bonyii bo nci le noo bonyii bo baay baay bo elaante, len to ley ηgay. Ɛ Festus mum gay Ɛ bó to bô Baul.
- 24 No bó toε bô wvú, Ɛ Festus gay le, “Nfon Aglifa bô bonyii bocii bô nu fen, ben eyen wee wvun. Ê nu wee wvù Bojuu bocii too nyεeyi me jan noo Jelusalem ekume wvú, wamte, gayte le ke è nu wee wvù enu dvú ke.
- 25 Ɛ me mbaa n'yen le wvú nu Ɛ ge fieε fi bó eyu wvú ke. No wvú se lekεε wase le nsaw we egen fwe Ɛ è nu fô Nfon wvu Lum e, me Ɛ mum Ɛ n'yen le me nu enciinse wvú fô wvú le.
- 26 Geenεn, ke me n'yaa nlooci ηkee fieε fi è nulo é me ensaη fô Nfon wvù cee ekole wem e ekume wvú ke. Nonεn, me Ɛ mum Ɛ nleke wvú ê ben ejise keseen efey mvunciim ê wo Nfon Aglifa ejise, le ben etasse nsaw we, wvu le me eηkeηke fieε fi è nulo é me ensaη.
- 27 Me n'yene le fí baa nu leη le me enciinse wee ncaw fô Nfon e se me nu Ɛ nduηce fieε fi bó gayte le wvú nu Ɛ jay e ke.”

Lem 26

Ɛ Baul taje diuw fwe dvu Nfon Aglifa

- ¹ Ɛ Nfon Aglifa mum gay ê Baul le, “È nu bvudvuu bvuw keseen keejeme bô diuw wo.” Ɛ Baul mum cake kebo we, kew keetaje diuw we, gay le,
- ² “Nyaa', me n'yene le keshi kem nu ɛ jon le baay keenleem etaje diuw wem fwe dvu bó ɛben yî mwɛem mvunciim mvù Bojuu teytoy yî yem e.
- ³ Me njemyi le nen, njefo bó looci le kee nce won Bojuu noo bombew bò bó ké no kɛnke. Nonen, me ɛ no nleke le bó eyeke ke le nyekɛy eyuw fiɛ fi me nu enjeme.
- ⁴ Bojuu bocii kee nce wem ɛ kew naa ɛ me mbɛɛ lo. Bó kee no me nto ncee won wese le noo Jelusalem.
- ⁵ Ɛ bó kee naa ntay le ɛ kew lo ncejole nu ɛ me nu wee ngoo Bofalasii ɛ è nu ngoo yî looci tɛmyi yî fiɛ fi Nyo' le fele yimi yicii. Fin nu fiɛ ɛ è nu le bó koonke keejeme, é bó ebee le è nu keɛɛy.
- ⁶ Me ɛ no nleeme le fɛn keseen yî nsaw e njefo me ntaale fwe, nkeɛ nkawma wvù Nyo' to kawɛ bo'icee bosɛɛ dvú.
- ⁷ Nkawma wvun nu le wvù dikfuu disese di yuufe ncow difɛɛ cɛyte no bó bunlee Nyo' shiee le entaɲ bô ɛmvunsheɛn. Nyaa', è nu le nje nkawma wvudvu wvun wvù Bojuu kɛnke le nsaw dvú bee bó.
- ⁸ Me ɛ no mbiite ê bó noo ê bonyii bocii le laa è ge la wvù ben yene ɛ fí tɛmyi keebɛ le è nulo é Nyo' ebvuse wee yî kpwe le le?
- ⁹ Me keɛɛ nto nkpwawci naa le me nkɛnke keɛnɛ fiɛ ficii keenfiwɛɛ diee di Jisos wvu Nasalet e.
- ¹⁰ Ɛ fifin nu naa fiɛ fi me nto ngeɛ Jelusalem. Me nto nu ɛ nfi mvunɲay ê bocee ncese bo baay baay nkooɲɛ bonyii bò è nu bo Nyo' le nteen, nfen yew ncaw e. Kɛ è to mɛy ke fin ke. Bó to ké dioo nu le bó nu eyuwɲɛ bó, ɛ me ten ntom.
- ¹¹ Me nto nyaa nɲɛw ê bó ɛfonɛfon yéw bunle le yicii, nkane le bó ejemyi díɛw yî befe ɛkumɛ wee wvù Jisos. Ɛ shém ffuuke me bô bó baay, ɛ me mbone bikaa ê bó ejim, nɲɛne mbuyte bilaante bi bitum bimew e.

Ɛ Baul bvuu jeme no wvú to kumɛnɛɛ no nu wee Klistu

- ¹² Ɛ me nke mum nɛ no nɲɛne Damaskus, ɛ bocee ncese bo baay baay ɛ saɲ nwa', ɛ nya me mvunɲay.
- ¹³ Nyaa', ɛ me ndioo nɲɛne ɛ è nu le ɛmvunsheɛn entelɛn, ɛ me nɛ n'yɛn ɛ n'yuu mvu nɛ law fowe baa fele diuu, shii to yî bee bonyii bò bee bó to lenɛ le.
- ¹⁴ Ɛ bese bocii nɛ gbweken fokuse, ɛ me n'yuw ɛ díɛw bife ê me ê díɛw Ibulu le le, 'Saul, Saul, wo bone bikaa ê me ejim nen nje la? Wo gee nen, kfune ɛ è nu ye yo, díɛwɛ na' lemme fô wvú bone ye yî kɛmbaɲ ke ice le.'

15 Ɛ me mbife le, ‘È nu wo wvù yee Tata?’ Ɛ wvù tfuse le, ‘È nu me wvù Jisos, ɛ è nu me wvù wo bone bikaa ejim jodvu.

16 Ja leem we. Fiee fi ge me ɛ mbuynen fô wo le nu le me embaa wo wee wem lemme le, é wo efewci mwëem mvù wo yen eben bô mvù me mbee nke enduŋce é wo le.

17 Me nu nke enfi wo can Bojuu noo bonyii bô yaa nu ke Bojuu le, ɛ è nu bó bô me nu entum wo fô bó le.

18 Wo nu ke egen eyene ejise ebo, ebvuse bó ê ejiwɛ le, eleke bó ê n'yu le, é bó ebuy can Satan e, enu bô bo Nyo', é bó elese fitele yî yem e, é Nyo' elɛshe bibefe bibole. É bó ke emum ekeŋke kelen fô bvudvuu bvù bonyii bô wvù nu ɛ ge le è nu naa bew e.'

19 Nyaa', no fí to kooye le nonen, ɛ me mum nge ke le no wvù jemye ê me fowe.

20 Ɛ me mum n'yaw nke no nfewci Damaskus, nse nke ngen Jerusalem. Ɛ me no nghanane won wvù Judea le tfuu noo bitum e bicii bì yaa nu ke bi Bojuu le, nfewci é bó le bó ekumen mvuntelem mvubole, etu bô bo Nyo', egeè ɛ è nu mwëem mvù duŋci le bó nu ɛ kumen wase.

21 È nee le fiee fi to gee é Bojuu se koo me yew ncese le egomte keeyu.

22 Geenɛn, Nyo' ɛ se ɛ no fii me ɛ to ɛ buy eben e. Me ɛ mum ɛ no nleeme fen nfewci ten ê bonyii bo baay baay noo bo caan caan. Ɛ fiee fi me nfewci nu ke fí fi Muses bô bonyii bo ntum Nyo' le to teete le fí nu ke ekooy.

23 Bó to gayte le Mboyse wvù Nyo' to kawee keŋke keeke eyen ngew, enu wee wvu fwe keebuy yî kpwe le, eduŋce n'yu ê Bojuu noo bonyii bô yaa nu ke Bojuu."

24 No Baul to taŋyi ke diuw we gene, ɛ Festus ne kay lo wvù gay le, "Baul wo jewte wase lo. N'yeyi wo wvu baay nu ɛ ge wase wo ɛ ne ɛ no jewte lo."

25 Ɛ Baul tfuse é Festus le, "Ke me n'yaa njewte ke wee wvu baay. Fiee fi me njemyi nu keceey, ɛ me njemyi bô bvufee bwem fô.

26 Me njemyi é Nfon endan nen, njefo bó kee mwëem mvun ɛ ke mvú to kooyi é kenyle le ke, ɛ ke fimew yaa nu dvú fi bó nu se bó kee lo ke.

27 Nyaa', bó nu ɛ bee ke fiee fi Boŋwa' bo bonyii bo ntum Nyo' le jemyi le? Me nke le bó nu le ɛ bee."

28 Ɛ Nfon Aglifa bife é Baul le, "Wo kpwaake le è nulo é wo ebanke me é me entu wee Klistu ke yî kefew e caan nen e?"

29 Ɛ Baul tfuse le, "Kenɛe kí nu caan, kenɛe kí nu baay, tu bunle yem fô Nyo' le nu ke le fo emey ke wo ke. Wee tfuu wvù nu fen eben yuuke no me njemyi ebanke ten enu diewe me le, geenɛn, efufe ke ɛ è nu boncaw ban."

30 Ɛ Nfon ne ja we, ɛ wee sa' bô Benis noo bonyii bô bô bó to shilee bi.

31 Ɛ bó buy, no jemyi ebonebon le, “Wee wvun baa ge fiee fi bó eyu lo wvú kenee elese wvú yew ncaw e ke.”

32 Ɛ Nfon Aglifa gay ê Festus le, “É è be baa nu le wee wvun nu e leke wase le nsaw we egen fô Nfon wvu Lum e, tu bó be e cine wvú le.”

Lem 27

Ɛ bó ciinse Baul Lum

1 Ɛ bó ke dioo seyse le bee bo Baul eley nguw wvu ê joo egen woŋ wvù Itali le, e bó mum nya Baul bô bonyii bo ncaw e bomew can Julius wvù to nu ekole ke ngoo mi bonyii bo nci le bo Nfon wvu Lum e.

2 Ɛ bee bó ley ê nguw wvù nen'yee Adamitium e wvù to nu keegene leemene mondvuum mo ngem joo le, keba kè Esia le. Ɛ Alistakus wvù wee wvu Tesalonika, woŋ wvù Masedonia le to nu ten bee bó. Ɛ bee bó mum no gene.

3 Ɛ ekfuŋ buy yuu, e bese fese Sidon, e Julius duŋce kenkoŋen fô Baul e, cine wvú le le wvú egen fô nsáa ye le elaanthe é bó efi wvú bô fiee fi wvú shieele.

4 Ɛ bese ke kase ley ê nguw e fô, dioo egene, e fwefwe no too cile bese fwe, e bese mum no wemte wase woŋ wvù Sayblus wvu ê joo enteleŋ e, e wvú cile fwefwe.

5 Ɛ bese ke gen lente joo yi baay yì nu mbew woŋ wvù Silishia bô yì nu mbew woŋ wvù Bamfilia le, mum fese ê kelaante kè Mila le, woŋ wvù Lisia le.

6 Ɛ ekole ke ngoo bonyii bo nci le kie yen nguw wvu ê joo le jó wvù to nen'yee Aleksandia gene Itali le, mum bvuse bese, lese e è nu ê wvuwe le.

7 Ɛ bese ke ja fô, len ke wase nen wee wee yì ediuw e nteen, ke jenen lo se fese mbew kelaante kè Sinidus e. No fwefwe to baa bee le bese egen fwe teyey, e bese mum bee no wemte wase lo Klet woŋ wvu ê joo enteleŋ e, e wvú cile fwefwe, mum fey Salmoni bvudvuu e bvú ley e gen ê joo woŋ wvudvu le.

8 Ɛ bese mey ke no wemte tuu ngem joo le, ke jenen lo se gen buy bvudvuu bvù bó teŋe le Diuw Joo wvù Nyekyey e, e wvú to nu nceencee mbew kelaante kè Lasia le.

9 No bese to nu e jewse wase kefew ê je baay, e Diuu di Baay di Nlæshe Bibefe le to fey wase, e è nu wase kefew ke nffum wvù temyi le, e Baul mum nya ntefe ê bonyii bo ê nguw e le,

10 “Bo'icem, me n'yene le e kew fen e gen fwe nu e lene diseebeene nu ke ebefe, é kenla enu dvú e è yaa nu ke ke mwæem bô nguw e maan ke, bonyii nu ke ekpweken ten.”

11 Geenen, e ekole ke bonyii bo nci le faŋe yaa yuw njeme Baul e ke, yuw fiew e è nu cee ekole nguw bô cee nguw e.

12No diuw joo wvudvu to baa jee keenu fó yî kefew ke nffum wvù temyi le, ε wee nteen mum no tomte le è jee le bó egeñè fwe, momtè laa è nulo é bó efese diuw joo wvu Foniks e, wvù nu woñ wvù Klet jodvu le, efese kefew kedvu fó le. Diuw joo wvudvu wvun to taale je eweewe bvuu taale ten je ekueku jò diuu seeyi.

ε nffum tuu ηguw

13ε fwefwe wvumew ke ne no bene je ekueku nen wεε, ε bonyii bo ηguw e mum no kpwaake le bó ε keñke wase fiεε fi bó be gomte. ε bó mum baa keñ'wow ke ηguw e, mum no gene ê joo, tuu ke ηgem e ηgem e Klet jodvu.

14ε nffum wvù temyi wvù bó teje le, “Wvù je εbo eñkoñko jò diuu sane”, ke ne sεεε woñ wvudvu le, shii ê joo.

15No wvú shiile, kfun ηguw ε je fañe yaa bvuu nu dvú keegene yî dvú le ke, ε bó mum cine ηguw e, ε nffum no tuule gene dvú.

16ε bese mum no gene ke lo, gen fey ekueku jo woñ wvumvu wvu caan ê joo enteleñ ε bó teje le Kawda. ε woñ wvudvu no cile fwefwe, ε bese mum no katene keebense kekoñ ê ηguw e.

17ε bese ke bense, mum yile ηguw bô bokfuu fo wvú esawye, dioo gene no fane le ηguw nu ke egen kfun ye mbew woñ wvù Libia le yî bijiw bi monshεem e bì nu ê joo. ε bó mum shike ndvu fwefwe, cine ε ηguw no gene εwvunεwvun.

18No nffum wvudvu to temyi ke gene lo, ε ekfuñ buy yuu, ε bó mum kew no bvuuuse mwεem ê ηguw e, laañke ê joo.

19ε bvú ke bvuu buy yuu, ε bonyii bo ηguw e bvuse mwεem mvu ηguw e lañ ê joo bô can yibo.

20ε εdiuw ke fey nteen ε bese baa yen diuu le keñεε jón e ke, ε nffum kfunε ke lo ε è yaa nu wvu wεε ke, ε bese mum kiεε le fiεεε nu ε ka wase.

21No bonyii to nu ε ce wase εdiuw nteen ε bó baa die fiεε, ε Baul ne bence leem fwe gay le, “Bo'icεm, é ben se bee eyuw me le é bó emεy Klet, tu beene baa ekeñke ηgew wvun bô kenla kin nen ke.

22Geenen, me nleke le ben ekuu shém, njefo ke naa wee mvu ben e nu ela ke, è nu ela ke ηguw mεy.

23Me njemyi nen njefo Nyo' wvù keñke me, wvù me mbunlee, se nu ε tum nceendaa we entañ eben wvú ε to ε leem mbew yem e,

24ε gay ê me le, ‘Baul, fo wo efanè ke. Wo keñke keeke eleem fwe dvu Nfon wvu Lum. Taa eyen, Nyo' nu ε duñce wase keñkoñen fô wo le ε ge le ke wee mvu ηgoo bonyii bò ben ε bó nu ê ηguw e nu ke ela ke.’

25Nonen, bo'icεm, ben ekuu shém. Me nu ε nlese fitele yî Nyo' le le fiεε fi wvú jeme ê me nu ke ekooy ke lenlen no wvú jeme.

- 26 No fí nu nonen, ηguw κηηκε keeke ekfun ye yí won wvumew e ê joo enteleη.”
- 27 Ε è ke no nu εdiuw ncow εna yuufe le ε nffum bæε κε kale bô bese ê joo yi baay yi Adia le. Ε è ke no nu κε diewe entaη enteleη e, ε bonyii bô lemte ê ηguw e ne kpawwce le sekemew ε bó buyte wase mbew nshε le.
- 28 Ε bó mum few joo no yí shiiyine bô kfuu ε bó ε shηηκε fiεε yí dvú le, yen le yí nu ηκεηκεη mbaanfιεε. Ε bó gence fwe, bvuu few, yen ε yí nu wase ηκεηκεη yuufe ncow tin.
- 29 Ε bó no fane le è nelo é ηguw ekfun ye yí bimbaan e, mum shike biηwow binew ê joo ejim jo ηguw, no bunlee le εκfuη eyuu κε lo.
- 30 Ε bonyii bô lemte ê ηguw e ke ne no gomte keelewte buy ê ηguw e, mum shike kekoη ê joo, no buwsee le bó gomte keeshike biηwow bi fwe dvu ηguw ê joo.
- 31 Ε Baul gay ê εκole κε bonyii bo nci le bô bonyii bew le, “É bonyii ban mom lo ε buy ê ηguw e, naa é wee mvu ben e saa κε eluη κε.”
- 32 Ε bonyii bo nci le mum sumye bokfuu bô bó to suuyεε kekoη dvú yí ηguw e, mum cine ε kí no leyte gene.
- 33 Ε bvutfuu κε dioo sam, ε Baul lεκε bonyii bocii le bó edieken, gayte le, “Eben nu wase εdiuw yuufe ncow εna no ben nu yí nfan e, ε fiεε baa eley ê ben εmvu κε.
- 34 Me ε mum ε no nλεκε le ben edie κε fiεε, é ye yene etu fó. Κε naa yvuw miaaη nu κε ela ê wee εfa κε.”
- 35 No wvú jeme nonen, mum jo bλεed, nya keyoone ê Nyo', guse no diee ê bonyii bocii ejise.
- 36 Ε bó mum kuu shém bocii dieken.
- 37 Bese bocii bô to nu ê ηguw e to nu wee gee fεε kecow mbaηsooshwiη ncow bosooaan (276).
- 38 Ε bonyii bocii κε dieken ffuu, ε bó mum bvuse εγιη yò to nu ê ηguw e, laη ê joo keege le wvú eyaaten.

Ε ηguw sawye

- 39 Ε εκfuη κε yuu, ε ηηkpwaante yene, ε bonyii bô lemte ê ηguw e faηε yaa κιεε bvudvuu bvudvu κε. Geenεn, ε bó yen kendvuy e, ε kí ε gen ε buy yí monshεem e, mum yen le bó emom é ηguw eley egen ece yí dvú le ηgem joo le.
- 40 Ε bó mum sumye biηwow ε bí shii gen ê joo, bvuu kase fay bokfuu bô bó to suuyεε bite bì bó baηse ηguw dvú, mum bense ten ndvu fwefwe yi fwe ε fwefwe ley jó no domsee ηguw ε wvú gene ê kendvuy kedvu le.
- 41 Geenεn, ε wvú dioo gene, kfun ye yí kejiw κε monshεem e ê joo. Ε keba κε ηguw e κε fwe ley ce yí dvú le faηε yaa ebvuu eshiike κε. Ε joo mum no kfune keba κε ejim ε kí sawyi.

⁴²Ɛ bonyii bo nci le mum ne no gomte le bó eyuwye bonyii bo ncaw e bocii wvu le fo mvu bó le ke ene esam joo ebuy elewte.

⁴³Geenen, ɛ ekole ke bonyii bo nci le no gomte keeboyse Baul, mum kan le fo bó ege nonen ke, gay fiew le bonyii bò kee keesam joo eyaw esele ê joo, esam ebuy ɛɲkpwaante,

⁴⁴É kebese ke bonyii le ebii yí biwan e noo yí binsawye bi ɲguw e. Ê nee no bese to ghanee se fese ɛɲkpwaante yuleyule.

Lem 28

Ɛ bo Baul fese Malta

¹No bese to fese ɛɲkpwaante yuleyule nonen, mum yuw le bó teɲe bvudvuu bvudvu le Malta, ɛ è to nu won ê joo entelenɲ.

²Ɛ bonyii bo won wvudvu le duɲce keɲkoɲen fô bese le ɛ è yaa nu ke wee ke, fiisen bese, fwee ɲguy ɛ bese no yosene, njefo jaɲ to nu ɛ kew wase no too ɛ kenton gule.

³Ɛ Baul ke baance ɲgay, gen le wen efwee, ɛ kefe to nu ê ɲgay yidvu le, ɛ ɲguy yuwse ge ɛ kí mum buy, lum kebo kew no njeeɲkene yí dvú le.

⁴Ɛ bonyii bo won wvudvu le dioo yen no kí njeeɲkene yí kebo kew e, mum no jemyi ɛbonebon le, “Wee wvun ke nu ɛ yu wase wee. Wvú be ɛ boy ê joo, geenen lon nu ɛ koo wvú ɛ wvú nu ekpwe.”

⁵Geenen, ɛ Baul yewse ke lo kefe kedvu ɛ kí gbwe ê ɲguy e, ɛ fiie faɲe yaa ge wvú ke.

⁶Ɛ bonyii bodvu mum no ceyte, kpwaake le ye Baul nu ekew ebene, keɲee le wvú nu ene esese egbwe ekpwe. Ɛ bó ke cey nen cey ɲkuuɲ, ke dioo yen ɛ fiie baa ge wvú, ɛ bó mum kumen ɲkpawace wvubo ne wase no duu le, “Wee wvun nu nyo' mvu.”

⁷Wee sa' wvu jó to keɲke ɲee ye ke nceencee mbew fô bese to nu le. Diee di wee wvudvu le to nu Bублиus. Ɛ wvú fiisen bese, ɛ bee bó ce ɛdiuw eta ɛ wvú taale fô bese le nɲay.

⁸Ɛ fí kooy le icee Bублиus to jiime cemte bô ken'ya' noo ntoombun. Ɛ Baul mum gen fô wvú to jiime, bunle, gee can yí ye le, fe wvú.

⁹No fí to kooyee nonen, ɛ bonyii bo won wvudvu le bocii bò to keɲke bincem mum no too ɛ Baul fele ten bó.

¹⁰Ɛ bó mum no ɲyaa bese bô mwɛem nteen. Ɛ bese ke dioo nen'yi jó, ɛ bó bvuu to bô mwɛem mvunciim mvù bese to shieele gee ê ɲguw e.

Ɛ bo Baul ne Malta gen Lum

11 Ɛ bese ley ê nguɔ e no gene ɛ bó ɛ ce wase Malta woŋ wvu ê joo enteleŋ wvudvu le kee tɛ. Nguɔ wvudvu to nu wvu Aleksandia ɛ bó teŋe le Bonyo' bo Emam e, ɛ wvú to nu woŋ wvudvu le cɛyte le kefew ke nffum wvù tɛmyi le efey.

12 Ɛ bese ke gen buy diuw joo wvu ê kelaante kè Silakus e, ce jó ɛdiuw ɛta,

13 ke ne jó, gen fɛse diuw joo wvu ê kelaante kè Lɛgium e ce jó. Ɛ ɛkfuŋ buy yuu, ɛ fwefwe keɔ no bene je ɛkuɛku, ɛ bese mum no gene, ɛ è ke no nu ɛdiuw ɛfaa, ɛ bese fɛse diuw joo wvù Butioli le.

14 No bese fɛse jó, yen bonyii bo mbee le bo jó le, ɛ bó lɛkɛ le bese egen ke le é bee bó ece ɛdiuw ɛsooshwiɔ. Ɛ bee bó ke ce, ɛ bese sɛ ke gen fɛse Lum.

15 No bese to gene, ɛ bonyii bo mbee le bo Lum ke dioo yuw le bese too lo, ɛ bó buy no lenɛ too le bee bó etasɛn. Ɛ bó to naa buy fô Way wvu Abiyus e, bô fô Yéw Bonyii bo Ghane le yi Shɛ le. Ɛ Baul yen bó le, ɛ fitele fiew lætɛn, ɛ wvú nya keyoone ê Nyo'.

16 Ɛ bese ke fɛse Lum, ɛ bó cinɛ Baul e ɛ wvú no cee fiew wvú ɛmbeŋ, ɛ wee nci cɛyte wvú.

Ɛ Baul no nu wee ncaw Lum fewci diw Nyo'

17 Ɛ ɛdiuw ke feɔ ɛta, ɛ Baul tee bikuu bi Bojuu le bi jó. Ɛ bí to, ɛ wvú gay ê bí le, “Boom bo bwɛɛm e, me nu yí ncaw e nen ɛ bó to koo me Jelusalem, nya can bonyii bo Lum e ɛ me mbaa ncim njay naa lo fieɛ bô bonyii bɔsɛɛbeene kenɛɛ nce bo'iceɛ bɔsɛɛbeene mvu ke.

18 Ɛ bonyii bo Lum bodvu ke dioo tasse nsaw wɛm, faŋe yaa yen fieɛ fi è nulo é bó eyu me yí dvú le ke. Ɛ bó mum no gomte keecinɛ me le,

19 geenɛn, ɛ Bojuu ma lo. Ɛ me mum no ŋkɛŋke keenlɛkɛ le nsaw wɛm egen fwe fô Nfon wvu Lum e. Ɛ ke me nto ŋgee nonɛn, le me ŋkɛŋke fieɛ keentey yí bonyii bem e ke.

20 È neɛ fieɛ fi ge me ɛ nɛ ntee ben le beene ejeme. Me nu yí boncaw ban e nen ɛ è nu nje wee wvù beene bonyii bo Islael se cɛyte.”

21 Ɛ bonyii bodvu tfuse ê wvú le, “Bese baa kɛŋke ŋwa' wvù ja Judea ɛkume wo ke, ɛ wee mvu boom bo bwee wesebeene le bô nen'yi jó too jan baa eshomse wo kenɛɛ ejeme fieɛ fi befe ɛkume wo ke.

22 Geenɛn, ɛ bese nu ke ekoonke keeyuw wo ŋkpawwɛ. Fì bese kee nu ke le ŋgoo yin yì wo nu jó nu ɛ bonyii bemte ke lo yí mondvuum monciim.”

23 Ɛ bó mum gɛɛ diuu di bó nu ke eto é Baul ejeme ê bó. Ɛ è ke no nu ɛbvubwɛ, ɛ bonyii nteen tase fô wvú to cee, ɛ wvú keɔ fontaŋentaŋ gen buy fokieguu, nyeyte fieɛ ficii ê bó, fewci ɛkume bvunfon bvu Nyo' le. Ɛ wvú bvuu no jemyi duŋci mwɛɛm mvù nu ê Nwa' bonci bo Muses e bô ê Boŋwa' bo bonyii bo ntum Nyo' le ɛkume Jisos, momte keege é bó ebee le fieɛ fi wen jemyi nu keceɛy.

- 24 Ɛ bonyii bomew bee fiε fi wvú to jemyi le, ε bomew faηε yaa bee κε.
- 25 Ɛ bó nε bvυη εbonεbon mum no buci no Baul laη diεw le, “Fiεε fi Keyoy ke Yuule to jemyεε ê bo'iceε bonen diuw wee ntum Nyo' wvù Yesaya le nu naa keceεy.
- 26 Kí to nu ε jeme le, ‘Gene egay ê bonyii bodvu le, ben nu ke eyeke naa mwεεm ntay geenεn yaa yuuke κε, ke etaale naa mwεεm ntay geenεn yaa yεne κε.
- 27 Ɛ fi nu nonεn njefo mvuntelem mvu bonyii bodvu le nu ε mvú ε le wase. Bó nu ε jine bintuηtuη bibole, ε kfuke εjise εbo. Ɛ bó ge nonεn le fo εjise εbo eyenè mwεεm e, ε bintuηtuη bibole yuuke mwεεm, ε mvuntelem mvubole yvuwse, é bó etu jim fô me le, é me enfε bó.”
- 28 Ɛ Baul mum mεse le, “Ben ekeè le bó nu ε tum wase bonyii bô saaka wvun wvu εkumε no Nyo' boysee bonyii fô bonyii bô yaa nu κε Bojuu le, ε bó nu eyuw.”
- 29 [No wvú jeme nonεn, ε Bojuu bodvu mum nε no buci, beeke mbew yî jeme wvudvu le ε è yaa nu wvu wεε κε.]
- 30 Ɛ Baul no cee κε yew yì wvú to laake lo le yî bilum e bifεε, fiisene bonyii bocii bô to too ê wvú le.
- 31 Ɛ wvú no fewci εkumε bvunfon bvυ Nyo' le, bvuu yεεyi bonyii εkumε Tata Jisos Klistu, jemyi yaa fane κε, ε wee yaa jewsee wvú κε.

Lum

Lum 1

- 1** È nu me wvù Baul wvù waa lemme Klistu Jisos. Nyo' to nu ε tee me le me enù waa ntum Jisos, gεε le me enfewcì saaka wvù jee wvu wvuwen.
- 2** Saaka wvù jee wvun nu wvù Nyo' to kawεε bonyii dvú fele yî bonyii bew bo ntum e, no fí nu ε bó ε saη ê Nwa' we wvù yuule le.
- 3** Wvú nu ekumε Waa we wvù to joε ye wee wvu wum, ε bó boo wvú ê kfuu di Nfon Dawe le.
- 4** Tata wesebeene wvù Jisos Klistu nu ε Nyo' to duηce fele yî Keyoy ke Yuule le le è nu Waa wen wvù keηke mvuηgay no wvú to bvuseε wvú yî kpwe le.
- 5** È ge Jisos Klistu Nyo' ε se buw me le me enù waa we ntum, wvu le me eηge é bonyii bocii bò yaa nu ke Bojuu elese fitele yî ye le, eyuukè ε è nu wvú le bensee diee diew.
- 6** Ben ten nu ηgoo bonyii bò Nyo' nu ε tee wase le bó enù bonyii bo Jisos Klistu le.
- 7** Me ε no nsaηke ηwa' wvun fô ben e bocii bò nu Lum, bò nu fitele fi Nyo' le, ε wvú ε tee le bó enù bonyii bò è nu bew. Nyo' Icee wesebeene bô Tata Jisos Klistu ebuw ben bô kembonen ebvuu enya ben bô mvuntelem mvù lætene.
- ε Baul no shieele keelaa ghane ê bonyii bo Lum e**
- 8** Me ηgomte keen'yaw enya keyoone ê Nyo' wem nje ben bocii nfele yî Jisos Klistu le, njefo woη tfuu jemyi ekumε fitele fi ben nu ε lese yî ye le.
- 9** Nyo' wvù me nlemte wvú le bô fitele fiem ficii yî saaka wvù jee wvu ekumε Waa we le leeme fwe wem le me ηké no ηkumyi ben sekecii ê bunle yem e.
- 10** Me ηké ndioo mbunlee no nleke le é je nelo ε yenε, é me ento ê ben e keseen fen é Nyo' ε bee,
- 11** njefo me ηkooηke naa baay keen'yen ben e wvu le me eηgaw nnya yî Keyoy ke Yuule nu ε nya ê me beene, é yí ege é ben etemyi.
- 12** Fì nu le, é beene eyvuwsε mvuntelem mvuseεbeene, é fitele fi ben lese yî Nyo' le eyvuwsε fiem, é fiem eyvuwsε finen.
- 13** Boom bo bwεem e, me ηgomte le ben ekieε le me nu ε ηkaw wase bokaη e bokaη e le me nu ento ê ben e, ηké ηkaw ε fieε jewse ke me. ε me ηgomte le me ento wvu le me eηkeηke ηgbwele jo ben leηleη no me nu ε ηkeηke wase jo bonyii bomew bò yaa nu ke Bojuu.
- 14** Lemme din fô bonyii bocii le nu ê kendoη kem e, kenεε è nu bonyii bò nu woη wvù yuu wase le, kenεε è nu bò bæe entfun, kenεε bonyii bò keηke bvufee, kenεε bò bæe biyuη.

15 È nɛɛ fiɛɛ fi fitele bɛɛnci naa me baay keenfewcɛ saaka wvù jee ê ben tɛn bò nu Lum.

Mvunɔgay mvu saaka wvù jee wvù wvu Nyo' le

16 Ben ekeè le ke me η'wuumene fiɛɛ fi ekumɛ saaka wvù jee wvù wvu Nyo' ke. Me ηkee lo le è nu fô mvunɔgay mvu Nyo' le keeboyse wee tfuu wvù nu ε lese fitele yî ye le nu. E saaka wvun yaake gene ε è nu fô Bojuu le sɛ gene tɛn fô bonyii bò yaa nu ke Bojuu le.

17 Fì nu le saaka wvù jee wvun duŋci je yì Nyo' joo le wee nu teytey ê wvù ejise le. E fifin kew ε gen ε mɛse yî fitele fi mwɛtɛn lese yî ye le. È nu fiɛɛ fi bó nu ε saŋ le, “Wee wvu teytey nu ke ecee nje fitele fi wvù lese yî Nyo' le.”

Shém ffuuke Nyo' no bonyii buwyi mwɛɛm

18 Me njemyi nɛn njefo shém Nyo' ké no ffuuke fowe bô bonyii bò maa lo wvù buwyi mwɛɛm, ε gee dibole di befe yike kecɛɛy ke diɛw Nyo' le.

19 Yí ffuuke nonɛn njefo fiɛɛ fi bonyii nulo ekieɛ ekumɛ Nyo' yen'yi endan, njefo wvù wvù Nyo' nu ε duŋcɛ wase ê bó.

20 E kew naa lo foŋkew no Nyo' to bomɛɛ woŋ nu ε mvunɔgay mwew mvù mey lo, bô no wvù wvù Nyo' nu, nu ε bonyii ε yen wase ε bvuu ε kieɛ yî mwɛɛm mvù wvù bom e, naa no bonyii yaa cim yene wvù le ke. Nonɛn ke je bvuu nu dvù yì bó ke enɛ ewowlene duu le ke bó kee Nyo' ke.

21 Naa no bó cim kee Nyo' nonɛn, ke bó wvumte wvù diɛwɛ Nyo' le kenɛɛ nyaa keyoone ê wvù ke. Boŋkpawcɛ bobole nu ε nɛ ε tu bo ɛcici. Bikuu bibole bi biye nu ε yiŋsɛn ke ε è nu bô ejiwɛ.

22 Bó duu le bó keŋke bvufɛɛ, ε kaa ε nɛ ε tu biyuŋ.

23 Bó nu ε shɛɛ keebunlee Nyo' bvukukɛ wvù yaa nulo ekpwe ke, ε fey ε no bunlee ε è nu mvumooso mvù bó kene bô can mvù ε no fieesene bonyii bò nulo ekpweken, bô mvunyiim noo nyám yì lɛne we, bô yì sone kuse.

24 No fí nu nonɛn Nyo' ε mum ε cinɛ bó le bó ε no gee wase ε è nu mwɛɛm mvù mvuntelem mvubole shieele mvù è nu mwɛɛm mvu nnyɛn e, ε bó gee nonɛn bô ye yibo wee bô wee, mum shoose bikuu bibole.

25 Bó nu ε kumɛn kecɛɛy ke ekumɛ Nyo' ε tu mbiay, ε no bunlee bvuu lemte ε è nu mwɛɛm mvù Nyo' bom e efey keebunlee bvuu lemte ε è nu wvù wvù Bomɛɛn e. E è nu wvù wvù bó keŋke keebensee sekecii sɛ ηka. Fí enù nonɛn.

26 No bó gee nonɛn, Nyo' ε mum ε cinɛ bó le, ye ε no yvuwse bó keege mwɛɛm mvu kenshoose le. E bokɛnɛ jiime fô bokɛnɛ le, ε Nyo' to baa bom wee le wvù egeè nonɛn ke.

27 E è nu ke lɛŋlɛŋ no bolemɛ cin'yi je yì Nyo' to gee keejiime bô bokɛnɛ le, ε ye yvuwse bó keejiime ε è nu fô bolemɛ bomew e. E bolemɛ gee mwɛɛm mvu

kenshoose le bô bolemse bomew. No bó gee nonen mum joo ηgew yî bikuu bibole wvù è nu nlawma gee dibole di befe.

²⁸No bonyii bodvu baa eyene le fí nu lan keekiee Nyo', Nyo' ε mum ε cine bó le le bó ekeηke bvufee ε è nu bvú keyuη e, mum gee mwεem mvù bó yaa keηke keegee ke.

²⁹Mvuntelem mvubole ε mum ε no nu ε mvú ε yiηsen bô mwεem mvù befe jεy jεy. Bó buwyi mwεem, dewkene ejise, keηke mvuntelem mvù befe, bene bindoη bô bonyii, yuwyi bonyii, diuu bvudiuw, læle kenlεema, ηgomgome bô mwεem, kunsene mvuηkunsen,

³⁰beete bô ediee ε bonyii, bane Nyo', sεenene kenseenen, temyi bikuu, saale ye, momte kuw, temyi bikuu bô bo'icee bobole noo bobwee bobole.

³¹Bó nu biyuη yaa leeme yî diew yibole ke. Bó nyewle bô bonyii bomew, yaa camte shen fô bonyii le ke.

³²Bó gee nonen kee ke naa le Nyo' nu ε leke wase le wee wvù gee mvumvun mwεem nu ε wvú keηke keekpwe. Geenεn, bó ε no gee ke gene dvú, bvuu bensee bonyii bô gee kfuú mvumwe mwεem.

Lum 2

Nyo' nu ke esaake wee bii gee di mwεten e

¹Nonen wo wvù lomte gee di wee mvu le kenεε è nu wo wvù yeε, ekeè le ke wo ten nu se jay ke. È keè le no wo lomte gee diew nu ε wo leese ε è nu ekole kuw ηgew e, ηjefo wo wvù lomte we gee ke naa ten fieε fi wvú gee.

²Beene kee lo le, é Nyo' lan ηgew yî bonyii bô gee mvumvun mwεem e, tu wvú laaηke bii keceey e.

³Nonen wo we wvù lomte gee di bonyii bô gee kfuú mvumwe mwεem e, geenεn ε wo kebeε gee ke ten mvú, kpwaake le wo nu ke eboy can nsaw Nyo' le?

⁴Nuu le ke wo yene le Nyo' keηke fitele fi jee fô bonyii le baay, kuule shém baay, nu ten nyekeey baay ε? È keè le fitele fi jee fi Nyo' le fô wo le duηci le wo ekumen fitele fiuw.

⁵Geenεn no wo nu ε tun keekumen fitele fiuw, ε no gee ε fí temyi ke gene lo, nu ε wo biise ε è nu ηgew fô ekole kuw e, wvù nu ke enu diuu di Nyo' nu ke eduηce shém yi ffuuke seke wvú saake bonyii bocii ê je yi lan e.

⁶Nyo' nu ke elaw wee mwaan mwaan bii gee di mwεten e.

⁷Bonyii bô nu nyekeey, lemte lemme di jee, gomte ε è nu bvukuke bô n'wvum noo nshii wvù yaa kaa ke, nu ε wvú nu ke enya nshii wvù mey lo ê bó.

⁸Geenεn ε bonyii bô taale ke ε è nu bikuu bibole, tune keeyuw keceey e, gee ε è nu mwεem mvù befe, nu ε Nyo' nu ke eduηce shém yi ton'yεen bô ηgew ê bó.

- ⁹Monlum mo baay bô nsase nu ke enu fô wee tfuu wvù gee kebefe le ε kew yî Bojuu le ε gen yî bonyii bô yaa nu ke Bojuu le.
- ¹⁰Geenen, ε bvukuke bô n'wvum noo nlæten nu ke enu fô bonyii bô gee gee dî jee le ε kew yî Bojuu le ε gen yî bonyii bô yaa nu ke Bojuu le.
- ¹¹Fí nu ke enu nonen njefo ke Nyo' ké no duŋci kejey jey ke.
- ¹²Bonyii bocii bô gee kebefe se bó cim keŋke bonci bo Muses e, nu ε bó nu ke eley ke ŋgew e naa no bó yaa cim keŋke bonci ke. E bonyii bocii bô gee kebefe ε bó nu ekuse jo bonci, nu ε bó nu ke esaw bó bii bonci bodvu le.
- ¹³Fí nu nonen njefo ke Nyo' nu ke ejo wee le wvú nu teyey é wvú ejise njefo wvú yuuke fieε fi bonci jemyi ke. Wvú nu ke ejo wee le wvú nu teyey ε è nu seke mweten gee fieε fi bonci gomte.
- ¹⁴É bonyii bô yaa nu ke Bojuu bô nu se bonci ne ε no gee mwæem bô boŋkpawce bobole ε è nu mwæem mvù bonci gomte, tu bó nu wase bonci fô bikuu bibole naa no bó baa cim keŋke bonci bô Nyo' nu ε nya é Bojuu ke.
- ¹⁵Fifie duŋci le fieε fi bonci gomte nu ε Nyo' ε saŋ fô mvuntelem mvubole. E mvuntelem mvubole seje ten é bó nonen. É bó dioo gee fieε fi befe, é fitele no saake bó. É bó dioo gee fi jee, é fí no tomte bó.
- ¹⁶Mwæem mvun nu ke ekooy diuu dî Nyo' nu ke esaw boŋkpawce bô bonyii bocii keŋke é nnyile le fele yî Klistu Jisos e, no saaka wvù jee wvù me nfewci duŋci.

Bojuu saale ye bô bonci

- ¹⁷Wo wvù teje ekole kuw le wee Juu, wo gæele ekole yî bonci bo Muses e, yuuke ye le wo nu wee Nyo',
- ¹⁸ε bó ε yeeyi wase ben bô bonci ben ε kieε fieε fi Nyo' shieele, kee ten fieε fi looci jee naa ntay.
- ¹⁹Ben kee naa ntay le è nu ben bô duŋci je é binfefe, nu ten bin'yeese fô bonyii bô nu kenjiwe le,
- ²⁰ε ben nu bô teete biyuŋ, ε è nu ben bô yeeyi bonyii bô maa mwæem diewe mvunley mvu boom e njefo bonci nu ε nya wase ben bô bvufee bvucii noo keceey.
- ²¹Wo wvù yeeyi bonyii nonen, wo yeeyi ke ten kuw ekole? Wo wvù fewci le fo wee ecoŋ bvucoŋ, wo gee næε fiuw?
- ²²Wo wvù kayte le fo dwee wee keŋε kpwæe wee ejim bô wee mvu, wo nu se wo gee nonen e? Wo wvù kaci lo fieε fi ekume mvumooso, wo nu se wo coŋke mwæem yéw ncese yi mvumooso le?
- ²³Wo wvù saale ye bô bonci bo Nyo' le, ke wo yaa shoose Nyo' no wo ŋoyte bonci bodvu?

24 È nu fiεε fi bó nu ε saη le, “Bonyii bò yaa nu κε Bojuu ké no beete bò diee di Nyo' le ε è ge gee dinen ben Bojuu.”

25 Keetfuse wee yew κηηκε naa sεw, é è fen nu le wee wvudvu gee fiεε fi bonci gayte. Geenεn, é wo ηgoyte bonci, tu ntfuse yew wvù bó tfuse wo yew wvudvu nu κε diεwε wo bεε ntffuse.

26 Wee é no bεε ntffuse, gee fiεε fi leη fi bonci gomte, bó saa ejo le bó nu ε tfuse wase wvú yew, naa no wvú cim bεε ntffuse?

27 Nonεn, bonyii bò bεε ntffuse yî nyam ye le geenεn gεεle bonci nu ke ege é bó else ben Bojuu ηgew e bò κηηκε bonci bò bó to saηεε, ε ben bvuu tfuuse bonyii yew geenεn ηgoyte bonci bodvu.

28 Ben ekeè le κε wee Juu wvu leη nu wvù yen'yi ye le κε. Ε κε ntfuse yew wvu leη nu fiεε fi bó yene fí le εκfuη yî nyam ye le κε.

29 Wee Juu wvu leη nu wvu ê fitele le. Ε ntfuse yew wvu leη nu wvu ê fitele le, wvù ε seyse Keyoy ke Yuule, ε è yaa nu fiεε fi bó yene εjise κε. Wvuwε wee nu ε è ké no bensee Nyo' wvú. Κε è ké no bensee bonyii wvú κε.

Lum 3

Nyo' leeme κε yî kecεεy e

1 No fí nu nonεn, Bojuu fele bonyii bomew yî fiεε le? Ε sεw nu dvú yî ntfuse wvù bó tfuuse bonyii yew e?

2 'Εε, Bojuu fele naa bonyii bomew ê jé le nteen. Fi baay nu le Nyo' to nu ε nya diεw ye ε è nu can yibole.

3 È nulo é bó emum egay le no bonyii bomew bó le to baa eleeme yî diεw yidvu le, tu fifie nu ege é Nyo' saa ebvuu eleeme yî diεw ye le?

4 Κε è nulo é fí ekooy nonεn κε! Naa no bonyii bocii cim nu naa bo mbiay e, nu ε Nyo' leeme κε yî kecεεy e, no bó nu ε saη le, “Nyo', wo dioo jemyi, ε njeme wo no nu κε wvu leη. Ε wo ké no soo κε lo nsaw wo.”

5 Geenεn é gee disεεbeene di yaa nu κε teytey fici keεgee le gee di Nyo' le di teytey eyen'yi ntay, tu è nulo é beene egay le la? È nulo é beene egay le Nyo' baa gee leη keelaanηκε ηgew yî yese beene le? Me mbiite nen ε è nu no wee wvu wum ké no biite.

6 Κε è nulo é fí enu nonεn κε! É fí nu nonεn, é Nyo' ke eghan nεε sε saw wonη?

7 Geenεn é me mbiayte mbiay ε yí gee ε kecεεy κε Nyo' le yen'yi gene lo fwe fwe too bò mbense fô diee diεw e, é bó ebvuu esaake me le me nu wee kebefε nje la?

8 É è fen nu nonεn é bese saa egay le, “Fí jee le beene egeè bibefε wvu le mwεεm mvù jee etoò le?” Njeme wvun nu wvù bonyii beete diee disεε dvú duu le è gayte bese. Boba bonyii nu ε bó nu κε εκηηκε ηgew wvù bó κηηκε keεκηηκε.

Ƙε wee wvu teyey nu naa lo dvú ƙε

- ⁹ Beene nu jeme naa ƙε la keseen? Bese Bojuu fele bonyii bomew e? Naa fεε ghεey! Beene nu ε yen wase ƙε Bojuu noo bonyii bò yaa nu ƙε Bojuu nu can mvuṅgay mvu kebefε le.
- ¹⁰ Fifin nu no bó nu ε saṅ ƙε, “Ƙε wee wvu teyey nu dvú ƙε, naa lo mwaan.
- ¹¹ Ƙε wee nu dvú wvù ƙεṅke bvufee ƙε, ε ƙε wee nu dvú wvù gomte Nyo' ƙε.
- ¹² Bonyii bocii nu ε banke wase jim ê Nyo' le. Bó bocii nu ε tu wase mwεem mvu εcici. Ƙε wee wvù ƙεṅke fitele fi jee nu dvú ƙε, naa lo mwaan.
- ¹³ Bó nu ε yan bosew ε gεε boyε diewe jém e. Bó nu bonyii bo leme le. Njeme wvù buyte dew yibole nulo eyu wee diewe εdien ε fimbuw e.
- ¹⁴ Boncun bò njeme wvù cewcewe nu ε yiṅsen dew yibole.
- ¹⁵ Bó ké no nu cekey keeyu lo wee.
- ¹⁶ Bó ké no beete bò mwεem, too bò ṅgew mondvuum monciim mò bó gene mó le.
- ¹⁷ Ƙε bó kee lo fiεε ekumε nce wvu nyεkeey ƙε.
- ¹⁸ Ƙε bó ƙεṅke naa lo nfan wvù wvu Nyo' fô mvuntelem mvubole ƙε.”
- ¹⁹ Beene nu ε kiεε keseen ƙε fiεε fi bonci jemyi, nu ε bó jemyi ê bonyii bò nu ekuse jo bonci bodvu, wvu ƙε fo wee ke eƙεṅke naa lo fiεε fi wvù ewowlen jeme ƙε. Wee tfuu yî woṅ wvun e nu ke eleem ê Nyo' εjise etaje diuw we.
- ²⁰ Ben ekeè ƙε, ƙε wee wvu wum nu dvú wvù Nyo' nu ke ejo ƙε wvù nu teyey ê wvù εjise njefo wvù gee fiεε fi bonci gomte ƙε, njefo bonci gee ε bonyii kee lo mwεem mvù befe mvù bó gee.

Je yì Nyo' joo ƙε wee nu teyey jó

- ²¹ Geenεn, keseen nu ε Nyo' ε duṅce wase je yì wvù joo wee ƙε wvù nu teyey jó ê wvù εjise. Ε je yidvu yaa ƙεṅke fiεε keege bò bonci ƙε. Je yidvu yin nu ε Nwa' bonci bo Muses e noo Bonwa' bo bonyii bo ntum Nyo' le to tomte wase.
- ²² Je yì Nyo' joo ƙε wee nu teyey jó, nu ε yì bii fitele fi wee wvudvu lese yî Jisos Klistu le. Ε Nyo' gee fifin fô wee tfuu wvù nu ε lese fitele yî Klistu le, njefo fô Nyo' le nu ε wee mvu yaa nu jεey ƙε,
- ²³ no wee tfuu nu ε ge wase kebefε ε mum ε no nu ncejole fô bvukuke bvu Nyo' le.
- ²⁴ Geenεn, ε keseen nu ε Nyo' ε jo wase bonyii ƙε bó nu sε jay. Ε è ge mbuwma we wvù wvù to buwεε bonyii dvú diewe nnya le fele yî Klistu Jisos wvù to sumεε bonyii can ṅgew e.
- ²⁵ Nyo' to nu ε nya wvù diewe ncese le keege keman bò ελεμε kew. Ε keman kin nu fô bonyii bocii bò nu ε lese fitele yî ye le. Wvù to ge keman kin keeduṅce le wen wvù Nyo' nu wee wvu teyey, njefo wvù wvù Nyo' to kuule lo shém bò bibefe bibole bì bó to shee gee fwele.

²⁶Fifin to nu keeduŋce yî kefew ke keseen e le wen wvù Nyo' kebee nu wee wvù gee mwεem teytoy, ε ε bvuu nu wen wvù joo wee wvù nu ε lese fitele yî Jisos e le mwεten nu se jay.

²⁷No fí nu nonen, tu fiεε bee dvú fi è nelo é beene ebensee ye yî dvú le? Ke fiεε nu dvú ke! È nelo é bó ebvuu ebensee ye yî nci wvù la le? Nuu le ebensee yî mwεem mvù beene lemte le le? Naa lo shikeey! Fí leeme ε è nu yî nci wvù le beene nu ε lese fitele yî Jisos e.

²⁸È nεε no fí nu. Beene nu ε leke le Nyo' joo wee le mwεten nu se jay ε è nu nje fitele fi wvù lese yî Jisos e, ε è yaa nu nje wvù gee fiεε fi bonci gomte ke.

²⁹Nuu le Nyo' nu ke Nyo' Bojuu maan ε? Ke è nu ten Nyo' bonyii bò yaa nu ke Bojuu le? 'Eε, wvù nu ten Nyo' bonyii bò yaa nu ke Bojuu,

³⁰no Nyo' mey ke mwaan, ε è nu wvù wvù nu ke ejo bonyii bò bó nu ε tfuse yew le bó nu se jay, ε è mey ke nje fitele fi bó lese yî Klistu le ke lenlen no wvù nu ke ejo bò nu ntffuse le bó nu se jay ke ten nje fitele fi bó lese yî Klistu le.

³¹Fí fen nu le beene emwase bonci nje fitele fi beene lese yî Klistu le? Naa lo, ke è nulo é fí enù nonen ke! Fí nu le beene kenke keeleeme lo yî bonci le.

Lum 4

Abla'am nu kenfewsεn ke wee wvù Nyo' joo le wvù nu se jay e

¹È nulo é beene egay le Ablam wvù icee kfuu disεεbeene to yen le la ekume saaka wvun?

²É Nyo' fen to jo Ablam le wvù nu se jay ε è nu nje lemme di jee di wvù to gee, ke tu wvù nulo ekfune gvuw ekume fí. Geenεn, ke wvù kenke naa lo fiεε fi wvù nulo ekfune gvuw dvú ê Nyo' ejise ke,

³njefo Nwa' Nyo' gayte le, “Ablam to nu ε lese fitele yî Nyo' le, ε Nyo' mum jo wvù le wvù nu wee wvu teytoy.”

⁴Wee wvù lemte ε bó laake wvù, ké lemte é bó elaw wvù, bó saa ejo le nlawma we nu ke lo nnya ε bó ε nya ê wvù ke. E bó jo le è nu nlawma wvù wvù kenke keekenke.

⁵Geenεn, é wee nu se wvù ε lem fiεε, ε lese ε è nu fitele yî Nyo' wvù joo bonyii bò befe le bó nu se jay ê wvù ejise, tu Nyo' nu ejo mwεten le wvù nu teytoy ê wvù ejise nje fitele fi wvù lese yî ye le.

⁶Dawe ten to nu ε jeme le njon wvu baay nu wvu bonyii bò Nyo' joo le bó nu teytoy ê wvù ejise ε è yaa nu nje lemme di bó nu ε lem ke.

⁷Wvù to nu ε jeme le, “Njon wvu baay nu fô bonyii bò Nyo' nu ε læshe wase bojay bobole, ε banye bibefe bibole.

⁸E njon wvu baay nu fô wee wvù Nyo' yaa bee ngoyte fite fi kebefe kew e ke.”

⁹No fí nu nonen, tu njonj wvu baay wvun nu ke fô bonyii bò bó nu ε tfuse bó yew maaj e? Nuu le wvú nu ten fô bò bæε ntffuse le le? Beene be ε gay wase le, “Fitele fi Ablam to leseε yí Nyo' le to nu ε ge ε Nyo' jo wvú le wvú nu wee wvu teytesy.”

¹⁰Nyo' to jo Ablam le wvú nu wee wvu teytesy ε è nu seke la? È to nu ε bó ε tfuse wase wvú yew, nuu ε wvú bæε ntffuse le? È to nu ε wvú bæε ntffuse. Ke bó to baa tfuse wase wvú yew ke.

¹¹Bó to tfuse wvú yew diewe nciise le keedunçe le wvú nu wase wee wvu teytesy nje fitele fi wvú to leseε yí Nyo' le seke wvú to bæε ntffuse. Nonen Ablam ε mum ε no nu icee bonyii bocii bò nu ε lese fitele yí Nyo' le ε bó baa tfuse bó yew ke, wvu le Nyo' ejo ten bó le bó nu bonyii bo teytesy ê wvú ejise.

¹²ε wvú nu ten icee bonyii bò bó nu ε tfuse wase bó yew, ε è yaa nu ke nje bó nu ε tfuse bó yew ke. È nu nje bó nu ε jo ekale kew yí fitele fi wvú to leseε yí Nyo' le ε bó se ke tfuse wvú yew.

Ablam to kenke fiεε fi Nyo' kawεε ε è nu nje fitele fi wvú to leseε yí Nyo' le

¹³ηkawma wvú Nyo' to kawεε Ablam le wvú bò boom bew nu ke eyow ekole ke nshε le to baa nu nje Ablam to gεεle bonci ke. È to nu nje fitele fi wvú to leseε yí Nyo' le, ε Nyo' jo wvú le wvú nu teytesy ê wvú ejise.

¹⁴É è to nu le bonyii bò nu ke ekenke fiεε fi Nyo' to kawεε nu ke bonyii bò gee no bonci gomte, ke tu fitele fi bó leese yí Nyo' le yaa kenke sew ke, ε ηkawma wvú Nyo' kawεε wvudvu nu ten εcici.

¹⁵Fiεε fi nu, nu le bonci ké no gee ke ε shém ffuuke lo Nyo', njefo é nci baa enu, fiεε fimew saa enu le wee nu ε ηgoy nci ke.

¹⁶Fí ε mum ε no nu le, ηkawma wvudvu bii ε è nu fitele fi wvú leseε yí Nyo' le wvu le é enu mbuwma ε wvú ε to fô wvú le, ε fiεε fi wvú kawεε fidvu kenke keekooy fô kfuu diew e dicii, ε è yaa nu ke fô bonyii bò leeme yí bonci le maaj ke. È nu ten fô bonyii bò nu ε lese fitele yí Nyo' le lenlen no Ablam to leseε, njefo Ablam nu icee wesebeene bocii bò nu bonyii bo Nyo' le.

¹⁷Fifin nu no bó nu ε saη ε Nyo' gayte ê Ablam le, “Me nu ε ηge le wo enù icee bitum nteen.” Wvú nu icee wesebeene ê Nyo' ejise. È nu Nyo' wvú Ablam to leseε fitele yí ye le. ε è nu wvú wvú gee ε bonyii bò nu ε kpweken wase kaase tuu dvú. ε è bvuu nu wvú wvú gee ε mwεem mvù ke baa nu wase dvú se nu dvú.

¹⁸Ablam to nu ε no taale ke fwe kee le wen nu ke ekenke fiεε fi Nyo' kawεε naa no wvú to nu wase ε è yaa nulo é wvú ebvuu etaale fwe yí fiεε le ke. Geenεn, ε wvú lese ke fitele yí Nyo' le ke ghan no nu, “Icee bitum nteen”, ke no Nyo' to kawεε ê wvú le, “Boom buw nu ke elone lo.”

¹⁹È to nu ε Ablam gene wase bilum gbwee, geenεn ε wvú faηε yaa ewεε yí fitele fi wvú to leseε yí Nyo' le ke, naa no wvú to yene ekole kew e le wen nu wase

diewe wee wvù nu ε kpwe wase le, yene ten le kpwee wvù Sela nu kase ε tee diew ε le wase.

²⁰Wvù to baa ekew ekeṅke kemaṅen wvu le wvù ene ekeṅke mvuntelem mvunfεem ekume ṅkawma wvù Nyo' kawεε wvù dvú ke. Fitele fi wvù to leseε yî Nyo' le to nu ε teme gen lo fwe, ε wvù no tumte ke ε è nu moṅkum mo Nyo' le.

²¹Wvù to nu ε mum bee naa bô fitele fiew ficii le Nyo' keṅke mvuṅgay keege fiεε fi wvù to kawεε.

²²È neε fiεε fi fitele fi wvù to leseε yî Nyo' le to nu ε ge ε Nyo' jo le wvù nu wee wvu teytey ê wvù ejise.

²³Geenen, njeme wvu le, “Nyo' to nu ε jo wvù nonen,” nu ε bó yaa saṅ ke ε è nu fô Ablam e maṅ ke.

²⁴Wvù nu ten fô beene le. Nyo' wvù beene lese fitele yî ye le nu ke ejo ten beene nonen. È nu wvù wvù to bvuseε Jisos wvù Tata wesebeene yî kpwe le.

²⁵Jisos nu wvù bó to nyae ε wvù kpwe nje bibefe bisεεbeene. E Nyo' kase bvuse wvù yî kpwe le wvu le wen ejo le beene nu se jay.

Lum 5

Bvujonke bvù beene keṅke njefo Nyo' nu ε jo wase beene le beene nu se jay

¹Keseen no Nyo' nu ε jo wase beene le beene nu se jay nje fitele fi beene lese yî ye le, beene ε mum ε no nu yî nyekeey e beene ε bó nje fiεε fi Tata wesebeene wvù Jisos Klistu ge.

²È ge wvù beene ε se keṅke je keeley mbuwma wvù beene nu yî dvú le gesehen nje fitele fi beene lese yî ye le. Beene ε no lanlanye no beene taale fwe kee le beene nu ke ekeṅke fô bvukuke bvù Nyo' le.

³E ke è mey ke nonen ke, beene lanlanye ten yî boṅgew bô beene yene le, njefo beene kee lo le boṅgew gee ε wee no kee keekuu shém.

⁴E shém yî kuulεen gee ε Nyo' bensee wee le wvù nu ε kocen. É Nyo' dioo bensee wee le wvù nu ε kocen, é wvù no taale ke wase ε è nu fwe yî fiεε le, kee le wen nu ke ekeṅke.

⁵E fiεε fi beene taale fwe yî dvú le yaa nulo ke eyuu efey kuse ke, njefo Nyo' nu ε yiṅsen mvuntelem mvuseεbeene bô keṅkoṅen kew fele yî Keyoy ke Yuule kè wvù nu ε nya ê beene le.

⁶Fì nu le seke beene to beε se beene nulo efi bikuu bisεεbeene, ε Klistu to ε è nu kefew ke leṅ e, kpwe nje yese beene bonyii bô maa Nyo'.

⁷È nu kecεy le fí temyi fô wee le keekpwe nje wee mvu wvù nu se jay, ε è nu ke naa lo é wee mvu emom keekpwe nje wee mvu wvù jee.

⁸ Geenen, Nyo' to dunji kenkonjen kew fô beene le ê je yî le, è to nu seke beene to bæe bonyii bô befe, ε Klistu kpwe nje yese beene.

⁹ Keseen no beene nu ε ελεμε kew ε ge wase Nyo' ε jo beene le beene nu se jay, tu wvú nu ke egen fwe eboyse beene can shém yî ffuuke Nyo' bô bonyii le.

¹⁰ Fì nu le, é è to nu seke beene to bæe bonyii bo bvuban e bo Nyo' le, ε kpwe Waa we mance mwεem beene ε bo Nyo', tu wvú nu egen fwe keseen eboyse beene bô nshii we no wvú nu ε mance wase mwεem beene ε bo Nyo'.

¹¹ Kε è mεy ke fifin maan fi beene lanlaje nje fí ke. Beene lanlaje ten beene ε bo Nyo' nje Tata wesebeene wvù Jisos Klistu wvù nu ε mance mwεem beene ε bo Nyo'.

Fieε fi Adam to toε dvú noo fi Klistu to toε dvú

¹² No kebefε to feyεε yî wee mwaan e se to yî nshε le, ε kpwe fey yî kebefε le se to, kpwe ε mum ε lam ke nonen ε gen yî wee tfuu le, njefo wee tfuu nu ε ge kebefε.

¹³ Kebefε to nu naa wase dvú yî nshε le ε Nyo' se ke nya bonci. Geenen é bonci nu se bó nu dvú, bó saa enjoyte fite fi bibefε bì bonyii gee le ke.

¹⁴ Ε kew yî kefew ke Adam e ε to ε buy yî ke Muses e nu ε kpwe to kenke mvunḡay ê we jo bonyii bocii naa noo bô to gee bibefε ε bó yaa gee ke diewe Adam wvù to ḡoyεε ε è nu nci ke. Adam to nu ê je mi le diewe Klistu wvù to nu keeke eto le.

¹⁵ Geenen ke nnya Nyo' yî wvú nya ê bonyii ecici nu diewe kebefε kè Adam to gee ke. É bonyii nteen to nu ε kpweken nje kebefε ke wee mwaan e, tu è nu keceey le mbuwma Nyo' noo nnya ye yî to toε nje fitele fi jee fi wee mwaan e wvù è nu Jisos Klistu, nu ke eto fô bonyii le nteen eduu efesen lo.

¹⁶ Kε fieε fi nnya Nyo' yin yî Nyo' to nyaε ecici to dvú nu lenlen diewe fieε fi kebefε ke wee mwaan wε le nu ε to dvú ke. Kebefε ke wee mwaan e nu ε to bô nsaw fô bonyii le bocii ε lese bó ḡgew e. Geenen nnya Nyo' yin yî to toε ejim jo bibefε bi bonyii le nteen nu ε ge Nyo' ε jo bó le bó nu se jay.

¹⁷ É kebefε ke wee mwaan e to nu ε ge ε kpwe no kenke mvunḡay ê we jo wee tfuu nje wee mwaan wvudvu, tu bonyii bô nu ε fiisen mbuwma wvu baay wvun, noo nnya yî è nu njo wvù Nyo' nu ε jo bonyii ecici le bó nu teyey, nu ke ekenke nshii naa baay nje wee mwaan wvù è nu Jisos Klistu.

¹⁸ Nonen, no kebefε ke wee mwaan e to nu ε to bô ḡgew fô bonyii bocii le, nu ke lenlen no gee di wee mwaan e di teyey nu ε ge Nyo' ε jo bonyii le bó nu se jay, ε bó bocii nu ke ekenke nshii.

¹⁹ Fì nu le ke no wee mwaan to nu ε teme ekole bô Nyo' ε fifin ge ε bonyii nteen mum no nu wase bonyii bô befe, nu ke no wee mwaan to nu ε yuw Nyo' le ε fí ge ε Nyo' nu ke ejo bonyii nteen le bó nu teyey ê wvú ejise.

²⁰ Nyo' to nya bonci keege le è nelo é bibefe eduule. Geenen no bibefe duule nu no shen Nyo' yì è nu mbuwma fô bonyii le duule ten fesene lo.

²¹ E fí nu nonen wvu le, no kebefe kenke mvungay ê bonyii we ε bó kpwee, nu ke ten no mbuwma Nyo' kenke mvungay ê bonyii we fele yí njo wvù Nyo' joo bonyii le bó nu teyete yê wvù ejise le keeke enya bó bô nshii wvù mey lo nje Jisos Klistu wvù Tata wesebeene.

Lum 6

Wee wvù nu ε taashe wase bô Klistu nu ε kpwe wase fô kebefe le

¹ No fí nu nonen, è nulo é beene egay le la? È fen nu le beene emey egee bibefe gene dvú fwe fwe wvu le shen Nyo' yì è nu mbuwma fô bonyii le eduule ten fesene lo?

² Ke è nulo é fí enù nonen ke! È nulo é beene bô nu ε kpwe wase fô kebefe le ebvuu eghan nœ le se ebvuu ecee yí kebefe le?

³ Ke ben kee le beene bocii bô bó nu ε lese wase ê joo ε taashe bô Klistu Jisos nu ε bó lese nonen ε taashe beene ε è nu bô kpwe ye le?

⁴ Bó to lese beene ê joo nonen ε fí mum no nu le bó nu ε taashe wase beene ε bó yí kpwe ye le ε dwey, wvu le no Klistu to kaseε buy yí kpwe le yí mvungay mvu Ice le mvù kuuke, nu ε beene nelo emum ecee wase ε è nu yí nshii wvu fwe le.

⁵ Fí nu nonen njefo é beene nu ε bó ε taashe wase beene ε bo Klistu yí kpwe yì è nu ye le, tu ke è nu kemañen le beene nu ke etaashe ten beene ε bó yí mbuy wvu yí kpwe le wvù è nu we le ke.

⁶ Beene kee le ye yesebeene yì è nu nce wvu yvum nu ε bó to ta wase yí kentam e beene ε bo Klistu, wvu le bó efiwse lo ye yidvu yì è nu yi kebefe, le è nelo é beene saa ebvuu enu bonfaw can kebefe le ke,

⁷ njefo wee ke kpwee tu wvù nu ε buy wase can kebefe le.

⁸ No beene nu ε kpwe wase beene ε bo Klistu, tu beene nu ε bee le beene nu ke ecee ten beene ε bó,

⁹ njefo beene kee lo le no Nyo' to bvuseε Klistu yí kpwe le, nu ε ke Klistu nelo ke ebvuu ekpwe ke. Ke kpwe bvuu kenke mvungay ê wvù we ke.

¹⁰ Kpwe yì wvù to kpweε nu ε wvù to kpwe fô bibefe le kañ mwaañ ε fí ka lo nonen. E nshii wvù wvù kenke keseen nu ε wvù nu wase ε è nu fô Nyo' le.

¹¹ Nonen ben ten kenke keeyen fô bikuu binen e le ben nu ε kpwe wase fô bibefe le, ε no cee wase keseen bii ε è nu no Nyo' gomte, no ben nu ε taashe ben ε bo Klistu Jisos.

¹² Nonen fo ben ebvuu ebee é kebefe ekenke mvungay ê we jo kencaa kenen ke ye le gee ε ben yuuke ε è nu fiεε fi ελεμε kenen gomte le ben egeè le ke.

13 Fo ben ebvuu ecine é kebefɛ ejoo biba binen bi ye le diewe mwɛɛm mwew mvu lemme le gee mwɛɛm mvù befe dvú kɛ. Ben enya bikuu binen ɛ è nu ê Nyo' diewe bonyii bò bó nu ɛ bvuse wase bó yî kpwe le ɛ nya bó bô nshii. Ben enya ten biba binen bi ye le ê Nyo' diewe mwɛɛm mwew mvu lemme le keege mwɛɛm mvu teyey dvú.

14 Kɛ kebefɛ bvuu kɛɲke keekɛɲke mvuɲgay ê ben we kɛ, njefo kɛ ben nu ê bonci kuse kɛ. Ben nu wase ɛ è nu ê mbuwma Nyo' kuse.

Wee wvù nu ɛ taashɛ bô Klistu nu wase nfwa nce wvu teyey

15 No fí nu nonɛn, è nulo é beene egay le la? Beene fɛn emum egeè bibefɛ njefo beene nu ekuse jo mbuwma Nyo', yaa nu kɛ ɛ è nu ê bonci kuse? Naa lo!

16 Kɛ ben kee le é wee jo ekolɛ kew ɛ nya ê wee mvu keeyuuke wvù le diewe nfwa le, tu wvù nu enu kɛ wase nfwa wee wvudvu wvù wvù yuuke wvù le le? É wee nya ekolɛ ɛ è nu ê kebefɛ, tu wvù nu nfwa kebefɛ. Ɛ kí nu ke eto ɛ è nu bô kpwe. Wee é nya ekolɛ kew keeyuuke Nyo' le, tu wvù nu enu nfwa ɛ è nu wvu Nyo'. Ɛ fí nu ke ege é wvù ekɛɲke nce wvu teyey.

17 Geenɛn keyoone ke Nyo' le le no ben to shee nu bonfaw bo kebefɛ le, nu ɛ keseen nu ɛ ben ɛ bee wase bô mvuntelem mvunen mvunciim fiɛɛ fí n'yɛɛyi wvù bó to nyaɛ ê ben duɲci le,

18 ben ɛ mum ɛ no nu ɛ bó ɛ bvuse wase ben can kebefɛ le, ben ɛ tu wase bonfaw ɛ è nu bo nce wvu teyey e.

19 Me njemyi fin diewe wee wvu wum e, njefo kɛ ben diewe bonyii bo boyuum e nulo ekieɛ mwɛɛm egen ebuy kelen kemew e kɛ. Ben ekeè le è to nu fwele ɛ ben nya biba binen bi ye le ê mwɛɛm mvu nnyɛn e bô bibefɛ bí le bí le diewe bonfaw e. Ben emum enyaà wase biba binen bi ye le keseen ɛ è nu ê mwɛɛm mvu teyey keenu bonyii bò yuule.

20 Seke ben to nu bonfaw bo kebefɛ le, kɛ nce wvu teyey to kɛɲke fiɛɛ keege bô ben kɛ.

21 No ben to nu nonɛn, sɛw wvù ben to kɛɲkɛɛ fô mwɛɛm mvun e mvù ben nu wase keseen wuumene lo yî mvù le nu la? Mwɛɛm mvudvu mvunciim mɛɛse kɛ ɛ è nu bô kpwe.

22 Geenɛn keseen no bó nu ɛ bvuse wase ben can kebefɛ le ben ɛ tu wase bonfaw ɛ è nu bo Nyo' le, nu ɛ sɛw wvudvu nu le ben tuu wase bonyii bò yuule, ɛ kemɛse kedvu nu ke enu nshii wvù mɛy lo.

23 Ben ekeè le nlawma kebefɛ nu kpwe, geenɛn ɛ nshii wvù mɛy lo nu nnya yi Nyo' nyaɛ ecici ê bonyii bò nu ɛ taashɛ bô bo Klistu Jisos wvù Tata wesebeene.

Lum 7

Nci ké no kɛɲke mvuɲgay ê wee we kɛ seke mwɛɛn bæɛ dvú

- ¹ Boom bo bwæm e, me ngomte keenjeme fin ê ben diewe bonyii bò kee nci le. Ke ben kee le nci ké no kenke mvungay ê wee we ke seke mweten bæe dvú?
- ² Beene ejo kenfewsen yî kentaashe ke kpwoon bô diemsen e. Nci ké no suule kpwoon yî dweese le ke seke dweese bæe dvú. Geenèn é dweese nelo ε kpwe, tu wvú nu ε buy wase ekuse jo nci wvù suule wvú bô dweese.
- ³ Nonen é wvú ne ε gen ê diemsen mvu le ε dweese bæe dvú, é bó etee wvú le kpwoon nsake. Geenèn é dweese nelo ε kpwe, tu wvú nu ε buy wase ê nci wvudvu kuse. É wvú gen lo ε taashe ε no nu bô diemsen mvu, wvú saa enu kpwoon nsake ke.
- ⁴ È nu ke lexlex boom bo bwæm e no ben nu ε kpwe wase fô bonci le fele yî ye Klistu yì bó to tæ yî kentam e. Ben nu ε kpwe nonen wvu le ben enù wase bonyii bo wee mvu le jæy. E wee wvudvu wvun nu wvù bó to bvuseε yî kpwe le, wvu le beene ecee wase gee ε è nu mwæm mvù jee fô Nyo' le.
- ⁵ Seke beene to bæe cee bii no nyam ye yesebeene gomte, bonci to ké no kamsee ye yesebeene yì fuu gee ε biba bisæbeene bi ye le lemte mwæm mvù too ε è nu bô kpwe fô beene le.
- ⁶ Geenèn, keseen nu ε beene ε buy wase ekuse jo bonci ε kpwe fô bonci bodvu le bò to nu ε jicε beene le diewe bonyii bo ncaw e. Beene nu ε buy wvu le beene elemte ente jo nshii wvu fwe wvù è nu wvu Keyoy ke Yuule, ε è yaa bvuu nu ê je yi yvum yì bonci bò bó sañεε le ke.

Nci gee ε beene kee mwæm mvù befe

- ⁷ È nulo é beene egay le la? È fen nu le nci nu fiεε fi befe? Ke è nu nonen ke! É è to baa nu nje bonci, tu ke me mbe ηkee fiεε fi befe ke. É nci to baa gay le, “Fo wee edewkenè ejise yî fiεε fi wee mvu le”, tu me mbaa ηkee le keedewkene ejise nu fiεε fi befe ke.
- ⁸ Geenèn kebefε ε mum ε bæe ekuse jo nci wvun ε shiw ejise yò dewkene yî yem e jé le jé le. É nci be baa nu, kebefε saa ekεke mvungay ke.
- ⁹ Me nto nshee ncee ηgee no me ngomte ε me mbaa ηkee wase bonci ke. Geenèn, ε me ke ndioo enkiεε bonci, ε kebefε mum ηaay, ε me mum kpwe.
- ¹⁰ Bonci bodvu keβεε bò fí to nu le bó nu ke eto bô nshii, nu ε kaa ε to ε è nu bô kpwe fô me le.
- ¹¹ Fì nu le kebefε to nu ε mum kenke je yî bonci ban e, læε me, bæe ekuse jodvu yu me.
- ¹² Nonen bonci nu fiεε fi yuule, ε fiεε fi bonci gayte nu fiεε fi yuule, nu teyey bvuu jee.
- ¹³ Fí fen nu le fiεε fi jee to nu ε kaa to ε è nu bô kpwe fô me le? Naa ke è nu nonen ke! È to nu kebefε kè to bækeε ekuse jo fiεε fi jee fin keeto bô kpwe fô me le, wvu

le beene eyen le kebefε nu kebefε, ε fí duŋci ε è nu yî fiεε fi bonci gayte le le kebefε looci naa befe baay.

Bvudiuw bvuyî wee le

14 Beene kee le bonci nu fiεε ε fí nε fô Nyo' le. Geenεn ε me nu fiem wee wvu wum ηkenke nyam ye, ε bó gese me diewe nƿwa le ê kebefε.

15 Ke me ηgee fiεε no ηkee fiεε fi me ηgee ke, njefo ke fiεε fi me ηgomte keenje nu fí fi me ηgee ke. Me ηkaa nen'yi ηge fiεε ε è nu ke naa fí fi me mbane.

16 No me nen'yi no ηgee fiεε ε è nu ke fí fi me n'yaa ηgomte ke, tu me nu ε mbee keceey le nci nu fiεε fi jee.

17 No fí nu nonεn, tu è nu keceey le ke è bvuu gee me fiεε fidvu ke. È gee wase kebefε kè nu yî yem e.

18 Me ηkee naa lo le ke fiεε fi jee nu yî yem e ke. Fì nu le ke fiεε fi jee nu yî εleme kem e ke. Me nen'yi no ηkenke shiee keenje fiεε fi leŋ, geenεn ε me n'yaa nulo enge ke.

19 Ke fiεε fi jee fi me ηgomte keenje nu fí fi me ηgee ke. Fiεε fi befe fi me n'yaa ηgomte keenje ke, nu fí fi me ηkaa ηgee.

20 No me nen'yi no ηgee fiεε ε è nu fí fi me n'yaa ηgomte ke, tu ke è bvuu nu me wvù gee fiεε fidvu ke. È gee wase kebefε kè nu yî yem e.

21 No fí nu nonεn, me ε mum ε n'yen le è nu wase lo nci le seke me ηgomte keenje fiεε fi jee, ε fi cekey keege no nu ke fi befe.

22 Ê fitele fiem e nu ε me n'yuuke njoŋ bô nci Nyo' baay.

23 Geenεn ε me nen'yi n'yene wvumvu nci le ε wvù nu yî yem e. E wvuwe tumte jem bô nci wvù keŋke ηkpawce wem, gee ε me ntuu nƿwa wvuwe nci wvu kebefε wvù nu yî yem e.

24 Fiŋkfusay fi fiεε le ke diewe me! È nu ebvuse yee me yî nyam ye yin yì too bô kpwe le?

25 Keyoone ke Nyo' le wvù nulo efi me fele yî Jisos Klistu wvù Tata wesebeene le! No fí nu nonεn me ε mum ε no nu wase keseen nƿwa bonci bo Nyo' le ê ηkpawce wem e. Geenεn nu nƿwa bonci bo kebefε le yî nyam ye le.

Lum 8

Keecee bii no Keyoy ke Yuule gomte

1 Fí ε mum ε no nu le, keseen nu ε ke wee wvù nu ε taashe wase bô Klistu Jisos bæε ke ebvuu eley ηgew e ke.

- ² Kε wvú bεε ke ebvuu eley njefo nci Keyoy ke Yuule kè nyaa nshii ê bonyii bò nu ε taashe wase bô bo Klistu Jisos, nu ε bvuse wase beene can nci wvù è nu wvu kebefε bô kpwe le.
- ³ Nyo' nu ε ge wase fiεε fi nci to baa kenke mvungay keege ke. Nci to baa kenke mvungay ε è ge kewεεyε ke nyam ye wee wvu wum e. Fiεε fi Nyo' ge nu le wvú to nu ε ciinse Wan wvu we ε wvú to diewe wee wvu wum wvù gee bibefε le keengoy kebefε. E Nyo' mum ngoy mvungay mvu kebefε le bô ye Waa we.
- ⁴ Wvú to ge nonen wvu le mwεem mvu len mvù nci gomte enù ε bó ε ge wase fô beene bò cee bii no Keyoy ke Yuule gomte le, ε è yaa bvuu nu no nyam ye gomte ke.
- ⁵ Bonyii bò cee bii no nyam ye gomte nu ε bó ké no lewse bvufee ε è nu yî mwεem mvù nyam ye gomte le, ε bò cee bii no Keyoy ke Yuule gomte ké no lewse bvubole bvufee ε è nu yî mwεem mvù Keyoy ke Yuule gomte le.
- ⁶ É wee leke bvufee ε è nu yî nyam ye le, tu wvú nu ke ekpwe. Geenε é wee leke bvufee yî Keyoy ke Yuule le, tu wvú nu ke ekenke nshii noo nyεkeey.
- ⁷ No fí nu nonen wee wvù leke bvufee ε è nu yî mwεem mvù nyam ye gomte le ké no bane Nyo'. Kε wvuwe wee ké no yuuke nci Nyo' le ke. E è nu kecεεy le ke è nulo é wvú eyuuke ke.
- ⁸ E ke è nulo é wee wvù cee no nyam ye gomte egee fiεε fi Nyo' eyuuke njon ke.
- ⁹ Geenε ke ben nu finen bonyii bò cee bii no nyam ye gomte ke. Ben bii ε è nu no Keyoy gomte, é è fen nu le Keyoy ke Nyo' le cee yî yene le. É wee nu dvú wvù baa kenke Keyoy ke Klistu le, tu ke wvú nu wee Klistu ke.
- ¹⁰ É Klistu fen nu yî yene le, naa no ye yene nu ke ekpwe nje kebefε, tu Keyoy ke Nyo' le nu enyaa nshii ê ben njefo Nyo' nu ε ge wase ben ε no nu teytoy ê wvù ejise.
- ¹¹ É Keyoy ke wvú wvù to bvuseε Jisos yî kpwe le cee yî yene le, tu wvú wvuwe wvù to bvuseε Klistu Jisos yî kpwe le nu ke enya ten nshii ê ye yene yì nu ke ekpwe le. Wvú nu ke enya fele yî Keyoy kew kedvu kè cee yî yene le.
- ¹² Nonen boom bo bwεem e, beene kenke fiεε keege, ε fiεε fin yaa nu keecee bii no nyam ye yesebeene gomte ke.
- ¹³ É ben cee bii no nyam ye gomte, tu ben nu ke ekpweken. Geenε é ben cine Keyoy ke Yuule ε lese gee di befe di nyam ye gomte, tu ben nu ke ekenke nshii.
- ¹⁴ Bonyii bocii bò cee bii no Keyoy ke Nyo' le duñci nu boom bo Nyo' le.
- ¹⁵ Nyo' to baa enya ε è nu keyoy ke bvunfaw e kè nu ege é ben ekaase ecee yî nfan e ke. Wvú to nya Keyoy ê ben ε è nu kè gee ε ben nu boom bew. E kí mum gee ε beene teje wvú le, “Abba, Icee wese.”

16 Keyoy kedvu kin kebee bô keyoy keseebeene leeme tomte le beene nu boom bo Nyo' le.

17 É beene fen nu wase boom bo Nyo' le, tu beene nu ke edie bvushew, bvushew bvù è nu bvù Nyo' le. Beene ε bo Klistu nu ke etaashε edie bvù é beene fen yene ηgew no Klistu to yeneε wvu le beene ten ke ekeηke bvukuke beene ε bó.

Bvujonke bvù è nu ke enu bvù boom bo Nyo' le

18 Me ηkee naa ntay le ke ηgew wvù beene yene keseen nu ε wvù ε buy naa lo wvù bó efewsene bô bvujonke bvù è nu ke enu bvuseεbeene ke.

19 Mwεem mvunciim mvù Nyo' to bomεε cεyte naa lo shiee le kefew kè Nyo' nu ke eduηce boom bò è nu naa bew.

20 Fí nu le mwεem mvù Nyo' bomεε to nu ε ne tu mwεem mvu εcici. Ke mvù to tu mvu εcici le mvù koonke lo nonen ke. È to koη Nyo' wvù to gee le mvù enu nonen. Geenεn ε bó taale ke fwe kee le,

21 diuu dimew nu ke enu é Nyo' ebvuse mvù é mvù eboy yí ncaw wvù nu le mvù mvunciim keηke keeke efo le. E wvù nu ke edioo ε bvuse nonen, é mvù ekeηke wase ε è nu bvujonke bvù boom bo Nyo' le.

22 Beene kee le mwεem mvunciim mvù Nyo' bomεε cone bô monlum diewe kpwoon lume le ε kew lo ε to ε buy keseen e.

23 Ke è mey ke mwεem mvù Nyo' bomεε maan mvù nu yí monlum e ke. Beene bò keηke sâ' Keyoy ke Yuule kè Nyo' nu ε nya ê beene cone ten ê shem ê shem no beene cεyte le Nyo' ege é beene enù boom bew, fi è nu nsum wvù wvù nu ke esum ye yesebeene yicii can ηgew e.

24 È nu fiεε fidvu fin fi beene taale fwe kee le beene nu ke ekeηke fi Nyo' to boyseε beene nje fí. Geenεn fiεε fi wee taale fwe yí dvù le le wen nu ke ekeηke ε fí nu wase ê wvù εjise yaa nulo bvuu nu le è nu fiεε ε wvù bæε cεyte lo ke. È nu yεε wvù nulo ebvuu etaale fwe yí fiεε le keeke ekeηke ε fí nu wase ê wvù εjise?

25 Geenεn é beene taale fwe yí fiεε le kee le beene nu ke ekeηke se beene cim yene wase fí le, é beene ekuu shém ecεyte.

26 Keyoy ke Yuule ten ε mum ε no fici beene yí kewεεye keseebeene le, no beene yaa kee keebunlee no beene keηke keebunlee ke. Keyoy kedvu kebee ké no lεke Nyo' fô beene bonyii bo Nyo' le beele ê wvù ê je yí è nulo wee saa esee le ke.

27 Nyo' wvù ké no taasse mvuntelem mvu bonyii le ké no kee ηkpawwεε wvu Keyoy ke Yuule, njefo Keyoy ké no lεke Nyo' fô bonyii bò è nu bo Nyo' le ê je yí Nyo' koonke le.

28 Beene kee le Nyo' lemte yí mwεem mvunciim e gee ε mvù gene ê je yí jee le fô bonyii bò koonke wvù le bò wvù nu ε tee bii fiεε fi wvù gomte fô bó le.

29 Bonyii bò Nyo' to kee wase ε è bæe lo nu ε wvú to seyse wase gee le bó nu ke ekumen enu diewe Waa we le, wvu le Waa we wvun nelo enu nsafwe boom bo bwee le, ε bó nu nteen.

30 Ε bonyii bò wvú to seysee wase gee nonen, ε wvú mum ke tee bó. Ε bonyii bodvu bò wvú to teηee nu ε wvú to jo wase bó le bó nu se jay. Ε bó bodvu bò wvú to joe le bó nu se jay, nu ε wvú to ge le bó eley bvukuke bwew e.

Wee wvù nulo ebvuu ege beene bô fiεε nu yεε?

31 No mwεem mvun nu nen mvunciim, è nulo é beene ebvuu egay le la? No Nyo' nu wase ê keba kesεεbeene le, wee wvù nulo ebvuu ege beene bô fiεε nu yεε?

32 É wvú wvù Nyo' to nu se wvú ε yεε ejise bô Waa we, geenen nya ε wvú kpwe fô beene le bocii, tu ke wvú nu ke enya mwεem mvunciim ebise fô é beene?

33 È nu yεε dvú wvù nulo ebvuu egomte nsaw bô bonyii bò Nyo' nu ε caw wase? Nyo' nu wvù joo bonyii le bó nu se jay.

34 Wee nu dvú wvù nulo ebvuu elese beene ηgew e? Klistu Jisos to nu ε kpwe, kase buy ten yî kpwe le, ε no nu keseen ê ebo ke Nyo' le ke εcεey e, looci lεke Nyo' fô beene le.

35 Wee wvù nulo ebvuu egawsen naa beene bo Klistu fo wvú ebvuu ekoonke beene nu yεε? È nulo é ηgew, kenεε monlum, kenεε bikaa bì bonyii bone ê beene ejim, kenεε jeη, kenεε kencimte, kenεε kembemse, kenεε kpwe, egawsen e?

36 Fí nu ke no bó nu ε saη ε bonyii bomew gayte ê Nyo' le, “Bese nu diuw kpwe le ediuw εcii nje yo. Bonyii joo le bese nu njée yî bó eεεye lo.”

37 Naa lo yî mwεem mvun e mvunciim nu ε beene nu bonyii bò looci soo lo yî mvuηgay mvu Klistu wvù to koηεε beene le.

38 Me ηkee naa ntay le ke kpwe kenεε nshii, kenεε kfuu bonceendaa bò la, kenεε biyoy bì saake, kenεε mwεem mvù nu keseen, kenεε mvù nu ke eyuu enu, kenεε mwεem mvù keηke mvuηgay,

39 kenεε mvù nu ê we, kenεε mvù nu ekuse, kenεε naa la fifie fi nu ηgoo mwεem mvù Nyo' feλεε le mvunciim, nu ε fimew nu dvú fi nulo egawsen beene ε bo keηkoηen ke Nyo' le kè wvú keηke fô beene le nje Klistu Jisos wvù Tata wesebeene ke.

Lum 9

Nyo' to nu ε caw bonyii bo Israel le bó enù bonyii bew

1 Fiεε fi me njemyi fin nu kecεey diewe wee Klistu le. Ke me mbiayte lo ke. Keyoy ke Yuule kè nu yî yem e tomte le ke me mbiayte lo ke.

2 Me ηkeηke yii baay bô nsase wvù yaa kaa ke fô fitele fiem e,

³ nje boom bo bwεem e bo won e bò bee bó nu ελεμε kemwaan. Me nelo enshieele naa baay le lon eto fô me le é me engawsen lo bee Klistu ke nje bó.

⁴ Bonyii ban nu bonyii bo Israel, ε Nyo' to jo bó ge le bó enu boom bew, duŋce n'yuu we ê bó, gbwo moŋkan bô bó, nya bonci bew can yibole, duŋce bó no bó ebunleè Nyo', ge boŋkawma bô bó.

⁵ È nu bonyii ε bo'icee bobole bô to sanε kfuu dibole to nu bonyii bo Nyo' le bô bó kee bó, ε Mboyse wvù Nyo' to kawεε to dioo to diewe wee wvu wum e ε bó boo wvú ε è nu ê kfuu di bonyii ban e. Beene enyaà mbense sekecii se ŋka ê Mboyse wvun wvù nu Nyo' wvù keŋke mvuŋgay ê we jo mwεem mvunciim. Fí enù nonen.

⁶ Ke fí nu le fiεε fi Nyo' to kawεε nu ε la εcici ke, njefo ke bonyii bocii bo Israel mum nu keceεy boom bô è nu bo Israel e ke.

⁷ E ke è nu ten boom bô buy yî Abl'am e bocii bô è nu boom bew ke. Geenen fí nu no Nyo' to jemyεε ê Abl'am le, “È nu Aysik wvù nu ke eboo boom bô nu egεε diee diuw.”

⁸ Fifin duŋci le ke è nu boom bô buy yî Abl'am e bocii bô è nu boom bo Nyo' le ke. È nu boom bô Nyo' to kawεε Abl'am dvú bô bó joo le è nu boom bo Abl'am e.

⁹ Nyo' to dioo ge ŋkawma wvun gay le, “È nu ke edioo enu diewe keseen e kelum kè too le, é me enkase ento, é Sela ekeŋke wan diemsen.”

¹⁰ Ke è mey ke fifin ke. Fiεε diewe fin e to nu ε kooy ten bô Lebeka wvù icee boom bew to mey ke Aysik wvù icee bo'icee bosεεbeene.

¹¹⁻¹² Naa é bó se keeke eboo boom ban, é bó se keeke ege fiεε fi jee kenεε fi befe, nu ε Nyo' to jeme ê bwee bó le, “Ŋgaywee nu ke elemte wan caan e.” Nyo' to jeme nonen keeduŋce le wvú cawte wee bii ŋkoŋ wvuwe le, ε è yaa nu nje lemme dimew di wee nu ε ge ke. Wvú cawte bii fiεε fi wvú gomte le wee ege le.

¹³ E è nu ke no bó saŋ le, “Yakow nu ε me ŋkoonke wvú, mbane Esau.”

Nyo' ké no gee fiεε ε è nu fi wvú koonke

¹⁴ No fí nu nonen, è nulo é beene ebvuu ejeme le la? Fí fen nu le ke Nyo' yaa gee gee di leŋ e? Ke è nu nonen ke!

¹⁵ Nyo' to nu ε jeme ê Muses le, “Me nu ŋke encam shen fô wee wvù me ε ŋkoŋ e, enkoo yii fô wee wvù me ε ŋkoŋ e.”

¹⁶ Nonen ke Nyo' cawte wee bii no wee wvu wum koonke, kenεε yî lemme di wee lem e ke. Wvú cawte ε è nu nje wvú keŋke shen fô bonyii le.

17 Fifin nu ke no bó nu ε saη ê Nwa' Nyo' le no Nyo' jemyεε ê Felo Nfon wvu Ijiw le, “Me nto mbense wo diewe Nfon e ke naa shiee wvù le me ηke enduηce mvuηgay mwem yî yo le, é bonyii egeη bô diee diem yî εkolε ke nshε le kecii.”

18 Fifin ε mum ε no duηci le Nyo' camte shen fô wee wvù wvú kooηke le, nyaa εkolε kè temyεεn ê wee wvù wvú kooηke le wvú etemyì εkolε le.

19 Wee nelo emum ebife ê me le, “É è fen nu no fí nu, Nyo' ε bvuu ε no baci bonyii nje la le? Wee wvù nulo etun fieε fi Nyo' kooηke le fí enù, nu yeε le?”

20 Fo wee ebiite nonen ke. È nu naa wee wvu wum wvù la wvù nulo ebeeke mbew bô Nyo'? È nulo é wee ebom fieε bô mbom é fí ekase ebife ê wvú le, “Wo bom me nen nje la le?”

21 Wee wvù bomte nsháan keηke mvuηgay ê we jo mbom keejo ntuw mbom mwaan ebom mwεem dvú jεey jεey, é fimew enu fi keηke lemme di kuuke, ε fimew keηke lemme di ncεw.

22 È nu ke leηleη no Nyo' gee. Wvú to gomte keeduηce shém ye yì ffuuke bô bonyii, ebvuu ege é bonyii ekieε mvuηgay mwew. Geenεn ε wvú looce kuu shém bô bonyii boba bô to gee ε shém ffuuke wvú bô bó to nu keeke efíwse lo bó.

23 E wvú to ge nonen keeduηce bvukuke bwew bvú baay bvù nu fô bonyii bô wvú camte shen fô bó le. E bonyii ban nu bô wvú to seyseε wase ε è bæε lo le bó nu ke ekeηke bvukuke bvudvu.

24 È nu naa beene bonyii bodvu bô wvú nu ε tee. E è yaa mey ke bô nu Bojuu maan ke. Bonyii bô yaa nu ke Bojuu nu ten fô.

25 E è nu ke naa fí fi Nyo' jemyi ê Nwa' wee ntum we wvù Osia le le, “Bonyii bô se yaa nu ke bonyii bem, nu ε me nu ηke enteηe bó le ‘Bonyii bem.’ E boba bô me nse mbaa eηkooηke bó ke, é me enteηe bó le ‘Fitele fiem.’”

26 “E fô bvudvuu bwε bvù Nyo' se ké no gayte ê bonyii bodvu le, ‘Ke ben nu bonyii bem ke’, nu ε bó nu ke eteηe wase bó le, ‘Boom bo Nyo' wvù keηke nshii le.’”

27 Yesaya wvù wee ntum Nyo' to nu ε no beele ten ekume bonyii bo Islael gayte le, “Naa no bonyii bo Islael cim duule naa diewe monshεem mo ê joo yi baay e, nu ε bô nu ke eboy nu ke nen caan.

28 Fì nu le Nyo' nu ke ene esεε elan ηgew yî εkolε ke nshε le kecii kan mwaan emεse lo fieε ficii.”

29 E wvú wvù Yesaya to yuu wase jeme le, “É è to baa nu le Tata Nyo' wvù keηke Mvuηgay Mvunciim ebawce boom ê kfuu disεεbeene le, tu beene be ε tu wase diewe kelaante kè Sodom e, noo diewe kè Gomola le.”

E bonyii bo Islael tun je yi bonyii keηke keebii dvú keenu teytoy ê Nyo' ejise

30 No fí nu nonen, è nulo é beene emum egay le la? È nulo é beene egay le bonyii bò yaa nu ke Bojuu bò to baa momte keenu teytoy ê Nyo' ejise nu wase keseen teytoy ê Nyo' ejise nje fitele fi bó lese yí ye le.

31 Geenən, ε bonyii bo Israel bò to momte keenu teytoy ê Nyo' ejise bii ê je yì bonci gomte le to baa eghan enu teytoy ê wvú ejise ke.

32 Ε è to nu nje la? È to nu njefo ke bó yaa to momte bii ê je yì le bó else ε è nu fitele yí Nyo' le ke. Bó to kpwaake le fiε fi gee ε wee nu teytoy ê Nyo' ejise nu lemme dimew dì mweten gee. Ε bó ge nonen mum bayten yí te le.

33 Te din nu dì bó saŋ ekumε dí le, “Ben etaa eyen, me ηγεεle te ê kelaante kè Sayon e, ε è nu te dì bonyii nu ke ebaytene yí dvú le. È nu kemaan kè bonyii nu ke egbwekene yí dvú le. Geenən, é wee lese fitele yí ye le, wvú saa ke ewuumen ke.”

Lum 10

1 Boom bo bwεem e, fiε fi me nshieele bô fitele fiem ficii, noo bunle yem ê Nyo', nu le bonyii bem bo Israel ban ke eboy.

2 Fiε fi me ηkee, ε è nulo é me enjeme nu le, bó kηke naa shiee wvu baay fô Nyo' le. Geenən ε bó yaa kee ke je yì len yì bó ebii wvú le jó ke.

3 No bó baa kee je yì Nyo' joo le wee ké no nu teytoy ê wvú ejise jó, bó ε mum ε no gomte wase keegεe yibo je, ε faŋe yaa bvuu nya bikuu bibole keebii yiye je yì Nyo' joo le wee nu teytoy ê wvú ejise jó le ke.

4 No Klistu to toε wase, ε je yì bonci yì bonyii to bii dvú keenu teytoy ê Nyo' ejise mum ka, wvu le keenu teytoy ê Nyo' ejise keseen enù wase keeese fitele yí Klistu le.

Mboyma nu ε to fô wee tfuu le

5 Muses to nu ε saŋ ekumε je keenu teytoy ê Nyo' ejise yì bii ε è nu bonci le le, “Wee wvù gee no bonci gayte nu ke ecee nje wvú gεεle bonci bodvu bocii.”

6 Fi ekumε je yì le wee nu teytoy ê Nyo' ejise bii fitele fi wvú lese yí ye le nu ε bó ε saŋ le, “Fo wo ebiitè ê fitele fiw e le laa è nu eben yεε fowe le?” Fì nu le laa è nu eben yεε eto bô Klistu le.

7 Kεnεε le, “Fo wo ebiite le laa è nu ebow yεε woŋ boŋkfu le le?” Fì nu le laa è nu ebow yεε eto bô Klistu le.

8 Geenən fí jemyi le la? Fí jemyi le, “Diεw Nyo' nu naa mbew yo le. Yí nu diuw wo le, noo ê fitele fiuw e.” Ε è nu yí yì bese fewci ekumε keeese fitele yí Klistu le.

9 É wo jeme bô diuw wo le Jisos nu Tata, ε bee fô fitele fiuw e le Nyo' to nu ε bvuse wvú yí kpwe le, é wo ke eboy.

10 Fí nu nonen njefo wee beŋe ε è nu bô fitele fiw ε Nyo' se jo wvú le wvú nu se jay. Ε wee jemyi ε è nu bô diuw we ε Nyo' se boyse wvú.

- 11 Nwa' Nyo' jemyi le, “Ke wee wvù nu ε bee wvù le nu ke ekeṅke ken'wuumen ke.”
- 12 Ben ekeè le ke kejeey jsey nu dvù entelen jo wee Juu bô wee wvù yaa nu ke wee Juu ke. Tata wvù nu Tata bonyii bocii nu ke mwaan. E wvù ké no yen'yi can ye nyaa mwεem ê wee tfuu wvù beele fô wvù le.
- 13 Fí nu no bó saṅ ê Nwa' Nyo' le le, “Wee tfuu wvù beele teje diee di Tata le, nu ε wvù nu ke eboyse wvù.”
- 14 Geenen è nulo é bonyii eghan nεε sε no beele teje wvù sε bó nu ε lese fitele yí ye le? E è nulo é bó eghan nεε sε lese fitele yí ye le sε bó ke nu ε yuw wase ekume wvù? E bó nulo eghan nεε sε keeyuw sε wee nfewce wvù efewce ekume wvù ê bó.
- 15 E è nulo é bonyii eghan nεε sε gen efewci sε bó nu ε tum bó? Fí nu ε bó ε saṅ le, “Bonyii ké yuuke ncín bika bi wee wvù too bô saaka wvù jee, no yuuke njoṅ baay.”
- 16 Geenen, ke bonyii bo Israel bocii nu ε bee wase saaka wvù jee wvun e ke. Ke lenlen no Nwa' wee ntum Nyo' wvù Yesaya jemyi le, “Tata, è nu yεε dvù wvù nu ε bee saaka wvù bese fewci le?”
- 17 Fí ε mum ε no nu le keelese fitele yí Klistu le nen'yi yí fiεε fi wee nu ε yuw e. E fiεε fi wee yuw nen'yi fô fi bó fewci ekume Klistu le.
- 18 Me ε mum ε no mbiite le laa bó to baa yuw ε? Kεεey bó to nu ε yuw. Nwa' Nyo' gayte le, “Diεw yibo to nu ε gen yí ekole ke nshε le keci, ε njeme wvubo gen buy yí εbuw ε woṅ e ecii.”
- 19 Me ε mbvuu ε no mbiite le laa fí nu le bonyii bo Israel to dioo yuw, faṅe yaa yuw ntay ε? Muses to nu ε yaw gay le Nyo' gayte le, “Me nu ḡke eṅge é kendoṅ ebene ben bô ketum ke bonyii bo ecici le, eṅge é shém eton'yi ben bô ketum ke bonyii bò nu biyuṅ e.”
- 20 E Yesaya bvuu jeme lo sε nfan le Nyo' gayte le, “Bonyii bò se baa egomte me nu bò nu ε yen me le. E me ε nduṅce ekole kem ê bonyii bò se baa ebiite me ke.”
- 21 Geenen fi ekume bonyii bo Israel nu ε Nyo' to gay le, “Eduw ecii nu ke no me nshεε me ε neke can keenfiisen bonyii, geenen ε bó temyi ke ε è nu bikuu gene ê yibo je le.”

Lum 11

Kε Nyo' baa mum ma wa lo bonyii bo Israel ke

- 1 Me ε mbvuu ε no mbiite le laa Nyo' nu ε ma wa lo bonyii bew ε? Ke è nu nonen ke! Me kebeε nu ε me nu wee wvu Israel. Me nu waa yew Aba'am, ε me mbuy ê kfu di Benjamin e.
- 2 Ke Nyo' baa ma wa lo bonyii bew bò wvù to cawεε wase ε è bεε lo ke. Ke ben kee fiεε fi Nwa' Nyo' jemyi ekume Elayja no wvù to beele fô Nyo' le ekume fiεε fi bonyii bo Israel to gee le?

³ Wvú to beele gayte ê Nyo' le, “Tata, bó nu ε yuwyε wase bonyii buw bo ntum e, ε sâw bitaŋ biuw bi ncese le. Ê shεke ke wase me maan, ε bó bii wase ten me le keemεse.”

⁴ Wvú to beele nonen ε Nyo' tfuse ê wvú le la? Wvú to nu ε tfuse ê wvú le, “Me nu ε ηγεε bonyii bò è nu bem ε bó nu bontfuke bosooshwiy (6,000), ε bó ke baa tum wase nvuu fwe dvu Baal keebunle fó ke.”

⁵ Ê nu ke lenlen no fí nu kefew ke keseen kin e. Bonyii bomew nu ke naa dvú Israeel caan bò nu ε shεε bò è nu bo Nyo' le. Ε boban nu ε wvú caw nje fitele fiew fi jee fô bó le.

⁶ Ê è fen nu le wvú to caw nje fitele fiew fi jee, tu ke è bvuu nu nje lemme dimew ε bó to ge ke. Ê è to nu nje lemme dimew ε bó ε ge, tu ke è nulo é ebvuu enu le è nu fitele fi jee ke.

⁷ Fieε fi me ηgayte nu le la? Fí nu le bonyii bo Israeel nteen to baa ghan enu teytey ê Nyo' ejise no bó to gomte ke. Ê to nu ke bonyii bò Nyo' to cawεε bò to nu ε ghan keηke je keenu teytey ê wvú ejise. Geenεn, ε Nyo' ge ε mvuntelem mvu kebεse ke bonyii le teme ghaw mey nonen.

⁸ Fifin nu no bó to saηεε le, “Nyo' to nu ε ge ε bó no funfunε, ε ejise εbo faηε yaa ebvuu eyene mwεεm e ke, ε bitem bibole yaa yuuke mwεεm ke. Bó ε no nu ke nonen ε to ε buy eben e.”

⁹ Ε Dawe to nu ε jeme ten le, “Nyo' ege é mwεεm mvudien mvù bó diee yuuke njoη enjim bó diewe lawe le, ebvuu ekoo bó diewe ketam e. Mvú etu fieε fi nu esen lo bó etufe, é emum enu nlawma gee dibole.

¹⁰ Nyo' ege é ejise εbo ejim wvu le fo bó eyenè lo mwεεm e ke. Wvú ege ten é jím yibo engvuushε emey lo nonen.”

¹¹ Me ε no mbiite le laa è fen nu le bonyii bo Israeel to baytene nen keegbwe emey lo fokuse le? Ke è nu nonen ke. Kebefe kè bó to gee to nu ε kaa to lo bô mboyma fô bonyii bò yaa nu ke bo Israeel e, wvu le bonyii bo Israeel ebenè kendoη.

¹² Ê è fen nu le kebefe kè bó to gee to nu ε kaa to ε è nu bô bvujonke yî nshe le, ε ηgbwe wvù bó to gbweε to ε è nu bô bvujonke fô bonyii bò yaa nu ke bo Israeel e, tu bvujonke bvù nu ke enu seke bonyii bo Israeel bocii ε bee Klistu le nu ke enu neε?

Fo bonyii bò yaa nu ke bo Israeel emum ekfune gvuw bô bonyii bo Israeel ke

¹³ Me ηgomte keenjeme keseen ε è nu ê ben bonyii bò yaa nu ke bo Israeel. No me nu waa ntum Jisos fô bonyii bò yaa nu ke bo Israeel e, me ε mum ε no njoo lemme diem le è nu fieε ε fí kuuke.

¹⁴ Ε me ηgee nonen wvu le me enge é Bojuu bosεse ebenè kendoη, é fí ekum bó le, é bomew bó le ke eboy.

15 É è fɛn nu lɛ Nyo' to dɪoo ma bonyii bo Israeɛl ɛ fifin ge ɛ bonyii bomew yɪ won ɛ kase tu fiɛɛ fimwaan bô bo Nyo', tu è nu ke enu seke wvú ɛ kase ɛ fiisen bó, ɛ fí nu nɛɛ? Fí nu ke enu lo diɛwɛ seke wee ɛ kpwe ɛ kase ɛ buy yɪ kpwe le.

16 É wee guse bvulem ɛ baa sâ' dvú ê Nyo', tu bvulem bvudvu bvucii nu enu wase bvú Nyo' le. Kete ɛ no nu ɛ geɲ yidvu nu yi Nyo', tu tíew kete kedvu nu enu ten yi Nyo'.

17 Geenɛn, é è fɛn nu lɛ tíew kete yimew nu ɛ bó to faashɛ lanɲɛ mum jo wase ɛ è nu ben bô nu kete ke Olif e ke ɛkow, to shfuwɛ yɪ kete ke Olif kè bó yele lo le fô tíew yimew yɛ to nɛn'yɛɛ, wvu lɛ ben ekeɲke ten joo yɪ nɛn'yi yɪ kete kedvu le,

18 tu ke ben keɲke keekfune gvuw ben ɛ bo tíew yidvu yɛ kɛ. É ben kfone gvuw ben ɛ bó, é ben no kumyɪ lɛ ben nu ke lo tíew. ɛ è yaa gee ben ɛ geɲ sɛ nu dvú kɛ. È gee geɲ ɛ ben sɛ nu dvú.

19 È nulo é wee mvu ben e enɛ ejemyi lɛ, “Kɛ bó to faashi tíew keeshfuw ɛ è nu me fô.”

20 È nu keɛɛy. Bó to faashi bó lanɲi njefo ke bó to keɲke mbee kɛ. Ben ɛ no nu fô tɛmyi nje fitele fi ben lese yɪ Klistu le. Nonɛn, fo ben emum ebensee ye kɛ. Ben enù nfan nfan.

21 Ben ekeè lɛ é Nyo' nu sɛ wvú to nu ɛ bawcɛ tíew kete kè bó yele lo kɛ, tu ke è nulo ten é wvú ke ebawcɛ ben kɛ.

22 Ben etaa lɛ eyɛn lɛ Nyo' keɲke fitele fi jee baay bvuu keɲke ten fitele fi cewcew e. Wvú ké no cewcewe bô bonyii bô nu ɛ gbwe, geenɛn duɲci fitele fi jee fô ben e fɛn é ben nu ɛ mɛy ɛ no bii ê je ye le. É fuw kɛ nonɛn, tu wvú nu ke efaashɛ ten ben elan.

23 ɛ dɪoo tu fô bonyii bo Israeɛl e, é bó kumene lo ɛ no keɲke mbee, é Nyo' ekase ejo bó eshfuwɛ yɪ kete kɛ le, njefo è nu fiɛɛ ɛ Nyo' keɲke mvunɲay keekase ege.

24 Ben ekeè lɛ, é ben nu tíew ɛ bó to faashɛ yɪ kete ke Olif e kè kuu ɛ è nu ɛkow, to shfuwɛ yɪ kè bó yele lo le, ɛ è nu fiɛɛ ɛ fí yaa keɲke keenu nonɛn kɛ, tu ke è nulo é bó ekase ejo tíew yɪ è nu yi kete kè bó yele lo yɪ bó to faashɛ wase ekase etfuushe yɪ kete kedvu le efey lo nonɛn e?

Nyo' camte shen fô wee tfuu le

25 Boom bo bwɛɛm e, me ɲgomte lɛ ben ekɛɛ keɛɛy kin kè nu ê nnyile le, wvu lɛ fo ben ke enɛ ebensee ye lɛ ben feefene baay kɛ. Fí nu lɛ ɛkolɛ kè tɛmyɛɛn nu ɛ to fô bonyii bo Israeɛl e nteen. ɛ bó nu ke etɛmyi ke bikuu nonɛn egen ebuy seke bonyii bô yaa nu ke bo Israeɛl bocii bô nu keeley ɲgoo bonyii bo Klistu le ɛ ley wase.

26 Fí nu ke edɪoo ɛ kooy nonɛn, é bonyii bo Israeɛl bocii emum eboy. È nu fí fi bó to saɲɛɛ ɛ Nyo' gayte lɛ, “Wee wvù nu ke ebvuse bonyii ɲgew e nu ke ebuy Sayon. Wvú nu ke ebvuse gee di befɛ ê kfuw di Yakow e.

27 Ɛ fifin nu moŋkan mò me nu ŋke eŋgbwo bee bó seke me ɛ ncake bibefe bibole.”

28 Ê keba ke saaka wvù jee wvu Nyo' le nu ɛ bonyii bo Israeɛl nu bonyii bo bvuban e fô Nyo' le nje yene. Ɛ dioo etu ê keba ke ncaw wvù Nyo' to cawɛɛ wase bó le, nu ɛ bonyii bo Israeɛl nu lo fitele fiew nje moŋkan mò wvù to gbwoɛɛ bô bo'icee cee bó.

29 Fí nu nonen njefo é Nyo' nya wase nnya ê wee, wvù saa ebvuu ekase efi ke, é wvù teŋe wase wee, wvù saa ebvuu ekase ecine wvù le ke.

30 No ben bonyii bò yaa nu ke bo Israeɛl to shee nu yaa yuuke Nyo' le ke, geenen ɛ no nu keseen ɛ wvù ɛ cam wase shen fô ben e njefo bonyii bo Israeɛl baa eyuuke wvù le ke,

31 È nu ke ɛŋɛŋ no bó ten baa eyuuke Nyo' le keseen wvu ɛ shen yì wvù cam fô ben e ege é wvù ke ecam ten shen fô bó le.

32 Fieɛ fi nu nu le, Nyo' nu ɛ lese bonyii bocii yì ncaw ekole kè temyɛen e, wvu ɛ è nelo é wen ecam shen fô bó le bocii.

Mbense enù fô Nyo' le

33 O, ben etaa eyen, bvukuke bvù è nu bvù Nyo' le nu naa lo bvù baay, ɛ bvufee bwew nu naa lo ten bvù baay, ɛ mwɛɛm mvù wvù kee nu ɛ wvù kee naa lo ten baay! Ke è nulo é wee ekieɛ je yì wvù kpwanɛsene mwɛɛm jó ke. Ke è nulo é wee ekieɛ je yì wvù gee mwɛɛm mwew jó ke.

34 Fifin nu no bó saŋɛɛ ê Nwa' Nyo' le le, “È nu yɛɛ dvù wvù kee ŋkpawɛɛ Tata? Ɛ è nu yɛɛ wvù nulo etefe wvù?”

35 È nu yɛɛ dvù wvù ke nu ɛ nya wase Nyo' bô fieɛ wvu ɛ Nyo' ke ekase elaw wvù?”

36 Mwɛɛm mvunciim nɛ fô wvù le. Mwɛɛm mvunciim fey can ye le, ɛ mwɛɛm mvunciim nu nje ye. Mbense enù fô wvù le sekeɛ se ŋka. Fí enù nonen.

Lum 12

Ben enya bikuu binɛn ê Nyo'

1 Boom bo bwɛɛm e, no Nyo' nu ɛ cam wase shen fô beene le, me ɛ mum ɛ no ŋkule can ɛ ben enya bikuu binɛn ê Nyo' diɛwɛ mwɛɛm mvu ncese le mvù bæ mvuyuum yuule ɛ Nyo' ɛ bee le. Fifin nu je yì ɛŋ fô ben e keebunlee Nyo' jó le.

2 Fo ben ebì mwɛɛm mvù bonyii bo yì nshɛ le fɛn gee ke. Ben ecine é Nyo' enyaa ben bô boŋkpawɛɛ bò bofe, é bó ekumene ben. É ben gee nonen, é ben emum ekieɛ keeyeese kee fieɛ fi Nyo' shieele, fi è nu fi jee, ɛ Nyo' ɛ bee dvù, ɛ fí ɛ joŋ wvù le ɛ gen ɛ mɛse.

3 Me diɛwɛ wee wvù Nyo' nu ɛ buw e, nu ɛ me ŋgomte keeŋgay ê ben bocii le, fo wee ekpawɛɛ ekume ekole kew le wen nu fieɛ fimew fele fieɛ fi wvù nu ke. Wee

ekpwaakè ekumε ekolε kew ê je yi laη e. Ê wee ekpwawcì bìi nfew mbee wvù Nyo' nu ε nya ê wvú le.

⁴Beene kee le ye wee nu yimiaaη, keηke biba jεey jεey, ε biba bidvu keηke lemme jεey jεey.

⁵Ê nu ke laηlaη no beene nu. Naa no beene cim nu nteen, nu ε beene nu ye miaaη yî Klistu le. E wee mvu yaa nu fô ekolε kew e maaη ke.

⁶Beene keηke nnya jεey jεey bii je yî Nyo' nu ε buw beene jó le. Beene emum elemtè dvú. Ê nnya wee nu keeteete ntum Nyo', é wvú no teetè bìi nfew mbee wvù Nyo' nu ε nya ê wvú le.

⁷Ê nnya wee nu keelemte fô bonyii le, é wvú no lemtè fô bó le. Ê yi wee nu keeyeyi bonyii, é wvú no yeyi.

⁸Ê nnya wee nu keeyvuwse mvuntelem mvu bonyii le, é wvú no yvuwsè. Ê yi wee nnya nu keenyaa mwεem ê bonyii, é wvú yene can ye. Ê yi wee nu keetaale fô bonyii le, é wvú no taalè fô bó le bô fitele fiew ficii. Ê wee nu ε ye nnya nu keecamte shen fô bonyii le, é wvú no camtè yuuke njoη.

Ɖkoηen wvu keceey

⁹Ɖkoηen wene keηke keenù wvu keceey. Ben ebanè fiεε fi befe, leemè ε è nu yî fiεε fi jee le.

¹⁰Ben ekoηenè bikuu binen bô fitele ficii diεwε boom bo bwee wan e. Ben efele naa lo bonyii bocii yî n'wvum wvù ben nyaa ê bonyii le.

¹¹Fo ben egeè ηgoy ke. Mvuntelem mvunen eyvuwsè sekecii ε ben lemte lemme di Nyo' le.

¹²Ben elanlaηè yî fiεε fi ben taale fwe yî dvú le kee le ben nu ke ekeηke le. Ben ekuulè shém yî boηgew e. Ben enù yî bunle le sekecii.

¹³Ben eficì bonyii bò è nu bo Nyo' le bò fuute. Ben efiisenè botolo yéw yene le taale fô bó le ntay.

¹⁴Ben elékè le Nyo' elan ε è nu kembonen yî bonyii bò bone bikaa ê ben ejim e. Ben elékè ε è nu kembonen fô bó le. Fo ben elékè le eto lon fô bó le ke.

¹⁵Ben elanlaηè ben ε bonyii bò lanlaηe, enù yî yii le ben ε bonyii bò nu yî yii le.

¹⁶Ben eceè yî fiεε le fimwaaη. Fo ben ebenseè ye ke. Ben ekoolè nsán ben ε bonyii bo ncεw ncεw. Fo ben ejòè le ben kee mwεem fele no ben kee ke.

¹⁷Fo ben etfuusè kebefε bô kebefε ke. Ben ekeηkè ηkpwawcε keegeε ε è nu mwεem mvù bonyii bocii yene le è nu mvù jee.

¹⁸Ê je nu dvú, no ben yene, é ben no momtè keecee yî nyεkeey e ben ε bonyii bocii.

¹⁹ Nsáa yem shém, fo ben eyuu emomtè naa lo keetfuuse envuke ke. Ben ecine dvú é Nyo' ke eduṅṅe shém ye yì ffuuke ê bó. È nu fí fi bó nu ε saṅ le, “Envuke nu ε è keṅke me keentfuse. È nu me wvù nu ṅke enlaw bó. Fifiṅ gayte Tata Nyo'.”

²⁰ Fì è nulo é ben egeè nu fin fi bó saṅ ê Nwa' Nyo' le le, “É jeṅ yuu wee wo bvuban, é wo nya fiεε ε wvú die. Kendon é no yumte wvú, é wo nya fiεε ε wvú wu. É wo ge nonen, é ken'wuumen enu fô wvú efa.”

²¹ Fo ben ecine é kebefε eso ben ke. Ben esoè lo kebefε bô mwεem mvù jee.

Lum 13

Beene eyuukè bonyii bô keṅke mvuṅgay mvu sa' le

¹ Wee tfuu keṅke keeyuukè bonyii bô keṅke mvuṅgay mvu sa' le, njefo ke mvuṅgay nu dvú se mvú nε fô Nyo' le ke. Boba bô saake nu ε è geke Nyo'.

² Fí ε mum ε no nu le é wee duṅci ekole kè temyεen ê bonyii bô keṅke mvuṅgay mvu sa' le, tu mweten duṅci ε è nu ê bonyii bô è geke Nyo'. E bonyii bô duṅci ekole kè temyεen teṅe ε è nu ṅgew yî bikuu bibole.

³ Ben ekeè le bonyii bô saake won nu ε bonyii bô keṅke keṅge kè jee yaa ké no fane bó ke. È ké no fane bô befe keṅge. É wo shieele le ke wo nu efane bonyii bô keṅke mvuṅgay mvu sa' le, é wo mum no geè le fiεε fi jee, é bó emum ebensee wo.

⁴ Wee wvù saake bonyii nu ε wvú lemte ε è nu fô Nyo' le le bonyii eceè ntay. Geenen, é wo nε ε no gee fiεε fi befe, é wo mum no fane wvú, njefo ke mvuṅgay mvù bó nya ê wvú keeleese bonyii yî ṅgew e nu mvu ecici ke. È nu wee lemme wvu Nyo' wvù duṅci shém Nyo' yì ffuuke fô bonyii bô gee mwεem mvù befe le.

⁵ Nonen ben keṅke keeyuukè bonyii bô saake won e, ε è yaa nu ke le njefo ben fane shém Nyo' yì ffuuke ke. Ben eyuukè ten wvu le fo fiεε enu dvú fi esaake ben fô fitele le ke.

⁶ È nεε fiεε fi gee ε ben se laaṅke ten shile, njefo bonyii bô keṅke mvuṅgay mvu sa' le lemte ε è nu fô Nyo' le, ε bó ε nya kefew kebole keci yî lemme didvu le.

⁷ Ben enyaà fiεε ficii fi ben keṅke keenya ê wee tfuu. É è nu shile keelan, é ben lan. É è nu keelaw mwεem mvù ben keṅke keelaw, é ben law. É è nu wee wvù ben keṅke keefane wvú, é ben no fanè. É è nu wvù ben nu enya ε è nu n'wvum ê wvú, é ben nya.

Ben ekonènè bikuu binen

⁸ Fo wee ekeṅkè naa lo fioo bô wee mvu efey fioo yì è nu keṅkonen ke. Ben ekeè le, é wee koonke wee mvu, tu wvù nu ε gee wase bonci bocii.

⁹ Bonci bo Nyo' le bô gayte le, “Fo wo ejaṅ kpweε wee, fo wo eyu wee, fo wo econ bvucōṅ, fo wo edewkenè ejise ke,” naa noo nci wvù la, nu ε bó ε taashe yî nci wvù gayte le, “È koonkè waa bwoo no wo koonke ekole kuw” e.

10 É wee koonke wee mvu, wvú saa ebvuu ege naa lo fiε fi befe bô wvú κε. Nonen é wee koonke wee mvu, tu wvú nu ε gee wase bonci bocii.

11 Ben egeè mwεem mvun nonen kee no kefew nu wase keseen. Kefew nu ε kí ε kocen wase fô ben e keekamse. Ben ekamse njefo kefew kè Nyo' nu eboyse beene nu wase nceencee fele no kí to shee nu seke beene to lesεε fitele yî Jisos Klistu le.

12 Entaη kaa wase, ε ekfuη yuule wase too. Beene emum elaη gee di εjiwε le, ejo wase ε è nu gee di n'yuu le diεwε mwεem mvu jem e.

13 Beene eceè nce wvù keηke n'wvum diεwε bonyii bô lene εmvunsheη e. Fo ben ediekenè, wukene gee diεwε bwé le κε. Fo ben ewuù mbvuum ε mó koole κε. Fo ben eceè nce nnyen kenjaη noo nce nsake κε. Fo ben ewaalè waa bvuu keηke keηghew κε.

14 Ben ejo ε è nu nce Tata Jisos Klistu yî yene le. Fo ben enya naa lo bvudvuu ê nyam ye wvu le ben egee mwεem mvù befe mvù yî shieele κε.

Lum 14

Fo wee esaakè wee mvu κε

1 Ben efiisenè bonyii bo wεεyi yî mbee le ê ben ente. Fo ben ε boba bonyii ebeeke ε è nu mbew yî mwεem mvù bó kpawci le è nu mvu leη keege le κε.

2 Wee mvu nu ε wvú beηe le è nulo é wen ediee fiεε ficii. Geenεn ε wee mvu wvù mbee we wεεyi nu ε wvú diee κε fiew ε è nu mbáse yì bó keeke lo.

3 Fo wee wvù diee fiεε ficii yaa nyaake, enyensè wee wvù nyaake κε. Fo wee wvù nyaake, esaakè wee wvù diee fiεε ficii yaa nyaake mum sumtene lo nsaw we κε, njefo bó bocii nu ε Nyo' ε fiisen bó.

4 È nu wo wvù yeε keesaake wee lemme wee mvu mum sumtene lo nsaw we? È keηke cee εkolε we keeke eyen laa waa we lemme leeme ntay nuu wvú gbwee lo le. Ε wvú nu ke eleem we, njefo Tata nulo eleke wvú we é wvú eleem ntay.

5 Wee mvu nu ten dvú wvù joo le εdiuw yomew nu yo baay baay ê yomew e. Ε wee mvu joo fiew le εdiuw εcii nu κε leηleη. Fiεε fi nu, nu κε le fo wee ekeηkè kemaηen ê ηkpawcε we le yî fiεε fi wvú leeme yî dvú le κε.

6 Wee wvù joo le εdiuw yomew nu yo baay baay gee nonen keenya n'wvum ê Tata. Ε wee wvù diee fiεε ficii diee ten keenya n'wvum ê Tata, no wvú gee nonen no nyaa keyoone ê Nyo'. Ε wee wvú nyensee keediee fiεε ficii nyensee κε ten keenya n'wvum ê Tata, no wvú nyaa ten keyoone ê Nyo'.

7 Beene ekeè le é wee nu dvú, tu κε è keηke wvú εkolε kew κε. É wvú kpwe lo, é saa ekeηke wvú εkolε kew κε.

⁸É beene nu dvú, tu beene nu ke beene ε bo Tata, beene é kpwe, tu beene nu ke beene ε bo Tata. Nonen, kenεε beene nu dvú, kenεε beene ε kpwe, tu è kenke ke Tata beene.

⁹È nu shiee wvù Klistu to kpweε kase buy yí kpwe le no nu dvú. Wvú to ge nonen wvu le wen enù Tata bonyii bocii bò bæε dvú bò bò kpweken wase.

¹⁰Nonen, è nu nje la wvù wo saake waa bwoo mum sumtene lo nsaw we? Ε è nu ten nje la wvù wo nyensee waa bwoo? Ben ekeè le beene bocii nu ke eleem fwe dvu Nyo' é wvú esaw beene.

¹¹È nu fiεε fi bó nu ε saη le, “Me wvù Tata ηgayte le, no me nu dvú, wee tfuu nu ke etum envuw ê me ejise, é wee tfuu ejemyi bò diuw we le me nu Nyo'.”

¹²Fí ε mum ε no nu le wee mwaanη mwaanη beene le kenke keeke eleem ê Nyo' ejise see no gee diuw to nu.

Fo wee ege fiεε fi waa bwee egbwe lo ke

¹³Nonen, fo beene ebvuu esaake wee noo wee mum sumtene lo nsaw ke. Fiεε fi beene kenke keegeè nu le wee dioo gee fiεε no yene fo enu fiεε fi ege é waa bwee ebayten yí dvú le kenεε egbwe lo ke.

¹⁴Me ηkee naa lo, ε me ε mbee diewe wee Tata Jisos e le ke fiεε fidien fimew nu dvú εfinεfin fi nu se fí yuule lo ke. Geenεn, é wee mvu ne ε no yene le fiεε fidien fimew nu ε fí yaa yuule ke, tu fí nu enu ke nonen fô wvú le.

¹⁵É wo diee fiεε ε fí beete bò waa bwoo, tu ke wo bvuu duηci kenkonen fô wvú le ke. Fo wo ecine é fiεε fi wo diee ege é waa bwoo wvù Klistu to kpweε nje ye, egbwe lo ke.

¹⁶Nonen, fo wo ege é fiεε fi jee fi wo gee ke ene etu fi bó ejemyi wase le è nu fi befe ke.

¹⁷Ben ekeè le ke bvunfon bvú Nyo' le nu fiεε fi ekume mwεem mvudien bò mwεem mvuwuun ke. È nu fiεε fi ekume keekenke nce wvu teytey bò wvu nyεkeey noo keekenke nlanηη wvù nen'yi fô Keyoy ke Yuule le.

¹⁸É wee lemte Klistu le ê yiye je le, tu Nyo' nu eyuuke njonη bò wvú, ε bonyii bensee ten wvú.

¹⁹Beene emum ebii mwεem mvù too ε è nu bò nyεkeey noo mvù fici beene keeyoote lo wee noo wee le.

²⁰Fo ben ebefe bò lemme di Nyo' le nje mwεem mvudien ke. È nu kecεey le mwεem mvudien mvunciim yuule lo, geenεn é wo diee fiεε fi nulo ege é wee mvu egbwe lo, tu è nu fiεε fi befe ε wo gee.

²¹È nu fiεε fi jee keetun keedie nyam, kenεε keewu mbvuum, kenεε keege naa la fi nulo ege é waa bwoo egbwe lo.

²²É fitele fiuw beɲe fiɛɛ fimew e, é wo gɛɛ ε è no kee ke ben ε Nyo' bofɛɛ. Njon wvu baay nu fô wee wvù shiee baa enu dvú fô wvú le keesaake ekole kew ke, njefo wvú gee fiɛɛ fi wvú tomte le fí nu lɛɲ e.

²³Geenɛn, wee wvù diee fiɛɛ keɲke kemaɲɛn fô fitele fiew e nu wase ɲgɛw e, njefo wvú gee fiɛɛ ε è yaa nu fi fitele fiew beɲe dvú ke. Ben ekeè le fiɛɛ ficii fi wee gee sɛ fitele fiew nu ε bee, nu ε è nu kebefɛ.

Lum 15

Wee egeè fiɛɛ fi ejeè tɛn waa bwee le

¹Beene bò tɛmyi keɲke keekuulè shém bô gbwee di bonyii bo wɛɛyi gbwee. Fo beene egeè fiɛɛ ε è nu ke fi è nulo é ye ejeè ke ε è nu beene ke.

²Wee mwaan mwaan beene le keɲke keemomte keegeè fiɛɛ fi ejeè waa bwee le keefici wvú ε mbee we kuu.

³Ben keè tɛn le ke Jisos Klistu to gee mwɛɛm mvù ye ejeè ke ε è nu wvú ke. Wvú to gee fiew ε fí kooyi no bó saɲ ε wee jemyi ê Nyo' le, “Boncun bò bonyii nan'yi wo dvú nu ε tu yî yɛm e.”

⁴Beene kee lo le mwɛɛm mvunciim mvù bó to saɲɛɛ ê ɲwa' Nyo' le fwele to nu keetefe beene dvú, wvu le mvú ege é beene eleemè tɛmyi, é mvuntelem mvuseɛbeene eyvuwsè yî fiɛɛ fi beene taale fwe yî dvú le.

⁵Me nleke le Nyo' wvù gee ε bonyii leeme tɛmyi bvuu gee ε mvuntelem mvu bonyii le yvuwsɛ, ege é ben eceè yî fiɛɛ le fimwaan ben ε bonyii bocii bii no Klistu Jisos duɲci,

⁶wvu le yî kentaashe le, é ben ebenseè Nyo' wvù nu Icee Tata wesebeene wvù Jisos Klistu yî diew e miaan.

Ben efiisɛn wee tfuu lɛɲlɛɲ no Klistu nu ε fiisɛn ben

⁷Ben emum efiisɛn wee tfuu ke lɛɲlɛɲ no Klistu nu ε fiisɛn ben, é mbense egeɲè ê Nyo'.

⁸É me ensee ê ben le Klistu to nu ε jo ekole kew diewe waa lemme le fô Bojuu le keeduɲɛ ê bó le Nyo' ké no jemyi keceɛy. Wvú to ge nonɛn keetom ɲkawma wvù Nyo' to nyaɛ ê bo'icee cee bó.

⁹É wvú to bvuu ge nonɛn wvu le bonyii bò yaa nu ke Bojuu nelo ebenseè tɛn Nyo' nje shen yì Nyo' keɲke fô bó le. Fifiɲ nu no bó saɲɛɛ le, “No fí nu nonɛn, me nu ɲke embensee wo ente jo bonyii bò yaa nu ke Bojuu. É me nu ɲke en'yemte mbensee diee diuw.”

¹⁰É fí bvuu nu ε bó ε saɲ le, “Ben bò yaa nu ke Bojuu, ben elanlanè ben ε bonyii bo Nyo' le.”

¹¹É fí bvuu nu tɛn ε bó ε saɲ le, “Bonyii bò yaa nu ke Bojuu, ben ebenseè Tata. Bitum bicii, ben ebenseè Tata.”

12 E Yesaya to bvuu jeme ten le, “Biay mi nu ke esan ê kfuu di Jεese le. E è nu wee wvù nu ke ebuy esaake bitum bi bonyii bò yaa nu ke Bojuu le. È nu yî ye le wvù bitum nu ke egeε bvufee bvubole.”

13 Me nleke le Nyo' wvù beene taale fwe yî ye le, eyiηsen mvuntelem mvunen bô njoη noo nyεkeey no ben nu ε lese fitele yî ye le, wvu le ê mvuηgay mvu Keyoy ke Yuule le, é ben etaale ke ε è nu fwe sekecii yî fiεε fi ben kee le ben nu ke ekeηke le.

Shiee wvù Baul to saηεε ê je yî wvù to saηεε le

14 Boom bo bwεem e, me kebee ηkee ntaη le ben keηke naa keηge kè jee baay, ε ben ε yiηsen bô bvufee, kee ten keetefe bikuu binen.

15 Geenεn, yî mwεem mvumew e nu ε me ε nsaj ε nlooce ε ntooshe lo ben. E me ηge nonen keeηkume lo ben, ε è nu nje mbuwma wvù Nyo' nu ε buw me dvú,

16 le me enù wee lemme Klistu Jisos fô bonyii bò yaa nu ke Bojuu le. Me ηgee lemme din diεwε cee ncese le, nlemte yî saaka wvù jee wvù wvu Nyo' le, wvu le bonyii bò yaa nu ke Bojuu enù diεwε ncese wvù Nyo' nu ε bee le, ε Keyoy ke Yuule ε seyse bó ε gee bó ε no yuule.

17 Nje Klistu Jisos, nu ε è nulo é me embensee ye yî lemme di me nlemte fô Nyo' le.

18 Ke è nulo é me emom lo enjeme ekumε fiεε fimew jεey, efey fi Klistu nu ε ge wase fele yî yem e, le bonyii bò yaa nu ke Bojuu elese fitele yî ye le ke. Bó to lese fitele bii mwεem mvù me nto njemyi bô mvù me nto ηgee le.

19 E è to nu ten bii mvuηgay mvu mwεem mvù duηci mvuηgay mvu Nyo' le bô mwεem mvu diuw wvù yumεen e mvù me nto ηgee le, noo yî mvuηgay mvu Keyoy ke Yuule le. Nonen, keekew Jelusalem ekenen egen ebuy keba kè Illilikum e, nu ε me ε nlooce wase ε nfewce saaka wvù jee ekumε Klistu jó.

20 Me nto gee nonen, ε shiee wem wvu baay nu le me enfewci saaka wvù jee wvun ε è nu fô bó ke baa yuw wase ekumε Klistu ke, wvu le fo me ηke ene engen en'yoote yî kenffuy ke wee mvu le ke.

21 Me nto ηgee fifin mbii ε è nu no bó to saηεε le, “Bonyii bò bó ke baa see wase ê bó ekumε wvù, nu ke eyen keceey kew e, ε bonyii bò ke baa yuw wase ekumε wvù, nu ke ekieε wvù.”

No Baul to seysee keegen Lum

22 È se jewse lene din me bokaη e nteen fo me ento é beene eyenen.

23 Geenεn, keseen ke bvudvuu bvu lemme le bvuu bæε dvú biba bin e ke. Nonen no me nse nshee nshieele wase bilum e keento é beene eyenen,

24 nu ε me ηkpwaake, ηkee naa le beene nu ke eyenen seke me nfele ηgene Sbeεn. Me ηkpwaake ten le ben nu ke efice me yî lene diem e keeηgen embuy jó, seke beene ε mooce caan, me ε n'yuw njoη ê ben enteleη.

- 25 Geenen, keseen nu ε me nu enjen Jelusalem yî lemme le fô bonyii bò è nu bo Nyo' le bo jó le.
- 26 Me ηgene jó njefo bonyii bo mbee le bo Masedonia noo bo Akeya se nu ε no koonke keege kensuw efi bonyii bò è nu bo Nyo' le bò fuute dvú Jelusalem.
- 27 È to koη bó keege nonen, ε è nu lo kecεey le bó keηke keege fiεε fô bó le nonen, njefo é bó bò yaa nu ke Bojuu nu ε keηke wase fô mbuwma wvù fici biyoy bibole wvù è nu wvu Bojuu, tu bó keηke ten keefi Bojuu bô mwεem mvu yî nshε le fen mvù Nyo' nu ε buw bó dvú.
- 28 Nonen, seke me ε mese lemme din, ε n'yen le fiεε fi bó suw nu ε ley can Bojuu le, é me emum ene jó, enfey jo ben, é beene eyenen, é me emum enjen Sbεen.
- 29 E me ηkee lo le me nu ηke endioo entoo ê ben e, entoo bô kembonen ke Klistu le fô ben e ε kí ε yiηsen.
- 30 Boom bo bwεem e, me ηkule lo can ê ben ê diee di Tata wesebeene wvù Jisos Klistu le noo yî keηkonen ke Keyoy ke Yuule le, le ben ebene me le é beene etaashe ebunlee shiee le ê Nyo' fô me le,
- 31 le è nulo é me ηke embuy can bonyii bò yaa nu ke bo mbee le Judea. Beene ebunleè ten le bonyii bò è nu bo Nyo' le ke ebee lemme di me ηgene keηge Jelusalem e,
- 32 wvu le é Nyo' fen nu ε bee, é me ηke entoo ê ben e n'yuuke njoη, é fitele fiem elεetene ê ben enteleη.
- 33 Nyo' wvù nu Nyo' nyεkeey enù ben ε bó bocii. Fí enù nonen.

Lum 16

Bongayma

- 1 Me ηgomte keenduηce jεme yesebeene mi yî diee nu Fuεβε é ben ekieε wvú. Wvú fici yî lemme di Nyo' le ê kentaashe ke bonyii bo mbee le ke Sηηklia le.
- 2 Seke wvú ε to, ε ben fiisen wvú diewe wee Tata le ê je yî è nu yî bonyii bò è nu bo Nyo' le. É fiεε nu dvú fi wvú shieele le ben efi wvú dvú, é ben fi, ekeè le wvú nu ε fi wase bonyii nteen, ε fi ten noo me.
- 3 Ben egay Blisilia bô Akpwila le enya ê me. È nu bonyii ε bó ε taashe bee bó yî lemme di Klistu Jisos e.
- 4 Bó nu ε kpwe to soy wase bó nje yem. È nu bonyii ε è yaa mey ke me maan wvù nyaa keyoone ê bó ke. Bintaashe bi bonyii bo mbee le bi bonyii bò yaa nu ke Bojuu le bicii nyaa ten keyoone ê bó.
- 5 Ben egay ten kentaashe ke bonyii bo mbee le kè taashi ê bó yew e enya ê me. Ben egay Abenetus wvù nsaa yem shém e. Wvú to nu wee wvu fwe keenu wee Klistu woη wvù Esia le.

- ⁶Ben egay ten Maalia wvù nu ε lem wase baay ê ben enteleŋ e.
- ⁷Ben egay Andulnikus bô Junias e bô nu bonyii bem bo won e, ε bó ε lem wase ncaw bee bó. È nu bonyii bô bó kee bó ŋgoo boom bo ntum e bo Jisos e. È to yaw bó lese fitele yî Klistu le ê me le.
- ⁸Ben egay ten Ambliyatus wvù nsaa yem shém wvù bee wvú nu ε taashe yî Tata le.
- ⁹Ben egay Ubanus wvù nu ε taashe bee bó yî lemme di Klistu le, egay ten Stacis wvù nu nsaa yem shém e.
- ¹⁰Ben egay Ebeles e. È nu wee ε wvú duŋce wase le wen leeme bô Klistu temyi. Ben egay ten bonyii bo yew dvu Alistobulus e.
- ¹¹Ben egay 'Elodion wvù wee wem won e, egay ten bonyii bô nu ε taashe yî Tata le bô nu yew dvu Nasisus e.
- ¹²Ben egay ten Tilfena bô Tilfosa le. È nu bokene ε bó lemte lemme di Tata le. Ben egay Basis e wvù nu fitele fiem. È nu ten kpwoon ε wvú ε lem wase lemme di Tata le naa baay.
- ¹³ Ben egay Lufus wvù Tata nu ε caw wee we le, egay ten bwee wvù me njoo le è nu ten bwεem e.
- ¹⁴Ben egay Asinklitus bô Fligon noo Emis noo Batlobas noo Emas, noo boom bo bwee wesebeene le bô nu bô bó le.
- ¹⁵Ben egay Filologus bô Julia le, egay Nelius bô jeme ye le. Ben egay ten Olimbas bô bonyii bô è nu bo Nyo' le bô nu bô bó le.
- ¹⁶ Ben egaynen bikuu binen e, eŋoce ê ŋŋoce bonyii bo Nyo' le. Bintaashe bi bonyii bo mbee le bi Klistu le bicii gayte ben e.

Ntefe wvu fokemεse

- ¹⁷ Boom bo bwεem e, me nleke lo ben le ben eyenè ekume bonyii bô too bô kenŋawsen jwsee ben bô n'yεeyi wvù kicine wvù bó to yεeyε ben dvú le. Ben elewtè lo boba bonyii.
- ¹⁸ Ben ekeè le ke boba bonyii yaa lemte ε è nu Tata wesebeene wvù Klistu le ke. Bó lemte ε è nu fô etew εbole. Bó joo njeme wvù yeke wvù è nu wvu kenleema leele bonyii bô nu se bó kee fiεε dvú.
- ¹⁹ No bonyii bocii nu ε yuw wase ekume ben le ben nu bonyii bô yuuke fiεε gee, me ε mum ε no n'yuuke njoŋ bô ben. Geenεn me ŋgomte le ben efeefenè, ebii ε è nu fiεε fi jee le, yaa keŋke kebo fô fiεε fi befe le ke.
- ²⁰ È sheete wase caan é Nyo' wvù è nu Nyo' nyekeey etufe Satan é ben eben yî dvú le bô bikaa. Me nleke le Tata wesebeene wvù Jisos Klistu ebuw ben bô kembonen kew é kí enù ben ε bó.

21 Timatio wvù lemte bee wvú yî fiε le fimwaan gayte ben e. ε Lushus bô Jason noo Sosibata bô nu bonyii bem bo woj e gayte ten ben e.

22 Me wvù Tetius wvù Baul jemyi ε me nsaanke nwa' wvun, ngayte ten ben e ê diee di Tata le.

23 Gayus wvù me wvù Baul cee ê wvú yew, ε kentaashε ke bonyii bo mbee le kecii ke fen taashi dvú gayte ben e. ε Elastus wvù nu wee ntfu wvu ê kelaante kin e, bô waa bwee wesebeene wvù diee nu Kpwatus gayte ten ben e.

24[Tata wesebeene wvù Jisos Klistu ebuw ben bocii bô kembonen kew é kí enù ben ε bó. Fí enù nonen.]

Mbense enù fô Nyo' le

25 Mbense enù fô Nyo' le. È nu wvú wvù nulo ege é ben etemyi ntay bii no saaka wem wvù jee jemyi. Saaka wvù jee wvun nu wvù me nfewci ekumε Jisos Klistu. Wvú to shee nu kenyile ke fiε le ε bó to nyile ε è bæε naa lo bvuyvuum e, ε keseen nu ε bó ε duņce wase ê beene.

26 Kinyile kin nu ε bó ε duņce wase. Mwεem mvù bonyii bo ntum Nyo' le to saņεε nu ε ge wase kí ε buy emwa fô bitum bicii le. Nyo' wvù mey lo nu wvù gayεε le bó eduņce ê bitum bicii wvu le bó elese fitele yî ye le eyuuke wvú le.

27 Mbense enù sekecii fô Nyo' wvun wvù è mey ke wvú wvù feefene le, fele yî Jisos Klistu le. Fí enù nonen.

1 Kol

1Kol 1

¹ È nu me wvù Baul wvù Nyo' to cawεε no wvú shieele le me enù waa ntum Klistu Jisos. Me nu bee Sostenes wvù waa bwee wesebeene.

² Njwa' wvun gene fô kentaashe ke bonyii bo Nyo' le bo Kolen bò wvú nu ε taashe bò bo Klistu Jisos, ε baa ε gee le. Nyo' to caw ben le ben enù bonyii bò è nu bew, no bonyii bocii bò teje diee di Tata Jisos Klistu le mondvuum monciim e nu. Wvú nu Tata wesebeene leηleη no wvú nu wvubo.

³ Nyo' Icee wesebeene bò Tata Jisos Klistu ebuw ben bò kembonen, ebvuu enya ben bò mvuntelem mvù læetene.

ε Baul nya keyoone no Nyo' nu ε buw bonyii bo Kolen

⁴ Me ηké no nyaa keyoone ê Nyo' sekecii nje ben, njefo wvú nu ε buw ben, no ben nu ε taashe ben ε bo Klistu Jisos.

⁵ No ben nu ε taashe ben ε bo Klistu Jisos nonen, Nyo' ε mum ε tfuw lo nnya yî yene le jé le jé le, efey mvunciim keekeε fiεε ficii, bvuu kee keejeme fiεε ficii ntay.

⁶ Nnya yin fô ben e tomte le saaka wvù ben to yuwεε ekumε Klistu nu ε ben ε fiisen.

⁷ Ben ε no nu keseen yaa bvuu tane nnya Nyo' mi ke, no ben cεyte kefew kè Tata wesebeene wvù Jisos Klistu nu ke ekase eto é ben eyen wvú le.

⁸ Wvú wvù Tata wesebeene wvù Jisos Klistu nu ege é ben eleeme temyi egen emεse, saa ke ekeηke naa jay yî diuu diew didvu le ke.

⁹ Nyo' nu Nyo' kecεεy. È nu wvú wvù to cawεε ben, ε ben ε bo Waa we wvù Jisos Klistu wvù nu Tata wesebeene taashe no nu yî fiεε le fimwaaη.

Ntefe ekumε keηgawsen

¹⁰ Boom bo bwεεm e, me nleke ben ê diee di Tata wesebeene wvù Jisos Klistu le le ben bocii etaashe enù diuw mwaanη. Fo keηgawsen enù ê ben enteleη ke. Ben enù yî wee le mwaanη, keηkè ηkpawwce mwaanη, lemtè yî fiεε le fimwaaη.

¹¹ Me ηgayte nen boom bo bwεεm e, njefo bonyii bo yew dvu Kloy nu ε see ê me le ben shee ke lo waa le.

¹² Wee nen'yi no duu le wen bii fiwene ε è nu Baul e, ε wee mvu duu le wen bii ε è nu Abolos e, wee mvu le wen bii Sefas e, wee mvu le wen bii ke fiwene ε è nu Klistu le.

¹³ Fí nu le bó nu ε gaw wase Klistu biba le biba le? È nu Baul wvù bó to tae yî kentam e nje ben e? Nu le bó to lese ben ê joo ê diee diem e le?

14 Keyoone baay le me nto mbaa enlese wee mvu ben e ê joo efey Klisbus bô Gayus ke,

15 wvu le fo wee eduu le bó to lese wen ê joo ê diee diem e ke.

16 Geenɛn, me nto nu ɛ nlese tɛn Tefanas bô bonyii bo yew dvu wvú ê joo. Efey nonɛn, me mbaa embvuu ɛŋkee wee mvu wvù me to nlesɛɛ ê joo ke.

17 Ben ekeè le ke Klistu to tum me le me ento enleese bonyii ê joo ke. Wvú to tum le me ento enfewci ɛ è nu saaka wvù jee wvù wvu Nyo'. ɛ me n'yaa nfewci bô bvufee bvú wee wvu wum e ke, wvu le fo mvuŋgay mvu kpwe yì Klistu to kpwee yì kentam e ke etu fiɛɛ fi ɛcici ke.

Klistu nu mvuŋgay bô bvufee bvú Nyo' le

18 Fí nu le saaka wvù le Klistu to nu ɛ kpwe yì kentam e nu keyuŋsɛɛ fô bonyii bô laa wase ɛcici le. Geenɛn, ɛ saaka wvun nu mvuŋgay mvu Nyo' le fô beene bô wvú boysee le.

19 Fí nu ɛ bó ɛ saŋ le, “Me nu ŋke enfiwse bvufee bvú bonyii bô duŋci bvufee le, embvuŋse boŋkpawce bo bonyii bô feefene le.”

20 No fí nu nonɛn, bonyii bô nulo ebvuu eduŋci bvufee keseen nu fɛɛ? Bonyii bô duŋci bonci bo Nyo' le nu fɛɛ? ɛ bonyii bô beeke bombew kefew kin e nu fɛɛ? Ke Nyo' nu ɛ duŋce wase le bvufee bvú fokuse fɛn nu keyuŋ e?

21 È nu fiɛɛ fi Nyo' wvù kee mwɛɛm mvunciim ntay to nu ɛ ge le ke bonyii bo yì woŋ wvun e nulo ekieɛ wvú bô bvubole bvufee ke. Wvú to seyse le wen nulo eboyse ɛ è nu bonyii bô nu ɛ bee saaka wvù bese fewci wvun ɛ bonyii yene le è nu keyuŋsɛɛ le.

22 Bojuu gomte keeyɛn fiɛɛ fi duŋci mvuŋgay mvu Nyo' le sɛ bee, ɛ Boglek gomte bvufee bvú fiɛɛ le sɛ bee.

23 Geenɛn, ɛ bese fewci fisese ɛkumɛ no bó to taɛ Klistu yì kentam e. Fí ɛ no saase lo Bojuu. ɛ bonyii bô yaa nu ke Bojuu yene le è nu keyuŋsɛɛ.

24 Geenɛn, fô bonyii bô Nyo' nu ɛ caw e, kɛnɛɛ è nu Bojuu, kɛnɛɛ è nu Boglek nu ɛ saaka wvu ɛkumɛ Klistu wvun nu mvuŋgay mvu Nyo' le bô bvufee bvú Nyo' le bvú baay.

25 Fí nu nonɛn, njefo fiɛɛ fi yen'yi le è nu keyuŋ ke Nyo' le nu ɛ è nu bvufee ɛ bvú fele naa lo bvú wee wvu wum e bvucii. ɛ fiɛɛ fi yen'yi le è nu kewɛɛye ke Nyo' le nu ɛ è nu mvuŋgay mvu fele naa lo mvu wee wvu wum e mvunciim.

26 Boom bo bwɛɛm e, ben ebvuu ekpwawce bonyii bô è to shee nu ben seke Nyo' to cawɛɛ ben. Ke ben nteen to nu bonyii bo bvufee le no bonyii bo fokuse fɛn gomte ke. Ke ben nteen to nu bontemmvuŋgay ke. ɛ ke ben nteen to buy ê dikfuu di bonyii bo baay baay e ke.

²⁷ Geenɛn, ɛ Nyo' caw ke biyɔŋ bi yî nshɛ le fɛn keege le bo bvufee le ewuumen, caw bo wɛɛyi yî nshɛ le fɛn keege le bô tɛmyi ewuumen.

²⁸ Nyo' to nu ɛ caw mwɛɛm mvù bonyii joo ɛkuse yî won wvun e, noo mwɛɛm mvù bonyii nyensee, caw naa noo mwɛɛm mvù yaa nu ke mwɛɛm, keege le mwɛɛm mvù bonyii yene le è nu mwɛɛm ke etu mvu ɛcici.

²⁹ Wvù to ge nonɛn, wvu le fo è nɛlo é wee wvu wum esaale ye ê wvù ɛjise ke.

³⁰ È nu wvù wvù Nyo' wvù to taashɛ ben ɛ bo Klistu Jisos. Wvù nu ɛ ge Klistu ɛ no nu je bvufee bvɔ baay fô beene le, ɛ ge tɛn wvù ɛ leke beene teytey ê wvù ɛjise, ɛ seyse beene ɛ gɛɛ bonyii bew e, ɛ sum beene can ŋɛw e.

³¹ Fí ɛ mum ɛ no nu no bó saŋ le, “Wee edioo esaale ye, no saale ɛ è nu yî fiɛɛ fi è ge Tata le.”

1Kol 2

Saaka wvù le bó to nu ɛ ta Klistu yî kentam e

¹ Boom bo bwɛɛm e, ben ekume seke me nto ntos ê ben e keenfewcɛ saaka Nyo' ê ben wvù to shee nu ê kenyilɛ le. Me nto mbaa ento fiem enfewci bô leme di yeke kenɛɛ bvufee bwem ke,

² njefo me nto nu ɛ nlese lo le ke me nu ɛngɛɛ bvufee yî fiɛɛ fimew e ɛfey keenfewci ke ɛ è nu ɛkumɛ Jisos Klistu maan, ɛfey mvunciim, no bó to taɛ wvù yî kentam e ke.

³ No me nto nu beene, me nto n'wɛɛyi lo, nfane, nciinke.

⁴ Seke me nto njemyi nfewci saaka wvù jee ê ben, me nto mbaa njemyi ɛ è nu bô díɛw bvufee yî yeke ke. Me nto njemyi ɛ è duŋci mvuŋgay mvu Keyoy ke Yuule le keɛɛy kedvu.

⁵ Me nto ŋɛɛ nonɛn, wvu le fo ben elese fitele yî bvufee bvɔ wee wvu wum e ke, geenɛn le ben elese ɛ è nu yî mvuŋgay mvu Nyo' le.

Bvufee bvɔ Nyo' le

⁶ Bonyii bô nu ɛ bó leeme wase bô bo Nyo' tɛmyi, nu ɛ bese ké no nyaa bvufee ê bó. ɛ ke bvufee bvun nu bvɔ fokuse fɛn kenɛɛ naa bvɔ yɛɛ le wvù saake fokuse fɛn keseen ke. Mvuŋgay mvubole nu ke eka ela ɛcici.

⁷ Bvufee bvɔ Nyo' le bvɔ baay bvù bese fewci bvun nu fiɛɛ ɛ fí to shee nu ê kenyilɛ le ɛ bonyii yaa kee ke. Bvufee bvudvu to seyse Nyo' ɛ è bɛɛ lo ɛ won se ke kew, keeyuu eto ege é beene enu ente jo bvukuke bwew.

⁸ Ke bvufee bvun nu ɛ wee mvu ŋgoo bonyii bô saake fokuse fɛn e to kee kenyi kedvu ke, njefo é bó to bee keekee, tu bó to baa eta Tata wvù nu Nfon bvukuke yî kentam e ke.

⁹ Geenen, no bó to saɲɛ le, “Mwɛɛm mvù wee ke baa yuu yɛn wase, ɛ wee ke baa yuu yuw wase, ɛ wee ke baa yuu kpawci wase, nu mvú mvù Nyo' to seysɛɛ fô bonyii bò kooŋke wvú le.”

¹⁰ Nyo' nu ɛ ge Keyoy kew ɛ duɲɛ mwɛɛm mvun ê beene. Keyoy ke Nyo' le ké no taasse mwɛɛm mvunciim, taasse naa noo kenyile ke Nyo' le,

¹¹ njefo ke è nulo é wee mvu ekieɛ fieɛ fi wee mvu kpawci fô fitele fiew e efey keyoy ke mwɛɛn e kè nu yî ye le ke. È nu ke lɛɲlɛɲ no ke è nulo é wee ekieɛ fieɛ fi Nyo' kpawci efey Keyoy ke Nyo' le ke.

¹² Ke keyoy kè Nyo' to nyaɛ ê beene nu ke yî woɲ wvun e ke. Keyoy kin to nɛ fô Nyo' le keege é beene ekeè bombuwma bocii bò Nyo' nu ɛ buw beene dvú.

¹³ Bese ɛ mum ɛ no fewci mwɛɛm mvun ɛ è yaa nu bô díew yì bó yɛyi bô bvufee bvú wee wvu wum e ke. Bese fewci ɛ è nu bô díew yì è yɛyi Keyoy ke Yuule bese dvú, mum yuuse mwɛɛm mvu keceɛy mvu Keyoy ke Yuule le ê bonyii bò keɲke Keyoy ke Yuule.

¹⁴ Ke wee wvù baa keɲke Keyoy ke Yuule yî ye le ké fiisen mwɛɛm mvu Keyoy ke Nyo' le ke. Wvú nɛn'yi fiew no yene le è nu mwɛɛm mvu keyuɲɛɛ le. ɛ ke è nulo é wvú ekieɛ no mvú nu ke, njefo è nu mwɛɛm ɛ è nulo é ege ke Keyoy ke Nyo' le é wee sɛ kieɛ.

¹⁵ Geenen, wee wvù Keyoy ke Yuule nu yî ye le nulo etasse fieɛ ficii ntay ekieɛ kenyi kedvu, ɛ ke wee nu dvú wvù nulo etasse mwɛɛm mvu wvuwe wee le ke.

¹⁶ Fí nu ɛ bó ɛ saɲ le, “Ke wee nu dvú wvù kee fieɛ fi Nyo' kpawci wvu le wvú etefe Nyo' ke.” Geenen, beene keɲke boɲkpawcɛ ɛ è nu bò Klistu keɲke.

1Kol 3

Bonyii bo Klistu le enù diuw mwaan

¹ Boom bo bwɛɛm e, seke beene to nu, ke è to nulo é me enjemyi ê ben diewe ê bonyii bò yuuke wase ɛ è nu ê Keyoy ke Yuule ke. ɛ me mum no njemyi ê ben diewe ê bonyii bò bɛɛ bii ɛ è nu mwɛɛm mvù nyam ye shieele le, noo ê bò bɛɛ diewe mvunlɛy mvu boom e yî Klistu le.

² Me nto nyaɛ ɛ è nu emben ê ben. Me nto mbaa nyaɛ mwɛɛm mvudien mvù tɛmyi ke, njefo ben to baa taw wase ke. ɛ naa ɛ to ɛ buy keseen e nu ɛ ben baa taw wase ke.

³ Ben bɛɛ bii ke ɛ è nu mwɛɛm mvù nyam ye shieele le. No ben bɛɛ ghæke keɲghew, waale diwaa, tu ke fifin duɲci le ben bii ɛ è nu nyam ye le? Ke fifin duɲci le ben bɛɛ keɲke gee di bonyii bo fokuse fɛn e?

⁴ Wee nɛn'yi no duu le wen bii fiwene ɛ è nu Baul e, wee mvu le wen bii ɛ è nu Abolos e. Ke fifin duɲci le ben gee ɛ è nu gee di bonyii bo fokuse fɛn e?

- ⁵Abolos nu yεε, ε Baul nu yεε? Bee wvú bocii nu κε lo boom bo lemme le bo Tata le bò to gee ε ben σε lese fitele yî ye le, ε wee lemte diew lemme no Tata nya ê wvú.
- ⁶Diem lemme to nu keejewe ε è nu ηgow, ε di Abolos e nu keefuci joo, geenεn ε è gee Nyo' ε yî σε kuu.
- ⁷Nonεn, κε wee wvù jeywi ηgow bô wee wvù fuci joo koole fiεε le κε. Ê mey Nyo' maan wvù gee ε yî σε kuu.
- ⁸Wee wvù jeywi bô wvù fuci joo nu κε ληληη, ε Nyo' nu ke emawce wee tfuu bii lemme diew e.
- ⁹Bese nu ε taashe ε no lemte lemme di Nyo' le. Ben ε mum ε no nu wεε Nyo' bvuu nu yew ye.
- ¹⁰ε Nyo' mum buw me bô bvufee ε me nlese kenffuy ke yew yidvu le diewe wee n'yoow wvù looci kee lemme diew e. No me nto nleseε nonεn, wee mvu ε mum ε no yote yew yidvu. Wee edioo eyote yî kenffuy kin e, no keè no wvù yote.
- ¹¹Ben ekeè le kenffuy mey κε kè bó to nu ε lese wase kè è nu Jisos Klistu, ε κε è nulo é wee ebvuu elese kemew κε.
- ¹²Bonyii ε mum ε no yote yî dvú le bô mwεem jεey jεey. Wee mvu jaa jo ε è nu ketwaa ke bigew e kè yεele, ε wee mvu jo kè baa, ε wee mvu jo εta yò lumte σε no yote dvú. ε wee mvu jo ε è nu bite, wee mvu yun, wee mvu shá σε no yote dvú.
- ¹³É bó cim yote nεε, tu diuu too lo dì bó nu ke eyen no lemme di wee le nu seke dí ε buy εmwa Diuu dì Klistu nu ke etoo bô ηguy, ε ηguy wvudvu nu ke emomte lemme di wee le ε bó yene no dí nu.
- ¹⁴É fiεε fi wee yoke yî kenffuy kedvu le ke emey σε fí ε fie, é mwεten emum ekeηke mmawce.
- ¹⁵Fí ε fie, é mwεten elase mmawce we, é wvú bô εkolε kew eboy, geenεn κε diewe wee wvù fey ηguy e.

Bonyii bo Klistu le nu yew Nyo'

- ¹⁶Κε ben kee le ben nu yew Nyo' ε Keyoy kew ke wvú wvù Nyo' le cee yî yene le le?
- ¹⁷É wee befe bô yew yidvu, tu Nyo' nu ke elεε lo mwεten, njefo è nu yew ε è nu yi Nyo', ε ben nu yew yidvu.
- ¹⁸Fo wee elεεle εkolε kew κε. Ê wee mvu ben e kpwaake le wen κεηke bvufee yî woη wvun e, é wvú tu keyuη wvu le wvù ekeηke bvufee bvu bvufee.
- ¹⁹Me njemyi nen njefo mwεem mvù bonyii bo fokuse fen yene le è nu bvufee nu ε Nyo' yene ε è nu keyuησεε. Ê nu fí fi bó to saηεε le, “Nyo' joo κε ε è nu bvufee bvu bonyii bò feefene le koole bó dvú.”

²⁰ Ɛ fí bvuu nu ɛ bó ɛ saŋ le, “Tata kee le mwɛɛm mvù bonyii bo bvufee le kpawawci nu naa lo mvu ɛcici.”

²¹ Fí ɛ mum ɛ no nu le, fo wee esaalè ye le wee mvu nu wvuwɛn ke, njefo mwɛɛm mvunciim nu mvunɛn.

²² Baul kɛɛɛ Abolos kɛɛɛ Sefas kɛɛɛ woŋ wvun kɛɛɛ nshii kɛɛɛ kpwe kɛɛɛ mwɛɛm mvu keseen kɛɛɛ mvu bɛɛ sɛ keeke eto, nu mvunɛn mvunciim,

²³ ɛ ben nu bo Klistu le, ɛ Klistu nu wvu Nyo'.

1Kol 4

Fo bonyii bo Klistu le ebenseè ye bô wee ke

¹ Fí be jee le ben ejoð le bese nu boom bo lemme le bo Klistu le bô Nyo' nu ɛ nya lemme diw di saaka wvù to shee nu ê kenyilɛ le can yibole.

² Fí ɛ mum ɛ no nu le, wee wvù bó nu ɛ nya lemme can ye le kɛŋke keegeɛ no cee ekolɛ we gomte.

³ Fô me le, ke ben, kɛɛɛ yew nsaw mi saake me é me en'yɛne le è nu fiɛɛ ke. Ke è cim nulo é me ensaw ekolɛ kem ke.

⁴ Ke fiɛɛ nu dvú fô fitele fiem e fi saake me ke. Geenɛn, ke fifiɛ mum duŋci le me n'yuule lo ke. È nu ke Tata wvù nu ke esaw me.

⁵ Nonɛn, fo ben emum esumtene nsaw sɛ kefew ɛ kocɛn ke. Ben eɛɛy Tata é wvù ke eto. È nu wvù wvù nu ke ebvuse ɛmwa mwɛɛm mvù nu keseen ɛ bó ɛ nyilɛ ê ejiwɛ le, ebwaashɛ mwɛɛm mvù bonyii kɛŋke shém yibole. Nonɛn, é Nyo' emum ke ebense wee tfuu wvù bó kɛŋke keebense.

⁶ Boom bo bwɛɛm e, mwɛɛm mvun mvù me njemyi ekumɛ bee Abolos nu keefi ben, wvu le ben eyɛɛyi fô bese le keegeɛ fiɛɛ bii ke ɛ è nu fiɛɛ fí bó nu ɛ saŋ e. Nonɛn, é ben saa ebvuu esaale ye bô wee mvu joo wee mvu ekuse ke.

⁷ È ge yɛɛ le wo enu jɛɛy fô wee mvu le? È nu la fi wo kɛŋke fi nu sɛ bó nya lo ê wo? No fí nu nonɛn, wo ɛ ghan nɛɛ ɛ sɛ no saale ye ke diwɛ ke bó nya lo ê wo ke?

⁸ Ke ben fɛn joo le ben kɛŋke wase fiɛɛ ficii, nu wase bonyii bo bvukukɛ le, saake wase diwɛ bonfon e sɛ bese? Wee ejo ɛ ben be nu wase bonfon wvu le bese ebon fô ben e é beene esaake bocii.

⁹ Me n'yɛne le Nyo' nu ɛ kaa ɛ gɛɛ bese bô nu boom bo ntum e bo Jisos e bincilɛjimɛ le. Bese nu diwɛ bonyii bô bó gene keeyuwɛ ya le. Bese nu ɛ tu wase kenjinjin yí woŋ wvun e kè bonyii bô bonceendaa bo Nyo' le etaalè.

¹⁰ Bese nu ɛ tu wase biyuŋ nje Klistu, geenɛn ɛ ben nu bonyii bo Klistu le bô feefene. Bese nu bonyii bô wɛɛyi, ɛ ben nu bô tɛmyi. Bonyii wvumte ben, joo bese ekuse.

- 11 Ɛ kɛw lo ɛ to ɛ buy keseen e, nu ɛ bese nu jɛɲ, ɛ kendoɲ yumte bese. Bese jiise ɛ è nu bincaanca bi ndvú le, ɛ bonyii nyewle bô bese, ɛ bese yaa kɛɲke fo nce kɛ.
- 12 È katene bese lemte bô can yese sɛ diee fiɛɛ. Bonyii dioo nan'yi bese, ɛ bese no lɛke ɛ è nu kembonen fô bó le. É bó dioo bone bikaa ê bese ɛjim, é bese kuu kɛ ɛ è nu shém.
- 13 É bó dioo jemyi díɛw yì befe ê bese, é bese no tfuuse ɛ è nu bô yì læetene. Ɛ to ɛ buy keseen e, bese nu diɛwɛ mwɛɛm mvù bó laɲ ɛɲkoɲ. Bese nu ɛ tu wase binfo bi mwɛɛm e yî woɲ wvun e.
- 14 Kɛ me nsaɲke mwɛɛm mvun ê ben nɛn lɛ me ɲgomte lɛ ben ewuumene kɛ. Me nteete lo ben diɛwɛ boom bem bò nu fitele fiem e.
- 15 É ben cim kɛɲke naa bonyii nteen bò yɛɛyi ben ɛkumɛ Klistu, tu kɛ è mum nu lɛ ben kɛɲke bo'icen nteen kɛ. È nu me wvù icee wene, ɲjefo è to ge me ɛ ben sɛ taashe ben ɛ bo Klistu Jisos seke me nto nfewcɛɛ saaka we wvù jee ê ben.
- 16 Nonɛn, me ɛ mum ɛ no nɛke lɛ ben etomyì ɛkale kenɛn kɛ naa no me ntomyi kem.
- 17 È nu shiee wvù me ntum Timatio fô ben e wvù nu waa wɛm yî Tata le. Wvù nu fitele fiem, ɛ wvù leeme tɛn yî saaka wvun e bô fitele fimwaaɲ. Wvù nu ke eto ebvuu etamcɛ ben no nce wɛm diɛwɛ wee Klistu le nu. Fiɛɛ fi wvù nu ke esee nu kɛ fí fi me ɲghane n'yɛɛyi bintaashe bi bonyii bo mbee le bicii dvù mondvuum e monciim.
- 18 Bonyii bomew nu ɛ kɛw wase ɛ no bensee ye ɲjefo bó kpwaake lɛ kɛ me mbɛɛ ɲke ento ê ben e kɛ.
- 19 Geenɛn, é Tata beɲe lo, tu è sheke caan é me embvuu ento. É me nu ndioo ɛ nto, nɛ n'yɛn lɛ laa bonyii bò bensee ye bodvu kumte kɛ ɛ è nu diuw nuu bó kɛɲke mvuɲgay mvù nɛ fô Nyo' le lɛ,
- 20 ɲjefo kɛ bvunfon bvú Nyo' le nu fiɛɛ fi diuw wvù kumɛn e kɛ. È nu fi mvuɲgay mwew e.
- 21 Ben shieele lɛ me ɲke entoo nɛɛ? Ben shieele lɛ me ɲke entoo bô ɲgbwan nuu bô fitele fi kɛɲkoɲɛn e noo nyɛkeey ɛ?

1Kol 5

Bó ebvuse wee nnyɛn kenjaɲ ê bonyii bo Klistu le ente

- 1 Me ɲkɛɲke lo ɲghaw keen'yuw lɛ wee mvu ê ben ente nu ɛ kɛw wase nce nnyɛn kenjaɲ. Ɛ nnyɛn kenjaɲ yin nu naa yì è yaa nulo é wee wvù yaa kee kɛ Nyo' emom kɛ. Me n'yuuke lɛ wee mvu ê ben ente joo kpwɛɛ ice.
- 2 Ben yɛn kfuu yin nnyɛn e nɛn, ɛ faɲɛ yaa ebeele lo, ɛ no bensee ɛ è nu ye le? Ben kɛɲke keebvuse lo kfuu wvuwe wee wvù mom fifiɛ fiɛɛ ê ben ente.

- ³ Naa no me mbaa enu beene ejise, nu ε me nu κε beene ê keyoy e leηληη diewe me nu beene. Me nu ε nsumten wase nsaw
- ⁴ Ê diee di Tata wesebeene wvù Jisos e ekume wee wvù mom kfuu fifie fiεε. Ben ke dīoo ε shii, ε me nu beene ê keyoy e, ε mvuηgay mvu Tata wesebeene wvù Jisos e nu ten fò,
- ⁵ ε ben jo wee wvudvu, nya can Satan e, é wvú ebefe bô nyam ye ye, é keyoy kew ke eboy diuu di Tata wesebeene wvù Jisos nu ke ekase eto le.
- ⁶ Ben saale ye nen ε fī yaa jee κε. Ke ben kee le bó ke joo fintuηleen nen caan tow ê mvuum e, ε fī mum ge ε mvuum modvu monciim ben e?
- ⁷ Ben ebvuse fintuηleen fi è nu nce wvu yvum ê ben ente, é ben emum enu bonyii bô bofe diewe mvuum mò bó baa gee fintuηleen jó le κε, ε è nu naa no ben nu. Ke ben kee le Klistu nu Waa Njee wvù Nyo' to gee ncese dvú fô beene le κε diewe wvù bó ké no sēele seke Nkaw Daηefey e le?
- ⁸ Nonen, beene nu diewe bonyii bô diee Nkaw Daηefey e ε è nu bô bleed wvù bó baa gee fintuηleen jó wvù è nu mvuntelem mvù yuule noo kecεεy. Fo beene enù diewe bonyii bô diee Nkaw wvun ε è nu bô bleed wvu bvuyvuum e wvù bó nu ε gee fintuηleen jó wvù è nu nce wvù befe noo keηge kè befe κε.
- ⁹ Ê ηwa' wvù me nto saηεε fô ben e, nu ε me nto nsaj le fo ben etaashì ben ε bonyii bô jaηke kenjaη κε.
- ¹⁰ Ke me nto njemyi ε è nu ekume bonyii bo ê woη jan bô jaηke kenjaη, keηε bô yεele ejise yī mwεem e, keηε bô ηgoyte mondvuum joo mwεem mvu bonyii le, keηε bô bunlee bonyo' bo εcici κε. É è nu boba, é ben ekeηke keene lo yī woη wvun e.
- ¹¹ Me nto njemyi ε è nu le fo ben etaashì ben ε bo wee wvù teηe ekole kew le wen nu waa bwee wesebeene yī Klistu le, bvuu jaηke kenjaη, keηε yεele ejise yī mwεem e, keηε bunlee bonyo' bo εcici, keηε nan'yi bonyii, keηε wuu mbvuum ε mó koole, keηε ηgoyte mondvuum joo mwεem mvu bonyii le κε. Fo wee emom naa lo edieken bô kfuu wvuwe wee κε.
- ¹² Ke è nu bvudvuu bvuseεbeene keesaake bonyii bô yaa nu ê kentaashe ke bonyii bo mbee le ente κε. Bonyii bô è nulo é beene esaake nu bô nu ê kentaashe ente.
- ¹³ Ê nu fī fī Nwa' Nyo' gayte le, “Ben ebvuse wee wvù keηke keηge kè befe ê ben ente.” È nu ke esaw Nyo' bonyii bô yaa nu κε ê kentaashe le.

1Kol 6

Fo wee mbee egen eshomse mvu ê bonyii bô yaa nu κε bo mbee le

- ¹ Ke fī baa enu leη le é wee ê ben ente keηke fiεε bô waa bwee, é wvú fey keegen shomse fwe dvu bonyii bô è nu bo Nyo' le, kaa gen dvú ε è nu fwe dvu bonyii bô yaa gee mwεem teytey κε.

² Kε ben kee le bonyii bò è nu bo Nyo' le nu ke esaw bonyii bo yî won wvun e le? No è nu ke esaw ben bó, tu ke è nulo é ben esaw mwεem mvu wεmewεme ê ben ente?

³ Kε ben kee le beene nu ke esaw bonceendaa bo Nyo' le le? No fí nu nonen, tu è nulo é ben ekee naa ntay keesaw mwεem mvù kooyi yî nshii wvu keseen e.

⁴ Mwεem diewe mvumwe le ε dīoo kooyi, ben ε ghan nεε ε se no joo gene dvú ε è nu fwe dvu bonyii bò baa kenke naa lo bvudvuu ente jo kentaashε ke bonyii bo mbee le?

⁵ Ben ewuumen. Ê fen nu le ke wee nu naa lo dvú ê ben ente wvù kenke bvufee keesumten nsaw wee bô wee le?

⁶ Ben kaa nen'yi ε wee jo waa bwee gen shomse, shomse ε è nu ê bonyii bò yaa nu ke bo mbee le.

⁷ Ben keenu bvuu kenke bonsaw ê ben ente duñci le ben nu ε gbwe wase. Kε ben nulo ecine é egee bonyii bomew mwεem mvù befe fô ben e le? E ke è nulo ten é ben ecine é efiike bonyii bomew ben e?

⁸ Geenēn, è kaa nen'yi ben gee mwεem mvù befe bvuu fiike kenfiw, efey mvunciim, ε wee no gee mvumvun mwεem ε è nu bô waa bwee.

⁹ Kε ben kee le ke bonyii bò gee mwεem mvù befe yaa nu ke ekenke bvudvuu ente jo bvunfon bvū Nyo' le le? Fo ben elēlē bikuu binen ke. Kε bonyii bò jaanke kenjañ, kenεε bò bunlee bonyo' bo εcici, kenεε bò jaanke bokε' bo bonyii bomew e, kenεε bolemse bò kaase joo bomew, kenεε bokεne bò kaase joo bomew,

¹⁰ kenεε bocooñ, kenεε bonyii bò yεele εjise yî mwεem e, kenεε bò wuu mbvuum ε mó koole, kenεε bò nan'yi bonyii, kenεε bò ngoyte mondvuum joo mwεem mvu bonyii le, nu ke ekenke bvudvuu ente jo bvunfon bvū Nyo' le ke.

¹¹ Mwεem mvun nu mvù ben bomew to gee fwele. Geenēn, ε Nyo' ke cukε ben, caw gεε, ε ben no nu teyey ê wvú εjise. Wvú to ge mwεem mvun bô mvuñgay mvu diee di Tata Jisos Klistu le bô mvu Keyoy kew ke wvú wvù Nyo' wesebeene le.

Fieε fi è nulo é wee egeè bô ye ye

¹² Wee nulo eduu le wen kenke mvuñgay keege fieε ficii fi wen kooñke. Geenēn, me ε no ñgayte le ke è nu fieε ficii fi nulo efi wee ke. E wee nulo eduu ke le wen kenke mvuñgay keege fieε ficii fi wen kooñke. Geenēn me ε no ñgayte ke le, ke è nulo é me encine é fieε fimew ejo me etfuse é me entu nfwa fí ke.

¹³ Wee mvu ten nulo eduu le, “Mwεem mvudien nu nje tee, ε tee nu nje mwεem mvudien.” Geenēn ben ekeè le Nyo' nu ke ebefe bô mvú mvunciim. Kε ye wee nu yî bó ejaanke kenjañ dvú ke. Ye wee nu ε è nu keelemte dvú fô Tata le, ε è kenke wvú wvù Tata ye yidvu.

- 14 No Nyo' to bvuseε Tata wesebeene yî kpwe le, nu ke læŋlæŋ no wvú nu ke ebvuse beene bô mvuŋgay mwew mvudvu yî kpwe le.
- 15 Kε ben kee læ ye yene nu biba bi ye Klistu le le? È nulo é wee ebvuu ege nεε se jo keba ke ye Klistu le egen etaashε bô kpwoon nsake? Kε è nulo é fí enù nonen ke.
- 16 Kε ben kee læ é wee taashi wase ye ye bô kpwoon nsake tu bô wvú nu wase ye miaaŋ e? È nu fí fi bó to saŋεε læ, “Kpwoon bô diemsen ké taashi, mum tu wase wee mwaan.”
- 17 Geenεn, wee wvù taashi bô Tata nu ε bô wvú nu wase fiεε fimwaan ê keyoy e.
- 18 Ben elewtè nce nnyen kenjaŋ. Mwεεm mvù befe mvumew mvù wee gee nu ε ke wvú gee ε è nu yî ye ye le ke. Geenεn, wee wvù jaanke kenjaŋ gee kebefe ε è nu bô ye ye.
- 19 Kε ben kee læ ye yene nu yew yî Keyoy ke Yuule kè Nyo' nya ê ben cee dvú le? Kε è keŋke ben bikuu binen ke.
- 20 Bó to guy lo ben kenlum e. Nonen, ben egeè mwεεm bô ye yene ε è nu mvù etoò bô mbense fô Nyo' le.

1Kol 7

Saaka wvu ekumε kpwoon bô diemsen

- 1 Me nu enya ntfuse keseen ekumε mwεεm mvù ben to saŋεε fô me le. Fí jee læ fo wee ekum kpwoon e ke.
- 2 Geenεn, no mmom yî ekumε kenjaŋ nu ekfuŋ, fí jee læ diemsen ekeŋkè we kpwoon ε kpwoon keŋke we diemsen.
- 3 E diemsen keŋke keegee diew lemme di diemsen e fô kpwεse le, ε kpwεse keŋke keegee tεn diew lemme di kpwoon e fô dweese le.
- 4 Kε è bvuu keŋke kpwoon mvuŋgay fô ekole kew e ke, è keŋke dweese. È nu ke læŋlæŋ no ke è bvuu keŋke diemsen mvuŋgay fô ekole kew e ke, è keŋke kpwεse.
- 5 Fo wee ebase jim ê wee le ε è baa nu læ è seyse ben bocii ε bee, ε ben nu ege nonen ke yî kefew e, wvu læ ben nulo emum enya bikuu binen sekekis yî bunle le ke. É ben dioo ε ge nonen, mum kase no nu yî kentaashε kenεn e no ben se shee nu, wvu læ fo Satan ke ene eteeyi ben njefo ke ben yaa kee keekemsen bô bikuu binen ke.
- 6 Me njemyi fin ke diwε ntefe le, ke è nu nci ε me nyaa ê ben ke.
- 7 É è be nu diwε me, é me enshieele læ wee tfuu enu se kpwoon ke diwε no me nu. Geenεn, etu ege nεε ε wee tfuu keŋke ke ye nnya yî Nyo' nu ε nya ê wvú. Wee mvu keŋke yin nnya ε wee mvu keŋke ye.

⁸Keseen, fô bonyii bò bæe bó embeŋ e noo bò nu bokε' bo boŋkfu le, me ε no ŋgayte le, fí jee le bó emey nu bó embeŋ ke diewe me le.

⁹Geenen, é bó nu se è nulo é bó ewensen bô ye, é wee gom kpwoon keŋe diemsen ε bô wvú taashε no nu, njefo fí jee keetaashε enu nonen, efey keekpwee bô ye yì ŋeyεn.

¹⁰Fô bonyii bò nu wase yéw e, me ε no ŋgayte le kpwoon eyenè fô wvú egawsen bô dweese. Ke wvun nu nci ε wvú buy ê me ke. Wvú buy ε è nu ê Tata.

¹¹Geenen, é wvú gawsen lo, tu wvú keŋke keemey enu wvú embeŋ. É è baa nu nonen, é wvú kase tu yew dvu dweese ε bô wvú mançe mwεem mum no nu. E è nu ke ten fí fi me ŋgayte ê bolemse le ke diemsen keŋke keekuŋ kpwee ke.

¹²Fô bomew bonyii le nu ε me ŋgayte ê bó le, é wee wvù nu wee mbee keŋke kpwoon ε kpwoon wvudvu yaa nu ke wee mbee, ε kpwoon wvudvu kooŋke le bô wvú enu, fo diemsen wvudvu ebvuse wvú ke. Fifin nu ε è gayte me. Ke è gayte Tata ke.

¹³Kpwoon é no keŋke dweese ε diemsen wvudvu yaa nu ke wee mbee, ε wvú kooŋke le bô wvú enu, fo kpwoon wvudvu ebuy ten ke.

¹⁴Me njemyi nonen, njefo é diemsen wvù yaa nu ke wee mbee keŋke kpwee ε è nu wee mbee, tu Nyo' joo ke wase wvú diewe wee we le nje kpwee. Kpwoon ten wvù yaa nu ke wee mbee é no keŋke dweese ε è nu wee mbee, tu Nyo' joo ke wase wvú diewe wee we le nje dweese. É è baa nu nonen, tu ke boom bobole yuule ke. Geenen, no fí nu, nu ε bó yuule.

¹⁵É wee wvù yaa nu ke wee mbee ne ε no shieele keegawsen, é bó cine dvú. É fí kooy nonen fo diemsen keŋe kpwoon wvù nu wee mbee ekpwaake le wen keŋke ke keenu bô wvú ke. Nyo' to teŋe beene le beene eceè ε è nu yì nyεkeey e.

¹⁶Wo wvù kpwoon, wo kee fεε le ke è nulo é wo ke ege é Nyo' eboyse dwee wo? E wo wvù diemsen kee ten fεε le ke è nulo é wo ke ege é Nyo' eboyse kpwee wo?

Wee emey ke enù no Nyo' to teŋε wvú ε wvú nu

¹⁷Fieε fi nu, nu ke le wee eceè nce ε è nu wvù Tata nu ε nya ê wvú. Wvú enù ke no Nyo' to teŋε wvú ε wvú nu. Fin nu fieε fi me nteete bintaashε bi bonyii bo mbee le dvú mondvuum e monciim.

¹⁸É wee nu ε bó to teŋe wvú ε bó ε tfuse wase wvú yew, fo wvú egomtè keenu diewe wee wvù bæe ntffuse le ke. É wee nu dvú wvù bó to teŋε wvú ε wvù bæe ntffuse, fo wvú egomtè le bó etfuse wvú yew keseen ke,

¹⁹njefo é wee nu ε bó ε tfuse wvú yew keŋe bó baa tfuse ke, tu ke fifie keŋke fieε kee ke. Fieε fi nu shiee le nu le wee egεélè bonci bo Nyo' le.

²⁰Wee tfuu emey ke enù no Nyo' to teŋε wvú ε wvú nu.

21 É bó to teje wo ε wo nu nfwa, fo wo ebuukè ke. Geenɛn, é wo keɛke je keebuy bvunfaw e, é wo buy fiuw.

22 Ben ekeè le wee wvù Tata to tejeε ε wvù nu nfwa nu ε wvù buy wase bvunfaw e fô Tata le. Ε è nu ke leɛleɛ ten no wee wvù bó to tejeε ε wvù yaa nu ke nfwa, nu wase keseen nfwa fô Klistu le.

23 Bó to guy lo ben kenlum e. Fo ben enù bonfaw bo bonyii le ke.

24 Nonɛn, boom bo bwεem e, wee emey ke enù bô Nyo' ê je yì wvù to tejeε wvù ε wvù nu jó le.

Ntefe ê bokpwεε noo bokε' bo bonkfu le

25 Keseen, ekumε fi bokεne kenεε bolemεε bô bee bokpwεε le, nu ε ke Tata nu ε see fiεε fi me enɔay ke. Geenɛn, ε me nu enya wεm ηkpawawce diewe wee wvù Tata nu ε koo shen fô wvù le ε wee nelo ebee fiεε fi wvù gayte le.

26 Me ηkpwaake le nje ηɔew wvù nu keseen, nu ε fí jee le wee emey ke enù no wvù nu.

27 É wee keɛke wase kpwoon, fo wvù ebvuu egomtè keekuj wvù ke. Wee é no nu se kpwoon, fo wvù ebvuu egomtè kpwoon ke.

28 Geenɛn, é diemsɛn yen le wen nu etaashe bô kpwoon é bô wvù enu, tu wvù baa ge kebefε ke. Ngon kpwoon ε gen ê diemsɛn e, tu wvù baa ge ten kebefε ke. Geenɛn, ben ekeè le bonyii bô nu ε taashe nu ε bó nu ke ekeɛke bonɔew yì won wvun e, ε fô me le nu ε me ηgomte keeɛgemηgem ben yì fifin e.

29 Boom bo bwεem e, fiεε fi me njemyi nu le kefew kfufe wase baay keejewsee yì mwεem mvu yì nshε le fen e. Ε kew yì keseen e ε gen lo, bonyii bô keɛke wase bokεne enù diewe ke bó keɛke ke.

30 É bonyii bô beele kpwe enù diewe ke bó beele ke, é bô lanlanε enù diewe ke fiεε jee bó le ke, é bô guyte mwεem enù diewe bó baa keɛke naa lo fiεε ke.

31 É bonyii bô gee mwεem yì won wvun e enù diewe ke bó keɛke naa lo fiεε keεε bô won wvun ke. Me njemyi nɛn, njefo won wvun no wvù nu keseen nɛn, nu ε wvù fele lo.

32 Me ηgomte le ben enù ε fiεε yaa jewsee ben ke. Wee wvù nu se kpwoon ké no gεεle bvufee yì saaka wvu ekumε Tata le no è nulo é wvù egeè ke ε è nu fiεε fi Tata eyuuke njon bô wvù.

33 Ε wee wvù keɛke kpwoon ké no gεεle bvufee ε è nu yì mwεem mvu yì won wvun e no è nulo é wvù egee fiεε fi ye ejee kpwεε.

34 Ε wvù mum no nu ε bvufee bwew ε gawsɛn. È nu ke leɛleɛ no fi kpwoon kenεε ηgon kpwoon wvù baa keɛke diemsɛn e nu. Wvù ké no gεεle bvufee yì saaka wvu ekumε Tata le no è nulo é wvù enya ekole kew bô fitele fiew ficii ê wvù. Ε wvù

kenke diamsen ké no gæle bvufee ε è nu yî mwæem mvu yî woj wvun e no è nulo é wvú egeè fiεε fi ye ejee dweese.

³⁵Me njemyi nen ke keenfi lo ben. Ke è nu le me ηgomte keemban je fô wee mvu le ke. Me ηgomte ε è nu le wee ekieε fiεε fi nu leη, wvu le è nulo é wvú elemte fô Tata le bô fitele fimwaan ε bvufee bwew baa gawsen ke.

³⁶É diamsen leyte wan kpwoon, ε ne ε no yene le gee diwene fô wan kpwoon wvudvu le baa nu leη ke, ε ye ηeyte wase wvú baay, ε fí nu ke le bó etaashe enu, é wvú ge no wvú shieele, taashe bô kpwoon wvudvu. Tu wvú baa ge kebefε ke.

³⁷Geenen, diamsen wvù nu ε lese lo fô fitele fiew e le ke wen nu etaashe enu bô kpwoon wvù wvú leyte ke, ε wee yaa kane wvú le bó etaashe ke, ε wvú wensene ten bô ye ye, ε lese lo fô fitele fiew e le ke bô wvù nu etaashe ke, tu wvú nu ε ge leη.

³⁸Fí mum è no nu le, wee wvù nu ε taashe ε no nu bô kpwæse wvù wvú leyte nu ε ge ke leη. Geenen, wee wvù baa taashe bô we kpwæse nu ε ge naa leη baay.

³⁹Kpwoon ké no nu kpwæe wee seke dweese bæε dvú. Geenen, é dweese nelo ε kpwe, tu è nulo é wvú egen ê diamsen mvu le wvù wvú shieele é bô wvú etaashe enu, ε wvuwe wee kenke keenu wee Tata.

⁴⁰Geenen, no me n'yene fiem nu é kpwoon wvudvu mey lo nonen, é wvú eyuuke lo njoη baay. Me njemyi nen, ε me ηkee le me ηkenke ten Keyoy ke Nyo' le.

1Kol 8

Saaka ekumε mwæem mvudien mvù bó nu ε ge kentaje dvú fô bonyo' le

¹ Me nu njeme keseen ekumε mwæem mvudien mvù bonyii gee bintaje dvú fô bonyo' le. È nu keceey no bó duu le beene bocii kenke bvufee. Bvubvun bvufee nulo ege é wee ebensee ε è nu ye. Geenen, ε kenkoηen ké no yoote lo.

²É wee ne ε no kpwaake le wen kee mwæem, é wvú no kee le wvú baa looci wase kee no wvú kenke keeke ke.

³ Geenen, é wee kooηke Nyo', é Nyo' no kee mweten.

⁴ Nonen, fi ekumε keedieε mwæem mvudien mvù bó nu ε ge kentaje dvú fô bonyo' le nu ε beene kee lo le ke bonyo' ban nu naa lo fiεε ke. Nyo' mey ke mwaan ε wvumvu yaa bvuu nu dvú ke.

⁵Bonyii bomew joo le bonyo' bomew nu dvú fowe kenεε fokuse fen. E è nu keceey le bonyii joo le bonyo' nu nteen, ε bocee ekole nu ten nteen.

⁶ No bó cim joo nonen nu ε fô beene le nu ε Nyo' mey ke mwaan. E è nu wvú wvù nu Icee wesebeene wvù to bomεε mwæem mvunciim. E beene cee ε è nu nje ye. E Cee Ekole mey ke ten mwaan wvù è nu Jisos Klistu. E è nu wvú wvù bó to bomεε mwæem mvunciim fele can ye le, ε beene kenke ten nshii fele yî ye le.

⁷ Fifin nu fiεε ε è baa nu bonyii bocii ê beene ente bò kee κε. Bonyii bomew bò to shee gee bintaŋe fô bonyo' bodvu le nen'yi dīoo diee kfuu mvumwε mwεεm mvudien keseen no kpwaake κε le bó bæε diee ε è nu naa mwεεm mvù bó nu ε ge kentaŋe dvu fô bonyo' bodvu le. Ε mvuntelem mvubole mvu wεεyi mum no saake bó le mwεεm mvudien mvudvu nu ε befe bô bó.

⁸ Ben ekeè le κε è nulo é mwεεm mvudien ege é beene enu jεεy ê Nyo' ejise κε. Ke beene nu sε bó ε die é fifie ekeŋke fiεε keεge κε. Beene ε die, jεεy jεεy saa enu κε.

⁹ Fiεε fi nu, nu κε le ben bò kee mwεεm mvun eyenè fo wee ke nε ejo mvuŋgay mvù wee keŋke keεge fiεε fi wvú kooŋke dvú, ege ε è nu fiεε fi waa bwee wvù wεεyi egbwe lo κε.

¹⁰ É wvuwε wee wvù fitele wεεyi yen ε wo wvù kee mwεεm, diekene bvudvuu bvù bó gee bintaŋe fô bonyo' le, wvù saa ekoŋke ten keediee mwεεm mvudien mvù bó gee bintaŋe dvú fô bonyo' le?

¹¹ É wvú ge nonen, κε tu wo wvù kee mwεεm nu ε befe wase bô waa bwoo wvù wεεyi wvun wvù Klistu to kpweε nje ye.

¹² É fiεε fi wo ge fin emum enu kebefε ε wo ε ge ε befe bô fitele fi waa bwoo wvù wεεyi le, ε kebefε kedvu nu ε wo ge ε è nu fô Klistu le.

¹³ Nonen, ε è nu le fiεε fi me ndiee, ebeete bô waa bwεεm, me nsaa embvuu en'yuu eŋkum dvú κε, wvu le fo wvú ke egbwe κε.

1Kol 9

Mvuŋgay mvù waa ntum Jisos keŋke

¹ Ke è nulo é me eŋgee fiεε fi me ŋkooŋke le? Ke me nu waa ntum Jisos e? Ke me nto nu ε n'yen Tata wesebeene wvù Jisos e le? Ε κε ben ban nu sεw lemme diem fô Tata le le?

² É bonyii bomew cim kicine le κε me nu waa ntum Jisos, tu κε è nulo é ben ten ekicine κε. Ben nu nciise wvù duŋci keceεy le me nu waa ntum Tata Jisos.

³ Me ŋgayte fin ê bonyii bò sowte kenyi kem.

⁴ Ke bese keŋke keediekene bvuu wukene nje lemme din e?

⁵ Ε κε bese ten koŋ lo ejo bosese bokene bò è nu bonyii bo mbee le elene bô bó ke leŋleŋ diεwε Bitā bô boom bo ntum e bo Jisos e bomew noo boom bo bwee Tata Jisos e le?

⁶ Fí nu le è mey κε bee Banaban bò keŋke keelemte bô can yese sε diekene le?

⁷ È nu wee nci wvù la wvù lemte ε è taale κε wvú fô ekole kew e? É wee lem wεε, é wvú enu sε wvú ε die mwεεm mvù buyte wene dvudvu le? É wee ceyte ten nyám, é wvú enu sε wvú kamte emben yodvu wuu le?

8 Mwεem mvun mvù me njemyi mvun nu ε è nu ηkpawwεε wee wvu wum maan e? Ke fí nu ke ten ê bonci bo Nyo' le le?

9 Muses to nu ε saη ê Nwa' bonci le le, “É wee jo nyam le yí ele egiη, fo wvú esûm diuw nyam yidvu ke.” Ben kpwaake le Nyo' to jemyi nonen, ε è nu ekume nyám e?

10 Wvú to jemyi ε è nu ekume beene, ε bó to saη fô beene le njefo wee wvù lemte wεε kenεε è nu wvù gbweci lo, kenke keetaale fwe kee le wen nu ke ekooy fieε wene fodvu.

11 É bese fen nu ε jewe ηgow yi ê keyoy e ê mvuntelem mvunen e, é fí enu baay fô bese le keekenke mwεem mvu yî nshε le ê ben e?

12 É bonyii bomew kenke mvuηgay keegay le ben enya mwεem ê bó, tu ke è nulo é ben enya ê bese fesen lo?

Baul to baa ejo mvuηgay mwew mvu waa ntum Jisos e keefii mwεem ê bonyii ke Geenen, bese baa jo mvumvun mvuηgay ke. Bese nu ε kuu ε è nu shém yî fieε ficii le, efey fo fieε enu dvú keejewsee le fo saaka wvù jee wvu ekume Klistu egene fwe.

13 Ke ben kee le bonyii bò lemte yew ncese le nu ε mwεem mvudien mvubole ké no buyte ε è nu dvú, ε bonyii bò lemte fô ketaη ke ncese le ké no boonke ten fô mwεem mvù bó too dvú fó le?

14 È nu ke lenlen no Tata nu ε gay le bonyii bò fewci saaka wvù jee kenke keecee ε è nu yî dvú le.

15 Naa no fí nu nonen, me mbaa njo mvumvun mvuηgay ke, ε ke me nsaanke nen le ben ekew egee fimew fô me le ke. É è fen nu le wee ege é ye yin yì me nsaale nje diew Nyo' yì me nfewci ecici enu le me nfii mwεem ê bó, é fí ejee le me ηkpwe lo.

16 Ke me ηkenke keensaale ye le me nfewci saaka wvù jee wvu ekume Jisos Klistu ke. È ge Nyo' le me enfewci. É me ntun lo keenfewci, é Nyo' elaη ηgew yî yem e.

17 É è fen nu le me ηgee lemme din ε è nu ηkpawwεε wem, é me enshieele mmawεε. Geenen, ke è to seyse me ke. È to seyse Nyo' nya can yem e.

18 Kfuu sew wvù è nulo é me enkenke nje lemme din nu naa la? Sew wem nu ke le me enfewci saaka wvù jee ecici, n'yaa nleeme le ben elaake me no me nfewci saaka wvudvu ke.

19 Ben ekeè le ke me nu ê wee ekuse ke. Geenen, me nu ε ntfuse ekole kem le me enù n'fwa bonyii bocii wvu le me enso bó nteen, é bó enu bo Klistu le.

20 Me ndioo nu bee Bojuu, no ηgee ε è nu no bó ké no gee, wvu le me enso bó é bó etu bonyii bo Klistu le. Me ndioo nu bee bó no bó bii bonci bo Muses e, no ηgee ke diewe bó le. Geenen, n'yaa nu ekuse jo bonci ke, wvu le me enso bonyii ê bó ente.

21 É me ndioo nu bee bonyii bò yaa nu ê boba bonci kuse, no ηgee ke ten diewe wee wvù yaa nu ke ê bonci kuse. Me ηgee nonen, wvu le me enso ten bonyii boba

é bó enu bo Klistu le. Kε è nu le me mbaa nu ê nci Nyo' kuse kε. Me nu ê nci Klistu kuse.

²² É me ndioo nu ten bee bonyii bò wεeyi yî mbee le, ε me ntu ten diewe bó le wvu le me enso ten bó. Me nu ε ntu wase lo fiεε ficii fô bonyii bocii le, wvu le è nulo é me enge naa la fi è nulo é me enge é bomew ê bó ente ke eboy.

²³ Me ηgee mwεem mvun mvunciim nen nje saaka wvù jee wvu ekume Klistu, wvu le me ηke ηκηκηκε ten bvujonke bvù saaka wvudvu nyaa ê bonyii.

²⁴ Kε ben kee le yî kenlewte le nu ε bonyii ké no lewte nteen ε è ke so ke wee mwaanη κηκηκε mmawce? Nonen, ben ten elewtè ê je yî ben ke eκηκηκε mmawce le.

²⁵ Bonyii bo kensewce le bocii kenεε è nu kensewce ke kenlewte le, kenεε è nu kfuu kè nεε, ké no yεeyi naa ntay. Bó ké no yεeyi nonen, keeke eκηκηκε mmawce, ε mmawce wvun yaa nu wvù mey lo kε. Geenen, ε wesebeene mmawce nu wvù mey lo.

²⁶ Me nlewte kem kenlewte ηgene teytey ε è nu fô bó koole. Kε me nu diewe wee mvuηko wvù tfumyi ke lo mvuηko ncew ncew kε.

²⁷ Me nyεwle bô ye yem, momte le yî ebii ε è nu fiεε fi leη e, wvu le fo me ηke endioo ε nfewce wase diew Nyo' ê bonyii bomew, é Nyo' ekaa ebvuse lo me ηgoo le kε.

1Kol 10

Beene eyenè fo fiεε fi to kooyεε bô bonyii bo Islael ke ekooy bô beene

¹ Boom bo bwεem e, me ηgomte le ben ekume ntay fiεε fi to kooyεε bô bo'icee cee boseεbeene seke bó to lene ηkpwaante. Bó bocii to lene ekuse jo kembew, gen lente joo yi baay kuse,

² ε bó mum no nu ke diewe bó nu ε taashε bó bô bo Muses ê kembew kedvu noo ê joo yidvu le.

³ Bó bocii to diee mwεem mvudien ε è to nyaa Nyo',

⁴ wuu ten joo ε è nyaa Nyo', ε wvù to gee ε yî buyte yî kembaan e. Kembaan kedvu to nu Klistu wvù to lene bô bó.

⁵ Naa no bó to yene mwεem mvun e nen, ε nteen bó le no gee kε mwεem mvù fitele ebeete Nyo'. Ε wvù mum yuwyε boba bonyii, ε digvune dibole jiimen ηkpwaante jodvu.

⁶ Mwεem mvun mvù to kooyεε bô bó nu ntefe fô beene le le fo beene eκηκηκε shieε mwεem mvù befe diewe bó le kε.

⁷ Fo beene ebunleè bonyo' bo εcici no bó bomew to bunlee kε. Bó nu ε saη ekume bó le, "Bonyii to nu ε shii, dieken, wuken, ja we mum ley bine le no bine fô fimooso le."

- 8 Fo beene ejaan̄kè kenjan̄ no bó bomew to jaan̄ke, ε Nyo' ge ε bó kpweken bontfuke mbaanf̄ieε ncow botete (23,000) ȳi diuu dimwaan̄ e ke.
- 9 Fo beene emomtè Tata no bó bomew to momte, ε Nyo' ge ε yó tawye bonyii bodvu ε bó kpweken ke.
- 10 Fo beene ewvukenè no bó bomew to wvukene, ε Nceendaa Kpwe yuwyε bó ke.
- 11 Mwεem mvun mvunciim mvù to kooyεε bô bó nu ntefe fô bonyii le. ε bó to san̄ nen̄ le beene ban bô cee ε è nu kefew kè won̄ kaa wase le, ejoð wεε.
- 12 Nonen, wee wvù kpwaake le wen leeme t̄emyi ntay, eyenè fo wvú ke egbwe.
- 13 Ben ekeè le mmom yicii yì too fô ben e nu ke yì ké no too ten̄ fô bonyii bomew e. Nyo' nu Nyo' keceey, ε ke è nulo é wvú ecine é mmom eto fô ben e fey mvun̄gay mvunen̄ ke. É mmom too fô ben e, é wvú edūnce ke je yì ben efey jó eso mmom yidvu.
- 14 Nonen nsáa yem shém, me ε no nteete ben le ben elewtè mwεem mvu ekume bonyo' bo ecici.
- 15 Me njemyi ê ben nen̄ diewe ê bonyii bô ken̄ke bvufee le. Ben ekpwawce ntay le laa ke fiε fi me njemyi ê ben fin̄ nu keceey ε?
- 16 Ke beene ké joo fiko fi ntaashe le, nya keyoone ê Nyo', wu yì kentaashe le, tu beene nu ε taashe yì el̄eme ke Klistu le? É beene ké dioo ε jo bl̄eed wvu yì kefew kek̄ie le ε guuten̄ ε die yì kentaashe le, ke tu beene taashi ε è nu yì ye Klistu le?
- 17 No beene diee bl̄eed wvun̄ nen̄ nu bonyii nteen̄ ε ntuw nu ke mwaan̄, tu f̄i dun̄ci le beene nu ye yimiaan̄, njefo beene diee ke ε è nu ntuw mwaan̄.
- 18 Ben ejo kenfews̄en̄ fô bonyii bo Israēl e. Wee tfuu wvù diee fiε fô ketan̄ ke ncese le nu ε taashe wase bô Nyo' yì ncese wvudvu le.
- 19 Fiε fi me ngayte f̄en̄ nu le la? È f̄en̄ nu le mwεem mvù bó gee bintan̄je dvú fô bonyo' le ken̄ke fiε keege ken̄ε le bonyo' bodvu ten̄ ken̄ke fiε keege?
- 20 Ke è nu nonen̄ ke. Fiε fi me ngayte nu le boncese bô bonyii bô yaa kee ke Nyo' gee nu ε bó gee ε è nu fô bonceendaa bo d̄ewle le. Ke bó gee ε è nu fô Nyo' le ke. Me ε no ngayte le fo ben etaash̄i ben ε bonceendaa bo d̄ewle le ke.
- 21 Ke è nulo é ben ewuu ê fiko fi ntaashe le fi è nu fi Tata le, bvuu wuu ê fiko fi Satan e ke. Ke è nulo ten̄ é ben ediee mwεem mvudien̄ mvu Tata le bvuu diee mvu Satan e ke.
- 22 Fo beene egeè fiε fi shém eton'yi Tata ke. Ke beene t̄emyi fele wvú ke.

Wee egeè fiε ε è nu fi nulo efi ten̄ waa bwee

- 23 Beene bomew nen'yi no duu le bó ken̄ke mvun̄gay keege naa fiε ficii. Geen̄en, bó ekeè le ke è nu fiε ficii fi nulo efi wee ke. ε beene bomew nen'yi no duu ke le

bó kɛŋke mvuŋgay keege naa fiɛɛ ficii. Ɛ kɛ è nu tɛn fiɛɛ ficii fi nulo ege é wee eleeme tɛmyi yî mbee we le kɛ.

24 Fo wee egeè fiɛɛ kpwaake kɛ ɛ è nu ɛkolɛ kew kɛ. Wee ekpwaakè tɛn ɛkumɛ waa bwee.

25 Ben edieè nyam yicii yî bó geese fô way yaa sowte laa yí nɛ fɛɛ lɛ, wvu lɛ fo mvuntelem mvunen esaakè ben yî fifiɛ le kɛ.

26 Me njemyi nonɛn, njefo bó nu ɛ saŋ ê Nwa' Nyo' le lɛ, “È kɛŋke Tata woŋ wvun noo mwɛɛm mvunciim mvù nu yî dvú le.”

27 É wee wvù yaa nu kɛ wee mbee teŋe ben lɛ ben eto ediekɛn, ben é bee ɛ gɛn, é ben no diee fiɛɛ ficii fi bó nya ê ben yaa sowte kɛ. Fo fitele esaakè ben yî fifiɛ le kɛ.

28 Geenɛn, é wee mvu nɛ lo ɛ see ê ben lɛ mwɛɛm mvudien mvudvu nu ɛ bó ɛ ge kentaŋe dvú fô bonyo' le, fo ben edie kɛ wvu lɛ fo wee wvù be seŋe ê ben eyenè lɛ ben gee fiɛɛ fi befɛ, bô fo fitele esaakè wee.

29 Me ŋgayte fitele fin ɛ è nu fi wee wvù be seŋe ê ben e. Kɛ me ŋgayte ɛ è nu finɛn kɛ. Geenɛn, è nulo é wee mvu ebife lɛ laa è nulo é wen elu keege fiɛɛ fi wen kooŋke nje fí nu esaake fitele fi wee mvu le lɛ?

30 É me ndiee fiɛɛ ɛ me ɛ nya keyoone kedvu ê Nyo', é wee ebvuu esaake me nje la?

31 Me ɛ mum ɛ no nduu fiem lɛ fiɛɛ ficii fi wee gee, kɛnɛɛ wvú diee ɛ è nu fidien, kɛnɛɛ wvú wuu ɛ è nu fiwuun, ɛ wvú no gee ê je yî wee mvu yɛn lo, enyaà mbense ê Nyo' le.

32 Fo ben egeè fiɛɛ fi nulo ebefe bô mvuntelem mvu bonyii le kɛ, kɛnɛɛ è nu Bojuu, kɛnɛɛ è nu bonyii bô yaa nu kɛ Bojuu, kɛnɛɛ kentaashɛ ke bonyii bo mbee le bo Nyo' le.

33 Me momte fiem keeŋgee fiɛɛ ficii ɛ è nu fi wee tfuu eyuukè njoŋ. Kɛ me ŋkpwaake kɛ ɛ è nu ɛkumɛ ɛkolɛ kem maan kɛ. Me ŋkpwaake ɛkumɛ bonyii bocii lɛ me eŋge é bó ke eboy.

1Kol 11

No è nulo é wee enu seke wvú bunlee

1 Ben ebeŋenè me kɛ no me mbeŋene Klistu.

2 Me mbensee ben no ben kumyi me yî fiɛɛ ficii le bvuu bii mwɛɛm mvù me nto n'yɛɛyɛɛ ben dvú.

3 Geenɛn, me ŋgomte lɛ ben ekiɛɛ ntay lɛ ɛkolɛ ke diemsɛn tfuu le nu Klistu, ɛ ɛkolɛ ke kpwoon e nu dweese, ɛ ɛkolɛ ke Klistu le nu Nyo'.

⁴É diemsɛn bunlee lo, kɛnɛɛ wvú teete ntum Nyo' ɛ wvú ɛ baŋ ɛkolɛ, tu wvú shoose ɛkolɛ kew.

⁵Geenɛn, ɛ kpwoon bunlee, kɛnɛɛ wvú teete ɛ è nu ntum Nyo' sɛ wvú nu ɛ baŋ ɛkolɛ ŋkuuŋ, tu wvú shoose ɛ è nu ɛkolɛ kew. Kɛ jɛɛy jɛɛy wvuwe kpwoon bô wvù nu ɛ kpwaa ɛkolɛ nu dvú kɛ.

⁶É wvú yɛn lɛ kɛ wen nu ebaŋ ɛkolɛ kew kɛ, ɛ wvú mum kpwaa lo. Geenɛn, no è nu kɛŋ'wuumɛn fô kpwoon e keenu bô ɛkolɛ ɛ bó ɛ kpwaa, ɛ wvú mum baŋ lɛ ɛkolɛ kedvu.

⁷Kɛ diemsɛn kɛŋke keebaŋ ɛkolɛ kew seke wvú bunlee kɛ, njefo wvú nu nfiɛsɛn Nyo' bvuu nu bvujonkɛ bvɛ Nyo' lɛ. Geenɛn, ɛ kpwoon nu bvujonkɛ bvɛ dweese lɛ.

⁸Kɛ è to buy diemsɛn yî kpwoon e kɛ, è to buy kpwoon yî diemsɛn e.

⁹Kɛ Nyo' to bom tɛn diemsɛn nje kpwoon kɛ. Wvú to bom ɛ è nu kpwoon nje diemsɛn.

¹⁰È nu nje fifiɛ bô nje bonceendaa bo Nyo' lɛ wvù kpwoon kɛŋke keebaŋ ɛkolɛ kew.

¹¹Naa no fí nu nonɛn, fô beene bô nu ɛ taashɛ wase beene bo Tata lɛ, nu ɛ kpwoon yaa nu kɛ bô ɛkolɛ kew maan kɛ, ɛ diemsɛn yaa nu kɛ tɛn bô ɛkolɛ kew maan kɛ.

¹²Fí nu nonɛn, njefo no Nyo' to bomɛ kpwoon yî diemsɛn e nu ɛ kɛsɛn nu ɛ è boote kpwoon diemsɛn. ɛ fiɛɛ ficii nɛn'yi fô Nyo' lɛ.

¹³Ben tɛn kɛ taa ɛntɛ jodvu eyɛn lɛ laa fí nu lɛŋ fô kpwoon e keebunlee Nyo' sɛ wvú nu ɛ baŋ ɛkolɛ lɛ.

¹⁴Naa no ben yɛnɛ mwɛɛm e, bonyii bocii kee lo lɛ fô diemsɛn e keegɛɛ ɛkolɛ ɛ kí ci baay nu ɛ è nu kenshoose fô wvú lɛ.

¹⁵Geenɛn, ɛ fô kpwoon e nu ɛ keekɛŋke yvuw yì defɛ nu lo ŋgone fô wvú lɛ. Nyo' to nu ɛ nya yvuw yì defɛ è kpwoon lɛ yí ebaŋyi ɛkolɛ kew.

¹⁶É weɛ nu dvú wvù gomte keekicine fiɛɛ fin, ɛ wvú no kee lɛ kɛ beene kɛnɛɛ bintaashɛ bi bonyii bo mbee lɛ bo Nyo' lɛ bvuu kɛŋke yimi je kɛ.

Ntefe ɛkumɛ ntaashɛ

(Mat 26:26-29; Mak 14:22-25; Luk 22:14-20)

¹⁷Geenɛn, fiɛɛ fimew nu dvú fi me ŋgomte keentefɛ ben yî dvú lɛ, ɛ è nu fi ben gee ɛ me n'yaa nu embɛnsɛ lo ben yî dvú lɛ kɛ. Ben ké too shii yî kentaashɛ lɛ ɛ è buy kɛ fiɛɛ fi befɛ ɛfey fi jee.

¹⁸Fiɛɛ fi me ŋgomte keen'yaw ɛŋgay nu lɛ, me n'yuuke lɛ ben ké taashi diɛwe kentaashɛ ke bonyii bo mbee lɛ, no nu dew jɛɛy jɛɛy. Me ɛ no n'yɛnɛ lɛ è nulo enu keɛɛy.

- 19 Fí lo jee ke le kenɔawsɛn enu ê ben entelɛŋ wvu le bó emum elooce ekiɛ bonyii bo lɛŋ ê ben ente.
- 20 Me n'yene le ben ké too yí kentaashɛ le keedie mwɛɛm mvudien mvu Tata wesebeene wvù Jisos e, saa die ɛ è nu mvú ke.
- 21 Me njemyi nɛn njefo ben ké dɔo diekene, ɛ wee no diee ke ɛ è nu mwew mwɛɛm mvudien gene fwe, ɛ bomew mum mɛy jɛŋ, ɛ bomew wu mbvuum ɛ mó koo lo bó.
- 22 È nu la fi nonɛn? Ke ben kɛŋke yéw keediekene, wukene dvú le? Nuu le ben gomte keejoo kentaashɛ ke bonyii bo mbee le ke Nyo' le ɛkuse, gee ɛ bonyii bò fuute wuumene le? È nulo é me njeme ê ben le la? È nulo é me embɛnsɛe ben e? Naa lo, ke è nulo é me embɛnsɛe ke.
- 23 Me nto nu ɛ n'yɛyi ben ɛ è nu bô fiɛ fi Tata to yɛyɛɛ me dvú, le è to nu entaŋ jò bó to nu keegese Tata wesebeene wvù Jisos, ɛ wvú jo ntuw blɛɛd,
- 24 nya keyoone ê Nyo', guushɛ gay le, “Fin nu ye yɛm ɛ me ɛ nya nje ben. Ben egeè fifin keekumyi me.”
- 25 ɛ bó dieken mɛsɛ, ɛ wvú jo fiko ge ke lɛŋlɛŋ diwɛ fwe le, gay le, “Fiko fin nu fi moŋkan mo monfɛm mò Nyo' gbwo bô ɛlɛmɛ kem. Ben egeè fifin sekecii wuu keekumyi me.”
- 26 Fí ɛ mum ɛ no nu le ɛ gen naa ɛ buy seke Tata nu ke ekase eto le, nu ɛ sekecii kè ben diee blɛɛd wvun bvuu wuu fiko fin nu ɛ ben fewci ɛ è nu ɛkumɛ kpwe Tata.
- 27 Nonɛn, ɛ è nu naa yɛ wvù diee blɛɛd wvudvu kɛnɛɛ wuu fiko fi Tata le fidvu ê je yì baa jee le ke, tu mwɛtɛn gee ɛ è nu kebefɛ njefo wvú baa wvumte ye bô ɛlɛmɛ ke Tata le ke.
- 28 Wee dɔo nu keedie blɛɛd wvun ebvuu ewu fiko fin, ɛ wvú yaw jɛŋ ɛkolɛ kew ntay sɛ no gee nonɛn,
- 29 njefo é wee diee blɛɛd wvun, wuu fiko fin yaa kee fiɛ fi è nu ye Tata, tu mwɛtɛn diee bvuu wuu, joo ɛ è nu nsaw fô ɛkolɛ kew e.
- 30 È nu fiɛ fi bonyii nteen ê ben entelɛŋ wɛɛyi ɛ bomew cɛmkene ɛ bomew ɛ kpweken wase.
- 31 Geenɛn, é beene jɛŋ bikuu bisɛɛbeene ntay ɛ sɛ no diee bvuu wuu, Tata saa ebvuu esaw beene ke.
- 32 É Tata saake beene, tu wvú nɛci lo beene wvu le fo wvú ke etaashɛ beene bô bonyii bo yí woŋ wvun e le beene nu ɛ gbwe nsaw ke.
- 33 Boom bo bwɛɛm e, fí ɛ mum ɛ no nu le seke ben ɛ taasɛ keedie mwɛɛm mvudien mvu Tata le, ɛ ben cɛy ɛ wee tfuu to.

³⁴É jey yuu wee, é mweten dieken fô yew e se no too wvu le fo wvú ke eto ege fiε ejo ε è nu nsaw fô ekole kew e ke. Fi ekume mwεem mvumew nu ε me nu nke entefe ben yî dvú le ε è nu seke me ε nto.

1Kol 12

Nnyá Keyoy ke Yuule

¹Boom bo bwεem e, me nu enjeme keseen ekume nnyá yî Keyoy ke Yuule nyaa ê bonyii. Ke me ngomte le ben enu kenjiwe le ke.

²Ben ekeè le seke ben to bæe bonyii bò yaa kee ke Nyo', nu ε bó to læe ben ε ben no njimte, mum wvumte bonyo' bo εcici bò nu se bó nulo ejeme nkuuη.

³Me ε mum ε no ηgayte le ben ekiεε ntay le é wee nu ε Keyoy ke Nyo' le nu yî ye le, wvú saa ebvuu egay le, “Lon ekoo Jisos” ke. E wee yaa nulo egay le, “Jisos nu Tata” se è fici Keyoy ke Yuule wvú ke.

⁴E dioo tu fô nnyá le nu ε bonyii kenke nnyá jεy jεy ε è nyaa ke Keyoy kemwaaη ê bó.

⁵Bonyii lemte dilemme jεy jεy ê kentaashe ke bonyii bo mbee le ente, geenε ε cee ekole wvubo nu ke mwaanη.

⁶É jé nu jεy jεy yî bonyii lemte jó, ε è gee ke Nyo' mwaanη le bonyii egeè dilemme didvu ê yiye jé le.

⁷Bó nu ε nya ke wee mwaanη mwaanη bô ye nnya yi Keyoy ke Yuule keelemte fici kentaashe kecii dvú.

⁸E wee mvu no kenke ye nnya yî Keyoy ke Yuule nya ê wvú ε è nu keejemyi diewe wee wvú kenke bvufee le, nya yi wee mvu nnya ε è nu keejemyi diewe wee wvú kee fiε le. E Keyoy kin nu ke kemwaaη.

⁹É Keyoy ké nya yi wee mvu nnya ε è nu fitele fi wvú elese yî Nyo' le ntay, nya yi wee mvu ε è nu keefele bincem. E Keyoy kin nu ke kemwaaη.

¹⁰É Keyoy ké nya yi wee mvu nnya ε è nu keegee biηghaw bi mwεem e, nya yi wee mvu ε è nu keeteete bontum bo Nyo' le, nya yi wee mvu ε è nu bvufee keeke jεy jεy mwεem mvù nen'yi fô Keyoy ke Nyo' le bô mvù yaa nen'yi ke fô Keyoy ke Nyo' le, nya yi wee mvu ε è nu mvuηgay keejemyi díew yî bó yaa kee ke, nya yi wee mvu ε è nu keeεyεi mwεem mvù wee wvudvu jemyi ê bonyii.

¹¹Bó gee mwεem mvun mvunciim ε è nyaa ke Keyoy kemwaaη nnya yidvu ê bó. E kí gawci ê wee tfuu no kí shieele.

Kentaashe ke bonyii bo mbee le nu diewe ye wee le

¹²Beene kee le ye wee nu ke yimiaaη, geenε ε yí kenke biba nteen. E naa no biba bidvu cim nu nteen nen nu ε bí taashi gee ye yimiaaη. È nu ke ten no Klistu bô bonyii bew nu.

- 13 Beene nu bonyii jɛy jɛy, ɛ bomew nu Bojuu, bomew Boglek, ɛ bomew nu bonfaw, ɛ bomew yaa nu ke bonfaw. Ɛ è nu ke Keyoy kemwaan kè to taashɛ beene bocii keenu ye yimiaaŋ. Ɛ Nyo' to gɛke ke ɛ è nu Keyoy kedvu kemwaan fô mvuntelem mvusɛbeene le.
- 14 Ke ye wee nu ke keba ke ye le kemwaan ke. È nu biba nteen.
- 15 È ɛkale cim nɛ ɛ gay lɛ, “No me mbaa nu kebo ke, tu ke me mbɛɛ keba ke ye le ke”, fifiɛ saa ege é kí emum enu sɛ è nu keba ke ye le ke.
- 16 Kentuŋtuŋ ɛ nɛ tɛn ɛ gay lɛ, “No me mbaa nu jise ke, tu ke me mbɛɛ keba ke ye le ke”, fifiɛ saa ege é kí emum enu sɛ è nu keba ke ye le ke.
- 17 È ye wee yicii be mɛy ke jise, é wvú eyuuke mwɛɛm bô la? È yí be mɛy ke kentuŋtuŋ, é wvú eyuuke nsam fiɛ bô la?
- 18 Fiɛɛ fi nu, nu lɛ Nyo' to nu ɛ bom wee seyse biba biew bi ye le jɛy jɛy no wvú kooŋke.
- 19 È ye wee be nu ke keba kemwaan, é yí enu nɛɛ le?
- 20 No fí nu, biba bi ye le nu nteen. Geenɛn ɛ bí ɛ taashe ɛ ge ye yimiaaŋ.
- 21 Ke è nulo é jise egay ê kebo lɛ, “Ke me nshieele wo ke.” Ɛ ke ɛkolɛ nulo egay ten ê bikaa lɛ, “Ke me nshieele ben ke.”
- 22 Fiɛɛ fi kaa nu, nu lɛ biba bi ye le bì yen'yi lɛ bí wɛyi lo nu bì ke è nulo é ye wee enu sɛ bí ke.
- 23 Ɛ biba bi ye le bì beene joo lɛ bí nu ncɛw, nu bì beene taale fô ntay. Ɛ biba bì beene ké no wuumene keeduŋci ê bonyii nu bì beene ké no baŋyi.
- 24 Ɛ biba bì bonyii yɛne, nu bì yaa shieele lɛ bó etaalè fô nonɛn ke. Nyo' nu ɛ seyse ye wee ê je yì lɛ bó ewvumtè biba bì yen'yi lɛ bí nu ncɛw e.
- 25 Wvú to ge nonɛn wvu lɛ fo keŋgawsɛn enu yí ye le ke, lɛ keba etomtè kemew, ɛ kemew tomte kemew.
- 26 È keba ke ye le kemew nɛ ɛ no yuuke nsase, tu biba bidvu bicii nu eyuuke nsase. È bó seyse keba ke ye le kemwaan, tu bí bicii nu elanlɛnɛ bô kí.
- 27 Ɛ dɔo tu fô Klistu le nu ɛ ben bocii nu ye ye, ɛ wee mwaan mwaan ben e nu keba ke ye yidvu le.
- 28 Nyo' nu ɛ gɛɛ bonyii bô elemtè dilemme jɛy jɛy ê kentaashe ke bonyii bo mbee le. Ɛ bo fwe nu boom bo ntum e bo Jisos e, ɛ bô bii bó le nu bonyii bô teete bontum bo Nyo' le, ɛ bô bii bó le nu bonyii bô yɛyi bonyii. Ɛ gɛɛ bomew ɛ è nu bonyii bô egeè biŋghaw bi mwɛɛm e, bomew bô efelè bincɛm, bomew bô efici bonyii. Ɛ gɛɛ bomew ɛ è nu bô eseyseè no dilemme egene, ɛ bomew nu bô kee keejemyi díew yì bó baa kee yí ke.

²⁹Κε è nu bonyii bocii bò nu boom bo ntum e bo Jisos e κε. Κε è nu bocii bò teete bontum bo Nyo' le κε. Κε è nu bonyii bocii bò yεεyi bonyii κε, ε κε è nu bocii bò gee biḡhaw bi mwεem e κε.

³⁰Κε è nu bonyii bocii bò κεḡke nnya keefele bincem κε. Κε è nu bocii bò nulo ejemyi díew yì bó baa kee κε. Ε κε è nu ten bonyii bocii bò nulo ecεεyi mwεem mvù bonyii jemyi ê díew yimi le ê bonyii κε.

³¹No nnyá yin yicii nu nen, ben eshieelè ntay keekεḡke nnyá ε è nu yì kuuke fele yicii. Geenεn, me nu nduḡε ê ben fiεε fi fele mwεem mvun mvunciim.

1Kol 13

Κεḡκοḡεn fele mwεem mvunciim

¹É me ncm ḡkee keenjeme díew bitum bicii naa noo díew bonceendaa bo Nyo' le, se me ḡκεḡke κεḡκοḡεn fô bonyii le ḡkuuḡ, tu me ḡkumte κε ε è nu diuw díewe ḡgem wvù caake, κεεε bikaḡkaḡ e ε wee kpwaake.

²É me ncm ḡκεḡke naa mvuḡgay keenteete bontum bo Nyo' le, ḡkee mwεem mvunciim naa noo mvù nu ê kenyile le, ε nlese fitele yî Nyo' le naa ntay wvù è nulo é me emvuwyi dikum, geenεn se me ḡκεḡke κεḡκοḡεn fô bonyii le, tu me nu κε lo fiεε fi εcici.

³É me ncm njo mwεem mwem mvunciim ε ḡgaw ê bonyii, ε nya ten ye yem le bó eton, geenεn se me ḡκεḡke κεḡκοḡεn fô bonyii le ḡkuuḡ, sew wvudvu saa enu κε.

⁴Wee wvù κεḡke κεḡκοḡεn fô bonyii le ké no kuule shém, bvuu gee gee dî jee fô bonyii le. Κε wvuwe wee ké no bene kendoḡ κε. Κε wvú ké no saale ye κεεε bensee ye κε.

⁵Κε wvú ké no ḡasene yî bonyii le κε. Κε wvú ké no kpwaake κε ε è nu εkolε kew κε. Κε wvú ké ton'ye shém cekey κε. Ε κε wvú ké no gεεle wee fô fitele le κε.

⁶Κε wvú ké no yuuke njoḡ bô fiεε fi befe κε. Wvú ké no yuuke njoḡ ε è nu bô fiεε fi nu keceεy.

⁷Κε wee wvù κεḡke κεḡκοḡεn ké no yene jay wee mvu le κε. Wvú ké no fiisene mwεem mvunciim, taale κε fwe yî fiεε le ficii, bvuu suule shém yî fiεε le ficii.

⁸Κε κεḡκοḡεn ké ka κε. Geenεn ε kefew nu eyuu eto kè mvuḡgay mvù Nyo' to nyaε le bonyii eteete bontum bew dvú nu ke eka, é díew yì bonyii jemyi yì bó baa kee yì ke eka, é mvuḡgay keekee mwεem ntay ke eka ten.

⁹Mvú nu ke eka nonεn ḡjefo beene kee mwεem keseen κε lo kebese kebese, teete bontum bo Nyo' le κε kebese kebese.

¹⁰Geenεn ε è nu ke enu seke beene ε loocε wase ε kocεn é mwεem mvu kebese kebese emum eka.

¹¹È to nu seke me nto nu wan caan, ε me no njemyi diewe wan e, ηkpawawci mwεem diewe wan e, n'yene mwεem diewe wan e. Me ε ndioo ntaw wase ε mum ε ncine nce boom e.

¹²Keseen nu ε beene yene mwεem e jiwejiwe diewe ê kenlεey e. Geenεn è nu ke enu kefew kekε le é mvú eyuu ê beene ejise. Keseen nu ε me ηkee mwεem kebese kebese, ε è nu ke enu sekekε, é me emum emεse eηkεε mwεem mvunciim ke no Nyo' kee me.

¹³Mwεem nu mvuntentem mvù nu ke emey eleeme fó. Mwεem mvudvu mvun nu: keelese fitele yî Nyo' le, bô keetaale fwe yî ηkawma Nyo' le, noo keekεηke keηkoηεn. Ε keηkoηεn nu fiεε fi kuuke εnte jo mvú fele mvú mvunciim.

1Kol 14

Keebvuu jemyi εκume nnyá Keyoy ke Yuule

¹Ben egεεlè keηkoηεn fwe dvu mwεem mvunciim, geenεn ekeηkè ten shiee ntay fô nnyá yî Keyoy ke Yuule nyaa ê bonyii le, εfey mvunciim, nnya keeteete bontum bo Nyo' le.

²É wee jemyi ε è nu díew yî bó baa kee yí ke, tu ke wvú jemyi ê bonyii ke, tu wvú jemyi ε è nu ê Nyo', njefo ke wee yaa yuuke fiεε fi wvú jemyi ke. Wvú jemyi ε è nu mwεem mvu ê kinyile le ê mvuηgay mvu Keyoy ke Yuule le.

³Geenεn, wee wvù teete bontum bo Nyo' le ké no jemyi ε è nu ê bonyii, gee ε bonyii kuu yî mbee le, bvuu yvuwwεe mvuntelem mvubole, bvuu gee ten ε mvuntelem mvu bonyii le lætene.

⁴Ε wee wvù jemyi díew yî bó baa kee yí ke ké no fici ke ε è nu ekole kew maan. Geenεn, ε wee wvù teete bontum bo Nyo' le ké no fici ε è nu kentaashe ke bonyii bo mbee le kecii.

⁵Me ε no ηkooηke le ben ejemyi díew yî bonyii baa kee yí ke. Geenεn, ε fiεε fi me ηkooηke baay nu le ben eteetè ε è nu bontum bo Nyo' le ê bonyii. Wee wvù teete bontum bo Nyo' le nu shiee le fele wee wvù jemyi díew yî bó baa kee yí ke. É è fen baa nu le wee mvu ebaηke díew yidvu wvu le kentaashe ke bonyii bo mbee le eyuw ntay é fí efi bó.

⁶Boom bo bwεem e, é me neeseen ε nto fô ben e, ε no njemyi ê díew yî bó baa kee yí le ke, é fifie efi ben yî la le? Fiεε fi nulo efi ben nu ke seke me nu ε nto bô fiεε fi fifie fi Nyo' nu ε duηce ê me, kenεε fiεε fimew fi wvú gomte le me eηge é ben ekieε, kenεε ntum we mvu le me entefe ê ben, kenεε fiεε fimew le me en'yεeyi ben dvú.

⁷Bó ejo ke fiεε diewe ndoη kenεε kome le mvù yaa keηke ke keyoy. È nulo é wee ege neε se kieε fiεε fi mvú jemyi se bó ε toη kenεε ε kum ê je yi leη e?

⁸É wee ne le wen etoη soη jem, ε faηe toη ê je yi leη e, é bonyii ege neε se buy jem?

- 9** È nu ke lenlen no é ben jemyi díew ê bonyii se bó yuuke lo, é bó ke ege nêe se kiee fiêe fi ben jemyi? Ke tu njeme wene nu laayi ke lo yî fwefwe le.
- 10** Ke è nu kemaŋen le dikfuu di díew e nu yî nshê le fen dí le dí le ke. E ke yimi nu dvú yî nu se bó kee kenyi kedvu ke.
- 11** Geenên, é wee nê e no jemyi ê me ê díew e se me n'yuuke yí ŋkuuŋ, tu wvú nu enu diêwe wee ketum e fô me le, e me nu ten diêwe wee ketum e fô wvú le.
- 12** Me e no ŋgayte ê ben le no ben gomte le mvuŋgay mvu Keyoy ke Yuule le eyen'yi ê ben ente, ben emum emom ntay keekêŋke e è nu nnyá yiye yî nulo ege é kentaashe ke bonyii bo mbee le ekuò lo.
- 13** Fí e mum e no nu le, é wee jemyi díew yî bó baa kee yí ke, é wvú no bunlee le Keyoy ke Nyo' le enya wen bô bvufee keecêyi fiêe fi wvú jemyi ê bonyii.
- 14** É me nê e no mbunlee ê díew yî bó baa kee yí le ke, tu me nu mbunlee ê keyoy kem e, geenên e me n'yaa mbunlee bô bvufee bwem ke.
- 15** No fí nu nonên, me nu enge nêe? Me nu embunlee ê keyoy kem e, mbunlee ten bô bvufee bwem, en'yemte ê keyoy kem e, n'yemte ten bô bvufee bwem.
- 16** È fuw ke nonên, wo e nê e no bensee Nyo' ê keyoy kuw e, é wee mvu wvù be nu fó yeke ke lo ke ege nêe se bee le, “Fí enù nonên” yî keyoone kè wo be nyaa le se wvú be yuuke díew yî wo jemyi?
- 17** É wo nya keyoone nonên, e cim e nya naa ntay nêe, tu ke è nulo é fí efi wee mvu we ke.
- 18** Me nyaa keyoone ê Nyo' le me njemyi díew yî bó baa kee yí ke nfele naa lo ben bocii.
- 19** Geenên, no me nciim njemyi nonên é me ndioo nu ente jo kentaashe ke bonyii bo mbee le, e me no ŋkooŋke keenjemyi bô bvufee bwem e è cim nu naa ke díew shen, wvu le me n'yêyi bó, efey keejemyi díew bontfuke yuufe (10,000) se bó kee yí ŋkuuŋ.
- 20** Boom bo bwêem e, fò ben ekeŋkè boŋkpawce bo boom bo caan e ke. Ben enù ke diêwe mvunley mvu boom e mvù yaa kee ke wase fiêe ekumê kebefê. Geenên, ekeŋkè boŋkpawce e è nu bo ŋgaybonyii le.
- 21** Bó nu e saŋ ê Nwa' bonci le le, “Me wvù Tata Nyo' ŋgayte le me nu ŋke enjemyi ê bonyii ban dew botolo le, é díew yî bó baa kee yí le ke. Geenên, ke fifie nu ke ege é bonyii ban emum eyuw me le ke.”
- 22** Fí e mum e no nu le, keejemyi díew yî bó baa kee yí ke, nu nciise wvù duŋci mvuŋgay mvu Keyoy ke Yuule le é bonyii bô yaa nu bo mbee le ke. Ke è nu nciise é bô nu bo mbee le ke. Geenên, e nnya keeteete bontum bo Nyo' le nu nciise wvù

duŋci mvuŋgay mvu Keyoy ke Yuule le ê bonyii bò nu bo mbee le, ε è yaa nu ke ê bò baa nu bo mbee le ke.

23 É ben, kentaashe ke bonyii bo mbee le bocii ne ε to yí kentaashe le, wee tfuu ε mum ε kew ε no jemyi ke ε è nu díew yì bó baa kee yí ke, bonyii bo ncw kenεε bonyii bò baa nu bo mbee le, ε ne ε ley, ε yuw no ben jemyi, bó saa ekpwaake le ben ghaanene lo?

24 Geenen, é wee tfuu teete ε è nu ntum Nyo', wee wvu ncw kenεε wvù baa nu wee mbee ε ley, é fiεε fi ben jemyi ege é wvù ekieε le wen nu wee wvù befe, é fi esaake wvù fô fitele le,

25 é mwεem mvù nyiime fô fitele fiew e, eyene emwa. Nonen, é wvù emum etum envuw fokuse, enyaa mbense wvu baay ê Nyo' gayte le, "Nyo' nu naa ben ε bó."

No è nulo é kentaashe ke bonyii bo mbee le ebunlee, gee mwεem lεŋ

26 Boom bo bwεem e, fiεε ficii fi me njemyi nu le la? Fí nu le, seke ben ε to yí kentaashe le, ε wee wvù keŋke ŋkieε keeyem no nu, ε wee n'yεeyi nu, ε wvù keŋke fiεε fi Nyo' nu ε duŋce ê wvù nu, ε wvù kee keejeme díew yì bó baa kee yí ke nu, ε wvù kee keeεeyε díew yidvu é bonyii eyuw enù ten. Ben egeè mwεem mvunciim ê je yì è nulo é mvù efii lo kentaashe ke bonyii bo mbee le.

27 É bonyii nu keejeme díew yì bó baa kee yí ke, é bó jeme ke bofeε kenεε botete maaŋ. É bó dioo jemyi no jemyi wee mwaan mwaan ε wee mvu cεeyi fiεε fi bó jemyi ê bonyii.

28 É wee baa nu dvù wvù ecεeyi fiεε fi bó jemyi, é bó no nu diuw tfu ê kentaashe ke bonyii bo mbee le ente, ε wee jemyi ke wase ê shem ê shem fô ekole kew e bò Nyo'.

29 É bonyii bò teete bontum bo Nyo' le nu dvù, é bofeε kenεε botete jeme ê bonyii. É bó dioo jemyi ε bomew no yeese fiεε fi bó jemyi ntay.

30 É Nyo' fen nu ε duŋce fiεε ê wee mvu wvù be ε shii dvù, é wee wvù be jemyi wase we cife, nya je ê wvuwe wee jeme.

31 Ben ekeè le ben bocii nulo etefe bontum bo Nyo' le. É ben dioo teete, no teete wee mwaan mwaan wvu le bonyii bocii eyεeyi mwεem ê ben, é ben ebvuu ege é mvuntelem mvubole bocii eyvuwsè.

32 Bonyii bò Nyo' nu ε nya yibo nnya keeteete bontum bew keŋke mvuŋgay ê we jo nnya yidvu,

33 njefo ke Nyo' nu Nyo' kembvuŋse ke, Nyo' nu Nyo' kenlεeten. No fí nu ê bintaashe bi bonyii bo mbee le bò è nu bo Nyo' le bicii,

34 seke bokene nu ê kentaashe ke bonyii bo mbee le ente, no nu diuw tfu. Ke bó baa nya bó bò mvuŋgay keejemyi ke. Bó keŋke keeyuuke lo bolemε le, ε è nu no nci jemyi.

³⁵É fiεε nu dvú fi bó gomte keekiεε, é bó bife ê bole' bobole seke bó ε tu jim yew, njefo è nu kenshoose fô kpwoon ejemyi ê kentaashe ke bonyii bo mbee le ente.

³⁶Ben ekeè le ke è to kew ben diew Nyo' ke. Nuw le è to kew ben ε? E ke è mey ke ben bò diew Nyo' nu ε gen wase fó ke. Nuw le è mey ben ε?

³⁷Wee wvù kee naa le wen nu wee wvù teete bontum bo Nyo' le, kenεε wvù kee le Nyo' nu ε nya wen bô nnya ye yi Keyoy ke Yuule, wvú keηke keebεε le fiεε fin fi me nsaj fô ben e nu ε è gay Tata le me ensaj.

³⁸É wee baa ebee fí, tu bó nu ema lo ten wvú bô fiεε.

³⁹Boom bo bwεεm e, fí ε mum ε no nu le, ben ekeηkè shieε baay ε è nu keeteete bontum bo Nyo' le. Geenεn, fo ben etun fo bonyii ejemyi díew yì bó baa kee yì ke.

⁴⁰Ben dioo gee mwεεm mvun mvunciim, no seysee ntay, gee ê je yì jee le.

1Kol 15

Jisos Klistu to nu ε buy yì kpwe le

¹Boom bo bwεεm e, me ηgomte keseen keηkume ben ekume saaka wvù jee wvù me nto nfewcεε ê ben ε ben fiisen, ε no leeme yì dvú le keseen.

²È nu saaka wvudvu wvun wvù boysee ben é ben fen jici dvú ntay. È fuw ke nonεn, tu ben to beηe ke ε è nu εcici.

³Ben ekeè le me nto nu ε nya fiεε ê ben ε fí kuuke baay fele lo mwεεm mvunciim. E è nu ke fí fi bó to nyaε ê me. Fiεε fidvu nu le Klistu to nu ε kpwe fô bibefe bisεεbeene le ke leηleη no bó to saηεε ê Nwa' Nyo' le,

⁴bô le bó to nu ε dwey wvú, ε è ke no nu ediuw εta ε Nyo' bvuse wvú yì kpwe le ke leηleη no bó to saηεε ê Nwa' Nyo' le,

⁵noo le wvú to nu ε duηce ekole kew ê Bitá, bvuu duηce ten ê boom bew bo ntum e bo yuufe ncow bofεε.

⁶E wvú ke duηce ten ekole kew ê bonyii bo mbee le ε bó nu bvudvuu bvumwaan fele wee gee tin. Bonyii nteen ηgoo yin e bεε ke naa dvú eben, ε bomew ε kpweken wase.

⁷E wvú ke bvuu duηce ekole kew ê Jεm, bvuu duηce ê boom bew bo ntum e bocii.

⁸E è ke dioo nu ejim, ε wvú duηce ten ekole kew ê me wvun wvù nu ente jo boom bo ntum e bo Jisos e diewe wan wvù bó to bokεε kente le.

⁹Me njemyi nonεn njefo me nu lo diewe wee wvu caan e ente jo boom bo ntum e bo Jisos e bocii. E me mbaa encim eηkpwentεn wvù bó eteηe me le waa ntum Jisos ke, njefo me nto mbone bikaa ejim jo kentaashe ke bonyii bo mbee le ke Nyo' le.

10 Geenen, ε Nyo' buw me, ge ε me no nu fiεε fi me nu fi keseen. Ke nfi wvun wvù Nyo' to nyaε ê me to nu ε la εcici ke. Me nto nu ε ηkaa nlem naa nfey lo boom bo ntum e bo Jisos e bocii. Geenen, ε ke ε to lemte me bô mvuᅅgay mwem ke. Ê to nu nfi wvun wvù Nyo' to buwεε me dvú wvù to lemte yî yem e.

11 Fí ε mum ε no nu le kenεε è to nu me wvù to fewcεε saaka wvun ê ben, kenεε è to fewci bó, tu è nu ke fiεε fimwaanᅅ fi bee bó fewci, ε ben to bee fí le.

Beene nu ke ebuy tɛn yî kpwe le

12 Keseen no bese fewci le Klistu to nu ε buy yî kpwe le, ben bomew ε ge nεε ε se no duu le ke bonyii bô kpweken wase nu ke ebuy yî kpwe le ke?

13 Ê è fen nu kecεεy le ke bonyii bô kpweken wase nu ke ebuy yî kpwe le, tu ke Klistu to nu ε buy tɛn yî kpwe le ke.

14 Ê è nu le Klistu to baa buy yî kpwe le, tu fiεε fi bese fewci nu εcici, ε mbee wene nu tɛn εcici.

15 Ê è fen nu nonen, tu bese teyte fiεε yî Nyo' le εcici, njefo bese ghane fewci le wvú to nu ε bvuse Klistu yî kpwe le se wvú to nu ε bvuse ηkuuᅅ, é è fen nu kecεεy le ke bonyii bô kpweken wase nu ke ebuy yî kpwe le ke.

16 Ê è fen nu kecεεy le ke bonyii nu ke ebuy yî kpwe le, tu ke Klistu to nu ε buy tɛn yî kpwe le ke.

17 Fí ε no nu le é è fen nu le Klistu to baa buy yî kpwe le, tu mbee wene nu εcici, ε bibefe binen bεε ke yî yene le.

18 Ê fí emum enu tɛn le bonyii bô nu ε kpweken wase ε bó to taashe bô bo Klistu nu ε la wase εcici.

19 Ê beene gεεle bvufee yî Klistu le, taale le wvú efii beene ε è nu ke yî nshii wvun e maanᅅ, tu beene nu bonyii bô shen ekoole bonyii dvú yî woᅅ wvun e fele lo bonyii bocii.

20 Geenen, kecεεy kedvu nu le Nyo' to nu ε bvuse Klistu yî kpwe le. E è nu Klistu wee wvu fwe wvù cεεεε je fô bonyii bô nu ε kpweken wase le.

21 No wee mwaanᅅ to geε ε kpwe to fô bonyii le bocii, nu ke lenᅅlenᅅ no wee mwaanᅅ nu ε ge le bonyii nu ke ebuy yî kpwe le.

22 Fí ε no nu le no bonyii bocii kpweε njefo bó nu kfuu di Adam e, nu ke lenᅅlenᅅ no bonyii bocii nu ke ebuy yî kpwe le njefo bó nu bonyii bo Klistu le.

23 Geenen, ε wee nu ke ebuyte ke ê kew kefew e. E Klistu nu wee wvù to yawεε cεε je buy. E wvú nu ke dīoo ε kase ε to, é bonyii bô nu bew emum ebuy tɛn.

24 Fí nu ke dīoo ε kooy nonen, é emum enu kefew kè woᅅ nu eka. Klistu nu ke efīwεε bvunfon bô mvuᅅgay noo bvukuke bvucii bvù saake keseen, emum etfuse bvunfon bwew ê Nyo' Ice.

25 Ɛ wvú wvù Klistu keŋke ke keesaake egen ebuy seke Nyo' nu ke egee bonyii bew bo bvuban e bocii ê wvú ekuse é wvú etome bikaa yî bó le.

26 Ɛ wee bvuban wvu ejim wvù wvú nu ke emese efiwse nu kpwe.

27 Ê nu fiεε fi bó to saŋεε ê Nwa' Nyo' le le, “Nyo' nu ε gee wase mwεem mvunciim ê wvú ekuse wvú ε no saake.” Geenεn, keegay le mwεem mvunciim nu ê wvú ekuse yaa mum nu le Nyo' wvù geke mwεem mvunciim ê wvú ekuse nu ten ê wvú ekuse ke.

28 Ê nu ke enu seke mwεem mvunciim nu wase ê Klistu ekuse ε wvú saake, é wvú wvù Waa Nyo' emum egee ekole kew ekuse jo Ice wvù geke mwεem mvunciim ê wvú ekuse, wvu le Nyo' emum enu ewe jo fiεε ficii mondvuum monciim saake.

29 Ê è baa nu le bonyii bò nu ε kpweken wase nu ke ekase buy yî kpwe le, bó ε no leese bonyii ê joo yî bvudvuu bvu bonyii bò kpweken wase le nje la? Bó leese bó ê joo nonen le sew wvudvu nu la?

30 Bese ten ε no ghane yuu ye nen nje la?

31 Boom bo bwεem e, me nu diuw kpwe le εdiuw ecii. Me njemyi mwεem mvun nen njefo me n'yuuke ye yî fiεε fi Klistu Jisos wvù Tata wesebeene nu ε ge fô ben e fele can yem e.

32 Ê è baa nu le bonyii bò kpweken wase nu ke ebuy yî kpwe le, no bonyii ké no jemyi mwεem, ε me ŋke ŋgen Efesus, ε bonyii ε bó ŋale diewe nyám yi ŋkpwaante le no diuu bee bó gomte keesaaye lo me, le sew wvudvu nu la? Ê me enfaŋe nlu lo engay le fi enù no bó ké no duu le, “Beene ediekenè, wukenè njefo ntfuu nu ε bó nu ebuy ekpweken” e?

33 Fo wee elaelè ben ke. Ben ekeè le, “Ê wee wvù keŋge kew jee lene bô ŋgoo yi befe, é ŋgoo yidvu ebefe bô wvú.”

34 Ben etee bvufee bvunen jim, ecine kebefe le. Me n'yene le ke ben bomew kee Nyo' ke. Ɛ me njemyi nen keeŋge le ben ewuumenè.

Ye yî bonyii nu ke ebuyte dvú yî kpwe le

35 Ê nulo é wee mvu ene ebiite le laa bonyii nu ke ebuyte yî kpwe le neε le le? Bó nu ke ekeŋke ε è nu kfuu ye yî neε le?

36 Wvuwe wee wvù biite nonen nu keyuŋ. Ke wvú kee le bó ké jewyi fiεε fi saa ke ebuy se fi ε yaw ε kpwe le?

37 Ke ye fiεε fi bó ké jewe nu yí yî ké buy no kuu ke. Bó ké jewe ke ε è nu ŋgow eyineyin, kenεε è nu ŋgow egiŋ, kenεε è nu yi la,

38 ε Nyo' mum nya ŋgow yidvu bô ye yî wvú shieele. Ɛ wvú nyaa ye jεey jεey ê ŋgow no ŋgow yidvu nu.

- 39** Ƙe mweem mvunciim ƙeƙe nyam ye lenlen ƙe. Bonyii ƙeƙe yibo nyam ye jee, e nyám ƙeƙe yibo, e mvunyiim ƙeƙe yibo, e byé ƙeƙe ten yibo ye.
- 40** Mweem mvu we nu ê yibo je le, e mvu fokuse nu ê yibo je le. Mweem mvu we ƙeƙe bvubole bvujonke, e mvu fokuse ƙeƙe bvubole bvujonke.
- 41** Diuu ƙeƙe bwew bvujonke, e kpwee ƙeƙe bwew bvujonke, e jón ƙeƙe ten bvubole bvujonke. E ƙe jon yimi bô yimi cim ƙeƙe bvujonke lenlen ƙe.
- 42** Ê nu ƙe lenlen no ye bonyii nu ke enu seke bó buyte yî kpwe le. Bó ké dweyte wee e ye ye fo, geenen ƙe ye yì wvú nu ke ebuy dvú yî kpwe le bee ke efo ƙe.
- 43** Bó dweyte wee bô ye e yí yaa yen'yi jee ƙe, yaa ƙeƙe mvungay ƙe. Geenen, e wvú nu ke ebuyte yî kpwe le bô ye e yí ƙeƙe bvujonke, ƙeƙe mvungay.
- 44** Bó dweyte wee e ye ye nu yî wee wvu wum. Geenen, wvú nu ke ebuyte yî kpwe le bô ye e è nu wase yî keyoy. Ê ye wee wvu wum nu lo, tu ye keyoy nu lo ten.
- 45** Bó nu e saɲ le, “Adam wvu fwe to nu e no nu dvú, yoyte.” Ê dioo tu fô Adam wvu ejim e, e wvú no nu fiew keyoy kè nyaa nshii ê bonyii.
- 46** Ƙe wee ké yaw no ƙeƙe ye e è nu yi keyoy ƙe. Wvú ké yaw ƙeƙe e è nu ye wee wvu wum se ké ƙeƙe yi keyoy.
- 47** Adam wvu fwe nu e bó to bom bô kebvu ke yî nshê le. E Adam wvu ejim to ne fiew fowe.
- 48** Bonyii bo fokuse fen nu diewe wee wvu fwe wvù bó to bomê bô nshê le, e bonyii bo fowe nu diewe wee wvù to nen'yee fowe le.
- 49** No beene nu e jo nfieesen yi wee wvù bó to bomê bô nshê, nu ke no beene nu ke ejo yi wee wvù to nen'yee fowe le.
- 50** Boom bo bwæm e, é me ensee ê ben le ƙe è nulo é ye yin yì è nu nyam bô elemê ke eƙeƙe bvudvuu ente jo bvunfon bvú Nyo' le ƙe. E ƙe è nulo ten é fiee fi nulo efo ke eƙeƙe bvudvuu fô fiee yaa foo fó le ƙe.
- 51** Ben eyeke eyuw é me ensee ben kenyile ke fiee le. Ƙe beene bocii nu ke ekpweken ƙe. Geenen e ye yesebeene bocii nu ke esese ekumen.
- 52** Bó nu ke edioo e toɲ soɲ yi fokemese, é ye yesebeene emum ekumen ƙe nen mwanɲ no wee ke bewbew jise. Soɲ nu ke dioo e jeme é bonyii bô nu e kpweken wase emum ebuy yî kpwe le bô ye yì yaa bee ke efo ƙe, é beene bô bee dvú emum ekumen lo.
- 53** Ye yin yì nulo efo ƙeƙe keeke ekumen etu wase e è nu yì yaa nulo efo ƙe. E ye yì nulo ekpwe ƙeƙe keeke ekumen etu wase yì yaa nulo ekpwe ƙe.
- 54** Seke ye yì nulo ekpwe ebvuu efo e kumen wase e tu yì yaa nulo ekpwe ebvuu efo ƙe, é fiee ficii emum ekocen no bó saɲ ê Nwa' Nyo' le le, “Bó nu e so wase kpwe e ngoy mvungay mwew.

55 O kpwe, mvungay mwuw ε fεε? O kpwe, gbwεεη wo wvù wo taa bonyii dvú ε fεε?”

56 Gbwεεη kpwe nu kebefε, ε mvungay mvu kebefε le nu nci Nyo'.

57 Beene enyaà keyoone ê Nyo' wvù nu ε taashε beene bo Tata wesebeene wvù Jisus Klistu beene ε no soo kebefε noo kpwe.

58 Nonεn boom bo bwεεm e bò nu shém yem, ben eleemè temyi. Fo fiεε eshiikè naa lo ben κε. Ben elemtè lemme di Tata le sekecii, ekeè le κε lemme di wee gee nje Tata nu ke ela εcici κε.

1Kol 16

Nnya keefi bonyii bo Nyo' le dvú

1 Me nu enjeme keseen εκume nnya yì bó nyaa keefi bonyii bò è nu bo Nyo' le dvú. Ben egeè κε ληληη no me nto ηgayεε le bintaashε bi bonyii bo mbee le bi Galashia egeè.

2Seke è nu diuu di fwe yî kema le kecii, ε wee mwaanη mwaanη baa fiεε seyse γεε. Wee dīoo baale, baa κε no Nyo' nu ε buw wvú. É me ηke endīoo ε nto ben saa ebvuu eshe esuuke lo kensuw κε.

3Me nu ηke endīoo ε nfεse, emum ensanη ηwa' embene fô nnya yene le, é bonyii bò ben nu ε baa emum ejo egen dvú Jelusalem.

4É fī fεn nu ε kocεn ben e le me ηγεν tεn, é bee bó emum egen.

Mwεεm mvù Baul to kpawaci keeke ege

5 Me nu ηke en'yaw enfey je Masedonia seke me ntoo ê ben e, njefo me ηgomte keenfey je jó.

6 Ε è nulo é beene ke ece, ce naa ε kefew ke nffum wvù temyi le ke eghan efey, wvu le ben ke efice me yî lene diem e, é me emum ηγενε jò me ηγενε.

7 Κε me ηgomte le me ηke endīoo ε nto ê ben e keseen é beene eyεnen κε lo we we κε. Me ntaale fwe, ηkee le me nu ηke ento é beene ebosen ece, é Tata fεn ε bee.

8 Geenεn me embεε ence Efesus jan ηγεν embuy diuu di Nkaw Bentekos e.

9Kembuη ke baay nu ε yene fô me le jan keεngee lemme di Nyo' le, naa no bonyii bomew cim nu dvú bane lemme didvu din nεn.

10 É Timatio ke eto lo, é ben yen le ben nu ε ge wvú ε no yuuke njonη ê ben ente, njefo wvú gee lemme ε è nu di Nyo' le ληληη κε diεwε me.

11Fo wee ejo wvú εκuse κε. Ben ke efice wvú é wvú elen nyεkeey etu jim fô me le, njefo bee boom bo bwεε wesebeene le cεyte wvú.

12 Fi ekume waa bwee wesebeene wvù Abolos nu ε me nse nu ε no nleke wvù le wvù elaa ghane ê ben e bô boom bo bwee wesebeene le bomew ba, geenen wvù se baa kooŋke naa lo keeto keseen κε. Wvù nu ke edioo ε keŋke je, emum eto.

Ŋgayma bô kemεε ke njeme le

13 Ben dioo nu no yenè. Ben eleemè temyi yî mbee wene le, enù bonyii bô keŋke mvuntelem. Ben eleemè temyi.

14 Ben dioo gee fiεε ficii no gee bô keŋkoŋen.

15 Boom bo bwεεm e, ben ekeè le Tefanas bô yew ye nu bonyii bo fwe ê keba kè Akεya le bô to yawεε lese fitele yî Tata le, nya bikuu bibole keefici bonyii bo Nyo' le.

16 Me ε no ŋkule can le ben eyuukè bonyii ke diewe ban e, ebvuu eyuukè ten bonyii bô lemte yî fiεε le fimwaaŋ bô bó le.

17 Me ε no n'yuuke njoŋ no wvù wvù Tefanas bô Fotunatus noo Akaykus nu ε to keeyen me le. Me nu ε n'yen bó le fí ε mum ε no nu le me nu ε n'yen wase ben e.

18 Bó nu ε læεε fitele fiem ke lenlen no bó læεε mvunen. Bonyii diewe ban e nu bô ben ewvumtè bó.

19 Bintaashe bi bonyii bo mbee le bi Esia jan gayte ben e. Akpwila bô Blisilia noo kentaashe ke bonyii bo mbee le kè shiile ê bó yew gayte ben e ê diee di Tata le.

20 Boom bo bwee wesebeene le bo mbee le ciinse ten ŋgayma. Ben egay wee tfuu le enoεε diewe bonyii bo Nyo' le.

21 Wvun ŋgayma saaŋke me wvù Baul bô kebo kem.

22 Lon ekoo wee wvù baa ekooŋke Tata κε. Kee Tata, kase κε eto.

23 Tata Jisos ebuw ben bô kembonen kew sekecii.

24 Keŋkoŋen kem enù fô ben e sekecii njefo beene nu ε taashe yî Klistu Jisos e. Fí enù nonen.

2 Kol

2Kol 1

¹ È nu me wvù Baul, ε me nu waa ntum Klistu Jisos yî ηκοη wvù wvu Nyo' le. È nu bee waa bwee wesebeene wvù Timatio. Me nsaanke ηwa' wvun fô kentaashe ke bonyii bo mbee le bo Nyo' le bo Kolεn, noo fô bonyii bò è nu bo Nyo' le bocii bo keba kè Akεya le kecii.

²Nyo' Icee wesebeene bô Tata Jisos Klistu ebuw ben, ebvuu enya ben bô mvuntelem mvù læstene.

Nyo' wvù læsee mvuntelem

³ Mbense enù fô Nyo' wvù è nu Nyo' wvu Tata wesebeene wvù Jisos Klistu, bvuu nu Ice le. Wvú nu Icee shen, nu Nyo' wvù læsee mvuntelem mvu bonyii le yî mwεem e mvunciim.

⁴È nu wvú wvù ké no læsee mvuntelem mvuseεbeene yî bonɣew bosεbeene le bocii wvu læ è nulo é beene emum ekee tεn keelæsee mvuntelem mvu bonyii bomew e seke bó nu yî bonɣew e. Beene nulo ekee keelæsee nonεn ε è nu bô nlæsee wvù Nyo' nu ε læsee mvuseεbeene mvuntelem dvú.

⁵ Bese kee lo læ ke læηlεη no bonɣew bo Klistu le nu fô bese le baay, nu ke no Nyo' nu efele yî Klistu le læsee mvuntelem mvusεse ke tεn baay.

⁶É bese nu yî monlum e, tu è nu keelæsee mvuntelem mvunεn noo keeboyse ben. É bó læsee mvuntelem mvusεse, tu è nu keege é mvuntelem mvunεn elæstene, é ben ekuu shém enu nyεkeey yî bonɣew bò ben yene diewe no bese yene le.

⁷Fieε fi bese taale fwe kee εkumε ben nu ε ke fieε nulo eshiw bese ke, njefo bese kee lo læ no ben yene ηɣew diewe bese le, nu ε ben tεn nu ekeηke mvuntelem mvù læstene diewe bese le.

⁸ Boom bo bwee wese le, ke bese gomte læ ben enù sε ben kee kfuu ηɣew wvù bese to wuε woη wvù Esia le ke. Wvuwe ηɣew to tεmyi baay fele mvunɣay, ε bese no yene læ ke è nulo é bese ebvuu eluη ke.

⁹ Yî keceey e, bese to kee læ è nu ke wase kpwe fô bese le. Geenεn fifin to kooyi nonεn keege læ fo bese eyeemè yî bikuu bisese le ke, læ bese eyeemè ε è nu yî Nyo' le. È nu wvú wee wvù bvuuuse bonyii yî kpwe le.

¹⁰ Wvú wvudvu wvù to bvuseε bese yî kfuu wvuwe ηɣew wvù è to yen'yi wase kpwe le, nu ε wvú nu ke emey ke ebvuuuse. Bese nu ε gεε bvufee ε è nu yî ye le læ wvú bæε ke ke ebvuu ebvuuuse bese sekecii,

¹¹ no ben nu etomte bese bô bunle yene. Nonεn é bonyii emum ke enyaa keyoone ê Nyo' fô bese le nje fieε fi jee fi wvú nu ε buw bese dvú nje bunle bonyii nteen.

Fieε fi to gεε ε Baul sε kumεn ηkpawwεε læne diew

- 12** Fiee nu dvú fi bese saale ye yí dvú le, e fitele fisese tomte bese ekumε fí. Fí nu le, gee disese ê woŋ jan, efey mvunciim fô ben e, nu di yuule, nu kecεey no Nyo' gomte. Ke bese gee gee di bii bvufee bvú yí woŋ wvun e ke. Bese gee bii ε è nu no Nyo' nu ε buw bese le bese egeè.
- 13** Ke bese saanƷe fiee fimew fô ben e jεey efey fi è nulo é ben etaŋ ekiεε fí ke. Me ŋkpwaake le ben nu ke etaŋ ekiεε fí ficii,
- 14** ke no ben nu ε kieε wase bese keseen caan, wvu le é ke edioo enu diuu di Tata wesebeene wvù Jisos ε to, é ben esaale ye bô bese ke naa no bese saale ye bô ben.
- 15** No me nto ŋkee naa fifin nonen, ε me mum no ŋgomte keen'yaw nto ê ben e, wvu le ben ekeŋke sew wem bokanƷ bofεε.
- 16** Me nto ŋkaake le me nu ŋke endioo eŋgene Masedonia enfey je jo ben, bô le me nu ŋke endioo eŋkaase embvuu enfey je jo ben é ben efice me yí lene diem di Judea le.
- 17** Ben kpwaake le no me nto mbaa eŋghan enfey ke, nu ε me nto ŋkaake nonen ŋgee ε è nu ndvum e? Nuu le me ndioo ŋkaake fiee no ŋkaake ê je wee wvu fokuse fen wvù beŋe fiee le “Eε” mum kase tun ke sekedvu le “Aay” e?
- 18** Yí kecεey e, no Nyo' ké no leeme ke yí diew ye le, ke fiee fi bese jemyi ê ben ké no nu fi bese ebee le, “Eε” kase tun le, “Aay” ke.
- 19** E fí nu nonen njefo ke Jisos Klistu wvù Waa Nyo' wvù bee bo Silas noo Timatio to fewci ê ben ente nu wvù beŋe fiee le, “Eε” kase tun le, “Aay” ke. È ké no nu ke le, “Eε” sekecii.
- 20** Ben ekeè le yí Klistu le nu ε boŋkawma bô Nyo' gee bocii nu ε wvú ε bee dvú le “Eε”. È nu nje fifin wvù beene fele yí Klistu le gayte ê Nyo' le “Fí enù nonen.” È neε no beene ké no tumte moŋkum mew nen.
- 21** È nu Nyo' wvù nu ε leke bese ε leke ten ben, beene ε no temyi yí Klistu le. Wvú nu ε caw beene.
- 22** Wvú nu ε gee nciise we yí yese beene le wvù è nu Keyoy kew kè nu fô mvuntelem mvuseεbeene le diewe sâ' fiee ficii fi beene nu ke ekeŋke le.
- 23** È nulo é me mbe Nyo' é wvú eben jim nsaw wem le me nto mbaa nto Kolen ε è nu njefo me nto ŋgomte keembawce lo ben.
- 24** E ke è nu le bese gomte keeleeme ke le è neε no mbee wene keŋke keenu ke. Bese kaa lemte lo beene keeto bô njoŋ fô ben e. Bese kee le ben leeme temyi yí mbee wene le.

2Kol 2

- 1** Nonen ε me mum ŋkpawawce le ke me mbeε mbvuu nlaa ghane di eto bô nsase ke.

²É me embvuu ene e nge ben e yuw nsase, é ebvuu enu yee dvú wvù nulo ege é me en'yuw njon efey ben boba bò me nu e nge wase bó e yuw nsase?

³È nee fiè fi to gee e me nse nsan nwa' we ê je yì me nto nsanèe le. È to nu wvu le me nke ndioo e nto ê ben e, me nsaa nke enkenke nsase wvumvu wvù ne fô ben bò bee ege é me en'yuw e è nu njon e ke, njefo me nkee naa ntay ekume ben bocii le njon wem nu ke njon wene bocii.

⁴Ben ekeè le nwa' wvudvu we nu e me nto nsan nke bô nsase wvu baay, e fitele tone me, e misem e yinsen ê me ejise. E ke me nto nsan nonen keenge é ben eyuw e è nu nsase ke. È to nu keege é ben ekiee kenkonen ke baay kè me nkenke fô ben e.

Bó elæshè jay mwætæn enya ê wvú

⁵É wee to nu e ge e me n'yuw nsase, tu ke nsase wvun to mey ke fô me le ke. Wvú to nu ten fô ben e bocii. (Ke fifin nu fiè fi me enjemyì engene yì dvú le baay ke).

⁶Ngew wvun wvù wee nteen ben e nu e nya wase ê wvuwe wee nu e wvú e kocen nonen.

⁷Keseen nu e è nulo é ben elæshè jay we, ege é fitele fiew elætene, wvu le fo wvú emey ke wase enu shen shen baay ke.

⁸Nonen me e no nkule can ê ben le ben ekase eduŋe ê wvú le ben bæe ke koonke wvú.

⁹È nee fiè fi to gee e me nse nsan nwa' we fô ben e keemom ben enkiee le laa ben yuuke ke me le yì fiè le ficii le.

¹⁰É ben læshi jay wee, tu me ten nu e nlæshè. É me nlæshi fiè, fen é fiè nu dvú keelæshè, tu me nlæshi ê Klistu ejise nje yene.

¹¹Beene gee nonen wvu le fo Satan ke ene eley jó ekenke mvuŋgay ê beene we. Ke beene maa no wvú ké no wæentene ke.

Diæw Nyo' kumte bonyii le jé le jé le

¹²È to nu seke me nto ngenèe mbuy kelaante kè Towas e keenfewce saaka wvù jee wvu ekume Klistu jó, e Tata yene kembuŋ fô me le keenlem lemme diæw jó.

¹³Geenen bvufee bwem to baa nu fó ke, njefo me nto mbaa n'yen waa bwæem wvù Taytus e jó ke. Nonen e me mum ngyay bó le le bó e shèe wase, mum nto Masedonia.

¹⁴Geenen, keyoone nu fô Nyo' le wvù ké no saa fwe dvusese yì Klistu le nya mbæte, e bese bii diæwe bonyii bò wvú nu e kenke gbwen jem e. E wvú mum fele yì yese le sanse Klistu mondvuum e monciim e bó kee wvú yuuke nsam we diæwe jiin fò bó e ton e.

¹⁵ Ben ekeè le bese nu diewe nsam jiin di Klistu le fô Nyo' le enteleŋ jo bonyii bò bó boysee bó noo fô bò laa wase le.

¹⁶ Fô bonyii bò laa wase le nu ε nsam wvun too ε è nu bô kpwe fô bó le. E bonyii bò bó boyse bó nu ε nsam wvun too ε è nu bô nshii fô bó le. No fí nu nonen, tu è nu yεε dvú wvù nu ε kocen keege didin lemme?

¹⁷ Ke bese nu diewe bonyii nteen e bò nu ε jo diew Nyo' yí ε tu fiεε fi way e fi bó ghane geese lo ke. Bese nu fisese bonyii bò nu ε taashe yí Klistu le. E bese fewci diew Nyo' bô mvuntelem mvù yuule diewe bonyii bò Nyo' nu ε tum bó, ε bó leeme ê wvú ejise le.

2Kol 3

Kenfewsɛn ke moŋkan mo moyvuum bô mo monfɛm e

¹ Me nfen ŋgayte nen ε fí nu le bese bvuu kaase duŋci lo bikuu bisese ê ben e? Nu le bese shieele boŋwa' diewe no bonyii bomew shieele boban boŋwa' bò ne fô bese le kenεε fô ben e bò duŋci bonyii bò è nu bese le?

² Ben kebεε nu wase ŋwa' wese wvù bó nu ε saŋ ê mvuntelem mvusese le le wee tfuu nulo ekiεε ebvuu etaŋke.

³ Ben yen'yi le ben nu ŋwa' Klistu ε bese ε seyse. Ŋwa' wvun nu ε ke bó saŋ ε è nu bô kete ke ŋwa' le ke. Bó saŋ ε è nu bô Keyoy ke Nyo' wvù keŋke nshii le. E ke bó saŋ ε è nu yí biwaŋ bi eta yo eta le ke. Bó saŋ ε è nu yí biwaŋ bi è nu mvuntelem mvu bonyii le.

⁴ Fifin nu fiεε ε bese jemyi ê Nyo' ejise se kemaŋen nje Klistu.

⁵ Ke è nu le bese nu ε kocen bô bikuu bisese keege fiεε fimew wvù bese ke ne eduu le fiεε fimew ne fô bese le ke. Ê ge Nyo' bese ε se kocen.

⁶ Wvú nu ε ge bese ε kocen keelemte yí saaka moŋkan mo monfɛm e. Ke moŋkan man yaa nu mò bii ε è nu bonci bò bó saŋεε lo bô can ke. È nu mo Keyoy ke Yuule le. Bonci to too ε è nu bô kpwe. Geenɛn ε Keyoy nyaa ε è nu nshii ê bonyii.

⁷ Je yi yvum yí bó to gee mwεem jó nu ε bó to cow bonci bodvu yí biwaŋ bi eta le. Seke Muses to too bô bonci bodvu nu ε ke bonyii bo Islael to kee keebvuu etaa bvushiw bwew ke, nje n'yuu Nyo' wvù to baa yí bvushiw bwew e. É yiyε je yi yvum yí to too ε è nu bô kpwe to too keŋke n'yuu Nyo', ε n'yuu wvun nu wvù to baa nonen jimte wase kaa gene lo,

⁸ É n'yuu je yí bó gee mwεem jó yí è nu yi Keyoy ke Yuule saa efey naa lo wvuwe n'yuu le?

⁹ É je yí bó to gee mwεem jó yí to too bô fiεε fi leese lo bonyii ŋgew e, to too bô n'yuu Nyo', ke tu je yí bó gee mwεem jó yí è nu yí Nyo' joo bonyii le bó nu teyɛy ê wvú ejise nulo ekeŋke n'yuu ε wvú fele lo wvuwe!

- 10** Kεcεεy kedvu nu λe fiε fi to too κeηke n'yuu Nyo' fidvu nu ε lase wase n'yuu we njefo n'yuu wvù kuuke fele wvuwe nu ε to wase.
- 11** É fiε fi to kaa wase gene lo to too bô n'yuu Nyo', κe tu n'yuu fiε fi too keenu wase kemakaa nu ekuuke fele naa lo wvuwe!
- 12** No bese kee nonen se kemaηen, bese ε mum ε no fewci yaa fane κe.
- 13** Κe bese nu diewe Muses wvù to ké baη bvushiw bwew bô ndvu keege λe fo bonyii bo Islael etaale no n'yuu wvù to baa yî bvushiw bwew e jimte kaa gene κe.
- 14** Geenεn bonyii bodvu nu ε bvufee bvubole to jiime. E naa ε to ε buy εben wvun e, nu ε bó dīoo taηke fiε ε ηwa' moηkan mo moyvuum e, é bó eyuw, ε fiε no nu ε fī ε baη κe bvufee bvubole. É nu κe yî Klistu le wvù è nulo é bó ecake fiε fi baηke fidvu.
- 15** Yî kecεey e, ε to ε buy naa εben wvun e, nu ε bó taηke fiε ε ηwa' Muses e, ε fiε no nu κe ε fī ε baη bvufee bvubole.
- 16** Geenεn é wee ke etu wase bô Tata, é bó mum cake fiε fi baηke fidvu.
- 17** Tata wvun nu Keyoy, ε naa fεε fô Keyoy kin nu, nu ε bonyii ke buy κe yî bvunfaw e.
- 18** Fī nu λe beene bocii bô nu se fiε bεε baηke monshim mosεεbeene nu ε n'yuu Tata baa yî yese beene le, gee ε beene baa mum kumene gene fwe fwe fieesene wase ε è nu wvú. Nkumen wvun nu ε è gee Tata wvù è nu Keyoy ke Yuule.

2Kol 4

Ntfu saaka wvù jee ε nsháan mbom e

- 1** Nonen no bese κeηke lemme din ε è cam Nyo' shen ε nya é bese, tu κe è nulo é shem ekpwee bese dvú κe.
- 2** Bese nu ε base jim é mwεem mvù bonyii gee é kenyile le mvù è nu mvu kenshoose le. Bese nu ε tun je kenlεema. Κe bese leese mbiay é diew Nyo' le κe. Bese ké no jemyi κe ε è nu kecεey endan endan, duηci bikuu bisese é wee tfuu é Nyo' ejise, wvu λe è nulo é bó ekpwawce ekiεε bonyii bô è nu bese.
- 3** É è cim nu λe saaka wvù jee wvù bese fewci wvun nu ε fiε baηyi, tu fī baηyi κe ε è nu fô bonyii bô laa lo le.
- 4** Fô boba bonyii bô baa bee saaka wvun e nu ε Satan wvù è nu nyo' wvu yî woη wvun e ε sūm bvufee bvubole bvú ε no jiime keege λe fo bó eyenè n'yuu saaka wvù jee wvù nu ekume bvukuke bvu Klistu wvù nu wunte Nyo' le κe.
- 5** Ben ekeè le κe bese fewci ε è nu ekume bikuu bisese κe. Bese fewci ε è nu ekume Klistu Jisos λe wvú nu Tata. E bese nu κe lo fisese bonyii bô lemte ben e nje Jisos.
- 6** Nyo' wvù to gayεε λe, “N'yuu ebuy é ejiwε le ebaa”,

è nu Nyo' wvudvu wvun wvù nu ε ge n'yuw we ε no baa fô mvuntelem mvusese le keeyuuse bese ε bese kee bvukuke bvù Nyo' le bvù nu yî bvushiw bvù Jisos Klistu le.

⁷Geenen, ntfu saaka wvun nu yî yese le, ε bese nu κε lo fisese nsháan mbom. Ε bese nu nonen wvu le fí eduñcì le mvunḡay mvu baay mvun yî yese le nu mvu Nyo' le ε è yaa nu mvusese κε.

⁸Bonḡew yike bese biba bicii, geenen yaa bvuwci bese κε. Bese nen'yi ε bvufee no bvunḡke lo bese, geenen shem saa ekpwee bese κε.

⁹Bó ké no bone bikaa ê bese ejim, geenen ε Nyo' yaa daayi ê bese le κε. Bó ké no kfunε bese ε bese gbwee fokuse, geenen yaa kpwee κε.

¹⁰Bese ké no ghane kpwee κε kfuw kpwe Jisos sekeci, wvu le nshii Jisos nulo eyen'yi ten yî ye yese le.

¹¹No bese cee, nu ε bese ké no nu κε diuw kpwe le sekeci nje Jisos, wvu le nshii Jisos eyen'yi yî binḡpwe bisese bi ye le.

¹²Nonen bese ε mum ε no kpwee kpwe, geenen ε kpwe yese yin too ε è nu bô nshii fô ben e.

¹³No bese nu ε lese fitele yî Nyo' le diewe wee mvu wvù to jemyεε ê Nwa' le le, “Me nu ε mbee ε nse no njemyi”, nu ε bese ten ε bee ε se no jemyi.

¹⁴Bese kee lo le wvú wvuwe wvù to bvuseε Tata wesebeene wvù Jisos yî kpwe le, nu ke ebvuse ten beene bô nu bô bo Jisos yî kpwe le, ejo bese noo ben ten egen egεε ê wvú fwe.

¹⁵Mwεem mvun mvunciim kooyi nje yene, wvu le no mbuwma Nyo' saanḡkene gene fô bonyii le nteen nteen, é keyoone kè bonyii nyaa ê Nyo' ebiisè, ε mbense gene fô Nyo' le.

Mwεem mvù beene yene mvú le fele lo

¹⁶È nεε fiεε fi κε shem kpwee bese κε. Naa no ye yese yin cim bvooke gene kaa nen, nu ε mvuntelem mvusese kumene tuu κε lo mvunfem εdiuw εci.

¹⁷Bonḡew bo caan ban bô bese yene yî kefew kin e, nu ε bó seysee ε è nu bvunḡke bvù baay bvù mεy lo fô bese le bvù è nulo wee saa efewsεn κε.

¹⁸Nonen, bese baa leke fisese bvufee yî mwεem mvù bó yene mvú le κε. Bese leke ε è nu yî mvù bó yaa yene le κε, njefo mwεem mvù beene yene mvú le nu ε mvú fele lo, geenen ε mvù beene yaa yene κε, nu mvù mεy lo.

2Kol 5

¹Beene kee le é bó sâw lo cun yin yì è nu ye yesebeene yì beene cee dvú fokuse fen, tu beene kanḡke yew fô Nyo' le ε bó yaa bom bô can κε. Yiyε nu yew yi fowe, ε è nu yì mεy lo.

- ² No beene nu fɛn keseen nu ɛ beene looci naa shomkene, njefo beene beele baay le bó etfume yew yi fowe ye yî yese beene le diɛwɛ ndvu le.
- ³ È nu ke enu seke bó ɛ tfume wase yiyɛ yî yese beene le, beene saa ebvuu enu ye ye kɛ.
- ⁴ No beene bæɛ cee cun yin e, nu ɛ boŋgɛw bò beene joo gee ɛ beene shomkene baay. Kɛ è nu le beene gomte le bó baayɛ ndvú yì è nu ye yesebeene yidvu yî yese beene le kɛ. Beene gomte le bó etfume lo yimi yî yese beene le wvu le nshii wvù mey lo emi lo biŋkpwe bi ye le bidvu.
- ⁵ Nyo' nu wvù nu ɛ seyse beene keekɛŋkɛ fiɛɛ fin. Wvú nu ɛ nya beene sâ' wvudvu ɛ è nu Keyoy ke Yuule.
- ⁶ Nonɛn, bese ɛ mum ɛ no nu sekecii kee fifin sɛ kemaŋɛn. Bese kee le no bese cee yî ye yin e yî woŋ wvun e, nu ɛ bese nu ncejole fô Tata le.
- ⁷ Bese gee mwɛɛm ɛ è nu nje fitele fi bese lese yî Nyo' le, kɛ è nu nje bese yɛne wvú le kɛ.
- ⁸ Bese nu naa sɛ kemaŋɛn yî fifin e, ɛ fí jee naa lo le bese ecinɛ lo ye yin e, egen enu wase bee bo Tata fô la diew e.
- ⁹ Fí ɛ no nu le kɛnɛɛ bese nu bee bó fô la diew e, kɛnɛɛ bese bæɛ fɛn, tu fiɛɛ fi bese taale yî dvú le, nu kɛ keegɛɛ ɛ wvú yuuke njɔŋ.
- ¹⁰ Ben ekeè le beene bocii kɛŋke keeke eleem fwe dvu Klistu é wvú esaw beene, wvu le wee mwaan mwaan ekɛŋke nlawma fiɛɛ fi wvú to gee yî ye yin e, kɛnɛɛ è nu fi jee kɛnɛɛ fi befɛ.

Lemme keegɛɛ ɛ bonyii manci mwɛɛm bô bo Nyo'

- ¹¹ No bese kee fiɛɛ fi nu keefane Tata, bese ɛ mum ɛ no momte keegɛɛ é bonyii ekumɛn. Nyo' looci naa kee bonyii bò è nu bese naa ntay. ɛ me ŋkpwaake le ben ten kee ntay é mvuntelem mvunen e bonyii bò è nu bese.
- ¹² No bese jemyi nɛn nu ɛ kɛ bese gomte keebvuu ekase eduŋci lo bikuu bisɛsɛ é ben kɛ. Bese nyaa kɛ ɛ è nu je é ben keesaale ye bô bese, wvu le è nulo é ben ekɛŋke fiɛɛ fi è nulo é ben etfuse é bonyii bò bensee bibɛɛn bô mwɛɛm mvù bó yɛne yî bonyii le ɛjise, ɛ è yaa nu mvu fô mvuntelem mvubole kɛ.
- ¹³ È è nu le bikuu ghane bese, tu bí ghane nje Nyo'. È no nu le bí leeme fô, tu bí leeme kɛ nje yene.
- ¹⁴ Fiɛɛ fi gee ɛ bese gene fwe bô fiɛɛ fi bese gee nu kɛŋkɔŋɛn kè Klistu kɛŋke fô beene le. Bese gee nonɛn njefo bese nu ɛ loocɛ ɛ bee le wee mwaan to nu ɛ kpwe fô bonyii le bocii, ɛ fí mum nu le bonyii bodvu bocii nu ɛ kpwe wase ten.
- ¹⁵ Wvú to kpwe fô bonyii bocii le wvu le fo boba bò cee, ebvuu ecee fô bikuu bibole kɛ. Geenɛn le bó eceè wase fô wvuwe wee wvù to kpweɛ kase buy yî kpwe le nje bó le.

¹⁶Nonen, ε κew lo nu ε κε bese bvuu taale wee bô bvufee bvuu wee wvu wum e κε. Naa no bese to cim shee taale Klistu ε è nu bô bvufee bvuu wee wvu wum e, nu ε bese yaa bvuu taale wvú keseen ê yiye je le κε.

¹⁷Fiεε fi nu nu le, é wee nu ε taashe wase bô Klistu, tu wvú nu wase wee wvu fwε. Mwεem mvu mvuyvuum mvunciim nu ε fey wase, ε mwεem mvunciim ε tu wase mvu mvunfem.

¹⁸Fin ficii nu ε è gee Nyo' wvù to kasεε jo beene yî ye le no wvú to mancεε mwεem beene ε bó fele yî Klistu le. E wvú ε nya ê bese lemme keegeε ε bonyii manci mwεem bô bo Nyo'.

¹⁹Fì nu le, è to nu yî Klistu le wvù Nyo' to manci mwεem bô bonyii bo yî won wvun e le bó etu bô wvú. E wvú faηε yaa ebvuu engoyte fite fi kebefε kebole κε, mum nya ntum keman wvun can yese le le bese eteete ê bonyii.

²⁰Bese ε mum ε no nu fen yî bvudvuu bvuu Klistu le, ε Nyo' fele yî yese le leke bonyii. Nonen bese kule can ê ben ê diee di Klistu le le ben ekase emancε mwεem ben ε bo Nyo'.

²¹È nu nje yese beene wvù wvú wvù Nyo' to gee ε Klistu wvù to baa kee kebefε, ne tu kebefε, wvu le beene etu teyey ê Nyo' ejise nje ye.

2Kol 6

Bongew bò Baul wvù waa ntum Jisos Klistu to yene

¹No bese lemte yî kentaashe le bee bo Nyo', bese ε mum ε no kule ten can ê ben le fo ben efiisen mbuwma Nyo' wvun ege é wvú ela εcici κε.

²Nyo' to nu ε jeme ê Nwa' we le le, “Kefew ke leη to nu ε to kocen, ε me nya bitem ê wo. Diuu di mboyma le to nu ε kocen ε me nfi wo.” Ben etaa eyen, keseen nu kefew ke leη, ε din nu diuu di mboyma le.

³Ke bese yaa gee naa lo fiεε fi nulo ebaaηke je wee mvu κε. Bese gee nonen wvu le fo bó ke eyen jay mvu le yî lemme disese le κε.

⁴Geenen, bese nu ε duηce fisese bikuu bisese ê jé le yicii le bese nu bonyii bo lemme le bo Nyo' le. Bese nu ε duηce ê je yî bese kuule fitele naa baay yî bongew bò bese yene le bô seke mwεem temyi noo seke je yaa nu naa dvú κε le.

⁵Bonyii ké no suηke bese, ké ne sekemew lese bese yew ncaw e, ε bonyii nen'yi no shiike mvunlaa bee bó. Bese ké no kfunε ye yî lemme le, ké ne ce entaη saa lefe κε, ké ne kefew kemew e no kpwee jeη.

⁶Bese duηci ten le bese nu bonyii bo lemme le bo Nyo' le ê je nce wese wvù yuule le bô no bese kee fiεε fi ekumε Nyo', noo no bese kuule shém, bô no bese keηke mvuntelem mvù jee fô bonyii le. Bese cee bii no Keyoy ke Yuule duηci, ε bese kooηke bonyii bô ηkoηen wvu keceey.

⁷ Bese ké no jemyi ke ε è nu njeme wvu keceey, gee mwεem ê mvuṅgay mvu Nyo' le. Bese ké no jici nce wvu teytey e diewe mwεem mvu jem e mvu εbo εceey bô mvu εbo εṅkoṅko le.

⁸ Bese ké no lemte ke lo, kenεε bonyii wvumte bese, kenεε bó yaa wvumte ke, kenεε bó jemyi mwεem mvù befe ekume bese kenεε bó jemyi mvù jee. Bonyii ké no joo bese le bese nu bonyii bo kenlεema le, geenεn ε bese nu bonyii bo keceey e.

⁹ É bonyii ké ne no nu nen diewe ke bó kee bese ke, geenεn ε bonyii kee naa bese ntay. Bó ké nen'yi no yene le bese nu wase boṅkfusay, geenεn ben etaa eyen, bese nu ke dvú. É bonyii ké ne no nyaa ṅgew ê bese, geenεn yaa yuwyi bese ke.

¹⁰ Bese ké no nu nen diewe bonyii bô nu yî yii le, geenεn lanlajε ke sekecii, nu diewe bonyii bô fuute le, geenεn gee ke ε bonyii nteen nu bonyii bo kpaw e. Bese ké no nu nen diewe ke bese keṅke naa lo fiεε ke, geenεn ε bese keṅke mwεem mvunciim.

¹¹ Bonyii bo Kolεn, bese nu ε jeme wase ê ben yaa nyile fiεε ke. Bese nu ε yene mvuntelem mvusεε ε gee mvuyεm ê ben.

¹² Ke bese baa baṅ mvuntelem mvusεε fô ben e ke. Ê baṅ ben mvunεn fô bese le.

¹³ Me ε no njemyi ê ben ke diewe ê boom bem e le, ben ege leṅleṅ no bese nu ε ge fô ben e, eyene tεn mvunεn mvuntelem fô bese le.

Fo wee mbee elεnè εkalε kemwaaṅ bô wee wvù baa nu wee mbee ke

¹⁴ Fo ben elεnè εkalε kemwaaṅ ben ε bonyii bô yaa nu bo mbee le ke. È nulo é fiεε fi teytey bô fi befe eghan neε se no nu yî fiεε le fimwaaṅ? N'yuu bô εjiwe nulo ekeṅke kentaashε?

¹⁵ È nulo é Klistu bô Bεlial enu diuw mwaṅ e? Fiεε fi taashi wee mbee bô wee wvù baa nu wee mbee nu la?

¹⁶ Yew ncese Nyo' nulo ekeṅke la keege bô mvunyo' mvu yî woṅ wvun e? Ben ekeè le beene nu yew ncese yî yi Nyo' wvù keṅke nshii. Fifin nu no Nyo' to gayεε le, “Me nu ṅke encee yî bó le, nlεne ê bó εntelεṅ. Me nu ṅke enu Nyo' wvubo, ε bó nu bonyii bem.”

¹⁷ Nonεn, Tata Nyo' gayte le, “Ben ebuy ê bó εnte, enù jεey fô bó le. Fo ben ekum fiεε fi nnyen e ke, é me emum enfiisen ben.

¹⁸ Me nu ṅke enu Icen, ε ben nu boom bem bô bolemεε noo bô bokεε. Fifin nu ε è jemyi Tata Nyo' wvù Keṅke Mvunṅgay Mvunciim.”

2Kol 7

¹ Nsáa yem shém, no Nyo' nu ε nya bonkawma ban ê beene nen, beene emum eukε fιεε ficii fi beete bô ye yesebeene noo keyoy kesεεbeene. Beene eyuulè gene mεεse no beene cee yî nfan wvù wvu Nyo' le.

ε Baul yuw njon le bonyii bo Kolεn to nu ε kumen mvuntelem mvubole

² Ben egεε bvudvuu ê mvuntelem mvunen e fô bese le. Kε bese nu ε jay fιεε fô wee le kε. Kε bese nu ε lεε wee kε, ε kε bese nu ε fiw wee mvu kε.

³ Kε me njemyi nen le me nsaake lo ben kε. Me nu ε ηgay wase ê ben le ben nu naa lo fitele fisεse, é è cim nu keekpwe kenεε keenu dvú, tu beene nu enu kε yî kentaashε le.

⁴ Me nu ε ηgεε fitele fiem yî yene le baay. Me ηkεηke kembense ye ke baay ekumε ben. Fitele fiem lætene baay ekumε ben. Ente jo bongew bocii bô bese yene nu ε me n'yuuke kε ε è nu njon.

⁵ Naa no bese to leyεε woη wvù Masedonia le, bese to baa kεηke n lætεn kε. Bese to kεηke bongew biba bicii. Bonyii to gomte diuw bee bó, ε bese bvuu kεηke nfan ê mvuntelem mvusεse le.

⁶ Geenεn, ε Nyo' wvù læsee mvuntelem mvu bonyii bô nu yî yii le ke læsee mvuntelem mvusεse bô nto wvù Taytus to toε.

⁷ Ε kε è to mey kε nto we maan wvù to læsεε mvuntelem mvusεse kε. È to nu ten je yî ben to læsεε fiew fitele jó. Wvú to nu ε see ê bese le ben shieele baay keeyen me le, bô no ben kεηke yii fô bikuu binεn e, noo no ben kεηke shiee fô me le. No me n'yuwεε nonεn, mbvuu n'yuw naa lo njon baay.

⁸ É è cim nu naa le ηwa' wvù me nto nsanηεε fô ben e wε to nu ε ge ε ben no nu yii yii, tu kε me ncim ηkumyi ye kε. Geenεn, ε me nto ηkumε kε ye, njefo me n'yene le ηwa' wεm wvudvu to nu ε ge ε ben no nu yii yii. Geenεn, ben to nu yii yii kε yî kefew e nen caan.

⁹ Me ε no n'yuuke njon keseen, ε è yaa nu njefo ben to nu ε no nu yii yii kε. È nu njefo yii yin to nu ε ge ε ben kumen mvuntelem mvunen. Ben to kεηke yii ε è nu è je yî Nyo' gomte le. Nonεn bese to baa ge fιεε fimew fi befe fô ben e kε.

¹⁰ É wee kεηke yii ê je yî Nyo' gomte le, tu fí nu ege é wvú ekumen fitele fiew. É fife fin eto ε è nu bô mboyma fô wvú le, saa eto ε è nu bô fιεε fi wvú ekumyi ye yî dvú le kε. Geenεn, é wee kεηke yii ê je bonyii bo yî woη wvun e, tu yí nu ke eto ε è nu bô kpwe.

¹¹ Ben eyen le fιεε fi yii yî è nu yî Nyo' gomte nu ε to dvú fô ben e. Ben eyen no ben nu ε jo mwεεm naa shiee le. Ben eyen ten no ben nu ε ge fιεε ficii keeduηce le kε ben kεηke εbo fô fιεε fi befe fidvu le kε. Ben eyen no fιεε fidvu nu ε ton'ye ben. Ben eyen nfan wvù ben nu ε kεηkε. Ben eyen shiee wvu baay wvù ben kεηke keeyen me le. Ben eyen shiee wvù ben kεηke keege fιεε fi læη. Ben eyen ten kfuu

ngew wvù ben nu ε nya ê wee wvudvu wvù gee jay. Yî fiεε le ficii nu ε ben ε duŋce lo le ke ben keŋke naa lo εbo fô fiεε fidvu le ke.

¹² Nonen, naa no me nto ncim nsaŋee ŋwa' we fô ben e nu ε ke me nto nsaŋ nje wee wvù to gee jay, kenεε wee wvù bó to gee jay fô wvù le ke. Me nto nsaŋ wvu le è nulo é ben eduŋce fô bikuu binen e ê Nyo' ejise le ben keŋke shiee fô bese le.

¹³ Nonen fifin nu ε ge shém ε no lætene bese. Keebise yî shém yese yî nu ε læten e, nu ε bese bvuu yuuke njoŋ baay nje njoŋ wvù Taytus yuuke njefo ben bocii nu ε ge fitele fiew ε no nu yî nyεkeey e.

¹⁴ Naa me nto ŋké no nsaale wase ye bô ben ê Taytus, ben to baa shoose me ke. Kensaa ye kè bese to ké no saale bô ben ê Taytus nu ε duŋce le è nu ke keceey. E è nu ke læŋleŋ no fiεε ficii fi bese to ké no jemyi ê ben nu ten keceey.

¹⁵ Wvù wvù Taytus ké kumyi no ben bocii to yuwεε wvù le, bô no ben to fiisεεε wvù fane, ciŋke, ε wvù bvuu koŋ ben naa fesen lo.

¹⁶ Me ten n'yuuke njoŋ njefo me nu ε ŋgeε bvufee bwem yî yene le ε ŋgen ε mεse.

2Kol 8

Ntefe no è nulo é bonyii bo mbee le enyaa nnya ê bonyii bomew

¹ Boom bo bwee wese le, bese gomte le ben ekiεε fiεε fi mbuwma Nyo' nu ε ge fô bintaashe bi bonyii bo mbee le bi ê keba kè Masedonia le.

² Bongew bò temyi nu ε mom wase bó baay. Geenεn ε njoŋ wvu baay wvù bó keŋke ε ge bó ε looce ε yene can yibo yicii ê bonyii bomew naa no bó cim nu ê kefufe ke baay ente.

³ Fiεε fi è nulo é me ensee nu le è to kpaw ke bó le bó enya nnya no mvuŋgay mvubole nu. E bó dioo nyaa, nya naa fesen lo.

⁴ Bó to nu ε læke bese naa shiee le le bese enya ke bó je keeese εbo fô lemme din e keetom bonyii bò è nu bo Nyo' le.

⁵ Bó to nu ε ge fiεε ê je yî bese to baa kpwaake le è nulo é bó ege le ke. Bó to nu ε yaw nya bikuu bibole ê Tata, mum nya ten ê bese no Nyo' gomte.

⁶ Nonen, ε bese mum læke Taytus le no wvù to nu ε kew wase lemme din ê ben enteleŋ, le wvù emum egen dvú fwe efice ben keemεse lemme di jee din.

⁷ No ben looci kee mwεem mvunciim naa ntay, mwεem mvu ê keba ke mbee le, mvu ê keba ke njeme le, mvu ê keba ke bvufee le, mvu ê keba ke shiee keege fiεε le, noo mvu ê keba ke keŋkoŋen kenεn e fô bese le, bese ε mum ε no gomte le ben elooce ekiεε ten keeyene can yene yî lemme di jee din e ntay.

⁸ Ke me njemyi nen nyaa ε è nu nci ke. Me momte lo mbii shiee wvù bonyii bomew keŋke keege fiεε le keen'yen le keŋkoŋen kenεn ten nu ke keceey.

⁹ Ben kee wase fitele fi jee fi Tata wesebeene wvù Jisos Klistu to kenke. Naa no wvù to nu wee bvukuke nu ε wvù to ne tu wee kefufe nje yene, wvu le kefufe kew ege é ben etu bonyii bo bvukuke le.

¹⁰ Yî saaka wvudvu wvun e nu ε me ηgomte keenya wem ntefe. Fí nu len le ben bò to kewee lumbee keege fiεε, ε è yaa nu ke keege fiεε maan ke, ben to nu ten bonyii bò to kewee keekenke shiee keege fiεε,

¹¹ben emum egen dvù fwe emese, wvu le ben ke dioo ε mese bii no mvungay mvunen nu, é fí elen ekale kemwaan bô shiee wene wvù ben kenke keege fiεε.

¹²Ben ekeè le é wee kenke shiee keenya, tu Nyo' nu efiisen nnya ye bii fiεε fi mweten kenke keenya le, wvù saa ebii fiεε fi wee baa kenke le ke.

¹³Ke me ηgayte nen le ben nu dioo nyaa keefi bonyii bomew kaa kpwe lo ke. È nu fiεε keege é biba bicii ekenke lenlen.

¹⁴No ben kenke mwεem keseen ε mvù ffuyte lo, ε bonyii bomew tane, nu ε è nulo é ben efi bó. É bó dioo kenke ten ε mvù ffuyte lo sekekis, ε ben tane, é bó efi ben. Nonen é biba bicii emum ekenke lenlen.

¹⁵È nu no bó nu ε san le, “Wee wvù to baanceε baay, to baa emum ekenke baay ke. E wee wvù to baanceε ke caan, to baa emum ekenke ke lo caan ke.”

ε bó tum Taytus Kolen

¹⁶Me nyaa keyoone ê Nyo' wvù nu ε gee shiee wene fô fitele fi Taytus e ke lenlen diewe wvù me ηkenke fô ben e.

¹⁷Ke wvù to baa emum ebee keeto ê ben e nje bese to nu ε lεke wvù ke. Wvù too ê ben e yî ηkpawce wvuwe le no wvù to kenke wase shiee naa baay fô ben e.

¹⁸Bese tumte wvù bô waa bwee wesebeene wvù bó kee wvù entelen jo bintaashe bi bonyii bo mbee le bicii yî saaka wvù jee wvù wvù ghane fewci le.

¹⁹ε ke è mey ke fifie ekume wvù ke. Wvù nu ten wee wvù bintaashe bi bonyii bo mbee le nu ε baa le wvù eghanè bee bó no bese ghane gee lemme di jee di ekume nnya yin. Lemme din nu keege é bonyii enyaà mbense ê Tata kebεε, bô keedunε le bese kenke shiee keefice bonyii bomew.

²⁰Bese gomte le fo fiεε ke enu dvù fi wee mvu ke ebace bese yî dvù le ekume nnya yi baay yin yi bese lemte yî dvù le ke.

²¹Bese momte naa ntay keege ε è nu fiεε fi nu len ε è yaa mey ke ê Tata ejise maan ke. Bese momte keege fi nu ten len ejise jo bonyii.

²²Bese tumte ten waa bwee wesebeene mvu bô bó wvù bese nu ε mom wase wvù bokaη nteen yî mwεem e nteen, ε yen le wvù kenke shiee keege mwεem. E wvù nu keseen kenke naa shiee wvu baay fô ben e, njefo wvù nu ε gee fitele yî yene le naa baay.

²³ Wee diewe Taytus e nu ε wvú nu wee wvù bee wvú lene yî ekale le kemwaan, nu ten wee wvù bee wvú lemte yî fiεε le fimwaan fô ben e. Ε διοο tu fô boom bo bwee wesebeene le bomew ba, nu ε bó nu bonyii bo ntum e bo bintaashe bi bonyii bo mbee le. Ê nu bonyii ε bó gee ε mbense gene fô Klistu le.

²⁴ Nonen, ben emum eduηce keηkoηen kenen fô bó le endan, wvu le bintaashe bi bonyii bo mbee le eyen le ye yî bese ké no saale ekume ben nu yi leη.

2Kol 9

Nyo' kooηke wee wvù nyaa nnya ye bô nlanlan

¹ Ke shiee cim nu dvú wvù me ensaanke lo ê ben ekume lemme din keetom bonyii bô è nu bo Nyo' le ke.

² Me ηkee lo le ben keηke wase shiee keetom bó. Ε è nu fiεε fidvu fi me nsaale ye dvú ê bonyii bo Masedonia ekume ben, njemyi le ben bo Akeya nu ε ben to seyse wase ε è bæε lo lumbee keetom. Shiee wvù ben keηke keenya ε mum ε ge ten mvuntelem mvu bonyii le nteen ê bó ente ε ja we.

³ Geenēn, me ntumte boom bo bwee wesebeene le ban fô ben e wvu le fo ye yî bese saale ekume ben yî saaka wvun e ke ebuy le è nu yi εcici ke. Me ε no ntumte bó wvu le ben enù ε ben ε seyse no me nto ηgayεε le ben nu ke enu.

⁴ Efuw ke nonen, fí ε kooy le bee bonyii bo Masedonia bomew ε ne ε to ε yen ε ben nu se ben nu ε seyse, é kenshoose kedvu enu nεε fô bese le, efey mvunciim fô ben e bô bese se gæεle bvufee yî yene le?

⁵ Ê nu fiεε fi gee ε me ηkpawwce le fí nu shiee le le me enlεke boom bo bwee wesebeene le ban le bó esa ke fwe eto ê ben e eseyse nnya yi baay yin ε kefew bæε yî ben to kawεε keenya. Nonen é nnya yidvu emum enu ε ben ε seyse wase le è nu nnya ε ben nyaa yî ηkoη wvu wene le, ε è yaa nu le bó kamte lo ben ke.

⁶ Ben ekumyî le wee wvù jewyi caan, nu ke egbwele ke caan, ε wee wvù jewyi nteen, nu ke egbwele ten nteen.

⁷ Wee mwaan mwaan ben e keηke keenya no wvú nu ε kpawwce fô fitele fiew e, yaa nyaa guute lo ye kenεε nyaa diewe bó kane lo wvú ke. Ben ekeè le Nyo' kooηke wee wvù nyaa bô nlanlan.

⁸ Nyo' nulo ebuw ben bô mwεem mvunciim ege é mvú effuyte lo, wvu le ben ekeηke fiεε ficii sekecii ε fí kocine ben e bocii, é ben emum egeè dilemme di jee dicii dvú ntay.

⁹ Fí nu no bó nu ε saη le, “Wee wvù nyaa nnya nu ε tfuw lo nnya ê bonyii bo kefufe le, lemme diw di jee nu ke emey nu sekecii.”

¹⁰ Nyo' wvù nyaa ηgow ê wee wεε bô mwεem mvudien ε bó diee, nu ke enya ten ebvuu ebise ηgow mwεem mvunen, ege é nce wene wvù jee eto bô ηgbwele ε wvú duule lo.

¹¹Nyo' nu ke enya ten ben bô bvukukε ê jé le yicii keege é ben eyen'yi can yene ntay ê bonyii bomew, wvu le bonyii enyaà mbense ê Nyo' seke bó ε kenke nnya yin can yese le.

¹²Ke lemme dinen di jee din di ben lemte too ke ε è nu bô mwεem mvù bonyii bò è nu bo Nyo' le shieele maan ke, dí too ten bô mbense fô Nyo' le jé le nteen.

¹³Lemme di ben gee din nu eduŋce bonyii bò è nu ben, é bonyii emum etumte moŋkum mo Nyo' le yî n'yuw wvù ben yuuke saaka wvù jee wvu ekumε Klistu wvù ben tomte le. Bó nu ke etumte ten moŋkum mo Nyo' le no ben nu ε yene can yene fô bó le noo fô bonyii bomew e bocii.

¹⁴Bó nu ke ebunlee fô ben e, ε mvuntelem mvubole nu yî yene le naa baay nje mbuwma Nyo' wvun wvù nu yî yene le wvù kuuke naa fele lo.

¹⁵Beene enyaà keyoone ê Nyo' yî nnya ye yi baay yi è nulo wee saa esee no yí nu le ke.

2Kol 10

É caw Nyo' Baul le wvù enù waa ntum Jisos Klistu

¹ Me wvù Baul kebee, ŋkule lo can ê ben ê je kembonen bô nyεkeey wvù wvu Klistu le. È nu me wvù bó duu le me ŋké ndioo nu keba kemew no ncewcewe lo bô ben, ŋké nto wase ê ben ejise, mum mbo.

² Me nleke lo ben le seke me ε ŋke ε nto, fo ben ege é me ene encewcewe beene no me nulo ŋke encewcewe bee bonyii bò kpwaake le bese gee mwεem bii ε è nu ŋkpawce bonyii bo yî woŋ wvun e ke.

³È nu kecεey le bese cee yî woŋ wvun e, geenen ke bese yaa tumte jem yese bii no bonyii bo yî woŋ wvun e tumte ke.

⁴ Ke mwεem mvù bese tumte jem yese dvú nu mvu yî woŋ wvun e ke. Mwεem mvù bese tumte jem yese dvú kenke mvuŋgay mvù nen'yi fô Nyo' le, keebvuuke mondvuum mò temyi dvú.

⁵ Bese ké no joo mwεem mvu jem e mvun bvooke bombew bò bonyii beeke dvú, shiwse kembense ye kecii kè baanke fo bonyii ekee Nyo', soo ten boŋkpawce bo bonyii le dvú, gee ε bó yuuke wase ε è nu Klistu le.

⁶ Seke ben ε duŋce le ben yuuke wase Klistu le bô mvuntelem mvunen mvunciim, é bese emum enya ŋgew ê wee tfuu wvù bee temyi ekole bô Klistu.

⁷ Ben etaa eyen fiε fi nu ê ben ejise! É wee kee naa kecεey le wen nu wee Klistu, é wvù no kumyi le no wvù nu wee Klistu, nu ke ten no bese nu.

⁸ É me ncim ne naa ε no nsaale ye nfesene caan nje mvuŋgay mvù bese kenke mvù Tata nyae keeyoo lo ben dvú, ε è yaa nu keesâw lo ben dvú ke, ken'wuumen saa ekoole me ke.

- ⁹Κε me ηgomte λε fí eyen'yi nen κε diewe me mbemsee lo ben bô bonwa' bem κε.
- ¹⁰Me ηgayte nen njefo bonyii bomew nen'yi no jemyi ekume me gayte λε, “Wvú ké no saanke bonwa' ε bó temyi bvuu cewcewe, geenen seke wvú ε to ê bonyii ejise mum tu wεε. Ε κε njeme we ké no koole fiεε λε κε.”
- ¹¹ Boba bonyii ekeè λε fiεε fi bese jemyi ê bonwa' λε seke bese yaa nu fó κε, nu ε bese nu ke ege fí seke bese ε to.
- ¹²Κε bese momte naa keebewsene ye, kenεε efewsene bikuu bisese bô bonyii bomew ba bô seηe bô dew yibo fiεε fi è nu bó κε. No bó fewsene bikuu bibole ebonεbon, bewsene ten ye yibo ebonεbon, nu ε fí duηci λε κε bó kee fiεε κε.
- ¹³ Fisese nu ε κε bese cim saale ye fesene keλεη κε. Bese saale ye ε è nu yî keλεη kè Nyo' nu ε nya can yese λε keelem eto ebuy naa ê ben e.
- ¹⁴Κε bese danεene ε è nu kedwee no bese too buyte ê ben e κε. Bese to nu bonyii bo fwe keelen bô saaka wvù jee wvu ekume Klistu to naa buy ê ben e.
- ¹⁵Κε bese saale ye fesene κε, fi nu λε κε bese saale ye yî lemme dì è ge bonyii bomew κε. Geenεn fiεε fi bese taale fwe kee nu λε no mbee wene kuu gene fwe, nu no keλεη ke lemme disese λε ê ben εντελεη nu ekuuke ten gene naa ntay.
- ¹⁶Nonεn é bese emum efey lo jo ben efewci saaka wvù jee gene biba bimew e, saa nu λε bese saale ye bô lemme dì bó nu ε lem wase bvudvuu bvυ wee mvυ λε κε.
- ¹⁷ Fí ε mum ε no nu no bó saη ê Nwa' Nyo' λε λε, “Wee edioo esaale ye, no saale ε è nu yî fiεε fi è ge Tata λε.”
- ¹⁸Κε è nu wee wvù duηci ekole kew λε wen nu wee wvu λεη wvù mum nu wee wvu λεη ê Tata jise κε. È nu wee wvù Tata yene λε wvú nu λεη wvù nu wee wvu λεη ê wvú ejise.

2Kol 11

Baul bô bonyii bô mbiayte λε bó nu boom bo ntum e bo Jisos

- ¹Me nλεke λε ben ecine κε é me enjeme njeme keyuηεε nen caan. Kee, ben ecine κε lo!
- ²Me ηκεηke ken'yεε ejise bô ben kè è nu ke Nyo' λε. Ben nu fô me λε diewe ηgon kpwoon wvù bεε tfu λε, wvù me nu ε ηkaw keηke enya wvú ê diemsen mwaan wvù è nu Klistu.
- ³Geenεn ε me nfane λε λεηλεη no yo to wεεντενεε λεε Iff, nu ε bó nu ke ebvunε ten bvufee bvunen é ben ecine je yì nu kecεey bvuu yuule yì ben bii Klistu λε jó.
- ⁴ Me njemyi nen njefo ben kaantene κε lo fiεε ficii. É wee ne ε no fewci ekume Jisos mvυ jεey se è nu wvù bese to fewcεε ê ben, kenεε keyoy kemew jεey se è nu kè ben to fiisενεε ê Nyo', kenεε ekume saaka wvù jee mvυ jεey se è nu wvù ben to fiisενεε ê bese, tu ben nu emum ekaanten κε lo.

- ⁵ Kε me ηkpwaake le bonyii ba bò ben teje le bokow bo boom bo ntum e bo Jisos e mum kuuke lo fele me κε.
- ⁶ É è cim nu naa le κε me ηkee njeme, tu κε è mum nu le κε me ηkee fiεε fi ekume Nyo' κε. Fin nu fiεε ε bese ε duņce wase ê ben ê jé le yicii noo yî mwεem e mvunciim.
- ⁷ No me nto nfewcεε saaka wvù jee wvù wvu Nyo' ê ben εcici se nlawma, ε fen ghane le me nto ηge ε è nu kebefe keenshike ekole kem nonen wvu le me embense ben e?
- ⁸ È nulo é me engay le me nto nsooηke ε è nu kenson ηntelen jo bintaashe bi bonyii bo mbee le bimew, no me nto nfii nfi ê bó, nlemte ε è nu fô ben e.
- ⁹ Seke me nto nu beene, me nto mbaa ηγεε bvujite bvumew yî wee mvu ben e seke me nto ηkeηke shiee fiεε κε. Boom bo bwee wesebeene le bo Masedonia to nyaa fiεε ficii fi me nto nshieele. Nonen yî fiεε le ficii nu ε me nto ntun keeηγεε bvujite yî yene le. Ε è nu κε no me nu ηke entune nonen.
- ¹⁰ No kecεey ke Klistu le nu yî yem e, κε wee nu dvú ê biba binen bi Akeya le wvù nulo ebaη diuw wεm yî fiεε fi me nsaale ye yî dvú le κε.
- ¹¹ Me ntune nfi ê ben nonen nje la? È nu njefo κε me ηkooηke ben e? Me ηkooηke naa ben ε Nyo' kee nonen.
- ¹² Fiεε fi me ηgee nu ε me nu ηke emεy κε ηgee, wvu le me embaaηke je fô bonyii ba bò gomte keeyene le bó nu lenlen bee bó yî fiεε fi bó saale ye yî dvú le.
- ¹³ Kε bonyii bodvu ba yaa nu boom bo ntum e bo Klistu le bo kecεey κε. Bó nu bonyii bo lemme le bo kenλεεma le. Bó tεeke lo Klistu fô jise le bowen nu boom bew bo ntum e.
- ¹⁴ Ε κε fifin yaa nu fiεε fi ηghaw e κε. Naa Satan bô ekole kew ke tεw κε Nyo' fô jise le wen nu nceendaa we wvu n'yuu.
- ¹⁵ Nonen κε è nu fiεε fi diuw wvù yumεen e seke bonyii bew bo lemme le baηse ten ye yen'yi diewe bonyii bô yeeyi bonyii no nce wvu teyey keηke keenu le κε. Kemεse kebole nu ke enu κε lenlen no gee dibole nu.

Ε Baul no saale ye ekume bongew bô wvú to yεne

- ¹⁶ Me ε mbvuu ε no njemyi le fo wee ejo me le me nu keyuη κε. Geenεn é ben jo me le me nu keyuη, é ben cine le me le ε me njeme ten njeme kensaa ye caan.
- ¹⁷ Fiεε fi me njemyi ekume fi fi me nsaale ye yî dvú le se nfan, nu ε κε me n'yaa njemyi bô mvuηgay mvu Tata le κε. Me njemyi ε è nu diewe keyuη e.
- ¹⁸ No bonyii nteen saale ye ê je bonyii bo yî woη wvun e, tu me nu ensaalè ten yem ye.
- ¹⁹ Me njemyi nen njefo ben fiisene biyuη duu le ben keηke bvufee!

20 Ben nu ε cine le bonyii ejoò ben ε ben tuu bonfaw bobole, ε bó diekene yî yene le, bene yî yene le, bensee ye, tumyi can ê ben jise.

21 Ken'wuumen koole me le bese to kaa nu fisese biwelencoy faηe yaa gee nonen ke! Geenεn é fiεε nu dvú fi wee momte keesaale ye dvú, tu me ten nu emomte keensaale ten ye yî fifie fiεε le. Me mbεε ke njemyi fin diεwe keyuη e.

22 É bonyii bodvu nu Bo'ibulu, tu me ten nu ke mvu. Bó é no nu bonyii bo Islael, tu me ten nu ke mvu. Bó é no nu bonyii bo ê kfuu di Ab'la'am e, tu me ten nu ke mvu.

23 É bó fen nu bonyii bò lemte Klistu le, tu me nfele naa lo bó yî fifie le. (Me njemyi wase fin diεwe wee jewte le.) Me nu ε nlem naa wase ε nfey lo bó, ε ηgen ncaw ε nfey bó, ε bó suη wase me bokaη ηkuuη, ε kpwe ε soy wase me bokaη e bokaη e.

24 Me nu ε nfi wase bongbwan can Bojuu le bokaη botin, ε bó tamte kaη mwaan ε è fuute ηgbwan mwaan fô mbaanyε.

25 Bó nu ε suη wase me bokaη botete bô bimbaη, ε tumye me bô eta kaη mwaan. Nguw wvu ê joo nu ε sawye wase bô me bokaη botete, ε me ε nce wase ê joo ε mbuy ε nshe jó.

26 Me nu ε nghan wase baay, ε mboy fo me enle joo bokaη nteen, ε mboy fo me enkpwe can bocoon e, ε mboy ten fo me enkpwe can bonyii bem bo won e, ε mbvuu ε mboy fo me enkpwe can bitum e, ε mboy fo me enkpwe εlaante, ε mbvuu ε mboy fo me enkpwe ηkpwaante, ε mboy fo me enkpwe ê joo yi baay e, ε mboy ten fo me enkpwe can bonyii bò mbiayte le bó nu boom bo bwεem e yî Klistu le.

27 Me nu ε nlem wase baay ε njimten. Me nu ε nce wase se nyii bokaη nteen. E me nu ε no nu wase jej noo se joo yî me η'wu. Me nu ε nce wase bokaη nteen se fiεε fidien, ε nce kenton e se ndvu.

28 E keebvuu bise yî mwεem mvumew e nu ε me nu ke ekuse jo bvujite ediuw ecii nje bonkpawce bò me ηkeηke fô bintaashe bi bonyii bo mbee le bicii.

29 É wee dīoo wεeyi, tu me nu en'yuuke ten ε me η'wεeyi. É wee ké ege é wee mvu ege kebefε, tu fī nu esase me baay.

30 É è nu le me ensaale ye, é me ensaalè ε è nu yî mwεem mvù duηci le me n'wεeyi lo le.

31 Nyo' wvù nu Nyo' noo Icee Tata wesebeene wvù Jisos wvù mbense nu fô wvù le sekecii se ηka, kee lo le ke me mbiayte lo ke.

32 È to nu seke me nto nu Damaskus, ε wee sa' wvù to nu ekuse jo Nfon Alētas ke gay ε bonyii no ceyte kelaante kedvu wvu le bó ekoo me.

33 Geenεn ε bonyii ke jo me lese ê ηkaa le, bvuse fô ntoo ketaan e shike ekfuη, ε me nse nlemten can ye le.

2Kol 12

Mwɛɛm diɛwɛ bifilɛ lɛ mvù to too fô Baul e bô mvù Tata to duŋci ê wvú

¹Me nu ensaale kɛ ye ŋgene dvú fwe naa no sɛw yaa cim nu fó kɛ. Me nu enɣen fwe yî mwɛɛm diɛwɛ bifilɛ lɛ mvù to too fô me le noo mvù Tata to duŋci ê me le.

²Me ŋkee wee Klistu mvu wvù Nyo' to cunɛɛ ben dvú fey lo ebule gen ê we eke. Eben nu wase bilum yuufe ncow binɛw no fí to kooyɛɛ. (Kɛnɛɛ wvú to ben fó bô ye, kɛnɛɛ sɛ ye, tu kɛ me ŋkee kɛ. Ê kee kɛ Nyo' maɒ.)

³Me ŋgomte keembvuu mbiinen lɛ, me ŋkee wvuwe wee, (kɛnɛɛ wvú to ben fó bô ye, kɛnɛɛ sɛ ye, tu kɛ me ŋkee kɛ. Ê kee kɛ Nyo' maɒ.)

⁴Nyo' to nu ɛ cun wvú ben dvú fô bvudvuu bvu njoŋ e bvú Nyo' le, ɛ wvú yuw mwɛɛm fó ɛ è yaa nu mvù è nulo é wee esee kɛ. ɛ mvumwɛ nu mwɛɛm mvù bó baa enya mvuŋgay lɛ wee wvu wum ejeme kɛ.

⁵È nu wee diɛwɛ wvuwe le wvù me nu ensaalè ye bô wvú. Kɛ è nulo é me ensaale ye bô ekolɛ kem kɛ, efey kɛ lɛ me ensaalè ye ekumɛ kewɛɛye kem.

⁶È è cim nu lɛ me ŋgomte keensaale ye ekumɛ ekolɛ kem, me nsaa nu keyuŋ kɛ, njefo fiɛɛ fi me nu enjɛmyi nu kecɛɛy. Geenɛn me nu ɛ ntun keeŋge fifiɛ, wvu lɛ fo wee mvu ke enɛ ekpwaake jɛɛy ekumɛ me fele fiɛɛ fi wvú yɛne yî yɛm e bô fi wvú yuuke ê me kɛ.

⁷Geenɛn, keege lɛ fo me ŋke enɛ embense ye baay ekumɛ mwɛɛm mvu keŋghaw e mvun mvù Nyo' to duŋcɛɛ ê me, wvú to nu ɛ tum kfuɛ biay mi ɛ yî no bon'yi ye yɛm. Biay yin to nu nceendaa Satan ɛ wvú njiŋsene bô me, wvu lɛ fo me ŋke enɛ embense ye baay kɛ.

⁸ɛ me ŋke mbunle ekumɛ fiɛɛ fidvu ê Tata mbuy bokaŋ botɛte nleke lɛ wvú ecake kɛ fiɛɛ fidvu yî yɛm e.

⁹Geenɛn ɛ wvú tfuse ê me lɛ, “Mvuŋgay mwem mvù me nu ɛ mbuw wo dvú nu ɛ kocɛn fô wo le keefii wo, njefo mvuŋgay mwem ké no lemte yî wee le gene mɛɛɛɛ seke wvú wɛɛyi.” Nonɛn me nu en'yuuke njoŋ mbvuu nsaale ye ekumɛ kewɛɛye kem nfesene lo wvu lɛ mvuŋgay mvu Klistu le nulo elemtè yî yɛm e.

¹⁰Fí ɛ mum ɛ no nu lɛ me n'yuuke njoŋ bô kewɛɛye kem noo boncun bô bó nan'yi me dvú noo bonɣew bô me n'yɛne noo bikaa bì bonyii bone ê me ejim bô bonɣew bô bii me le nje Klistu. Me n'yuuke njoŋ nonɛn njefo è nu seke me ŋ'wɛɛyi, tu sekekɛ nu ɛ me nu emum entɛmyi.

Shiɛ wvù Baul to kɛŋke fô kentaashɛ ke bonyii bo mbee le ke Kolɛn e

¹¹Me nu ɛ nɛ wase ɛ ntu keyuŋ! Geenɛn ɛ è ge ben me ɛ nɛ ntu nonɛn. È nu ben bô be kɛŋke keeduŋci wee wvù è nu me. Naa no me mbaa ncim mbuy fiɛɛ le nu ɛ kɛ fí mum nu le bonyii ba bô teŋɛ bikuu bibole lɛ bokow bo boom bo ntum e bo Jisos e mum kuuke fele me kɛ.

12 Mwεem mvù duñci mvuñgay mvu Nyo' le bô biñghaw bi mwεem e noo mwεem mvu diuw wvù yumεen e nu ε me nto ñkuu shém baay no ñgee ê ben entelen. E mvumvun nu bonciise bô duñci le wee nu cεy cεy waa ntum Klistu.

13 Fiεε fi me nto ñgee fô bintaashε bi bonyii bo mbee le bimew e nshεete ben efey le me nto mbaa ñgeεle bvujite bvumew yî yene le, nu la? Ben elεshε jay wem fofε!

14 Ê nεε me wvun, ε me ε nseyse wase keento ê ben e yî bokañ e botεte. E ke me nu ñke ento enu bvujite bvumew fô ben e ke, ñjefo ke me ñgomte ε è nu mwεem mvunen ke. Me ñgomte ε è nu ben. Me ñgomte ε è nu ben ñjefo ke è nu boom bô keñke keegεele mwεem ê bo'icee bobole bô bobwee bobole ke. Ê ké no gεele bocee boom bô bobwee boom mwεem ê boom bobole.

15 Me nu ñke en'yuuke naa ñjoñ baay keenjewse fiεε ficii fi me ñkeñke fô ben e bô keenya noo ekole kem ñje ben. É me ñkoonke ben baay, é ben kaa ekoonke me caan e?

16 Ben nu ε yen kecεy le ke me nto mbaa engeε bvujite yî yene le ke. Geenεn bonyii ε no duu le me nto nu ε n'wεentεn nleε ben bô mbiay.

17 Nuu le wee mvu bonyii bô me nto ntumεε fô ben e to nu ε leε ben ê diee diem e le?

18 Me nto nu ε nleke Taytus le wvú eto ê ben e, mbvuu ntum waa bwee wesebeene wε le bô wvú eto. Taytus to nu ε leε ben seke wvú to toε le? Bee wvú to baa gee ke mwεem yî ñkpawawcε le mwaañ bô yî ekale le kemwaañ e?

19 Sekemew ε ben kpwaake le no bese mεy ε no jemyi nen nu ε bese gomte keetanji lo diuw wese fwe dvunen. Bese jemyi ε è nu diewe bonyii bo Klistu le fwe dvu Nyo'. Nsáa yese shém, fiεε ficii fi bese gee fô ben e nu keege é ben ekuu lo.

20 E me nfane le è nelo é me ñke enε ento en'yen ε ben yaa nu no me nshieele le ben enù ke, é ben ten eyen ε me n'yaa nu ten no ben shieele le me enù ke. Me nfane le è nelo é me ñke enε ento en'yen ε bonyii waale diwaa, ghεeke keñghew, keñke shém yî ton'yεen, beele ke ε è nu dew yibo, beete bô ediee ε bonyii, kunsene mvuñkunsen, bensee ye yi εcici, keñke kembvuñse.

21 Me nfane le me nu ñke endioo ε mbvuu ε nto, é Nyo' wem ege é ken'wuumen ekoole me, noo le me nu ñke enu yî yii le ñje bonyii bô se gee bibefε diewe nnyen e bô nce nnyen kenjañ noo nsake, ε bó nu ε bó baa cine wase dvú ke.

2Kol 13

Ε Baul gay ê bonyii bô to gee bibefε le bó eyenè

1 Fin nu wase bokañ bem botεte bô me nu ento ê ben e. Nwa' Nyo' gayte le, “É bó lese nsaw wee, tu bó nu eshieele bonyii bofεε kenεε botεte, bô eleem jim nsaw wvudvu.”

² È to nu seke me nto ntoe ê ben e yî nto wem wvu bokaŋ bofɛɛ le, me nto nu ɛ ŋgay ê bonyii bô to cee nce kebefe le, bó eyenè. Me ɛ mbvuu ɛ no ŋgayte ê bó noo ê bonyii bocii naa no me mbaa nu ê ben ɛjise le, ben eyenè, njefo kefew kè me nu ŋke embvuu ento nu ɛ me n'yaa nu ŋke encam naa lo shen fô wee le kɛ.

³No ben gomte le me ŋge fiɛɛ fi duŋci le è jemyi Klistu ê ben fele yî yem e, tu me nu eŋge. Kɛ è nu le wvú wɛɛyi lo keenya ŋgew ê ben kɛ. Wvú keŋke naa mvuŋgay ê ben enteleŋ.

⁴ È nu keceɛy le bó to taa wvú yî kentam e ɛ wvú wɛɛyi. Geenɛn keseen nu ɛ wvú nu dvú ê mvuŋgay mvu Nyo' le. Bese wɛɛyi kɛ ten diewe no wvú to wɛɛyi. Geenɛn yî mvuŋgay mvu Nyo' le nu ɛ bese nu ke ecee bee bó lemte ben e.

⁵Ben etaa bikuu binɛn eyen le laa ben nu yî mbee le le. Ben emom ɛ è nu bikuu binɛn. Kɛ ben yene le Jisos Klistu nu yî yene le? Wvú nu naa yî yene le, é è fɛn baa nu le ben nu ɛ mom bikuu binɛn ɛ yɛn ɛ ben ɛ gbwe.

⁶Me ŋkee naa le ben nu ke eyen le bese baa egbwe kɛ.

⁷Bese bunlee Nyo' le fo ben ke enɛ ege fiɛɛ sɛ è nu fi leŋ kɛ. Kɛ bese yaa gomte le bonyii eyene le bese nu ɛ fey mmom wvudvu kɛ. Geenɛn bese bunlee ɛ è nu le ben egeè ɛ è nu fiɛɛ fi leŋ naa no bese cim yen'yi kɛ diewe bese nu ɛ gbwe wase mmom wvudvu.

⁸Kɛ bese yaa nulo egee naa lo fiɛɛ fi kicine keceɛy kɛ. Bese nulo egee kɛ ɛ è nu fi tomte lo keceɛy.

⁹È dīoo nu seke bese wɛɛyi ɛ ben tɛmyi, ɛ bese no yuuke njoŋ baay. Bunle yese nu kɛ le ben eku egen emɛse.

¹⁰ È nɛɛ fiɛɛ fi me nsaanŋke mwɛɛm mvun ê ben ɛ me mbɛɛ sɛ me ɛ nto, wvu le seke me ɛ nto, me nsaa eŋkeŋke keenjo mvuŋgay mvù Tata nu ɛ nya ê me encewcewe lo dvú yî yene le kɛ. Mvuŋgay mvun nu mvù wvú nya le me en'yoo lo ben dvú, ɛ è yaa nu le me ensâw lo ben dvú kɛ.

Ŋgayma Baul wvu fokemɛse

¹¹ Keemɛɛse boom bo bwɛɛm e, me ŋgayte ben e le beene ɛ shɛɛ wase. Ben eseyse bikuu binɛn, eyuw ntefe wem, enù diuw mwaan, eceè yî nyɛkeey e, nonɛn é Nyo' keŋkoŋɛn bô nyɛkeey emum enù ben ɛ bó.

¹² Ben egaynɛn bikuu binɛn e, eŋocɛ ê ŋocɛ bonyii bo Nyo' le.

¹³ Bonyii bô è nu bo Nyo' le bocii gayte ben e.

¹⁴Mbuwma Tata wesebeene wvù Jisos Klistu, bô keŋkoŋɛn ke Nyo' le, noo kentaashe ke Keyou ke Yuule le enù ben ɛ bó bocii.

Gal

Gal 1

¹ Nwa' wvun saŋ me wvù Baul, waa ntum Jisos Klistu. Ke me nu waa ntum ε è to tum wee wvu wum me kenεε nya mvuŋgay ê me ke. È to tum Jisos Klistu bô Nyo' Ice wvù to bvuseε wvú yî kpwe le.

² Bee boom bo bwee wene le bo mbee le bocii bô nu fεn bee bó gayte ben bintaashe bi bonyii bo mbee le bi woŋ wvù Galεshia le.

³ Nyo' Ice bô Tata wesebeene wvù Jisos Klistu ebuw ben bô kembonen, ebvuu enya ben bô mvuntelem mvù lætene.

⁴ Jisos Klistu nu wvù to nyaε ekole kew nje bibefe bisεεbeene wvu le wen ebvuse beene can woŋ kebefe wvu keseen wvun e. Fife nu no Nyo' wvù Icee wesebeene to seyseε.

⁵ Bvukuke bvucii nu ε è kenke wvú sekecii se ŋka. Fí enù nonen.

Saaka wvù jee wvu εkume Jisos Klistu mey ke mwaan

⁶ Diuw yumte lo me le ke keseen keseen nen ben nu ε ne wase ε no baŋsee jim ê Nyo' wvù to teŋεε ben nje fitele fi jee fi Klistu kenke fô ben e, ε no bii ε è nu saaka wvù jee wvumvu le jεy.

⁷ Ke è nu le saaka wvù jee wvumvu bvuu nu lo dvú jεy ke. Fí nu ke lo le bonyii bomew gomte keebvuŋsee bvufee bvunen, beete bô saaka wvù jee wvu εkume Klistu.

⁸ Me ε no ŋgayte le é è cim to naa bese kenεε nceendaa Nyo' mvu fowe ε no fewci saaka wvumvu jεy ê ben se è nu wvuwe wvù bese to fewcεε ê ben, é mweten tuu lon!

⁹ No bese to gayεε wase nu ε me mbvuu ntuu ke fó ŋgayte le, é wee ne ε no fewci saaka Nyo' wvumvu jεy se è nu wvuwe wvù bese to fewcεε ê ben, é mweten tuu le lon!

¹⁰ Ben kpwaake le me ŋgomte le é ebenseè bonyii me nuu le é ebenseè Nyo' le? Nuu le ben kpwaake le me ŋgomte keeŋgee le bonyii eyuukè njoŋ e? É è be nu le me ŋgomte keeŋgee le bonyii eyuukè njoŋ, me nsaa enu wee lemme wvu Klistu ke.

Saaka wvù jee wvù Baul to fewci to duŋci Klistu ê wvú

¹¹ Boom bo bwεem e, me ŋgomte le ben ekiεε le ke saaka wvù jee wvù wvu Nyo' wvù me nto nfewcεε ê ben nu fiεε ε fí to buy ê wee wvu wum ke.

¹² Ke me nto n'yuw diuw wee mvu le, ε ke è to yεyεi wee me dvú ke. È to duŋci Jisos Klistu ê me.

- 13** Me njemyi nen ε ben to yuw wase no kenje kem to shee nu seke me nto mbee yî nce woŋ wese Bojuu le. Me nto ηké no mbone bikaa ejim jo bintaashe bi bonyii bo mbee le bo Nyo' le baay ηgomte keenfiwse naa lo bí.
- 14** Me nto njici mbee wese Bojuu le ntemyi nfele lo keghan kem entelenj jo bonyii bosese, nlooci nleeme ntemyi naa ntay yî nce woŋ bo'icee bosese le.
- 15** Geenεn ε Nyo' to baa wase me gεε ε me mbee ê bwεem εshem. Ε fitele fiew fi jee ke ge ε wvú tee me.
- 16** Ε wvú ke duŋce Waa we ê me no wvú to shieele, wvu le me enghanè nfewci ekumε wvú ê bonyii bò yaa nu ke Bojuu. No wvú to duŋceε nonen, ε me nfaŋε n'yaa embvuu enu lo keembife fieε ê wee wvu wum ke.
- 17** Ke me nto mbaa emben ten Jelusalem keen'yen bonyii bò to nu wase boom bo ntum e bo Jisos e ê me fwe ke. Me nto ne ηgen fiem ε è nu Alebia, ηke ne jó ηkase ntu jim Damaskus.
- 18** Ε è ke no nu ejim jo bilum bitete ε me mben Jelusalem le bee Bita kieenen bikuu. No me mbenεε, ε bee wvú ce εdiuw yuufe ncow εtin.
- 19** Me nto mbaa embvuu en'yen wee mvu ηgoo boom bo ntum e bo Jisos e efey Jem wvù waa bwee Tata wesebeene wvù Jisos e ke.
- 20** Fieε fi me nsaanke fin nu keceεy, ε Nyo' kee le ke me mbiayte lo ke.
- 21** Ε è ke no nu kefew kemew e, ε me ne ηgen ê biba bì Silia bô Silishia le.
- 22** Sekekie to nu ε bintaashe bi bonyii bo mbee le bi Klistu le bi ê keba kè Judea le yaa kee wase me ejise ke.
- 23** Bó to yuuke ke lo ε bonyii jemyi le, “Wee wε wvù se bone bikaa ê beene ejim ghane wase keseen fewci le bonyii elese fitele yî Klistu le, ε è nu fieε fi wvú se shee gomte le wen efiwse lo.”
- 24** Ε bó yuw nonen no tumte moŋkum mo Nyo' le yî fieε fi wvú geε fô me le.

Gal 2

Ε boom bo ntum e bo Jisos e tom saaka Nyo' wvù Baul to fewci

- 1** Ε è ke no nu ejim jo bilum yuufe ncow binεw, ε me mbvuu mben Jelusalem bee Banaban. Me nto ndioo mbene, njo Taytus.
- 2** Me nto mben kefew kin e ε è duŋci Nyo' le me emben. No me mbenεε, n'yen bonyii bò bó to kee bó le è nu bikuu le, ε bee bó lewse ye, ε me njike saaka wvù jee wvù wvu Nyo' wvù me nto nfewci ê bonyii bò yaa nu ke Bojuu ê bó ejise. Ε me nto ηge nonen wvu le fo lemme dì me nu ε nlem wase bô dì me mbee nlemte ke ela εcici ke.

³Ɛ bó yuw nonen, faɲe yaa eleeme le bó etfuse Taytus yew wvù bee wvú to nu ɛ è nu naa wee Glek ke.

⁴É è to baa nu nje bonyii bomew bò to mbiayte le bó nu bonyii bo mbee le, bò to wɛɛntɛnɛɛ ley fô bese to nu, tu ke bó to bee ejemyi leyte ê fifie fiɛɛ le ke. Bó to to diɛwɛ boɲkee le keeyen no bese gee wase mwɛɛm wasewase nje bese nu ɛ taashe bee bo Klistu Jisos. Ɛ bó mum no gomte keekase tfuse bese bvunfaw e.

⁵Ɛ bese faɲe yaa bee naa lo fiɛɛ fi bó to too dvú caan ke. Ɛ bese to ge nonen wvu le bese gomte keegɛɛ kecɛɛy kè è nu ke saaka wvù jee wvù wvu Nyo' le wvun fô ben e.

⁶Ɛ bonyii ba bò bó to kee bó le è nu bikuu, (kɛnɛɛ bó to nu la, kɛnɛɛ la, tu ke fifie kɛɲke fiɛɛ fô me le ke, njefo ke Nyo' duɲci kejɛɛy jɛɛy ke.) Boba bonyii bò me ɲgayte, bò bó to kee le è nu bikuu to baa ebise fiɛɛ yî fi me nto nfewci le ke.

⁷Geenen, ɛ bó kaa yen le bó nu ɛ nya saaka wvù jee wvù wvu Nyo' can yɛm e le me enfewcì ê bonyii bò yaa nu ke Bojuu, leɲleɲ no bó nu ɛ nya ê Bita le wvú efewcì ê Bojuu.

⁸(Nyo' wvù to nyaɛ mvuɲgay ê Bita le wvú elemtè lemme din fô Bojuu le, nu ke wvú wvù to nyaɛ ê me le me enlemtè fô bonyii bò yaa nu ke Bojuu le.)

⁹Ɛ bó dioo yen je yì Nyo' nu ɛ buw me jó, ɛ Jɛm bô Bita noo Jon bò bó to kee le è nu dikfuy di bonyii bo mbee le mum nya ɛbo ê bee Banaban keeduɲɛ le bee bó lemte yî fiɛɛ le fimwaaɲ, le bese egen le elemtè fô bonyii bò yaa nu ke Bojuu le, é bó elemtè fô Bojuu le.

¹⁰Fiɛɛ fi bó to gayɛɛ to nu ke le bese ekumyì Bojuu bo kefufe le. Ɛ fifin nu fiɛɛ ɛ me nto ɲkooɲke naa baay keeɲgee.

Ɛ Baul saw Bita Antiok

¹¹Geenen ɛ è ke no nu kefew kemew e, ɛ Bita ke nɛ to Antiok, ɛ me nsaw wvú ê bonyii ejise njefo wvú to nu ɛ jay baay.

¹²Fí nu le wvú to yaw to no diekene bô bonyii bò yaa nu ke Bojuu, yaa nyaake ke. Ɛ bonyii bomew bò Jɛm to tumɛɛ ke dioo to, ɛ wvú mum kɛw no guute ye jim, ke nɛ gawsɛn, faɲe yaa bvuu diekene bô bó ke. Ɛ wvú to gawsene nonen njefo wvú to fane ɲgoo yì to ké no leeme ke le bó kɛɲke keetfuse wee wvù yaa nu ke wee Juu yew é mwɛtɛn sɛ no nu wee Klistu.

¹³No wvú ge nonen ɛ bonyii bo mbee le bomew bò to nu Bojuu mum beɲɛn gee diew didvu le. Ɛ naa Banaban kebɛɛ mum bi tɛn gee dibole didvu le.

¹⁴Ɛ me ndioo n'yɛn le ke gee dibole bii cɛɛy cɛɛy no saaka wvù jee wvu ɛkume Klistu duɲci ke, ɛ me mum ɲgay ê Bita ê bó bocii ejise le, “Wo nu wee Juu, cee wase diɛwɛ wee wvù yaa nu ke wee Juu le, ɛ no gomte keekane bonyii bò yaa nu ke Bojuu le bó eceè diɛwɛ Bojuu le nɛɛ le?”

- 15** Me nto njemyi ê Bita nonen ε è nu kecεεy le bee bó nu boom bo Bojuu le bo won e. Ke bese nu bonyii bò yaa nu ke Bojuu bò bó yene le è nu bonyii bò befe ke.
- 16** Geenεn ε bese kee ke le ke Nyo' joo wee le wvú nu teytey njefo wvú gεεle bonci bo Bojuu le ke. Wvú joo njefo wvú nu ε lese fitele yî Jisos Klistu le. E bese kebεε ε lese tεn fitele yî Klistu Jisos e wvu le bese enù teytey ê Nyo' ejise nje fitele fi bese lese yî ye le, ε è yaa nu nje bese gεεle bonci ke, njefo ke wee gεεle bonci é Nyo' ke eyuu ejo wvú le wvú nu teytey ke.
- 17** É bese momte keenu teytey ê Nyo' ejise nje bese nu bonyii bo Klistu le, bonyii ε bvuu ε no yene ke le bese nu bonyii bò befe njefo ke bese gεεle bonci bo Bojuu le, tu fí fεn nu le Klistu tomte kebεε? Ke fí nu naa lo nonen ke!
- 18** É me nε ε mbvuu ε no n'yoote fiεε ε me nto nsâw wase, tu fifiε duñci le me njayte lo.
- 19** Fiεε fi nu, nu le ê keba ke bonci le nu ε me nu wase ηkfusay, ε è yu bonci me, me ε ηkpwe wvu le me enceè wase no Nyo' gomte.
- 20** È nulo é me enjay le bó to nu ε ta wase me yî kentam e ε me ηkpwe bee Klistu. Ke nshii wvù me ηkeηke keseen bvuu nu wεm ke. È cee wase Klistu yî yεm e. E nshii wvù me ηkeηke keseen yî yεm e nu wvù fitele fi me nlese yî Waa Nyo' le wvù to nu ε duñce keηkoηen fô me le nya εkole kew keekpwe nje yεm.
- 21** Ke è nulo é me ntune mbuwma Nyo' ke. É è nu le è nelo é wee enu teytey ê Nyo' ejise njefo wvú gεεle bonci, ke tu kpwe Klistu to nu εcici.

Gal 3

Bonci noo keelese fitele yî Klistu le

- 1** O oo bonyii bo Galeshia, ben nu la biyuη nen? Wee nu ε low ben e? È nu ke ben bò bó nu ε nele wase baayη no bó to taε Jisos Klistu yî kentam e ben ε yen lo endan e?
- 2** Me ηgomte keembife fiεε fimwaan ê ben. Keyoy ke Nyo' le to to yî yene le njefo ben to gee no bonci gayte nuu njefo ben to nu ε bee fiεε fi ben to yuwεε, lese fitele yî dvú le le?
- 3** Ben yuñsene la nen? Ben kew fiεε bô Keyoy ke Nyo' le, ε no nu wase keseen le ben nu ke emεse ε è nu bô mvuñgay mvunen e?
- 4** Ben to yen ηgew ε è nu wvu εcici le? Kecεεy, ke è to nu wvu εcici ke.
- 5** Nyo' wvù nyaa Keyoy kew ê ben bvuu gee biñghaw bi mwεεm e ê ben εntelen, gee nonen njefo ben gεεle bonci nuu njefo ben nu ε yuw saaka wvu εkume Klistu ε lese fitele yî ye le le?
- 6** È nu no bó saη εkume Abl'am ê Nwa' Nyo' le le, “Wvú to nu ε lese fitele yî Nyo' le, ε Nyo' mum jo wvú le wvú nu wee wvu teytey.”

- ⁷ Ben eyen le le è nu bonyii bò nu ε lese fitele yî Nyo' le bò looci nu kfuu di Ablam e.
- ⁸ Nwa' Nyo' to nu ε yuu wase duŋce le Nyo' nu ke ejo bonyii bò yaa nu ke Bojuu le bó enù teytey ê wvú ejise nje fitele fi bó nu ε lese yî ye le. E wvú mum fewce saaka wvú jee wvun ê Ablam ε è bæe lo gayte le, “Me nu ŋke embuw bitum bicii bi yî ekole ke nshε le nje yo.”
- ⁹ Nonen, fí ε no nu le bonyii bò nu ε lese fitele yî Nyo' le nu ε Nyo' ε buw ten bó no wvú to buwεε Ablam wvú to nu ε lese fitele yî ye le.
- ¹⁰ Bonyii bocii bò yene le bó nulo enu teytey ê Nyo' ejise njefo bó gæle bonci nu ε bó tuule lon yî bikuu bibole, njefo bó nu ε saŋ le, “Wee tfuu wvù baa ecee no bó saŋ ê Nwa' bonci le gee no bonci bocii gomte, nu ε wvú tuule lon yî ekole kew e.”
- ¹¹ Fí ε mum ε no duŋci naa endan le ke è nulo é Nyo' ejo wee le wvú nu teytey nje mweten gæle bonci ke. Ê nu fieε fi bó nu ε saŋ le, “Ê nu ke wee wvù Nyo' nu ε jo le wvú nu teytey nje fitele fi wvú lese yî ye le wvù nu ke ekeŋke nshii.”
- ¹² Ke bonci keŋke fieε keege bô nlese fitele yî Nyo' le ke, njefo “Wee wvù gæle bonci nu ke ecee bii ke ε è nu bó le.”
- ¹³ Klistu to nu ε sum beene can lon wvù bonci too dvú le. Wvú to nu ε tuu bolon boseεbeene yî ekole kew e, ε è nu no bó saŋ le, “Lon nu yî wee wvù bó nu ε njeyse yî kete le.”
- ¹⁴ Wvú to ge nonen, wvu le mbuwma wvù Nyo' to nyaε ê Ablam eto ten fô bonyii bò yaa nu ke Bojuu le nje Klistu Jisos, é beene bò nu ε lese fitele yî ye le ekeŋke ten Keyoy ke Nyo' le kè wvú to kawεε.

Ke bonci nulo ekose ŋkawma Nyo' ke

- ¹⁵ Boom bo bwεem e, beene ejo kenfewsεn yî mwεem mvù bonyii ké no gee le. É bonyii seyse wase fieε ε die kelew, tu ke è nulo é wee ebvuu ekose keεε ebise fieε yî dvú le ke.
- ¹⁶ Ekume ŋkawma wvu Nyo', nu ε wvú to kaw ê Ablam bô wan wvù nu ke ebuy ê kfuu diew e. Bó baa saŋ le, “Wvú nu fô boom bò nu ke ebuy ê kfuu diew e ke”, fi duŋci le bó nu nteen ke. Fí duŋci le fó jemyi ekume wan mwaan. E wan wvun nu Klistu.
- ¹⁷ Fieε fi me ŋgomte keεgay nu le, Nyo' to nu ε ge ŋkawma wvun, ε bilum ke fey gee ne bô kecow mbaanshe (430) ε wvú se nya bonci. No fí nu nonen, ke è nulo é bonci bò to toε wase ejim ebvuu eto ekose moŋkan mò Nyo' to gbwolεε fwele, ege é fieε fi wvú to kawεε ela εcici ke.
- ¹⁸ É fí fen nu le wee nulo ekeŋke nnya yin ε è nu ke seke wvú gæle bonci, ke tu ke ε bvuu bæe le Nyo' to kaw lo bonyii dvú ke. Geenεn, Nyo' to nya nnya yin ê Ablam bii no wvú to kawεε wvú dvú.

¹⁹ Shiee bonci è no nu la? Bó to bise bonci keeduñci mwεem mvù bonyii jayte ε kew nonen gen buy naa seke wan wvun wvù Nyo' to gee ñkawma wvun ekume wvù nu ke eto. E Nyo' mum nya bonci ban ê bonceendaa bew mum nya can wee mvu le le wvù efese ê bonyii.

²⁰ Ke ben kee le é bonyii ne ε no seysee fiεε ε wee mvu nu ê bó entelen, tu wvù nu fô bó le bocii. Geenεn, Nyo' nu ke mwaan.

²¹ No fí nu nonen, tu è nulo é nci Nyo' ebvuu ekose fiεε fí wvù to kawεε le? Ke è nu naa lo é fí enu nonen ke! É nci mvu to nu dvù wvù nulo enya nshii, tu è nulo é wee enu teytoy ê Nyo' ejise nje wvù geele bonci cεey cεey.

²² Geenεn, Nwa' Nyo' gayte le wee tfuu nu nfwa ekuse jo bibefe. Fí ε mum ε no nu le ñkawma wvù Nyo' to kawεε fô wee wvù nu ε lese fitele yî Jisos Klistu le, nu ε è nu ke ekeñke ke wvuwe wee wvù nu ε lese fitele yî ye le.

Bonci to nu diewe nde wan e

²³ È to nu fwele ε Jisos baa to wase wvu le bonyii eleese fitele yî ye le, ε bonyii nu ê bonci kuse ε bó ε kay bó diewe bonyii bo ncaw e ε no ceyte, gen buy seke Nyo' ke eduñce Jisos é bó eleese fitele yî ye le.

²⁴ Bonci to nu diewe nde wan wvù to shee bô bonyii naci gen buy seke Klistu to toε wvu le bonyii eleese fitele ε è nu yî ye le é Nyo' se jo bó le bó nu teytoy ê wvù ejise.

²⁵ No Klistu nu ε to wase bonyii ε no leese fitele yî ye le, tu ke beene bæε can nde wan wvun e ke.

²⁶ Ben bò nu ε taashe ben ε bo Klistu Jisos nu wase boom bo Nyo' le nje fitele fi ben nu ε lese yî Klistu le.

²⁷ Ben ekeè le wee tfuu wvù bó nu ε lese wase ê joo ε taashe wvù bô Klistu nu ε wvù ε tu wase bô Klistu fiεε fimwaan.

²⁸ Ke wee mvu bvuu nu jεey le wen nu wee Juu kenεε wee ketum ke. Ke wee mvu bvuu nu jεey le wen nu nfwa kenεε waa yew ke, ε ke wee mvu bvuu nu jεey le wen nu diemsen kenεε kpwoon ke. Ben bocii nu wase fiεε fimwaan yî Klistu Jisos e.

²⁹ No ben nu wase bonyii bo Klistu le nonen, tu ben nu wase boom bo Aba'am e, ε ben nu ke ekeñke mwεem mvù Nyo' to kawεε Aba'am dvù.

Gal 4

¹ Fiεε fi me ñgayte nu le, é wee nu keeke edie bvushew bvú ice le, geenεn bæε wan caan, tu ke jεey jεey nu dvù bô nfwa ice naa no è cim keñke wvù bvushew bvudvu ke.

²Wvú nu eyaw ke enu ê bonyii bomew taale fô wvú le ε bvushew bvudvu nu can bonyii bomew e ε bó taale fô, egen ebuy kefew kè ice seyse le.

³È nu ke no fí nu fô beene le. È to nu seke beene to nu diewe boom bo caan e, ε beene no nu bonfaw bo mwεem mvù saake yí woŋ wvun e.

⁴ε kefew ke dīoo loocε kocεn, ε Nyo' tum waa we ε wvú to, ε kpwoon boo wvú, ε wvú no nu ten ê bonci kuse.

⁵Wvú to to wvu le wen esum bonyii bò nu ê bonci kuse é Nyo' emum ejo beene diewe boom bew e.

⁶No Nyo' jo wase beene diewe boom bew e nonεn, ε mum ε ciinse Keyoy ke Waa we le kí ε to yí yese beene le, ε ge beene ε no teŋe wvú le. “Abba, Icee wese!”

⁷Fí nu le Nyo' nu ε ge wase ben ε faŋe yaa bvuu nu bonfaw ke. Ben nu wase boom bo yew e. No ben nu wase boom, tu fí nu le ben nu ke ekeŋke mwεem mvù wvú geke fô boom bew e.

Baul fane le bonyii bo Galcshia nu ejay je

⁸È to nu fwele seke ben to baa kee wase Nyo' ke, ε ben no lemte bvunfaw can mwεem mvù ben to joo le è nu bonyo' se è nu bonyo' ŋkuuŋ.

⁹Geenen, keseen no ben nu ε kieε wase Nyo', kenεε le keseen no Nyo' nu ε kieε wase ben no me mbee keeŋgay, ben ε ghan nεε ε se no gomte keetuu jim fô bonyo' bo εcici ban e bò nu se bó keŋke mvuŋgay ŋkuuŋ. Ben gomte keebvuu etuu bonfaw bo bonyo' bodvu ban e nje la?

¹⁰Ben gεele mbam εdiuw yomew le è nu yo baay baay, bamte kee yimi, bamte bifew bimew yí kelum e, bamte bilum nje la?

¹¹Ben gee nen ε me nfane baay le lemme diem di me nlem ê ben enteleŋ nu ε la εcici.

¹²Boom bo bwεem e, me ŋkule lo can ê ben le ben ekumen enù ke diewe no me nu ekumε bonci, ke no me nto ŋkumεnεε no nu diewe ben e seke ben to nu se bonci. Ben to ke baa ege wase fieε fi befe fô me le ke.

¹³Ben kee le seke fwele wvù me nto nfewci saaka wvù jee wvù wvu Nyo' ê ben nu njefo me nto nu beene ncεmte.

¹⁴ε naa no me nto nu yí kencεm e nen, ε kí nu diewe mmom e ε yí ε to fô ben e, ben to baa elewte, kenεε nyensee me ke. ε ben kaa fiisen lo me naa ke diewe nceendaa Nyo' mvu kenεε diewe Klistu Jisos e kebεε.

¹⁵Ben to yuuke njoŋ bô me sekekie, è kooyi la keseen? È nulo é me eŋgay le é bó to gay lo le ben ebaaye ejise eyene enya ê me, é ben ebaaye lo é je fen nu dvú.

¹⁶Me nu ε ntu wase wee bvuban fô ben e no me nseŋe keceεy ê ben e?

17 Bonyii ba gomte keeduŋci le bó keŋke shiee fô ben e baay, geenen e bó gomte ben yî fiie le e è yaa nu fi jee ke. Bó koonke le beene egawsen é ben ekeŋke wase shiee e è nu fô bó le.

18 Fí jee le wee ekeŋkè shiee fô wee le yî fiie fi jee le. Fifin nu lenj sekecii e è yaa nu ke seke me nu beene maan ke.

19 Boom bem bò nu shém yem, è nu ke diewe me mbee embvuu eŋkew lo lume dinen, en'yen ŋgew eŋgen embuy no nce Klistu nu ke enu yî yene le!

20 Wee ejo e me mbe nu beene keseen, é me nse ŋkiee je yì me enjeme jó ê ben. Fiie fi ben ge fin nu e bvufee e la lo me.

Jɛɛy jɛɛy boom bo Abl'am e

21 Ben bò gomte keenu ê bonci kuse, ben ke see ê me, ben yuuke ke fiie fi bonci jemyi?

22 Bó nu e saŋ le Abl'am to keŋke boom bolemse bofee, e wvú to boke mvu bô nfwa, boo wvumvu bô kpwee wvù leyee.

23 Nfwa wvun to boke wan ke no bó ké no boote boom bocii. Geen en e kpwoon wvù leyee boo we bii ŋkawma wvù Nyo' to gee le.

24 È nulo é beene ejo fiie fin diewe kenfews en ke fiie le. Bokene bo bofee ban duŋci moŋkan monfem. 'Aga wvù to nu nfwa joo bvudvuu bvu moŋkan mò Nyo' to gbwol ee bô bonyii bo Israel yî kum wvù Sinay e. Bonyii bocii bò nu ekuse jo moŋkan modvu nu bonfaw.

25 No 'Aga joo bvudvuu bvu moŋkan mo yî kum wvù Sinay wvù nu woŋ wvù Alebia le, wvú bvuu joo ten bvudvuu bvu kelaante kè Jelusalem wvu keseen e, njefo bonyii bo ê kelaante kedvu le bocii nu bvunfaw e ê bonci kuse.

26 Geen en e bonyii bo Jelusalem wvù nu wvu fowe le yaa nu bonfaw ke. Wvuwe Jelusalem nu bwee wesebeene.

27 È nu fiie fi bó to saŋ ee le, “Wo wvù kpwoon wvù nu kase yaa boote ke, è lanlanè. Wo wvù ke baa lum wase wan, è kpwaakè dikie. È keè le boom bo kpwoon wvù bó nu e base jim ê wvú le nu ke eduule fele bo kpwoon wvù nu bô dweese le.”

28 Nonen boom bo bwem e, ben nu boom bo Nyo' le bii no Nyo' to kawee lenlen no Abl'am to bok ee Aysik bii no Nyo' to kawee.

29 È to nu kefew kedvu le e wan wvù bó to bok ee no bó boote boom bocii no bone bikaa ejim jo wvù è to nyae Keyoy ke Nyo' le mvuŋgay e bó se boo wvú. È nu ke ten lenlen fiie fi kooyi keseen.

30 Bó saŋ ê Nwa' Nyo' le ekume fiie fin le la? Bó nu e saŋ le, “Kuŋe kpwoon wvù nu nfwa bô waa we bocii, njefo ke waa nfwa nulo ke egaw bvushew bô waa kpwoon wvù leyee e ke.”

31 No fí nu nonen boom bo bwεem e, fiεε fi me njemyi ficii duŋci le ke beene nu boom bo kpwoon wvù nu nfwa le ke. Beene nu ε è nu boom bo kpwoon wvù leyεen e.

Gal 5

Klistu nu ε bvuse wase beene yí bvunfaw e

1 Klistu to nu ε bvuse wase beene yí bvunfaw e. Wvú to bvuse nen, wvu le fo beene ebvuu enù yí bvunfaw e ekuse jo bonci ke. Nonen ben emum eleemè tamyi. Fo ben ebvuu ebee eley ekuse jo kemmbuŋ ke bvunfaw e ke.

2 Ben eyeke eyuw fiεε fi me wvù Baul nu enjeme. É ben beŋe lo le bó etfuse ben yew é ben se no nu teytey ê Nyo' ejise, tu fiεε fi Klistu to gee fô ben e nu εcici.

3 Me mbvuu njemyi nciise le wee wemen wvù nu ε bee le bó etfuse wvú yew ekeè le wvú keŋke keegεlè bonci bo Bojuu le bocii no bó nu.

4 Ben bocii bò gomte keenu teytey ê Nyo' ejise ε è nu nje ben gεεle bonci, ekeè le ben nu ε gawsen wase bikuu binen ben ε bo Klistu. Ben nu ε laŋ wase mbuwma Nyo'.

5 Fô beene le nu ε fiεε fi beene taale fwe yí dvú le nu le Nyo' nu ke ejo beene diewe bonyii bò nu teytey ê wvú ejise le. Fifi nu fiεε fi Keyoy ke Nyo' le kè lemte yí yese beene le fele yí fitele fi beene lese yí Klistu le nu ε ge le beene eceyte.

6 Ben ekeè le é wee nu ε wvú ε taashe wase bô Klistu Jisos, ε wvú nu ε bó ε tfuse wvú yew kenεε bó baa tfuse wvú yew ke, tu ke fifie keŋke fiεε keege ke. Fiεε fi nu shiee le nu fitele fi wvú lese yí Klistu le ε no duŋci yí keŋkoŋen e.

7 È to nu fwele ε ben gee naa leŋ. È ge yεε ben ε se lu keebii keceey e?

8 Ke è ge Nyo' wvù to teŋεε ben fifi fiεε ke.

9 Ke ben kumyi ŋgan wvù bó ké no maa le, “Kekuu kemwaan ε befe bô ntwaw?”

10 Me ŋgεεle bvufee yí yene le nje Tata le ke ben nu ebi fiεε fi bonyii bomew gayte le efey fi è gayte me ke. E wee we wvù bvunsee bvufee bvunen, kenεε è nu yεε, nu ε Nyo' nu ke elan ŋgew yí ye le.

11 Boom bo bwεem e, é è be nu le me mbεε nfewci le bó etfuuse bonyii yew ε bó se nu teytey ê Nyo' ejise, é bonyii ebvuu ebone bikaa ê me ejim nje la? Ke tu fiεε fi me nfewci le Klistu to nu ε kpwe yí kentam e fin ε bonyii yuuke ε fí kaa saase lo bó yaa be beε dvú ke.

12 Fo bonyii ba bò jewsee ben le bó etfuuse bonyii yew e, nu ε me ŋgomte le bó emεse eson lo bikuu bibole.

13 Boom bo bwεem e, Nyo' to nu ε tee wase ben wvu le fo ben ebvuu elemtè bvunfaw ê bonci kuse ke. Geenεn, no ben yaa beε bvunfaw e ê bonci kuse nonen,

fo ben emum ejo le ben nulo egee no nyam ye yene gomte ke. Ben elemtè ε è nu fô boom bo bwee wene le yî kenkojen e.

14 Ben egeè nonen njefo bonci bocii nu ε taashe yî wvun wvu mwaan e le, “È koonkè waa bwoo no wo koonke ekole kuw.”

15 Geenɛn, é ben ne ε no nasene ebenɛben diewe bwé le, ε wee gomte keedie lo waa bwee, ε ben no yenè fô ben ke ene eyuwye bikuu binɛn.

Ke wee wvù cee no Keyoy ke Nyo' le duŋci ké bvuu no gee no nyam ye gomte ke

16 Fiεε fi me njemyi nu le, ben eceè biì ε è nu no Keyoy ke Nyo' le duŋci ê ben, nonen ben saa ebvuu egeè ε è nu no nyam ye yene shieele le ben egeè ke.

17 Me njemyi nen njefo ke fiεε fi nyam ye shieele nu fi Keyoy ke Nyo' le shieele ke. E ke fi Keyoy ke Nyo' le shieele nu fi nyam ye shieele ke. Ke mwεem mvu mvunfεem mvun nu yî fiεε le fimwaan ke. È nu fiεε fi ke è nulo é ben egeè fiεε fi ben gomte ke.

18 É ben cee bii ε è nu no Keyoy ke Nyo' le duŋci ê ben, ben saa ebvuu enù ekuse jo bonci ke.

19 Mwεem mvù nyam ye ké no shieele nu ε bonyii yaa maa mvú ke. È nu keejaanke kenjaŋ bô keekpwawci mwεem ekume kenjaŋ noo keecee nce nnyen kenjaŋ.

20 E è bvuu nu keebunlee bonyo' bo εcici bô keelaale kenεε fiεεŋke diam. E è bvuu nu keebanene, nyamte kenyam, gheεke kenghew, kenke shém yì ton'yεen bô fô wee le keekpwawci ke ε è nu ekole kew. E è bvuu nu keegawsene bonyii noo fô wee le keegaw bonyii ekenke ye ηgoo.

21 E è nu ten keebene kendoŋ, wuu mbvuum ε mó koole bô keewukene yole noo keegeε mvumew mwεem diewe mvumvun e. Me ε no njemyi nciise lo no me nto njemyεε wase fwele ê ben le, ke bonyii bô gee mvumvun mwεem yaa nu ke ekenke bvudvuu ente jo bvunfon bvù Nyo' le ke.

22 Geenɛn, ε mwεem mvù nen'yi fô Keyoy ke Nyo' le nu mvun, kenkojen, nlanjaŋ, nyεkeey, shém yì kuulɛn, fitele fi jee, kenje kè jee, keeleeme yî keεεy e,

23 keebonene kenje, noo keekemsene bô ekole. Ke nci mvu nu dvú wvù kicine mwεem mvun ke.

24 Bonyii bô è nu bo Klistu Jisos e nu ε ta wase nyam ye yibo bô mwεem mvù befe mvù nyam ye yì ηeyte shieele yî kentam ke Jisos e.

25 No beene cee keseen yî mvuŋgay mvu Keyoy ke Nyo' le, beene emum egeè mwεem bii ke no Keyoy kedvu duŋci.

26 Fo beene ebenseè ye yi εcici ke. Fo beene egeè ε mvuntelem beete bonyii bomew ke. Fo beene ebenè kendoŋ bô bonyii bomew ke.

Gal 6

Bonyii bo Nyo' le efici bikuu bibole

- ¹ Boom bo bwεem e, ε ben nε ε yen ε wee mvù ben e ε ge fiε fi befe, ε ben bò cee nce no Keyoy ke Nyo' le duŋci mom keetefe wvú ε wvú ebuy ê kebefε kedvu ente. Geenen, wee dioo teete no teete wε eyenè fo wvú ten eley mmom e egbwe.
- ² Ben efici boom bo bwee wene le bô bonḡew bobole. É ben gee nonen tu ben gεele nci Klistu.
- ³ É wee joo ekole kew le wen nu fiε, sε wvú nu fimweten ηkuuη, tu wvú læele ke ε è nu ekole kew.
- ⁴ Wee tfuu etaa mwεem mvù wvú gee, eyen laa wen gee læη ε. É wvú fen gee læη, é wvú sε no saale ye fô ekole kew e. Geenen fo wvú esaalè ye fewsene ekole kew bô wee mvu ke.
- ⁵ Ben ekeè le wee tfuu keηke keetuule bwew bvujite.
- ⁶ É wee yεyi wee bô diεw Nyo', é wee wvù bó yεyi wvú gaw mwεem mwew mvù Nyo' nya wvú dvú nya wee wvù yεyi wvú wvudvu dvú.
- ⁷ Fo ben elaelè bikuu binen joo le Nyo' nu keyuη ke. Ben ekeè le fiε fi wee jewyi nu ke fí fi wvú nu ke egbwele.
- ⁸ É wee jewe ye ηgow ε è nu fiε fi nyam ye ye gomte, tu wvú nu ke egbwele ke ε è nu fiε fi nyam ye ye nyaa fi è nu kpwe. É wee jewe ye ηgow ε è nu fiε fi Keyoy ke Nyo' le gomte, tu wvú nu ke egbwele nshii wvù mey lo wvù Keyoy ke Nyo' le nyaa.
- ⁹ Fo beene ke ewεle keεgee mwεem mvù jee ke, njefo kefew nu ke eto ekocen é beene ekeηke sεw wvudvu fen é beene baa edose ke.
- ¹⁰ Nonen yî kefew e kecii kè beene keηke je, ε beene no geè ke mwεem mvù jee fô bonyii bocii le efey mvunciim fô boba bò nu ê kfuu di bonyii bo mbee le.

Ŋgayma Baul fô Bonyii bo Galεshia le

- ¹¹ Ben nu ε yen no εjise ηwa' yo fen nu ε faηken e? É saη me bô kebo kem.
- ¹² Bonyii ba bò kane le bó etfuuse ben yew nu bô gomte keesaale ye yî mwεem mvu yî nyam ye le, ε bó gee nonen wvu le fo bonyii ke ebone bikaa ê bó εjim nje bó fewci le Klistu to nu ε kpwe yî kentam e.
- ¹³ Naa ke bonyii bò bó nu ε tfuse wase bó yew yaa cim gεele bonci bocii ke. Geenen ε bó gomte ke le bó dioo ε tfuse ben yew emum ekfune gvuw le ben nu ε ge fiε fi bó shieele yî yene le.
- ¹⁴ Geenen fô me le, ke è nu naa lo é me ηke en'yuu eηkfune gvuw yî fiε fimew e efey yî saaka wvù le Tata wesebeene wvù Jisos Klistu to nu ε kpwe yî kentam e

ke. È nu fiεε fi mwεεm mvu yî nshε le nu ε kpwe wase fô me le, me ε ηkpwe ten fô mvú le.

15 É wee nu ε bó ε tfuse wvú yew kenεε bó baa etfuse, tu ke fifiε kenke fiεε keεge ke. Fiεε fi kuuke nu le Nyo' eseysel wee é wvú enù wee wvu fwε.

16 Kembonen ke Nyo' le bô shen ye eto fô bonyii bocii bò bii je yin e, bò nu wase bonyii bo Islael bo Nyo' le.

17 Ε kew keseen e ε gen lo, fo wee ebvuu eshiike me ke, njefo bolule bò nu yî yem e dujci le me nu wee Jisos.

18 Boom bo bwεεm e, me mbunlee le Tata wesebeene wvù Jisos Klistu ebuw ben bocii bô kembonen kew é kí efici biyoy binen. Fí enù nonen.

Ἐφε

Ἐφε 1

¹ Ἐ nu me wvù Baul, waa ntum Klistu Jisos yî ηκοη wvù wvu Nyo' le. Me nsaanke ηwa' wvun fô bonyii bò è nu bo Nyo' le bo Ἐφεsus bò leeme yî fiεε le fimwaaη yî Klistu Jisos e.

² Nyo' Icee wesebeene bô Tata Jisos Klistu ebuw ben, ebvuu enya ben bô nyεkeey.

Mbuwma wvù fici biyoy bi bonyii bò nu ε taashε yî Klistu le

³ Mbense enù fô Nyo' wvù è nu Nyo' wvu Tata wesebeene wvù Jisos Klistu, bvuu nu Ice le. Wvú nu ε buw beene bô mbuwma tfuu wvu woη wvu we le wvù fici biyoy bisεεbeene njefo beene nu ε taashε yî Klistu le.

⁴ Ἐ Nyo' σε keenu keebom woη nu ε wvú to caw wase beene le beene etaashε beene bo Klistu, eyuule, nu σε nlom ê wvú εjise. Yî keηkoηen kew e,

⁵ nu ε wvú to seyse wase keeke ejo beene le è nu boom bew fele yî Jisos Klistu le. Wvú to ge nonen, bii fiεε fi wvú to gomte le fí enù le.

⁶ Ε è to nu wvu le mbense egenè ê wvú yî mbuwma we wvu baay wvù wvú nu ε nya ê beene εcici fele yî Waa we wvù nu fitele fiew e.

⁷ Wvú to sum beene can ηgew e ε è nu bô ελεμε ke Waa we wvun e. Fì nu le, wvú nu ε læshε bibefe bisεεbeene, bii mbuwma we wvù kuuke naa baay e,

⁸ wvù wvú tfuwεε lo yî yese beene le. Wvú to ge nonen bô bvufee bvucii noo ηkpawce we tfuu.

⁹ Nyo' nu ε ge wase beene ε kiεε fiεε fi wvú gomte fi to shee nu ê kenyile le. Wvú ge bii fiεε fi jee wvú le no wvú to seyσεε keeke ege fele yî Klistu le.

¹⁰ Wvú to seyσε le kefew nu ke edioo ε to wase ε kocen é wen ebaance mwεεm mvunciim kenεε è nu mvu fowe, kenεε mvu fokuse, egeε ê Jisos εkuse.

¹¹ Ἐ nu ten nje Klistu wvù Nyo' to cawεε bese keenu bonyii bew. Wvú to caw no wvú to seyσεε wase ε è bεε lo bii ηkpawce wvuwe le ke leηleη no wvú ké no gee mwεεm mwew mvunciim bii ntaη wvuwe bô ηκοη wvuwe le.

¹² Fí to nu nonen, wvu le bese bò to nu bonyii bo fwe keεgeε bvufee yî Klistu le ke eceè nce wvù egeè ε bvukuke bvυ Nyo' le yen'yi, ε mbense gene ê wvú.

¹³ Ben ten to nu ε taashε yî Klistu le seke ben to yuwεε diew yi keceey yì è nu saaka wvù jee wvù to toε bô mboyma fô ben e. No ben yuwεε nonen, mum lese fitele yî Klistu le, ε Nyo' ge nciise we yî yene le wvù è nu Keyoy ke Yuule kè wvú to kawεε bonyii dvú.

14 Keyoy ke Yuule kin nu ketfuŋ ke bvushew bvù beene nu ke ekeŋke le. E beene nu ke ekeŋke seke Nyo' ε mese ε sum bonyii bò è keŋke wvù yî ηgew kebefe le. Nonen, é bvukuke bwew eyen'yi ε mbense gene ê wvù.

Ε Baul nya keyoone ê Nyo' fô bonyii bo Εφesus e

15 Me nu ε n'yuw wase ekume fitele fi ben nu ε lese yî Tata Jisos e, noo keŋkoŋen kè ben keŋke fô bonyii bocii bò è nu bo Nyo' le. È nεε fiεε fi ge,

16 é me ηké ndioo mbunlee no ηkumyi ben ê bunle yem e. Me ηke mbaa enlu wase keenyaa keyoone ê Nyo' ekume ben ke.

17 Me mbunlee le Nyo' wvù nu wvu Tata wesebeene wvù Jisos Klistu, Nyo' wvù nu Icee bvukuke, enya ben bô keyoy ke bvufee le, eyene ejise eyene é ben ekieε wvù ntay.

18 Me mbvuu mbunlee le wvù eyuuse bvufee bvunen é ben ekieε fiεε fi ben taale fwe yî dvù le, fi è nu fi bó to teŋεε ben nje fí, ebvuu ekieε bvukuke bvù baay bvù bvushew bvù bonyii bò è nu bo Nyo' le.

19 E me mbvuu mbunlee le Nyo' eyene bvufee bvunen é ben ekieε mvuŋgay mwew mvù fele mvuŋgay mvunciim. È nu mvuŋgay mvun mvù wvù lemte dvù fô beene bò nu ε lese fitele yî ye le, ε è nu mvuŋgay mvu baay.

20 E è nu mvuŋgay mvudvu mvun mvù wvù to lemεε dvù bvuse Klistu yî kpwe le, bense wvù shike ê ebo kew ke εceey e woŋ wvu we le.

21 Klistu kuuke fele naa lo mwεem mvù saake fowe mvunciim noo bvunfon noo mvuŋgay noo bvukuke bvucii. Wvù bvuu keŋke diee di kuuke fele naa lo εdiee ecii yò bó teŋe bonyii dvù. Ke wvù nu nonen ε è nu ke yî kefew kin e maan̄ ke. Wvù nu ke enu ke nonen kefew kè too le.

22 Nyo' nu ε gεε mwεem mvunciim ê wvù ekuse, ε bvuu ε gεε wvù le wvù enù ekole ke fiεε ficii fi kentaashe ke bonyii bo mbee le.

23 Kentaashe ke bonyii bo mbee le kin nu ye Klistu. Klistu ε mum ε yiŋsen yî kentaashe kin e kí ε kocen, ε è nu wvù wvù gee ε mwεem mvunciim yiŋsene kocine ê jé le yicii.

Εφε 2

Nyo' to nu ε taashe beene bo Klistu bvuse yî kpwe le

1 È to nu fwele, ε ben nu bonyii bò nu ε kpwe wase ê keyoy e nje bojay bonen bô bibefe,

2 bì ben to cee gee le. Ben to cee bii ε è nu je yì bonyii bo yî woŋ wvun e cee, bvuu bii nfon mvuŋgay mvu yî fwefwe le. È nu wvù keyoy kekie kè lemte keseen yî bonyii bò temyi bikuu bô bo Nyo' le.

³ È nu ke ten no beene bocii to shee cee. Beene to cee gee mwεem mvù nyam ye yì ngyte shieele, bii mwεem mvù nyam ye bô bonkpawwεε bosεεbeene gomte le beene egeè. Beene diεwε bonyii bo boyuum to nu wase lo bonyii bô shém effuuke Nyo' bô bó, ke lenlen diεwε no wee wvu wum tfuu nu.

⁴ Geenεn Nyo' wvù nu ε yijsen bô shen fô beene le to nu ε koη beene baay,

⁵ taashe beene bo Klistu bvuse yî kpwe le no beene to nu ε kpweken wase nje bojay bosεεbeene. Nyo' to boyse ben ε è nu nje fitele fiew fi jee.

⁶ No wvù to taasheε beene ε bo Klistu Jisos bvuse yî kpwe le nonen, mum bense beene shike beene ε bó woη wvu we le.

⁷ Wvù to ge nonen wvu le é ke edioo enu yî kefew kè too le, é wvù eduηce mbuwma we wvu baay wvù è nulo wee saa efewsεn ke. Mbuwma wvun nu ε wvù ε duηce wase ê beene nje fitele fiew fi jee fele yî Klistu Jisos e.

⁸ Ben ekeè le Nyo' to boyse ben ε è nu nje fitele fiew fi jee fele yî fitele fi ben to lesεε yî Klistu le. Ke fifin nu ε è to ge ben ke. È nu nnya Nyo'.

⁹ Ke è to nu nje lemme dimew di wee to lemεε se keηke wvu le wee mvu ke ene esaale ye ke.

¹⁰ Fieε fi nu, nu le beene nu no bó nu nen, ε è lem Nyo' bô εbo kew. Wvù nu ε taashe beene bo Klistu Jisos ε ge beene ε no nu bonyii bo bofε, wvu le beene elemtè dilemme di jee di wvù to seysεε wase ε è bεε lo le è nu di beene nu ke ecee lemte le.

Dikfuu di difεε nu wase wee mwaan yî Klistu le

¹¹ Ben bonyii bô yaa nu ke kfuu di Bojuu le, ben ekumyì fieε fi ben to shee nu fwele. Bojuu bô teηe bikuu bibole le bowen nu bonyii bô bó nu ε tfuse yew, to teηe ben le ben nu bonyii bô nu ntfuse. ε ntfuse wvu yew wvun nu fieε ε bó gee ke ε è nu yî ye wee le bô can.

¹² Ben ekumyì le è to nu sekekie, ε ben yaa keηke fieε keege bô Klistu ke. Ke ben to nu ente jo engoke ke bonyii bo Nyo' le bô è nu bo Islael ke. Ke ben to keηke fieε keege bô moηkan mo ηkawma le mò Nyo' to gbwole bô bó ke. Ben to nu ke lo finen yî nshε le fen yaa keηke fieε fimew fi ben taale fwe yî dvù le ke, yaa kee ten Nyo' ke.

¹³ Geenεn, yî keseen e no ben nu ε taashe wase ben ε bo Klistu Jisos, ben bô to shee nu ncejole fô Nyo' le, nu ε wvù ε jo wase ben ε to dvù nceencee fô wvù le fele yî εleme ke Klistu le.

¹⁴ È nu wvù wvù Klistu kebεε wvù nu ε to bô nyεkeey fô beene le. Wvù nu ε ge wase Bojuu bô bonyii bô yaa nu ke Bojuu ε tu wee mwaan. Wvù nu ε bvusse kembew ke keηgawsen e kè è nu kembanen kè se shee nu ê beene entelen.

- 15 Wvú nu ε nya ye ye ε kpwe keefiwse nci bô mwεem mvù nci duu le bó egeè keenu bonyii bo Nyo' le. Wvú ge nonen wvu le wen etaashe wee tfuu yî ye le é bó etu wase wee mwaan wvu fwe yî bvudvuu bvù bonyii bo bofεε le. No wvú ge nonen, ε mum ε to bô nyεkeey.
- 16 Kpwe ye yî kentam e nu ε taashe dikfuu di difεε ε to dvú fô Nyo' le yî ye le yimiaan, ε mum ε yu kembangan kebole yî kentam e kí ε ka.
- 17 Wvú to nu ε to fewce saaka wvù too bô nyεkeey ê ben bò to nu ncejole, fewce ten saaka wvudvu wvun ê bonyii bò to nu nceencee.
- 18 Ê ge wvú beene bocii ε se keηke je keeto fô Nyo' Ice le fele yî Keyoy e kemwaan.
- 19 Nonen, ke ben beε botolo kenεε bonyii bò beke lo ke. Ben nu wase boom bo won e ben ε bonyii bò è nu bo Nyo' le, nu ten bonyii bo yew e bo Nyo' le.
- 20 Ε yew yin nu ε bó bom yî kenffuy kè è nu boom bo ntum e bo Jisos e bô bonyii bò teete bontum bo Nyo' le, ε Klistu Jisos kebεε nu te di buu di yew yidvu le.
- 21 Ê nu yî ye le wvù yew yidvu nu ε taashe ε no kuu keeke eto enu yew yî yuule fô Tata le.
- 22 Ben ten nu ε taashe ε yoo yî Klistu le, ε no nu bvudvuu bvù Nyo' cee fó ê Keyoy kew e.

εfe 3

Baul nu wee nfewce fô bonyii bò yaa nu ke Bojuu le

- 1 No Nyo' nu ε ge wase mwεem mvun fô ben e nonen, me ε mum ε no mbunlee fô ben e. Me wvù Baul nu yî ncaw e nje saaka wvu ekume Klistu Jisos. Ε me nlemte ncaw wvun nje yene ben bonyii bò yaa nu ke Bojuu.
- 2 Me ηkpwaake le ben nu ε yuw wase no Nyo' to nu ε caw me nya lemme le me ensee ê ben ekume mbuwma we fô ben e.
- 3 Fieε fidvu fin nu fi to shee nu ê kenyile le ε Nyo' ε yene wase ejise eyem me ε n'yen. Me nu ε nsaη wase caan ekume fí fô ben e.
- 4 É ben taη lo, é ben eyen fieε fi me ηkee ekume kenyile kin kè to nu ekume Klistu le.
- 5 Ê to nu fwele ε bó faηe yaa ege é εηgokε ke bonyii le ke sekekie ekiεε kenyile kedvu ke. Keseen nu ε Keyoy ke Yuule ε duηce wase ê boom bo ntum e bo Jisos e bò wvú to balεε le è nu bew noo ê bonyii bò teete bontum bo Nyo' le, bó ε kieε.
- 6 Fieε fidvu fin nu le bonyii bò yaa nu ke Bojuu nulo ebee saaka wvù jee le, é Nyo' enya ten bó bô bvushew bvù wvú nu ε gee ê bonyii bew. Bó nu wase ye yimiaan bó bó, ε ηkawma wvù Nyo' to gee fô Bojuu le nu wase ten fô bó le no bó nu ε taashe bô bo Klistu Jisos.

⁷Nyo' to nu ε baa me le me enfewcì saaka we wvù jee wvun. Wvú to bale nje fitele fiew fi jee fi wvú kenke fô me le. Wvú to nu ε jo mvuᅅgay mwew lem dvú yî yem e mum nya lemme din le me enlemtè.

⁸ Me mbaa ncm mbuy naa lo wee wvu caan ᅅgoo bonyii bò è nu bo Nyo' le ke. Geenen Nyo' to nu ε nya ke mbuwma wvun ê me le me enᅅen enfewce saaka wvu ekume bvukuke bvù Klistu le bvù yaa kenke ke kenfewsen ê bonyii bò yaa nu ke Bojuu le.

⁹ Wvú to nya ten mbuwma wvun le me enᅅe é bonyii bocii ekiee ntaᅅ kenyle ke fiee le kè Nyo' wvù bomε mwεem mvunciim to shee nyile yî ye le bilum e bilum e.

¹⁰ Ntaᅅ wvun to nu le è nu ke enu kefew ke keseen e, é Nyo' ege fele yî kentaashe ke bonyii bo mbee le, é bonceendaa bo Nyo' le bô biyoy bì kenke mvuᅅgay saake mondvuum mo fowe le, eyen bvufee bvù Nyo' le bvù nu lo jé le jé le.

¹¹ Wvú to ge fiee fin bii no wvú to seysεe wase fonkew. E wvú ε ge wase fiee fidvu fele yî Klistu Jisos wvù Tata wesebeene le.

¹² È nu nje ye wvù beene nu ε kenke je keetoo mbew Nyo' le yaa kenke ke nfan kenεε kemaᅅen nje fitele fi beene lese yî ye le.

¹³ No fí nu nonen, me ε mum ε no ᅅkule lo can le fo shem kpwe ben nje ᅅᅅew wvù me n'yene fô ben e ke. Ben nu ke ekenke bvujonke bvudvu.

ε Baul bunle fô bonyii bo εfus e

¹⁴ È nu nje mwεem mvun wvù me ntumte envuw ê Icee wesebeene fwe,

¹⁵ wvù ediee ε dikfuu dicii di fowe noo di fokuse nen'yi fô wvú le.

¹⁶ Me ntumte envuw nleke le, bii bvukuke bwew bvù è nu bvù baay e, le wvú enya ben bô mvuᅅgay fele yî Keyoy kew e, é mvú ege é mvuntelem mvunen etemyi.

¹⁷ Nonen, é Klistu emum ecee ê mvuntelem mvunen e no ben leese fitele yî ye le. Me mbunlee ten le kenkonen kenen etemyi diεwe kete kè cime ᅅᅅ e noo diεwe yew yì bó bom yî kenffuy kè temyi le,

¹⁸ wvu le ben ε bonyii bocii bò è nu bo Nyo' le ekenke bvufee bvù è nulo é ben ekiee kenkonen ke Klistu le kè nu fô beene le. Kenkonen kew fô beene le nu ε kí kenke mbuw baay, kenke bvundee bô bvudefe baay, ε kí ε ley ten fokuse baay.

¹⁹ Me mbunlee le è nulo é ben ekiee kenkonen kew kedvu kè ghaake bonyii keekiee le, wvu le ben nulo enu ε ben ε yiᅅsen bô fiee fi Nyo' nu fí ficii.

²⁰ Beene emum ebenseè Nyo'. È nu wvú wvù nulo ege fiee ficii bô mvuᅅgay mvù lemte yî yese beene le. E wvú nulo ege naa efey lo no beene biite kenεε no beene nulo ekpwawce.

21 Mbense enù fô wvú le nje kentaashɛ ke bonyii bo mbee le noo nje Klistu Jisos yí kefew e kecii noo sekecii se nka. Fí enù nonen.

Ɛfɛ 4

Bonyii bo Klistu le enù yí kentaashɛ le

1 Nonen, me wvù Baul wvù nu wee ncaw nje saaka wvu ekumɛ Tata Jisos, me nleke lo ben le ben eceè nce wvù nu ɛ kocɛn wvù Nyo' teɲɛɛ ben le ben eceè yí dvú le.

2 Ben eshiwsè bikuu binen, nù wɛɛ, kuulè shém. Ben enù yí keɲkoɲɛn e, yaa keɲke fitele fi sɛsene ke.

3 Ben emomtè naa ntay keenu ke yí kentaashɛ kè Keyoy ke Yuule nu ɛ to dvú fô ben e no ben cee yí nyekeey wvù taashi bonyii le.

4 Ye Klistu nu yimiaaɲ, ɛ Keyoy ke Yuule nu kemwaaɲ. È nu ke leɲleɲ no fiɛɛ fi Nyo' to teɲɛɛ beene le beene etaalè fwe yí dvú le nu ten fimwaaɲ.

5 Tata nu ke mwaaɲ, ɛ mbee nu ke mwaaɲ, ɛ nlese wvù bó leese bonyii ê joo nu ke mwaaɲ.

6 Nyo' nu ke mwaaɲ wvù nu Icee wesebeene bocii. Wvú nu ê we jo mwɛɛm mvunciim, lemte yí beene le bocii, nu ten ente jo beene bocii.

7 Fí nu ten le Klistu nu ɛ buw ke wee mwaaɲ mwaan beene le ɛ nya wvú bô ye nnya bii nfew we le ê mwɛɛn.

8 È nɛɛ fiɛɛ fi bó nu ɛ saɲ ê Nwa' Nyo' le le, “Seke wvú to benɛɛ gen we, wvú to nu ɛ ge ɛ bonyii bô wvú to kooyɛ no bii wvú le. Wvú to nu ɛ nya nnya ê bonyii.”

9 Keegay le, “Wvú to nu ɛ ben gen we” nu le la? Fí duɲci le wvú to nu ɛ yaw shii gen ekuse jo nshɛ.

10 Nonen, wvú wvudvu wvù to shiileɛ to fokuse nu ke ten wvú wvù to benɛɛ fey naa lo ɛbulɛ kecii gen ê we, wvu le wen eyiɲɛn mwɛɛm mvunciim é mvú eyiɲɛn ekocɛn.

11 È nu ke wvú wvù to nyaɛ nnyá ê bonyii. Wvú to nu ɛ nya ê bomew le bó enù boom bew bo ntum e, nya ê bomew bô eseɲè mwɛɛm mvù bó yuuke ɛ Nyo' jemyi, bomew bô eghanè fewci saaka wvù jee wvù wvu Nyo', bomew bô etaalè fô kentaashɛ ke bonyii bo mbee le bvuu yɛɛyi bonyii.

12 Wvú to nya nnyá yidvu yin keeseysel bonyii bô è nu bo Nyo' le dvú é bó ekpwɛntɛn bô elemte lemme diew, yoote ye Klistu yì è nu kentaashɛ ke bonyii bo mbee le,

13 ke egen ebuy kefew kè beene bocii ke enu wase wee mwaan yí mbee wesebeene le bô yí fiɛɛ fi beene kee ekumɛ Waa Nyo' le. É beene cee nonen, é fí ege é beene enu ɛ bó ɛ taw ɛ kocɛn ɛ mɛse ɛ no nu wase no Klistu nu kebeɛ.

14 Nonen, beene saa ebvuu enu ke diewe boom bo caan e, bò kfuu n'yeyi wvù la dioo fele no njijsene bô bó ε bó gene fwe tuu jim ke diewe fiε fò fwefwe kale le ke. Beene saa ebvuu enu ten diewe bonyii bò bonyii bò ghane wεentene lo elεεle bó bô mbiay yì bó seyse le ke.

15 Beene keŋke keeseŋe fiεεbeene ε è nu keceey yî keŋkoŋen e, emum ekuu ê jé le yicii keeto enu diewe Klistu le wvù nu ekole kesεεbeene.

16 È nu wvù wvù gee ε biba bi ye ye le bicii bì nu ε shfuwye ε taashe yî ye le se kuu, yoote ye ye yî keŋkoŋen e no keba lemte diew lemme ε keba lemte diew ntay.

Nce wvu yvum bô wvu fwe

17 Yî keseen e, ê diee di Tata le nu ε me ŋgomte keengay embvuu enciise lo ê ben le fo ben ebvuu eceè ke diewe bonyii bò maa Nyo' le ke. Boŋkpawce bobole ké no nu ke bo εcici.

18 Bvufee bvubole nu bvu binjiwe le. Bó nu ncejole fô nce wvù Nyo' duŋci le, njefo bó nu ε ma lo Nyo', ε è nu nje bó temyi bikuu.

19 Bó nu ε yum bikuu baay. Bó nu ε lese bikuu bibole ente jo nnyen kenjaŋ, ε ye yiibo yvuwse ke keege dikfuu di nnyen e dicii.

20 Ke fifin nu fiεε fi bó to yeyyεε ben dvú ekume Klistu ke.

21 Me ŋkee naa ntay le ben nu ε yuw wase ekume wvù, ε bó ε yeyyi wase ben bò nu ε taashe bô wvù bô keceey ke ekume Jisos.

22 Ben emum ebaa ye yi yvum yì ben to cee nce wvu yvum dvú yì nu ε befe wase nje mwεem mvu nnyen e mvù ben to shee gee.

23 Ben ecine é Nyo' eseyse boŋkpawce bonen é bó enu boŋkpawce bo bofe,

24 emum etfume ε è nu ye yi fiε yî yene le yì Nyo' nu ε ge yí ε no fieesene wvù. Yiyin nu ye nce wvù looci nu keceey wvu teytey bô wvù yuule.

25 Fí ε mum ε no nu le, ben ecine mbiay e, é wee ejemyi ε è nu keceey ê waa bwee njefo beene bocii nu biba bi ye yimiaaŋ e.

26 É wee ton'yi shém, é wvù no yene fo wvù ene ege kebefε. Fo wvù ecine é diuu eseε ε wvù bæε ton'yi shém ke.

27 Fo wvù enya je é dεwle eley jó ke.

28 É wee se cooŋke bvuoŋ, é wvù cine dvú no lemte ε è nu lemme di jee bô can ye, wvu le wvù nulo ekeŋke fiεε fi wvù efi ten bonyii bò fuute dvú.

29 Ben eyenè fo njeme wvù samte ebuyte dew yene le. Wee ejemyi fiεε ε è nu fi jee fi nulo eyoo lo bonyii naa fεε fò bó nu, wvu le njeme we etoo ε è nu bô nfi fô bonyii bò yuuke le.

30 Fo ben egeè fiεε fi Keyoy ke Yuule ke Nyo' le eyuuke ηkuuη ke. Keyoy ke Yuule kin nu nciise Nyo' yî yene le keeduηce le diuu nu ke edioo ε to ε kocen é wen emεse esum ben can ηgew e.

31 Ben elañ naa lo mvuntelem mvù cεwkene bô shém yî ffuuke noo shém yî ton'yεen noo waa noo keebeete bô ediee ε bonyii noo mvuntelem mvù befe.

32 Ben ekeηkè ε è nu keηge kè jee bô mvuntelem mvù jee fô wee noo wee le. Wee é ge kebefe bô wee, é wvú læshe enya ê wvú ke læηληη no Nyo' to feyεε yî Klistu le læshe binen bibefe.

εfe 5

Bonyii bo Klistu le eceè diεwe bonyii bo n'yuule

1 No ben nu boom bo Nyo' le bô wvú kooηke naa ntaη, ben emum ebenenè wvú.

2 Ben eceè yî keηkooηen e læηληη no Klistu to koηεε beene nya εkolε kew fô beene le. Nnya ye yin to nu ncese ε wvú samte shfuuηkene fô Nyo' le.

3 Mwεem ke diεwe kenjaη bô nce nnyen tfuu noo ken'yεε εjise yaa nu mvù bó eyuuke ekumε mvú ê ben enteleη ke, njefo ke mvumvun nu mwεem mvù enù ê bonyii bô è nu bo Nyo' le ente ke.

4 Ke fî baa ekocen naa lo le njeme wvù nyene bô njeme keyuη, noo yeλε di εcici ebuytè dew yene le ke. Ben enyaà ke ε è nu keyoone ê Nyo'.

5 Ben ekeè lo keceεy le ke wee wvù jaηke kenjaη, keηεε wee wvù gee nnyen, keηεε wee wvù yeλε εjise, keηke keλεη ente jo bvunfon bvu Klistu le noo bvu Nyo' le ke. Wee ken'yεε εjise ké no joo mwεem diεwe nyo' we le.

6 Fo ben ebee é wee elεε ben bô njeme wvu εcici ekumε mwεem mvun ke. Ben ekeè le è nu mwεem mvudvu mvun mvù ké ge ε shém Nyo' no ffuuke bô bonyii bô yaa yuuke wvú le ke.

7 Nonen fo ben etaashì ηgoo ben ε boba bonyii ke.

8 È to shee nu fwele ε ben nu bonyii bo εjiwe le. Geenεn keseen no ben nu ε taashe ben ε bo Tata, nu ε ben nu wase bonyii bo n'yuule. Ben emum eceè diεwe bonyii bo n'yuule.

9 Fiεε fi n'yuule ké no too dvú nu nce wvù jee bô wvu teytey noo wvù duηci keceεy.

10 Ben emom keekieε fiεε fi jee Tata le.

11 Fo ben eleesè εbo fô mwεem mvu εjiwe le ke. Ben ebvuusè lo mvú εmwa.

12 È nu naa lo fiεε fi keη'wuumen e keejemyi ekumε mwεem mvun mvù bonyii gee ê kenyile le.

13 Geenεn ε fiεε ficii fi n'yuule baa yî dvú le ké no yen'yi ε bó yene fî le,

- 14** njefo fiεε ficii fi yen'yi ké no nu n'yu. È nεε fiεε fi gee ε bó sε no gayte fiεε fimew le, “Wo wvù leete, kamse! Buye yî kpwe le, é n'yu Klistu ebaa yî yo le.”
- 15** Nonen ben emum elenè tomyi ekale yî kemew e. Fo ben eceè diewe biyuη e ke. Ben eceè ε è nu diewe bonyii bò keηke bvufee le.
- 16** Seke ben keηke je keege fiεε, ε ben yen le fo kefew kedvu efey εcici ke, njefo ediuw yo keseen nu ε kebefε nu ekfuη baay.
- 17** Nonen fo ben enù biyuη ke. Ben emomtè keekieε fiεε fi Tata koηke le ben egeè.
- 18** Fo ben ewuù mbvuum ε mó koole ben ke. Fifi nu fiεε fi beete lo bô bonyii. Ben enù ε ben ε yiηsεn ε è nu bô Keyoy ke Yuule.
- 19** Ben eyemtè boηkieε fô bikuu binen e bò buyte ê Nwa' Mbense le, noo boηkieε bomew bo Mbense le, noo bò Keyoy ke Yuule nyaa ê ben e. Ben eyemtè nonen bensee Tata ê mvuntelem mvunen e.
- 20** Ben enyaà keyoone ê Nyo' Ice kefew e kecii bô yî fiεε le ficii fele yî diee di Tata wesebeene wvù Jisos Klistu le.

Ntefe ê bokεε bô bolemε

- 21** Ben enya bikuu binen ê wee noo wee bii n'wvum wvù ben keηke fô Klistu le.
- 22** Ben bokε' bo bonyii le, ben enya bikuu binen ê bole' bonen no ben nu ε nya ê Tata,
- 23** njefo diemsεn nu ekole ke kpwoon e, ke no Klistu nu ekole ke kentaashe ke bonyii bo mbee le. Kentaashe kedvu nu ye ye, ε wvù keβεε nu wvù boysee kí.
- 24** Nonen bokε' bo bonyii le keηke keenya bikuu bibole ê bole' bobole yî fiεε ficii le ke leηleη no kentaashe ke bonyii bo mbee le nu ε nya kew ekole ê Klistu.
- 25** Ben bolemε, ben ekooηkè bokε' bonen ke leηleη no Klistu to koηεε kentaashe ke bonyii bo mbee le nya ekole kew, kpwe nje kí.
- 26** Wvù to nya ekole kew keege é kentaashe kedvu eyuule no wvù to cukεε kí bô joo noo diew ye.
- 27** Wvù to seyse kentaashe ke bonyii bo mbee le kedvu nonen wvu le wvù ejo kí yî ye le diewe kpwoon wvù fomte nu sε nlom, nu lemeleme yaa keηke fiεε fimew fi befe ke, ε wvù yuule nu naa sε fijay yî ye le.
- 28** È nu ke leηleη no bolemε ten keηke keekoηkè bokε' bobole ke no bó koηke yiyo ye. É wee koηke kpweε, tu wvù koηke ε è nu ekole kew.
- 29** Ke wee nu dvù wvù ké no bane ye ye ke. Wvù ké no nyaηyi lo yí, bosene taale fô yí le ntay. È nu ke leηleη no Klistu gee fô beene bò è nu kentaashe ke bonyii bo mbee le,

30 njefo beene nu biba bi ye ye le.

31 È nu fiεε fi bó to saηεε ê Nwa' Nyo' le ε, “È nu nje fifin wvù diemsen nu ke ecine ice bô bwee le, emum etaashe bô kpweε, é bó bofεε emum etu wase wee mwaanη.”

32 Fiεε nyiime εnte jo njeme wvun ε fí kuuke baay, ε me n'yene fiem le fí jemyi ekumε Klistu bô kentaashe ke bonyii bo mbee le.

33 Naa no me nci njemyi nen, wee mwaanη mwaanη ben e keηke keekoηkè kpweε no wvú koηke ekole kew, é kpwoon ten eyen le wen enyaà n'wvum ê dweese.

Εφε 6

Ntefe ê boom bô bocee boom

1 Boom, ben eyuukè bo'icee bonen bô bobwee bonen e, njefo fifin nu fiεε fi leη fi boom bô nu ε taashe wase bô bo Tata keηke keege.

2 Nci Nyo' wvù gayte le, “È wvumtè ico bô bwoo”, nu nci wvu fwe wvù keηke ηkawma fó.

3 E ηkawma wvudvu wvun nu le, “Wee wvù gεεle nci wvun nu ke eyuw njoη, ebvuu ece egen ncejole yî nshε le fen.”

4 Bocee boom, fo ben egeè mwεem mvù mvuntelem esaase boom bonen κε. Ben ekuusè lo bó ε bó kuu bô n'yεeyi noo ntefe wvù wvu Tata.

Ntefe ê bonfaw bô bonyii bô keηke bó

5 Ben bô nu bonfaw, ben eyuukè bonyii bô keηke ben yî nshε le fen e, ben efanè bó bvuu wvumtè bó. Ben eyuukè bó le bô mvuntelem mvunen mvunciim no ben yuuke Klistu le.

6 Fo ben egeè nonen κε seke jise dibole nu yî yene le wvu le ye ejeè bó κε. Ben egeè ε è nu diεwe bonfaw bo Klistu le bô gee ε è nu fiεε fi Nyo' gomte bô mvuntelem mvubole mvunciim.

7 Ben dioo lemte bó le, no lemtè bô njoη κε diεwe ben lemte ε è nu Tata le, ε è yaa nu ke wee wvu wum e κε.

8 Ben elemtè, kumyi le fiεε fi jee ficii fi wee gee nu ε wvú nu ke ekeηke ten fiεε fi jee ê Tata, keηεε wvú nu nfa keηεε wvú yaa nu κε.

9 Ben bonyii bô keηke bonfaw, ben ekeηkè ten bó ê je yî jee le, yene fo ben ebemseè bó. Ben ekumyi le ben ε bó bocii keηke Cee Ekole mwaanη fowe, ε fô wvú le nu ε jεey jεey yaa nu κε.

Mwεem mvu jem e mvù Nyo' nya ê beene

10 Keemεεε, me ε no ηgayte ê ben le ben eleemè temyi yî Tata le, eyeemè ε è nu yî mvuηgay mwew mvu baay e.

- 11 Ben etfume mwεem mvu jem e mvunciim ye le mvù Nyo' nya ê ben, wvu le ben nulo eleem etum jem ben ε bo dεwle ê jé yicii yì wvú wεentene jó le.
- 12 Ben ekeè le ke beene diuu ε è nu beene ε bo bonyii bo boyuum ke. Beene diuu ε è nu beene ε bo mwεem mvunciim mvù keŋke mvuŋgay bô bvukuke, saake won ejawe wvun e, mvù è nu biyoy bì befe bicii bì nu mondvuum mo fowe le.
- 13 Nonen ben emum etfume mwεem mvu jem e mvunciim mvù Nyo' nya ê ben, wvu le é ke edioo enu εdiuw yò befe le, é ben eleem eteme no ben nu ε ge wase fiεε ficii keeke eleeme temyi.
- 14 Nonen, ben emum eleemè temyi. Ben ejo keceey é kí enu diewe keaw e ε ben ε suu cin, ejo nce wvu teyey é wvú enu diewe ketwaa le ε ben ε jise ε baŋ gvúw yene dvú.
- 15 Ben enù ε ben ε seyse keefewci saaka wvù jee wvù too bô nyεkeey fô bonyii le, é fifin enu diewe bolaba bo jem e ε ben ε lese yì bikaa le.
- 16 Keebise fô, ben eleesè ke ε è nu fitele yì Klistu le, é fifin enu diewe ηkeε jem e ε ben keŋke εbo. È nu fí fi ben nu ekoole bomvuun bô wee kebefε tfumyi ε ηguy bæenci yì dvú le.
- 17 Ben ejo ten mboyma wvù Nyo' nu ε boyse ben é wvú enu diewe kefo ke jem e ε ben ε bon, emum ejo ten nyo jem yì Keyoy ke Yuule nyaa yì è nu diew Nyo'.
- 18 Yì fiεε le ficii, é ben ebunleè sekecii bii no Keyoy ke Yuule duŋci. Ben dioo bunlee no biite fiεε ficii fi ben shieele ê Nyo'. Yì fifie le é ben etaalè ntay, ebvuu ekuulè shém sekecii keebunlee leke Nyo' fô bonyii bô è nu bo Nyo' le bocii.
- 19 Ben ebunleè ten fô me le le seke me ε ηake diuw wem keenjeme, ε Nyo' nya ke me bô fiεε fi me njeme, ε me no njemyi se nfan ekumε kenyile ke saaka wvù jee wvù wvu Nyo' le.
- 20 È nu saaka wvudvu wvun wvù me nu yì ncaw e nje wvú diewe wee wvù nu jise di Klistu le. Ben ebunleè wvu le me ndioo enu keenjeme, ε me njeme no me ηkeŋke keenjeme, se nfan.

Ngayma

- 21 Tikikus wvù waa bwee wesebeene shém wvù lemte ten Tata le bô fitele fiew ficii nu esee fiεε ficii ê ben ekumε me, wvu le ben ten ekieε no me nu, noo fiεε fi me engee.
- 22 Fifin nu naa fiεε fi me ntumte wvú fô ben e nje fí, wvu le wvú eto ege é ben ekieε no bese nu, ebvuu eyvuwse mvuntelem mvunen.
- 23 Nyo' Icee wesebeene bô Tata Jisos Klistu enya ben nyεkeey bô keŋkonen noo mbee.
- 24 Nyo' ebuw ben bocii bô keŋke keŋkonen kè yaa kaa ke fô Tata wesebeene wvù Jisos Klistu le.

Fili

Fili 1

¹ Nwa' wvun saŋ me wvù Baul bee Timatio bò nu boom bo lemme le bo Klistu Jisos e. Nwa' wvun gene fô ben e, bonyii bò nu bo Klistu Jisos e bocii Filibi bô bocee bikuu bi kentaashε ke bonyii bo mbee le noo bonyii bò fici gee dilemme ê kentaashε ke bonyii bo mbee le ente.

² Nyo' Icee wesebeene bô Tata Jisos Klistu ebuw ben bô kembonεn, ebvuu enya ben bô mvuntelem mvù læetene.

ε Baul nya keyoone ê Nyo' fô bonyii bo Filibi le

³ Me ŋke ŋkpawwaci ekumε ben sekecii, no nyaa ke ε è nu keyoone ê Nyo' wεm.

⁴ É me ndioo mbunlee bunle yεm yicii fô ben e bocii, no mbunlee n'yuuke njoŋ,

⁵ njefo ε kεw yî diuu di fwe le ε to ε buy εben e, nu ε ben ε taashε beene keelemte le saaka wvù jee wvu ekumε Jisos Klistu egene fwe.

⁶ Me ŋkee naa ntay le Nyo' wvù kεwεε lemme di jee din yî yene le nu ke egen dvú fwe egen emεse diuu di Jisos Klistu nu ke ekase eto le.

⁷ Fí nu leŋ le me eŋkpawwaci ekumε ben nonεn, njefo ben nu fitele fiem, ε beene leeme yî fiεε le fimwaaŋ ε è nu fí fi Nyo' nu ε buw beene dvú. Beene leeme yî dvú le keseen wvù me nu yî ncaw e, ke no beene to leeme seke me nto mbεε ŋghane ntanyi diuw saaka wvù jee wvu ekumε Jisos Klistu ŋgee ε wvú ciime ntay.

⁸ Me njemyi nen ε Nyo' kee naa ntay le me ŋkεŋke shiee wene, ŋkooŋke ben bocii ke leŋleŋ no Klistu Jisos kooŋke.

⁹ Me mbunlee le keŋkoŋεn kenεn ekuù gene fwe fwe, é ben ekεŋke bvufee, taasse mwεεm ntay.

¹⁰ Ben nu dioo taasse nonεn, emum ecawte mvù looci nu leŋ. Nonεn, é ke edioo enu diuu di Jisos Klistu kaase too, é ben enu yuule, nu sε nlom.

¹¹ Ben nu ke enu nonεn njefo Jisos Klistu nu ε ge ben ε no keŋke nce wvu teytey, bonyii ε no yene bensee Nyo', tumte moŋkum mew.

ε Baul no nu yî ncaw e, ε saaka wvu ekumε Jisos gene ke fwe

¹² Boom bo bwεεm e, me ŋgomte le ben ekieε le mwεεm mvun mvunciim mvù nu ε kooy bô me nu ε loocε ε ge saaka wvù jee wvu ekumε Jisos ε ku ε gen lo fwe fwe.

¹³ Mwεεm mvudvu nu ε ge bonyii bò cεyte ntow wvun fô me nu, noo bonyii bocii ε kieε le me nu yî ncaw e fen nen, nje me nu wee Klistu.

¹⁴ Ncaw wvù me nlemte wvun nu ε bvuu ε ge boom bo bwee wesebeene le nteen ε mεse ε lese fitele yî Tata le ε no fewci diεw Nyo' tεmyi lo, yaa fane ke.

- 15 Me ηkee λε bó bomew fewci naa εκυμε Klistu nen bene ε ε nu kendon bee bó, taanke lemme diem. Geenen ε bomew fewci fibole bó mvuntelem mvù yuule.
- 16 Boban fewci nonen, njefo bó koonke me, ε bó kee lo λε me nu yî ncaw e fen ε ε γεke Nyo' me λε me entomtè saaka wvù jee wvu εκυμε Jisos Klistu.
- 17 Ε bomew ba fewci εκυμε Klistu κε fomvu fomvu bó mvuntelem mvù yiile wvu λε bó egeè nonen biise ηgew yî ηgew wvù me n'yene wase yî ncaw e fen.
- 18 Fifie κηke la keege? Kenεε bó fewci nonen bvulle lo, kenεε bó fewci bó keceey, tu me n'yuuke κε fiem ε ε nu njon njefo ficii nu ε bó fewci κε ε ε nu εκυμε Klistu.
- 19 È nu κε no me nu ηke en'yuuke njon nonen, njefo me ηkee lo λε no ben bunlee fô me le, ε Keyoy ke Jisos Klistu le bvuu fii me, nu ε me nu ηke emboy yî ηgew e.
- 20 Fieε fi me nlooci ntaale fwe ε me ε nlese bvufee yî dvú le nu λε fo me ηke enge naa lo fieε fi ege é me en'wuumene κε. Me nu ηkkuu κε ε ε nu shém, enleeme ntemyi sekecii, se ge keseen wvu λε kenεε me ε ηkpwe, kenεε me nu dvú, é fieε ficii fi me ηgee, ecawsè κε ε ε nu diee di Klistu le we.
- 21 Me njemyi nonen nje, fô me le, é me nu dvú, tu me nu κε bee Klistu, me é ηkpwe, é enu sew fô me le.
- 22 Geenen, é ε nu λε me nu enu dvú, é me engeè lemme di efii bonyii ntay. No mwεem mvun nu mvunfεem nen, me mbaa embvuu ηkiseε laa me nu encaw fi la λε.
- 23 Me ntuwtene lo entelen jodvu. Me ηgomte λε ε be nulo é me engene fiem engen enu bee Klistu. Fifie jee fele keenu dvú.
- 24 Geenen, ε fi jee baay λε me enu dvú nje yene.
- 25 No fi nu nonen, me nlooci naa ηkee λε me nu enu dvú nlemte beene bocii wvu le ben ekuè gene fwe bvuu yuuke njon no ben nu ε lese fitele yî Klistu le.
- 26 Nonen, é me ndioo ε ηkase ε nto ε no nu beene, é ben ebvuu ebensee lo ye ntay εκυμε Klistu Jisos nje yem.

Ben eceè nce wvù Jisos Klistu gomte

- 27 Fieε fi me ηgomte keηγay nu κε λε ben eceè nce ε ε nu wvù saaka wvù jee wvu εκυμε Klistu gomte. Ben eceè nonen, wvu λε kenεε me ε ηkase ε nto ε n'yen ben e, kenεε me mbaa nto, é me en'yuuke κε λε ben leeme temyi, κηke fitele fimwaan, nu yî wee le mwaan, diuu yî fieε le fimwaan, wvu λε saaka wvù jee wvun egenè fwe, ε bonyii beje dvú.
- 28 Fo ben efanè naa lo bonyii bò bane ben yî saaka wvun e κε. É ben nu se ben fane bó, é fifin eduñci ê bó λε Nyo' nu ke eboyse ben, geenen elεε lo bó.
- 29 Ben ekeè λε Nyo' baa buw ben λε ben enù bonyii bo Klistu le κε λε ben elese ε ε nu fitele yî ye le maan κε. Wvù nu ε buw ten λε ben eyenè ηgew nje Klistu.

³⁰ Ben nu ε bene wase me le beene ε no diuu yî saaka wvun e bocii wvù ben to yeneε ε me ndiuu yî dvú le, ε è nu κε wvú wvù ben yuuke le me mbeε yî dvú le keseen.

Fili 2

Ben ejoò kenfewsen yî Jisos Klistu le

¹Κε ben nu ε taashe wase ben ε bo Klistu wvú ε ge ben ε no kenke mvuntelem? Κε kenkonen kew fô ben e nu ε ge wase mvuntelem mvunen ε no yuwse? Κε ben ε bo Keyoy ke Yuule nu ε taashe wase, ε Klistu kenke fitele fi jee fô ben e bvuu camte shen fô ben e?

²No fi nu nonen, ben ege le é me emese en'yuw njon. Ben enù diuw mwaan, koonkè bikuu binen, kenkè fitele fimwaan bvuu kenkè ηkpawawce mwaan.

³Fo ben dioo nu ε wee no kpwaake κε ε è nu ekume ekole kew kenεε bensee ye yi ecici κε. Wee tfuu eshike ekole kew, eyenè wee mvu le fele ekole kew.

⁴Fo wee ekpwaakè κε ε è nu ekume ekole kew κε. Wvú ekpwaakè ten ekume bonyii bomew.

⁵Kenke kenen kenke keenu lenlen κε diewe κε Klistu Jisos e.

⁶Wvú to nu Nyo', faje yaa ejo fifie le è nu fiε fi wvú emey eghemte yî dvú le κε,

⁷geenen, cine bvudvuu bvudvu le, jo ε è nu bvú nfwa le. Ε bó boo wvú, ε wvú no nu lenlen κε diewe wee wvu wum e.

⁸Seke wvú to nu wee wvu wum, ε wvú shike ekole kew no yuuke Nyo' le, ke bee keekpwe kpwe, efey mvunciim, kpwe yi yî kentam e.

⁹No wvú to gee nonen, ε Nyo' bense wvú gee bvudvuu le bvù fele bvú wee tfuu le, buw wvú bô diee di fele ediee ecii,

¹⁰wvu le wee tfuu wvù nu won wvu we le bô wvù nu yî nshε le noo wvù nu ekuse jo nshε, ke dioo ε yuw diee di Jisos e didvu, ηgvuum,

¹¹É wee tfuu ejemyi bô diuw we le Jisos Klistu nu Cee Ekole.

É bó edioo egee nonen é mbense egene ê Nyo' Ice.

Ben ebaà ê won jan diewe jón e

¹²Nonen nsáa yem shém, ben eyuukè κε ten Nyo' le nonen no ben to yuuke seke me nto nu beene. Ben eyuukè keseen fele lo wvù me n'yaa nu κε beene, egene fwe gee mwεem mvu ekume mboyma wene. Ben egeè nonen, fane ciinke.

¹³Ben ekeè le è lemte Nyo' yî yene le, gee le ben eshieelè keege mwεem mvù wvú koonke. Ε è bvuu nyaa wvú mvunḡay keege mwεem mvudvu dvú.

¹⁴Ben dioo gee fiε ficii fi ben gee, fo ben ewukenè, kenεε beekè mbew κε,

15 wvu le ben eyuule, nu se nlom. Nonen, é ben emum enu boom bo Nyo' le bò nu se jay entelej jo engoke kin kè keŋke mvuntelem mvù yiile, buuke mwεem. Ben ebaà ê woŋ jan diewe jón e,

16 no ben jici saaka wvù nyaa nshii wvù mey lo ê bonyii le. É ben gee nonen, é ke edioo enu diuu di Jisos Klistu kaase too, é me embensee ye le me mbaa nlem lemme di εcici ke.

17 No ben nu ε lese fitele yî Nyo' le, tu è nu ncese ε ben ε ge fô wvú le. É è cim nu naa le bó nu emεse enya me diewe no bó ké fuu mbvuum, ebise yî wene ncese le, é me en'yuuke ke ε è nu njoŋ, nlanlanε beene bocii.

18 ε me ŋgomte le ben ebene me le é beene eyuuke njoŋ, lanlanε.

ε Baul jeme ekumε Timatio bô εbaflodaytus

19 É Tata Jisos beŋe lo, tu me n'yene le è sheke caan é me entum Timatio fô ben e. Wvú nu ke edioo ε to ε kase ε tu jim, esee ê me no ben nu, é fitele fiem elεeten.

20 Ke me ŋkeŋke wee mvu diewe wvú le wvù looci naa keŋke ten shiee fô ben e diewe no me ŋkeŋke ke.

21 Me njemyi nen, njefo wee nteen keŋke shiee ε è nu fô εkolε kew e, yaa taale ke ekumε fiε fi Jisos Klistu gomte le ke.

22 Geenεn, Timatio nu ε ben kee wase wee wvù è nu wvú, no wvú nu ε lem wase bee wvù keefewce saaka wvù jee, ε wvù lemte bee wvù lenlen diewe no wan ké no lemte bô ice.

23 È nu fiε fi me n'yene le è sheke caan é me entum ε è nu wvú. Fiε fi me mbεε ntaale nu keen'yen laa mwεem nu etu nεε le yî yem e le.

24 Me ŋgεele bvufee yî Tata le le è sheke caan, é me kebεε ento ten en'yen ben e.

25 Me n'yene le fí nu shiee le le me eŋkase enciinse εbaflodaytus ê ben. Wvú nu waa bwee wesebeene, ε bee wvù lemte bvuu diuu yî diew Nyo' le. É nu wee wene ntum wvù ben to tumεε le wvù eto etaale fô me le.

26 Wvú se keŋke wase shiee keeyen ben e bocii, ε fitele buuke wvù no wvù se yuwεε le ben nu ε yuw le wen cemte lo.

27 È nu kecεεy, wvù se nu ε looce ε cem ε shεε ke caan keekpwe. Geenεn, Nyo' se nu ε cam shen fô wvù le, ε ke wvù se cam ke ε è nu fô wvù le maan ke. Wvù nu ε cam ten fô me le le fo wvù ekpwe ebvuu ebise ŋgew yî wvù me n'yene wase le ke.

28 Nonen, me ε mum ε no nshieele naa baay le me enciinse wvù, wvu le ben ebvuu eyen wvù le eyuuke njoŋ, é fitele fiem ten elεetene.

29 Ben efiisen wvù diewe bonyii bo Tata le bô njoŋ. Bonyii diewe wvù le nu bò è nulo é ben ewvumte.

³⁰Me njemyi nen njefo è to shêke caan tu wvú to kpwe nje lemme di Jisos Klistu le no wvú to nyaε ekole kew keetaale fô me le yî bvudvuu bvunen e.

Fili 3

Fieε fi kuuke nu keekieε Klistu

¹ Boom bo bwεem e, keemεεε, ben eyuukè njoη le ben nu bonyii bo Tata le. Me nu ε nsaη wase mwεem fô ben e, ε ke è nulo é me endose keenjemyi ηkaase ntuu fô ke. Me ηgee nonen keenjemηgeme lo ben.

² Ben dioo nu, no yenè ben ε bonyii ba bô gee mwεem mvù befe, leeme ke le bó keηke ke keesεyi ye bonyii le bó tfuuse bó yew. Bonyii bodvu ba nu lo bwé.

³ È nu beene ban bô nu ε keηke ntfuse yew wvu leη, beene ban bô bunlee Nyo' no Keyoy kew duηci. Beene bensee ye ε è nu nje Klistu Jisos, ke beene leese bvufee yî mwεem mvù è gee bonyii le ke.

⁴ Geenεn, è nelo é me ηkeηke ten shieε keenleese bvufee yî mvumwε mwεem e. É wee fen nu dvú wvù kpwaake le wen nulo ekeηke shieε keeleese bvufee yî mvumwε mwεem e, tu me ηkeηke wvù fele wvu mwεten.

⁵ Me nu wee wvu Islael, ê kfuu di Benjamen e, nu wee Ibulu, ε è to boke Bo'ibulu me, ε è ke no nu εdiuw nyaη ε bó tfuse me yew. È dioo tu ê keba ke bonci bosese le, nu ε me nto nu wee Falasii,

⁶ntemyi naa ntay yî fieε fi Nyo' le, mbone bikaa ê kentaashe ke bonyii bo mbee le ejim. È keba ke bonci bosese le no è nulo é wee enu teytey, me nto mbaa eηkeηke jay ke.

⁷ Geenεn mwεem mvù me nto nshee n'yene le è nu mwεem mvu sεw e fô me le, nu ε me n'yene wase keseen le è nu mwεem mvu εcici, nje fieε fi Klistu ge fô me le.

⁸Ke è mεy ke fifie ke, keεεy, me n'yene mwεem mvunciim e ε mvú nu lo mwεem mvu εcici fô me le, njefo fieε fi kuuke fele mwεem mvunciim nu keekieε Tata wεm wvù Klistu Jisos ntay. Me nu ε nlaη mwεem mvun mvunciim nje ye. Me n'yene wase mvú le ε è nu mwεem mvu nnyen e, wvu le me enù bee Klistu,

⁹ é bee wvú emεse eleyne, enu yî wee le mwaah. Me nu ε Nyo' ε jo wase me le me nu teytey fô wvú le. Wvú jo nonen njefo me nu ε nlese fitele yî Klistu le. Me ε mum ε no nu teytey no wvú joo bonyii bô nu ε lese fitele yî Klistu le. Ke me mbvuu njoo naa lo le me nu teytey mbii no me nto ηkpawci le wee ké no nu seke wvú bii bonci bosese le ke.

¹⁰ Fieε fi me ηgomte keseen nu le me eηkieε Klistu ntay, eηkeηke mvuηgay mvù wvú keηke no wvú to kasε ebuy yî kpwe le. Me ηgomte ten keen'yen ηgew no wvú to yεεε, bô keenya ekole kem ê kpwe no wvú to nyaε,

¹¹wvu le Nyo' ke ebvuse ten me yî kpwe le.

Me mbone ɲaɲ ntaale fô me ɲɛne

- 12 Kε me ɲgayte nɛn lε me nu ε ɲge wase mwεεm mvun kenεε lε me nu ε nfεse wase kε. Me mbεε mbone kε ɲaɲ lε me ɲke enlaɲ kebo enjicε mwεεm mvudvu lε ê me εbo, nɲefo Klistu Jisos nu ε jo wase me wee we le.
- 13 Boom bo bwεεm e, kε me n'yεne lε me nu ε ɲjicε wase mwεεm mvudvu lε ê me εbo kε. Geenɛn fiεε fi me ɲgee nu lε me ndaayi ê mwεεm mvù nu ε fey wase le, mbone ɲaɲ lε me enjicε ε è nu mvù nu fwe le.
- 14 Me mbone ɲaɲ ntaale kε ε è nu fô fô me ɲɛne, keɲkeɲke mmawcε wvù è nu ntee wvù Nyo' nu ε tee me lε me emben ento we no me nu ε ntaashε bee Klistu Jisos.
- 15 Beene bocii bô nu ε cime wase ɲɲ yî Jisos Klistu le kɲke keekpwawci mwεεm mvun. Geenɛn, é ben bomew kpawci mvunen mwεεm jεy, tu è nu ke eyuuse wase Nyo' ê ben.
- 16 Fiεε fi baay nu kε lε beene ejicì ε è nu fiεε fi beene nu ε yεyi wase le ntaɲ.
- 17 Boom bo bwεεm e, ben ejodò kenfewsɛn fô me le, ebvuu etaalè tɛn nce wvù bonyii bomew cee bô nu ε jo kenfewsɛn fô bese le.
- 18 Me ɲjemyi nɛn nɲefo no me nto ɲké no ɲjemyi wase ê ben bokaɲ e bokaɲ e, ε mbvuu ε no ɲjemyi keseen bô misɛm ê jise lε bonyii bomew nu dvù bô cee nce wvù duɲci lε bó bane lo saaka wvù lε Klistu to nu ε kpwe yî kentam e.
- 19 Boba bonyii nu ε bó nu ke elɛse lo bó. Wvubo nyo' nu diuwdiee. Bó bensee ye yî mwεεm mvù bó bee keewuumene lo yî dvù le. ɲkpawcε wvubo nu kε ε è nu yî mwεεm mvu fokuse fɛn e.
- 20 Beene nu fiεεbeene bonyii bo woɲ wvu we le. ε è nu fô fô beene looci cɛyɛ le Mboise wesebeene wvù Tata Jisos Klistu nu ke enε sɛ to.
- 21 Wvù nu ke edioo ε to, ekumɛn ye yesebeene yi ncɛwnɛw yin é yí etu diwε ye ye yì kɲke bvujɲkε le. Wvù nu ke ekumɛn ε è nu bô mvuɲgay mwew mvù wvù nu ke ebaancε mwεεm mvunciim dvù enu εwe jodvu.

Fili 4

ε Baul nya ntefe ê bonyii bo mbee le bo Filibi

- 1 Nonɛn boom bo bwεεm e, me ɲkoɲke ben baay mbvuu ɲkeɲke shiee keen'yɛn ben e. È nu ben bô gee ε me n'yuuke ɲɲ, ε ben bvuu nu kefo kem ke bvunfon e. Nsáa yɛm, ben emum eleemè kε tɛmyi ben ε bo Tata nonɛn.
- 2 Me nleke lε εwodia bô Sintiki emεεshε fiεε fi bó kɲke etu diuw mwaɲ no bó nu wee bô waa bwee nje Tata.
- 3 Me ε no ɲgayte tɛn ê wo wε wvù looci nu naa wee wɛm ɲgoo lε wo efi kε bokɛnε ban é bó etu diuw mwaɲ. È nu bonyii ε bó ε katɛn wase bee bó yî lemme di

saaka wvù jee wvu ekumε Jisos Klistu le bô bo Kelemen noo bonyii bomew bô bee bó to lemte. Bonyii ban bocii nu ε εdiee εbo nu wase ê ηwa' bonyii bô κηηke nshii wvù meγ lo le.

⁴ Ben eyuukè njoη sekecii no ben nu bonyii bo Tata le. No me ηgay nu ε me mbvuu ηkaase ntuu fó le ben eyuukè njoη.

⁵ Ben eduηçi gee di nyεkeey ê wee tfuu, ekumyì le kefew kè Tata nu ke ekase eto nu wase nceencee.

⁶ Fo ben ebuukè naa lo ekumε fieε fimew κε. Ben ebunleè lo fô fieε ficii le gεele fwe dvu Nyo'. Ben dioo bunlee no biite mwεem mvù ben shieele ê wvù, enyaà keyoone yì mvù wvù gee le.

⁷ É ben gee nonen, é Nyo' emum enya ben nyεkeey we é wvù ecεyεte mvuntelem bô bvufee bvunen no ben nu bonyii bo Klistu Jisos e. Nyεkeey wvun wvù Nyo' nyaa nu ε κε è nulo é wee ekieε kenfewsen kedvu κε.

⁸ Boom bo bwεem e keemεse, mwεem mvù ben κηηke keekpwawci nu mwεem mvù nu mvu keceey bô mwεem mvù κηηke n'wvum, noo mwεem mvù nu leη. Ben ekpwawci mwεem ε è nu mvù yuule bô mwεem mvù bonyii ké no kooηke noo mwεem mvù sem nulo eta wee dvú. É mwεem nu dvú mvù looci jee, é mwεem nu dvú mvù è nulo é bonyii ebensee, é ben no kpwawci ε è nu ekumε mvumwε.

⁹ Ben egeè mwεem biì κε ε è nu n'yεeyi wvù me nto nyae ê ben e, kenεε è nu mwεem mvù ben to yuuke lo ê me, kenεε è nu mvù ben to yene lo. Ben nu dioo gee no nen, é Nyo' wvù gee ε mvuntelem mvu bonyii le nu nyεkeey emum enu ben ε bó.

ε Baul yuw njoη no bonyii bo Filibi duηci shiee fô wvù le

¹⁰ Tata nu ε ge me ε no n'yuuke njoη baay no ben nu ε bvuu ε duηce shiee wene fô me le κε no ben to shee duηci. Me ηkee naa ntay le ben se κηηke κε shiee fô me le, geenen tane ε è nu je.

¹¹ Ke me njemyi nen le me nse ntane fieε κε. Me nu ε n'yεeyi wase ε ηkieε keenfiisene mwεem mvunciim.

¹² Me ηkee no wee ké no nu seke wvù tane, ηkee no wee ké no nu seke wvù κηηke baay. Me ε mum ε n'yεeyi fifin ε ηkieε no è nulo é me enu sekecii yì mwεem e mvunciim kenεε me nu ε ndie, kenεε me mbaa endie, kenεε me ηκηηke baay kenεε me ntane lo.

¹³ Me ηkee keeηge mwεem mvun mvunciim nen, ε è nu bô mvuηgay mvù Klistu nyaa ê me le.

¹⁴ Geenen, no me nciη ηgayte nen, ben nu ε ge naa ntay keefi me yì kefew ke ηgew wem e kin e.

¹⁵ Ben bonyii bo Filibi kee lo le è to nu seke me nto nen'yee woŋ wene le Masedonia no me nto ŋkewee keenfewci saaka wvù jee wvun ê ben, ke kentaashe ke bonyii bo mbee le kemew to nu ε taashe bee bó keetasene can ke. È to mey ke ben.

¹⁶ È to nu naa seke me nto nu Tesalonika, ε ben ciinse nfi ê me, bvuu ciinse.

¹⁷ Ke me njemyi nen le me ntaale le ben eciinseè mwεem ê me ke. Me ntaale baay ε è nu mmawce wvù Nyo' nu ke enya ê ben yî fiε fi ben gee fô me le.

¹⁸ Ben to nu ε tum Ebaflodaytus bô nnya ε wvú to nya ê me. Me ε no nu keseen n'yaa mbvuu ntane fiε ke. Me nto nu ε nfiisen nnya yidvu yicii, n'yen ε yí duule fele lo no me nshieele. Nnya yin nu ncese ε ben ε ge fô Nyo' le, ε wvú ε fiisen, yí ε no samte shfuunƙene ε wvú kooŋke.

¹⁹ Nyo' wεm wvù me mbunlee keŋke ntfu bvukuke bvucii bvù beene shieele, ε wvú nu ke enya ê ben fiε ficii fi ben shieele, njefo beene nu bonyii bo Klistu Jisos e.

²⁰ Mbense enù fô Nyo' Icee wesebeene wvun e sekecii se ŋka. Fí enù nonen.

Ŋgayma

²¹ Ben egay bonyii bocii bô è nu bo Klistu Jisos e enya ê me. Boom bo bwee wesebeene le bô nu bee bó fen gayte ten ben e.

²² E bonyii bocii bô è nu bo Nyo' le jan gayte ben e, efey mvunciim bô nu ê ntow Kaysa le fen.

²³ Tata Jisos Klistu ebuw ben bô kembonen kew é kí efici biyoy binen. Fí enù nonen.

Kolo

Kolo 1

¹ È nu me wvù Baul, waa ntum Klistu Jisos yî ñkoñ wvù wvu Nyo' le. Me nu bee Timatio wvù waa bwee wesebeene.

² Nwa' wvun gene fô ben e boom bo bwee wese le bô nu fitele fimwaan bô bo Klistu, nu bonyii bô è nu bo Nyo' le Kolose. Nyo' Icee wesebeene ebw ben bô kembonen kew ebvuu enya ben bô mvuntelem mvù lætene.

È Baul no bunlee, nyaa keyoone ê Nyo' fô bonyii bo Kolose le

³ Bese dioo bunlee fô ben e sekecii no nyaa ke ε è nu keyoone ê Nyo' wvù Icee Tata wesebeene wvù Jisos Klistu,

⁴ njefo bese nu ε yuw wase ekumε fitele finen fi ben lese yî Klistu Jisos e, bô keñkoñen kè ben keñke fô bonyii bocii bô è nu bo Nyo' le.

⁵ Bese kee læ ben gee nonen njefo ben taale fwe ε è nu yî fiε fi Nyo' nu ε seyse ε gεε ê ben fowe le. È fiε fin nu fi ben to yuwεε wase ê diw Nyo' le yî nu keceey, nu saaka wvù jee.

⁶ Saaka wvun to to fô ben e læñlæn no wvù to toε fô bonyii le yî ekole ke nshε le kecii no kumene nce bonyii bvuu saankene gene fwe fwe. È nu ke læñlæn no fî to kooyεε bô ben ε kew diuu dî ben yuwεε saaka wvudvu bvuu kiεε keceey læ Nyo' nu ε buw bonyii bô keñkoñen kew.

⁷ Ben to yuw saaka wvudvu wvun ê Ebaflas wvù nu fitele fisese, ε bee bó lemte yî fiε le fimwaan. Wvù nu wee lemme Klistu, ε wvù ε jo bvudvuu bvusese ε no lemte bô fitele fiew ficii,

⁸ ε wvù ε see wase ê bese ekumε keñkoñen kè Keyoy ke Nyo' le nu ε nya ben ε no keñke fô bonyii le.

⁹ È kew diuu dî bese yuwεε ekumε ben nonen, bese ε mum ε no bunlee fô ben e sekecii. Bese bunlee læke læ Nyo' ege é ben ekiε fiε fi wvù gomte. È fifin nu ke efey yî bvufee bô mwεem mvù Keyoy kew nu ε ge ben ε no kee le.

¹⁰ Nonen é ben emum ecee nce ε è nu wvù nu ε kpwenten wvu bonyii bo Tata le. È è nu wvù, wvù wvù looci koonke. É ben dioo cee nonen emum egee dilemme dî jee jé le jé le, ekeè Nyo' gene fwe fwe.

¹¹ Bese bunlee ten læ Nyo' wvù mvuñgay mvu baay mvunciim nu mwew enya ben bô mvuñgay mvunciim é ben etemyi sekecii, kuule shém gene fwe yî fiε le ficii, læñlæn,

¹² nyaa keyoone ê Nyo' Ice. È nu wvù wvù nu ε ge beene ε kocen keeke ekeñke fiε fi wvù nu ε seyse ε gεε ê bonyii bô è nu bew fô bvudvuu bvu n'yuule.

13 Wvú nu ε bvuse wase beene can mvungay mvu ejiwε le, ε gee ente jo bvunfon bvú Waa we wvù nu fitele fiew e.

14 È nu Waa we wvun wvù nu ε ge Nyo' ε læshe bibefe bisεεbeene, ε sum beene can ηgew e.

Klistu nu εkolε ke mwεem mvunciim e

15 Waa we wvun nu naa lo wunte Nyo' kebεε wvù beene yaa yene ke. È nu wvú nsafwe mwεem mvunciim mvù bó bomεε.

16 Nyo' to bom mwεem mvunciim can ye le, mwεem mvu fowe bô mvu fokuse, mvù bó yene mvú le, bô mvù bó yaa yene ke, kenεε è nu naa bonceendaa bô la, bô lene ê fwefwe le, kenεε bô kenke mvungay, kenεε bo baay baay, kenεε bô saake. Mwεem mvun mvunciim nu ε Nyo' to bom can ye le, ε mvú nu keewvumte wvú.

17 Wvú to nu wase dvú ε mwεem mvunciim se ke no nu. Mwεem mvunciim nu can ye le, ε è jici wvú dvú ε mvú se nu.

18 Wvú nu εkolε ke kentaashe ke bonyii bo mbee le kè è nu ye ye. È nu wvú wvù to kewεε kentaashe kin. Ε è nu wvú wee wvu fwe keebuy yî kpwe le wvù yaa bεε ke ekpwe ke, wvu le yî fiεε ficii le é wvú enù nsafwe.

19 Mwεem mvun nu nonen njefo Nyo' to nu ε koη le fiεε fi wen nu fí ficii enù yî Waa we le,

20 é wvú ege é mwεem mvunciim ekase etaashe bô Nyo', kenεε è nu mvu fowe kenεε mvu fokuse. Ε Nyo' mum ge keman bô εleme ke Waa we le seke wvú to kpweε yî kentam e.

21 Ben ten to shee nu ε ben ε gawsen ben ε bo Nyo', kenke boηkpawcε bô befe ekumε wvú, gee mwεem mvù befe.

22 Geenen, keseen nu ε Nyo' ε kase wase ε taashe ben ε bó. Wvú to ge fifin fele yî Waa we le wvù to tue wee wvu wum, to kpwe fô ben e, wvu le ben enù ê wvú fwe yuule yaa kenke nlom ke, nu se jay.

23 Ben kenke keemum egenè fwe yî fitele fi ben lese yî ye le, ecime geη eleemè temyi ε fiεε yaa shiike ke ben yî fiεε fi ben taale fwe yî dvú le fi ben to yuwεε ê saaka wvù jee le. Saaka wvù jee wvudvu wvun nu wvù bó nu ε fewcε wase ê wee tfuu yî nshe le fen. Ε saaka wvudvu wvun nu wvù me wvù Baul nfewci ê bonyii diεwε wee lemme Nyo' le.

Lemme di Nyo' to nyae ê Baul

24 Me nlanlanε keseen yî ηgew wεm wvù me n'yene nje yene le. Ε me njoo ηgew wvun yî εkolε kem e nen keemεε ηgew wvù Klistu to yεnεε nje kentaashe ke bonyii bo mbee le kè è nu ye ye.

25 Nyo' nu ε gee me le me enlemtè fô kentaashe ke bonyii bo mbee le, enfewci diεw ye ê ben no yí nu yicii.

²⁶ Diɛw yin nu yì to shee nu ε bó ε nyilɛ ê ɛngokɛ ke bonyii le kecii bilum ŋkuun, ε keseen nu ε Nyo' ε duŋɛ wase ê bonyii bò è nu bew.

²⁷ Nyo' to nu ε caw keege é bonyii bew ban ekieɛ le bonyii bò yaa nu ke Bojuu nu ke ekɛŋke bvukuke bvu saaka wvù bó to shee nyile wvun e naa ntay. E saaka wvudvu wvun nu le Klistu nu yì yene le. Nonɛn ben ε mum ε no taale fwe keekɛŋke bvukuke.

²⁸ È nu Klistu wvudvu wvun wvù bese fewci ɛkumɛ wvú ê bonyii bocii. Bese yɛɛyi bó bô bvufee bvucii bvù Nyo' nyaa ê bese, bvuu teete bó, wvu le bó enù ε bó ε taw ε kocɛn ê Nyo' ejise no bonyii bo Klistu le kɛŋke keenu.

²⁹ È nɛɛ fiɛɛ fi me mbone ŋaŋ, nlemte bô mvuŋgay mvunciim mvù Klistu lemte dvú yì yem e.

Kolo 2

¹ Me ε mum ε no ŋgomte le me ɛŋge é ben bo Kolose ekieɛ no me nlumte naa ntay nje yene, bô nje bonyii bo Lawdɛsia noo bonyii bo mbee le bocii bò ke baa yen wase me le ejise ke.

² Me ŋgee nonɛn le mvuntelem mvu ben ε bó le eyvuwsè, é ben etaashe enu yì kɛŋkoŋɛn e, wvu le ben elooci kee naa ntay mwɛɛm mvunciim no wee kɛŋke keeke, emum ekeè tɛn kenylɛ ke Nyo' le, kè è nu Klistu.

³ Nyo' nu ε nyilɛ ntfu bvufee bvucii bô mwɛɛm mvù bonyii kɛŋke keekeè ɛkumɛ wvú ε è nu yì Klistu le.

⁴ Me njemyi fin wvu le fo wee mvu ke enɛ eto bô njeme wvù yeke wvu fomvu fomvu elɛɛ ben dvú.

⁵ Ben ekeè le naa no me nɛim nu ncejole nɛn nu ε me nu beene ê keyoy e. E me laŋlaŋe no me n'yuuke no ben gee mwɛɛm ê je yi laŋ e, ε ben ε lese fitele yì Klistu le ε fí tɛmyi ntay.

Bonyii bo Klistu le nu ε boy wase can bonci bo ɛcici le

⁶ No ben nu ε fiisen wase Klistu Jisos wvù Tata, ben emum eleemè ke yì ye le nonɛn.

⁷ Ben ecime gɛŋ ekuù yì ye le, eleemè tɛmyi yì mbee wene le ke laŋlaŋe no bó to yɛɛyɛ ben, enyaà keyoone ê Nyo' sekecii.

⁸ Ben eyenè fo wee ke ejo bvufee bvu ɛcici bvu fokuse fɛn bvu kenlɛɛma le enjim ben dvú é ben etu bonfaw ke. Bvufee bvun nu bvù bii bonkpawɛɛ bo wee wvu wum bô bo mwɛɛm mvù saake yì woŋ wvun e. Ke è yaa nu bvù bii bonkpawɛɛ bo Klistu le ke.

⁹ Ben ekeè le no Klistu to tuɛ wee wvu wum, nu ε fiɛɛ fi Nyo' nu fí ficii nu yì ye le.

- 10** Ben nu ε κηηκε wase mwεem mvunciim no ben nu ε taashe ben ε bo Klistu. È nu wvù ekole ke mwεem mvunciim mvù κηηκε mvuηgay saake le.
- 11** No ben ε bó to taasheε nonen, ε wvù tfuse ben yew. Ε κε ntfuse yew wvun nu wvù bó tfusee bô can seke bó ε sum kejewlεε ke ye wee le κε. Wvuwwun nu wvù è gee Klistu keesum nyam yene ye kebefε.
- 12** Seke bó to lesεε ben ê joo nu ε bó to taashe ben ε bo Klistu dwey. Ε Nyo' kase bvuse ten ben nje fitele fi ben to lesεε yî ye le le wvù nulo ebvuse ten ben yî kpwe le bô mvuηgay mvù wvù to bvuseε Klistu dvù yî kpwe le.
- 13** Ben to shee nu ε ben ε kpwe wase ê keyoy e nje bonci bo Nyo' le bô ben to ηgoyte ε Klistu baa tfuse wase ten ben yew keesum mwεem mvù nyam ye yene gomte le κε. Keseen, Nyo' nu ε ge wase ben ε kase ε tu dvù, ε taashe ben ε bo Klistu. Wvù nu ε læshe wase bibefe bisεεbeene bicii.
- 14** Wvù nu ε fiwse wase mwεem mvù to koole beene ê ηwa' bonci le ε bó saηke ekume beene. Wvù nu ε jo mwεem mvudvu mvun ε tfuse yî Klistu le, bó ε mum ε ta wvù yî kentam e,
- 15** wvù ε mum ε ηgoy mvuηgay mvu mwεem mvunciim mvù κηηκε mvuηgay saake le, ε bvuse mvù ya le, ε shoose, ε mum ε so mvù yî kentam e.

Bonyii bo Klistu le eyuukè ε è nu fiεε fi è gayte wvù

- 16** Nonen, fo ben ebvuu ebee é wee mvu esaake ben ekume mwεem mvù ben diee kenεε mvù ben wuu kenεε le ben baa egεεle boηkaw, kenεε è nu ηkaw kpwee wvu fwe, kenεε le ben baa eshee mbam κε.
- 17** Bó to shee gee mwεem mvun fwele ε mvù nu κε lo diewe kenjinjijη ke fiεε fi to nu keeke to le, ε fiεε fidvu keβεε nu Klistu.
- 18** Fo ben ebee é bonyii bomew esaake ben duu le ben nu ε jay je κε. Bonyii ban nu bô duu le ben ejod bikuu binen ekuse no bó joo, duu le ben ebunleè ten bonceendaa bo Nyo' le no bó bunlee. Bó duu le bó kee mwεem njefo bó yene mwεem e ê bifile le. Ε bó bensee κε ε è nu ye yî mwεem mvù too εfa jobo le, ε kenyi kedvu yaa nu κε.
- 19** Boba bonyii nu ε gawsen wase bô bo ekole kè è nu Klistu. Klistu nu wvù nyaa mvuηgay ê ye ye ε yî se kuu no Nyo' seyse le yî ekuù. Beene nu ε taashe κε diewe no ye wee nu ε taashe yî biyuη bô boηgeηsee le ε se no lemte leη.
- 20** No ben nu ε kpwe wase ben ε bo Klistu ê keba ke mwεem mvù saake yî woη wvun e, ε no nu nje la wvù ben bvuu cee κε diewe ben nu bonyii bo yî woη wvun e? Ben bvuu beηe keebii ban bonci le nje la?
- 21** Bó nen'yi cew lo le, “Fo wee ejice fin fiεε le κε. Fo wee emom fifi εmvu κε. Fo wee ekum fin e κε.”

22 Ɛ mwɛɛm mvun mvunciim nu ɛ bonyii gee ɛ mvú fele lo, ɛ bonci ban nu ɛ è geke bonyii bii bvufee bvubole.

23 Bonyii nen'yi no yene naa le bvufee nu ê bonci bodvu ban e, no bó gee le bonyii ekeè keebunlee ê je yi leŋ e, bô keeshiwse ekole noo keenyewle bô ye. Geenɛn, ɛ mwɛɛm mvun yaa nulo efice keebvuse wee ê mwɛɛm mvù nyam ye ye shieele le ke.

Kolo 3

Bonyii bo Klistu le keŋke nshii wvu fwɛ

1 No Nyo' to nu ɛ bvuse wase ben ɛ bo Klistu yî kpwe le, ben emum egomte mwɛɛm ɛ è nu mvu fowe fô Klistu nu ɛ Nyo' ɛ shike wvú ê ebo kew ke eceey e.

2 Ben egɛɛ bvufee bvunen yî mwɛɛm mvu fowe le. Fo ben egɛɛ yî mvu fokuse le ke,

3 njefo ben to nu ɛ kpwe wase, ɛ nshii wene nu keseen ɛ Nyo' ɛ nyile yî Klistu le wvù nu bô wvú.

4 Seke Klistu wvù nu nshii wene ɛ ke ɛ buynɛn bô bvukuke bwew, é ben ten emum ebuynɛn ente jo bvukuke bvudvu.

5 Fí ɛ mum ɛ no nu le, ben elɛse lo mwɛɛm diɛwɛ mvun e mvù nyam ye shieele. Ê nu keejaanke kenjaŋ bô keekpwawci mwɛɛm ekumɛ kenjaŋ, noo ye yî ŋeyɛɛn, noo keeshieele keegɛ mwɛɛm mvù befe, noo keebvuushi ejise yî mwɛɛm e. Wee wvù bvuuushi ejise yî mwɛɛm e nu ɛ mwɛɛm mvun ɛ tu wase nyo' mvu fô wvú le.

6 Ê nu kfuu mvumvun mwɛɛm mvù nu ke ege é Nyo' eton'ye shém elañ ŋgɛw yî bonyii bô gee mvú le.

7 Ê to nu fwele ɛ ben gee kfuu mvumwɛ mwɛɛm seke ben to bæe cee nce bii no nyam ye shieele.

8 Geenɛn keseen, ben keŋke keecine mvú le mvunciim. Ben ecine shém yî ton'yɛɛn bô mvuntelem mvù sɛsene noo mvuntelem mvù befe le. Fo wee ebeetè bô diee di wee le ke. Fo njeme wvù samte ebuytè diuw wee le ke.

9 Fo wee elɛlè waa bwee ke. Ben ekeè le ben nu ɛ baa wase ye yi yvum bô gee diew,

10 ɛ jo wase ɛ è nu yi fie. Yiyin nu ɛ Nyo' seysee sekecii kumene ɛ yí tuu diɛwɛ ye le, wvu le ben elooci kee wvú.

11 Fofɛn nu ɛ wee mvu yaa bvuu nu jɛɛy fô mvu le ke. Ke wee mvu bvuu nu dvú le è nu wee Juu ɛ mvu nu wee Glek ke. Ke wee mvu nu dvú le bó nu ɛ tfuse yew ɛ mvu nu ntffuse ke. Ke wee mvu nu dvú le è nu wvu entfun ke. Ɛ ke wee mvu nu dvú le è nu nyam yi ŋkpwaante ke. Ke wee mvu nu dvú le è nu nƿwa ɛ mvu nu waa yew ke. Klistu nu fieɛ ficii fô bó le, ɛ wvú nu yî bó le bocii.

- 12** No Nyo' nu ε caw wase ben, ben ε no nu bonyii bew, ε wvú koonke ben, ben emum ejo kenke ke læη kè læ: wee ecamtè shen fô waa bwee le, geè mwεem mvù jee fô bonyii le, shiwsè bikuu binen, nù wεε, kuulè shém,
- 13** yaa kenke fitele fi sēsene κε. É wee cim ge naa la fí ε luce wee, é wvú læshε nya ê wvú. No Tata nu ε læshε wase binen bibefε, ben ten elæshì bi bonyii bomew e.
- 14** Ben dioo gee mwεem mvun mvunciim, no tomyi kenkonen fwe. Kenkonen nu fiεε fi taashi mwεem mvunciim ε mvú sε nu yî fiεε le fimwaaη.
- 15** Ben ecinε é nyεkeey wvù nen'yi fô Klistu le enu ê mvuntelem mvunen e duñci ben je. Nyεkeey wvun nu naa wvù Nyo' to tenεε ben læ ben ekenkè no ben nu ye yimiaaη. Ben enyaà ten keyoone ê Nyo' sekecii.
- 16** Ben egεε é saaka wvu ekumε Klistu enù ê mvuntelem mvunen e naa ntay, é ben eyεyi bvuu teete bikuu binen bô bvufee bvucii. Ben eyemtè benseè Nyo' bô njoη fô mvuntelem mvunen e bô bonkiee bô buyte ê Nwa' Mbense le noo bonkiee bomew bo mbense le, noo bô Keyoy kew nyaa ê bonyii.
- 17** Ben dioo gee fiεε ficii fi ben gee, kenεε ben jemyi lo, ε ben no gee diεwε bonyii bo Tata Jisos e, nyaà keyoone ê Nyo' Ice fele yî ye le.

No bonyii bo Klistu le nulo ecee yéw yibole

- 18** Bokεε, ben enyaà bikuu binen ê bole' bonen no bonyii bo Tata Jisos e ké no gee.
- 19** Bolemsε, ben ekoonkè bokε' bonen. Fo ben enasene yî bó le κε.
- 20** Boom, ben eyuukè bobwee bonen bô bo'icee bonen e yî fiεε ficii le. É ben gee nonen, é fí ejee Tata le.
- 21** Bocee boom, fo ben egee mwεem mvù mvuntelem mvu boom bonen e esaase κε. É ben gee lo, é shem ekpwee bó.
- 22** Bonfaw ben eyuukè bonyii bô kenke ben fokuse fεn e yî fiεε le ficii. Fo ben elemtè bó le κε seke jise dibole nu yî yene le keegeε læ ye ejee bó κε. Geenεn, ben elemtè bô fitele fimwaaη, fanè ε è nu Tata.
- 23** Wee dioo lemte fiεε ficii fi wvú lemte, no lemte bô fitele fiew ficii le wen lemte ε è nu Tata le ε è yaa nu wee le κε.
- 24** Ben ekeè læ wee nu ke ekenkε fiεε fi bó nu ε seyse ε gεε fi è nu mmawcε we ε è nu ê Tata. È nu Tata Klistu wvù ben lemte wvú le.
- 25** Geenεn, fô bonyii bô gee kebefε le nu ε Nyo' nu ke elaw bó yî kebefε kè bó gee le. Ben ekeè læ ke Nyo' ké no duñci kejεey jεey ê bonyii κε.

Kolo 4

¹ Ben bò kẹ̀kẹ̀ bonfaw, ben egeè mwεem bô bó ε è nu mvu lẹ̀ bô mvù jee, ekumyì le ben kẹ̀kẹ̀ tẹ̀n Cee Ekolẹ̀ fowe.

Ntefe wvu fokemεse

² Ben bocii ebunleè gene fwe yaa doose κε. Ben dioo bunlee no leesè bvufee yí dvù le, nyaà keyoone ê Nyo'.

³ Ben ebunleè fô bese le tẹ̀n le Nyo' eyene kembuɲ fô diew ye le é bese efewci diew yin yì è nu kenyilẹ̀ ke ekumε Klistu kè me nu yí ncaw e nje kí.

⁴ Ben ebunleè le me enlooci nfewci ε wvù yuule ntay no me ηkẹ̀kẹ̀ keenfewci.

⁵ Ben dioo nu ben ε bonyii bò yaa nu κε bo mbee le no gee mwεem bô bvufee. Seke ben ε kẹ̀kẹ̀ je keege fiεε, ε ben mom le fo kefew kedvu efey εcici κε.

⁶ Njeme wene sekēcii enù wvù bonene, yeke diewe ηkauw e, é ben emum ekee keetfuuse fiεε ê wee tfuu ê je yi lẹ̀n e.

Bongayma

⁷ Tikikus nu esee fiεε ficii fi ekumε me ê ben. Wvù nu waa bwee wesebeene, nu tẹ̀n fitele fiεεbeene. Bee bó lemte Tata le yí wee le mwaan ε wvù nu wee lemme wvù lemte bô fitele fiεε ficii.

⁸ Me ntumte wvù fô ben e bô shiee wvu le wvù eto ege é ben ekiεε no bese nu, ebvuu eyvuwse mvuntelem mvunεn.

⁹ Me ntumte bô Onesimus wvù nu wee mvu wvu jo ben, ε wvù nu tẹ̀n waa bwee wesebeene wvù nu fitele fiεεbeene ε wvù leeme yí fiεε fi Klistu le temyi. Bó nu ke esee ê ben fiεε ficii fi kooyi fεn.

¹⁰ Alistakus wvù bee wvù nu fεn yew ncaw e gayte ben e. E Mak wvù waycee Banaban gayte tẹ̀n ben e. È nu wvù wvù ben nu ε kẹ̀kẹ̀ wase ntum ekumε wvù. Seke wvù ε to, ε ben fiisen wvù.

¹¹ Jisos wvù bó teɲe le Justus gayte tẹ̀n ben e. È mεy κε bonyii bo botete ban bò è nu Bojuu bò bee bó lemte yí fiεε le fimwaan yí bvunfon bvù Nyo' le. Bó fici naa me baay, gee ε fitele fiem lεetene.

¹² Ebaflas wvù nu tẹ̀n wee mvu wvu jo ben, wvù lemte Klistu Jisos e gayte tẹ̀n ben e. Wvù dioo bunlee sekēcii no kumyi ben naa baay, lẹ̀ke le Nyo' ege é ben eleemè temyi diewe bonyii bò nu ε taw wase, looci kee fiεε ficii fi Nyo' gomte le.

¹³ Me nu ε n'yεn wase bô εjise eyem le wvù lemte fô ben e baay noo fô bonyii bo Lawdesia bô bo 'Iliabolis e.

¹⁴ Luk wvù cuuke bonyii wvù nu nsaa yem shém bô Demas gayte tẹ̀n ben e.

¹⁵ Ben egay boom bo bwee wesebeene le bo mbee le bo Lawdesia le, egay tẹ̀n Nimfa bô kentaashe ke bonyii bo mbee le kè taashi ê wvù yew e, enya ê me.

- 16 Ben dioo ε taη ηwa' wvun, ciinse ê kentaashe ke bonyii bo mbee le ke Lawdesia ε bó taη ten, mum yen ten le bó nu ε ciinse ηwa' wvù nu ê bó ben ε taη.
- 17 Ben egay ê Alkibus le wvú eyen le wvú nu ε mese lemme di Tata nu ε nya can ye le.
- 18 Wvun ngayma saanke me wvù Baul bô kebo kem. Ben ekumyi le me nu yi ncaw e. Nyo' ebuw ben bô kembonen.

1Tes

1Tes 1

1 È nu me wvù Baul, ε me nu bee Silas noo Timatio. Me nsaan̄ke ɲwa' wvun fô kentaashε ke bonyii bo mbee le ke Tesalonika le kè nu ε taashe ε no nu yî Nyo' Ice bô Tata Jisos Klistu le. Mbuwma Nyo' bô nyεkeey enù fô ben e.

ε Baul nya keyoone ε Nyo' yî kentaashε ke bonyii bo mbee le ke Tesalonika le

2 Bese ké no nyaa keyoone ε Nyo' sekecii εkumε ben bocii, bene ben sekecii ε bunle yese le.

3 Seke bese nu ε Nyo' Icee wesebeene fwe, bese ké no kumyi gee dinen dî buyte yî fitele fi ben lese yî Klistu le bô lemme dinen dî buyte yî ken̄konen kenen e noo shém yî ben kuule yî buyte yî ntaa wvù ben taale fwe yî Tata wesebeene wvù Jisos Klistu le.

4 Boom bo bwee wese le bô Nyo' koon̄ke, bese kee lo le Nyo' nu ε caw wase ben.

5 Bese kee nonen njefo ke saaka wvù jee wvù bese to toε dvú fô ben e to to ke ε è nu bô njeme maan̄ ke. Wvú to to ten bô mvun̄gay mvù nen'yi fô Keyoy ke Yuule le, ε bese looci kee lo le saaka wvudvu nu keceey. Ben kee kfuu bonyii bô è to nu bese seke bese to cee ε ben enteleɲ nje ben.

6 Ben to nu ε no beɲene bese noo Tata njefo ben to nu ε fiisen saaka wvudvu bô nlan̄lan̄ wvù nen'yi fô Keyoy ke Yuule le naa no ben cim to nu yî ɲgew wvu baay e.

7 Nonen ε ben mum tu bonyii bô bonyii bo mbee le bocii bo ε keba kè Masedonia le noo kè Akεya le ejoð kenfewsɛn fô bó le.

8 Me njemyi nen njefo ke è mey ke diew yî yi Tata yî nu ε san jo ben ε ghan keba kè Masedonia bô kè Akεya le ke. Saaka wvu εkumε fitele finen fi ben lese yî Nyo' le nu ε ghan wase ten mondvuum e monciim. Nonen ke shiee bvuu nu dvú wvù bese ejemyi fiεε εkumε fifiε ke.

9 Ben ekeè le bonyii bodvu kebεε nu ε no seɲε εkumε no ben to fiisenεε bese ε ben enteleɲ, noo no ben to cin'yεε mvunyo' le tu wase ben ε bo Nyo' keelemte wase Nyo' wvu keceey wvù ken̄ke nshii le.

10 Bó seɲε ten no ben ceyte Waa we wvù nu ke enε fowe eto le. Waa we wvun nu wvù wvú to bvuseε yî kpwe le, ε è nu Jisos wvù bvuisse beene can shém Nyo' yî ffuuke yî wvú nu ke eduɲce ε bonyii le.

1Tes 2

ε Baul jeme εkumε lemme diew di Tesalonika

1 Boom bo bwee wese le, ben kebεε kee lo le ke ghane dî bese to laalεε ε ben e to nu ε la εcici ke.

- ² Naa no ben kee le bonyii to nu ε nya ηgew ê bese bvuu nvuwse bese ê kelaante kè Filibi le, nu ε bese to kuu ke shém ê mvunḡay mvu Nyo' wese le keefewce saaka wvù jee wvù wvu Nyo' ê ben naa no bonyii cim to cile bese naa baay nen.
- ³ Ke saaka wvù bese to fewci lèke ben dvú to nu bô jay ke, ε ke bese to fewci bô ηkpawawce mvu wvù befe kenεε gomte keeεε lo ben ke.
- ⁴ Geenεn no Nyo' nu ε yen le bese nu ε kocεn bonyii bô wvú enya saaka wvù jee wvun can yibole, nonεn bese ε mum ε no fewci. E bese yaa fewci le ye ejeè ε è nu bonyii ke. Bese fewci le ye ejeè ε è nu Nyo' wvù taasse mvuntelem mvusεse.
- ⁵ No ben kee nu ε bese to baa ke yuu wase etoo bô díεw ken'yem kenεε tεw fiεε fojise keedie fiεε can yene le ke. E fin nu fiεε ε Nyo' leeme fwe wese.
- ⁶ Ke bese to baa egomte keekεηke mbense mvu ê wee kenεε wvù nen'yi fô ben e kenεε fô bonyii bomew e ke. Naa ε è to nu bvudvuu bvusεse diεwε boom bo ntum e bo Klistu le keebiite mwεem le ben egeè fô bese le.
- ⁷ Bese to nu fisεse nyεkeey ê ben εntelεη diεwε bwee wan wvù taale fô boom bew e.
- ⁸ Nonεn ε bese mum jo ben ye le naa ntaη bô keηkoηεn, nya ben ε è yaa mεy ke bô saaka wvù jee wvù wvu Nyo' maan ke, geenεn nya ten bikuu bisεse ê ben njefo ben to nu wa lo mvuntelem mvusεse naa baay.
- ⁹ Boom bo bwee wese le, ke ben kumyi ten lemme disεse bô njimten wese. Bese to lemte εntaη bô εmvunsheεη wvu le fo bese egεε bvujite yí wee mvu ben e no bese to fewci saaka wvù jee wvù wvu Nyo' ê ben ke.
- ¹⁰ Ben kebεε naa noo Nyo' nulo eben jim nsaw wese le nce wese fô ben bonyii bo mbee le to nu wvù yuule nu teyney yaa keηke nlom yimi ke.
- ¹¹ Ben kee ten no bese to gee bô ben diεwε no cee wan ké no gee bô boom bew.
- ¹² Bese to yvwuse mvuntelem mvunεn, lowci ben, tomsee le ben eceè nce ε è nu wvù Nyo' gomte. È nu Nyo' wvù teηε ben le ben eley bvunfon bwew bô bvukuke bwew e.
- ¹³ Bese shee ke ten nyaa keyoone ê Nyo' nje fin fi le seke bese to toε bô diεw Nyo' fô ben e, ben to nu ε fiisen diεw yidvu no yí looci nu le è nu diεw Nyo' ε è yaa nu diεw wee ke. E è nu yí yì lemte yí yene le, ben bô nu bonyii bo mbee le.
- ¹⁴ Ben kee boom bo bwee wese le le fiεε fi to kooyεε bô bintaashε bi bonyii bo mbee le bi Nyo' le bì nu ε bee Klistu Jisos e ê keba kè Judea le to nu ε kooy ten bô ben. Ben to nu ε yen ten boηgew can bonyii bonεn bo woη e leηleη no bó to yenεε can Bojuu bobole.
- ¹⁵ Bojuu ban nu bô to yuε Tata Jisos. E è nu bó bô to yuwyi bonyii bo ntum Nyo' le. È nu bó bô to kuηεε bese jo bó. Bó gee nonεn ε Nyo' yaa yuuke njoη bô bó ke. Bó bane lo bonyii bocii,

¹⁶ no bó baan̄ke je fô bese le keejemyi ê bonyii bò yaa nu ke Bojuu wvu le bó eboy e. Bó gee nonen sekecii ε bibefe bibole yiñsene bene. Shém Nyo' yì ffluuke nu ε to wase yî bó le keseen.

ε Baul no keñke shiee keebvuu eyen bonyii bo mbee le bo Tεsalonika le

¹⁷ Boom bo bwee wese le, no beene se gawsenεε nu ε bese ε mom wase naa baay keñke shiee le bese bee eyen ben e ejise naa no è cim bæε ke kefew caan no beene se gawsenεε. Beene nu ε gawsen ke ε è nu ejise. Beene baa gawsen ê fitele le ke.

¹⁸ Bese gomte keekase eto ê ben e. Me wvù Baul ke bæε nu ε mom wase naa bokan̄ e bokan̄ e, geenen ε Satan jewsee ke bese.

¹⁹ Bese keñke shiee nonen njefo fiεε fi è nulo é bese etaale fwe yî dvú le, kenεε bvujon̄ke bvusese bô kefo kesese ke bvunfon e kè bese nu ke esaale ye dvú fwe dvu Tata wesebeene wvù Jisos seke wvú ε kase ε to bvuu nu la? Ke è nu ben e?

²⁰ È nu naa ben bvuwee bvusese bô bvujon̄ke bvusese.

1Tεs 3

¹ Nonen no bese to yanεε le fí nu ε ghaw wase, ε bese cu ntay keeshεε ejim Aten bese embeñ,

² mum tum Timatio wvù waa bwee wesebeene wvù bee bó lemte Nyo' le yî saaka wvù jee wvu ekumε Klistu le. Bese to tum le wvú eto eleke ben yî mbee wene le ntay, ebvuu etefe ben,

³ le fo bon̄gew ban ke eshiw wee mvu ben e ke. Ben ke bæε kee lo le bon̄gew nu wase fiεε fiεεbeene.

⁴ Ben kee lo le seke bese to nu beene nu ε bese to see ê ben ε è bæε lo le beene nu ke eyene bon̄gew. ε è nu ke naa len̄len̄ no fí nu ε kooy wase ε ben kee.

⁵ È nεε fiεε fi to gee ε me ñke ndioo n'yan le fí nu ε ghaw wase, ε me mum ntum Timatio keen̄kiεε no mbee wene nu, njefo me nto ñken̄ke nfan le è nelo enu ε wee we wvù momte bonyii ε mom wase ben ε ge lemme dicii di bese lem fô ben e ε tu di εcici.

ε Timatio nya saaka ekumε mbee bonyii bo Tεsalonika

⁶ Geen̄en keseen nu ε Timatio ε to wase ê ben e ε kase ε tu jim fô bese le, ε see saaka wvù jee wvu ekumε fitele fi ben lese yî Klistu le bô no ben dun̄ci keñkon̄en fô bonyii le. Wvú nu ε see ten no ben kumyi bese naa ntay bvuu keñke shiee keeyen bese le no bese keñke ten shiee keeyen ben e.

⁷ Nje fin̄ boom bo bwee wese le, yî nsase bô bon̄gew bò bese keñke le nu ε shém ε læten bese ekumε ben baay nje fitele fi ben lese yî Klistu le.

⁸ Keseen nu ε bese ε yoy nje ben leeme ke temyi ben ε bo Tata.

⁹Nonen bese ε no nyaa keyoone ê Nyo' baay nje ben. Bese nyaa keyoone ê Nyo' nje njon wvù bese yuuke fwe dvu wvù nje ben.

¹⁰Bese bunlee shiee le entañ bô emvunsheeh le è nelo é bese ebvuu eyen ben e ejise wvu le bese enya ben bô fiεε fi bæε fuute yî mbee wene le.

¹¹Bese bunlee le Nyo' Icee wesebeene kebεε bô Tata wesebeene wvù Jisos eyene je é bese eto ê ben e.

¹²Bese bunlee ten le Tata ege é keηkoηen kenen eku egen fwe é ben ekoηenè bikuu binen bô bonyii bocii leηleη no bese kooηke ben.

¹³Bese bunlee nonen wvu le wvù ege é mvuntelem mvunen etemyi, é ben ke enu se jay, yuule fwe dvu Nyo' Icee wesebeene seke Tata wesebeene wvù Jisos too bô ηgoo ye yicii.

1Tes 4

Nce wvù Nyo' kooηke

¹Keemεεse boom bo bwee wese le, bese lεke ben kule lo can diεwε bonyii bô nu ε taashe yî Tata Jisos e, le no ben to γεεγεε ê bese no ben keηke keεcee no Nyo' kooηke, ε è nu ke naa wase no ben cee keseen, ben egeè ke nonen gene lo fwe fwe.

²Ben kee wase bontefe bô bese to nyae ê ben ê mvuηgay mvu Tata Jisos e.

³Fiεε fi Nyo' kooηke nu le ben eceè diεwε bonyii bô è nu bo Nyo' le. Fo ben ejaan̄kè kenjaη ke.

⁴Wee mwaan̄ mwaan̄ ben e keηke keεkee keejici ye ye le ê je yì yuule keηke n'wvum e.

⁵Fo ye wee enù ke lo yvuwse, ηeyte diεwε yi wee ketum kè yaa kee ke Nyo' ke le.

⁶Fo wee ege kebefe kenεε ege jay mvu bô waa bwee yî saaka wvudvu wvun e ke. Bese to nu ε jeme wase ciise lo ê ben ε è bæε lo le Tata nu ke elañ ηgew yî bonyii bô gee mwεem mvun mvunciim e.

⁷Ben ekeè le ke Nyo' to teηe beene le beene eceè ε è nu nce nnyen ke. Wvù to teηe le beene eceè nce wvù yuule.

⁸Fí ε mum ε no nu le naa γεε wvù tun keeyuw ntefe wvun e nu ε ke wvù tun keeyuw ε è nu wee wvu wum e ke. Wvù tun keeyuw ε è nu Nyo' wvù nyaa Keyoy kew ke Yuule ê ben e.

⁹Fi εκumε keηkoηen kè ben ekeηkè fô boom bo bwee wene le bo mbee le nu ε ke shiee nu dvù fô ben e wvù bó ebvuu esaan̄ke εκumε fifie ê ben ke. Fifi nu fiεε ε ben kebεε nu ε Nyo' to γεεyi wase ben no è nulo é ben ekoηenè bikuu binen.

10 Yî keceey e, ben koonke naa wase boom bo bwee wene le bocii bo ê keba kè Masedonia le. Geen en boom bo bwee wese le, bese bvuu teete ke ben le ben egeè ke nonen gene lo fwe fwe.

11 Shiee wene baay enù ε è nu keecee nce wvu nyεkeey, yaa leese ke diuw fô mwεem mvu bonyii le ke. Ben elemtè bô can yene no bese to teetε ben.

12 Nonen é bonyii bo ekfuη emum enyaa n'wvum ê ben, ben saa ebvuu etaale wee mvu yî fiεε le ke.

Ekumε kefew kè Tata nu ke ekase eto le

13 Boom bo bwee wese le, ke bese gomte le ben enu kenjiwe le ekumε bonyii bô nu ε kpweken wase ke. Bese gomte le ben ekiεε wvu le fo ben enu yii yii diewe bonyii bô yaa taale ke fwe yî fiεε le ke.

14 Beene nu ε bee le Jisos to nu ε kpwe kase buy yî kpwe le, ε è nu ke lenlen no Nyo' nu ke ekase etfuse jim bonyii bô to kpwekene ε bó ε taashe bô bo Jisos, é bó ke enu bô wvú.

15 Bese jemyi fin bii ε è nu diew Tata le, le ke beene bô nu ε shεε ejim bô nu ke ebεε dvú yî kefew kè Tata nu ke etoo le nu ke esa fwe dvu bonyii bô nu ε kpweken wase ke.

16 Ben ekeè le Tata kebεε nu ke enε fowe eshiile too wamte foweεwe bô diew yi temyi, ε ekole ke bonceendaa bo Nyo' le fuuηke ten, ε soη Nyo' jemyi. É bonyii bô to kpwekene ε bó ε taashe wase bô bo Klistu emum eyaw ebuy.

17 Nonen é Nyo' emum ecun beene bô nu ε shεε bô bεε dvú noo bó ntaashe le ê kembew e keegen etasen beene bo Tata ê kebulε le. É beene bo Tata ke emum enu sekecii.

18 Nonen ben emum elεεsè fitele fi wee noo wee le bô njeme wvun.

1Tes 5

No è nulo é wee ecεyte nto Tata

1 Boom bo bwee wese le, ekumε kefew bô diuu di nto Tata le nu ε ke shiee nu dvú fô ben e wvù bó esaηkè fifie ê ben ke.

2 Ben kebεε kee lo le diuu di nto Tata le nu ke enu diewe di cooη e entaη.

3 Bonyii nu ke edioo duu le, “Nyεkeey nu dvú, ε fiεε fi wee efanè yaa nu ke”, é ηgew emum enε esεε egbwe yî bó le diewe no lume ke ne to yî kpwoon wvù nu bô fue le, je saa enu dvú keelewtε ke.

4 Geen en boom bo bwee wese le, ke ben nu finen kenjiwe le wvù diuu didvu ke enε esεε eto fô ben e diewe cooη e ke.

5 Me njemyi nen njefo ben bocii nu bonyii bo n'yu le, nu bonyii bo εmvunsheη. Ke beene nu bonyii bo entaη kenεε bo kenjiwe le ke.

⁶Nonen fo beene eleetè no bonyii bomew leete ke. Beene enù we bô bvufee bvusebeene fó bvucii.

⁷Bonyii bô leete ké no leete ε è nu entaη, ε bonyii bô mbvuum koole bó nu ε mó ké no koole ε è nu entaη.

⁸Geenen no beene nu fisεbeene ε è nu bonyii bo εmvunsheen, beene emum enù bô bvufee bvusebeene fó bvucii. Beene ejo mbee bô keηkoηen é mvú enù diewe ketwaa ke jem e ε beene ε jise ε baη gvúw yesebeene dvú, ejo ten mboyma wvù beene taale fwe yî dvú le é wvú enù diewe kefo ke jem e ε beene ε bon.

⁹Ben ekeè le ke Nyo' to caw beene gee le wen ke eduηε ε è nu shém ye yî ffuuke ê beene ke. Wvú to caw le beene ke ekeηke ε è nu mboyma fele yî Tata wesebeene wvù Jisos Klistu le.

¹⁰Jisos Klistu nu wvù to kpweε nje yese beene, wvu le kenεε beene nu dvú, kenεε beene ε kpweken, é beene enu ke beene ε bó.

¹¹Nonen ben emum eyvuwsè mvuntelem mvu wee noo wee le, eyootè ten wee noo wee ε wvú kuu ke no ben gee wase.

Ntefe wvu fokemεse bô ngayma

¹²Boom bo bwee wese le, bese lεke lo ben le ben ewvumtè bonyii bô lemte ê ben enteleη taale fô ben e yî saaka Tata le bvuu teete ben e.

¹³Ben eduηci n'wvum ê bó naa ntay yî keηkoηen e nje lemme dibole. Ben ekeηkè ten nshii wvu nyεkeey fô bikuu binen e.

¹⁴Bese bvuu lεke ten ben boom bo bwee wese le le ben etefe bonyii bô nu laame ke lo, eyvuwsε mvuntelem mvu bonyii bô keηke jaη e, eficε ten bonyii bô wεeyi. Ben ekuulè shém ben ε bonyii bocii.

¹⁵Ben eyenè fo wee etfuusè kebefe bô kebefe. Ben egomtè sekecii keegeε ε è nu mwεem mvù jee fô bikuu binen e noo fô bonyii bocii le.

¹⁶Ben elanηanè sekecii,

¹⁷bunleè kefew kecii,

¹⁸nyaà keyoone ê Nyo' yî fiεε ficii fi kooyi le. Fin nu fiεε fi Nyo' shieele fô ben bô nu yî Klistu Jisos e.

¹⁹Fo ben ecilè lemme di Keyoy ke Yuule le ke.

²⁰Fo ben emwaasè bontum bo Nyo' le bô bonyii teete ke.

²¹Ben etaassè mwεem mvunciim, joð mvù jee leeme yî dvú le,

²²ebvuusè can fô mwεem mvù befe le mvunciim.

- 23 Me nleke le Nyo' keβeε wvù nu Nyo' kembonen elooce ege é ben eyuule yî fiεε le ficii. Wvú egeε keyoy kenεn bô mvuntelem mvunen noo ye yene é yî ke enu se nlom kefew kè Tata wesebeene wvù Jisos Klistu nu ke eto le.
- 24 Wvú wvù Nyo' wvù to teηεε ben nu ε wvú ké no leeme ke yî diεw ye le, ε wvú nu ke ege mwεεm mvudvu.
- 25 Boom bo bwee wese le, ben ebunleè fô bese le.
- 26 Ben egay boom bo bwee wesebeene le bocii εηoεε ê ηηoεε bonyii bo Nyo' le.
- 27 Me njemyi nciise lo ê ben yî mvuηgay mvu Tata le le ben etaη ηwa' wvun é boom bo bwee wesebeene le bocii eyuw.
- 28 Tata wesebeene wvù Jisos Klistu ebuw ben bô kembonen kew é kí enù ben ε bó.

2 Tes

2Tes 1

1 È nu me wvù Baul, ε me nu bee Silas noo Timatio. Me nsaanke ηwa' wvun fô kentaashε ke bonyii bo mbee le ke Tesalonika le kè nu ε taashε ε no nu yî Nyo' Icee wesebeene bô Tata Jisos Klistu le.

2Nyo' Icee wesebeene bô Tata Jisos Klistu ebuw ben bô kembonen ebvuu enya ben bô nyεkeey.

Ngew bô mmawcε wvù nu ke enu kefew kè Klistu nu ke ekase eto le

3 Boom bo bwee wese le, bese keηke keenyaa keyoone ê Nyo' sekecii ekumε ben. Ε fí nu leη nonen, ηjefo mbee wene kuu ke gene lo fwe fwe, ε keηkoηen kè wee mwaanη mwaanη keηke fô wee noo wee le gene ke lo ten fwe fwe.

4 Nonen, bese kebεε ké no saale ye bô ben ê bintaashε bi bonyii bo mbee le bi Nyo' le bimew e. Bese ké no saale ekumε no ben leeme temyi bô ekumε no bonyii bone bikaa ê ben εjim ε ben jici ke mbee wene le, noo ekumε boηgew bô ben yene kuule ke shém e.

5 Fifin nu fiεε fi duηci le Nyo' nu ke esaw bonyii ê je yi teytoy e, wvu le ben ke enu ε ben ε kocen bonyii bo bvunfon bvú Nyo' le bvù ben yene boηgew ban nje bvú le.

6 No Nyo' nu wee wvu teytoy, wvú nu ke etfuse naa ηgew wvù bonyii nyaa ê ben bô ηgew,

7 enya nλεεten ê ben bô yene ηgew noo ê bese ten. Fifin nu ke ekooy seke Tata Jisos nu ke ebuynen fowe etoo ê leme di ηguy e di saasaa le. Wvú nu ke etoo nonen bô bonceendaa bew bô temyi.

8 Wvú nu ke etfuse envuke ê bonyii bô maa lo Nyo' noo bô baa bee saaka wvù jee wvu ekumε Tata Jisos e ke.

9Bó nu ke elεse bó é bó ekeηke ηgew wvù mey lo, é bó egawsen bó bô bo Tata fo bó eto fwe dvu wvú noo fô bvukuke bwew bvú baay e.

10Fifin nu ke ekooy εbvubwε bvù wvú nu ke eto wvu le bonyii bô è nu bew etumte moηkum mew, é bonyii bocii bô nu ε lese fitele yî ye le ekeηke lo ηghaw bô wvú. Ε ben ten nu ke enu bó le ηjefo ben to nu ε bee saaka we wvù bese to jemyεε ê ben e.

11 È nεε fiεε fi bese bunlee ke fô ben e sekecii le Nyo' wese ege é ben enù ε ben ε kocen kfuu bonyii bô wvú teηe le ben enù le. Bese bunlee ten le wvú efi ben yî mvuηgay mwew e, é ben ege fiεε fi jee ficii fi ben shieele noo lemme dicii di ben gee nje fitele fi ben nu ε lese yî Klistu le.

¹²Bese bunlee ten nonen wvu le diee di Tata wesebeene wvù Jisos e, ekenkè mbense ê ben entelen, e ben ten kenke mbense yî ye le. Fifiin nu nje fitele fi jee fi Nyo' wesebeene bô Tata Jisos Klistu kenke fô ben e.

2Tes 2

Ekumε wee wε wvù ngoyte nci Nyo'

¹ Boom bo bwee wese le, fi ekumε nto Tata wesebeene wvù Jisos Klistu bô no beene nu ke etaashe keegen enu beene e bó, nu e me nleke le,

² fo ben ke ene é bvufee emum ebvuy ke lo ben nen ncew, kenεε ene emum etuwtene le ben nu e yuw njeme mvu le wvù nen'yi fô Keyoy ke Yuule le, kenεε le bese nu e jeme, kenεε le bese nu e saŋ ŋwa' le diuu di nto Tata le nu e to wase ke.

³ Fo ben ecine é wee ke elεε ben e è cim nu naa ê je yî neε le ke. Ben ekeè le ke diuu di nto Tata le didvu nu ke ekocen se kefew kie kè bonyii nu ke ene ebewci bô bo Nyo' e yaw wase e to, noo se wee wε wvù ngoyte nci Nyo' e buynen ten ke. E è nu wvù wvù bó nu ke elεε lo.

⁴ È nu wvù wvù nu ke ebense ekole kew emum ekicine lo fiεε ficii fi bó teŋe le nyo' kenεε fi bó bunlee fí. Nonen, emum egen eley eshii yew ncese Nyo' le emum eteŋe ekole kew le è nu wen Nyo'.

⁵ Ke ben kumyi le seke me nto nu beene, nu e me nto nsee fiεε fin ê ben?

⁶ Ben kee wase keseen fiεε fi jici wvù le wvu le wvù ke ebuynen ke wase e è nu ê kefew kè bó nu e ŋgeε ê wvù le.

⁷ Ben ekeè le mvuŋgay mwew mvù wvù ngoyte nci Nyo' dvù lemte wase keseen ejim ejim, e è nu ke le wee wvù baanke mvù nu ke ebaanke ke nonen egen ebuy seke bó ke ecake wvù ê je.

⁸ Bó nu ke dīoo e cake, é wee wvù ngoyte nci Nyo' wε emum ebuynen, é Tata Jisos emum efefe lo wvù bô keyoy ke ê wvù emvu, efīwse lo bô nlawken wvù wvù nu ke etoo dvù.

⁹ Wee wvudvu wvù ngoyte nci nu ke etoo ê mvuŋgay mvu Satan e, kenke mvuŋgay mvunciim, gee mwεεm mvù duŋci mvuŋgay mwew bô mwεεm mvu diuw wvù yumεen e mvù è nu mvu kenleεma le mvunciim.

¹⁰ E wvù nu ke etoo ten bô kfuu mwεεm mvù befe mvunciim keelεεle bonyii bô laa wase dvù. E bó laa njefo bó nu e faŋ keekoŋke keceey wvu le bó ke eboy.

¹¹ No bó baa koŋke keceey nonen, Nyo' e mum e ge bó e no looci jeenke lo wvu le bó ebeŋe ke wase e è nu fiεε fi nu fi mbiay e.

¹² E Nyo' to ge nonen wvu le wen ke elεε bó bocii yî ŋgew e bô baa bee keceey e, yuuke njoŋ keegeε mwεεm e è nu ke mvù yaa nu ke teytēy e.

Nyo' to caw ben keeboyse ben

¹³ Geenɛn boom bo bwee wese le bɔ Tata kooŋke naa ntay, bese keŋke ke keenyaa keyoone ê Nyo' sekecii ekumɛ ben, njefo Nyo' to nu ɛ caw wase ben foŋkew keeke eboyse ben fele yî lemme di Keyoy ke Yuule gee le ben eyuule le, bɔ yî mbee wvù ben nu ɛ bee keceey e.

¹⁴ Wvù to teŋe ben yî fifin e fele yî saaka wvù jee wvù bese to fewci le, wvu le ben ke ekeŋke fô bvukuke bvu Tata wesebeene wvù Jisos Klistu le.

¹⁵ Nonɛn boom bo bwee wese le, ben eleemè tɛmyi, jicì nce wvù bese to nyaɛ ê ben e, keɛɛ è nu wvù bese to yeeyee lo ben dvù bɔ diuw, keɛɛ è nu wvù bese to saŋɛ lo ê ben.

¹⁶ Bese leke le Tata wesebeene wvù Jisos Klistu kebeɛ noo Nyo' Icee wesebeene wvù to koŋɛ beene no læse shém yesebeene sekecii se ŋka, ebvuu enya beene bɔ fiɛ fi jee fi beene taale fwe yî dvù le nje fitele fiew fi jee.

¹⁷ Wvù eyvuwse mvuntelem mvunɛn, ege é mvù etemyi yî lemme di jee le dicii di ben gee bɔ yî fiɛ ficii fi ben jemyi le.

2Tɛs 3

ɛ Baul leke le bonyii bo mbee le ebunleè fô bowen e

¹ Keemɛɛɛ, boom bo bwee wese le, ben ebunleè ten fô bese le. Ben ebunleè le diɛw Tata elewtè gene lo fwe ɛ bonyii wvumte diɛw yidvu ke no ben to gee.

² Ben ebunleè ten le bese ke eboy can bonyii bɔ keŋke mvuntelem mvù befe gee mwɛɛm mvù befe le, njefo ke è nu bonyii bocii bɔ keŋke mbee ke.

³ Geenɛn Tata ké no leeme ke yî diɛw ye le. Wvù nu ke enya ben bɔ mvuŋgay, ebvuu egemgeme ben fo ben ke eley can wee kebefɛ le.

⁴ Bese nu ɛ gee bvufɛe bvusɛɛ yî Tata le ekumɛ ben le ben gee wase fiɛ fi bese gayte, ɛ ben nu ke emey ke egee.

⁵ Bese leke le Tata eleke mvuntelem mvunɛn é mvù enu yî keŋkoŋɛn kè ke Nyo' le ebvuu ege é ben ekuulè shém no Klistu to kule.

Wee keŋke keelemte sɛ dieɛ

⁶ Boom bo bwee wese le, bese gayte lo ê ben ê dieɛ di Tata wesebeene wvù Jisos Klistu le le, ben enjemkesè ye ben ɛ boom bo bwee wesebeene le bɔ laame ke lo yaa cee ke bii nce wvù bese to duŋɛɛ ê ben e ke.

⁷ Me njemyi nɛn, njefo ben kebeɛ kee no ben keŋke keebenene bese. Ke bese to ké no laame seke bese to nu beene ke.

⁸ Ke bese to dieɛ fiɛ fi wee le sɛ bese ɛ law ke. Bese to lemte jimtene entaŋ bɔ emvunsheerj wvu le fo bese ke egeɛ bvujite yî wee mvu ben e ke.

⁹ Ke bese to gee nonɛn le ke è nu bvudvuu bvusɛɛ keebiite mwɛɛm ê ben ke. È to nu wvu le bese eduŋcì yî gee disɛɛ le wvu le ben ebeŋɛnè bese.

- 10 Ben ekeè le naa seke bese to nu beene nu ε bese to nya nci wvun ê ben le, “É wee nu le ke wen nu elemtè, fo bó enya wvú bô fiεε fidien ke.”
- 11 Me njemyi nen njefo bese yuuke le ben bomew shee laame ke lo yaa lemte ke, lenε ke lo leese dew fô mwεεm mvu bonyii bomew e.
- 12 Boba bonyii nu ε bese gayte bvuu ciise lo ê bó ê diee di Tata Jisos Klistu le le bó eshii fokuse elemtè keekεηke fiεε fi bó edieè.
- 13 Fô ben e, boom bo bwee wese le, fo ben ke ewεle keεgee gee di jee ke.
- 14 É wee tun keeyuw fiεε fi bese jemyi ê ηwa' wvun e, é ben ciise wvú. Fo ben ebvuu ekεηke lo fiεε keεge bô wvuwε wee ke, wvu le wvú ewuumen.
- 15 Geenεn, fo ben ejòò wvú diεwε wee bvuban e ke. Ben etefe lo wvú diεwε waa bwee wene le.

Ngayma wvu fokemεse

- 16 Tata wvù nu wvu nyεkeey enyaà ben bô nyεkeey sekecii ê jé le yicii. Tata enù ben ε bó bocii.
- 17 Me wvù Baul nsaanηke ηgayma wvun bô kebo kem. Fin nu nciise wεm wvù me ηgee ê boηwa' bem e bocii. E è nu no me ηké no nsaanηke.
- 18 Tata wesebeene wvù Jisos Klistu ebuw ben bocii bô kembonεn kew é kí enù ben ε bó.

1 Tim

1Tim 1

1 È nu me wvù Baul, ε me nu waa ntum Klistu Jisos no Nyo' wvù Mboyse wesebeene bô Klistu Jisos wvù beene geke bvufee yî ye le to gayεε le me enù.

2 Me nsaanke ηwa' wvun fô wo le Timatio wvù è nu waa wem wvu keceey yî mbee le. Nyo' Ice bô Klistu Jisos wvù Tata wesebeene ebuw wo, ecam shen fô wo le, enya wo bô nyεkeey.

Lε Timatio ecilè bon'yεeyi bo mbiay e

3 No me nto ηgayεε ê wo seke me nto ηgene Masedonia le wo esheε enù Efesus, nu ε me mbvuu ηgayte le wo enù ke jó wvu le wo ecilè bonyii ba bô yεeyi kfuu n'yεeyi mvu wvu jεey.

4 È cilè ten le fo bó ejòð kefew kebole jewsee yî mvumangaan e noo yî ediee ε bo'icee dikfuu di bonyii le yò bó ké no taanke gene dvú se yó kaa lo ηkuuη. Mvumvun nu mwεem mvù too ke ε è nu bô bombew, ε è yaa nu ke bô ntaη wvù wvu Nyo' wvù bii mbee le ke.

5 Shiee ntefe wvun nu keege le bonyii ekeηkè keηkoηen kè nen'yi fô mvuntelem mvù yuule le bô kè nen'yi fô mvuntelem mvù wee gee fieε ε è yaa nu fi fitele esaake wvù le noo kè nen'yi fô fitele fi keceey fi wee lese yî Nyo' le.

6 Bonyii bomew nu ε cine wase yiyin je le ε no bvuyte gene wase ε è nu yî bonjeme bo εcici le.

7 Bó gomte keenu bonyii bô yεeyi bonyii bô bonci bo Nyo' le, geenen yaa cim kee naa fieε fi bó jemyi εkumε fí kenεε kenyi ke fieε fi bó tεencine yî dvú le se nfan e ke.

8 Beene kee le nci Nyo' nu fieε fi jee fen é wee joo nci wvudvu ê je yi leη no wvù keηke keejoo le.

9 Beene kee ten le nci nu ε bó yaa to geke fô bonyii bô nu teytey e ke. Bó to geke ε è nu fô bonyii bô ηgoyte bonci le bô bô temyi bikuu le, noo bô maa lo Nyo' le, noo bô gee bibefε le, noo bô yaa yuule ke le, noo bô beete bô diee di Nyo' le, noo bô yuwyi bo'icee bobole noo bobwee bobole, noo bô yuwyi bonyii bomew e.

10 È nu ten fô bokεε bô bolemse bô jaanke kenjaη e, noo fô bolemse bô jiime fô bomew e. È nu ten fô bonyii bô cooηke bonyii gene bô bó le, noo fô bô mbiayte mbiay e, noo bô kane keesee keceey kane mbiayte lo le. Ε è nu ten fô bô gee naa la fi yaa bii ke n'yεeyi wvu leη e.

11 N'yεeyi wvun bii saaka wvù jee wvù kuuke wvù è nu wvu Nyo' wvù bó bensee le, ε saaka wvudvu nu wvù bó to nyae can yem e.

Ε Baul nya keyoone ê Tata yî shen yî wvù to camε fô wvù le

12 Me nyaa keyoone ê Klistu Jisos wvù Tata wesebeene wvù nu ε nya me mvungay keelemte lemme diw dî wvù to jinyεε me yen le me nu ε ηkocεn, mum baa me le me enlemte le.

13 Naa no me nciw nto nu fwele njemyi diw yî befe ekumε wvù, mbone bikaa ê wvù εjim, nan'yi wvù, geenεn ε wvù cam ke shen fô me le, njefo me nto ηgee kenjiwe le n'yaa ηkenke wase mbee ke.

14 Tata to nu ε tfuw lo mbuwma we kenkonen yî yem e, ge ε me no ηkenke mbee bô kenkonen no wee wvù nu ε taashe bô Klistu Jisos ké no kenke.

15 Njeme wvù le Klistu Jisos to to yî nshe le keeboyse bonyii bô befe nu naa keceey, ε è nu njeme wvù nu ε kocεn wvù wee ebee wvù le se kemaηen. Me kebee nto nu naa lo nfon bonyii bô befe.

16 Geenεn, ε Tata ke cam shen fô me le, wvu le Jisos Klistu eduηce yî yem e, me wvù nu nfon bonyii bô befe, shém ye yî wvù kuule gene mæese bô bonyii. E me nto nu nonen diwε kenfewsεn e fô bonyii bô nu ke ebee wvù le ke ekeηke nshii wvù mey lo le.

17 Nyo' nu Nfon wvu bvuyvuum e se ηka, ε ke wvù yaa nulo ekpwe ke, ε ke bó nulo eyen wvù le ke. È mey ke wvù maan wvù è nu Nyo'. Beene etumtè monkum mew, nyaà n'wvum ê wvù sekeci se ηka. Fí enù nonen.

Lemme di Timatio elemtè

18 Timatio waa wem, me nyaa lemme di fiε fi me njeme fin e can yo le, ε fí bii ε è nu mwεem mvù bonyii to jemyεε wase ekumε wo diwε bonyii bô teete bontum bo Nyo' le, wvu le mvù ke efi wo é wo etum jem yî jee.

19 È leemè ke yî fitele fi wo lese yî Klistu le, eyekè fiε fi fitele fiuw jemyi ê wo ntay. Bonyii bomew nu ε cine wase keeyeke fiε fi fitele fibole jemyi ê bó, ε mum ε gbwe yî mbee wvubole diwε ηguw wvu ê joo fò wvù ε bvuj e.

20 Ngoo bó le nu 'Imenayus bô Aleksanda. Me nu ε nya wase boban can Satan e, wvu le bó ekeηke bvufee, elu bô diee di Nyo' le di bó beete dvù.

1Tim 2

Ntefe ekumε bunle

1 Fiε fi fwe fi me nleke nu le, bonyii bo Nyo' le ebunleè fô bonyii le bocii. Bó ebunleè beelè fô Nyo' le bvuu lekè Nyo' fô bonyii bomew e, nyaà ten keyoone ê wvù.

2 Bó ebunleè fô bonfon e, bô fô bonyii le bocii bô nu yî bintaw bi baay baay e. Bó ebunleè nonen wvu le è nulo é beene eceè nce kenlesten bô wvu nyεkeey noo wvu bonyii bo Nyo' le noo wvù kenke n'wvum.

3 Keebunlee nonen nu fiε fi jee, ε fí ε kocεn ejise jo Nyo' wvù Mboyse wesebeene,

- ⁴ wvù shieele le wee tfuu ke eboy noo le wee tfuu ekeè kecɛɛy e.
- ⁵ Nyo' nu ke mwaan maan, e wee wvù nu entelen jo Nyo' bô bonyii nu ke ten mwaan. E wee wvun nu Klistu Jisos.
- ⁶ È nu wvù wvù to nyaɛ ekole kew keesum bonyii bocii yî ngew e. Fifi nu fiɛ fi Nyo' to duɲɛ seke kefew ke len to kocɛnɛ.
- ⁷ È nɛɛ fiɛ fi Nyo' to balɛ me le me enù wee nfewɛ noo waa ntum Jisos bô le me enù wee n'yɛɛyi bonyii bô yaa nu ke Bojuu keen'yɛɛyi bó é bó elese fitele yî Klistu le, eyɛɛyi ten bó bô kecɛɛy. Ke fiɛ fi me njemyi fin nu e me mbiayte lo ke. Me njemyi e è nu kecɛɛy.
- ⁸ Me e mum e no nshieele le bolemɛ ebunleè mondvuum e monciim, cawse e è nu can yî yuule we yaa ton'yi shém kɛnɛ cɛwkene ke.
- ⁹ Me nshieele ten le bokɛnɛ ejiisè ndvú ê je yi len e yî duɲci n'wvum e, noo ê yî bonyii yene le è nu yi len e. Fo bó etuwci bikuu kɛnɛ leese mwɛɛm mvù bó kene bô ketwaa ke bigew e kè yɛele kɛnɛ ejise e ban, kɛnɛ ndvú yi kenlum e ke.
- ¹⁰ Bó esuutè ye yibo e è nu bô gee di jee diɛwɛ bokɛnɛ bô nu e kocɛn keebunlee Nyo' le.
- ¹¹ Kpwoon kɛɲke keenya ekole kew keeyeke lo n'yɛɛyi, nu diuw tfu.
- ¹² Me mbaa nya je le kpwoon eyɛɛyi bolemɛ kɛnɛ ekɛɲke mvuɲgay ê we jo bolemɛ ke. Wvù kɛɲke keenu diuw tfu.
- ¹³ Fí nu nonɛ njefo è nu Adam wvù Nyo' to yawɛ bom, sɛ bom Iff.
- ¹⁴ E ke è yaa nu Adam wvù Satan to lɛlɛ ke. È nu kpwoon wvù bó to lɛlɛ e wvù ngoy nci Nyo'.
- ¹⁵ Naa no fí cim nu nonɛ, nu e Nyo' nu ke eboyse kpwoon fele yî boom bô wvù boote le, fɛn é wvù e mɛy e no leeme yî fitele fi wvù lese yî Nyo' le, kɛɲke kɛɲkoɲɛn, cee nce wvù yuule noo wvù kɛɲke n'wvum e.

1Tim 3

No nce bocee bikuu bi kentaashɛ ke bonyii bo mbee le kɛɲke keenu

- ¹ Njeme mvu nu dvú e wvù nu naa lo kecɛɛy. Njeme wvun nu lɛ: É wee shieele kentaw keenu cee ekole ke kentaashɛ le, tu wvù shieele lemme e è nu di jee.
- ² Cee ekole kentaashɛ ke bonyii bo mbee le kɛɲke keenu wee wvù yaa kɛɲke fiɛ fi bó ebaci wvù yî dvú le ke. Wvù kɛɲke keenu dwee kpwoon mwaan, yaa gee mwɛɛm kenduun e ke, kpawci mwɛɛm ntay, kɛɲke n'wvum, fiisene bonyii bo ghane le, kee keeyɛyi bonyii.

³ Wvú kɛŋke keenu wee wvù yaa wuu ke mbvuum ε mó koole ke. Wvú kɛŋke keenu nyɛkeey bô bonyii yaa cɛwkene ke, yaa waale waa ke, yaa kɛŋke shiee yî bigew e ke.

⁴Wvú kɛŋke keenu wee wvù kee keetaa fô yew ye le ntay, gee ε boom bew yuuke wvù le yî fiɛɛ le ficii, wvumte wvù.

⁵É wee nu sɛ wvù kee keetaa fô ye yew e ntay, é wvù ke eghan nɛɛ sɛ keetaa fô kentaashɛ ke bonyii bo mbee le ke Nyo' le?

⁶Ke wvù kɛŋke keenu wee wvù bɛɛ baŋke lo è no nu wee mbee ke. É wvù nu wvuwe wee, é wvù ke enɛ sekemew emum ebensee ye, ke enɛ eley ŋgɛw diɛwɛ wvu dɛwle le.

⁷ Wvú kɛŋke tɛn keenu wee wvù bonyii bo ɛkfuŋ yɛne tɛn lɛ è nu wee wvu lɛŋ. Ɛfuw ke nonɛn, é wvù ke enɛ ejo ê ketam ke dɛwle le eshoose ɛkolɛ kew.

No nce bonyii bô fici gee dilemme ê kentaashɛ ke bonyii bo mbee le ɛnte, kɛŋke keenu

⁸Bonyii bô fici gee dilemme ê kentaashɛ ke bonyii bo mbee le ɛnte kɛŋke tɛn keenu bô kɛŋke kɛŋge ke lɛŋ. Ke bó kɛŋke keejemyi díɛw fiɛɛ ke, yaa nu bô nu ɛ nya bikuu bibole ê mbvuum ke, yaa nu bonyii bô kuuŋke ke ε è nu sɛw ke.

⁹Bó kɛŋke keejicì kenyilɛ ke fiɛɛ fi Nyo' nu ɛ duŋcɛ wase ê beene ɛkumɛ mbee le, leeme yî dvù le ɛ fiɛɛ yaa saake bó fô fitele le ke.

¹⁰É bo sɛ gɛɛ bó yî lemme le, nu ɛ bó kɛŋke keeyaw emom bó. É bó dioo ɛ duŋcɛ lɛ ke bó kɛŋke jay ke, é bó emum egɛɛ bó é bó elemte diɛwɛ bonyii bô fici gee dilemme ê kentaashɛ ke bonyii bo mbee le ɛnte.

¹¹Boke' bobole kɛŋke tɛn keenu bô kɛŋke kɛŋge ke lɛŋ, yaa kunsene mvuŋkunsɛn ke. Ke bó kɛŋke keegɛè mwɛɛm kenduun e ke. Bó kɛŋke tɛn keeleemè yî kecɛɛy e yî fiɛɛ le ficii.

¹²Wee wvù fici lemte lemme ê kentaashɛ ɛnte kɛŋke keenu dwee kpwoon mwaan. Ɛ wvù kɛŋke tɛn keekee keetaa fô boom bew bô fô yew ye le ntay.

¹³Bonyii bô fici lemte ê kentaashɛ ɛnte ké lemte ntay, kɛŋke diee di baay fô bikuu bibole, no nu tɛn sɛ nfan ɛkumɛ fitele fi bó lese yî Klistu Jisos e.

Fiɛɛ fi kuuke baay fi è nu fi mbee wesebeene le

¹⁴Me n'yɛne lɛ è shɛɛte wase caan é me ento en'yɛn wo le. Geenɛn ɛ me saanke mwɛɛm mvun fô wo le wvu lɛ,

¹⁵ é me nɛ lo è no ndvuyte, é wo ekee no bonyii kɛŋke keegɛɛ mwɛɛm ɛnte jo yew yî yi Nyo' yî è nu kentaashɛ ke bonyii bo mbee le bo Nyo' wvù kɛŋke nshii le. Kentaashɛ kin nu kfuy bô kenffuy kè jici kecɛɛy e.

¹⁶ Fiee nu dvú ε fí kuuke naa baay. Ε fiee fin nu fi to shee nu ê kenyile le ekume mbee wesebeene wvù beene jemyi, ε Nyo' ε ge wase beene ε kiee. Fiee fin nu le: Wvú to nu ε duŋce ekole kew yî nyam ye wee wvu wum e. Keyoy ke Yuule to nu ε bense wvú. Bonceendaa bo Nyo' le to nu ε yen wvú le. Bó to nu ε fewce ekume wvú ê bitum bicii. Bonyii to nu ε lese fitele yî ye le woŋ tfuu. Bó to nu ε jo wvú ε wvú ben we ley bvukuke le.

1Tim 4

Ekume bonyii bo n'yeyi le bo mbiay e

¹ Keyoy ke Yuule jemyi lo teytoy le è nu ke enu kefew kemew e, é bonyii bomew ecine mbee le eyuuke wase mwεem ε è nu ê biyoy bì læele bonyii noo bon'yeyi bo bonceendaa bo dεwle le.

² Ε bon'yeyi ban nu ke etoo can bonyii bò ghane buwsee bonyii mbiayte mbiay, ε mvuntelem mvubole ε cife wase ke diewe bó ton ε è nu bô kento.

³ Bó nu ke ekane le fo bonyii etaashì bvujen, bô le fo wee edieè kfuu mwεem mvumew ke. Ε mwεem mvun nu ε Nyo' to fe le bonyii edieè, ε bonyii bò keŋke mbee bvuu kee keceey dīoo diee no nyaa keyoone ê Nyo'.

⁴ Fiee ficii fi Nyo' to feleε nu ε fí jee, ε fimew yaa nu dvú fi wee etune é wvú fen ε fiisen bô keyoone ê Nyo' ke,

⁵ njefo njeme wvù wvu Nyo' bô bunle nu ε ge wase fí ε no yuule.

Waa lemme wvu Klistu Jisos wvù jee

⁶ É wo duŋci mwεem mvun ê boom bo bwee wesebeene le, é wo enù wee lemme wvu Klistu Jisos wvù jee wvù nu ε bó ε kuuse bô diew Nyo' yì nu ekume mbee bô n'yeyi wvù jee wvù wo bii wvú le.

⁷ Fo wo ekeŋke naa lo fiee keege bô mvumaŋgaan mvu ecici mvù nu se mvú keŋke fiee keege bô Nyo' ke. Yeyye ekole kuw keecee nce ε è nu wvù Nyo' gomte.

⁸ Keedvumte ndvum yaci ye keŋke ke sew fô wee le. Geenε ε keecee ε è nu nce wvù Nyo' gomte keŋke sew fô wee le ê jé le yicii, njefo fifin keŋke sew yî nshii wvu keseen e, bvuu keŋke yî nshii wvù too le.

⁹ Njeme wvun nu naa keceey, ε è nu njeme wvù nu ε kocen wvù wee ebee wvú le se kemaŋen.

¹⁰ È nεε fiee fi bese famte εdien yî lemme din e njefo bese nu ε leke bvufee bvusese bvucii yî Nyo' wvù keŋke nshii le. Nyo' nu Mboyse bonyii bocii, efey mvunciim bonyii bò nu ε bee wvú le.

¹¹ È yeyyi bonyii bô mwεem mvun gayte ε bó gee mvú.

¹² Fo wo ecine é wee ejòò wo ekuse le njefo wo bæe wan caan ke. È nù kenfewsën fô bonyii bo mbee le ê je yì wo jemyi jó bô yî nce wo le, noo kenkonjen kè wo kenke le, noo fitele fi wo lese yî Nyo' le, noo je yì wo gæele ye yo jó ε yí yuule le.

¹³ Nya ekole kuw keetaanke Nwa' Nyo' ê bonyii ya le, ebvuu efewci diew Nyo', eyæyi ten bó egen ebuy seke me ñke ento.

¹⁴ Fo wo elañ nnya yo ke. Nnya yin nu yì bó to nyaε ê wo seke ñgoo bocee bikuu bi kentaashe ke bonyii bo mbee le to gæleε can yibo yî yo le jemyi ê wo we diewe bonyii bo ntum Nyo' le.

¹⁵ Nya ekole kuw ê mwæem mvun, egeè mvú mvunciim ε bonyii bocii yene ñgenfwe wo le.

¹⁶ È yenè bô ekole kuw noo bô n'yæyi wo. È jici dvú ntay wvu le no wo gee nonen, é wo ke eboyse ekole kuw, eboyse ten noo bonyii bò yuuke fiε fi wo jemyi.

1Tim 5

Ntefe no Timatio egeè bô bonyii bo mbee le

¹ Fo wo ke dioo jemyi fiε ê wee wvu ñgaywee no wamene lo wvú ke. Geenën tefe lo wvú ke diewe ico le. È joò cubonyii diewe boom bo bwoo le.

² È joò ten bokene bo ñgaybonyii diewe bobwoo le, ejòò ñgon bokene diewe jéme yo le, etaalè bó ê je yì yuule le.

No è nulo é kentaashe etaale fô bokε' bo boñkfu le

³ È taalè fô bokε' bo boñkfu le bò è looci nu bò yaa kenke ke wee wvù taale fô bó le ke.

⁴ Geenën, é kpweε ñkfu kenke boom, kenεε boom bo boom e, é wo cine ε bó yaw yæyi keegeε lemme dibole di mbee le, wvu le bó etaale ten fô bobweε bobole kenεε fô bo'iceε bobole no bó to taale fô bó le. Fifiñ nu fiε ε fí ε kocen ê Nyo' ejise.

⁵ Kpweε ñkfu wvù looci nu kpweε ñkfu wvù yaa bvuu kenke wee wvù taale fô wvú le, nu ε wvù taale ke wase fwe ε è nu yî Nyo' le, bunlee sekeci bee le fô Nyo' le entañ bô emvunsheen.

⁶ Geenën, ε kpweε ñkfu wvù ghane fiεw dieε ε è nu ekole kew, nu ε wvú ε kpwe ke wase naa no wvú cim bæe lene ê we.

⁷ È jemyi mwæem mvun ê bó, wvu le fo bonyii ke ene ebaci bó.

⁸ È wee nu se wvù taale fô kfu diεw e, efey mvunciim fô ye yew e, tu wvú nu ε tun wase nce wvù è nu wvu mbee. E didieε gee nu ε dí ε fo ε fey naa lo di wee wvù yaa nu ke wee mbee le.

⁹Kpwɛɛ ŋkfu wvù è nulo é bó elese diee diew ŋgoo boka' bo boŋkfu le bò bó efici bó kɛŋke keenu wvù nu ε buy wase bilum mbaŋsoocaaŋ, wvù to nu kɛ kpwɛɛ diemsɛn mwaan,

¹⁰ε è nu wvù bó kee lo ɛ wvù kɛŋke gee di jee. Fì nu ɛ: Wvù kuuse boom bew ê je yì jee le, fiisene botolo ê wvù yew, ε wvù ε cuke wase ten bikaa bi bonyii bò è nu bo Nyo' le, ε fiɛ bonyii bo ŋgɛw e, ε wvù ε nya ekolɛ kew keege lemme di jee ê jé le yicii.

¹¹Geenen, fo wo ebee keelese boka' bo boŋkfu le bò bæ boom bo caan ŋgoo bò bó efici le kɛ, njefo é ye yibo ja ε kew ε no ŋeyte, é bó emum edaaye ŋkawma wvù bó to gee ê Klistu, emum egomte keekase egen ê bolemɛ bomew e.

¹²É bó ge nonen, tu bó ε jo wase ŋgɛw yì bikuu bibole njefo bó nu ε ŋgoy wase ŋkawma wvubo wvu fwe.

¹³ε keebvuu ebise fó nu, é wo lese bó ŋgoo le, é bó ene enu wase bonyii bò shee laame lo, gbwayte yew bonyii le danɛne. ε è yaa mɛy kɛ ɛ bó nu eshee laame lo kɛ, bó nu ekunsene ten mvuŋkunsɛn, leese dew fô mwɛɛm mvu bonyii le, jemyi mwɛɛm mvù bó yaa kɛŋke keejemyi kɛ.

¹⁴Nonen me ε no nteete boka' bo boŋkfu le bò bæ boom bo caan ɛ bó ekase egen etaashɛ bvujen bô bolemɛ bomew, eboo boom, etaalè fô yéw yibole, fo wee bvuban ke ene ebɛɛ ejim jodvu ebeete bô diee disɛɛbeene.

¹⁵Me ŋgayte nen njefo bonyii bomew bó le nu ε jay wase je ε tu ê keba ke Satan e.

¹⁶É kpwoon wvù è nu wee mbee kɛŋke boka' bo boŋkfu le ê kfuu dibole, é wvù nu fici bó, wvu ɛ fo kentaashɛ ke bonyii bo mbee le etuule bvujite kɛ. É kí efici wase ε è nu boka' bo boŋkfu le bò looci nu ebonɛbon.

Fiɛ fi bonyii bo mbee le kɛŋke keege fô bocee kentaashɛ le

¹⁷Bocee bikuu bi kentaashɛ ke bonyii bo mbee le bò lemte ntaɔ nu ε bó kɛŋke keenyaà n'wvum bô mmawɛɛ ê bó ntaɔ, efey mvunciim bò fewci ten diew Nyo' bvuu yɛɛyi bonyii.

¹⁸Bó kɛŋke keenyaà nonen njefo Nwa' Nyo' gayte ɛ, “Fo wo esûm diuw nyam seke yì ɛɛɛ egiŋ kɛ.” ε fì bvuu nu ten ɛ, “Wee lemme kɛŋke keekɛŋke nlawma we.”

¹⁹Fo wee ke eyuu eshomse cee ekolɛ ke kentaashɛ le kemew ê wo, é wo emum ebee wvù le sɛ bonyii ε leem bofɛɛ kɛnɛɛ botɛte ε ben jim nsaw wvudvu kɛ.

²⁰É è nu wee wvù nu ε mɛy kɛ ε no gee kebefɛ gene dvù, é wo wamen wvù ejise jo bonyii bocii, wvu ɛ kebɛse efan.

²¹Me njemyi fin ê wo fwe dvu Nyo' bô Klistu Jisos noo bonceendaa bò Nyo' nu ε baa ɛ, wo egeè fiɛ fi me ŋgayte fin yaa tuu dwen wee mvu kɛ, egeè fiɛ yaa duŋci kejeɛy jɛɛy kɛ.

²²Fo wo ebuwbuwè keegεε can yî wee le le wvú enù cee εkolε ke kentaashε ke bonyii bo mbee le κε. Fo wo elese fiuw can fô kebefε ke wee mvu le κε. Gεεε εkolε kuw ε kí eyuulè.

²³Fo wo ebvuu ewuu κε ε è nu joo maan κε. È wuù ten fimmbvuum caan nje tee diuw bô no wo mooci κε cεmcεme baay nen.

²⁴Bibefε bi bonyii bomew e ké no yen'yi naa baay duŋci le bó nu ε gbwe wase nsaw, ε bi bomew e ké jo naa kefew sε yenε.

²⁵È nu κε leŋleŋ no gee dì jee di bonyii bomew e ké no yen'yi. É dí cim baa yaŋsen eyenε, tu κε dí nu ke emεy nyiime κε.

1Tim 6

Nfwa wvù nu wee mbee eyuukè wee wvù κεηke wvù le

¹ Bonyii bocii bô nu εkuse jo kemmbuŋ ke bvunfaw e κεηke keenyaa n'wvum ê jé le yicii ê bonyii bô κεηke bó. Bó egeè nonen, wvu le fo bonyii ejemyi díεw yì befe εkumε diee di Nyo' le noo n'yεεyi wesebeene κε.

²Fo bonfaw bô bonyii bô κεηke bó nu bonyii bo mbee le emum ejod bó εkuse le njefo bó bocii nu boom bo bwee wan e yî Klistu le κε. Bó κεηke keelemte lo fô bó le ntay fesene lo, njefo bonyii bô κεηke sεw lemme dibole nu ε è nu bonyii bo mbee le ε bó kooηke bó naa ntay.

Bonyii bo n'yεεyi le bo mbiay e bô bvukuke bvu leŋ

È yεεyi bonyii bô mwεem mvun, teete bó le bó egeè mvú.

³ É wee yεεyi n'yεεyi mvu jεεy yaa beŋe n'yεεyi wvu leŋ wvù wvu Tata wesebeene wvù Jisos Klistu le noo n'yεεyi wvù kocine bô nce wvù Nyo' gomte,

⁴ tu mwεten bensee ε è nu ye yi εcici yaa kee fieε κε. Wvuwe wee cεmte bô kencεm ke bombew bô mvuηkicεn mvu díεw e mvù too bô kendoŋ ke benεen noo diwaa noo díεw yì befe noo keebiinene bonyii κεηke ηkpawawce wvù befe,

⁵noo diuw wvu kumεen enteleŋ jo bonyii bô nu ε bvufee bvubole ε lemlεm wase ε bó ε lase wase kecεεy e. Bó gee nonen kpwaake le fieε fi Nyo' le nu je mi yì bó nu ke ekuw jó.

⁶ Geenεn é wee cee nce wvù Nyo' gomte bvuu yuuke njoŋ bô fieε fi wvù κεηke, tu è nu naa bvukuke bvu baay,

⁷ njefo beene to to ê woŋ jan cancan, ε beene nu ke etu κε jim cancan.

⁸ Nonen é beene κεηke mwεem mvudien bô ndvú, tu mvumvun nu ε kocen fô beene le.

⁹Geenεn bonyii bô gomte ε è nu bvukuke ké ley mmom e, jo ê ketam e, mum ley shieε mwεem e nteen mvu keyuŋ e mvù too bô boŋgew. Ε mwεem mvun nu mvù ffûmte bonyii ηgew e ε è yaa nu wvu wεε κε.

- 10** Dikfuu di mwεem mvù befe le mvunciim san ε è nu yî keŋkoŋen ke bigew e. È nu nje shiee wvu baay wvun wvù bonyii keŋke fô bigew e wvù bonyii nteen nu ε jay wase je yî mbee wvubole, ε bon'ye mvuntelem mvubole bô mwεem mvu nsase le nteen.
- 11** Fô wo le Timatio, wo nu fiuw wee Nyo'. È lewtè lo fiuw mvumvun mwεem. È taalè ε è nu keekeŋke nce wvu teytey noo nce wvù Nyo' gomte. È jicì mbee wo le, keŋke keŋkoŋen, kuule shém, keŋke ten nce wvu nyεkeey.
- 12** È diuù bvudiuw bvù mbee le bvù jee, jicì nshii wvù mey lo wvù bó to teŋεε wo keeley wvù le, ε wo leem ê bonyii nteen fwe bô eben jim nsaw wo, ε wo jeme leŋ ekumε mbee wo.
- 13** Me ε mum ε no njemyi ê wo εjise jo Nyo' wvù nyaa nshii ê mwεem mvunciim, noo ê εjise jo Klistu Jisos wvù to leemε fwe dvu Bontus Baylet jeme fieε fi leŋ bô diuw we ekumε ekole kew,
- 14** ŋgayte le wo egeelè bonci ban, nù se nlom ε fieε yaa nu dvú fi wee ebaci wo yî dvú le egen ebuy kefew kè Tata wesebeene wvù Jisos Klistu nu ke ebuyneen e.
- 15** E wvù nu ke ebuyneen ε è nu ê kefew ke leŋ e, kè è nu ke eduŋce Nyo' wvù bó bensee, wvù è mey ke wvù wvù saake mwεem mvunciim, nu Nfon bonfon noo Tata botata bocii.
- 16** È mey ke wvù maan wvù yaa nulo ekpwe ke, ε wvù nu ê n'yuw wvù è nulo wee saa ebence nceencee fó le ke. Wee ke baa yuu yen wase wvù le, ε ke è nulo é wee eyen wvù le ke. N'wvum nu ê wvù, ε sa' ye nu yì mey lo. Fí enù nonen.
- 17** È dioo tu ê keba ke bonyii bo kpaw e yî won wvun e, è jemyi ê bó le fo bó ebenseè ye ke. Fo bó eleke bvufee bvubole yî kpaw e wvù nulo ke ene eka le ke. Bó eleke bvufee ε è nu yî Nyo' wvù looci tfuuke lo mwεem mvunciim ê beene le beene eyuuke njoŋ dvú le.
- 18** Bó egeè ε è nu mwεem mvù jee, é kpaw wvubo enù mwεem mvù jee mvù bó gee. Bó eyene can yibo enyaa nnya yaa taale ke.
- 19** Yiyin nu je yì è nulo é bó egeele ntfu fô bikuu bibole yî ntfu le diewe kenffuy kè temyi le, wvu le bó ejici nshii wvù looci nu nshii le.
- 20** Timatio, è jicì ke fieε fi bó nu ε gee can yo le. È wεmte lo bonjeme bô yaa keŋke ke fieε keege bô Nyo' noo bonjeme bo mvuŋkicεn e bô bonyii kpwaake le è nu bo bvufee le.
- 21** Bonyii bomew nu ε ne wase ε no kuŋene mvumvun mwεem, ε ne ε jay je ê keba ke mbee wvubole. Tata ebuw ben bocii.

2 Tim

2Tim 1

¹ È nu me wvù Baul, ε me nu waa ntum Klistu Jisos yî ηκοη wvù wvu Nyo' le bii ηkawma wvu εκυμε nshii wvù meγ lo wvù nu yî Klistu Jisos e.

² Me nsaanke ηwa' wvun fô wo le Timatio waa wem. Wo nu fitele fiem. Nyo' Ice bô Klistu Jisos wvù Tata wesebeene ebuw wo, ecam shen fô wo le, enya wo bô nyekeye.

Ε Baul nya keyoone ê Nyo' εκυμε Timatio bvuu yvuwsε fitele fiaw

³ Me ηké ηkumyi wo sekeci ê bunle yem e no nyaa ke ε è nu keyoone ê Nyo' wvù me nlemte wvù le ε fiε yaa saake me fô fitele le ke no bo'icem to lemte.

⁴ Me ηké ηkumyi ten misem yî wo to shiwse seke bee wo to gawsene, ε jeη no yuu me entaη bô emvunsheen η me mbee en'yen wo le, wvu le fitele fiem eyiηsen bô njoη.

⁵ Me ηké no ηkumyi ten mbee wo wvu keceey wvù wo keηke. Mbee wvun to yaw bwee bwoo wvù Loys bô bwoo wvù Yunis no keηke, ε me ηkee se kemaηen le è nu wvù wvù wo keηke keseen.

⁶ È neε fiε fi me ηgomte keentamce wo le wo ekase ekamse yî nnya Nyo' yî nu yî yo le, efieè yî dvù le diewe ηguy e. Nnya yin nu yî wo to keηkee seke me nto ηgelee can yem yî yo le.

⁷ È keè le Nyo' to baa nya keyoy ê beene ε è nu kè egee ε beene keηke nfan ke. Wvù to nya ε è nu keyoy ke mvuηgay e bô ke keηkoηen e noo kè nulo ege é beene ekeè keekemsene bô bikuu bisεbeene.

⁸ Nonen, fo wo ewuunenè keejemyi ê bonyii bomew εκυμε Tata wesebeene keηε εκυμε me wvù lemte ncaw nje ye ke. Geenεn è joδ ten wo ηgew yî saaka wvù jee wvun e bô mvuηgay mvù Nyo' nya ê wo le.

⁹ Nyo' nu wvù to boyσεε beene, tee beene le beene enu bonyii bô è nu bew. Ke wvù to ge fifin ε è nu nje lemme dimew di beene to gee ke. È to nu nje kenseyse kew fô beene le, bô mbuwma we wvù wvù to buweε beene dvù fele yî Klistu Jisos e ε è beε naa lo ε woη se ke kew.

¹⁰ Keseen nu ε bó ε duηce wase mbuwma wvudvu ê beene no Mboyse wesebeene wvù Klistu Jisos nu ε to wase. Wvù nu ε ηgoy mvuηgay mvu kpwe le, ε duηce nshii wvù meγ lo endan, bô le ke wee beε ke ebvuu ekpwe ke. Ε wvù ge mvù ε buy endan ε è nu bô saaka wvù jee.

¹¹ È nu saaka wvù jee wvudvu wvun wvù Nyo' nu ε baa me le me enù wee nfewce bô waa ntum Klistu noo wee n'yεeyi wvudvu.

¹² È nu nje fifin wvù me n'yene ηgew wvù me n'yene wvun nen. Geenεn ke me η'wuumene ke, ηjefo me ηkee wee wvù me nu ε nlese fitele yî ye le. Ε me ηkee lo

se kemaŋen le wvú nulo etaale ke fô fiεε fi me nu ε nya can ye le fin e, egen buy diuu di fokemese le.

¹³ È bìì ke tweŋ n'yεεyi wvù è nu wvu leŋ wvù me nto n'yεεyεε wo dvú. No wo bii dvú nonen eleesè ke fitele ε è nu yî Klistu le, keŋke keŋkoŋen fô bonyii le kè è nu ke Klistu Jisos e.

¹⁴ È jicì n'yεεyi wvu keceεy e wvù bó to nyaε can yo le. È jicì bô mvuŋgay mvu Keyoy ke Yuule le kè nu yî yese beene le.

¹⁵ Wo kee lo le bonyii bocii bo ê keba kè εsia le to nu ε laŋ wase me. Ê ηgoo yibole nu Figelus bô 'Emogenes.

¹⁶ Me nleke le Tata ecam shen fô yew Onesifolus e. Wvú to ké no gee naa bokaŋ e bokaŋ e ε shém yem lætene. Wvú to baa wuumene me nje ncaw wvù me nu wvú le ke.

¹⁷ È nu seke wvú to fεεε Lum jan, wvú to nu ε looce gom lo me ke ghan yen me le.

¹⁸ Me mbunlee le Tata ege é ke edioo enu diuu di fokemese, é Tata ecam shen fô wvú le. Wo looci kee naa lemme dicii di wvú to lemεε fô me le ê kelaante kè εfesus e.

2Tim 2

No è nulo é Timatio ediuu yî fiεε fi Nyo' le

¹ Timatio waa wem, è dioo tu fô wo, è leemè ke temyi bô mvuŋgay mvù Klistu Jisos nu ε buw wo dvú.

² È joò ten fiεε fi wo ké no yuuke ε me njemyi fwe dvu bonyii nteen leesè can bonyii bo leŋ e bô nulo ke eyεεyi ten bonyii bomew dvú.

³ È joò ten wo ηgew diewe wee jem wvu leŋ wvù wvu Klistu Jisos e.

⁴ Ke wee jem ke dioo nu yî lemme diew e bvuu no leese ekole fô mwεem mvu bonyii bo ncaw e ke, njefo fiεε fi wvú taale yî dvú le nu keegeε fiεε fi cee ekole we shieele.

⁵ ε è nu ke leŋleŋ no ke wee wvù lewte kenlewte nulo ke elewte eso fiεε, se wvú lewte bii bonci bo kenlewte le ke.

⁶ Wee wεε wvù lemte ten ntay nu wvù keŋke keeyaw emom fiεε ηgoo mwεem mvù wvú to jεwyεε le.

⁷ È kpawci ekume mwεem mvù me njemyi mvun é Tata ege é wo ekieε mvú mvunciim.

⁸ È kumyi Jisos Klistu. Wvú to nu ε buy yî kpwe le. Wvú to nu wee wvu ê kfuu di Nfon Dawe le. È nu wvú wvù me nfewci ekume wvú ê saaka wem wvù jee le.

9 È nu nje saaka wvù jee wvun wvù me n'yene ηgew, nu yî boncaw e diewe cooη e. Geenηn, naa no me ncim nu yî boncaw e nonηn nu ε κε diew Nyo' nu yî boncaw e κε.

10 No fî nu nonηn, me ε mum ε no ηkuule shém yî fiεε ficii le nje bonyii bò Nyo' nu ε caw, wvu le bó ten ke ekeηke mboyma yî Klistu Jisos e bò bvukuke bvù meη lo.

11 Njeme wvun nu naa keceey, wvù nu le:

É beene nu ε taashε ε kpwe beene ε bó,
 é beene ke ecee ten beene ε bó.

12 É beene kuule shém,

é beene ke esaake bvunfon beene ε bó.
 É beene ma lo wvú,
 é wvú ke ema ten beene.

13 É beene nu se beene leeme yî diew yesebeene le,

é wvú emey κε leeme yî diew ye le, njefo κε è nulo é wvú etun εkole kew κε.

Wee lemme wvù Nyo' nu ε bee

14 Tamce bó bò mwεem mvun, ebvuu ejeme ê bó fwe dvu Nyo' le bó elu bò mvuηkicen mvu εkume díew. Ke mvú yaa fii wee κε. Mvú beete κε lo bò bonyii bò yeke mvú.

15 È momtè ntay keeduηci εkole kuw ê Nyo' ejise diewe wee wvù Nyo' yene le è nu wvu leη e. È nù wee lemme wvù yaa keηke κε fiεε fî wvú ewuumene yî dvú le, noo wvù jici keceey κε diew Nyo' le ê je yi leη e.

16 È wemtè lo bonjeme bò yaa keηke κε fiεε keege bò Nyo', njefo bonjeme bodvu nu ege é bonyii ecee κε ε è nu nce wvù yaa nu κε wvù Nyo' gomte gene dvú fwe.

17 Bon'yεeyi bobole bodvu nen'yi no nu κε diewe keηkoken kè diee ye wee ghεeηke gene dvú le. Nηoo bonyii bò yεeyi n'yεeyi wvudvu wvun nu 'Imenayus bò Filitus.

18 Bó nu ε cine wase je keceey e no bó leeme le mbuy wvu yî kpwe le nu ε jo wase bvudvuu. ε dīoo ge nonηn, ε befεe bò mbee bonyii bomew.

19 Geenηn, kenffuy kè è lese Nyo' nu kè temyi, ε kí leeme κε fó. Kenffuy kin nu ε Nyo' ε saη nciise we yî dvú le ε wvú nu le, “Tata kee bonyii bò è nu bew,” noo le, “Wee tfuu wvù bene diee di Tata le, keηke keecinε gee di befεe le.”

20 Yew wee wvu baay ké dīoo nu ε shúw bò ηkáa noo mvuηkom mvù nu dvú saa nu κε mwεem mvù bó kene bò ketwaa κε bigew e kè yeεle kenεε kè baa κε. Mvumew ké no nu ten mvù bó kene bò bite noo mvù bó kene bò mbom. Mwεem mvun ké no nu ε mvumew nu mvù keηke lemme di kuuke, ε mvumew nu mvù keηke κε lo lemme di ncew.

²¹ Nonen, é wee bvuushi can ye fô mwεem mvù keŋke ke lo lemme di ncεw e, tu wvú nu enu wase diεwε fiεε fi yew fi è nulo é bó ejoo gee lemme di kuuke dvú. Wvú nu enu wase wee wvù Nyo' nu ε ge le è nu wee wen. E wvú nu wase wee wvù cεyεte lo cee εkole we le wvú ejoo wen gee lemme diεwε di jee dvú sekeci.

²² Nonen, è lewtè lo fiuw nce nnyen wvù keghan ké no keŋke le. È taalè fiuw ε è nu keεcee nce wvu teyεyε bô keεkeŋke mbee noo keŋkeŋen bô nce wvu nyεkeey no bonyii bô teŋe ten diee di Tata le bô mvuntelem mvubole mvù yuule gee.

²³ Fo wo ekeŋkè naa lo fiεε keεge bô bombew bo keyuŋ e bo εcici ke, njefo bó ké no too ke ε è nu bô diwaa.

²⁴ E wee lemme wvù wvu Tata yaa keŋke keewaale bô bonyii ke. Wvú keŋke keεkeŋke ε è nu fitele fi jee fô wee le tfuu, nù wee wvù kee keεyεyi bonyii, kee ten keeku shém bô bonyii.

²⁵ Wvú ké no nεci fiεε bô nyεkeey ê bonyii bô kicine wvú. Wvú ké no nεci nonen bô ŋkpawcε wvu le è nelo é Nyo' efi bó é bó ekumen mvuntelem mvubole ekase ekee fiεε fi keεεy,

²⁶ emum etee bvufee bvubole jim, elewte ebuy ê ketam ke dεwle le kè wvú nu ε koo bó jó le bó egeè ε è nu fiεε fi wvú koonke le.

2Tim 3

¹ È keè le, è nu ke edioo enu εdiuw yo fokemεse le, é mwεem mvù temyi ekooyi baay.

² Bonyii nu ke ene ekoonke ke wase ε è nu bikuu bibole, koonke bigew, bensee ye, duŋci ye, jemyi díεw yì befe ekumε bonyii bomew. Ke bó yaa nu ke ebvuu eyuuke bobwee bobole bô bo'iceε bobole ke, yaa nyaa ke lo keyoone yì fiεε le, yaa keŋke lo gee di yuule ke.

³ Ke bó nu ke ekeŋke shen fô bonyii le ke, yaa læshi ten bojay bo bonyii le ke. Bó nu ke ebeete bô εdieε ε bonyii, yaa nu ke lo é bó ejice ye yibole ke. Bó nu ke ekeŋke gee di bεmte, yaa koonke fiεε fi jee ke.

⁴ Bó nu ke ekuule mvunaŋ yì bonyii le, cee nce wvu ncεwncεw, nu ε bó ε yiŋsen bô kεcεke ye. Bó nu ke ekoonke ke ε è nu keedieε bikuu bibole εfey keεkoonke ε è nu Nyo'.

⁵ Bó nu ke eduŋci le bó leeme yì fiεε fi Nyo' le, geenεn bvuu tune mvuŋgay mvu fiεε fi Nyo' le fidvu. È wεmtè lo kfuu boba bonyii.

⁶ Bonyii ban bomew nu bô ghane leyte yéw bonyii le soo bokεε bô wεyi bô bibefε nu ε yike wase bó, bó ε no jeŋke bii ke wase ε è nu shieε mwεem mvumew e.

⁷ Boban bokεε nu bô ké no shee ke yeke n'yεyi sekeci, geenεn yaa nulo ke eyuu ekieε fiεε fi è nu fi keεεy ke.

⁸ No Janis bô Jambles to kicine Muses, nu ke lɛɛlɛɛ no bonyii ban kicine keceey ke Nyo' le. È nu bonyii ɛ bvufee bvubole ɛ lɛmlɛm wase, ɛ fitele fi bó duu le bó nu ɛ lese yî Klistu le nu mbiay.

⁹Geenen ke bó nu ke ege nonen egen ebuy ncejole ke, njefo keyuɲ kebole nu ke ebuy ke ten endan fô bonyii bocii le no ke Janis bô Jambles e to buyɛɛ.

Ɛ Baul tefe Timatio le wvú eleeme ke yî fiɛ fi bó yɛyɛ wvú dvú le

¹⁰ Geenen Timatio, wo kee wase ekumɛ n'yɛyɛi wɛm bô nce wɛm noo fiɛ fi me nleke bvufee yî dvú le. Wo kee ten ekumɛ fitele fi me nlese yî Nyo' le bô shém yî me ɲké no ɲkuule, noo keɲkoɲen kè me ɲkeɲke fô bonyii le, bô no me ɲké no momte yî fiɛ ficii le ɲgene fwe.

¹¹ Wo kee ten bikaa bì bonyii to bone ê me ejim noo boɲɛw bem. Wo kee mwɛɛm mvù to kooyɛ bô me Antiok bô Ikonium noo Lista. Wo kee kfuu bikaa bì bonyii to bone ê me ejim. Geenen yî boɲɛw ban e bocii nu ɛ Tata to boyse ke me.

¹² Fí nu lo keceey le wee tfuu wvù gomte keecee nce wvù Nyo' gomte diɛwe wee wvù nu ɛ taashe wase bô Klistu Jisos nu ɛ bó nu ke ebone ke bikaa ê wvú ejim.

¹³Ɛ bonyii bô buwyi mwɛɛm bô bonyii bo kenlɛɛma le, nu ɛ gee dibole nu ke efoo ke gene lo no bó lɛɛle bonyii bomew lɛɛle ten bikuu bibole.

¹⁴ Geenen, fô wo le, è leemè ke ɛ è nu yî fiɛ fi bó nu ɛ yɛyɛi wo dvú wo ɛ bee fí le bô fitele fiuw ficii. È leemè yî dvú le njefo wo kee bonyii bô yɛyɛɛ wo dvú.

¹⁵Wo to keɛw no kee mwɛɛm mvù bó saɲ ê Ɗwa' Nyo' le beɛ naa wan caan e. Mwɛɛm mvun nu mvù nulo etefe wo é wo ke ekeɲke mboyma fele yî fitele fi wo lese yî Klistu Jisos e.

¹⁶Fiɛ ficii fi bó saɲ ê Ɗwa' Nyo' le nu ɛ bvufee bvudvu nɛ fô Nyo' le. Ɛ fí fici keeyɛyɛi bonyii dvú, duɲci bojay, nɛci bonyii, yɛyɛi bonyii bô nce wvu teytey,

¹⁷ wvu le wee wvù è nu wee Nyo' enù ɛ wvú ɛ kpwentɛn, keɲke fiɛ ficii keege lemme dì jee dicii dvú.

2Tim 4

Ɛ Baul tefe Timatio le wvú egeè lemme diɛw ntay

¹ Me njemyi fin ê wo fwe dvu Nyo' bô Klistu Jisos wvù nu ke esaw bonyii bô beɛ dvú bô bô kpweken wase. Ɛ me njemyi nje mbuynɛn we wvù wvú nu ke ebuynɛn noo nje bvunfon bwew ɲgayte le,

² è fewcì diɛw Nyo'. È fewcì ke gene dvú, kenɛɛ è nu kefew ke lɛɲ kenɛɛ è baa nu ke lɛɲ. È duɲci bojay bo bonyii le, saakè bó, yvuwsè mvuntelem mvubole bô nyɛkeey noo n'yɛyɛi wo.

³ È keè le kefew too lo kè bonyii yaa bæe ke eleeme yî n'yæyi wvu læŋ e ke. Bitem bibole nu ke efuu keeyuuke wase ε è nu fiεε fimew jæy. È bó emum egom ε è nu bonyii bo n'yæyi le bò nu eyæyi wase ε è nu fiεε fi bó kooŋke keeyuuke.

⁴Bó nu ke ecine keeyuuke fiεε fi kecæy e, ebvuyte wase gene ε è nu ê mvumaŋgaan e.

⁵Geenen, fô wo le, è lewsè ekole kuw teytey sekecii, kuulè shém yî boŋgew e, egeè lemme di wee wvù ghane lo fewci diew Nyo' le. È geè lemme diuw dicii ntay.

⁶Fô me le nu ε me nu wase keseen diewe mbvuum e, ε kefew kocine wase kè bó nu ejo me ege dvú diewe no bó ke fuu mbvuum yî ketaŋ ke ncese le. Kefew kè me nu enkfulε nu ε kocen wase.

⁷Me nu ε ndiu wase bvudiuw bvù jee yî fiεε fi Nyo' le, ε nlewte kenlewte ε mæse, ε njice mbee wem e ε mæy yî dvú le.

⁸È kew yî keseen e nu ε bó ε gæε wase kefo kem ke bvunfon e kè è nu ke nce wvu teytey e. Kefo kin nu kè Tata wvù nu wee wvù saake bonsaw teytey nu ke ebon ê me efa yî diuu di fokemæse le. Kε wvú nu ke ebon ke ε è nu kem maan ke. Wvú nu ke ebon ten ke bonyii bocii bò kooŋke le wvú ekase eto le.

ε Baul see no mwæm nu ê keba kew e

⁹Timatio, momε naa ntay keeyanŋsen eto cekey ê me le.

¹⁰È keè le Demas nu ε koŋ wase woŋ wvu keseen wvun, ε laŋ me ε gen Tesalonika. Klesens nu ε gen Galëshia, Taytus ε gen Dalmatia.

¹¹È mæy ke Luk wvú embeŋ wvù nu bee wvú. Seke wo too, jo Mak ε ben ε wvú no too. Wvú nulo efici me baay yî lemme le.

¹²Tikikus nu ε me ε ntum wvú Efesus.

¹³Seke wo too, jo kekum kem ke baay kè me nto ŋgekεε yew dvu Kabus ê kelaante kè Towas e. È toò ten bô boŋwa' bem, efey mvunciim bò bó fe bô jéw nyam.

¹⁴Aleksanda wvù tfuyte elame nu ε ge ŋgew bô me ε è yaa nu wvu wæε ke. Tata nu ke elaw wvú yî gee diew e.

¹⁵È yenè ten ben ε wvú. Wvú kicine saaka wvù beene fewci naa lo baay.

¹⁶Yî nsaw wem e nu ε diuu di fwe dì me nto nleemεε ê kebeŋ ke nsaw e nu ε wee to baa leem lo ê me ejim ke. Bonyii bocii to nu ε lewte me. Fo Nyo' esaw bó yî fifie le ke.

¹⁷Geenen, Tata to nu ε leem ê me ejim, nya me bô mvuŋgay keenfewce saaka wvù jee ntay wvu le bonyii bò yaa nu ke Bojuu eyuw saaka wvudvu. Nonen wvú to nu ε bvuse me diuw bvule le.

18Tata nu ke ebvuuse ke me can fiε fi befe le ficii, ke eghan elese me bvunfon bwew bvu fowe le yî nyεkeey e. Beene etumtè moŋkum mew sekecii se ŋka. Fí enù nonen.

Bongayma

19 Gayε Blisilia bô Akpwila le enya ê me. Gayε ten yew Onesifolus e.

20 Elastus to nu ε shεε Kolεn, ε Toofimus nu ε me nto ncine wvú le Miletus ε wvú cεmte.

21Momε naa ntay keeto é kefew ke nffum wvù tεmyi le se kεw. Yubulus ciinse ŋgayma ê wo. Budens bô Linus noo Klawdia bô boom bo bwee wesebeene le bocii yî Klistu le ciinse ten ŋgayma.

22 Me nlεke le Tata etaalè fô keyoy kuw e. Wvú ebuw ben bocii.

Tay

Tay 1

¹ È nu me wvù Baul, ε me nu waa lemme Nyo' noo waa ntum Jisos Klistu. Lemme diem nu keenjeε ε mbee bonyii bò Nyo' nu ε caw gene fwe, bô le bó ekeè fiεε fi keceεy fi bii nce wvù è nu wvù Nyo' gomte le,

² emum etaalè fwe yî nshii wvù mey lo wvù Nyo' wvù nulo saa mbiay mbiay to kawεε ε woj se ke kew e.

³ Kefew ke lej to nu ε dioo kocen, ε wvù mum dujce diew ye endan fele yî diew ye yî me nfewci le, ε è to nya Nyo' wvù Mboyse wesebeene mvungay mvudvu ê me le me enfewci.

⁴ Me nsaanke ηwa' wvun fô wo le Taytus. Wo nu waa wem wvu keceεy yî mbee wvù è nu wesebeene bocii le. Nyo' Ice bô Klistu Jisos wvù Mboyse wesebeene ebuw wo, enya wo bô nyεkeey.

Lemme di Taytus to shεεεε Klet keege

⁵ Shiee wvù me nto ncin'yεε wo le Klet to nu le wo eshεε enele mwεem mvù nu ε lemlem, ebvuu egεε bocee bintaashe bi bonyii bo mbee le bilaante le bicii ê je yî me nto ndujceε ê wo le.

⁶ Wee keenu cee kentaashe nu ε wvù kejke keenu wee wvù yaa kejke ke fiεε fi bó ebaci wvù yî dvù le ke. Wvù kejke keenu dwee kpwoon mwaan, ε boom bew nu bonyii bo mbee le, ε è yaa nu bò bonyii yene le bó ghanghane lo kenεε temyi bikuu ke.

⁷ No cee εkole ke kentaashe le nu wee lemme Nyo', tu ke wvù kejke keekεjke fiεε fi bó ebaci wvù yî dvù le ke. Ke wvù kejke keedujci ye kenεε kejke shém yî ton'yεen kenεε nu wvù wuu mbvuum ε mó koole ke. Ke wvù kejke keenu wvù wamene bonyii kenεε wvù kuujke ke ε è nu sεw ke.

⁸ Wvù kejke keenu wvù fiisene bonyii bo ghane le, koojke fiεε fi è nu fi jee, gee mwεem bô bvufee, kejke nce wvu teyvey, kejke nce wvù yuule, kee keejice ye ye le.

⁹ Wvù kejke keenu wvù jici n'yεeyi wvù è nu wvu lej wvù bó yεeyi wvù dvù ntay, wvu le wvù enyaa ntefe ê bonyii bii ε è nu n'yεeyi wvù è nu wvu lej e, ebvuu etooshi ten bonyii bò kicine n'yεeyi wvudvu.

Bó ecilè n'yεeyi bonyii bo mbiay e

¹⁰ Me njemyi nen njefo bonyii nu dvù nteen bò temyi bikuu, bò jemyi díew yi εcici, læle bonyii, efey mvunciim ηgoo bonyii ba bò leeme ke le bó kejke keetfuuse bonyii yew.

11 Boban nu bonyii bò bó eban lo dew yibo, njefo bó ghane bvunse yéw bonyii yicii no bó yeyi mwεem mvù bó yaa kenke keeyeyi ke. E bó gee nonen ε è nu nje bigew bi ecici bì bó kuunke.

12 Bonyii ban nu ε wee wvubo mvu kebεε wvù bó duu le è nu wee ntum Nyo' wvubo to jeme wase ekumε bó gayte le, “Bonyii bo Klet ké no nu bonyii bo mbiay e sekecii. Bó nu lo nyám yi ηkpwaante yì befe, nu biwelencoy bì wuwte ke ε è nu mwεem mvudien.”

13 Njeme wvudvu wvun ekumε bó nu lo keceey. Nonen è looci tooshi lo bó dew yibole, wvu le bó ekenke mbee ε è nu wvu len,

14 efey fo bó enya bikuu bibole eyuuke ε è nu mvumangan mvu Bojuu le, keneε mwεem mvù bonyii bò nu ε tun mwεem mvu keceey mvù Nyo' gayte le bonyii ebii dvú le.

15 Bonyii dioo kenke mvuntelem mvù yuule, ε mwεem mvunciim no yuule fô bó le. Geenεn, bó dioo kenke mvuntelem mvù yiile se bó kenke mbee, fiεε saa enu dvú fi yuule fô bó le ke, njefo boηkpawace bobole bô je yì mvuntelem mvubole nu jó, nu ε befe wase.

16 Boba bonyii duu le bó kee Nyo', geenεn ε gee dibole kaa duñci le bó nu ε ma lo Nyo'. Nce wvubo nyene baay, ε bó temyi bikuu. Ke bó nu bonyii bò nulo ege naa lo fiεε fi jee ke.

Tay 2

Bon'yeyi ekumε kenge kè jee

1 Fô wo le Taytus, fiuw nu ε wo kenke keeyeyi bonyii ε è nu bô mwεem mvù cemsene ê n'yeyi wvu len e.

2 È teetè bolemse bò nu wase ηgaybonyii le bó ejici ye yibole yì fiεε le ficii, kenkè n'wvum fô bikuu bibole, geè mwεem diewe bonyii bò kenke bvufee le, kenkè mbee ε è nu wvu len, kenkè kenkonen ε è nu ke len, kuulè shém yì bongew e bocii.

3 È teetè ten bokene bò nu wase ηgaybonyii le bó ekenkè kenge ε è nu kè duñci n'wvum fô Nyo' le. Fo bó ekunsenè mvun̄kunsen ke. Fo bó enù bonfaw bo mbvuum e ke. Bó eyeyi bonyii ε è nu bô mwεem mvù jee.

4 Nonen, é bó emum eteete ηgon bokene no è nulo é bó ekoonke bole' bobole noo boom bobole,

5 bvuu geè mwεem diewe bonyii bò kenke bvufee le, ceè nce wvù yuule, tawtenè yéw yibole, kenkè mvuntelem mvù jee fô bonyii le, yuukè bole' bobole. Nonen, wee saa ebvuu enu dvú wvù nulo ejeme diew yì befe ekumε diew Nyo' ke.

6 È nu ke lenlen no wo nu ejemyi ê cubonyii le bó kenke keegeè mwεem diewe bonyii bò kenke bvufee le.

- ⁷ È duŋcì keŋge kè jee yî fiεε ficii fi wo gee le, wvu le bonyii eyenè beŋene. Seke wo yεeyi bonyii bô fiεε, ε wo lese fitele fiuw ficii yî dvú le, no yεeyi bô shiee,
- ⁸ ε njeme wo nu wvu leŋ wvù è nulo wee saa ekeŋke fiεε fi befe keejeme ente jodvu ke. Nonen, é bonyii bô kicine beene ewuumen njefo ke bó keŋke fiεε fi befe keejeme ekume beene ke.
- ⁹ È teetè bonfaw le bó enya bikuu bibole ê bonyii bô keŋke bó, egeè fiεε ficii no bó gomte le bó egeè. Fo bó etfuusè fiεε dew yibole ke.
- ¹⁰ Fo bó esoŋkè mwεem mvubole ke. Bó keŋke keeduŋcì lo ê jé le yicii le bó nu bonyii bo keceey e. É bó gee nonen yî fiεε ficii le, é bonyii emum eyene n'yεeyi wvu ekume Nyo' wvù Mboyse wesebeene le, le è nu fiεε ε fí keŋke njon.
- ¹¹ È yεeyi bó nonen, njefo mbuwma Nyo' keeboyse bonyii nu ε to wase wvu le è nelo é bonyii bocii ke eboy.
- ¹² Mbuwma wvun yεeyi beene le beene ecine nce wvù yaa nu ke wvù Nyo' gomte le, bô le fo beene ekeŋke shiee wvu baay yî mwεem mvu yî nshe le ke. Le beene eceè bô bvufee bvuseεbeene fó bvucii, ceè nce wvu teytey noo nce wvù Nyo' gomte yî won wvun e.
- ¹³ Beene eceè nonen, ceyte bvujonke bvù beene taale fwe yî dvú le bvù nu ke ebuynen, bvù è nu bvukuke bvù Nyo' wesebeene wvu baay wvù è nu Mboyse wvù Jisos Klistu le.
- ¹⁴ Wvú to nu ε nya ekole kew nje yese beene keesum beene yî bibefe le bicii, keege é beene eyuule, nu bonyii bew bô keŋke shiee wvu baay keege gee di jee.
- ¹⁵ Mvun nu mwεem mvù wo keŋke keeyeyi bonyii dvú. È teetè bó, duŋcì bojay bobole bô mvuŋgay mvunciim mvù wo keŋke. Fo wo ebee é wee ejin wo ke.

Tay 3

No è nulo é gee di bonyii bo mbee le enù

- ¹ È tamcì bonyii bo mbee le le bó eyuukè bonyii bô saake won bô bô keŋke mvuŋgay ê bó we le. Bó egeè fiεε fi bó gayte, enù ε bó ε seyse keege fiεε ficii fi è nu fi leŋ.
- ² Fo bó ejemyi fiεε fi befe ekume wee ke. Fo bó ewaalè diwaa ke. Bó enù wεε, joo bikuu bibole fokuse fwe dvu bonyii bocii.
- ³ È kumyi le beene ten to shee gee keyuŋ, temyi bikuu, jayte je. Beene to nu bonfaw bo mwεem e jεey jεey mvù ye yesebeene to koonke, bvuu diee bikuu bisεεbeene. Beene to cee nce wesebeene keŋke ke ε è nu mvuntelem mvù befe bô kendon ke benεen, ε bonyii bane beene ε beene bane ten bonyii.
- ⁴ Geenεn, ε Nyo' wvù Mboyse wesebeene ke dīoo duŋce fitele fiew fi jee bô keŋkonεn kew fô beene le,

⁵ mum boyse beene. Ke wvú to boyse beene nje fiεε fimew fi læη fi beene to gee ke. Wvú to boyse nje shen ye fele yî ncuke wvù wvú to cukεε beene ε beene keηke mboo wvu fwε le, ε Keyoy ke Yuule kumen beene ε beene no nu bonyii bo bofε keηke nshii wvu fwε.

⁶ Keyoy ke Yuule kin nu ε wvú to loocε tfuw lo yî yese beene le fele yî Jisos Klistu wvù Mboyse wesebeene le.

⁷ Wvú to ge nonen wvu læ wen ebuw lo beene, ejo beene læ beene nu sε jay, emum enu bondiela bew taale fwe keeke ekeηke nshii wvù mεy lo.

⁸ Njeme wvù me njeme wvun nu naa lo kecεεy. Me nshieele naa læ wo ejemyî ciise lo mwεem mvun ê bonyii, wvu læ bonyii bò nu ε bee Nyo' le eyen læ bó enya bikuu bibole keegeε gee di jee. Mvun nu naa mwεem mvù jee baay, ε mvú too bô sεw fô bonyii le bocii.

⁹ Geenεn, è wεmtè bombew bo keyuη e, bô εdiee ε bo'icee dikfuu yò bonyii ke she taanke. È wεmtè ten mvuηkicεn bô diwaa di εkumε bonci bo Bojuu le. Ke mvumvun mwεem keηke naa lo sεw ke. È nu mwεem mvu εcici.

¹⁰ É wee nu dvú wvù too bô keηgawsen, é wo jeme ê wvú. É wo jeme ê wvú kaη mwaan ε buy bokaη bofεε sε wvú lu, é wo cinε je ye le.

¹¹ È keè læ wvuwe wee nu ε wvú ε cinε wase je yi læη e ε no bvuyte lo, ε nce we nu wvu kebefε, ε wvú ε lese wase εkolε kew ηgew e.

Njeme bô bongayma bo fokemεse

¹² Me nu ηke enciinse Atemas kenεε Tikikus fô wo le. Wvú ke dioo ε to, ε wo mom naa ntay keeto fô me le Nikobolis. È nu jó jò me nu ε nseyse læ me nu ηke enu yî kefew ke nffum wvù temyi le.

¹³ Momε naa ntay keeficε Senas wvù wee wvù looci kee bonci, bô Abolos yî læne dibole. Momε eyen læ bó nu ε keηke fiεε ficii fi bó shieele.

¹⁴ Bonyii bosεεbeene ten keηke keeyεyi keenya bikuu bibole keegeε dilemme di jee, wvu læ è nulo é bó efici yî mwεem mvù nu shiee le læ bó eficε le. Fo bó enù ke lo εcici ke.

¹⁵ Bonyii bocii bò nu fen bee bó ciinse ηgayma ê wo. Gayε bonyii bo mbee le bocii bò kooηke beene. Nyo' ebuw ben bocii.

Flm

Flm 1

¹ È nu me wvù Baul, ε me nu yî ncaw e nje me nu wee Klistu Jisos. È nu bee waa bwee wesebeene wvù Timatio. Me nsaan̄ke ηwa' wvun fô Filemun wvù nsaa yesebeene shém wvù bee bó lemte yî fiεε le fimwaan̄,

² noo fô Afia wvù jeme yesebeene le, bô Alkibus wvù beene ε bó diuu yî fiεε le fimwaan̄ diewe bonyii bo jem e, noo fô kentaashe ke bonyii bo mbee le kè taashi ê wo yew e.

³ Nyo' Icee wesebeene bô Tata Jisos Klistu ebuw ben bô kembonen, ebvuu enya ben bô mvuntelem mvù læetene.

ε Baul nya keyoone ê Nyo' nje Filemun

⁴ Filemun, me ηke ndioo mbunlee sekecii en̄kume wo, no nyaa ke ε è nu keyoone ê Nyo' wem ekumε wo,

⁵ njefo me n'yuuke no wo nu ε lese fitele yî Tata Jisos e, ε no koon̄ke bonyii bô è nu bo Nyo' le bocii.

⁶ Me ε no mbunlee læ no wo nu ε lese wase fitele yî Jisos e, ben ε bonyii bo Nyo' le ε no nu yî kentaashe le, fifin ege é wo emese ekiεε mwεem mvù jee mvunciim mvù è nu mvuseεbeene bô nu ε taashe bô bo Klistu.

⁷ Waa bwεem, kfuu ken̄kon̄en kè wo ken̄ke fô bonyii bo Nyo' le, gee ε mvuntelem mvubole læetene, nu ε ge me ε no n'yuuke njon̄ baay, ε fitele fiem ten yvuwse.

ε Baul læke Filemun ekumε Onesimus

⁸ Fiεε fimew ε mum ε no nu dvú fi me nshieele læ wo ege, ε è be nulo é me en̄gay lo bô mvun̄gay mvù me ηken̄ke diewe wee Klistu le læ wo ege.

⁹ Geen̄en, nje ken̄kon̄en, me nu en̄ku lo can ê wo. Me wvù Baul nu wase ηgaywee, ε me mbvuu nu yî ncaw e keseen nje saaka wvu ekumε Klistu Jisos.

¹⁰ Me ε no ηkule can ê wo ekumε waa wem wvù Onesimus wvun. Me nto njo wvú waa wem e yî mbee le nu yew ncaw e fεn.

¹¹ Fwele to nu ε wvú nu fiεε fi εcici fô wo le. Keseen wvú ε no looci wase nu naa wee fô bee wo le bocii.

¹² Me ε no ntfuuse wvú jim fô wo le keseen. Wvú looci nu fitele fiem.

¹³ Me ηkoon̄ke læ è be nulo é me en̄geε wvú mbew yem e é wvú etaale fô me le fô bvudvuu bwuw e no me nu yî ncaw e fεn nje saaka wvù jee wvu ekumε Jisos.

¹⁴ Geen̄en, me ε n'yen læ ke è nulo é me en̄ge fiεε diewe fifin e sε wo kee fó ke, njefo ke me ηgomte læ lemme diuw d̄i jee d̄i wo gee fô me le en̄u ke diewe me ηkane lo wo ke. Me ηgomte læ f̄i en̄u no fitele fiuw nu ε bee.

15 Sekemew ε Onesimus to nε ê wo εjise yî kefew e caan nen, le wvú ke dioo ε tu jim, é ben ε wvú emum enù wase kemakaa,

16 ε wvú yaa bvuu nu nƒwa ke, ε wvú fele wase nƒwa. Wvú nu wase waa bwoo shém yî Klistu le, ε wvú nu ten fô me le baay se ge fô wo le, no wvú nu wee wo lemme bvuu nu wee Tata.

17 Nonen, é wo fεn nu ε yen le bee wo nu yî kentaashe le, é wo fiisen wvú no è be nu me é wo efiisen.

18 É è nu le wvú to nu ε jay fiε fô wo le, kenεε le, wvú kenke fioo ben ε wvú, é wo gεε ê diee diem e.

19 Me nsaanke fin ε è nu bô kebo kem le, “Me wvù Baul nu ηke enlaw.” Me njemyi nen ε ke shiee nu dvú wvù me nshe nseηe lo le, wo ten kenke fioo bee wo ke. Nshii wvù wo kenke keseen nu nje me.

20 Nonen waa bwεem, ficε ke me njefo bee wo nu bonyii bo Tata le. Gee nonen nje kentaashe ke bee wo le yî Klistu le é ye ejon me.

21 Me nsaanke ê wo nen, ηkee naa ntay le wo nu ebee keεge fiε fi me ηgayte, ε wo nu dioo gee, ege naa efesen lo.

22 Keebvuu bise fó, seyse bvudvuu bvu nce le ê me, njefo me ntaale fwe ηkee le Nyo' nu eyuw bunle yene eciinse me fô ben e.

Ŋgayma

23 Ebaflas wvù nu bee bó yî ncaw e fεn nje saaka wvu ekumε Klistu Jisos, gayte wo le.

24 Maaku, Alistakus, Demas noo Luk bò bee bó lemte yî kentaashe le, gayte ten wo le.

25 Tata Jisos Klistu ebuw ben bô kembonen kew é kí eficì biyoy binen.

Ibu

Ibu 1

Nyo' nu ε jeme wase ê beene ε è nu diuw Waa we le

¹È to shee nu fwele, ε Nyo' jemyi ê bo'icee bosεbeene dew bonyii bew bo ntum e bokaη e nteen bô ê jé le jεεy jεεy.

²Geenen, è dioo nu εdiuw εyan yo fokemese le, wvú ε jeme wase ê beene ε è nu diuw Waa we le. È nu Waa we wvun wvù wvú nu ε gee le wen nu ke enya fiεε ficii can ye le é wvú esaakè. Ε è nu wvú wvù Nyo' to bomεε woη bô fiεε ficii can ye le.

³N'yu Nyo' lawkene yî ye le, ε wvú nu wunte Nyo' kebεε. È nu wvú wvù gee ε ebule bô nshe se nu dvú. Ε wvú gee ε è nu bô diew ye yì keηke mvuηgay e. Wvú to nu ε man bibefe bisεεbeene. No wvú man nonen mum ben we shii ê εbo ke εεεy ke Nyo' Bvukuke le.

Waa Nyo' kuuke fele bonceendaa bo Nyo' le

⁴Fí ε mum ε no nu le Waa Nyo' kuuke naa baay fele bonceendaa bo Nyo' le, ke leηleη no diee di Nyo' teje wvú dvú kuuke naa ten baay fele dibole.

⁵Beene kee le wvú kuuke lo njefo ke nceendaa Nyo' mvu nu dvú wvù Nyo' ke nu ε yuu wase gay ê wvú le, “Wo nu Waa wεm, ε eben nu ε me ε ηgay wase le me nu Ico” ke. Ε ke mvu nu dvú wvù wvú ke nu ε yuu wase jeme ekumε wvú le, “Me nu ηke enu Ice, ε wvú nu Waa wεm” ke.

⁶È to nu kefew kè Nyo' to nu keetum Waa we wvu fwe wvun yî woη wvun e, ε wvú gay le, bonceendaa bowene bocii ewvumtè wvú.

⁷Ε fiεε fi Nyo' to jemyεε ekumε bonceendaa bew nu le, wen gee ε bó nu diewe fwefwe le, gee ten ε bó bô nu bonyii bowene bo lemme le nu diewe elem ε ηguy e.

⁸Ε dioo tu fô Waa we, ε wvú gay le, “O Nyo', wo nu ke eshii yî kawla wo le esaake sekecii se ηka. Nce wvu teyten nu ke enu ketoome ke bvunfon bwuw e.

⁹Wo kooηke ε è nu fiεε fi teyten, bane fi befe. Nonen me wvù Nyo' wvù nu Nyo' wo ε mum ε mbense wo ε nfey ηgoo yo, no me nu ε n'yefe wo bô nsusu bonfon yì è nu yi bvujonke.”

¹⁰Ε wvú bvuu jeme ten ê Waa we le, “Tata, è nu wo wvù to bomεε nshe foηkew, ε mwεem mvunciim mvù nu we nu lemme di εbo kuw e.

¹¹Mwεem mvun nu ke eka, geenen é esheε ke wo. Mvú nu ke eyvumen diewe ndvú le.

¹²Wo nu ke ekewe mvú diewe kekum e. Mvú nu ke ekumen diewe no ndvu ké kpwe ncom. Geenεn wo nu ke emey ke nu no wo nu. Ke bilim biuw nu ke eyuu eka ke.”

¹³È nu nceendaa Nyo' mvu wvù la wvù Nyo' ke nu ε yuu wase gay ê wvú le, “Shiile ê εbo kem ke εεεy e, egen ebuy kefew kè me nu ηke enjike bonyii buw bo bvuban e ê wo εjise diewe kedvuushεε ke bikaa biuw e,

é wo etome bikaa yî bó le?"

14 Bonceendaa bo Nyo' le ban nu ke lo biyoy bì lemte Nyo' le, ε wvú tumte ε bí ghane fici bonyii bò nu ke ekeṅke mboyma.

Ibu 2

Fo beene emwase mboyma wvù Jisos to ghane fewci ekumε wvú ke

1 Fí ε mum ε no nu le beene keṅke keegεε bvufee naa ntay yî fiεε fi beene to yuwεε le, wvu le fo beene ke ene ebvuyte lo ke.

2 Beene kpwaake le, é bontum bò bonceendaa bo Nyo' le to teete fwele to nu fiεε ε fí temyi naa baay, é wee ké engoy mvu kenεε etun keege no bó gayte, é mwεten keṅke nlawma wvudvu ke leṅleṅ,

3 é ke ege la é beene enu se bó ε yen ṅεw fen ε beene ε jo mboyma wvù kuuke wvun ke lo ncew? Mboyma wvun to yaw Tata Jisos no fewci ekumε wvú, ε bonyii bò to yuwεε no wvú fewci ke mum tom ten keceεy kedvu no bó to fewci ê beene.

4 E Nyo' ten to nu ε tom bô mwεem mvù duṅci mvuṅgay mvu mwew noo biṅhaw bi mwεem e noo mwεem mvu diuw wvù yumεen e mvù bó to gee. E wvú bvuu gawce nnyá Keyoy ke Yuule no wvú to shieele keetom dvú.

Jisos nu wee wvù nu ε ceε je mboyma fô beene le

5 Nyo' to baa gεε woṅ wvu fwe wvù bese fewci ekumε wvú wvun le è nu ke esaake bonceendaa bew ke.

6 Bó nu ε saṅ bvudvuu bvumew e ê Nwa' Nyo' le ekumε saaka wvun le, "Wee wvu wum nu naa la wvù wo kpwaake ekumε wvú? Waa wee wvu wum nu naa la wvù wo keṅke shiee we?"

7 Yí kefew e nen caan nu ε wo to ge ε wvú no nu yî bvudvuu le ε bvú nu ekuse jo bvu bonceendaa buw e. E wo ke ghaa wvú ε wvú no keṅke bvukuke bô n'wvum.

8 Wo nu ε gεε mwεem mvunciim ekuse jo wvú, wvú ε no saake." No Nyo' to gεεε mwεem mvunciim ekuse jo wee wvu wum, fiεε fimew baa bvuu nu dvú fi nu se fí nu ê wvú ekuse ke. Naa no fí cim nu nonen, nu ε ke beene yene wase le mwεem mvunciim nu ê wee wvu wum ekuse ke.

9 Geenεn Jisos nu wee wvù beene yene le yî kefew e nen caan nu ε Nyo' to ge ε bvudvuu bwew no nu ekuse jo bvu bonceendaa bew e. E Nyo' ke bense wvú ε wvú no keṅke bvukuke bô n'wvum njefo wvú to nu ε yen ṅεw kpwe, wvu le wvú ekpwe kpwe wee tfuu nje mbuwma wvu Nyo' fô bonyii le.

10 È nu Nyo' wvù ge mwεem mvunciim, ε mwεem mvunciim nu mwew. No wvú to gomte le wen nu ke ejo bonyii bocii bò è nu boom bew é bó eley bvukuke bwew e, ε fí mum no nu naa leṅ le wvú ege é Jisos eyen ṅεw wvu le wvú enù ε wvú ε kpwenten ε gen ε mese wee wvù eceε je mboyma fô bó le.

- 11 Wvú wvù Jisos wvù gee ε bonyii se yuule ê Nyo' ejise, nu ε bô bonyii bodvu bô wvù gee ε bó yuule, keŋke Icee bó mwaan. Ê nu fiεε fi ke wvù wuumene keeteŋe bó le boom bo bwee wen e ke.
- 12 Wvú to nu ε gay ê Nyo' kefew kemew e le, “Me nu ŋke encawsee diee diuw we ê boom bo bwεem e ente. Me nu ŋke en'yemte mbensee wo ê kentaashe kebole ente.”
- 13 Ε wvù bvuu gay le, “Me nu ŋke eŋgeε bvufee bwem yî Nyo' le.” Bvuu kase gay le, “Me wvun fen bee boom bô Nyo' nu ε nya ê me bocii.”
- 14 No boom bô wvù gayte ban nu bonyii ε bó keŋke nyam ye bô ελεμε, ε wvù wvù Jisos mum jo ten nyam ye wee wvu wum, wvu le è nulo é wvù ke ekpwe keengoy dεwle wvù keŋke mvuŋgay mvu kpwe le.
- 15 Ε wvù ke ge nonen mum bvuse bonyii bô to cee bvunfaw e yî nshii wvubole tfuu njefo bó to fane kpwe.
- 16 Fí looci yuule naa ntay le ke wvù to keŋke shiee ε è nu fô bonceendaa bo Nyo' le ke. Wvù to keŋke ε è nu fô kfuu di Abla'am e.
- 17 Ê nu fiεε fi to gee ε Jisos se tu diεwe boom bo bwee le yî fiεε le ficii, wvu le wvù enù ekole ke bocee ncese le kebole wvù camte shen fô bó le, ε wvù ε lese ten fitele yî lemme di Nyo' le keege keman é Nyo' eleεshe bibefe bibole.
- 18 No wvù to γεεε ηγεω, ε mmom to fô wvù le, wvù ε mum ε no kee no è nulo é wvù efii bonyii bô mmom too ten fô bó le.

Ibu 3

Jisos kuuke fele Muses

- 1 Nonen boom bo bwεem e bô è nu bonyii bo Nyo' le, ε bó ε tee ten bó le bó ke eley won wvu we le, ben egεε bvufee yî Jisos e. Wvù nu waa ntum Nyo' bvuu nu ekole ke bocee ncese le ke mbee wvù beene ké no seŋe ê bonyii le.
- 2 Wvù to lemte bô fitele fiew ficii fô Nyo' wvù to γεκεε wvù le wvù elemte wvù le ke no Muses ten to lemte bô fiew fitele ficii yew dvu Nyo'.
- 3 Geenen, Jisos nu wee wvù bó ebenseè ntay fele Muses ke lenlen no wee ké bomte yew ε bó no bensee wvù fele yew yidvu.
- 4 Ke yew mi nu dvú yî nu se è bom wee ke. Geenen, Nyo' nu wvù bom mwεem mvunciim.
- 5 Muses to lemte naa ntay bô fitele fiew yew Nyo' le yicii diεwe waa lemme le. Ε mwεem mvunciim mvù wvù to gee to tomte ε è nu fiεε fi Nyo' to nu keeke eyuu ejeme.

6 Ɛ Klistu ke lem ten yew dvu Nyo' bô fitele fiew ficii ɛ è nu diewe waa yew e. Yew Nyo' yin nu beene fen é beene leeme tɛmyi yî fiɛɛ fi beene nu ɛ kuu shém ɛ no taale fwe yî dvú le bô kembense ye.

Fo wee emwase fiɛɛ fi Nyo' le ke

7 Beene eyuw le fiɛɛ fi Keyoy ke Yuule to gayɛɛ. Kí to nu ɛ gay le, “É ben yuw lo ɛ Nyo' ɛ jeme ê ben ɛben,

8 fo ben eteme bikuu diewe no bo'icee bonen to sɛenene bô bo Nyo' diuu di bó to momte Nyo' ɲkpwaante ke.

9 È nu jó jò bo'icee bonen to momɛɛ me wvù Nyo', yen biɲghaw bi mwɛɛm e bi me nto ɲgeɛ fô bó le yî bilum e mbaanyɛ.

10 Nonen ɛ me nton'ye shém bee ɛngokɛ ke bonyii le kedvu, mum ɲgay le, ‘Kɛ mvuntelem mvubole ké no nu naa lo yî yem e ke. Bó baa kee wase je yem ke.’

11 Ɛ shém ton'ye me ɛ me nlew lo le, ‘Kɛ è nu naa lo é bó ke eyuu eley bvudvuu bwem bvu nlɛɛten e ke.’”

12 Boom bo bwɛɛm e, ben emum eyenè fo wee mvu ben e enù dvú wvù keɲke fitele fi befe, fi tune keebɛ Nyo' le, nulo ege é ben ene ebase jim ê Nyo' wvù keɲke nshii le ke.

13 Fiɛɛ fi ben keɲke keegɛ nu le ben eteetè bikuu binen ɛdiuw ɛcii, no kefew kin nu kí kè bó teɲɛ ê Ɗwa' Nyo' le le, “Ɛben.” Ben egeè nonen fo fiɛɛ fi befe fimew ke ene elɛwɛɛ wee é wvú ene etɛmyi ɛkolɛ.

14 Ben ekeè le beene nu wase fiɛɛ fimwaaɲ beene ɛ bo Klistu fen é beene ɛ mey ɛ no jici fiɛɛ fi beene to leeme wase yî dvú le fwele ɛ gen ɛ mɛɛɛ.

15 Ben ekumyi fiɛɛ fi le, “É ben yuw lo ɛ Nyo' ɛ jeme ê ben ɛben, fo ben eteme bikuu diewe no bo'icee bonen to sɛenene bô bo Nyo' ke.”

16 È nu baa bò to yuwɛɛ ɛ Nyo' ɛ jeme ê bó ɛ bó mwase lo no sɛenene bô wvú? Kɛ è nu bonyii bocii bò Muses to joɛ Ijiw buy bô bó le?

17 Ɛ è nu baa bodvu bò Nyo' to ton'yɛɛ shém bô bó yî bilum e mbaanyɛ? Kɛ è nu ke bó bò to geɛ bibefe, ke kpweken ɲkpwaante jodvu le?

18 Ɛ è bvuu nu baa bò Nyo' to lewɛɛ le ke è nu naa lo é bó ke eyuu eley bvudvuu bvuwene bvu nlɛɛten e ke? È nu ke bó bodvu bò to tɛmyi bikuu le?

19 Nonen beene nu ɛ yen le ke bonyii bodvu to nulo egen eley bvudvuu bvudvu le ke, njefo bó to baa lese fitele yî Nyo' le ke.

Ibu 4

Ɛkumɛ keeley nlɛɛten wvù wvu Nyo' le

1 Fí ɛ mum ɛ no nu le ɲkawma wvù Nyo' to gekɛɛ le bonyii nu ke eley nlɛɛten e bɛɛ leeme ke fô. Nonen beene emum eyenè fo bó ke dioo etaa eyen ɛ wee mvu ben e baa ekocɛn keeley wvú le ke.

²Saaka wvù jee wvun nu ε to wase fô beene le κε ληληη no wvú to toε fô bó le. Geenεn, saaka wvudvu wvù bó to yuwεε to baa fi bó κε, njefo wvú to to fô bó le ε bó φαε yaa bee wvú le κε.

³Fô beene bò nu ε bee wvú le nu ε beene nulo eley nλεεten wvudvu le. Ε bonyii bomew ba nu ε Nyo' to gay λε, “Shém to nu ε ton'ye me, ε me nlew lo λε, ‘Κε bó nu ke eyuu eley naa lo nλεεten wεm e κε.” Nyo' to jemyi nen, naa ε lemme diew to ka wase fonkew seke wvú to bomεε wonη.

⁴Beene kee λε bó nu ε saη ê Nwa' Nyo' le bvudvuu bvumew e εκumε diuu di ediuw εsooshwiγ ê yin je le λε, “Nyo' to nu ε lem lemme diew dicii, ε è ke dioo yiηsen ediuw εsooshwiγ ε wvú λεεten.”

⁵Ε dioo nu bvudvuu bvù bó be jemyi wase fó bwε λε, wvú ε bvuu ε jeme λε, “Κε bó nu ke eyuu eley naa nλεεten wεm e κε.”

⁶Fί nu kecεεy λε nλεεten wvun bεε κε fó. Ε bonyii bomew nu ke eley wvú le. Ε bonyii bò to yawεε yuw saaka wvù jee wvun to baa λey nλεεten wvun e njefo bó to nu ε yuw, geenεn tun keεge no wvú gayte.

⁷Nonεn ε Nyo' mum kase gεε diuu dimew dì wvú teηe λε “Εben.” No wvú γεκεε ke mum jeme diuw Nfon Dawe λε ε bilum ε fey wase nteen no bonyii bodvu to tunεε keεge no wvú gayte. Ε fiεε fi wvú to jemyεε nu fí fi beene be yuuke wase λε, “É ben yuw lo ε Nyo' ε jeme ê ben εben, fo ben etεme bikuu κε.”

⁸É è nu λε bvudvuu bvù Yoshua to joε bonyii gen λey bô bó fó to nu wase bvudvuu bvυ nλεεten e bvudvu, tu κε Nyo' to bee ebvuu ejeme εκumε diuu dimew λε è nu di nλεεten e κε.

⁹Fί ε mum ε no nu λε diuu di nλεεten e bεε dvú fwe fô bonyii bo Nyo' le diewe dì Nyo' to λεεtenεε dvú die λε.

¹⁰Fί ε no nu λε, é wee λey nλεεten wvun e, tu mwεten ε λεεten wase yî lemme diew e dicii ληληη no Nyo' to λεεtenεε yî diew lemme λε.

¹¹Nonεn beene emomtè ntay keeke eley nλεεten wvun e, wvu λε fo wee mvu ke egbwe λε è base εκole κè temyεen wvú diewe bonyii bo fwele ba λε κε.

¹²Ben ekeè λε diew Nyo' κηηke nshii, lemte. Yí koole fele nyo yì bó nu ε fon biba bicii. Yí ké no λeyte gene buyte fô nshii bô keyoy ke wee λε taashi, λeyte ten ê biyuy bô bikufe bi wee λε. Yí ké no bwaashi bonkpawce noo mwεem mvù nu ê fitele fi wee λε.

¹³Κε fiεε nu naa lo dvú fi Nyo' nu ε bom fi nulo enyiime ê wvú εjise κε. Mwεem mvunciim yen'yi ê wvú εjise endan. Ε è nu wvú wvù beene κηηke keeke etaje diuw ê wvú fwe.

Jisos nu εκole ke bocee ncese le ke baay

¹⁴ Nonen no beene be ε gay wase le beene keηke ekole ke bocee ncese le ke baay, kè è nu Jisos wvù Waa Nyo', ε wvù ε ben wase ε tosen ebule ε gen fowe, beene emum ejicì mbee wvù beene ké no seηe ê bonyii le ntay.

¹⁵ Ke ekole ke bocee ncese le kesεεbeene kin nu wee wvù nulo emaa kewεεye kesεεbeene wvu le wvù ecamtè shém fô beene le ke. È nu wee ε mmom to to wase ten fô wvù le jé le jé le no yí too fô beene le, geenen ε wvù faηe yaa ge kebefe ke.

¹⁶ Nonen beene emum ebencì too mbew kawla mbuwma Nyo' le se nfan wvu le wvù ecamtè shen fô beene le, é dīoo nu kefew kè fieε ghaake beene é wvù ebuw beene bô nfi we.

Ibu 5

¹ Beene kee le bó ké baale ekole ke bocee ncese le ê bonyii enteleη egεε le wvù elemtè Nyo' le nje bonyii, ε wvù mum no joo nnyá bonyii feese ê Nyo', gee ten boncese fô bibefe bi bonyii le.

² No wvù wvù cee ncese nu ten ε wvù wεεyi jé le nteen, ε wvù mum no kee keenu nyεkeey bô bonyii bô yaa kee ke mwεem bvuyte lo le.

³ Nje kewεεye kew kin, ε wvù mum no keηke keegeε boncese fô biew bibefe le ke leηleη no wvù gee fô bi bonyii bomew e.

⁴ Ke wee nulo ebense ekole kew le wen enù ekole ke bocee ncese le ke. È ké baa Nyo' mweten ke leηleη no wvù to baleε Elon.

⁵ È nu ke leηleη no ke Klistu to baa bense ekole kew le wen enù ekole ke bocee ncese le ke. È to geke Nyo' wvù mum gay le, “Wo nu Waa wem, ε eben nu ε me ε ηgay wase le me nu Ico.”

⁶ Ε wvù bvuu gay bvudvuu bvumew e ten le, “Wo nu cee ncese wvù mey lo ê je yì Melkisedek nu jó le.”

⁷ È to nu seke Jisos to nu fokuse fen, wvù to ké no bunlee sekecii lεke fô Nyo' le, beele foweεwe shiwse misem fô wvù wvù Nyo' wvù nulo efi wvù can kpwe le. No è to nu wee ε wvù fane bvuu wvumte Nyo', ε Nyo' mum yuw bunle ye.

⁸ Naa no Jisos to nu Waa Nyo' nonen, bongew bô wvù to yεnεε to nu ε ge ε wvù yεεyi keeyuuke ke ε è nu Nyo' le.

⁹ Ε Nyo' ke ge ε wvù no nu wee wvù nu ε kpwenten ε gen ε mese, wvù eboysee bonyii bô yuuke wvù le. Ε mboyma wvun nu wvù nu se ηka.

¹⁰ No Nyo' gee nonen mum gεε wvù le wvù enù ekole ke bocee ncese le diewe Melkisedek e.

Fo wee Klistu ebvuu etfuw bikaa ke

11 Mwɛɛm nu dvú nteen mvù bese bɛɛ kɛɲke keejeme ekume saaka wvun. Geenɛn fí tɛmyi keenele é fí eyuu fô ben e, njefo ben nu ε nɛ wase ε no lɛɛ baay keeyuw fíɛɛ.

12 É è be nu ê lɛɲ e, tu è be yɛɛyi wase ben bonyii keseen. Ben ε kaa ε nɛ ε no nu lɛ bó ebvuu ekase eyɛɛyi lo ben bô mwɛɛm mvu ekume diɛw Nyo', ε è nu mvù bó ké yaw kɛw yí dvú le. Ben bɛɛ diɛwɛ mvunley mvu boom e mvù bɛɛ yamte ε è nu emben, ε bó baa diee wase mwɛɛm mvudien mvù tɛmyi kɛ.

13 Kɛ è nulo é wee wvù bɛɛ yɛɛyi lo diɛw Nyo' ekee fíɛɛ fí lɛɲ ê Nyo' ejise kɛ. Wvú nu diɛwɛ finley fí wan e fí bɛɛ yamte ε è nu emben e.

14 Mwɛɛm mvudien mvù tɛmyi nu ε è ké no diee bonyii bò nu ε bó ε taw wase. Boban nu bonyii bò nu ε bó ε yɛɛyi wase keetaasse mwɛɛm kee jɛɛy jɛɛy mvù jee bô mvù befe.

Ibu 6

1 No fí nu nonɛn, beene emum ecinɛ n'yɛɛyi wvu ekume Klistu wvù wee ké yaw kɛw yɛɛyi le, egenè fwe ε è nu yí wvu bonyii bò nu ε taw wase le. Fo beene ebvuu ekɛw eleesè kenffuy ke n'yɛɛyi le kè lɛ bonyii ekumen mvuntelem mvubole yí gee dibole dì nulo etoo bô kpwe, noo n'yɛɛyi wvù lɛ bonyii elese fitele yí Nyo' le kɛ.

2 Kɛ è nulo tɛn é beene ebvuu ekɛw eyɛɛyi lo ekume no bó cuke bonyii, bô keegɛɛle can yí bonyii le kɛ. E kɛ è nulo é beene ebvuu ekɛw eyɛɛyi ekume mbuy wvu yí kpwe le bô ekume nsaw wvù nsumtɛn wvudvu nu wvù mɛy lo kɛ.

3 Mwɛɛm mvun nu ε beene nulo ecinɛ dvú egenè fwe fɛn ε Nyo' ε fí.

4 Beene ecinɛ dvú njefo é bonyii nu ε bó to yuuse wase bó yí fíɛɛ fí Nyo' le, ε bó ε mom wase nnya yì nɛn'yi fowe, ε bó ε kɛɲke wase tɛn Keyoy ke Yuule, ε nɛ ε kase ε tfuw bika, tu kɛ je nu naa lo dvú yì è nulo é bó ebvuu ege é bó ekumen mvuntelem mvubole ekase etu jim kɛ.

5 Boban bonyii nu ε bó ε mom wase bvujonkɛ bvu diɛw Nyo' le ε yuw, ε bvuu ε kíɛɛ mvunɲay mvu nshii wvù too le.

6 É bó ley wase mwɛɛm mvun e, ε kase ε tfuw bika, tu kɛ je bvuu nu dvú keege é bó ekase ekumen mvuntelem mvubole etu jim kɛ, njefo fíɛɛ fí bó ge nu ε bó kaase joo ε è nu Waa Nyo' taa yí kentam e bô can yibo, shoose ya le.

7 Wɛɛ wvù jaɲ gbwee yí dvú le sekecii ε wvú nyaa mwɛɛm mvù bonyii bò bó lem wɛɛ wvudvu nje bó lɛ bó eboytè yí dvú le, ké no kɛɲke kembonen ke Nyo' le.

8 Geenɛn, é è kuu bisafe bô bíay wɛne dvudvu, tu è nulo é bó eciese lo wvú, ke emum enɛ eton lo.

9 Nsáa yese shém, naa no bese cim jemyi nɛn, bese kee lɛ ben leeme finɛn ε è nu yí mwɛɛm mvù jee fele mvubole, ε è nu mvú mvù too bô mboyma fô ben e.

10 Kε Nyo' nu Nyo' kenlow wvù nulo ke edaaye lemme dinen dì ben lemte noo kenkonen kè ben dunji ε kew lo ε to ε buy keseen e fô bonyii bò è nu bew e nje ye ke.

11 Shiee wese baay nu le wee bô ekole kew eleemè ke yî fifie fiee le nonen egen emese, wvu le ben ke ekenke fiee fi ben nu ε lese bvufee bvucii ε no taale fwe yî dvú le.

12 Fo ben egeè ngoy ke. Ben ebenen bonyii bò to lesε fitele yî Nyo' le, no kuule shém sε ke kenke fiee fi Nyo' to kawε.

Kε Nyo' ké kumen nkawma we ke

13 Ben ekume seke Nyo' to gee nkawma ê Abl'am. Wvú to dioo gee kan ε è nu diee diew di wvú wvù Nyo' le, njefo ke wee mvu to bvuu nu dvú wvù kuuke fele wvú, wvù wvú ekan diee diew ke.

14 Wvú to dioo kan gay le, “Kecεy, me nu nke embuw wo enge é boom buw elone lo.”

15 No Abl'am yuwεε nonen, mum no nu nyεkeey, ke mum ghan kenke fiee fi Nyo' to kawεε fidvu.

16 È nu kecεy le wee ké diee kelew ekan ε è nu diee di wee wvù kuuke fele wvú le, ε kelew kedvu mum sumten nsaw.

17 È nu ke lenlen no Nyo' to dioo gee nkawma no gomte keege le bonyii bò nu ke ekenke fiee fi wvú kaw fin, ekieε naa ntay le ke wen ké kumen fiee fi wen gomte ke. E wvú dioo kaw mum die kelew.

18 No Nyo' to kawεε kase die kelew nonen, ε mwεem mvun mum buy mvunfεem mvù è nulo bó saa ekumen ke, njefo mvú to buy ε è nu diuw Nyo' le, wvù yaa nu naa lo embiay mbiay ke. Nonen beene bò nu ε lewte wase ε beε ê wvú ekuse emum ekenkè mvuntelem mvù temyi keekaanten fiee fi bó nu ε gee beene ε no taale fwe yî dvú le.

19 Fieε fin fi beene taale fwe yî dvú le nu fi jici mvuntelem mvuseεbeene le cεy cεy, temyi diewe ken'wow e fo mvú ebuuke. È nu fí fi nu ke ege é beene efey eley egen ente fô kecee ke Nyo' le ejim jo ndvu yì bó nu ε shenke ε ban jó dvú le.

20 E è nu fó fò Jisos to leyεε wase diewe nsafwe wesebeene le keekene bvudvuu ê beene. Wvú nu ekole ke bocee ncese le wvù mey lo ê je yì Melkisedek nu jó le.

Ibu 7

Ekume cee ncese wvù Melkisedek

1 Melkisedek wvun to nu Nfon wvu Salem, bvuu nu cee ncese Nyo' wvù nu Ekole ke Mwεem Mvunciim e. E è ke no nu kefew kemew e, ε Abl'am laa jem yuwye

bonfon nteen. E Melkisedek ke tasen bô wvú no wvú to kfuuyi, mum lan kembonen yî ye le.

²E Abl'am gaw mwëem mvunciim mvù wvú to yowëe gbwen jem e biba yuufe, nya keba kemwaan ê Melkisedek. Cee ncese wvun nu e diee diew duñci mwëem mvunfëem. Fi fwe nu le wvú nu “Nfon wvu Teytey” no diee diew di Melkisedek duñci. E fi bii fó nu le wvú nu “Nfon Nyëkeey” njefo wvú to nu Nfon wvu Salem.

³Ke wee kee ice bô bwee kenëe kfuu diew ke. E ke wee kee ten seke bó to bokëe wvú kenëe seke wvú to kpwee ke. Wvú nu cee ncese wvù mey lo diewë Waa Nyo' le.

⁴Ben ke etaa eyen wee wvù è to nu Melkisedek wvun! Wvú to nu naa lo wee e wvú kuuke. Naa e Abl'am wvù to nu cee kfuu di bonyii bo Israel e ke yow mwëem gbwen jem e to dvú gaw biba yuufe, mum nya lo kemwaan ê wvú.

⁵Fi ekumë boom bo Lëwe le bô to ké no lemte lemme di bocee ncese le nu e bvudvuu bvumew to jemyi ê bonci bo Muses e le bó efii mwëem ê bonyii bo Israel keba kemwaan ente jo yuufe, naa no bonyii ban to cim nu boom bo bwee bó le, e bó bocii nu boom bo Abl'am e.

⁶Ke wee wvun to nu wee kfuu di Lëwe le ke. Geenën e è fi wvú mwëem ê Abl'am keba kemwaan ente jo yuufe, lan kembonen yî ye le, e Abl'am nu wee wvù Nyo' to gee ñkawma ê wvú.

⁷Ke è nu kemañen le wee wvù laañke kembonen yî wee mvu le kuuke fele wee wvù wvú laañke kembonen yî ye le ke.

⁸Bocee ncese bo ê kfuu di Lëwe le ban to fii mwëem ê bonyii keba kemwaan ente jo yuufe, e bó bodvu bô fii nu bonyii e bó kpwee. Geenën Melkisedek wvù to fie mwëem keba kemwaan ente jo yuufe ê Abl'am nu e Nwa' Nyo' seje ê beene le è nu wee e wvú to fele.

⁹È nulo é bó egay le Lëwe kebee wvù kfuu diew to fii mwëem ê bonyii keba kemwaan ente jo yuufe to nu e nya mwew mwëem ê Melkisedek can Abl'am e.

¹⁰Bó nulo egay nonen njefo seke Melkisedek to tasënëe bô Abl'am nu e wvú wvù Lëwe to bæe ê bvulëw bvú Abl'am wvù è to nu icee cee cee bó le.

¹¹É è fën to nu le lemme di kfuu di Lëwe le to gee diewë bocee ncese le to nu e kocen keege é bonyii enu teytey ê Nyo' ejise, tu shiee wvumvu cee ncese to bee ebvuu enu wvu la? Beene kee le Nyo' to nya bonci ê bonyii bo Israel bii lemme di bocee ncese bo ê kfuu di Lëwe le to gee. Fí dïoo nu nonen, bó kaa e gay le wvuwe cee ncese keñke keeke enù ê je yì Melkisedek nu jó le, efey keenu e è nu ê je yì cee ncese wvu ê kfuu di Elon e nu jó le nëe le?

¹²Beene kee le kfuu di bocee ncese le ké kumene, e fí no nu shiee le keekumen ten bonci.

13Wee wvun wvù beene jemyi ekumε wvù, nu ε wvù to buy ê kfuu dimew e jεεy, ε wee ke baa yuu buy wase ê kfuu didvu le elemte fô ketaη ke ncese le κε.

14Wee wvun nu Tata wesebeene. Ε è nu keceεy le wvù to buy ê kfuu di Juda le. Ε Muses to ke baa yuu jeme fieε ekumε kfuu din seke wvù to jemyi ekumε bocee ncese κε.

Jisos nu cee ncese ê je yì Mελkiseδek nu jó le

15Fieε fin fi beene jemyi ekumε fí nu ε looce ε duηce ye no cee ncese wvumvu nu ε buy wase diewe Mελkiseδek e.

16Wvù nu ε ne ε tu cee ncese ε è yaa nu ê je yì nci jemyi le no wee keηke keenu ê kfuu di bocee ncese le κε. Wvù nu cee ncese ε è nu yì mvuηgay mvu nshii wvù yaa kaa κε le.

17È nu fieε fi bó nu ε saη ekumε wvù le, “Wo nu cee ncese wvù mey lo ê je yì Mελkiseδek nu jó le.”

18Fí ε mum ε no nu le, je yì yvum yì bó to gee mwεem jó nu ε bó ε fuwyε wase yiyε, njefo κε yì bvuu keηke mvuηgay keηεε lemme κε.

19[Ke bonci bo Muses e to ké ge fieε ε fí joη gen mεse κε.] Geenen, keseen nu ε Nyo' ε duηce wase je yì jee ntay yì beene egeelè bvufee yì dvù le yì fele yiyε. È nu yì yì beene fele jó se too nceencee fô Nyo' le.

20Ε keebvu e bise fó nu ε Nyo' to dioo gεele cee ncese je yì fie yin, die kelew, ε κε wvù to ké die kelew seke wvù to gεele bomew ba κε.

21Geenen, ε wvù ke dioo gεele wvun, die kelew ekumε wvù gay le, “Me wvù Tata nu ε me ε ndie kelew, ε κε me nu ηke eηkumen diew yem κε, ‘Wo nu cee ncese wvù mey lo.’”

22Kelew kè Nyo' to dieε kin ε mum ε duηce le Jisos nu wee wvù nu ε ge moηkan mo monfem man ε no leeme temyi fele mo moyvuum.

23Bocee ncese bò to shee nu fwele to ké no nu nteen, njefo κε kpwe to nulo ecine wee le é wvù emey egee lemme diew di kecee ncese le κε.

24Geenen, Jisos ε no nu fiew cee ncese sekecii njefo κε nshii we keηke kendvuse κε.

25Nonen, wvù nulo eboysee bonyii sekecii bò benci too fô Nyo' le fele can ye le. Ε wvù boysee nonen, njefo wvù nu dvù sekecii leke Nyo' fô bó le.

26Fí nu leη le beene ekeηkè kfuu kekie ekole ke bocee ncese le. Wvù nu fiew wee wvù yuule, ε wvù baa keηke jay keηεε nlom yì ye le κε. Wvù nu fiew ε Nyo' ε gawsen wvù fô bonyii bo bibefe le. Nyo' nu ε bense wase wvù, wvù ε ben naa ε fey ebule ε gen fowe.

²⁷Ke wvú keŋke fiew shiee keege boncese diewe bikuu bi bocee ncese le, bì to ké no gee boncese ediuw ecii ke. E bó to ké dioo gee yaw ge fô bikuu bibole, keekpwaŋsen bibole bibefe, se ke no gee fô bi bonyii le. Wvú to ge fiew we ncese kaŋ mwaan no wvú to nyaε ekole kew keetaŋe bonyii dvú.

²⁸Yî kefew ke bonci bo Muses e nu ε bó to baale naa ε è nu bonyii ε bó wεeyi yî nyam ye le le bó enù bikuu bi bocee ncese le. Geenεn, ε è ke dioo nu wase ejim jo bonci ban, ε Nyo' ge ŋkawma die kelew, mum baa wase ε è nu Waa we wvù wvú nu ε ge wvú ε no jee gene mεese sekecii.

Ibu 8

Jisos nu ekole ke bocee ncese le ke moŋkan mo monfem e

¹Ekole ke fiεε fi beene jemyi ekume fí le nu ke le, beene keŋke kfuu ekole ke bocee ncese le ε è nu wee ε wvú ε shii ê εbo ke εceey ke kawla Nyo' Bvukuke le fowe.

²Wvú nu wee lemme fô Nyo' nu, lemte cun dvù è nu cεey cεey cun yi wvú wvù Nyo' le, ε è yaa kene bonyii ke. Ê kene wvú wvù Tata Nyo' cun yidvu.

³Ekole ke bocee ncese le kecii nu ε Nyo' ké baa gee le wvú ejòè nnyá yi bonyii feese ê Nyo' bvuu gee ten boncese fô Nyo' le. Nonεn, fí ε no nu shiee le fô wvuwvun cee ncese le keekεŋke ten fiεε fi wvú nulo ege ncese dvú fô Nyo' le.

⁴É wvú be nu fokuse fen, wvú saa enu naa lo cee ncese ke, njefo bocee ncese nu wase dvú bò nyaa nnyá bii no nci Muses gomte.

⁵Lemme di bó lemte fokuse fen nu ke lo nfieesen bô kenjinjin ke di yew dvu Nyo' le fowe. Ê neε fiεε fi è to nu seke Muses to nu keekene cun Nyo' yi fokuse fen, ε Nyo' tefe wvú gay le, “Yεnε le wo nu ε kene fiεε ficii fí ε no nu ke lenlen diewe fi me nto nduŋcεε ê wo yî kum e.”

⁶Geenεn Jisos nu ε bó ε nya lemme ê wvú ε dí kuuke fele di bocee ncese bo fwele le, ke lenlen no moŋkan mò wvú leeme fwe wvudvu entelen jo Nyo' bô wee wvu wum kuuke ten fele mo moyvuum. Mó fele lo njefo moman bii ε è nu boŋkawma bò fele bo fwe le.

⁷É moŋkan mo fwele to nu se mó keŋke jay ŋkuuŋ, tu ke shiee momew to bee ebvuu enu dvú ke.

⁸Nyo' to nu ε yen le jay nu dvú bô bonyii, mum gay le, “Me wvù Tata ŋgayte le diuu too lo di me nu ŋke engbwo moŋkan mo monfem bee yew Israel noo yew Juda.

⁹ε ke moŋkan man nu diewe mò me nto ŋgbwolεε bee bo'icee cee bó diuu di me nto njiceε bó le yî kebo le, njo mbuy bô bó woŋ wvù Ijiw e ke. Moŋkan modvu man nu ε bó to baa emey eleeme yî dvú le ke. Nonεn, ε me mum mbase jim ê bó le. Fifi jemyi me wvù Tata.

- 10** Me wvù Tata mbvuu njemyi le, kefew nu ke eto ekocen,
 é me embvuu engbwo momew moŋkan bee yew Israel. Mó nu ke enu le, me nu
 ŋke enlese lo bonci bem
 ê bonkpawawce bobole, ensaŋ ε è nu ê mvuntelem mvubole. Me nu ŋke enu Nyo'
 wvubo, ε bó nu bonyii bem.
- 11** Ke wee bæε ke ebvuu eyeyi lo wee we woŋ mvu kenεε waa bwee gayte le wvú
 ekeè Tata Nyo' ke, njefo wee tfuu nu ke ekee me ε kaw yí wee wvu caan e ε gen ε
 buy yí wvu baay e.
- 12** Me nu ŋke encam shen fô bó le, nleeshe mwεem mvubole mvù befe. Ke me
 mbæε ŋke embvuu enkumyi bibefe bibole ke.”
- 13** No Nyo' to jemyεε le moŋkan mo monfem nu ke enu, tu wvú to yene wase le
 mo fwele ma nu fieε fi fiyvuum. E fieε yvuumene kenεε lune wase, tu è sheete
 caan é fi ela ê bonyii ejise.

Ibu 9

Je ncese yi yvum bô yi fie

- 1** Fí nu le, moŋkan mo fwele to kenke bonci bô duŋci je yi bonyii ebunleè Nyo' jó,
 bvuu kenke bvudvuu ε bó ε seyse le è nu yew Nyo' yi fokuse fen.
- 2** Bó to nu ε kene cun bô ndvu sumten biba bifεε, ε keba ke fwe ente nu ε bó teje
 le Bvudvuu bvù Yuule. Bvubvun nu fò fieε fi bó to tomyi ken'yeese yí dvú le noo
 fò kedaŋ kè bó to ké no gæele blæed wvù bó nu ε ge ncese dvú fô Nyo' le to nu.
- 3** E keba kè bii fô ente nu ε bó teje le Bvudvuu bvù looci Yuule naa ntay. Bvudvuu
 bvun to nu ejim jo ndvu mi ε bó ε sheŋke ε sumten cun dvú entelen.
- 4** Bvubvun bvudvuu nu fò ketaŋ ke jiin e to nu, ε bó ε seyse ketaŋ kedvu bô
 ketwaa ke bigew e kè yeεle. E ŋkuw moŋkan mò Nyo' to gbwolεε bô bonyii nu ten
 fô, ε bó ε seyse ε lay ye yidvu yicii bô ketwaa ke bigew e kè yeεle. Ê ŋkuw wvun e
 nu ε kentee ke mana le to nu jó, ε bó ε seyse ten bô ketwaa ke bigew e kè yeεle. E
 kemaŋ ke Elon e kie kè bibε to comεε yí dvú le nu ten ê ŋkuw wvun e. E biwaŋ bi
 eta le bì bó to saŋεε bonci bo moŋkan modvu le nu ten ê ŋkuw wvudvu le.
- 5** Ê we jo ŋkuw wvun nu ε bó to leke mwεem mvumew ε mvú nu diewe
 bonceendaa bo Nyo' le bo n'yuule, ε mvú ε saŋ ye ê we jo kentaw ke Nyo' le ke
 nleeshe bibefe le. Mwεem mvun nu ε ke è nulo é beene ejemyi gene ente jodvu
 keseen baay ke.
- 6** No bó to seyσεε mwεem mvun ê yiyin je le nen, ε bocee ncese mum no gene
 leyte ê keba ke fwe kie le εdiuw ecii gee lemme dibole dvú.
- 7** Geenεn, ε wee wvù to ké ley ê keba ke ente kie le to nu ke ekolε ke bocee ncese
 le maan. E wvú to ké ley dvú ke kaŋ mwaan yí kelum e. E wvú yaa to ké ley dvú se
 εlεmε ke nyam e kè wvú ege ncese dvú fô ekolε kew e noo fô bibefe bi bonyii le bì
 bó gee yaa kee ke le.

⁸Nonen, yiyin nu je yì Keyoy ke Yuule duŋci ê bonyii le je yì wee to nulo eley egen fô Bvudvuu bvù looci Yuule naa ntay e to baa yene wase ye ke, no cun Nyo' yi fwe ye to bæ leeme fô.

⁹Mwæem mvun mvunciim nu nciise mwæem mvù kooyi kefew ke keseen kin e. E fifin duŋci le ke mwæem mvù bó to nyaa ê Nyo' noo boncese bò bó to gee fô Nyo' le nulo ege é mvuntelem mvu bonyii bò bunlee Nyo' le enu ε mvú yuule gene mæese ke.

¹⁰Mwæem mvudvu keŋke ke fiε maan keege ε è nu bô mwæem mvudien noo mwæem mvuwuun noo jé yì bonyii cuke ye jó keeyuule ê Nyo' ejise. E mvumvun nu mwæem mvù kumte ke ε è nu nyam ye le, mvù bó to keŋke keege egen ebuy kefew kè ŋkumen ke eto le.

¹¹Geenen no Klistu wvù nu ekole ke bocee ncese le nu ε to wase, ε è nu wvú wvù nu ε to bô mwæem mvù jee, wvú ε mum ε ley cun, ε è nu yi baay yì yuule gene mæese le. Ke yiyε nu yì è yoke bonyii ke. Fi nu le, ke è nu cun yi yì nshε yin e ke.

¹²Fô wvú to leyε nu Bvudvuu ε bvu looci Yuule naa ntay. E wvú to ley kan mwaan ε fí ka lo nonen. Wvú to baa eley fofen ε è nu bô elemε ke bîe le kenεε ke boom bo bona' le ke. Wvú to ley ε è nu bô kew elemε. No wvú gee nonen, ε fifin mum sum beene yì bibefε le, ε nsum wvun nu wvù mey lo.

¹³È to nu fwele é wee ké dioo nu bô ŋkfum ye le, é bó jo elemε ke bie le kenεε ke na' le, kenεε taan di kejun ke na' wvù bó nu ε ton wvú ε fie le, mise kenεε mwan yì mweten e, ε wvú kase no yuule.

¹⁴É fí to nu nonen, tu ke elemε ke Klistu le nulo ege fiε fi fele fifiε? Wvú to nu ε nya ekole kew ε kí nu se nlo m ê Nyo' fele yì Keyoy kè mey lo le. Wvú to ge nonen, mum cuke mvuntelem mvuseεbeene yì mwæem mvù too bô kpwe le, wvu le beene elemtè Nyo' wvù keŋke nshii le.

¹⁵È nεε fiεε fi Klistu nu wee wvù leeme fwe moŋkan mo monfem man entelen jo Nyo' bô wee wvu wum. E wvú leeme wvu le bonyii bò Nyo' nu ε tee le è nu bew ke ekeŋke bvudvuu fô bvujonke bvù mey lo bvù Nyo' nu ε kaw bó dvú. Bó nu ke ekeŋke njefo wee nu ε kpwe wase, ε kpwe ye yin ε sum bó yì ŋgew wvù to nu keeke eto nje bibefε bì bó to shee gee fwele é moŋkan mo moyvuum e.

¹⁶Beene kee le wee ké teete kpwe, wee saa ke ebi ntefe kpwe wvudvu le se bó ε yen le mweten nu ε kpwe wase ke.

¹⁷Fí nu nonen, njefo ke ntefe kpwe ké no keŋke mvuŋgay se wee ε kpwe ke. Ke bó ké bi ntefe kpwe le ε wee wvù tefe kpwe bæε dvú ke.

¹⁸È nεε fiεε fi naa moŋkan mo fwe nu ε mó yaa to nulo ke eleem se bó ε sεε nyam elemε ε buy ke.

¹⁹È to nu seke Muses to taŋεε wase fiεε ficii fi to nu ê Nwa' bonci le ê bonyii bocii, ε wvú mum jo tiεw kete ke isob e ε bó ε njim yvúw njee yì dvú le ε bó ε com yí ε

no yeele, mum jo ten elee ke boom bo bona' le, bô ke bîe le, noo joo, mise yî nwa' bonci bodvu le, mum mise ten yî bonyii bocii le.

²⁰ε wvú dîoo miise no gayte le, “Elee kin nu ke moŋkan mò Nyo' gbwole ben ε bó le, gayte le ben eleemè yî dvú le.”

²¹ε wvú mise ten elee kedvu yî cun Nyo' ye le noo yî mwεem mvu cun dvu dvú le mvù bó gee bunle dvú.

²² Fí nu naa lo keceey le mwεem nteen to shee nu ε nci duŋci le bó keŋke keege ke ε è nu bô elee é mvú se no yuule. ε ke è nulo é bó elee she bibefe bi wee le se bó ε see fiε elee ε buy ke.

Ncese wvù Jisos to gee kaŋ mwaan cuke bibefe bi bonyii le

²³ Fí to nu naa shiee le le bó euke mwεem mvun mvù nu ke lo nfieesen mwεem mvu fowe ê yiyin je le. Geenεn, euke mvù looci nu mvu fowe ε è nu bô boncese bò fele boban,

²⁴ njefo Klistu to ley cun Nyo' le ε è yaa nu yî è yoke bonyii bô can, yî è nu ke lo nfieesen cun Nyo' yi ceey ceey ke. Wvú to ley ε è nu fowe kebee. ε è nu fò wvú nu keseen fwe dvu Nyo' leke Nyo' fô beene le.

²⁵ Ke wvú nu fó nen keebvuu egee boncese bô ekole kew fô Nyo' le bokaŋ e bokaŋ e diewe no ekole ke bocee ncese le to ké no leyte fô Bvudvuu bvù looci Yuule naa ntay e ê kelum ê kelum, keege ncese bô elee se è nu kew ŋkuuŋ.

²⁶ É fifin to nu shiee le, tu Klistu be keŋke keekpwee jaa we, kaase kpwee ε kew no bó to bomε woŋ. Geenεn no fí nu, nu ε wvú ε to wase kaŋ mwaan fí ε ka lo nonεn. Wvú to kefew kin kè woŋ kaa wase le keejo ekole kew ege ncese dvú, ekpwe keeuke bibefe.

²⁷ Ke leŋleŋ no fí nu le wee keŋke keekpwe ke kaŋ mwaan emum ecyete wase ε è nu nsaw,

²⁸ nu ke no Klistu to nyaε ekole kew kpwe fô bonyii le kaŋ mwaan keetuu bibefe bi bonyii le nteen. ε wvú nu ke ekase eto yî bokaŋ bo bofε le ε è yaa bvuu nu keege fiε bô bibefe ke. Wvú nu ke eto wase keseen keeboyse bonyii bò cyete wvú shiee le.

Ibu 10

Ncese wvù Jisos to gee nu ε jo wase bvudvuu bvù boncese le bocii

¹ Bonci bo Muses e to nu ke lo kenjinjin ke mwεem mvù jee mvù to nu keeke enu le. Ke bó to nu wase ceey ceey mwεem mvù to nu keeke enu ke. ε bó mum no shee gee boncese ê kelum ê kelum, se è nulo é boncese bodvu ege é bonyii bò benci too fô Nyo' le eyuule gene mεese ŋkuuŋ.

² É è to nu le boncese bodvu nulo ege é bó eyuule nonεn, tu ke bó to bee ebvuu eshee egee boncese bó le bó le ke, njefo bonyii bò bunlee Nyo' to bee keenu ε bó ε

cukε wase bibefε bibole kaη mwaan, ε mvuntelem mvubole yaa bvuu saake bó yí bibefε le κε.

³Geenen, boncese bò bó to gee ê kelum ê kelum ban to kaa gee ε bonyii kumyi lo bibefε bibole.

⁴Ε fí nu nonen, njefo κε è nu naa lo é elemε ke bona' bô ke bíe le ecukε bibefε bi wee le κε.

⁵È nεε fiεε fi to gee ε Klistu dioo to fokuse fεn gay ê Nyo' le, “Κε wo κεηκε shiee fô boncese bò bó gee bô nyám e, noo fô mwεem mvù bó nyaa ê wo le κε. Wo nu ε nya me ε è nu bô ye le me enge ncese dvú.

⁶Κε nyám yì bó nyaa ε bó tone gee boncese dvú fô wo le, noo mwεem mvù bó nyaa ε bó gee boncese dvú keecukε bibefε bi bonyii le baa cim ege é wo eyuuke njoη κε.

⁷Me ε mum ε ηgay le, ‘O Nyo' taa eyen, me nu ε nto keηge fiεε fi wo shieele, κε no bó saηεε ekumε me ê Nwa' wo le.”

⁸Wvú to yaw gay ê Nyo' le, “Κε wo baa κεηκε shiee κεεε yuuke njoη bô boncese noo nnyá yì bó nyaa ê wo noo nyám yì bó nyaa ε bó tone gee boncese dvú fô wo le, noo mwεem mvù bó nyaa ε bó gee boncese dvú keecukε bibefε bi bonyii le κε.” Ε mwεem mvun nu ε bó to gee κε naa bii no nci gomte.

⁹No wvú gay nonen, mum bise fó gay ê Nyo' le, “Taa eyen, me nu ε nto keηge fiεε fi wo shieele.” Wvú to jeme nonen, mum lese boncese bo boyvuum keεgeε wvu fwε.

¹⁰No Jisos Klistu to gee fiεε fi Nyo' to shieele le wvú ege, ε ye ye yì wvú to nyaε kaη mwaan ε fí ka lo nonen, ge ε beene mum no yuule.

¹¹Cee ncese tfuu ké no gene leeme fô bvudvuu bwew bvu lemme le εdiuw εcii gee boncese biinene bokaη e bokaη e, se boncese bodvu nulo ecake bibefε bi bonyii le ηkuuη.

¹²Geenen Klistu to nu ε ge we ncese κε kaη mwaan ε wvú mum kocen wvù ecake bibefε bi bonyii le kemakaa. No wvú gee nonen mum shii ê ebo ke εceey ke Nyo' le.

¹³Wvú nu fó ε κew sekekie le, cεyte egen ebuy seke Nyo' ke ejike bonyii bew bo bvuban e diewe kedvuushεε ke bikaa biew e é wvú etome bikaa yí bó le.

¹⁴Ncese we wvù mwaan wvun nu ε ge bonyii bò wvú gee ε bó yuule, ε mum ε no yuule ten ê Nyo' ejise gene mεεse sekecii.

¹⁵Keyoy ke Yuule jemyi ten ê beene tomte fiεε fin. Kí to nu ε yaw gay le,

¹⁶“Tata gayte le, è nεε moηkan man mò me nu ηke engbwo bee bó ejim jo εdiuw yoya le: Me nu ηke engeε bonci bem ê mvuntelem mvubole, embvuu ensaη ê boηkpawcε bobole.”

17 No wvú gay nonen bvuu bise le, “Ke me mbεε nke embvuu enkpawawci bibefe bibole kenεε gee dibole di befe ke”

18 Fí ε mum ε no nu le é bó læshi wase bibefe bi bonyii le, tu ke shiee mwεεm mvù bó enyaa ε bó gee boncese dvú keecuke bibefe bi bonyii le bvuu bεε ke.

Beene ebencì too nceencee mbew Nyo' le

19 Boom bo bwεεm e, fí ε mum ε no nu le ελεμε ke Jisos e nu ε yene wase je ε beene nulo eley keseen yaa fane ke, egen fô Bvudvuu bwε bvù looci Yuule naa ntay e.

20 Beene nulo efey ê je yi fie yì nyaa nshii le yì Jisos to yen'yεε fô beene le. Wvú to yene je yin bô ye ye, ε fí mum no nu le wvú nu ε cake wase ndvu yì bó to shenkee ban bvudvuu bvudvu dvú.

21 Beene kenke wase cee ncese wvu baay wvù taale fô yew Nyo' le yì è nu bonyii bew.

22 No mwεεm mvun nu nonen, beene emum ebencì too mbew Nyo' le bô fitele fimwaan ε beene ε lese fitele yì ye le ficii nu sε kemaen. Beene ebencì njefo bó nu ε miawmiaw wase mvuntelem mvuseεbeene bô ελεμε ke Klistu le mvú ε no yuule, yaa bvuu saake beene yì fie le ke. E beene bvuu nu ten ε bó ε cuke wase ye yesebeene bô joo yì yuule.

23 Beene eleemè temyi ntay yì fieε fi beene taale fwe yì dvú le fi beene ké no jemyi ê bonyii ekumε fí le. Fo beene etuwtenè ke, njefo wee wvù kawεε beene leeme yì diew ye le.

24 Beene egomtè ten je keeyvuwse mvuntelem mvu wee noo wee le keekonene noo keegeε mwεεm mvù jee.

25 Fo beene ecin'yì keetoo yì kentaashe le diewe no bonyii bomew nu ε ne wase ε no gee ke. Beene eyvuwsè lo mvuntelem mvuseεbeene, efey mvunciim no beene yne wase ε diuu di Tata wesebeene nu ke ekase eto nu wase nceencee.

26 Beene ekeè le é beene ne ε bvuu ε no gee bibefe, gee kee, ε beene nu ε bó ε fiisen wase je yi kecey, é beene no keè le ke ncese wvumvu bvuu nu dvú wvù è nulo é bó ebvuu ege fô bibefe bisεεbeene le ke.

27 É wee gee nonen, é wvú no ceyte ke wase bô nfan ε è nu nsaw Nyo' noo ngyu wvù befe wvù nu ke eyese lo bonyii bo bvuban e bo Nyo' le.

28 Wee ké ngyoyte nci Muses, é bonyii eleem bofεε kenεε botete etom le bó nu ε yen fieε fi wvú ge le, é nsaw mum koo mweten, ε bó mum yu lo wvú yaa koole yii ke.

29 É fí nu nonen, tu ben kpwaake le wee wvù joo Waa Nyo' ekuse, joo ελεμε ke monkan mò Nyo' gbwolεε keecuke wvú dvú é wvú eyuule le kí nu fieε fi εcici,

nan'yi ten Keyoy ke Yuule kè too bô mbuwma Nyo', nu ε kfuu ηgew wvù wvuwe wee nu ke ekeηke nu ke enu nεε?

³⁰ We ηgew nu ke ebemte lo njefo beene kee wee wvù to gayεε le, “È nu me wvù nu ke etfuse envuke, ε è nu me wvù nu ke enya nlawma wvubo.” Ε wvù ε bvuu ε gay le, “È nu me wvù Tata wvù nu ke esaw bonyii bem.”

³¹ È nu fiεε fi nfan e baay keegbwe can Nyo' wvù keηke nshii le.

³² Geenεn, ben ekumyì εdiuw yo fwe yò bó to yuuseε ben yì fiεε fi Nyo' le. Ben to nu ε kuu shém no diuu bô boηgew bò to too fô ben e.

³³ Kefew kemew e nu ε bonyii to ké no nan'yi bvuu nyewle bô ben ya le. Kefew kemew e, ε ben no leeme ejim jo bonyii bò bó nyaa ten ηgew ê bó ê yiye je le.

³⁴ Ben to ké no koole shen bô boba bonyii bò nu yì ncaw e, fii bó. Bó to ké loo mwεεm mvunen, ε ben cine ke dvú no yuuke ε è nu njoη, njefo ben kee le ben keηke mwεεm mvumew mvù fele mvumwe ε è nu mvù nu ke emey nu sekecii.

³⁵ Nonεn, fo ben ecine fiεε fi ben leeme wase yì dvú le ke, njefo è nu fiεε ε fí keηke nlawma wvù kuuke.

³⁶ Fiεε fi shiee le fô ben e nu le ben esuu shém wvu le ben nulo egee ε è nu fiεε fi Nyo' shieele, ε ben ke emum ekeηke fiεε fi wvù nu ε kaw beene dvú.

³⁷ Bó nu ε saη le, “È shεεte ke wase caan é wee wvù nu keeto emum efεε. Ke wvù nu emoocε ke.

³⁸ Wee wεm wvu teyney nu ke ekeηke nshii nje fitele fi wvù lese yì yεm e. Geenεn é wvù nε lo ε no fane ε tfuw bikaa, fitele fiem saa ejee bô wvù ke.”

³⁹ Geenεn, ke beene nu boba bò tfuuke bikaa bò nu ke ela ke. Beene nu fiεεεbeene bonyii bò nu ε lese fitele yì Nyo' le bò biyoy bibole nu ke eboy.

Ibu 11

Ekumε keelese fitele yì Nyo' le

¹ Keelese fitele yì Nyo' le nu keetaale fwe yì fiεε fi Nyo' nu ε kaw wee dvú kee naa ntay le wvù nu ke ekeηke fí, kee ten le fí nu dvú ε wvù baa cim yen wase fí le ke.

² Nyo' to bensee bonyii bo fwele njefo bó to nu ε lese fitele yì ye le.

³ È ge ten fitele fi beene lese yì Nyo' le beene ε se kieε ntay le Nyo' to bom woη wvun ε è nu ke bô diεw ye, ε mwεεm mvù beene yene to buy yì mvù bó yaa yene mvú le ke.

Èbel

⁴ È to ge fitele fi Èbel to leseε yì Nyo' le ε wvù se ge ncεε wvu leη fey Kεεn. Ε Nyo' mum jo wvù le wvù nu wee wvu teyney, mum fi nnya ye keetom le wvù nu wee wvu teyney. Abel to nu ε kpwe, geenεn ε fitele fi wvù to leseε yì Nyo' le ε ge beene ε no yuuke ε wvù bεε jemyi ê beene ε to ε buy εben e.

Enok

⁵ È to ge ten fitele fi Enok to leseε yî Nyo' le ε Nyo' se jo wvú gen bô wvú fowe wum ε kpwe baa kum wvú le ke. Bó to nu ε ne fañe yaa bvuu yen wvú le ke, njefo Nyo' to nu ε jo wase wvú we. É Nyo' se jo Enok we nu ε Njwa' Nyo' jemyi le wvú to ké no gee ε Nyo' yuuke njoñ.

⁶ Nonen é wee nu dvú se wvú nu ε lese fitele yî Nyo' le, tu ke è nu naa lo é Nyo' eyuuke njoñ bô wvú ke, njefo é wee gomte keebenci too mbew Nyo' le, tu wvú keñke keebec le Nyo' nu dvú, noo le wvú mawci wee tfuu wvù looci gomte wvú.

Noa'

⁷ È to ge ten fitele fi Noa' to leseε yî Nyo' le ε Nyo' ke dioo tefe wvú ekume fiε fi to nu keeke ekooy ε wvú baa cim yen wase fí le, ε wvú yuw Nyo' le mum fe ηguw wvu baay keeke eboyse yew ye dvú. No wvú to leseε fitele nonen mum duñce le kebese ke bonyii bo yî woñ wvun e nu bô befe é Nyo' ejise, ε è nu ke wase wvú wvù Nyo' to nyae bvudvuu bvú wee wvu teyney e é wvú, njefo wvú to nu ε lese fitele yî Nyo' le.

Abla'am bô Sela

⁸ È to ge ten fitele fi Abla'am to leseε yî Nyo' le, ε wvú se yuw Nyo' le seke wvú to tenjεε wvú le wvú ene woñ wvubole egen wvumew wvù wvú to nu keeke ekeñke diewe woñ we le. No Abla'am yuwεε nonen mum no gene ke lo, yaa cim kee fô wvú gene ke.

⁹ È to ge fitele fi wvú to leseε yî Nyo' le fidvu ε wvú se gen no cee woñ wvù Nyo' to kawεε wvú dvú le diewe tolo wvù nu ε gen ε beε woñ bonyii bomew e. Wvú to nu jó ghane cee cún e bô bo Aysik noo Yakow bô Nyo' to kawεε bó bocii bô woñ wvudvu le è nu ke enu wvubo.

¹⁰ Wvú to cee cún e nonen njefo wvú to taale fwe keeke eley kelaante le ε kí keñke kenffuy ε è to seyse Nyo' no kelaante kedvu nu ke enu, mum yoo.

¹¹ È to ge ten fitele fi Sela to leseε yî Nyo' le ε wvú se keñke mvunḡay keeleem bô fue ε wvú ε lun naa wase ε fesen wvù è nulo é wvú ebvuu eboo. Fí to kooyi nonen njefo Sela to nu ε bee le Nyo' wvù kawεε wvú ké no leeme ke yî diew ye le.

¹² E fí mum no nu le wee mwaañ wvù Abla'am wvù to nu ε wvú ε lun wase baay, nu wase diuw kpwe le, to nu ε ne ε engoke ke wee le buy yî ye le duule diewe jón yi we le noo diewe monsheem mo ηgem joo yi baay e mò wee yaa nulo etañ etoo ke.

¹³ Bonyii ban bocii to nu ε ghan fañe yaa keñke fiε fi Nyo' kawεε fidvu ke, ke ghan no kpwekene ε bó lese ke fitele yî Nyo' le. Bó to yen ke lo fí le ε fí beε too ncejole, fiisen bô nlanlan, jeme bô dew yibo le, fô bó le nu ε bó kee le bowen nu ke lo botolo ε bó beke lo yî nshe yin e.

¹⁴ É bonyii jemyi nen, tu fí duñci naa ntay le bó beε gomte woñ wvù è nu wvubo.

15 É bó to bvuu kpawwci ekume woy wvù bó to nen'yee jó, tu bó to nu e keñke je keekase tu jim jó.

16 Geen en no fí nu, nu e bó to gomte e è nu woy wvù fele wwuwe, wvù è nu woy wvu we. Nonen ke Nyo' ké no wuumene seke bó teñe wvù le Nyo' wvubo ke, njefo wvù nu e seyse kelaante e gee ê bó.

17 È to nu fitele fi Ablam to lese e yí Nyo' le fi to gee e Nyo' ke dioo mom wvù, e wvù bee keejo waa we wvù Aysik ege ncese dvú fô Nyo' le. E wvù wvù Ablam nu wvù Nyo' to kawee le engoke ke wee le nu ke ebuy yí ye le. E wvù bee ke keejo waa we e è ka wvù, le wen ege ncese dvú.

18 Waa we wvun nu wvù Nyo' to gayee wase ê Ablam le, “È nu Aysik wvù nu ke egee diee di kfuu diuw e.”

19 Ablam to kee ke le é wee cim kpwe lo, tu Nyo' nulo ekase ege é wvù etu dvú. Nonen ê je mi le nu e è nulo é bó ejo le Aysik to nu e kpwe e Nyo' kase nya wvù ê Ablam e wvù nu dvú wum.

Aysik

20 È to ge fitele fi Aysik to lese e ten yí Nyo' le e wvù se cew Yakow bô Esau jeme ê bó ekume mbuwma wvù to nu keeke eyuu eto fô bó le.

Yakow

21 È to ge ten fitele fi Yakow to lese e yí Nyo' le e wvù ke dioo kpwee, cew boom bo Yosew wvù waa we le. E wvù to ceeke nonen e wvù e ngvuum yí kemañ e e no nyaa n'wvum ê Nyo'.

Yosew

22 È to nu fitele fi Yosew to lese e yí Nyo' le fi to gee e wvù ke dioo nu wase keekpwe mum no teete kpwe ye duñci le bonyii bo Islael nu ke eshee ebuy woy wvù Ijiw e. E wvù mum gay le bó ke edioo ebuyte jó jo bikufe biwene.

Icee Muses bô bwee Muses

23 È to nu fitele fi icee Muses bô bwee to lese e yí Nyo' le fi to gee e bó se nyile Muses yí kee le te fo bó eyu seke bó to bokée wvù. E bó to nyile nonen njefo bó to nu e yen le è to nu wan e wvù jee cuu baay. E bó fañe yaa efane keengoy sa' yí Nfon to bvusee ke.

Muses

24 È to nu fitele fi Muses to lese e ten yí Nyo' le seke wvù to kue wase fi to gee e wvù tun le fo bó eteñè wen le waa ngonjuu Nfon Felo ke.

25 Wvù to nu e caw fiew keeyene e è nu ngew bô bonyii bô è nu bo Nyo' le, efey keeyuuke njoñ bô mwem mvù è nu mvù befe e mvù fele lo.

26 Wvú to nu ε jo le é bó eshoose wen njefo wen nu wee Mboyse wvù Nyo' to kawεε, tu fifie keηke sew fele keekeηke kpaw wvu Ijiw tfuu. Wvú to jo nonen njefo wvú to taale mmawce wvù nu ke eto fô wvú le.

27 È to ge fitele fi wvú to leseε yî Nyo' le ε wvú se ne Ijiw yaa fane fieε fi è nulo é Nfon ege bô wvú ke, naa ε wvú cim ton'yi shém bô wvú neε. Wvú to nu ε suu shém ne no gene njefo wvú to taale fiew ε è nu fwe diewe wvú yene Nyo' wvù bó yaa yene bô ejise le ke.

28 È to ge ten fitele fi wvú to leseε yî Nyo' le ε wvú se gee Nkaw Danefey, jo eleme yefe yî lan fwese le, wvu le Nceendaa Kpwe wvù to yuwyi boom bolemse bo fwe yî kfu le edioo etoo buyte fô dew fwese bonyii bo Israel e emum edaη efey.

Bonyii bo Israel

29 È to ge ten fitele fi bonyii bo Israel to leseε yî Nyo' le ε bó gen lente Joo yi Baay yî Yεele fokuse ke diewe bó fey yî nshe yi yem e. E bonyii bo Ijiw ke dioo to ten buy fô joo yidvu le no momte keefey ten nonen ε yî kuu bó bocii gen dvú.

30 È nu ten fitele fi bonyii bodvu to leseε fi to gee ε bó ke dioo gen buy Jeliku, ke len kenεn kelaante kedvu, ke dioo kenεn nonen buy ediuw εsooshwiε ε kembew ke kelaante kedvu le kesε kecii.

La'ab

31 È to ge fitele fi La'ab wvù to nu kpwoon nsake mvu to leseε ten yî Nyo' le ε wvú se boy faηe yaa ekpwe ηgoo bonyii bobole bo woη e bô to temyi bikuu bô bo Nyo' ke. Wvú to baa kpwe, njefo bonyii bo Israel to nu ε tum bonyii le bó eto eghan ekee woη wvudvu, ε kpwoon wvudvu fiisen bó ê wvú yew.

Gidion, Balak, Samsen, Jεfta, Dawe bô Samwel noo bonyii bo ntum Nyo' le bomew

32 É è nu le me entaηke bonyii bô to leseε fitele yî Nyo' le, é me ηke entaη eηgen embuy fεε? Ke kefew nu dvú kè è nulo é me ηkew nyey mwεem mvu bonyii le dieweε gidion, Balak, Samsen, Jεfta kenεε Dawe bô Samwel noo bonyii bo ntum Nyo' le bomew e ke.

33 Bonyii ban bocii nu ε bó to leseε fitele yî Nyo' le. E bomew ke so bitum yî jem e, ε bomew saw bvunfon ê je yi leη e, ε bomew keηke mwεem mvù Nyo' to kawεε bó dvú, ε bomew keηke mvuηgay keebaη dew bobvule fo bó eηgele bó.

34 Bomew to nu ε keηke mvuηgay keege é ηguε wvù to beenci naa bemte lo ejime. E bomew keηke mvuηgay keebuy can bonyii bô to gomte keegwoce bó bô nyó jem e. E bomew bô to yen'yi weεyi ke ne tu bontemmvuηgay. E bomew tu bonyii bo jem e bô temyi, ε bomew kuη bonyii bo jem e bo bitum bimew e ε bó fεε lo.

35 Bomew to nu bokεε bô to leseε ten fitele yî Nyo' le. E Nyo' ge ε bonyii bobole bomew bô to nu ε kpweken wase kase tu dvú no nu bô bó. Bomew bonyii nu ε bó to koole bvooke bô bimbaη, ε bó faηe yaa cim ebvuu eshieele le bó ecine bó le ke,

njefo bó to yene le é bowen kpwe lo, ke ekase ebuy yí kpwe le ekeŋke nshii wvù jee fele wvun.

36 Bomew nu ε bó to keŋke bó, tamte bô bongbwan ε ye caafi, kayte bomew bô boncaw fene yew ncaw e.

37 Bomew nu ε bó to tumye bô eta ε bó kpweken, bvuu tan'yi bomew bô nyó yí bó tane bite dvú ε bó buyte biba bifεε bifεε, gbwoci bomew bô nyó jem ε bó kpwekene. Bomew to ghane jiise ε è nu jéw njée bô yi bíe. Bó to nu bonyii bo kefufe le, ε bonyii njiŋsene bô bó bvuu nyewle bô bó.

38 Bó to ghane cee ŋkaante le noo yí dikum e bô ê ditfum e noo ê bibuw e. È nu bonyii ε woŋ wvun to baa ekocen wvù bó ecee wvú le ke.

39 Bonyii ban nen bocii nu ε bó to lese fitele yí Nyo' le, ε Nyo' bense bó naa ntay. Geenen wee mvu bó le to baa emum ekeŋke fiε fi Nyo' to kawεε bonyii dvú ke.

40 Bó to baa ekeŋke njefo Nyo' to keŋke ntaŋ wvù jee ntay fô beene le fele wvubo, wvu le è nu ke enu ke seke bó ε taashe beene ε bó, é bó se no nu ε bó ε kpwenten ê Nyo' ejise ε gen ε mεse.

Ibu 12

Nyo' nɛci boom bô è nu bew

1 No beene nu wase ε kebombom ke bonyii bô to nu ε lese fitele yí Nyo' le ban ε gem beene ε tase ε no duŋci no è nulo é wee elese fitele yí Nyo' le, beene emum ebuy ekuse jo bvujite bvucii bvù jewsee beene, noo bibefε bì njimte beene, emum ekuu shém elewtè kenlewtε kè Nyo' nu ε gεε ê beene fwe.

2 Beene dioo lewte no taale yí Jisos e. È nu wvú wvù to yen'yεε je fô beene le keelese fitele yí Nyo' le, ε è nu wvú wvù gee ε fitele fi beene lese yí Nyo' le kpwentene gene mεεse. Wvú to nu ε bee keekpwe kpwe yi yí kentam e. Wvú to baa ecim etaale ê kenshoose ke kfuu yiyε kpwe le ke, njefo wvú to taale fwe yí bvujonke bvù nu ê wvú fwe le. Keseen wvú ε no nu ε wvú ε shii ê εbo ke εεεy ke kawla Nyo' le.

3 Ben ekpwawcì ekumε wvuwe wee wvù to nu ε fiisen kfuu wvuwe ŋgew wvù bonyii bô befe to nyaa ê wvú, wvu le fifie ege é mvuntelem mvunen saa ewεeyi, keŋεε edoose ê je ke.

4 Jem yí ben tumte ben ε bo kebefε nu ε ben baa tum wase egen ebuy yí gvune di wee le ejiim lo ke.

5 Me ŋkpwaake le ben baa edaaye wase ntefe wvù Nyo' nyaa ê ben diewe boom bew e ke? Wvú gayte le, “Waa wem, seke Tata nɛci wo, fo wo ejodò ncεw ke. È wvú dioo saake wo yí fiε le, fo shem ekpweè wo ke.

6 È keè le Tata ké no nɛci ε è nu wee wvù wvú kooŋke, tamte ε è nu wan tfuu wvù wvú joo le è nu wvuwen.”

⁷ Ben emum ekuulè shém yî bonḡew bò ben yene le, ekeè le Nyo' nēci lo ben diēwe boom bew e. Wan mvu nu dvú wvù jay fiē ē ice enu sē wvú ē nele wvú e?

⁸ É Nyo' cin'yi ben e sē wvú nēci no wvú ké no nēci boom bew bocii, tu ben baa enu naa lo boom bew kē, tu ben nu bikolē.

⁹ Beene keḡke tēn bo'icee bosēbeene bo fokuse fēn bò to ké no nēci beene ē beene wvumte bó. É beene to wvumte bó nonēn, tu kē è nulo ē beene enya bikuu ê Icee biyoy bisēbeene efey lo nonēn, ke ekeḡke nshii wvù mēy lo?

¹⁰ Bocee bosēbeene bodvu to nu ē nēce beene kē yî kefew e caan no bó to yene le fī nu lēḡ. É Icee wesebeene wvun nēci beene keeseyse lo beene ē beene eyuule no wvú yuule.

¹¹ È ke dioo nu seke bó tamte wee keenēle wvú, ē wvú no yuuke nluce kefew kekīe le, wvú saa yuuke naa lo nḡoḡ kē. É ke edioo enu wase ejim jo kefew kedvu, ē fifiē to bô nyēkeey noo nce wvu teyḡey fô wvuwē wee wvù Nyo' nu ē yēyi wvú ê yiyin je le.

¹² Nonēn ben ege ē can yene yì nu ē jēw wase ekase etēme, ege tēn ē envw w eyene yò ndēḡdeḡe wase ekase etēme.

¹³ Ben egenē kē ē è nu ê je yi teyḡey e, wvu lē fo bikoy bì tēse wase emēse elose kē, ē bí etēme lo.

Ntefe ekumē keeyuuke Nyo' le ntay

¹⁴ Ben emomtè ntay keecee yî nyēkeey e ben ē bonyii bocii, ebvuu emomtè tēn ntay keecee nce wvù yuule. É wee nu sē wvú cee nce wvù yuule, tu kē è nulo ē wvú ke eyēn Tata le kē.

¹⁵ Ben eyenē fo wee mvu ke ejim keeḡke mbuwma Nyo', ebvuu eyenē tēn fo ḡgow mi yì befe ke enē ebuy ê ben entelēḡ ke eto bô ḡḡew ejiḡ bonyii nteēn.

¹⁶ Ben eyenē tēn lē fo wee mvu ben e ekeḡke nce nnyēn kenjaḡ kē. Fo wee tēn emaà lo Nyo' diēwe Esau wvù to gesē mbuwma wvù wvú to nu keeke ekeḡke diēwe wan wvu ḡḡaywee le yî mwēm mvudien mvu kaḡ mwaḡḡ e maḡḡ kē.

¹⁷ Kē ben kee lē ejim jodvu nu ē wvú to nē bvuu no gomte keeḡke mbuwma wvun can ice le, ē ice ma lo wvú? Naa no wvú to cim shiwse misēm ê jise gomte keekumēn fitele fiēw, nu ē kē je to bvuu nu dvú keekumēn kē.

¹⁸ Ben ekeè lē fô ben leeme fó keseen baa nu diēwe bvudvuu bvū fokuse bvù bonyii bo Islael to leeme fó bvù bó yene bvú le kē. Bó to leeme, ē ḡḡuy bene nēn lululu, ē ekfuj yiile nēn tayḡtay, ē nffum kfune tēn nēn kekeke.

¹⁹ Bó to yuuke tēn ē soḡ saayi, ē diēw mi jemyi. Mwēm mvù diēw yidvu to jemyi to nu ē bēmse bó, ē bó no leke lo lē fo diēw yidvu ebvuu ejeme ê bó kē.

²⁰ Bó to leke nonēn njefo fiē fī diēw yidvu to jemyē to nu ē ghaw mvunḡay mvubole. Diēw yidvu to nu ē ciise lo ê bó lē, “Fo fiē ebencē lo bew kum wvun kē.

É è cim nu nyam, é bó tumye lo bô eta ε yí kpwe.”

21 Keceey, mwεem mvù bó to yene fó to bemte baay. E Muses kebee jeme le, “Nfan wvu baay nu ε ge ye ε ne ε no ciinke lo me.”

22 Ben nu finen ε ben leeme ε è nu yí kum wvù Sayon e, ε è nu kelaante kè è nu ke Nyo' wvù keŋke nshii le, ε è bvuu nu Jelusalem wvu fowe. É nu fó fò bonceendaa bo Nyo' le bô wee yaa nulo etan etoo lanlanje yí kentaashe le.

23 Ben nu ε to wase ê kentaashe ke bonyii bo Nyo' le bô è nu boom bew bo fwe, ε wvú ε saŋ ediee ebo ê nwa' we le fowe. Ben nu ε to wase fwe dvu Nyo' wvù sumtene bonsaw bo bonyii bocii le. Ben nu ε to wase ten fwe dvu biyoy bi bonyii bô to nu teyete e bì Nyo' nu ε ge wase bí ε no yuule gene mæse le.

24 Ben nu ε to wase ten fô Jisos wvù leeme fwe monkan mo monfem entelenjo jo Nyo' bô bonyii le, è to ten fwe dvu elemε ke Jisos e kè bó to miawmiawεε yí beene le. Elemε kin jemyi fiεε fi fele fi elemε ke Abel e.

25 Ben eyenè fo ben etune keebwee wee wvù jemyi ê ben e. Ben kpwaake le é bonyii bo Islael to nu se bó eboy can ngew wvù to toε fô bó le njefo bó to nu ε tun keebwee wee wvù Nyo' to tumεε le wvú etete bó fokuse fen e, tu je nu dvú fô beene le keeke eboy fen é beene ε tun keebwee wee wvù teete beene ε è nu fowe le?

26 È to nu sekekie ε wvú jeme ε nshε shiw. Keseen ε no nu ε wvú ε kaw le, “Seke me ε mbvuu ε nshiwse, é saa eshiw ke nshε maan ke. Ebulε ten nu ke eshiw fó.”

27 Diεw yí le, “Seke me ε mbvuu ε nshiwse”, duŋci le Nyo' nu ke ecake lo mwεem mvunciim mvù wvú to bomεε mvù è nulo é bó eshiw, wvu le é esheε ke wase mwεem mvù yaa nulo é bó eshiw ke.

28 Fí ε mum ε no nu le beene enyaà keyoone ê Nyo' le bvunfon bvù beene nu ε fiisen nu bvù è yaa nulo é bó eshiw bvú ke. Nonen beene emum ebunleè Nyo' ê je yí len e, enyaà n'wvum ê wvú, fanè wvú.

29 Beene enyaà nonen njefo, “Nyo' wesebeene nu diεwe ngyu wvù nulo efiese lo fiεε le.”

Ibu 13

Ntefe wvu fokemεse

1 Ben ekoŋenè ke nonen gene fwe diεwe boom bo bwee wan e.

2 Fo ben ecine keefiisene botolo εla eyene le ke. Ben ekeè le bonyii bomew nu ε fiisen wase nonen ε fiisen ε è nu bonceendaa bo Nyo' le yaa kee ke.

3 Ben ekumyì bonyii bô nu yew ncaw e, enù ke diεwe ben ε bó bocii nu yew ncaw e. Ben ekumyì ten bonyii bô bó nyεwle bô bó, njefo ben ten keŋke ye.

- ⁴ Wee tfuu enyaà n'wvum ê kentaashe ke wee bô kpwese le, é kpwoon bô diemsen eyenè fo wee ebvuu ebuy ekfuñ ebefe bô kentaw kebole. Ben ekeè le Nyo' nu ke esaw bonyii bocii bô cee nce nnyen noo bô cin'yi kentaashe kebole ke wee bô kpwese le buyte ekfuñ.
- ⁵ Fo ben elese bvufee bvunen yî bigew e yî nshii wene le ke. Wee eyuukè njon bô fiε fi wvú kenke, njefo Nyo' nu ε gay le, “Kε me nu ηke en'yuu encine wo le ke, ε ke me nu ηke en'yuu enlan wo ke.”
- ⁶ Fifin ε mum ε ge ε è nulo é beene ejeme se kemañen no wee to gayε le, “Tata nu wvù fii me. Kε è nulo é me enfane fiε ke. È nulo é wee ege la bô me?”
- ⁷ Ben ekumyì bonyii bô to nu bikuu binen bô to yawεε fewce diew Nyo' ê ben. Ben ekume no nce wvubo to nu, emum ebeñene je yì bó to lesεε fitele yî Nyo' le jó.
- ⁸ Kε Jisos Klistu ké no kumene ke. No wvú se nu foguu, nu ke no wvú nu εben, ε è nu ke no wvú nu ke enu sekecii.
- ⁹ Fo ben ecine é bonyii eto bô bon'yεeyi bo jεey bô bó yaa kee jò bó buy, elewe ben dvú ke. Fí jee le mvuntelem mvuseεbeene etemyi nje mbuwma Nyo', εfey fo enu nje bonci bo ekume mwεεm mvudien. Kε bonci boban cim fii bonyii bô leeme yî dvú le ke.
- ¹⁰ Beene kenke ketañ ke ncese le, ε bocee ncese bô lemte fô ketañ ke yew Nyo' yi fokuse fen e yaa kenke naa lo mvuñgay keedie fiε fi ne fô kekin ketañ e ke.
- ¹¹ Ben ekeè le ekole ke bocee ncese le to ké jo ε è nu ελεμε ke nyám e ley dvú fô Bvudvuu bwe bvù looci Yuule naa ntay e keege ncese dvú fô bibefe bi bonyii le, geenεn ε bó jo nyám yidvu buysen ntew dvú mum ton ε yí fie.
- ¹² Jisos to nu ε kpwe ten ekfuñ jo kelaante wvu le wen ecuke bibefe bi bonyii le bô ελεμε kew.
- ¹³ Nonen beene emum ebuysen ten ebi wvú le ekfuñ jo ntew ekenke ten boncun bô wvú to kenkeε.
- ¹⁴ Beene kee le ke la din di beene nu fó fen nu ke emey nu sekecii ke. Beene taale fwe ε è nu yî la di bæε too le.
- ¹⁵ Nonen beene emum eβεε Jisos egeè ncese wvu mbense fô Nyo' le sekecii wvù è nu keeyemte diee diew.
- ¹⁶ Fo ben edaaye keege lemme di jee noo keegawte mwεεm mvunen mvù ben kenke ben ε bonyii bomew ke. É ben gee nonen, tu è nu ncese wvù jee fô Nyo' le.
- ¹⁷ Ben eyuukè bonyii bô nu bikuu binen e, geè no bó shieele, njefo bó taale fô biyoy binen e diewe bonyii bô kee le bó nu ke etaje diuw ekume lemme dibole ê Nyo'. Ben egeè nonen wvu le bó egee lemme dibole bô nlanlan, ε è yaa nu ke shen shen ke. É bó gee shen shen, fifie saa efici ben ke.

18 Ben ebunleè fô bese le. Bese kee naa keceey le ke fitele saake bese yî fiεε fimew e ke, njefo bese ké no shieele keegeε fiεε ficii bô n'wvum.

19 Me nlooci naa nleke baay le ben ebunleè, wvu le è nulo é me en'yaṅsen eṅkase ento fô ben e.

Bunle bô ṅgayma

20 Nyo' wvù nu Nyo' kembonen nu wvù to kaseε bvuse Jisos wvù Tata wesebeene wvù nu Ncey Njée wvu baay yî kpwe le. Wvù to bvuse fele yî mvuṅgay mvu εleme ke moṅkan mò mey lo le.

21 Me nleke le wvù enya ben bô mwεem mvù jee mvunciim, wvu le ben egee fiεε ficii fi wvù shieele. Me nleke ten le wvù elemtè fiεε ficii yî yene le can Jisos Klistu le fi wvù yene le fí jee wvù le. Beene enyaà mbense ê Jisos Klistu wvun sekeci se ṅka. Fí enù nonen.

22 Boom bo bwεem e, me nleke le ben ekuu shém eyuw diew ntefe yì me nsañ fô ben e yin. Fiεε fi me nsañ nu ke nen kfuy.

23 Me ṅgomte le ben ekiεε le waa bwee wesebeene wvù Timatio nu ε bó ε bvuse wase wvù yew ncaw e. É wvù yaṅsene lo ε to, é bee wvù ke elen ekale kemwaan eto eyen ben e.

24 Ben egay bonyii bô nu bikuu binen e bocii noo bonyii bô è nu bo Nyo' le bocii enya ê me. Boom bo bwee wesebeene le bo Itali ciinse ten ṅgayma ê ben.

25 Nyo' ebuw ben bocii bô kembonen.

Jem

Jem 1

¹ Nwa' wvun saŋ me wvù Jem, waa lemme Nyo' bô Tata Jisos Klistu. Me nsan fô dikfuu di bonyii bo Nyo' le di yuufe ncow difεε dî nu ε tawse woŋ e tfuu. Me ŋgayte ben e.

Keelese fitele yî Nyo' le noo keefeefene

- ² Boom bo bwεem e, é mmom too fô ben e jé le jé le, é ben jo le è nu bvujonke.
- ³ Me njemyi nonen njefo no ben fele ê mmom ente, leese ke fitele yî Nyo' le, nu ε yî nu ege é ben ekee keekuu shém ntay.
- ⁴ Ben ekuulè ke shém nonen egen emese, wvu le ben enu bonyii bô nu ε taw ε kocen, yaa tane fiεε yî yene le ke.
- ⁵ É wee mvu ben e tane bvufee keekiεε fiεε fi Nyo' gomte, é wvú lεke ε è nu ê Nyo' é wvú enya. Nyo' nu wvù nyaa ê wee tfuu bô fitele ficii yaa waale wee ke.
- ⁶ Geenεn, wee edioo elεke no leeme ke bô Nyo' fitele fimwaan, yaa maŋene ke. Ben ekeè le wee wvù maŋene nu diεwe joo yi baay yî fwefwe bvuyte ε yî shεεŋke bii jò wvú gene.
- ⁷ Fo wee diεwe wvuwe le ekpwaakè le wen nu ke elεke fiεε ê Nyo' ekeŋke ke.
- ⁸ Wvuwe wee nu wvù keŋke mvuntelem mvunfεem, tuwtene lo yî fiεε ficii fi wvú gee le.

Bonyii bo kefufe le bô bo kpaw e

- ⁹ Wee mbee wvù fuute eyuukè njoŋ le Nyo' nu ε bense wase wvú,
- ¹⁰ é wee kpaw eyuukè njoŋ le bó nu ε shike wase wvú, njefo wvú nu ke egen ecine kpaw we le ke leŋleŋ no fow ké looke yî εgay e ke ne yeε.
- ¹¹ No diuu ké sane dioo baa ton'yi ε εgay yowlen, ε fow wvù yî dvú le yeε, ε bvujonke bwew ka, nu ke leŋleŋ no wee wvù ghane kuŋene kpaw we nu ke egen.

Mmom bô mwεem mvù teeyi bonyii

- ¹² Njoŋ wvu baay nu wvu wee wvù kuule shém seke mmom ε to fô wvú le, njefo è nu seke wvú ε leem ε tεme, é wvú ke ekeŋke kefo ke bvunfon e kè è nu nshii wvù mey lo kè Nyo' nu ε kaw wee tfuu wvù kooŋke wvú dvú.
- ¹³ Fo fiεε ké dioo teeyi wee le wvú ege kebefε, ε wvú no duù le è teeyi Nyo' wen ke, njefo ke è nulo é fiεε etele Nyo' le wvú ege kebefε ke. E ke Nyo' ké no teeyi fiew wee ke.
- ¹⁴ Fiεε fi ké tele wee nonen, nu mwεem mvù befe mvù wvú keŋke shiee yî dvú le, é mvú dioo ε lewce wvú mum wow,

15 É shiee wvun ké tème, mum to bô kebefè, é kebefè ké dioo ε ku ε kocen, to bô kpwe.

16 Boom bo bwεem e bô nu shém yem, fo ben elɛlè bikuu binen ke.

17 Mwεem mvunciim mvù jee nu lɛɲ, mvù beene kɛɲke nɛn'yi ε è nu fowe fô Nyo' le. È nu wvù Cee Mbom mwεem mvunciim mvu fowe mvù nyaa n'yuu. Kε Nyo' kumene diewe kenjinjin e kè ké no kumene mondvuum ke.

18 È nu wvù wvù to cawεε beene nya beene bô diew yì nu keceey ε yì nya nshii wvu fwe ê beene, wvu lε beene enù fiεε fi fwe fi wvù to balεε lε è nu naa fiew ente jo mwεem mvunciim mvù wvù to bomεε.

Keeyuuke diew Nyo' gee no yí gomte

19 Boom bo bwεem e bô nu shém yem, ben ekieε lε wee tfuu kɛɲke keenu cekey keenya bitem yì fiεε le, joð wεε bô njeme, joð wεε bô shém yì ton'yεen,

20 njefo ke wee wvù ton'yi shém nulo ege fiεε fi teytey fi Nyo' shieele ke.

21 Fí ε no nu lε, ben ecine nce nnyen e noo kɛɲge kè tɛmyi le, eshike bikuu binen, efiisen diew Nyo' yì Nyo' nu ε lese fô mvuntelem mvunen e. Diew yin nu yì nulo eboyse ben.

22 Fo ben elɛlè bikuu binen keeyuuke ke lo diew Nyo' maan ke. Ben egeè no yí gayte.

23 Wee wvù yuuke ke lo diew Nyo' yaa gee no yí gayte, nu diewe wee wvù nu ε taa bvushiw bwew ê kenlɛey e,

24 no wvù tale nonen, ε base jim ε mum ε kase ε daaye no nfieesen ye nu.

25 Geenɛn, wee wvù looci taale ê nci wvù taashi bonci bocii bvuu bvuuεe bonyii bvunfaw e, leeme yì dvù le sekecii, yaa daayi fiεε fi wvù yuuke ε wvù jemyi, gee no wvù gayte, nu ε Nyo' nu ke elan kembonen yì fiεε ficii fi wvù gee le.

26 É wee teɲe ekole kew lε wen looci nu wee mbee, ε faɲε yaa ejici leme diew e, tu wvù lɛεle ekole kew, ε fiεε fi wvù teɲe ekole kew lε wen nu wee mbee nu εcici.

27 Mbee wvù Nyo' Icee wesebeene yεne ε è nu wvu lɛɲ bvuu yuule ê wvù ejise, nu wvu wee wvù taale fô boom bo boɲkfu le noo fô bokε' bo boɲkfu le seke bó nu yì ɲεw e. ε è bvuu nu ten wvù kemsene bô ekole kew fo mwεem mvu yì nshe le fen elom wvù.

Jem 2

Fo ben eduɲci kejeey jεy ke

1 Boom bo bwεem e, no ben nu ε lese wase fitele yì Tata wesebeene wvù Jisos Klistu wvù nu Tata bvukuke le, fo ben eduɲci kejeey jεy ke.

²Me njemyi nonen njefo è nulo é bonyii bofée ene eley yew yene nshii le, ε wvumvu ε jise ndvú ε yí jee, ε lese mvuncaw ε bó ε kene bô ketwaa ke bigew e kè yéele, ε wvumvu wee nu fiew wee kefufe, ε wvú ε jise ndvú ε yí ε sawyε.

³Ben ε ne ε gay ê wee kefufe le, “Leem fofe,” keneε le, “To eshii fokuse fen nshε le,” ε mum ε nya bvufee ε è nu yí wee wvù sufe ye we le, ε gay ê wvú le, “Kε to eshii fen wee wvu baay.”

⁴É ben ne ε ge nonen, ke tu ben nu ε tu wase bonyii bô sumtene bonsaw bô mvuntelem mvù yiile? Kε fifin yen'yi le ben duñci kejεey jεey ê ben enteleñ e?

⁵Boom bo bwεem e bô nu shém yem, ben eyeke eyuw, ke è nu bonyii bo kefufe le bo fokuse fen bô Nyo' nu ε caw le bó elooci keñke mbee wvù nu ε yiñsen e? E ke è bvuu nu bó bô Nyo' nu ke enya bó bô bvudvuu ente jo bvunfon bwew bvù wvú to kawεe wee tfuu wvù koonke wvú dvú le?

⁶Geenen, ben nen'yi finen kaa no shoose lo wee kefufe ê yiye je le, yene ε è nu wee kpaw e. Bonyii bô nu ε ben ε shii yí yene le guute ben gene dvú yéw bonsaw e nu baa? Kε è nu bonyii bo kpaw e le?

⁷Kε è bvuu nu ke bó bô jemyi díew yí befe ekume diee di Tata wvù keñke ben e le?

⁸Ben elooci gεele nci Nfon wvù Nyo' wvù nu ê Nwa' we le. Nci wvun nu le, “È koonkè waa bwoo no wo koonke ekole kuw.”
É ben gee nonen, tu ben gee leñ.

⁹Geenen, é ben duñci kejεey jεey no me mbe njeme wase, tu è nu kebefε ε ben gee, tu ben nu ε ηgoy nci wvú ε koo ben.

¹⁰Ben ekeè le é wee gεele naa bonci bo Nyo' le bocii, ε ke ε ηgoy mwaan, tu wvú nu ε ηgoy wase bocii.

¹¹E fí nu nonen, njefo Nyo' wvù to gayεε le, “Fo wo ejañ kpweε wee ke” nu ke ten wvú wvù to gayεε le, “Fo wo eyu wee ke.”
É wo nu se wo nu ε jañ kpweε wee, geenε ε yu wee, tu wo nu ε ηgoy ke nci Nyo'.

¹²Nonen, ben ejemyi bvuu geè mwεem diewe bonyii bô Nyo' nu ke esaw bó bii nci wvù bvuse bonyii bvunfaw e.

¹³Ben ekeè le Nyo' nu ke dīoo saake nsaw, wvú saa ekoole shen fô wee wvù to baa koole shen fô wee mvu le ke. Geenε, wee wvù koole shen nu wvù nu ke eboy yí nsaw e.

Fice fi duñci le wee nu ε lese fitele yí Nyo' le nu gee diew di leñ

¹⁴Boom bo bwεem e, é wee ne ε no duu le wen nu ε lese fitele yí Nyo' le, ε gee diew yaa duñci nonen ke, é fife ke efi wvú yí la le? È nulo é fitele fi wvú lese fidvu ke eboyse wvú?

¹⁵Bó ejo le, é waa bwoo wvù diemsen keneε wvù kpwoon ne ε no tane ndvú bô mwεem mvudien mvu ediuw ecii,

16 Ɛ to fô wo le, wo ɛ gay ê wvú le, “Nyo' elañ kembonen yî yo le é wo ekeŋke ndvú bô mwɛɛm mvudien.” É wo gay ke lo nonen, se wo ɛ nya wvú bô mwɛɛm mvù wvú shieele, é fifie efi wvú yî la le?

17 Ben baa yen le le é wee duu le wen nu ɛ lese fitele yî Nyo' le, se gee diew duŋci nonen, tu fitele fi wvú lese ɛfinɛfin nu ɛcici?

18 Wee mvu nulo ene egay le, fi wee mvu le nu ɛ wvú ɛ lese ɛ è nu fitele yî Nyo' le, ɛ fi wee mvu le nu ɛ wvú gee ɛ è nu gee di leŋ. Me ɛ mum ɛ no ŋgayte le wvú eduŋce no è nulo é wee elese fitele yî Nyo' le se gee diew nu leŋ, é me nduŋce ê wvú no me nu ɛ nlese fitele yî Nyo' le ɛ è nu yî gee diem di leŋ e.

19 É wee nu ɛ bee le Nyo' nu mwaan, tu è nu leŋ. Geenɛn, naa bonceendaa bo dɛwle le ten nu ɛ bee ke nonen ɛ no fane, ciŋke.

20 Wvuwɛ wee nu keyuŋ. Wvú gomte le me enduŋce le é wee lese fitele yî Nyo' le se gee di jee ŋkuuŋ, tu è nu ɛcici?

21 Ke fiɛɛ fi to gee ɛ Nyo' yen le Abl'am wvù icee wesebeene nu ɛ kocɛn wee we le to nu gee diew di leŋ e? Wvú to nu ɛ jo waa we wvù Aysik, jike yî ketañ ke ncese le keege ncese dvú fô Nyo' le.

22 Ben ɛ yen le le fitele fi wvú to leseɛ yî Nyo' le bô gee diew di leŋ to lene ekale kemwaan e? Gee diew di leŋ to nu ɛ duŋce le fitele fi wvú to leseɛ yî Nyo' le to nu ɛ yiŋsɛn.

23 Ɛ fí mum kocɛn no bó to saŋɛɛ ê Nwa' Nyo' le le, “Abl'am to nu ɛ lese fitele yî Nyo' le, nje nonen, ɛ Nyo' yen le wvú nu wee wvu teytey.” Ɛ bó mum no teŋe wvú le nsaa Nyo'.

24 Ben ɛ bvuu ɛ yen le le fiɛɛ fi ké ge ɛ Nyo' yen le wee nu ɛ kocɛn wee we le nu gee diew di leŋ, ɛ è yaa mɛy ke fitele fi wvú lese yî Nyo' le maañ ke?

25 È nu ke leŋleŋ no fi La'ab wvù to nu kpwoon nsake le to nu. Fiɛɛ fi to gee ɛ Nyo' yen le wvú nu ɛ kocɛn wee we le to nu gee diew di leŋ. Wvú to nu ɛ fiisɛn boŋkee bo Islael ê wvú yew, ke duŋce je yimi jɛɛy yì bó etu jim jó.

26 Fí ɛ no nu le, ke no keyoy cin'yi nyam ye le ɛ yí mum no nu wase fiɛɛ fi ɛcici, nu ke leŋleŋ no wee lese fitele yî Nyo' le se gee di leŋ ŋkuuŋ tu fí nu ɛcici.

Jɛm 3

Wee eshe bô leme diew

1 Boom bo bwɛɛm e, fo ben nteen egomtè keenu bonyii bo n'yɛɛyi le ke. Ke ben kee ntay le bonyii bo n'yɛɛyi le nu ɛ wvubo nsaw nu ɛ bó nu ke elooce etasse ntay?

2 È nu keɛɛy le beene bocii gee bojay nteen. Geenɛn, é wee nu dvú wvù yaa ké jay njeme ke, tu è nu wee ɛ wvú ɛ kocɛn, bvuu kee ten keekemsɛn bô ekole kew.

- ³ Beene ké jo ncaw lese emvu jo nyambala keege le yí eyuukè beene le. E beene mum no banse nyam yidvu dvú e yí gene jò beene gomte.
- ⁴ Ben eyen ten no ηguw wvu ê joo nu. Wvú kuuke naa ntay, e fwefwe wvù temyi ké no domsee. Geenen, e fiεε fi wee wvù guute ηguw banse dvú e wvú gene jò wvú gomte, nu ke nen caan.
- ⁵ È nu ke lenlen no leme nu. Dí nu ke lo fiεε fi caan yí wee le. Geenen ké no jemyi mwεem mvù temyi baay. Ke ben kee no è nulo é ηguy ekpway nen kpwayy, ekoo, eshike ekowe kecile fokuse?
- ⁶ Leme nu ke ten diewe ηguy e. Mwεem mvù befe mvu fokuse fen nu e tase yí leme di wee le, lamte beete bô ye wee yicii. Leme ké fwεε ηguy e wvú befe bô nshii wee tfuu. E ηguy wvun nu e leme joo e è nu fô ηguy wvu baay e.
- ⁷ Bonyii nu e mom wase keeyεyi dikfuu di nyám e dicii. Bó nu e yεyi wase nyám yi ηkpwaante bô mvunyiim noo nyám yì sone bô yi ê joo.
- ⁸ Geenen, ke wee nu naa lo dvú wvù nulo eyεyi leme ke. Leme ké no wewte ke lo, e dí e yiηsen bô kebefe e è nu kè nulo eyu wee ke diewe edien e fimbuw e.
- ⁹ È nu leme din di beene ké no bensee Tata wvù Icee wesebeene dvú, e è bvuu nu ke dí di beene ké no nan'yi bonyii dvú, e bonyii ban nu e è bom Nyo' e bó fieesene wvú.
- ¹⁰ Diuw mwaan e mum e no bvuuuse mbense bvuu bvuuuse boncun. Boom bo bwεem e, ke fí kenke keenu nonen ke.
- ¹¹ È nulo é joo yì yuule bô keduuduu ebuyte diuw mwaan e?
- ¹² Boom bo bwεem e, è nulo é fimbi eyum yí efele le? Nuu le è nulo é ntulun eyum yí efele le le? Ke è nulo ten é diuw joo lew ebvuuse joo yì jee ke.

Bvufee bvù nen'yi fowe

- ¹³ È nu yεε ê ben ente wvù duu le wen feefene bvuu kee fiεε? Mweten eduηce ekole kew yí nce we wvù jee bô gee diew di len di wvú gee yaa saale ke ye, no wee wvù feefene ké no nu.
- ¹⁴ Geenen, é wee ffuuke bô kenghew noo ken'yεε ejise fô fitele le, fo wvú esaalè ye le wen feefene lo ke. É wvú ge nonen, tu wvù tune keceey.
- ¹⁵ Ke kfuu bvubwe bvufee yaa nu bvú fowe ke. È nu bvú yí nshε le, e è nu bvú wee wvu wum e, e è bvuu nu bvú dewle le.
- ¹⁶ Ben ekeè le naa fεε fô bonyii kenke kenghew bô ken'yεε ejise, nu e mwεem ké no bvuuηke ke lo fó. E bó no gee dikfuu di mwεem mvù befe le mvunciim.
- ¹⁷ Geenen, wee wvù kenke bvufee bvù nen'yi fowe ké no yuule, koonke nyεkeey bvuu nu wεε, nyaa ten bitem ê wee mvu, nu e wvú e yiηsen bô shen noo gee di jee, yaa duηci kejεy jεey ke, yaa kenke díew fiεε ke.

¹⁸ Bonyii bò gæle nyεkeey, jeywi ηgow yì è nu nyεkeey, ε ηgbwele no nu nce wvu teytey.

Jεm 4

Keekoηke mwεεm mvu yì nshε le beete bô wee Nyo'

¹ Fιεε fi nen'yi no too bô waa noo bvudiuw ê ben enteleη nu la? Kε è nu shiee mwεεm mvù ye yene gomte mvù ffuuke shém yene le le?

² Ben dioo shieele fιεε sε ben ε κηηκε mum no gomte keeyu wee sε κηηκε. É ben ké dioo bvushu ejise yì fιεε le, é fí fufe, é ben mum no waale, diuu. Fιεε fi gee ε ben nu sε ben κηηκε mwεεm mvun nu ηjefo κε ben ké no lεke ê Nyo' κε.

³ É ben ké dioo ε cim ε lεke, ben saa κηηκε κε, ε è nu ηjefo κε ben lεke bô boηkpwawce bo lεη κε. Ben lεke mwεεm ε è nu κε keege mwεεm mvù ye yene gomte dvú.

⁴ Ben nu naa lo diewe bokene bô nu ε cine wase bolemse bobole ε no gee ε è nu nsake le. Kε ben kee lε é wee kole nsan bô woη wvun, tu wvú nu ε tu wase wee bvuban fô Nyo' le le? Nonen, ben ekeè lε ε è nu naa yee wvù nu ε caw fiew keekoo nsan bô woη wvun, tu mweten nu ε tu wase wee bvuban fô Nyo' le.

⁵ È nulo é ben eghan nee sε no kpwaake lε fιεε fi bó to saηεε ê Nwa' Nyo' le nu εcici? Bó to nu ε saη lε, “Nyo' κηηκε shiee, beele baay fô keyoy kè wvú to γεκεε lε kí enù yì yese beene le.”

⁶ Nyo' fii naa beene baay. È nu fιεε fi bó saηεε ê Nwa' Nyo' le lε, “Nyo' shiwse bonyii bô bensee bikuu bibole, geenen buuke bonyii bô shiwse bikuu bibole bô nfi.”

⁷ Nonen, ben enya bikuu binen ê Nyo', ebon ηaη ben ε bo dewle é wvú efεε lo ê ben ejim.

⁸ Ben eto nceencee mbew Nyo' le, é wvú eto ten nceencee mbew yene le. Ben bonyii bô befe ebvushε can fô mwεεm mvù befe le, ecuke mvuntelem mvunen ben bô leeme mvuntelem mvunfεem ben ε bo Nyo'.

⁹ Ben enù bô yii, beelè shiwsè misem nen wowwowwow. Ben elu bô dikie, ebeelè ε è nu kpwe, elu bô ηjoη wvù ben yuuke, esoδ ε è nu bikuu.

¹⁰ Ben eshike bikuu binen ê Nyo' ejise, é wvú ecake ben we.

Fo wee elomte gee di waa bwee le κε

¹¹ Boom bo bwεεm e, fo wee ejemyì díew yì befe εκume waa bwee κε. É wee jemyi díew yì befe εκume waa bwee κeneε lomte gee di waa bwee le, tu wvú jemyi díew yì befe ε è nu εκume nci Nyo' bvuu lomte nci wvudvu. É wee lomte nci Nyo', tu κε wvú bæε wee wvù gæle nci κε. Wvuweε wee nu ε tu wase wee wvù saake lo nci.

¹² Wee wvù nyaa nci bvuu sumtene bonsaw bo bonyii le nu ke mwaan. È nu ke wvù wvù nulo eboyse kenεε elεse wee. Wo ε no nu yεε wvù lomte gee di waa bwoo le?

Fo ben esaalè ye ke

¹³ Ben eyeke eyuw, ben bò nen'yi no duu le, “Èben kenεε ntfuu nu ε bese nu egen kin kelaante le kenεε keki le, ece jó yí kelum e, ekamεm way, ekeηke sεw.”

¹⁴ Ben ké dīoo jemyi nonen no kee fiεε fi nu ebuy ekooy ntfuu le? Ben kee fiεε fi è nu nshii wene? Nshii wene nu diεwε kekfu kè bó yene kí le, moocε caan ε kí ε la wase.

¹⁵ Fiεε fi ben bee ejemyi nu le, “É Nyo' fεn nu ε bee le bese enù dvú, é bese ke ege fin fiεε ebvuu ege fifi.”

¹⁶ Geenen, ben nen'yi finen kaa no saale lo ye, kfunε gvuw. Ben ekeè le keesaale ye nonen nu kebefε.

¹⁷ Nonen, é wee kee fiεε fi leη fi wvù keηke keege, ε faηε yaa ege, tu wvù nu ε ge kebefε.

Jem 5

Bonyii bo kpaw e eyenè

¹ Bonyii bo kpaw e, ben eyeke eyuw fiεε fi me njemyi. Ben ebeelè, fuuηkè kpwe nje ηgew wvù nu ke eto fô ben e.

² Kpaw wene nu ε fo wase, shéw ε kan ndvú yene.

³ Mwεεm mvunen mvu bigew e nu ε duwse wase. Nduwse wvun nu ke eduηce nce wene ken'yεε ejise, ebvuu edie ye yene diεwε ηguy e. Eyan nu wase εdiuw yo fokemεse, ε ben baanci ke ε è nu kpaw.

⁴ Ben etaa eyen, ben nu ε lee bonyii bò lemte ηεε yene. Bó nu ε gbwele wase mwεεm mvunen ben ε faη keelaw bó, bó ε no beele. Bó nu ε bee wase Tata Nyo' wvù keηke Mvunηgay Mvunciim ε yuw kpwe yibo.

⁵ Ben nu ε ce wase fokuse fεn ε die bikuu binen no ye yene shieele. Ben nu ε dieken wase ε faηken diεwε binsonη bi nyám e bì cεyte diuu di bó nu ke esane le.

⁶ Ben nu ε bon bikaa ê bonyii ejim bó ε ley ηgew e. Ben ε yuwye bonyii se bó nu ε jay fiεε ηkuuη, ε è nu bonyii bò nulo saa ebon ηaη ben ε bó ke.

Bonyii bo Nyo' le enù nyεkeey

⁷ Boom bo bwεεm e, fí mum è no nu le ben enù ke nyεkeey egen ebuy seke Tata nu ke ekase eto. Ben etaa eyen no bonyii bò lemte ηεε ké no nu nyεkeey gen buy seke bó ké gbwele ηgu yì jee ηεε yibole. Bó ké cεy ε jaη ghan gbwe ε bó jewe mwεεm, ké cεy ε mvú ghan be.

- ⁸ Ben ten enù ke nyekēey nonen. Ben eleemè ke tēmyi njefo kefew kè Tata Jisos nu ke eto nu wase nceencee.
- ⁹ Boom bo bwεem e, fo wee ewvukenè waa bwee ke. Wee wvù wvukene waa bwee nu ke ekeŋke nsaw. Wee wvù nu ke esumtene bonsaw nu wase ê yew fwese.
- ¹⁰ Boom bo bwεem e, ben ejo kenfewsen fô bonyii bo ntum e bo Nyo' le bô to ké no jemyi ê bonyii ê diee di Nyo' le. Bô to yene boŋgew, nu ke nyekēey.
- ¹¹ Beene nu ε yen le bonyii bocii bô to nu ε kuu shém gen mēse nu ε Nyo' ε laŋ kembonen yî bó le. Ben nu ε yuw wase ekumε Job no wvú to kulεε shém gen mēse, ε bvuu ε yuw ten no Tata Nyo' to ghanεe baŋke ŋgew we ε è tu bvujonke. Tata to ge nonen, njefo wvú camte shen bô bonyii, koole yii fô bó le.
- ¹² Boom bo bwεem e, fiεε fi fele mwεem mvunciim nu le, fo wee ke dioo jemyi fiεε kan naa lo ke. Kenεε wvú kane ε è nu woŋ Nyo', kenεε wvú kane nshε, kenεε è nu fiεε diee la. Ê wee beŋe fiεε le, “Eε”, ε è no nu no fí nu. Wvú ε tun le, “Aay”, ε è no nu no fí nu. Ê ben gee nonen, Nyo' saa ke ebvuu elese wee ŋgew e ke.

Bunle bô mbee fii lo

- ¹³ Ê wee mvu ben e yene ŋgew, é wvú no bunleè. Wee é no yuuke njon, é wvú no yemtè bensee Nyo'.
- ¹⁴ Ê wee mvu ben e cεmte lo, é wvú tee bocee kentaashe ke bonyii bo mbee le, ε bó to bunle ê wvú we, yefe wvú bô mεem ê diee di Tata le,
- ¹⁵ é bunle yidvu yî bó bunlee ε bó ε lese fitele yî Tata le, efi wvú é wvú ebonen, é Nyo' ecake wvú we. Ê è fen nu ε wee wvudvu ε ge kebefe, é Nyo' elεsše enya é wvú.
- ¹⁶ Nonen, fí è no nu le, é wee ge fiεε fi befe, é wvú see ê waa bwee, é wee ebunle fô wee noo wee le, wvu le Nyo' efe ben. Bunle wee wvu teytey keŋke mvuŋgay baay gee mwεem nteen.
- ¹⁷ Ben ejo kenfewsen yî Elayja le. Wvú to nu ke wee wvu wum diewe beene le. E wvú ke bunle shiee le le fo jaŋ egbwe yî nshε le ke. E jaŋ mεy ke we nonen yî bilim e bitete bô keŋgawten.
- ¹⁸ E wvú ke ne kase bunle, ε Nyo' shike jaŋ, ε mwεem kase no kuu yî nshε le.
- ¹⁹ Boom bo bwεem e, é wee mvu ben e ne ε cine je kecεey e ε no bvuyte lo, wee mvu ε jo wvú ε tu bô wvú jim,
- ²⁰ ε wee wvù tu bô wvú jim we no kee le é wee baŋke wee wvù gee mwεem mvù befe, wvú ε cine jé ye yi εcici le, tu wvú nu ε bvuse mweten diuw kpwe le, Nyo' ε lεsše bibefe biew bì nu ε bí ε mâ lo.

1 Bi

1Bi 1

¹ Nwa' wvun saŋ me wvù Bita waa ntum Jisos Klistu. E me nsaŋ fô bonyii bò Nyo' nu e caw le è nu bew e bò nu e saanŋen e no nu biba bì Bontus bô Galëshia noo Kafadosia noo Esia noo Bitinia le.

² Nyo' Icee wesebeene to caw ben no wvù to seysee wase e è bæe lo le fí nu ke enù. E Keyoy kew mum seyse ben gæe le ben eyuukè Jisos Klistu wvù nu e cuke ben bô elæmæ kew e. Nyo' ebuw ben bô kembonen naa ntay ebvuu enya ben bô mvuntelem mvù læetene naa ntay.

Beene cee taale ke wase e è nu fwe

³ Mbense enù fô Nyo' le wvù nu Nyo' Tata wesebeene wvù Jisos Klistu bvuu nu Ice. Wvù nu e cam shen fô beene le baay, e boo beene ê mboo wvu fwe le no Jisos Klistu to buyee yî kpwe le. Fifin nu e ge beene e no cee keseen taale ke wase e è nu fwe,

⁴ keeke edie bvushew bvù wvù nu e gæe ê beene woŋ wvu we le. Bvushew bvun nu bvù yaa nulo efo, kenæe ebefe, kenæe ekpwe ncom ke.

⁵ Nyo' gemgeme ben bô mvuŋgay mwew fele yî fitele fi ben nu e lese yî ye le e no ceyte mboyma wvù nu ke eyen diuu di fokemæse le.

⁶ No ben kee nonen, e mum e no yuuke njoŋ. Geenæn e ben keŋke ke keeyuuke nsase yî kefew e caan nje mmom yî too fô ben e jé le jé le.

⁷ Yí too keemom laa fitele finen fi ben lese yî Nyo' le temyi ke ntay e. Ke naa ketwaa ke bigew e kè yæele nu e bó ké mom bô ŋguy, e ketwaa kin nu fiæ e fí nulo ebefe, tu è nulo é bó emom ke ten fitele fi ben lese yî Nyo' le. E fitele fin nu fiæ e fí fele ketwaa ke bigew e kè yæele. Nonen, é ke edioo enu diuu di Jisos Klistu nu ke eduŋce ekole kew, é bó ebensee ben, tumte moŋkum monen, wvumte ben.

⁸ Keseen nu e ben kooŋke Jisos Klistu e ben ke baa cim yen wase wvù le ke, e ben e lese fitele yî ye le, yaa yene wvù le ke. Ben e mum e no yuuke njoŋ naa wvu baay wvù è nulo wee saa esee ke,

⁹ njefo ben kee le no ben nu e lese fitele yî ye le nu e Nyo' nu ke eboyse ben.

¹⁰ Bonyii bo ntum Nyo' le bò to jemyi ekumæ mbuwma wvù Nyo' to nu keeke ebuw ben dvù to nu e no temte, gomte keekiee ekumæ mboyma wvun.

¹¹ Keyoy ke Klistu le to nu yî bó le no bó to teete le Klistu nu ke eyen ŋgew é ke edioo enu ejim jodvu, é wvù ekeŋke bvukuke. E bó mum no gomte keekiee kefew kè mwæem mvudvu nu ke ekooy, bô je yî mvù nu ke eghan se kooy jó le.

¹² E Nyo' mum ge e bó kiee le mwæem mvù bó to jemyi mvun nu e bó yaa jemyi e è nu fô bikuu bibole ke, le mvù nu fô ben e. È nu mvù mvù ben to yuwæe dew bonyii

bò to fewcɛɛ saaka wvù jee wvù wvu Nyo' ê ben ê mvungay mvu Keyoy ke Yuule kè Nyo' to ciinsɛɛ ε kí to fowe le. Mvun nu mwɛɛm ε naa bonceendaa bo Nyo' le beele keekiɛɛ mvú.

Bonyii bo Nyo' le eyuulè yî gee dibole

¹³No fí nu nonɛn, ben ekay bicaw binɛn enù ε ben ε seyse bvufɛɛ bvunɛn. Ben ekemsɛnè bô bikuu binɛn, taalè kɛ fwe ε è nu yî mbuwma wvù nu ke eto fô ben e seke Jisos Klistu ε kase ε duɲɛɛ ekolɛ kew e.

¹⁴Ben eyuukè kɛ Nyo' le diɛwɛ boom bew e. Fo ben ebvuu egeè mwɛɛm bii nyam ye le no ben to shee gee seke ben to bæɛ kenjiwe le kɛ.

¹⁵Nyo' wvù to cawɛɛ ben nu ε wvú yuule. Ben tɛn eyuulè yî gee dinɛn e dicii,

¹⁶no fí nu ε bó ε saɲ le, “Ben eyuulè njefo me n'yuule lo.”

¹⁷No ben tɛɲɛ Nyo' le Icee wene, ε wvú nu wee wvù saake wee tfuu yî gee diɛw e yaa duɲci kejeɛy jɛɛy kɛ, tu ben kɛɲke keɛɛɛ nɛɛ wene tfuu bô nfan wvù wvu Nyo' yî kefɛw e kecii kè ben nu yî woɲ wvun e kɛ diɛwɛ botolo le.

¹⁸Kɛ ben kee le Nyo' to nu ε sum wase ben yî nɛɛ wvu ɛcici wvù bo'iceɛ bonɛn to kuusɛɛ ben dvú, ε kɛ wvú to sum ε è nu bô fiɛɛ diɛwɛ bigew e bì nulo ebefɛ kɛ.

¹⁹Wvú to sum ε è nu bô ɛlɛmɛ ke Klistu le kè yaa nu kɛ fiɛɛ fi nɛɛw, kè nu diɛwɛ ke waa njee kentɛɲɛ le wvù yaa kɛɲke nɛɛ kɛnɛɛ fiɛɛ fimew fi befe yî dvú le kɛ.

²⁰Nyo' to seyse wvú ε è bæɛ lo ε woɲ sɛ ke kɛw, ε duɲɛɛ wvú ɛdiuw yo fokemɛsɛ ɛyan e nje yene.

²¹È ge Klistu ben ε sɛ lese fitele yî Nyo' wvù to bvusɛɛ wvú yî kpwe le nya wvú bô bvukukɛ le. No wvú ge nonɛn, mvuntelem mvunɛn bô boɲkpɛwɛɛ bonɛn ε mum ε no nu ε ben ε gɛɛ yî Nyo' le.

²²No ben yuuke keɛɛɛy e, ε kí gee ε mvuntelem mvunɛn yuule wvu le ben ekɛɲkè kɛɲkoɲɛn fô boom bo bwee wene le ε è nu ke keɛɛɛy, ben emum ekɔɲɛnè kɛ nonɛn bô mvuntelem mvunɛn mvunciim.

²³Ben ekɔɲɛnè nonɛn, njefo bó nu ε kase wase ε boo ben ê mboo wvu fwe le. Kɛ wee wvù boke ben wvun nu wvù nulo ekpwe kɛ. È nu Nyo' keɛɛɛ ε wvú yaa nulo ekpwe kɛ. Wvú to boke ben ε è nu bô diɛw ye yî nyaa nshii. È diɛw yin nu ke emɛy kɛ eleeme fô.

²⁴Fí nu no bó saɲ ê Nwa' Nyo' le le, “Wee wvu wum tfuu nu kɛ diɛwɛ ɛgay e, ε bvujɔɲkɛ bwew nu kɛ diɛwɛ fow e. ɛgay ké no yowlene, ε fow tɛn yɛɛte,

²⁵geenɛn ε diɛw Tata nu ke eleeme kɛ fô sekecii.” Diɛw yidvu yin nu saaka wvù jee wvù wvu Nyo' wvù bó to fewcɛɛ ê ben.

1Bi 2

Èkumɛ Tɛ di kɛɲke nshii noo ketum kè yuule

- 1 Fí ε mum ε no nu le, ben ecine mvuntelem mvù befe le, ecine kenleema noo díew fíe le, ecine kendoj ke beneen noo mvuñkunsen e.
- 2 Ben ekeñkè shíee fô emben yo ê keyoy e yò è nu diew Nyo' eyineyin e, ke lenlen no wan wvu caan ké no keñke fô emben e, wvu le yí egeè ε ben kuu gene fwe yí mboyma wene le,
- 3 no ben nu ε yen wase le Tata taale fô ben e.
- 4 Ben etoò fô Tata le wvù nu te ε dí keñke nshii, ε bonyii to tun le ke dí jee ke, geenen ε Nyo' caw fiew le è nu di kenlum e fô wen e.
- 5 Ben nu diewe eta yò keñke ten nshii le ε Nyo' bomte yew Keyoy kew dvú, ε ben nu ηgoo bocee ncese bew bò yuule, gee boncese bo ê keyoy e fô wvú le bò wvú koonke nje Jisos Klistu.
- 6 Fí nu ê Nwa' Nyo' le le, “Ben etaa eyen, me ηgeele te ê kelaante kè Sayon e, ε è nu te di buu di yew e. È nu te ε è caw me, ε me ηkoonke dí baay. Te din nu ε ke wee lese fitele yí ye le é wvú ke ewuumen ke.”
- 7 Fô ben bò nu ε lese fitele yí ye le nu ε te din jee fô ben e. Geen en fô bonyii bò baa lese fitele yí ye le nu ε fí nu fô bó le no bó to sañee ê Nwa' Nyo' le le, “Te didvu din di bonyii bo kembom e to tunee nu ε ne wase ε tu di bó ebom naa ε è nu buu di yew e dvú.”
- 8 E fí bvuu nu ε bó ε sañ le, “Te din nu ke egee ε bonyii baytene yí dvú le. È nu kemaan ε kí nu ke egee ε bonyii gbwekene.” Bó baytene yí dvú le njefo bó nu ε tun keebee diew Nyo' le, ε è nu no Nyo' to seyseε wase le fí nu ke enu.
- 9 Geen en, ben nu finen kfuu ε è caw Nyo' ben. Ben nu ηgoo bocee ncese bò lemte Nfon e. Ben nu ketum kè yuule, nu bonyii bò Nyo' nu ε ge le è nu naa bew, le ben eseñè mwεem mvù jee mvù wvú gee. Wvú nu ε tee ben, ben ε buy ê ejiwe le, ε ley ê n'yuwe wvu baay e.
- 10 È to nu fwele ε ben yaa nu bonyii ke, keseen ben ε no nu wase bonyii bo Nyo' le. Nyo' to baa cam shen fô ben e fwele ke, keseen nu ε wvú ε cam wase shen fô ben e.

Bonyii bo Nyo' le eduñci keñge kè jee entelen jo bonyii bocii

- 11 Nsáa yem shém, ben ekeè le ben nu botolo yí nshé le fen fele lo je. Me ε mum ε no nlooci ηkule lo can ê ben le fo ben egeè mwεem mvù nyam ye shieele ke, njefo mwεem mvumvun diuu bô biyoy binen.
- 12 Ben eduñci keñge kè jee entelen jo bonyii bò yaa kee ke Nyo' wvu le é bó cim jemyi ekume ben le ben befe lo, é bó eyenè keñge ken en kè jee le, é ke edioo enu diuu di Nyo' ε to, é bó etumte moñkum mew.
- 13 Ben eyuukè wee tfuu wvù bó nu ε gee le wvú esaakè bonyii le no ben nu bonyii bo Tata le. Ben eyuukè Nfon wvu Lum wvù nu Nfon wvu baay e,

¹⁴eyuukè naa bonyii bò wvú nu ε gee le bó esaaké biba bi woη e leese bonyii bò gee mwεem mvù befe ηgew e bensee bò gee mwεem mvu leη e.

¹⁵ Nyo' gomte le ben egeè mwεem mvu leη, emum ebaan̄ke dew biyuη bi bonyii le bò jemyi mwεem ncεwn̄cεw.

¹⁶ Ben eceè diewe bonyii bò bó nu ε bvuse wase bó bvunfaw e, geen̄en fo ben emum ejod̄ fifie tεeke fojise gee bibefe ke. Ben eceè ε è nu diewe bonfaw bo Nyo' le.

¹⁷ Ben ewvumtè bonyii bocii, kooηkè boom bo bwee wene le bo mbee le bocii, fanè Nyo', wvumtè Nfon wvu Lum wvù nu Nfon wvu baay.

Bonyii bo Nyo' le ejod̄ kenfews̄en yî ηgew Klistu le

¹⁸ Bonyii bò lemte bomew e, ben eyuukè bonyii bò ben nu ê bó ekuse le, wvumtè bó n̄tay. Fo ben eyuukè ke ε è nu bò nu nyεkeey taale fô ben e ke. Ben ewvumtè ten bò befe keηge le.

¹⁹ Me njemyi n̄en njefo Nyo' ké no yuuke n̄joη bô wee wvù bó nyewle bô wvú ε wvú yuuke nsase s̄e wvú nu ε jay fiεε, geen̄en kuule ke shém njefo wvù nu ε gee bvufee yî Nyo' le.

²⁰ É bó suuηke wee ε wvú ε jay fiεε, wvú ε no kuule shém, é s̄ew wvudvu enu la? Geen̄en, é wee yene ηgew ε è nu yî fiεε fi jee le ε wvú ε ge, wvú ε no kuule shém, é Nyo' eyuuke n̄joη bô wvú.

²¹ È nu bvudvuu bvunen keeyene ηgew non̄en, njefo Klistu ten to nu ε yen ηgew n̄je yene, duηc̄e kenfews̄en ê ben le ben ejo ekale kew.

²² “Wvú to ke baa yuu ge naa lo kebefε ke, ε ke díew fiεε to ké no ε yuu buy diuw we le ke.”

²³ Seke bó to nan'yi wvú, wvú to baa tfuse ke. É bó dioo n̄j̄nsene bô wvú, wvú saa s̄ewci ke, geen̄en nya fiεε ficii ε è nu can Nyo' le wvù kee keesaw nsaw leη.

²⁴ Wvú to nu ε tfuse bibefe bisεεbeene ε bí tu yî ye le yî kentam e. Wvú to ge non̄en, wvu le beene ekpwe ê keba ke kebefε le, eceè n̄ce wvu teȳtey. Bil̄emte bì wvú to keηk̄ee nu ε ge wase beene ε bon̄en.

²⁵ Ben to shee njimte diewe njée le, geen̄en keseen ben ε kase wase ε to fô Wee wvù C̄eyte bvuu Taale fô biyoy bin̄en e.

1Bi 3

No kpwoon bô diems̄en nulo ecee

¹ Bok̄e' bo bonyii le, ben ten eyuukè bole' bon̄en e. É ben gee non̄en, ε wee mvu bó le nu ε wvú tune keeb̄ee diew Nyo' le, é wvú ke en̄e ebee ε wee baa cim jeme diew ê wvú ke, ε è ge keηge ke kp̄w̄ese le,

²no wvú yene ε wvú wvumte ekole kew, cee n̄ce wvù yuule.

- ³ Fo fiεε fi duŋci bvujonke bvunen enù mwεem mvu ye le diewe keeseyse yvuw ekole ε yí jee, bô keejise biεε, noo keesuute ye bô ndvú yí jee κε.
- ⁴Fiεε fi eduŋci bvujonke bvu wee le enù fiεε fi wee nu fô fitele fiew e, ε è nu fitele fi bonene nu nyεkeey. Ke bvun bvujonke ke yvumen κε, ε è nu bvù Nyo' koonke ntay.
- ⁵È nεε no bokεε bô yuule bo fwele bô to nu ε gεε bvufee bvubole yí Nyo' le to ké no duŋci bvubole bvujonke. Bó to yuuke ten bole' bobole.
- ⁶Wee diewe Sela le to yuuke Abl'am e teŋe wvú le tata wen. Ben ten nu boom bo Sela le fen é ben gee mwεem mvu leŋ yaa fane fiεε κε.
- ⁷Bolemse, ben ten ekieε je yí ben keŋke keecee ben ε bokε' bonen jó. Ben enyaà n'wvum ê bó no bó baa keŋke mvuŋgay diewe ben e κε. Nyo' nu ε buw ben ε bó bocii bô nshii wvù mey lo. Ben eceè nonen, wvu le fô fiεε ebaanke bunle yene κε.
- ⁸Keemεese, me ε no nteete ben bocii le, ben ekeŋkè fitele fimwaan, keŋkè shen fô bonyii le, keŋkè keŋkonen ke bonyii bo mbee le, keŋkè mvuntelem mvù jee, ε wee yaa joo κε wee mvu ekuse κε.
- ⁹Fo wee é ge kebefe bô wee, é wvú tfuse bô kebefe κε. É wee nan wee, fo wvú etfuse bô ncun κε, ε wvú tfuse ε è nu bô diew kembonen. Fin nu fiεε fi Nyo' teŋe ben le ben egeè é wen ke elaŋ kembonen yí yene le.
- ¹⁰È nu no bó nu ε saŋ le, “É wee koonke keeyuw njon yí nshii we le, bô keeyen ediuw yò jee le, é wvú no kemsene bô leme diew, ε díew fiεε yaa buyte diuw we le κε.
- ¹¹Wvú keŋke keebaŋke jim ê mwεem mvù befe le, egeè ε è nu mvù jee, ekuŋenè nyεkeey biì dvú le,
- ¹²njefo Tata Nyo' ké no yene bonyii bo teytey e yuuke bunle yiibo. Geenεn ε Nyo' ε bon jise yí bonyii bô gee bibefe le.”
- ¹³É ben keŋke shieε wvu baay keegee mwεem mvù jee nonen, tu wee wvù nulo ebvuu ege fiεε fi befe bô ben nu γεε?
- ¹⁴Geenεn, é bonyii cim nyaa lo ŋgew ê ben njefo ben gee mwεem mvu teytey, tu Nyo' nu ke elaŋ kembonen yí yene le. “Fo ben efanè bó, kenεε fo mvuntelem ebuukè ben κε.”
- ¹⁵Ben ewvumtè ε è nu Klistu ê mvuntelem mvunen e diewe Tata wene le. Ben eseyse bikuu binen, ecεytè keenya ntfuse ê wee wvù nu ebife fiεε fi ben taale fwe yí dvú le. Geenεn ben dioo tfuuse, no tfuuse nyεkeey bô n'wvum.
- ¹⁶Fo ben egeè fiεε fi nelo esaake ben fô fitele le κε, wvu le é bó nan'yi ben, jemyi díew yí befe ekumε keŋge kenεn kè jee nje ben nu bonyii bo Klistu le, é bó ewuumene.

¹⁷Ben ekeè le fí jee keeyen ñgew nje fiεε fi jee fi ben ge ε è fen nu le Nyo' koonke le fí enù nonen, efey keeyen ñgew yí fiεε fi befe le fi ben ge.

¹⁸È nu ke ten no Klistu to yeneε ñgew kpwe. Wvú to kpwe nje bibefe bi bonyii le kañ mwaan ε fí ka lo nonen. Wvú wvù to nu wee wvu teyey to nu ε kpwe fô bonyii bò yaa nu ke teyey e keeto bô beene fô Nyo' le. Bó to nu ε yu wvú ε è kpwe nyam ye, geenen ε Nyo' ge ε wvú no nu dvú ê keyoy e.

¹⁹È nu ê keyoy kin e wvù wvú to geneε fewce diew Nyo' ê biyoy bì nu yew ncaw e.

²⁰Biyoy bin nu bì to baa bee Nyo' le kefew ke Noa' le ke. Nyo' to nu ε bosen kuu shém bô bí, cey seke Noa' to keenci ñguw. Ñguw wvun nu ε bonyii to ley jó ke wee nyan maan, ε è nu bó bò to boyee can joo le.

²¹Joo yidvu yin nu diewe joo yí bó leese bonyii jó keseen ε yí boysee bó bô mvungay mvù Jisos Klistu to buyee dvú yí kpwe le. Ke bó leese wee ê joo le bó cuke ε è nu yile yí ye le ke. È nu keelεke Nyo' bô fitele fi yuule.

²²Jisos Klistu wvun to nu ε ben fowe, shii ê εbo ke eceey ke Nyo' le, ε no nu fó saake bonceendaa bo Nyo' le bô biyoy bì keñke mvungay noo bì saake bicii.

1Bi 4

Nce bonyii bo Nyo' le nu wvu fwe

¹No Klistu to nu ε yen ñgew yí nyam ye le, ben ten ekenkè kfuu fifie fitele fi wvú to keñke keeyen ten ñgew, ekumyì le wee wvù nu ε yen wase ñgew yí nyam ye le nu ε bô kebefε ε ka wase.

²Nonen, ke wvú bæ ebvuu eceè nce we fokuse fen bii mwεem mvù nyam ye gomte le ke. Wvú nu eceè bii wase ε è nu mwεem mvù Nyo' gomte le.

³Ben ekeè le kefew kè ben to shee gee mwεem diewe bonyii bò yaa kee ke Nyo' le nu ε kí ε fey wase. Ben to cee nce nnyen kenjan, bii ye yene yí ñeyte le, wuu mbvuum ε mó koole, gee boñkaw diekene, wukene yole fó gee diewe bwé le. È ben to bvuu bunlee ten bonyo' bo εcici, ε Nyo' to tun wase.

⁴Keseen diuw ε no yumte bonyii bò yaa kee ke Nyo' no ben baa bvuu taashi ñgoo ben ε bó yí nce wvun wvù nu diewe wvu nyám e, bó mum ε banke ye ε no nan'yi ben.

⁵Geenen, bó nu ke eleem etaje diuw fwe dvu Nyo' wvù ceyte keesaw bonyii bò bæ dvú bô bò kpweken wase le.

⁶È nu fiεε fi to gee é bó se fewce ten saaka wvù jee wvù wvu Nyo' ê bonyii bò nu ε kpweken wase. Bó to fewci nonen wvu le no bó nu ε bó to cim saw wase bó yí nyam ye le diewe bonyii bo boyuum e, é bó eceè ke nce wvu ê keyoy e ε wvú nu diewe no Nyo' cee.

Wee elemtè bô nnya ye ê je yì jee le

- 7** Ben ekeè le kefew kè fiεε ficii nu ke eka too wase nceencee. Nonen, ben enù ke bô bvufee bvunen fó, kemsenè bô bikuu binen, wvu le ben ebunleè.
- 8** Fiεε fi fele mwεεm mvunciim nu ke le wee ekoonkè waa bwee bô fitele fiew ficii njefo kenkonen ké no banji bibefe nteen.
- 9** É waa bwee wee la ghane ê wvú le, é wvú fiisen wvú, taa fô wvú le yaa wvukene ke.
- 10** No ben nu ε Nyo' ε buw ben bô nnya jεey jεey, wee ejoò ye nnya lemte dvú fô bonyii bomew e. Ben elemtè bô mbuwma wvun wvù Nyo' nya jé le jé le diewe bonyii bo lemme le bò jee.
- 11** É wee fewci diew Nyo', é wvú no fewci ke ε è nu diew yì buy diuw Nyo' le. Wee é no lemte fô bonyii bomew e, é wvú no lemtè ke ε è nu bô mvunḡay mvù Nyo' nya ê wvú le. Ben egeè nonen wvu le yì fiεε ficii fi ben gee le, é mbense egenè fô Nyo' le fele yì Jisos Klistu le. Bvukuke bô mvunḡay mvunciim nu ε è kenke wvú sekecii se nka. Fí enù nonen.

Keeyεne ḡεw diewe bonyii bo Klistu le

- 12** Nsáa yem shém, fo ben ekenke ḡhaw yì nton'ye wvù ben yuuke ye le wvù too fô ben e keemom ben ke. Fo fí enù ke diewe è nu fiεε fimew fifε ε fí kooyi bô ben ke.
- 13** Ben elanlanè lo le ben yene ḡεw diewe no Klistu to yeneε wvu le é ke edioo enu seke wvú ε buynen bô bvukuke bwew, é ben ebvuu elanlane, yuuke njon.
- 14** É bonyii nan'yi ben nje diee di Klistu le, tu njon wvu baay nu wene. Fifin dunji le Keyoy ke bvukuke le kè è nu Keyoy ke Nyo' le nu yì yene le.
- 15** É wee yene ḡεw, fo wvú eyenè njefo wvú nu ε yu wee, kenεε le wvú nu ε con fiεε kenεε ε ge fiεε fimew fi befe, kenεε le wvú nu ε lese diuw fô mwεεm mvu bonyii bomew e ke.
- 16** Geenεn, é wee yene ḡεw njefo bó teḡe wvú le wee Klistu, fo wvú ewuunenè ke. E wvú no bensee ε è nu Nyo' le wen kenke didie diee.
- 17** Ben egeè nonen njefo kefew nu ε to wase kè Nyo' nu esaw bonyii, ε wvú nu ekew ε è nu bô yew ye. É wvú kew ε è nu bô beene nonen, é fí ke enu nεε bô bonyii bò nu ε tun keebεe saaka wvù jee wvù wvu Nyo' le?
- 18** Bó nu ε saḡ ê Nwa' Nyo' le le, “É fí temyi fô wee wvu teyḡey e keeboy, é fí ke enu nεε bô wee wvù tune Nyo', gee bibefe le?”
- 19** Nonen, bonyii bò yene ḡεw no Nyo' gomte le bó eyenè, egeè mwεεm ε è nu mvu leḡ, ḡεlè bikuu bibole can Nyo' Mbom e wvù ké no leeme ke yì ḡkawma we le.

1Bi 5**Ἐκουμε njée Nyo'**

- 1** Me ε mum ε no ηgomte keentefe bocee kentaashe ke bonyii bo mbee le ê ben enteleη. Me nu wee ê ηgoo bocee kentaashe le, ε me nto n'yen bô ejise yem no Klistu to yeneε ηgew, ε me nu ten wee wvù nu ke eley bvukuke bvù wvù nu ke eto dvù le.
- 2** Me ε no nteete le, ben etaalè fô njée Nyo' yì bó nu ε gee can yene le ntay. Fo ben dioo taale, no taale ke diewe bó kane lo ben ke. Ben etaalè bô ηkoη no Nyo' gomte. Fo ben etaalè keηke ken'yee ejise yì bigew e ke. Ben ekeηkè shiee ε è nu yì lemme le.
- 3** Fo ben envuwseè njée Nyo' yì bó nu ε gee ben ê we jodvu ke. Ben eduηci ε è nu keηge kè jee kè yì eyenè beηene.
- 4** É ben gee nonen, é Ekole ke Boncaynjee le ke dioo ε buynen, é ben ekeηke kefo ke bvukuke le kè yaa ké kpwe ncom ke.
- 5** Me ε no njemyi ten ê keghan le, ben eyuukè bocee kentaashe ke bonyii bo mbee le ntay. Wee tfuu eshiwsè ekole kew ê waa bwee fwe sekecii. Ben ekeè le, “Ke Nyo' ké no tomte wee wvù bensee ye ke. Wvù ké no tomte ε è nu wvù shiwse ekole kew bô mbuwma we.”
- 6** Ben emum eshike bikuu binen enù ê mvuηgay mvu Nyo' le kuse, é kefew ke dioo ε kocen, é wvù ebense ben.
- 7** Ben egee mwεem mvunciim mvù jewsee ben can ye le, njefo wvù keηke shiee wene.
- 8** Ben ekemsenè bô bikuu binen, ejinyì ntay njefo wee wene bvuban wvù dεwle ghane wεentene diewe bvule wvù fεwte le, gomte wee keeηgele.
- 9** Ben ebon ηaη bô wvù, lese ke ε è nu fitele yì Nyo' le é fí eteme, ekumyì le boom bo bwee wene le yene ke ten ηgew nonen woη tfuu.
- 10** ηgew wvun nu ke yì kefew e caan, é Nyo' emum ekase eseyse mwεem é mvù ejoη fô ben e, enya ben bô mvuηgay, ege é ben eciim ntay. Nyo' nu wvù nyaa mbuwma tfuu ê bonyii. Wvù nu ε tee ben keeley bvukuke bwew bvù mey lo le nje ben nu bonyii bo Klistu le.
- 11** Mvuηgay mvunciim nu ε è keηke wvù sekecii se ηka. Fí enù nonen.

Ἰgayma

- 12** Me nsaj fiηwa' fin fô ben e ε è fici Silas me wvù nu waa bwee wesebeene. No me n'yene nu ε wvù nu wee wvù è nulo é wee egee bvufee yì ye le. Me nsaj keentefe ben, embvuu eηge é ben ekiε le fiεε ficii fi me nsaj duηci keceey ke ekume mbuwma Nyo'. Ben eleemè yì dvù le temyi ntay.

13 Kentaashe ke boom bo bwee wesebeene le ke Babilon kè Nyo' nu ε caw gayte ben e. Mak wvù waa wem yî mbee le gayte ten ben e.

14 Ben egaynen bikuu binen e, enoce yî kenkonen e. Kembonen enù fô ben e bocii bò nu ε taashe bô bo Klistu.

2 Bi

2Bi 1

¹È nu me wvù Semon Bitá, waa lemme Jisos Klistu noo waa we ntum. Me nsaanjke ñwa' wvun fô ben bô keŋke mbee wvù kuuke leŋleŋ diewe wvù bese keŋke le. Jisos Klistu wvù nu Nyo' noo Mboyse wesebeene ké no gee mwæem teydey. È nu nje fifin wvù ben keŋke mbee ε wvù nu leŋleŋ diewe wese le.

²Nyo' ebvuu ebuw ben bô kembonen naa ntay, ebvuu enya ben bô mvuntelem mvù lætene naa ntay, njefo ben kee wvù wvù Nyo' bô Jisos wvù nu Tata wesebeene.

Nce bonyii bô Nyo' nu ε tee wase ε caw e

³Mvunŋay mwew mvù è nu mvu Nyo' le nu ε ge wase beene ε keŋke mwæem mvunciim mvù nulo ege é beene ekeŋke nshii wvù mey lo, noo keecee nce bonyii bo Nyo' le. Mvù ge nonen no beene nu ε kiee Nyo' wvù nu ε tee beene keeley bvukuke bô bvujonke bvù è nu bwew e.

⁴No wvù ge nonen, beene ε mum ε keŋke mwæem mvù kuuke baay bvuu jee fele mwæem mvunciim ε è nu mvù wvù to kawæe. Mwæem mvun nu keege wvu le ben elewtè mwæem mvu yî woŋ wvun e mvù nyam ye shieele mvù beete bô bonyii. Nonen é ben emum ekeŋke nce ε è nu we wvù Nyo'.

⁵No fí nu nonen ben emum emom ntay keebise nce wvù jee yî fitele fí ben lese yî Klistu le. Yî nce wvù jee le, é ben ebise bvufee bvú Nyo' le.

⁶Yî bvufee bvú Nyo' le é ben ebise bikuu bì kemseem. Yî bikuu bì kemseem e, é ben ebise shém yî kuuleem. Yî shém yî kuuleem e, é ben ebise nce wvù è nu wvu bonyii bo Nyo' le.

⁷Yî nce wvù è nu wvu bonyii bo Nyo' le, é wee ekeŋke shen fô waa bwee le. Yî shen e fô waa bwee wee le, é ben ebise keŋkonen.

⁸Me ŋgayte nen njefo, é ben keŋke wvun nce, ε no gene dvú fwe fwe, é wvù ege é ben saa ebvuu enu ke lo nen ncew keŋe enu diewe bonyii bô nulo saa ege fiee diewe bonyii bô kee fiee ekume Tata wesebeene wvù Jisos Klistu le ke.

⁹Ben ekeè le é wee baa ekeŋke wvu wvun nce tu wvù nu ε fefe wase yî mwæem mvu Nyo' le, ε wvù yaa bvuu yene mwæem e ncejole ke. Wvù nu ε daaye wase le bibefe biew bì wvù to shee gee fwele nu ε Nyo' to cuke wase.

¹⁰Boom bo bwæem e, fí ε mum ε no nu le ben emum emomtè ntay keege mwæem ε è nu mvù duŋci le Nyo' to nu ε tee wase ben, caw. É ben gee nonen ben saa ke eyuu egbwe yî mbee wene le ke.

¹¹Nonen é bó ke eyene je fô ben e ε yî kuuke nen gbwuuu, é ben eley bvunfon bvù mey lo bvú Tata wesebeene wvù Jisos Klistu wvù Mboyse le.

12 Me ηkee le ben kee wase mwεem mvun, leeme ten yî keceey kè ben to yuwε le temyi, geenεn ε me ηgomte ke keembvuu ηkumyi ben ekumε mvú sekecii.

13 Me n'yene le fí nu leη nonεn le me eηkamsè ben ekumε mwεem mvun no me mbεε dvú n'yoyte wvu le ben ekumyi,

14 ηjefo me ηkee lo le è shεete wase caan é keyoy ecine nyam ye le no Tata wesebeene wvù Jisos Klistu nu ε ge wase me ε ηkieε le.

15 Me ε mum ε no ηgomte keemom naa ntay le seke me ε ηgen wase é ben enu wvù è nulo é ben ekumyi mwεem mvun sekecii.

Saaka wvu ekumε nto Jisos nu fiεε fi bonyii nulo egεε bvufee yî dvú le

16 Ben ekeè le ke mwεem mvun mvù bese to jemyεε ê ben ekumε mvuηgay mvu Tata wesebeene wvù Jisos Klistu le noo nto we wvù wvú nu ke ekase eto, to nu ke lo mvumaηgaan ε bonyii ε bosεn ε seyse ε bese maa ê ben ke. Bese to nu ε yen naa bvukuke bwew e bô εjise eyese.

17 È to nu seke Nyo' Ice to buwεε wvú bô mbense noo bvukuke, ε diεw buy fô wvú wvù nu Nyo' Bvukuke le jemyi le, “Wvun nu Waa wεm, wvù nu fitele fiem. Me n'yuuke njoη bô wvú baay.”

18 Bese kebeε to nu ε yuw diεw yin no yí shiile too we seke bese to nu bee bo Jisos yî kum Nyo' le.

19 No bese yuw nonεn, mum mεse kieε keceey ke fiεε fi bonyii bo ntum Nyo' le to jemyεε ε è bεε naa lo. Ε fí jee le ben egεε bvufee yî fiεε fidvu le ntay, ηjefo fí nu diεwε ken'yεese le kè baa ê εjiwε le egen ebuy Diuu dî εkfuη nu ke eyuu, é Jisos ebaa fô mvuntelem mvunεn e diεwε law e.

20 Fiεε fi kuuke fele mwεem mvunciim nu le ben ekeè le, ke ntum Nyo' mvu nu dvú ê Nwa' Nyo' le wvù wee nulo eteete bô bwew bvufee ke.

21 Ke wee ntum Nyo' to baa jemyi naa lo fiεε fi è nu ηkpawwεε wee wvu wum ke. È to gee Keyoy ke Yuule ε bó sε jemyi diεw yî buyte fô Nyo' le.

2Bi 2

Bonyii bo n'yεeyi le bo mbiay e

1 Ke leηleη no bonyii bomew to nu dvú fwele ê bonyii εnteleη bò to mbiayte le è tum Nyo' bó, è nu ke ten no bonyii bo n'yεeyi le bo mbiay e nu enù ê ben εnteleη. Bó nu ke ewεεntεn eto bô n'yεeyi mvu wvù nulo ebefe bô bonyii, elese ê diεw Nyo' le emum emaa naa lo Cee Ekole wvù to kpweε keesum bó. Bó nu ke ege nonεn emum eto lo bô ηgew kaη mwaan elay yî bikuu bibole.

2 Bonyii nteen nu ke ebeηen nce wvubo nnyen e, é fifin ege é bonyii ejemyi díεw yî befe ekumε je yi keceey.

- ³ Ken'yee ejise ke mweem e nu ke ege é bó efii mweem can yene le bó binfe bi mbiay e bí bó nu e seyse. Bonyii bodvu ban nu e Nyo' to seyse wase ngew wvubo e è bee lo, e wvú nu ke fò ceyte bó.
- ⁴ Ben ekeè le Nyo' to baa bawce bonceendaa ba bò to gee kebefe ke. Wvú to nu e shike bó e bó gen bvudvuu bvú ngew e, lese bó yí boncaw e ê bintuke bi jiime nen taytaytay e, fò bó nu enù egen ebuy diuu di nsaw e.
- ⁵ Wvú to baa ebawce ten won wvu fwele seke wvú to ciinsae joo e yí to mi won bonyii bò to maa lo wvú ke. Wvú to nu e bawce ke e è nu Noa' wvú to fewci le bonyii eceè nce wvu teyey ê Nyo' ejise, noo bonyii bomew bossooshiy.
- ⁶ Wvú to nu e fiwse kelaante kè Sodom bó kè Gomola ton bó nguy e bí fie bvuw, ge e fifin no nu diewe kenfewsan ke fiie fi nu ke ekooy bó bonyii bò maa lo Nyo' le.
- ⁷ Geenən, boyse Lot wvú to cee nce wvu teyey e shém looci ffuuke wvú bó nce nnyen wvú bonyii bò befe to keŋke.
- ⁸ (Mweem mvù wee wvu teyey wvun to yene bvuu yuuke no wvú to cee ê bó enteleŋ to nu e ge e fitele fiew fi yuule no ton'yi ediuw scii yí gee dibole di befe le.)
- ⁹ É mweem mvun to nu e kooy nonen, tu fí duŋci le Tata kee keeboyse bonyii bò yuuke wvú le can ngew e, bvuu kee ten keegae bonyii bò cee nce wvú yaa nu ke wvu teyey yí ngew e, egen ebuy diuu di nsaw e.
- ¹⁰ Ngew wvun nu e wvu bonyii bomew nu ke efey naa lo wvu wee tfuu. Boba bonyii nu bò koonke keebii ke e è nu fiie fi ye yibo yí ŋeyte shieele e è nu fi beete bó wee. E è bvuu nu bó bò joo wee wvú saake bonyii ekuse.

Nyo' nu ke elase bonyii bo n'yeyi le bo mbiay e

Bonyii bo n'yeyi le bo mbiay e ban ŋaake baay. Bó bensee ye baay, yaa fane naa lo keenan'yi biyoy bí keŋke mvuŋgay fele bó ke.

- ¹¹ Naa ke bonceendaa bo Nyo' le bò keŋke mvuŋgay bvuu temyi fele bó yaa ke mom nan biyoy bin fwe dvu Tata ke.
- ¹² Geenən bonyii ban gee mweem e è nu mvù elemē kebole gomte diewe nyám yi ŋkpwaante yí ké no gee mweem se yí kpawci lo, e yí nu ke le bonyii ke ekooye eseye lo le. Bonyii bodvu ban nu bò nan'yi mweem se bó kee mvú ŋkuuŋ. Nyo' nu ke elase bó ke diewe nyám yi ŋkpwaante yin e,
- ¹³ é nlawma wvubo enu ngew wvú bó nu eyene nje ngew wvú bó se too dvú. Bó ké no kpwaake le keediekene bvuu wukene kenduun e emvunsheen enteleŋ nu lo njoŋ mvu fò bó le. Bó nu lo yile ê ben enteleŋ yiise ben. Seke ben e bó diekene, e bó no yuuke njoŋ keelaele ben bó gee dibole di kenshoose le.
- ¹⁴ Ejise ebo ké no nu ke e è nu yo kenjaŋ, yaa ffuule yí kebefe le ke. Bó ké no lewci bonyii bò weyi yí mbee le e bó bó gee kebefe. Ken'yee ejise nu e ley wase yí elemē kebole. Bó nu e jo wase lon!

- 15** Bó nu ε cine wase je yi len e ε jo ε è nu yi ecici. Bó nu ε jo ekale ke Balaam wvù waa Bèwu le wvù to nu ε bee keege fiε fi yaa nu ke len nje wvù to koonke bigew e.
- 16** Ε kembεεbey wamen wvù yî fiε fi befe fin e. Kembεεbey kè ké no nu se kí jemyi lo, ε kí jeme diewe wee wvu wum e, ci gee di kejewte le di wee ntum Nyo' wvun to gee.
- 17** Boban bonyii bo n'yεyi le nu diewe diuw joo wvù joo baa bvuu buyte fó le ke, bvuu nu diewe kekfu kè nu ε gbwe ekfuη nffum ε fey ε tuu le. Nyo' nu ε seyse wase bvudvuu bvυ ηgew e ε bvú jiime nen taytaytay, ε gee ê bó.
- 18** Bó kumte diuw wvu ecici baay se kinyi ηkuuη. Bó lewci bonyii bò bæε buy ke lo ente jo bonyii bò yaa kee ke fiε fi len bô n'yεyi wvu le è nulo é bó ekase egee mwεem mvu nnyen e mvù ye yibo yì ηeyte shieele.
- 19** Bó jaa no jemyi ê bonyii le ke bó keηke keenu bonfaw bô fiεε fimew e ke, geenεn ε bó bodvu kebεε bò jemyi bæε naa bonfaw bo mwεem mvù beete bô ye wee le. Bó nu bonfaw ηjefo é wee nya ekole kew ê fiεε tu wvù nu nfwā fiεε fidvu.
- 20** Ben ekeè le é wee lewte wase mwεem mvù beete bô wee yî woη wvun e nje wvù kee wase Tata wesebeene wvù Jisos Klistu wvù Mboyse wesebeene, ε kase ε gen ε ley mwεem mvudvu le, mvú ε njim wvù ε no keηke, é mwεem efo yî ye le efey lo no mvú se shee nu fwele.
- 21** Ε wee ge nonen tu fí be jee le fo mwεten eyaw ekieε je nce wvu teytey ke, efey keekieε ebvuu ekase ecine bonci bò yuule bò bó nu ε nya ê bonyii le.
- 22** Kfuu boba bonyii gee ε fiεε fi nu ê ηgan e mum nu keceey le, “Bwe ké suuke mwεem kase bvuu tu fó die.” Ε wvumvu bvuu nu le, “Bó ké cuke ηkunyam ε wvù kase ke gen no biηlene ê kencaa le.”

2Bi 3

Diuu di Tata nu ke eto

- 1** Nsáa yem shém, ηwa' wvu keseen wvun nu wase wvu bokaη bofεε wvù me nsaj fô ben e. Ê boηwa' ban e bocii nu ε me nsaj diewe ntamce le keηkamse ben é ben ekeηke boηkpawce bo len.
- 2** Me ηgomte le ben ekumyì mwεem mvù bonyii bo ntum Nyo' le bò yuule to jemyεε le mvú nu ke ekooy, ebvuu ekumyì ten mwεem mvù boom bo ntum e bo Jisos e to jemyεε ê ben le Tata bô Mboyse nu ε gay le ben egeè.
- 3** Fiεε fi baay nu le ben ekieε le è nu ke edioo nu εdiuw yo fokemεse le, é bonyii bo kensewse le ene ekew esewsee ben, gee mwεem mvù nyam ye yibo gomte.
- 4** Bó nu ke esewsee ben duu le, “Ke wvù to nu ε kaw le wen nu ke ekase eto, wvù ε fεε keseen? Naa no bo'iceε bosεεbeene to yuue kpweken, mwεem mvunciim leeme ke bikaa le no mvú to shee nu ε kew foηkew no Nyo' to bomεε woη.”

- ⁵ Bó jemyi nonen kee ke naa ntay se tune le Nyo' to jeme ke e è nu diew fwele e ebule mum no nu. E wvú jeme e nshe buy ê joo, e wvú to ge nshe yidvu bô joo.
- ⁶ E wvú ke kase jeme ke e è nu diew, e joo ban nshe yidvu yì yí to gee e yí buy, mum lese mwëem mvunciim.
- ⁷ È nu ke ten diew yidvu yì wvú nu e gee ebule ke keseen bô nshe, e no ceyte nguy dvú. E wvú ceyte e è nu diuu dî wvú nu ke esaw bonyii bô maa lo wvú, elëse bó.
- ⁸ Geen en nsáa yem shém, fo ben edaayi le fô Tata le nu e diuu dimwaan nu ke lenlen diewe bilim ntfuke le, e bilim ntfuke nu ke lenlen diewe diuu dimwaan e ke.
- ⁹ Ke Tata guute lo ye no bonyii bomew kpwaake, keege no wvú to kawee ke. Wvú kuule e è nu shém bô ben. Wvú shieele le bonyii bocii ekumen mvuntelem mvubole njefo ke wvú gomte le wee mvu ke ela ke.
- ¹⁰ Diuu dî Tata nu ke ekase eto nu ke enu ke diewe di coon e. Ebvubwe nu e ebule nu ke edvum foweewe emum ela, é nguy ebuñse mwëem mvunciim mvù nu we, é nshe bô mwëem mvù nu yí dvú le efie ebvuw.
- ¹¹ No nguy nu ke efiese mwëem mvunciim ê yiyin je le, ben kpwaake le ben nulo ecee nce e è nu wvu nêe? Ben kenke keecee nce e è nu wvù yuule e ben e nya bikuu binen ê Nyo',
- ¹² E no ceyte Diuu di Nyo' le din, momte keege le dí eyañsen eto. È nu diuu dî nguy nu ke efiese ebule é kí efie, é mwëem mvunciim mvù nu we ebuñ.
- ¹³ Geen en, beene ceyte e è nu ebule ke kefe bô nshe yi fie yì Nyo' to kawee, e wvuwvun won nu wvù è nu ke enu ke nce wvu teyey fô maañ.
- ¹⁴ Nonen nsáa yem shém, no ben ceyte mwëem mvun nen, ben emomtè naa ntay keenu se nlo m kenêe fiêe fimew fi befe ê Nyo' ejise, noo keenu yí kenlæeten e ben e bo Nyo'.
- ¹⁵ Ben ekumyi le Tata wesebeene kuule shém nen, nyaa e è nu kefew ê bonyii le bó ke eboy. Fiêe fin nu ke fi waa bwee wesebeene wvù Baul wvù nu fitele fiêebeene to sañee fô ben e bô bvufee bvù Nyo' nu e nya ê wvú le.
- ¹⁶ Ê boñwa' bocii bô wvú sañ e nu e wvú jemyi ke jó ekume fiêe fin. Wvú sañke mwëem mvumew e mvú temyi fô bonyii le keekiee, nonen e bimaante bi bonyii le bô yaa kee ke fò bó leeme mum toysee kenyi ke mwëem mvudvu le, e è nu ke lenlen no bó toysee ten mvu ê mondvuum momew e ê Nwa' Nyo' le. Bó gee nonen, teñe e è nu ngew yí bikuu bibole.
- ¹⁷ Nsáa yem shém, no ben kee wase mwëem mvun nen, ben emum eyenè fo bonyii bô maa lo Nyo' ban ke egufe ben bô gee dibole dî befe é ben ene fô ben leeme wase ekase egbwe lo.

18 Geenen, ben ekuù lo yî mbuwma wvù Tata wesebeene wvù Jisos Klistu wvù Mboyse wesebeene nu ε buw ben dvú, ebvuu ekeè wvú gene lo fwe fwe. Mbense enù fô wvú le keseen noo sekecii se ŋka. Fí enù nonen.

1 Jon

1Jon 1

Diɛw yì nyaa nshii

¹ Fiɛɛ fi bese saan̄ke fin nu ɛkumɛ Diɛw yì nyaa nshii yì to nu wase foŋkɛw. Diɛw yì nyaa nshii yin nu ɛ bese to yuw mwɛɛm mvù yí to jemyi, yɛn yí le bô ejise eyese, taa no yí nu, kum yí le bô can yese.

² Nshii wvun nu ɛ bó to duŋɛ ɛ bese yɛn wvú le, ɛ mum ɛ no jemyi ɛkumɛ wvú, fewci ê ben ɛkumɛ nshii wvù mɛy lo wvun wvù to nu bô Ice, ɛ wvú ke duŋɛ ê bese.

³ Fifiɛ fi bese to yɛnɛɛ bvuu yuw, nu fí fi bese fewci tɛn ê ben wvu lɛ ben ɛkɛŋkè kentaashɛ beene. Kentaashɛ kesɛsɛ nu ke bee bo Nyo' Ice bô Waa we wvù Jisos Klistu le.

⁴ Bese ɛ mum ɛ no saan̄ke fin wvu lɛ njoŋ wesebeene enu ɛ wvú ɛ yiŋsɛn.

Beene eceè ente jo n'yu

⁵ Wvun nu saaka wvù bese to yuwɛɛ ê wvú, ɛ mum ɛ no seŋe ê ben lɛ, Nyo' nu n'yu ɛ kejiwɛ yaa nu naa lo yí ye le kɛ.

⁶ Nonɛn, é beene duu lɛ beene nu yí kentaashɛ le beene ɛ bó, geenɛn kaa lɛne ɛ è nu ê kejiwɛ le, tu beene mbiayte lo, yaa cee bii keceɛy e kɛ.

⁷ Geenɛn, é beene cee ente jo n'yu no wvù wvú nu ente jo n'yu, tu beene nu enù yí kentaashɛ le wee noo wee, ɛ elɛmɛ ke Jisos wvù Waa we le cuke beene ɛ beene yuule ente jo bibefɛ bisɛɛbeene bicii.

⁸ É beene duu lɛ kɛ beene kɛŋke bibefɛ kɛ, tu beene læle lo bikuu bisɛɛbeene, ɛ keceɛy yaa nu yí yese beene le kɛ.

⁹ Geenɛn, é beene seŋe lo bibefɛ bisɛɛbeene ê wvú, no wvú nu wee wvù ké no leeme yí diɛw ye le bvuu gee mwɛɛm lɛŋ, tu wvú nu elɛashɛ bibefɛ bisɛɛbeene ecukɛ beene, é beene eyuule yí gee disɛɛbeene le dicii di yaa nu kɛ teytey e.

¹⁰ É beene duu lɛ beene baa ge kebefɛ kɛ, tu beene joo wvú lɛ wvú nu wee mbiay, ɛ diɛw ye yaa kɛŋke bvudvuu yí yese beene le kɛ.

1Jon 2

Jisos nu keman kè læshi bibefɛ bisɛɛbeene

¹ Boom bem, me nsaan̄ke fiɛɛ fin ê ben wvu lɛ fo ben ke enɛ ege kebefɛ kɛ. Geenɛn, é wee nɛlo ɛ ge kebefɛ, tu beene kɛŋke wee wvù kule can ê Nyo' Ice fô beene le, ɛ wee wvun nu Jisos Klistu wvù nu wee wvu teytey.

² È nu wvú keman kè læshi bibefɛ bisɛɛbeene, ɛ keman kin yaa nu kɛ fô bibefɛ bisɛɛbeene le maan̄ kɛ, kí nu tɛn fô bi bonyii bocii le yí woŋ wvun e.

- ³É beene gæle bonci bo Nyo' le, é fifin emum eduŋci ntay le beene kee wvú.
- ⁴Wee wvù duu le wen kee Nyo', geenen yaa gæle bonci bew ke, nu wee mbiay, ε keceey yaa nu yî ye le ke.
- ⁵Geenen, wee wvù gæle njeme we nu wvuwe wvù nu keceey wee wvù kooŋke Nyo' gene mæese. Fieε fi nulo eduŋce ntay é wee se kieε le wen nu ε taashe bô Nyo' nu fin fi le:
- ⁶É wee duu le wen nu sekecii yî Nyo' le tu wvú keŋke keeceè ke lenlen ê je yî Klistu to cee le.

Nci wvu fwε

- ⁷Nsáa yem shém, ke nci wvù me ngomte keensaŋ fô ben e nu nci wvu fwε ke. Ê nu nci wvu yvum wvù ben to keŋke ε kew foŋkew. E nci wvu yvum wvun nu saaka wvù ben to yuweε wase.
- ⁸Geenen nci wvù me nsaanŋke ê ben nu ke nci wvu fwε. Keceey ke nci wvun e to nu ε duŋce yî Klistu le, ε no duŋci ten yî yene le. Nci wvudvu yen'yi fwε njefo kejiwe kaa wase gene, ε n'yuu wvu keceey ε kew wase ε no baa.
- ⁹É wee duu le wen nu ente jo n'yuu bvuu bane waa bwee, tu wvú bæε ke ente jo kejiwe.
- ¹⁰Wee wvù kooŋke waa bwee nu ε wvú nu sekecii ente jo n'yuu ε fieε yaa nu yî ye le fi nulo ege é wvú elene baytene ke.
- ¹¹Geenen, wee wvù bane waa bwee nu ε wvú nu ê kejiwe le lenε jó yaa kee fô wvú gene ke, njefo kejiwe kedvu nu ε ge wase wvú ε fefe.
- ¹²Boom bem, me nsaanŋke fô ben e njefo bó nu ε læsše wase bibefe binen nje Klistu.
- ¹³Bo'icem, me nsaanŋke fô ben e njefo ben kee wase wvú wvudvu wε wvù to nu foŋkew. Cubonyii, me nsaanŋke fô ben e njefo ben nu ε so wase wee kebefε wε. Boom bem, me nsaanŋke fô ben e njefo ben kee Nyo' Ice.
- ¹⁴Bo'icem, me nsaanŋke fô ben e njefo ben kee wase wvú wvudvu wvù to nu foŋkew. Cubonyii, me nsaanŋke fô ben e njefo ben temyi lo ε diew Nyo' nu sekecii yî yene le, ε ben ε so wase wee kebefε wε.
- ¹⁵Me ε mum ε no nteete ben le, fo ben ekoonŋkè woŋ wvun keŋεε mwεem mvu yî woŋ wvun e ke. É wee kooŋke woŋ wvun, wvú saa ekoonŋke Nyo' Ice ke.
- ¹⁶Ben ekeè le mwεem mvunciim ê woŋ jan mvù nyam ye keŋke shieε yî dvu le bô mvù ejise taale kooŋke, noo mvù bonyii bensee ye yî dvú le yî nshii wvun e, yaa nu mvù nen'yi fô Nyo' Ice le ke. Ê nu mvu yî woŋ wvun e.

17 Woŋ wvun nu ke eka, é mwεem mvu yî woŋ wvun e mvù bonyii keŋke shiee yî dvú le eka ten. Geenεn, wee wvù gee ε è nu fiεε fi Nyo' shieele nu ke emεy enu dvú sekecii.

Bonyii bo bvuban e bo Klistu le

18 Boom bem, kefew kin nu wase ke fokemεse. No ben to yuwεε le wee bvuban Klistu nu ke eto, nu ε naa keseen nu ε bonyii bo bvuban e bo Klistu le ε to wase nteen. É nεε fiεε fi ge beene ε mum ε kiεε le kin nu wase kefew ke fokemεse.

19 Bonyii bodvu ban to buy ê beene εntelen, geenεn ke bó to nu bonyii bosεεbeene ke. É bó to nu bonyii bosεεbeene, tu bó to bee emεy enu beene ε bó. Nonεn ε bó mum buy wvu le fí eduŋε endan le ke bó nu bonyii bosεεbeene ke.

20 Ben nu finεn ε wvú wvù è nu Wvú wvù Yuule ε yefe wase ben, ben ε no kee mwεem mvu keceey.

21 Ke me nsaanke fô ben e ε è nu njefo ben maa keceey ke. Me nsaanke njefo ben kee keceey, ε ben kee ten le ke è nulo é mbiay ebuy εnte jo keceey ke.

22 Wee mbiay nu wvù la? Ke è nu wvuwe wvù tune le ke Jisos nu Mboyse wvù Nyo' to kawεε le? Wee wvù tune Nyo' Ice bô Waa we nu wvuwe wvù nu wee bvuban Klistu.

23 Ke wee wvù tune Wan keŋke kentaashε bô Icee Wan wvudvu ke. Wee wvù jemyi bô diuw we le wen nu ε bee Wan e, nu wvù keŋke kentaashε bô Icee Wan ten.

24 Ben egεε fiεε fi ben to yuwεε foŋkew é fí enu sekecii yî yene le. É ben geke fiεε fi ben to yuwεε foŋkew fí ε no nu sekecii yî yene le, é ben ten emum enu sekecii yî Waa Nyo' bô Ice le.

25 Ε fiεε fi Klistu nu ε kaw beene dvú nu nshii wvù mey lo.

26 Me nsaanke mwεem mvun fô ben e ε è nu ekumε bonyii bô gomte keeleεle ben.

27 Geenεn n'yefe wvù ben to keŋkeε ê Klistu nu sekecii yî yene le, ε ben yaa bvuu shieele lo wee mvu wvù ebvuu eyεyi ben ke. No n'yefe we wvun yεyi wase ben ekumε mwεem mvunciim, ε n'yefe wvudvu nu wvu keceey, se è nu wvu mbiay, ben emum enù sekecii yî Klistu le ke leŋleŋ no n'yefe wvun nu ε yεyi ben.

28 Boom bem, ben emum emεy enù sekecii yî ye le wvu le seke wvú ε ke ε buynεn, é beene ekeŋke fitele keeyεn wvú le efey keeke enyiimen lo εnte jo ken'wuumen.

29 É ben kee lo le wvú nu wee wvù gee mwεem teyey, tu ben keŋke keekeè ten le wee tfuu wvù gee fiεε fi teyey nu ε è nu mboo we.

1Jon 3

Beene nu boom bo Nyo' le

- ¹ Ben etaa ke eyen kfuu kenkojen ke baay kè Nyo' Ice nu ε duηce fô beene le, ε ge le bó eteηe beene le boom bo Nyo' le! E beene nu keceey boom bo Nyo' le. Fieε fi bonyii bô è nu bo yî woη wvun e baa kee beene nu njefo bó baa kee ten wvú wvù Nyo' ke.
- ² Nsáa yem shém, keseen nu ε beene nu wase boom bo Nyo' le, geenen beene baa kee wase no beene nu ke enu ke. Fì beene kee nu ke le è nu ke enu seke Klistu ε buynen, é beene enu diewe wvú le, njefo beene nu ke eyen wvú le no wvú nu.
- ³ Fí ε mum ε no nu le, wee tfuu wvù taale fwe yî ye le nonen kenke keecuke ekole kew sekecii yuule no wvú yuule.
- ⁴ Wee tfuu wvù gee kebefε nu ε wvù ηgoyte ε è nu nci Nyo', njefo kebefε nu nci ε wee ε ηgoy.
- ⁵ Ben kee lo le Klistu to to keecake bibefε bi bonyii le. E ke wvú wvù Klistu to kenke kebefε ke.
- ⁶ Ke wee wvù nu yî Klistu le ké mey no gee bibefε ke. Ke wee wvù mey ε no gee bibefε ké no ε yen wase wvú le kenεε kee wvú ke.
- ⁷ Boom bem, fo wee elεε ben ke. Wee wvù gee fieε teytey nu ke wase wee wvu teytey lenlen no Klistu nu wee wvu teytey.
- ⁸ Wee wvù mey ε no gee bibefε nu wee dεwle, njefo dεwle wvun to gee wase bibefε naa ε kew lo fonkew. Shiee wvù Waa Nyo' to toε to nu keefiwse dilemme di dεwle wvun e.
- ⁹ Ke wee wvù è nu mboo Nyo' ké no gee kebefε ke, njefo fieε fi è nu Nyo' ficii nu yî ye le sekecii, ε ke è nulo é wvú ebvuu egee kebefε ke, njefo wvú nu mboo Nyo'.
- ¹⁰ Fieε fi nulo ege é beene eyene bonyii bô è nu boom bo Nyo' le bô bô è nu bo dεwle le nu fin: Wee tfuu wvù nu se wvú gee mwεem teytey kenεε wvù nu se wvú koonke waa bwee, yaa nu Waa Nyo' ke.

Beene ekojenè

- ¹¹ Saaka wvù ben to yuweε ε kew fonkew nu ke wvun wvù le, beene ekojenè.
- ¹² Fo beene enù diewe Keen e ke. Wvú to nu waa Satan wvù wee kebefε we, ke mum ne yu waa bwee. E wvú to yu wvú nje la? Wvú to yu njefo diew gee to nu di befe, ε di waa bwee le nu di teytey.
- ¹³ Boom bo bwεem e, fo ben ekenkè ηghaw le bonyii bô è nu bo yî woη wvun e bane ben ke.
- ¹⁴ Beene kee lo le beene nu ε buy wase can kpwe le ε ley yî nshii le, njefo beene koonke boom bo bwee wesebeene le. Wee wvù nu se wvú koonke waa bwee beε ke nu can kpwe le.

- 15 É è nu naa yee wvù bane waa bwee, tu mweten nu wee wvù yuwyi bonyii. E ben kee lo le ke wee wvù yuwyi bonyii kenke nshii wvù mey lo yî ye le ke.
- 16 Fiee fi nu e duŋce beene kenkonen ke kenkonen nu fin fi Klistu to gee: Wvù to nu e nya nshii we kpwe nje yese beene. Beene ten kenke keenya wesebeene nshii nje boom bo bwee wesebeene le.
- 17 É wee kenke mwem mvu yî nshè le fen, yene e waa bwee tane, e faŋe yaa eyene lo fitele fiew fô wvù le, tu kenkonen ke Nyo' le nu yî wvuwè wee le nne le?
- 18 Boom bem, fo beene ekoŋenè ke fomvu fomvu kenne yî njeme le ke. Beene ekoŋenè yî keceey e, duŋci yî gee le.
- 19 È nne le fiee fi nu ke ege é beene ekiee le beene nu bonyii bò è nu bo keceey e, ebvuu ege é beene elèse mvuntelem mvusebeene fwe dvu Nyo',
- 20 naa seke la wvù mvuntelem mvusebeene mvudvu saake beene, njefo Nyo' kuuke fele mvuntelem mvusebeene, e wvù kee fiee ficii.
- 21 Nsáa yem shém, é mvuntelem mvusebeene nu se mvù saake beene, beene saa ekenke nfan mvu fwe dvu Nyo' ke.
- 22 É beene leke naa la ê wvù, é wvù enya ê beene, njefo beene gèle bonci bew gee fiee fi ye ejeè wvù.
- 23 E nci we nu wvun wvù le, beene elese fitele yî Waa we wvù Jisos Klistu le, ekoŋenè ke no wvù gay ê beene.
- 24 Bonyii bocii bò gèle bonci bew nu yî ye le sekecii e wvù nu ten yî bó le. Fiee fi gee e beene se kee le beene nu yî ye le sekecii nu Keyoy ke Yuule kè wvù nu e nya ê beene.

1Jon 4

Wee wvù kenke Keyoy ke Nyo' le bò wvù yaa kenke ke

- 1 Nsáa yem shém, fo wee dioo duu le fiee fi wen jemyi ne fô Keyoy ke Nyo' le, e ben mum bee ke lo wvù le ke. Ben emom wvù eyen laa keyoy kedvu nu ke Nyo' le keceey e. Me njemyi nen njefo bonyii bò mbiayte le bowen nu bonyii bo ntum Nyo' le nu wase yî woŋ wvun e nteen.
- 2 Fiee fi nulo ege é ben ekiee keyoy kè è nu ke Nyo' le yî wee le nu fin: Wee tfuu wvù jemyi bò diuw we le Jisos Klistu to nu e tu wee wvu wum to fokuse fen, nu wvuwè wvù kenke Keyoy ke Nyo' le.
- 3 Wee tfuu wvù baa jemyi nonen ekume Jisos nu wvù kenke keyoy e è yaa nu ke Nyo' le ke. Kekin keyoy nu ke wee bvuban Klistu le wvù ben to yuwèe wase le wvù nu ke eto le, e keseen nu e wvù e to wase ê woŋ jan.
- 4 Boom bem, ben nu bonyii bo Nyo' le, e ben e so wase bonyii bodvu. Ben so njefo wee wvù nu yî yene le fele wvù nu ê woŋ jan.

⁵ Boba bonyii nu bo yî woŋ wvun e. Nonen mwεem mvù bó jemyi nu mvu yî woŋ wvun e, ε bonyii bò è nu bo yî woŋ wvun e yuuke bó le.

⁶ Beene nu fiεεbeene bonyii bo Nyo' le. Wee tfuu wvù kee Nyo' yuuke beene le, ε wvù yaa nu ke wee Nyo' yaa yuuke fiew beene le ke. Fifin nu fiεε fi gee ε beene se kee keyoy kè è nu ke wee kecεεy e bô kè è nu ke wee mbiay e.

Nyo' nu Nyo' keŋkoŋen

⁷ Nsáa yem shém, beene ekoŋenè, njefo keŋkoŋen nu fiεε fi Nyo' le. Wee wvù kooŋke wee mvu, nu mboo Nyo', ε wvù kee Nyo'.

⁸ Ke wee wvù nu se wvù kooŋke wee mvu kee Nyo' ke. Fí nu nonen njefo Nyo' nu Nyo' keŋkoŋen.

⁹ Yin nu je yî Nyo' to duŋcεε keŋkoŋen kew fô beene le jó: Wvù to nu ε tum Waa we wvù ε ka ke wvù yî woŋ wvun e wvu le beene ke ekeŋke nshii fele yî ye le.

¹⁰ Fifin nu fiεε fi bó teŋe le keŋkoŋen. E ke è nu le è to koŋ beene Nyo' ke. È to koŋ Nyo' beene, tum Waa we le wvù eto ege keman fô bibefe bisεεbeene le.

¹¹ Nsáa yem shém, no Nyo' to koŋεε beene ê yin je le nen, beene ten keŋke keekoŋenè.

¹² Ke wee nu dvù wvù ke nu ε yuu wase yen Nyo' le ke. É beene koŋene lo, é Nyo' enu sekecii yî yese beene le, ε keŋkoŋen kew nu yî yese beene le gene mεεse.

¹³ Beene kee le beene nu yî ye le sekecii ε wvù nu yî yese beene le, njefo wvù nu ε nya beene bô Keyoy kè è nu kew.

¹⁴ Bese to nu ε yen ε mum ε no seŋe ê bonyii le Nyo' Ice to nu ε tum Waa we le wvù eto eboyse woŋ wvun.

¹⁵ É è nu naa yεε wvù jeme bô diuw we le Jisos nu Waa Nyo', tu Nyo' nu yî mwεten e sekecii ε wvù nu ten yî Nyo' le.

¹⁶ No fí nu nonen, beene ε mum ε kieε, ε bee keŋkoŋen kè Nyo' keŋke fô beene le. Nyo' nu Nyo' keŋkoŋen, ε wee wvù cee yî keŋkoŋen e sekecii, cee ε è nu yî Nyo' le, ε Nyo' ten cee yî ye le sekecii.

¹⁷ Fiεε fi duŋci le keŋkoŋen nu fô beene le ε kí ε yiŋsen nu fin fi le, ke beene keŋke nfan ekumε diuu di nsaw wvu fokemεse le ke. E beene yaa keŋke ke nfan njefo beene cee yî woŋ wvun e diεwε Klistu le.

¹⁸ Ke nfan ké no nu ente jo keŋkoŋen ke. Keŋkoŋen kè nu ε leynen ε gen ε mese ké no bvuuεse lo nfan, njefo nfan keŋke fiεε keεge ε è nu bô ηgew wvù è nulo é bó enya ê wee. Ke wee wvù keŋke nfan nu ε ley wase ente jo keŋkoŋen ε gen ε mese ke.

¹⁹ Beene koŋene njefo è to yaw Nyo' no kooŋke beene.

20 É wee duu le wen kooŋke Nyo', geenen bvuu bane waa bwee, tu wvú nu wee mbiay, njefo é wee nu se wvú kooŋke waa bwee wvú yene wvú le, wvú saa ke ekoŋke Nyo' wvú nu se wvú yene wvú le ke.

21 Nci wvú beene to keŋke é Klistu nu wvun wvú le, wee wvú kooŋke Nyo' keŋke keekoŋkè waa bwee ten.

1Jon 5

Wee wvú soo woŋ wvun nu wvú nu ε bee Jisos e

1 Wee tfuu wvú nu ε bee le Jisos nu Mboyse wvú Nyo' to kawee nu ε wvú nu waa Nyo', ε wee tfuu wvú kooŋke wee, nu ε wvú kooŋke ten mboo mweten.

2 Fiεε fi gee ε beene se kee le beene kooŋke boom bo Nyo' le nu seke beene kooŋke Nyo' gee fiεε fi nci we gayte.

3 Ben ekeè le keekoŋke Nyo' nu keegeele bonci bew, ε bonci bew yaa nu bvujite ke,

4 njefo wee tfuu wvú è nu mboo Nyo' nu ε wvú soo lo woŋ wvun. E fiεε fi soo woŋ wvun nu mbee wesebeene.

5 Wee wvú soo woŋ wvun nu wvú la? Ke è nu wvuwε wvú nu ε bee le Jisos nu Waa Nyo' le?

Mwεem mvù leeme jim nsaw Jisos

6 Jisos Klistu to nu ε to yî woŋ wvun e, fey yî joo bô yî ελεμε le. Ke wvú to fey ke ε è nu yî joo le maan ke. Wvú to fey yî joo le bô yî ελεμε le. E Keyoy ke Yuule leeme jim nsaw fiεε fin njefo Keyoy jemyi keceey.

7 Mwεem nu dvú mvuntentem mvù leeme jim nsaw wvudvu.

8 E mwεem mvun nu Keyoy ke Yuule, joo noo ελεμε. E mwεem mvu mvuntentem mvun nu yî fiεε le fimwaan.

9 Beene ké no beŋe fiεε fi è jemyi wee wvu wum é beene. Geenεn, fiεε fi è jemyi Nyo' nu ε fí jite fele fi wee wvu wum e. Ben ekeè le fifin nu fiεε fi è jemyi Nyo' é beene, leeme jim nsaw wvu Waa we.

10 Wee wvú nu ε bee Waa Nyo' le nu ε wvú keŋke fiεε fi Nyo' jeme fin yî ye le. Wee wvú baa bee Nyo' le nu ε wvú gee ε Nyo' nu wee mbiay, njefo wvú baa bee fiεε fi è jeme Nyo' é beene ekume Waa we le ke.

11 Njeme Nyo' wvun nu le Nyo' nu ε nya beene bô nshii wvú mey lo, ε nshii wvun nen'yi yî Waa we le.

12 Wee wvú keŋke Waa Nyo' yî ye le keŋke nshii wvudvu, ε wee wvú baa keŋke Waa Nyo' yî ye le yaa keŋke nshii wvudvu ke.

Bonyii bô keŋke wase nshii wvú mey lo

- 13 Me nsaanke mwεem mvun ê ben bò nu ε bee Waa Nyo' le, wvu le ben ekieε le ben keηke wase nshii wvù mey lo.
- 14 Ke beene yaa keηke nfan keebence egen fwe dvu Nyo' eleke fieε ê wvù ke, njefo é beene leke fieε ê wvù bii no wvù shieele, é wvù eyuw fieε fi beene jemyi.
- 15 É beene kee le wvù yuuke fieε fi beene jemyi seke beene leke naa la ê wvù, é beene emum ekeè ten le beene nu ε keηke wase fieε fi beene leke ê wvù.
- 16 É wee yen ε waa bwee gee kebefε kè yaa nulo ege é wvù ekpwe lo ke, é wvù leke le Nyo' enya nshii ê wvù. Fifiin nu fô wee wvù kebefε kew yaa nulo ege é wvù ekpwe lo ke. Kebefε kemew nu dvù kè nulo ege é wee ekpwe lo. Ke me ηgayte le wee ebunleè fô wvuwee wee le ke.
- 17 Gee di befe dicii nu kebefε, geenεn ε kebefε kemew nu dvù kè yaa nulo ege é wee ekpwe lo ke.
- 18 Beene kee lo le ke wee wvù è nu mboo Nyo' nulo ebvuu emey egee bibefε ke, njefo Waa Nyo' cεyεyi wvù, ε ke wee kebefε we nulo ebvuu ekum wvù le ke.
- 19 Beene kee lo ten le beene nu bonyii bo Nyo' le, ε bonyii bò è nu bo yî woη wvun e bocii nu can wee kebefε we le.
- 20 Beene kee le Waa Nyo' nu ε to wase ε yene bvufee bvuseεbeene keekieε wvù wvù Nyo' wvu keceεy. E beene nu yî ye le wvù è nu keceεy njefo beene nu yî Waa we wvù Jisos Klistu le. È nu wvù wvù Nyo' wvu keceεy ε nshii wvù mey lo nu can ye le.
- 21 Boom bem, ben eyenè ekume mvunyo' mvu εcici.

2 Jon

2Jon 1

1 È nu me wvù cee ekole kentaashe ke bonyii bo mbee le. Me nsaanke nwa' wvun fô wo le kpwoon wvù Nyo' nu ε caw noo fô boom buw e. Me nkoonke ben yî keceey e. E ke è mey ke me maan wvù koonke ben ke. Bonyii bocii bô kee keceey koonke ten ben.

2 Bese koonke ben nje keceey kè nu yî yese beene le, ε kí nu ke emey nu ke yî yese beene le sekeci.

3 Mbuwma Nyo' bô shen noo nyakeey wvù nen'yi fô Nyo' Ice bô fô Jisos Klistu wvù Waa Nyo' Ice le nu enu yî yese beene le no beene nu yî keceey e bô yî kenkonen e.

Ben enù yî keceey e noo yî kenkonen e

4 Me nlanlanje baay no me nu ε n'yen ε boom buw bomew bii keceey e ke no Nyo' Ice to gaye le beene egeè.

5 Yî keseen e bwee bonyii, me nleke lo wo ngayte le beene ekonènè. Ke fin nu nci mvu wvu fwe ε me nsaanke fô wo le ke. È nu ke nci wvù beene to kenke wase ε kew fonkew.

6 Kenkonen nu fin fi le beene ebii nci we le. E nci wvudvu nu wvun wvù ben to yuwee wase ε è bee fonkew le ben eceè yî kenkonen e.

7 Bonyii bo mbiay e nteen nu wase ê won, ε è nu bonyii bô yaa tomte le Jisos Klistu to nu ε tu wee wvu wum to fokuse fen ke. Boba bonyii nu bo wee mbiay e wvù nu ten wee bvuban Klistu.

8 Ben eyenè bô bikuu binen fo ben ke ene elase fiε fi ben nu ε lem wase. Ben emomtè ε è nu keeke ekenke nlawma wene tfuu.

9 Wee tfuu wvù daanke gene fwe yaa leeme ke yî n'yeyi wvu Klistu le, nu ε wvù yaa bvuu kenke Nyo' yî ye le ke. E wee wvù leeme sekeci yî n'yeyi wvu Klistu le, nu ε wvù kenke Nyo' Ice bô Wan yî ye le.

10 É wee to fô ben e ε fahe yaa eto ε è nu bô wvuwwun n'yeyi, fo ben efiisen wvù ê ben yew kenεε egay lo wvù le ke.

11 É wee gay wvù le, tu wvù nu ε taashe wase bô wvù yî lemme diew di befe le.

3 Jon

3Jon 1

¹ È nu me wvù cee ekolε kentaashe ke bonyii bo mbee le. Me nsaanke nwa' wvun fô wo le Gayus wvù nsaa yem shém. Me nkoonke naa wo yî keceey e.

Ɛ Jon bense Gayus

²Nsaa yem shém, me mbunlee le mwεem mvunciim egene ntay ê keba kuw e, Ɛ wo temyi yî nyam ye le ke no me nkee le wo temyi ê keyoy e.

³ Me nto nu Ɛ n'yuw njon baay no boom bo bwee wesebeene le bomew to fεεε jan see ekumε no wo leeme yî keceey e bô fitele fiuw ficii. Ɛ è nu naa keceey le wo bii keceey e.

⁴Ke fiεε fimew bvuu nu dvú fi nulo ege é me en'yuuke njon nfele keen'yuuke le boom bobem bii keceey e ke.

⁵ Nsaa yem shém, lemme di wo lemte fô boom bo bwee wesebeene le, efey mvunciim fô bô nu botolo le, nu Ɛ wo lemte naa len.

⁶ Bó to nu Ɛ see ê kentaashe ke bonyii bo mbee le ke jan ekumε kenkonen kuw. È momtè ke fici boba bonyii ê je yî Nyo' shieele le nonen yî lenε dibole.

⁷È keè le bó buy ekfuƚ Ɛ è nu nje diee di Klistu le, Ɛ bó baa etaale nfi mvu ê bonyii bô yaa nu bo Nyo' le ke.

⁸Nonen, beene kenke keetomtè boba bonyii, wvu le beene Ɛ bó enù bonyii bô lemte yî fiεε le fimwaan ekumε keceey.

Ɛkumε Diotefεs bô Demitiyus

⁹Me nto nu Ɛ nsaƚ fiεε fô kentaashe ke bonyii bo mbee le kenεn e, geenεn Ɛ Diotefεs wvù koonke keelewse ekolε kew fwe, faƚe yaa eyuw wee wvù è nu me le ke.

¹⁰Nonen, me nu nkε endioo Ɛ nto, é me enjike fiεε fi wvú gee fin fokuse, no wvú ghane kunsene mvunƚkunsen, jemyi díew yî befe ekumε me. No wvú gee nonen, wvú baa cim ffuu bô fifiε ke. Wvú tune ten keefiisene boom bo bwee wesebeene le, tune ten fo bonyii bô gomte keefiisene bó efiisenè. É bó dioo gomte keefiisen, é wvú mum kuƚ lo bó ê kentaashe ke bonyii bo mbee le ente.

¹¹ Nsaa yem shém, fo wo ebejenè fiεε fi befe ke. È bejenè Ɛ è nu fi jee. Wee wvù gee fiεε fi jee nu wee Nyo', Ɛ wvù gee fi befe nu Ɛ wvú baa kee wase Nyo' ke.

¹²Demitiyus nu fiew wee Ɛ bonyii bocii jemyi mwεem mvù jee ekumε wvú, Ɛ kenƚe kew kè jee jemyi ten ekumε wvú. Bese ten jemyi ekumε wvú. Ɛ wo kee lo le fiεε fi bese jemyi ekumε wvú nu keceey.

Dgayma

13 Me mbεε ηκηηke mwεem nteen keensan ê wo, geenen ke me ηkooηke keensan lo bô ete ke ηwa' le ke.

14 Me n'yene le è shεke caan é me ento en'yen lo wo le, é bee wo ejemyi ε wee yene wee le ê jise.

15 Nyεkeey enù fô wo le. Nsáa yesebeewo gayte wo le. Gayε nsáa yesebeewo le yicii wee mwaanη mwaanη bó le, enya ê me.

Jut

Jut 1

1 È nu me wvù Jut wee lemme Jisos Klistu, ε me nu waa bwee Jem. Me nsaanke ηwa' wvun fô bonyii bò Nyo' Icee wesebeene nu ε tee, ε bó cee yî kenkonen kew e, ε wvú ε gee bó can Jisos Klistu le.

2 Nyo' ebvuu ecam shen fô ben e naa ntay, ebvuu ege é mvuntelem mvunen elæetene, é kenkonen kew fô ben e ebvuu eduu egen fwe.

Bonyii bo n'yeyi le bo mbiay e

3 Nsáa yem shém, me nse ηkpawwaci naa baay le me nu ensaη fô ben e ekume mboyma wvù beene bocii nu ε kenke wase, ε ne ε n'yen le fí nu shiee le baay keensaη enleke ben le ben ediuù keetomte mbee wvù bó to nyaε ê beene bò è nu bonyii bo Nyo' le. È nu fieε ε bó to nya wa lo ê beene kaη mwaan η fimew yaa bæ ke.

4 Me njemyi nen njefo bonyii bomew nu ε wæentεn wase ε ley ê ben ente, ε è nu bò bó to jemyεε wase ekume bó ε è bæε lo le Nyo' nu ε gee wase ηgew wvubo. Boban nu bonyii bò maa lo Nyo', bò joo mbuwma Nyo' tfuuse ε è tuu fieε fi bó ebæεε ekuse jodvu gee nnyen, bvuu maa lo Cee Ekole wesebeene wvù Tata Jisos Klistu wvù è mey ke wvú.

5 Keseen me ηgomte keembvuu enkume ben ekume mwæem mvumew ε ben kee ke naa wase mvú ntay. Tata to nu ε bvuse bonyii bo Islael woη wvù Ijiw e, ε bó boy yî ηgew e, geenεn ε wvú ke kase ke læse bonyii bò to baa lese fitele yî ye le ke.

6 Ε è nu ke no bonceendaa bew bò to baa leeme fô wvú to gekεε bó, cine bvudvuu bvubole bvu leη bvu nce le, nu ε wvú ε lese boba yî boncaw bò mey lo le, fô bvudvuu bvù jiime nen taytaytay e, fô bó nu enu egen ebuy diuu di baay di è nu di nsaw e.

7 Ε è bvuu nu ke leηleη no wvú to tonεε kelaante kè Sodom bô kè Gomola bô ηguy wvù mey lo, noo bilaante bi to nu mbew bí le, bi to cee ten nce nnyen kenjaη, ε bokεεε bô bolemse joo ten ye yibo gee dvú ε è yaa nu ê je yì Nyo' to bomεε le wee egee le ke. Fieε fin nu kenfewsεn ke fieε fi nu ke ekooy bô bonyii bò cee kfuw wvuwvun nce le.

8 Naa no fí nu nonεn, bonyii ban ε jo ke ε è nu gee didvu. Bó beete bô ye yibo, tune wee wvù saake bó, nan'yi biyoy bi kenke mvuηgay fele bó. Bó gee nonεn duu le è nu njefo bó yene mwæem e ê bifile le.

9 Seke Maykel wvù nu ekole ke bonceendaa bo Nyo' le to waale εwe jo gvune di Muses e, ε bô dεwle taanke gvune didvu, wvú to baa cim bvuse diεw yì befε ejeme ê dεwle ke, ε wvú tfuse ke ê wvú le, “È nu esaw Tata wo.”

10 Bonyii ban ε no nan'yi lo mwεem mvunciim mvù bó baa kee no mvú nu ke. Bó gee mwεem ε è nu mvù elemε kebole gomte diewe nyám yi ηkpwaante le. È nu mwεem mvudvu mvun mvù beete bô bó.

11Ngew wvu baay nu fô bó le. Bó nu ε jo gee ε è nu di Kεen e. Bó nu ε ne wase ε no gee mwεem mvù befe nje bigew diewe Balaam e. Bó temyi bikuu ke lηηlηη diewe no Koola to temyi. Bó nu ke ekpweken ke no Koola to kpweε.

12 Boban bonyii nu lo yile ê ben entelη seke ben diee ηkaw keηkoηen kenεn. Bó ké no gee diewe bwé le kefew ke mwεem mvudien mvun e, ε wee taale ke ε è nu ekole kew yaa wuumene ke. Bó nu diewe kembew fò kí ε suu se kí enya jaη e, fwefwe ε kase ε tawse kí. Bó nu ten diewe bite bì ké ce gen buy naa seke mondvuum kaa ε bí baa eyum mvuntam ke le. Bó nu diewe bite bì bó nu ε mvuwyε le. Bó nu ε kpwe wase ε bvuu ε kpwe.

13 Bó nu diewe joo yi baay yi nffum fεete bensee we le, ε gee dibole di kenshoose le nu diewe diffuw di nffum fεete bensee we yí joo le. Bó nu diewe jón yi waysene lo ncewncew e. Nyo' nu ε seyse wase bvudvuu bvυ ηgew e ε bvú jiime nen taytaytay sekecii, ε gεε ê bó.

14 Enok wvù ηngoke kew to nu ke bisooshwiγ ε kew yí Adam e, to nu ε yuu jeme diewe wee ntum Nyo' le ekumε bonyii ban gayte le, “Ben etaa eyen, Tata nu ke eto bô ηgoo bonceendaa bew bò yuule ε bó nu bontfuke le,

15keesaw wee tfuu. Wvú nu ke eto eduηce gee di befe dicii di bonyii bocii bò yaa kee ke Nyo' se gee no bó maa lo wvú noo mwεem mvunciim mvù befe mvù bó se ké no jemyi ekumε Nyo'.”

16Boban bonyii nu bò ké no diomene ke lo sekecii, gomte diuw, bii ke ε è nu fiεε yi ye yibo yi ηeyte shieele le, seηe ye yi εcici, læle bonyii bô díew yi yeke keekeηke mwεem mvù bó shieele.

Ntefe ekumε mwεem mvù nu ke ekooy

17 Geenεn nsáa yem shém, ben ekumε mwεem mvù boom bo ntum e bo Tata wesebeene wvù Jisos Klistu to jemyεε ê ben le mvú nu ke ekooy.

18 Bó to nu ε jeme ê ben le, “È nu ke edioo enu εdiuw yo fokemεse le, é bonyii ebuynεn esεwsee ben. Bó nu ke enu bonyii bò maa lo Nyo', gee ε è nu mwεem mvù ye yibo yi ηeyte shieele.”

19Boban bonyii nu bò too bô keηgawsen ê bonyii entelη, bii ε è nu mwεem mvu yí nshε le, yaa keηke Keyoy ke Nyo' le yí bó le ke.

20 Geenεn nsáa yem shém, ben eyoo bikuu binεn eleemè ke ε è nu yí mbee wene wvù nu naa wvù yuule le, ebunlè sekecii ê mvuηgay mvu Keyoy ke Yuule le.

21Ben emey ke enù yí keηkoηen kè ke Nyo' le, eεyτè Tata wesebeene wvù Jisos Klistu wvù nu ke ecam shen, ege é ben eley nshii wvù mey lo le.

22 Ben ecamtè shen fô bonyii bò bæε yî kemaηen e.

23 Ben ecuttè bonyii bò nu ηguy e bvuuσè, boyseè bó. Ben ecamtè shen fô bomew bonyii le, geenen dīoo camte no yene. Ben ebanè naa noo ndvú yībo yī bó nu ε yiise wase bô nce wvù befe.

Bunle Mbense

24 Mbense enù fô Nyo' le! È nu wvú wvù nulo ecεyεte ben fo ben ke egbwe. Wvú nu ke egeη bô ben fwe dvu bvukukε bwew ε ben nu σε nlom nu bô nlaηlaη.

25 Beene enyaà mbense ê Nyo' wvù Mboyse wesebeene wvù è mey ke wvú, fele yî Jīsoσ Klistu wvù Tata wesebeene le. Bvukukε bô mvuηgay noo sa' ekeηkè ke wvú wvù Nyo' ε kew no woη to kewεε bô keseen noo sekeciī σε ηka. Fī enù nonen.

Mwm

Mwm 1

Kenkewce

¹ Nwa' wvun nu ekume mwεem mvù Nyo' to nyaε ê Jisos Klistu le wvú eduŋce ê bonyii bew, le è nu mvù nu ke ekooyi nfew caan. E Jisos Klistu mum tum nceendaa we fô wee we lemme wvù Jon e keege le bó ekiεε mwεem mvudvu.

² E wvú mum saŋ naa fiεε ficii fi wvú to yεneε, fi è nu diεw Nyo' yin bô mwεem mvù Jisos Klistu to jemyεε ê wvú le.

³ Njoh wvu baay nu ke enu wvù wee wvù nu ke etaanke ntum Nyo' wvun. E njoh wvu baay nu ke enu ten wvù bonyii bô nu ke eyuuke fiεε fi bó saŋ ê nwa' wvudvu wvun e geele, njefo kefew ke mwεem mvudvu le nu wase nceencee.

E Jon nya ngayma ê bintaashε bi bonyii bo mbee le bi bisooshwi

⁴ È nu me wvù Jon, ε me nsaanke nwa' wvun fô bintaashε bi bonyii bo mbee le bi bisooshwi bì nu ê biba bi woŋ e bi Esia le. Mbuwma bô nyεkeey enù fô ben e wvù nen'yi fô Nyo' le wvù è nu wvuwe wvù nu, ε wvú to nu wase, ε wvú nu ke eto. Mbuwma bô nyεkeey wvun enù fô ben e wvù nen'yi ten fô biyoy bi bisooshwi bì nu fwe dvu kawla we le,

⁵ noo fô Jisos Klistu wvù è nu ke wvú wvù ké no duŋci fiεε fi keceey ekume Nyo' ê bonyii le. È to nu wvú wee wvu fwe keekase buy yî kpwe le. E è nu wvú wvù saake bonfon bocii bo yî nshε le fen. Mbense enù fô wvú le. È nu wvú wvù kooŋke beene, ε wvú to bvuse beene can kebefε kesεεbeene le bô εleme kew.

⁶ Wvú nu ε ge beene ε no nu bonyii bo bvunfon e, ε ge beene ε no nu bocee ncese bo Nyo' wvù Ice le. Bvukuke bô mvuŋgay mvunciim enù fô wvú le sekecii sε nka. Fí enù nonen.

⁷ Ben etaa eyen, Jisos too lo, ε wvú nu ke etoo ê kembew e. Bonyii bocii nu ke eyen wvú le naa noo bonyii bô to bonεε wvú bô goo. Bitum bi yî nshε le bicii nu ke efuunke kpwe nje ye. È nεε no fí nu ke enu. Fí enù nonen.

⁸ Tata Nyo' gayte le è nu wen Alfa, ε è nu wen Omega. È nu wvú wvù nu, ε è nu wvú wvù to nu wase, ε è nu wvú wvù nu ke eto. È nu wvú Mvuŋgay Mvunciim.

E Jon yen Jisos e

⁹ È nu me wvù Jon, waa bwee wene yî Jisos e, ε beene bocii yεne ngew nje ye, nu ê bvunfon bwew ente, kuule shém yî mwεem mvunciim e. Me nto nu ê kendvuy kè Batmos e ε bó to bvuse lo me nje diεw Nyo' yi me nto nfewci mbvuu nseŋe ekume Jisos.

¹⁰ E è ke no nu diuu di Tata le, ε me nu can Keyoy ke Nyo' le, ε me ne n'yuw ε diεw jemyi ê me ejim foweewe diεwe soŋ e.

- 11 Yí to jemyi gayte le, “Saɲe mwɛɛm mvù wo yene mvun ê ɲwa' le eciinse ê bintaashe bi bonyii bo mbee le bi bisooshwiɲ bì nu ê bilaante bi Efesus, Similna, Begamum, Tayatila, Saldis bô Filadelfia noo Lawdesia le.”
- 12 E me mum no mbaɲse ye keen'yen wee wvù jemyi ê me le. E me ndioo mbaɲke, n'yen mwɛɛm mvù bó tomyi bin'yeese yî dvú le mvusooshwiɲ ε bó kene bô ketwaa ke bigew e kè yeɛle.
- 13 E wee mvu nu enteleɲ jo mwɛɛm mvù bó tomyi bin'yeese yî dvú le mvudvu diewe wee wvù diee nu Waawee le, ε wvù ε tfume kekum ε kí defe, ε waw ɲ'waw yî gvuw e ε bó kene bô ketwaa ke bigew e kè yeɛle.
- 14 Yvuw ye ekole to baa diewe ndaw wvù baa nen bvuuu le, ε ejise eye beenci diewe leme di ɲguy e.
- 15 Bikaa biew to nu lemeleme diewe ketwaa kè yeɛle kè bó ton ê lam, ε diew ye dvûmte diewe joo yi gbwee le.
- 16 Wvú to keɲke jón yisooshwiɲ ê ebo kew ke eceey e, ε nyo yì koole biba bicii buyte emvu jo wvú, ε bvushiw bwew baa diewe diuu seke dí keyte lo le.
- 17 No me n'yenɛɛ wvú le, mum ɲgbwe ê wvú ejise no nu diewe keɲkpwe ke wee le. E wvú gɛɛ ebo kew ke eceey yî yem e gay le, “Fo wo efanè ke. Ê nu me Fwe, ε è nu me Ejime.
- 18 Ê nu me wvù nu dvú. Me nto nu ε ɲkpwe, geenɛn taa eyen, me nu ε ɲkase ε no nu dvú, ε me nu ɲke enu dvú sekecii. Ê keɲke me ken'yene ke kpwe le bô ke won boɲkfu le.
- 19 Nonɛn, saɲe le mwɛɛm mvù wo yene, mwɛɛm mvù nu keseen bô mvù nu ke ekooyi ejim jodvu le.
- 20 Fiɛɛ fi jón yi yisooshwiɲ ye yì wo be yen ê ebo kem ke eceey e bô mwɛɛm mvu mvusooshwiɲ mwe mvù bó kene bô ketwaa ke bigew e kè yeɛle mvù bó tomyi bin'yeese yî dvú le duɲci nu fin: Jón yi yisooshwiɲ ye nu bonceendaa bo Nyo' le bô è nu bo bintaashe bi bonyii bo mbee le bi bisooshwiɲ bidvu, ε mwɛɛm mvu mvusooshwiɲ mwe mvù bó tomyi bin'yeese yî dvú le nu bintaashe bi bonyii bo mbee le bi bossooshwiɲ bidvu.”

Mwm 2

Ntum Jisos wvù gɛne fô kentaashe ke bonyii bo mbee le ke Efesus e

- 1 E wee wvù me n'yenɛɛ we gay ê me le, “Saɲe ɲwa' fô nceendaa Nyo' wvù è nu wvu kentaashe ke bonyii bo mbee le ke Efesus e le, ‘Wvun nu ɲjeme wvu wvuwe wvù jici jón yi yisooshwiɲ e ê ebo kew ke eceey e, lene enteleɲ jo mwɛɛm mvu mvusooshwiɲ mvù bó kene bô ketwaa ke bigew e kè yeɛle mvù bó tomyi bin'yeese yî dvú le:

² Me ηkee lemme dinen bô no ben lemte jimtene, ηkee ten shém yì ben kuule bô no κε è nulo é ben ebee fiεε fi bonyii bô befe too dvú κε. Ben nu ε mom wase bonyii ba bô teje bikuu bibole le bowen nu boom bo ntum e bo Jisos e ε bó yaa nu κε, ε yen le bó nu bonyii bo mbiay e.

³ Me ηkee no ben looci kuule shém yî fiεε ficii le nje yem yaa doose κε.

⁴ Geenεn, fiεε fimew nu dvú fi me ηκηηκε εκυμε ben fi baa jee me le κε. Ke ben bæε κηηκε κηηκονηen κè ben to shee κηηκε fwele κε.

⁵ Ben ekume fò ben to shee nu ε σε ne ε gbwe. Ben ekumen mvuntelem mvunen ekase egeè no ben to gee fwele. É ben nu σε ben ε kumen, é me ηke ento encake fiεε finen fi bó tomyi ken'yeese yî dvú le fô fí leeme.

⁶ Geenεn, fiεε fi ληη fi ben gee nu le ben bane gee di ηgoo bonyii bo Nikolaus e, ε è nu fiεε fi me mbane ten.

⁷ Wee wvù κηηκε bitem, ε wvú yuw fiεε fi Keyoy ke Nyo' le jemyi ê bintaashe bi bonyii bo mbee le. Wee wvù ε ke ε so nu ε me nu ηke enya je é wvú edie mvuntam mvu kete κè nyaa nshii le, κè nu fô bvudvuu bvυ njon e bvυ Nyo' le.”

Ntum Jisos wvù gεne fô kentaashe ke bonyii bo mbee le ke Similna le

⁸ Ε wee wvudvu bvυu gay ê me le, “Saηε ηwa' fô nceendaa Nyo' wvù è nu wvu kentaashe ke bonyii bo mbee le ke Similna le le, ‘Wvun nu njeme wvu wvuwe wvù è nu wvú Fwe, ε è nu wvú Ejime. É nu wvú wvù to kpweε ε kase ε no nu dvú:

⁹ Me ηkee bongew bô ben yene noo kefufe kenεn, geenεn ben nu bonyii bo bvukuke le. Me ηkee díew yì befe yì bonyii jemyi εκυμε ben. Bó teje bikuu bibole le bowen nu Bojuu, ε bó yaa nu κε. Bó nu ê ηgoo Satan e.

¹⁰ Fo ben efanè bongew bô ben nu keeyen e κε. Ben eyeke eyuw, dεwle nu wase keelese ben bomew yew ncaw e keemom ben. Ben nu ke eyen ηgew yî εdiuw e yuufe. É è cim nu keekpwe, é ben no leeme κε temyi, nonεn é me ηke enya kefo ke bvunfon e κè è nu nshii wvù meγ lo ê ben.

¹¹ Wee wvù κηηκε bitem, ε wvú yuw fiεε fi Keyoy ke Nyo' le jemyi ê bintaashe bi bonyii bo mbee le. Wee wvù ε ke ε so nu ε ke kpwe yi bokaη bofεε nu ke ekum wvú le κε.”

Ntum Jisos wvù gεne fô kentaashe ke bonyii bo mbee le ke Begamum e

¹² Ε wvú bvυu gay ê me le, “Saηε ηwa' fô nceendaa Nyo' wvù è nu wvu kentaashe ke bonyii bo mbee le ke Begamum e le, ‘Wvun nu njeme wvu wvuwe wvù κηηκε nyo yì koole biba bicii:

¹³ Me ηkee fô ben cee. Ben cee naa fô kawla Satan nu. Geenεn ε ben leeme κε yî diee diem e temyi. Ben to baa cim tun keeleese fitele yî yem e naa εdiuw yo Antibas wvù wee wem wvu keceey e κε. Wvú to jemyi εκυμε me, ε bó yu wvú ê ben enteleη fe fô Satan cee.

14 Geenen, ε me ηκηκη κε mwεem mvumew caan εκυμε ben mvù baa jee me le κε. Bonyii bomew nu dvù ηgoo yene le bò bii n'yεeyi Balaam wvù to tefεε Balak le wvù ege fiεε fi boom bo Islael ebayten yî dvù le egbwe. Wvù to nu ε ge ε bó no diee mwεem mvudien mvù bó nu ε ge kentaηe dvù fô bonyo' le bvuu ge ε bó no cee nce nnyen kenjaη.

15 Ε è nu κε ληληη no ben κηκη ten bonyii bomew ηgoo yene le bò bii n'yεeyi bonyii bo Nikolaus e.

16 Nonen, ben ekumen mvuntelem mvunen. Έ ben baa ekumen, tu me nu ento nfew caan endiu bonyii bodvu bô nyo yî buyte ê me emvu.

17 Wee wvù κηκη bitem, ε wvù yuw fiεε fi Keyoy ke Nyo' le jemyi ê bintaashε bi bonyii bo mbee le. Wee wvù ε ke ε so nu ε me nu ηke enjo fô mana wvù bó to nyileε le enya wvù dvù, embvuu enya wvù τε δι baa ε bó ε saη diee di dife yî dvù le ε wee yaa nu dvù wvù kee diee didvu efey wee wvù fi τε didvu κε.”

Ntum Jisos wvù gene fô kentaashε ke bonyii bo mbee le ke Tayatila le

18 Ε wee wvudvu bvuu gay ê me λε, “Saηε ηwa' fô nceendaa Nyo' wvù è nu wvu kentaashε ke bonyii bo mbee le ke Tayatila le λε, 'Wvun nu njeme Waa Nyo'. È nu wvù wvù ejise eye bεenci diεwε lemme di ηguy e, ε bikaa biew nu lemeleme diεwε ketwaa kè yεele kè bó ton ê lam e:

19 Me ηkee gee dinen, ηkee no ben κηκη κηκηηηη, ηkee ten fitele fi ben lese yî γem e noo lemme δι ben lemte bô no ben kuule shém. Me ηkee lo ten λε gee dinen δι keseen jee fele δι ben to κηκη fwele.

20 Geenen, fiεε fimew nu dvù fi me ηκηκη εκυμε ben fi baa jee me le κε. Ben nu ε cine kpwoon wvù Jεεβελ wε le wvù ε no gee fiεε fi wvù gee. Wvù teηe εκole kew λε wen nu wee ntum Nyo', λεεle bonyii bem bô n'yεeyi we, gee ε bó gee nce nnyen kenjaη, bvuu diee mwεem mvudien mvù bó nu ε ge kentaηe dvù fô bonyo' le.

21 Me nu ε nya wvù kefew keekumen fitele fiew, geenen wvù nu ε tun keekumen nce we nsake.

22 Ben eyeke eyuw, me nu ηke entum kencem yî ye le é kí ejike wvù entaw é bô bonyii bò bô bó se gee nnyen kenjaη engeyte lo, efuw κε le bó ε kumen keebii gee δι kpwoon wvudvu le.

23 Me nu ηke en'yuwye boom bew bo ηgoo le. Nonen, é bintaashε bi bonyii bo mbee le bicii emum ekiεε λε è nu me wvù kee mwεem mvù nu shém bonyii le bô mvù nu ê mvuntelem e. Me nu ηke enlaw wee tfuu mbii no lemme diew nu.

24 Geenen, ben bomew ba bo Tayatila bò baa leeme fô wvuwwun n'yεeyi le, yaa yεeyi ten fiεε fi bonyii bomew teηe λε mwεem mvu Satan e mvu ê kenyle le, nu ε me ε ηgay λε κε è nulo é me embvuu engeε lo bvujite bvumew yî yene le κε.

25 Fí nu κε λε, ben ejicì fiεε fi ben κηκη wase le temyi, egen ebuy no me nu ηke ento.

²⁶Wee wvù ε ke ε so, wvù gee lemme dì me ηkooηke ε gen ε mese, nu ε me nu ηke enya wvù mvuηgay é wvù enu ewe jo bitum.

²⁷Ke leηleη no Icem nu ε nya mvuηgay ê me, nu ε me nu ηke enya mvuηgay é wvù esaake bí bô ketooome ke ketfu le, bvooke bí dvú ke diewe nsháan mbom yi bó ε bvuw binsew e binsew e.

²⁸Me nu ηke enya ten wvù bô jon yi law e.

²⁹Wee wvù keηke bitem, ε wvù yuw fiεε fi Keyoy ke Nyo' le jemyi ê bintaashe bi bonyii bo mbee le.”

Mwm 3

Ntum Jisos wvù gne fô kentaashe ke bonyii bo mbee le ke Saldis e

¹ε wee wvù me n'yeneε wvudvu bvuu gay ê me le, “Saηe ηwa' fô nceendaa Nyo' wvù è nu wvu kentaashe ke bonyii bo mbee le ke Saldis e le, ‘Wvun nu njeme wvu wvuwe wvù keηke biyoy bi Nyo' le bi bisooshwiyy noo jón yi yisooshwiyy: Me ηkee gee dinen. Ben yen'yi fô bonyii le le ben bæ boyuum geenen ε ben ε kpweken wase.

²Ben ekamse, ebise mvuηgay yî fiεε fi sheke nu wase ten diuw kpwe le. Ben ekeè le me mbaa n'yen ε gee dinen jee gene mese ê Nyo' wem ejise ke.

³Ben ekume fiεε fi ben to fiisenεε fi è nu fi ben to yuwεε. Ben ejicì fifie le, ekumen mvuntelem mvunen. É ben baa ekamse, tu me nu ηke ene ento fô ben e diewe cooη e, ε ben yaa kee kefew kedvu ke.

⁴Geenen, ben keηke ke bonyii bomew caan Saldis bô baa lom ndvú yibo ke. Boba nu ke elene bee bó ε bó ε tfume ndvú yi baa, njefo è nu bonyii ε bó ε kocen.

⁵Wee wvù ε ke ε so nu ε wvù nu ke ejise ten ndvú yi baa. Ke wvuwe wee nu ε me nu ηke enfiwse diee diew ê ηwa' bonyii bô keηke nshii wvù mey lo le ke. Me nu ηke enjeme bô diuw wem ekume wvù fwe dvu Icem bô bonceendaa bew le me ηkee wvù.

⁶Wee wvù keηke bitem ε wvù yuw fiεε fi Keyoy ke Nyo' le jemyi ê bintaashe bi bonyii bo mbee le.”

Ntum Jisos wvù gne fô kentaashe ke bonyii bo mbee le ke Filadelfia le

⁷ε wee wvudvu bvuu gay ê me le, “Saηe ηwa' fô nceendaa Nyo' wvù è nu wvu kentaashe ke bonyii bo mbee le ke Filadelfia le le, ‘Wvun nu njeme wvu wvuwe wvù yuule bvuu nu wee keceey. È nu wvù wvù keηke ken'yene ke bvunfon bu Dawe le. Wvù ke yen'yi, wee saa nu dvú wvù efen ke, é wvù ke efen, wee saa nu dvú wvù eyene ke:

⁸Me ηkee gee dinen. Ben eyeke eyuw, me nu ε n'yene kembuη fô ben e ε ηγεε keye, ε wee yaa nu dvú wvù nulo efaa ke. Me ηkee lo le ke ben keηke mvungay ntay ke, geenen ε ben gæele ke ηjeme wem. Ben baa tun me ke.

⁹Ben eyeke eyuw, bonyii ba bò nu ηgoo Satan e bò duu le bowen nu Bojuu ε bó mbiayte lo, yaa nu ke Bojuu, nu ε me nu ηke eηge é bó eto egbwe bikaa binen e emum ekiεε le me ηkooηke ben.

¹⁰No ben nu ε gæe ηjeme wem ekume keekuule shém, nu ε me nu ηke eηgemgem ben kefew kè mmom nu ke etoo yî ekole ke nshε le keemom bonyii bocii bò nu yî nshε le.

¹¹Me ntoo wase nfew caan. Ben ejice fieε fi ben keηke le eteme, wvu le fo wee mvu ke efi kefo kenen ke bvunfon e.

¹²Wee wvù ε ke ε so nu ε me nu ηke eηge é wvú enù kfuy wvu yew ncese Nyo' wem e. E ke è nulo é wvú ke eyuu ebuy dvú ke. Me nu ηke ensaη diee di Nyo' wem e yî ye le bô diee di kelaante ke Nyo' wem e kè è nu Jelusalem wvu fwe wvù buyte fô Nyo' wem e fowe. Me nu ηke ensaη ten diee diem di dife yî ye le.

¹³Wee wvù keηke bitem ε wvú yuw fieε fi Keyoy ke Nyo' le jemyi ê bintaashe bi bonyii bo mbee le.”

Ntum Jisos wvù gæne fô kentaashe ke bonyii bo mbee le ke Lawdεsia le

¹⁴E wvú bvuu gay ê me le, “Saηe ηwa' fô nceendaa Nyo' wvù è nu wvu kentaashe ke bonyii bo mbee le ke Lawdεsia le le, ‘Wvun nu ηjeme wvu wvuwe wvù diee diew nu, Fí enù nonen. È nu wvú wvuwe wvù ké no leeme yî diew ye le, ε è nu wvú wvù seηe keceey ekume Nyo'. È nu wvú keηkewce ke fieε ficii fi Nyo' to bomεε le:

¹⁵Me ηkee gee dinen. Ben nu ke lo! Ke ben læε, ke ben yvuwse. Me nshieele le ben bee keeleε lo kenεε yvuwse lo!

¹⁶Nonen, no ben nu ke lo finen enteleη yaa læε kenεε yvuwse, me nu ηke encuy ben ê me emvu.

¹⁷Ben duu le ben nu bonyii bo kpaw e ε ben ε kuken wase yaa bvuu shieele fieε ke. Ben gayte nonen yaa yene le finen nu ε fí ε fo lo? Ben nu bonyii bò shen ekoole bonyii dvú, bô bonyii bo kefufe le, bvuu nu binfefe noo bonyii bò lene binyi bincimte!

¹⁸Me ηgomte keentefe ben le ben eguy ketwaa ke bigew e kè yeεle ê me kè bó nu ε ton ê lam kí ε no yuule, é ben emum enu bonyii bo kpaw e. Ben eguy ndvú yî baa yî ben ebaη bincimte binen dvú, fo bonyii eyene bí le ε ben wuumene. Ben eguy ten efuwe ke ejise le ê me, eyefe ejise eyene dvú, emum eyene mwæm e.

¹⁹Bonyii bò me ηkooηke nu ε me ηké nsaw bó yî gee dibole, nya ηgew ê bó keentefe bó. Nonen, ben eduηce shiee ekumen mvuntelem mvunen.

²⁰ Ben eyeke eyuw, me nleeme ê yew fwese ñkumci. Ê wee yuw lo diew yem e yene kembuñ, é me enley ento ê wvú le é bee wvú ediekene fiee fimwaan.

²¹ Wee wvù e ke e so nu e me nu ñke enya wvú bvudvuu é wvú eshii bee wvú yî kawla wem e ke no me nto nsoe nshii bee Icem yî kawla we le.

²² Wee wvù keñke bitem e wvú yuw fiee fi Keyoy ke Nyo' le jemyi ê bintaashe bi bonyii bo mbee le.”

Mwm 4

È Jon yen e bó nyaa mbense ê Nyo' fowe

¹ Ejim jo mwëem mwë, e me mbvuu ntaa, ne n'yen kembuñ e fowe e kí nu keye. È diew ye yî me mbe n'yaw wase e n'yuw e yî jemyi ê me diewe soñ e, bvuu gay ê me le, “Bence eto fen é me enduñce mwëem mvù keñke keekooy ejim jo kefew kin ê wo.”

² Kañ mwaan, e me ne no nu can Keyoy ke Nyo' le, mum n'yen kawla le e wvú nu fowe, e wee e shii yî dvú le.

³ Wee wvudvu to lawkene diewe kfuu eta yomew yò lumte yò bó teje le jasba noo yò bó teje le kanelia, e kela e daa e keeke kawla wvudvu lawkene ten diewe te di bó teje le emelaal e.

⁴ Bokawla bomew mbaanfiee ncow bonew to nu e keeke kawla wvudvu, e bocé' bo bonyii le bomew e shiiyen yî dvú le mbaanfiee ncow bonew e bó e jise ndvú yî baa, e bon bifo bi bvunfon e e bó kene bô ketwaa ke bigew e kè yeële.

⁵ Jañ yî lawkene to buyte yî kawla we le, baykene, dvûmte, e bin'yeese bæenci fwe dvu kawla wvudvu bisooshwi yî è nu biyoy bi Nyo' le bi bisooshwi y.

⁶ Fiee fimew to nu ten fwe dvu kawla wvudvu fieesene joo yi baay mi yî yuule naa nen sakasaka diewe kenleey e. Mwëem mvu mvuyuum mvumew mvunem to nu e leem keeke kawla wvudvu biba bicii e ejise e yinşen lo yî mvú le fwe bô ejim.

⁷ Fiee fi fiyuum fi fwe to fieesene bvule, e fi bii fó fieesene waa na' wvù diemşen, e fi bvuu bii fó keñke bvushiw diewe bvuu wee le, e fi ejim fieesene nfaanduñ fò wvú bile.

⁸ Mwëem mvu mvuyuum mvu mvunem mvudvu to keñke bibe bisoocaa bisoocaa, e mvú e yinşen lo bô ejise ewe bô ekuse. Mwëem mvudvu to ké no yemte entañ bô emvunsheey yaa luu ke. Mvú to ké no yemte le, “Nyo' yuule lo! Nyo' yuule lo! Nyo' yuule lo! È nu wvú Tata Nyo' wvù Keñke Mvunşay Mvunciim. È nu wvú wvù to nu wase, e è nu wvú wvù nu, e wvú nu ke eto.”

⁹ Mwëem mvu mvuyuum mvudvu to ké dioo tumte moñkum mo Nyo' le nyaa n'wvum bô keyoone ê wvú wvudvu wvù nu e shii yî kawla le wvù nu dvú sekecii se ñka,

10 Ɛ bocɛ' bo bonyii le bo mbaanfɛɛ ncow bonɛw ba mum gbwe gen fwe dvu wvù wvù nu ɛ shii yî kawla le, nya mbense wvu baay ê wvù wvuwe wvù nu dvù sekecii sɛ ŋka. Ê bó dɔo gee nonɛn mum no baayi bifo bibole bi bvunfon e, jiwse fwe dvu kawla yemte le,

11 “Wo wvù nu Tata, nu Nyo' wese, wo nu ɛ kocɛn wvù bó etumte moŋkum muw, nyaa n'wvum ê wo, bense mvunɔay mwuw, njefo è to bom wo mwɛɛm mvunciim, ɛ è to koŋ wo sɛ bom mvù, mvù ɛ no nu dvù.”

Mwm 5

Waa Njee nu ɛ kocɛn keebacɛ bilay bi bisooshwiw

1 Ɛ me mbvuu nɛ n'yɛn ŋwa' mvu le ê ɛbo ke ɛcɛɛy ke wee wvù to shilɛɛ yî kawla wɛ le, ɛ bó ɛ saŋ ente bô ɛkfuŋ ɛ kɛwe lo, ɛ lace mondvuum mosooshwiw bô kelay.

2 Ɛ me nɛ n'yɛn tɛn nceendaa Nyo' mvu wvù tɛmyi le ɛ wvù wamte fowɛɛwe biite le, “È nu yɛɛ dvù wvù nu ɛ kocɛn keebacɛ bilay bin, efay ŋwa' wvun?”

3 Ɛ wee faŋɛ yaa nu dvù fowe kɛnɛɛ yî nshɛ le kɛnɛɛ ɛkuse jo nshɛ, wvù nulo efay ŋwa' wvudvu kɛnɛɛ etaa ente jo ŋwa' wvudvu kɛ.

4 Ɛ me mbee kpwe baay le wee to baa nu dvù wvù nu ɛ kocɛn wvù nulo eyene ŋwa' wvudvu kɛnɛɛ taa ente jodvu kɛ.

5 Ɛ wee mvu ŋgoo bocɛ' bo bonyii le ba gay ê me le, “Fo wo ebeelè kɛ. Yekɛ eyuw, wee wvù bó teŋɛ le Bvule wvu ê kfu di Juda le bvuu teŋɛ tɛn le Biay yî san ê kfu di Nfon Dawe le nu ɛ so wase, ɛ è nu wvù wvù nulo ebacɛ bilay bi bisooshwiw bidvu efay ŋwa' wvudvu.”

6 Ɛ me nɛ n'yɛn Waa Njee le ɛ wvù leeme ɛntelɛŋ jo kawla bô mwɛɛm mvu mvuyuum mvu mvunɛm mwɛ noo bocɛ' bo bonyii le ba, ɛ wvù nu kɛ diɛwɛ bó nu ɛ sɛɛ. Wvù to kɛŋke bitoŋ bisooshwiw bô ɛjise ɛsooshwiw. Ɛjise yodvu nu biyoy bi Nyo' le bi bisooshwiw bi wvù nu ɛ tum bí ɛ buy ɛ gen yî ɛkolɛ ke nshɛ le kecii.

7 Ɛ Waa Njee wvudvu mum gen fi ŋwa' wɛ ê ɛbo ke ɛcɛɛy ke wee wɛ wvù to nu ɛ shii yî kawla le.

8 No wvù fi ŋwa' wvudvu nonɛn, ɛ mwɛɛm mvu mvuyuum mvu mvunɛm mwɛ bô bocɛ' bo bonyii le bo mbaanfɛɛ ncow bonɛw ba mum gbwe gen fokuse fwe dvu Waa Njee wvudvu. Wee mwaan mwaan bó le to kɛŋke kome bô kentee kè bó fe bô ketwaa ke bigew e kè yɛɛle, ɛ jiin nu ɛ dí ɛ yinɛn jó. Ɛ jiin din nu bunle yi bonyii bô è nu bo Nyo' le.

9 Ɛ mwɛɛm mwɛ bô bocɛ' bo bonyii le ba mum yem ŋkieɛ mvu wvu fwe ɛ wvù jemyi le, “È nu wo wvù nu ɛ kocɛn keefi ŋwa' wvudvu ebacɛ bilay bidvu, njefo bó to nu ɛ sɛɛ wo ɛ ɛlɛmɛ kuw sum bonyii can kebefɛ le nya bó ê Nyo'. Ɛ bonyii ban buy ê dikfu le dicii, díɛw yicii, dikfu di bonyii le dicii noo bitum e bicii.

¹⁰ Wo nu ε nya bó bvunfon ε ge bó ε no nu bocee ncese bo Nyo' wesebeene le. Ε bó nu ke esaake yî nshe le.”

¹¹ Ε me ndioo mbvuu ntaale, ne n'yuw diew bonceendaa bo Nyo' le ε bó nu lo bontfuke le bontfuke le bô bomala le bomala le. Bó to nu ε leemen keekeε kawla bô mwεem mvu mvuyuum mwε noo boce' ba.

¹² Bó to yemte foweεwe gayte le, “Waa Njee wvù bó to selee, è nu wvù wvù nu ε kocen keekeηke mvuηgay bô kpaw noo bvufee bvυ baay noo diee di kuuke noo n'wvum noo bvukuke noo mbense.”

¹³ Ε me ne n'yuw ε mwεem mvunciim mvù Nyo' to bomεε mvù nu fowe noo yî nshe le noo ekuse jo nshe noo ê joo yi baay e, naa mwεem mvunciim mvù nu mondvuum man e, ε mvù yemte le, “Mbense bô n'wvum noo bvukuke noo mvuηgay nu ε è keηke wvù wvuwe wvù nu ε shii yî kawla le noo Waa Njee wvun sekecii se ηka!”

¹⁴ No mvù yem nonen, ε mwεem mvu mvuyuum mvu mvunem mwε bee le, “Fí enù nonen!” Ε boce' bo bonyii le ba gbwe gen fokuse nya mbense wvu baay.

Mwm 6

Ε Waa Njee bacε bilay bi bisooshwiγ

¹ Ε me no ntaale no Waa Njee we to bayte kelay ke fwe ente jo bilay bi bisooshwiγ bie, ne n'yuw ε fiεε fimew ηgoo mwεem mvu mvuyuum mwε le jeme bô diew ke diewe ε bay jaη, gay le, “To!”

² Le me ntaa, ne n'yen nyambala mi yî baa le ε wee ε ben yî dvù le, keηke kenew. Ε bó mum bon kefo ke bvunfon e ê wvù efa, ε wvù buy, gen no diuu soo.

³ Ε Waa Njee ke bay kelay ke bokaη bofεε, ε me n'yuw ε fiεε fi bokaη bofεε ηgoo mwεem mvu mvuyuum mwε le gay le, “To!”

⁴ Ε nyambala mi buy ε yí yeεle nen ghaηη, ε bó mum nya nyo jem mi yi baay ê wee wvù to benεε yî dvù le, nya wvù bô mvuηgay keecake nyεkeey yî ekole ke nshe le kecii wvu le bonyii eyuwyi bomew.

⁵ Ε Waa Njee ke bay kelay ke bokaη botεte, ε me n'yuw ε fiεε fi bokaη botεte ηgoo mwεem mvu mvuyuum mwε le gay le, “To!” Le me ntaa, ne n'yen nyambala mi yî yiile le, ε wee ε ben yî dvù le keηke nfew wvù bó feeke mwεem yî dvù le ê wvù εbo.

⁶ Ε me ne n'yuw ke diewe diew mi jemyi enteleη jo mwεem mvu mvuyuum mvu mvunem mwε gayte le, “Wee nu ke ejo nlawma wvu yî diuu le dicile se guy fiηkone fi εgiη e dvù, kenεε ejo nlawma wvu yî diuu le dicile se guy mvuηkone mvu εse le dvù mvuntentem. Geenεn fo wo eshiw mεem bô mbvuum ke!”

⁷ Ε Waa Njee ke bay kelay ke bokaη bonew, ε me n'yuw diew fiεε fi bokaη bonew ηgoo mwεem mvu mvuyuum mwε le ε yî gay le, “To!”

⁸ Le me ntaa, ne n'yen nyambala mi le e yi yayse lo, e diee di wee wvù ben yi dvù le nu le Kpwe. E wvumvu wee bii ejim e diee nu Wonḡonḡkfu. E bó nya bó bô mvuḡgay le bó ejo bonyii bo yi keba ke nshē le kemwaan ente jo binew, elese bonyii bodvu bô nyó jem noo jeḡ noo kenfim noo nyám yi ḡkpwaante.

⁹ E Waa Njee ke bay kelay ke bokaḡ botin, e me n'yen biyoy bi bonyii le ekuse jo ketaḡ ke ncese le. E biyoy bin nu bi bonyii bô bó to yuwyee bó nje diew Nyo' bô fiē fi bó to jemyi leeme yi dvù le.

¹⁰ E bí wamte foweewe le, “O Tata Nyo' wvù nu Ewe jo Mwem Mvunciim, wo wvù yuule, nu kecey. Wo nu ke ecey egen ebuy nee se sumten nsaw wese etfuse envuke yi bonyii bô to yuwyee bese le bô nu yi ekole ke nshē le?”

¹¹ E bó mum nya ndvù yi baa ê wee mwaan mwaan bó le, gay le bó ebvuu emoocē caan, egen ebuy no bó nu ke emese eyuwyē boom bo bwee bó le bô nu ten bonyii bo lemme le bo Nyo' le bô bó to nu keeke eyuwyē ke no bó to yuwyee bó.

¹² E Waa Njee ke bay kelay ke bokaḡ bosooaan, e me ntaa ne n'yen e nshē shiw bô mvuḡgay, e diuu baḡke no yiile nen tibtibtib diewe ndvu kembamkpwe le, e kpwee wvù tfule baḡke no yeēle nen buḡ diewe eleme le.

¹³ E jón nen'yi fowe gbwekene fokuse diewe mvuntam mvù bēe ndecindēci e nffum fele kale le.

¹⁴ E ebule ne kewe diewe kemba ke ḡwa' le mum la lo. E dikum dicii bô bindvuy bicii ja fô mvù to nu.

¹⁵ E bonfon bo yi nshē le noo bonyii bo baay baay bocii noo bikuu bi bonyii bo nci le bi baay baay noo bonyii bo kpaw e noo bontememvuḡgay naa noo bonyii bocii kenēe bonfaw kenēe bô yaa nu ke bonfaw, mum no nyiimene ê ditfum e noo ê bimbaan e kuse yi dikum e.

¹⁶ E bó nyiimene nonen, fuuḡke ê dikum bô bimbaan gayte le, “Ben egbweken yi yese le, ebaḡye bese fo wee we wvù nu e shii yi kawla le eyene bese le bô fo Waa Njee eduḡce shém ye yi ffuuke yi yese le.

¹⁷ Diuu di bó nu eduḡce shém yibo yi ffuuke nu e to wase e kocen, e ke wee yaa nu dvù wvù nulo eleem ê bó fwe ke.”

Mwm 7

E bó ge bonciise yi bonyii bo Islael e bontfuke gbwee kecow mbaanyē ncow bonew e (144,000)

¹ Ejim jodvu, e me n'yen bonceendaa bo Nyo' le bonew e bó leemene ebw e won yo ena le, baḡke fwefwe wvù buyte ebw yodvu le fo wvù efele yi nshē le kenēe yi joo yi baay e, naa noo yi bite le.

² E me mbvuu n'yen nceendaa Nyo' mvu le, e wvù buyte jò diuu sane, keḡke fiē fi Nyo' wvù keḡke nshii le fi wvù ciise bonyii bew dvù ebo. E wvù mum tee

bonceendaa bo Nyo' le bo bonɛw ba bô diew yî tɛmyi. Bonceendaa ban nu bô bó to nyae mvuŋgay ê bó, ɛ bó ebefe bô nshɛ noo joo yi baay.

³ ɛ wvú tee gay ɛ, “Fo ben ebefe bô nshɛ kɛnɛɛ joo yi baay kɛnɛɛ bite sɛ bese ɛ ge bonciise yî monshim mo bonyii bo lemme le bo Nyo' wese le kɛ.”

⁴ ɛ me n'yuw ɛ bonyii bô bó to ciisɛɛ nu bontfuke gbwee kecow mbaanyɛ ncow bonɛw (144,000), ɛ bó buy ê dikfuu di Islael e dicii.

⁵ Bó to nu ɛ ciise bonyii ê kfuu di Juda le, bontfuke ncow bofɛɛ yuufe le, ê kfuu di Leuben e, bontfuke ncow bofɛɛ yuufe le, ê kfuu di Gad e, bontfuke ncow bofɛɛ yuufe le,

⁶ ê kfuu di Ashel e, bontfuke ncow bofɛɛ yuufe le, ê kfuu di Naftali le, bontfuke ncow bofɛɛ yuufe le, ê kfuu di Manase le, bontfuke ncow bofɛɛ yuufe le,

⁷ ê kfuu di Semeon e, bontfuke ncow bofɛɛ yuufe le, ê kfuu di Lɛwe le, bontfuke ncow bofɛɛ yuufe le, ê kfuu di Isaka le, bontfuke ncow bofɛɛ yuufe le,

⁸ ê kfuu di Sɛbulun e, bontfuke ncow bofɛɛ yuufe le, ê kfuu di Yosɛw e, bontfuke ncow bofɛɛ yuufe le, ê kfuu di Benjamen e, ɛ bó ciise bontfuke ncow bofɛɛ yuufe le.

Kebombom ke bonyii le ɛ kí nu nɛn mamamama

⁹ Ejim jodvu, ɛ me ntaa nɛ n'yɛn kebombom ke bonyii le nɛn mamamama ɛ wee yaa nulo etaŋ kɛ. ɛ bó buy bitum e bicii, bô dikfuu le dicii noo bonyii bocii bô díɛw yicii, ɛ bó leeme fwe dvu kawla noo Waa Njee, ɛ bó ɛ jise ndvú yî baa kɛŋke bidaayɛɛ can yibole.

¹⁰ Bó to wvuuyi foweɛwe gayte le, “Mboyma nɛn'yi ɛ è nu fô Nyo' wese wvù nu ɛ shii yî kawla le noo fô Waa Njee le.”

¹¹ ɛ bonceendaa bo Nyo' le bocii leem gem kɛɛkɛɛ kawla bô bocɛ' bo bonyii le ba noo mwɛɛm mvu mvuyuum mvu mvunɛm mwɛ, no gbwee tumte monshim fokuse fwe dvu kawla, nyaa mbense wvu baay ê Nyo'.

¹² Bó to gee nonɛn, gayte le, “Fí enù nonɛn! Mbense bô bvukukɛ noo bvufɛɛ bvɛ baay nu ɛ è kɛŋke Nyo' wese. Beene enyaà keyoone ê wvú. È kɛŋke wvú n'wvum bô mvuŋgay, ɛ wvú tɛmyi sekecii sɛ ŋka! Fí enù nonɛn.”

¹³ ɛ ɛɛ' mvu bocɛ' ba le, bife ê me le, “Ban nu baa bô nu ɛ jise ndvú yî baa? Bó buy fɛɛ?”

¹⁴ ɛ me ntfuse ê wvú le, “Cee ɛkolɛ, è kee kɛ wo.” ɛ wvú gay ê me le, “Ban nu bonyii bô boy yî kefew ke ŋɛw wvu baay e. Bó nu ɛ cukɛ ndvú yibo ê ɛlɛmɛ ke Waa Njee le, yí ɛ no baa,

¹⁵ bó ɛ mum ɛ no nu fwe dvu kawla Nyo', lemte wvú le ɛntaŋ bô ɛmvunsheɛŋ yew ye ncese le. Wvú wvudvu wvù nu ɛ shii yî kawla le nu ke enu bô bó nu kebaw kebole.

16Ke jen bæe ke eyuu bó ke, ε ke kendoŋ bæe ke eyumte naa lo bó ke. Ke mvum bæe ke esuuŋke bó, ε ke keŋkfum bæe ke eyvuuke bó ke.

17 Fí nu ke enu nonen, njefo Waa Njee wvù nu enteleŋ jo kawla nu ke eceyte bó diewe nceynjee le, joo bó gene bô bó fô joo yì nyaa nshii nu le. E Nyo' ten nu ke esho misem yicii ejise ebole.”

Mwm 8

ε Waa Njee bay kelay ke ejim

1 E Waa Njee ke bay kelay ke bokaŋ bosooshwiyy yì ŋwa' we le, ε mondvuum cife fowe nen ndvumm gen buy keŋgawten ke ntam kefew e.

2 E me mum n'yen bonceendaa bo Nyo' le bo bosooshwiyy bô ké no leeme ê Nyo' fwe. E bó nya disoŋ disooshwiyy ê bó.

3 E nceendaa Nyo' wvumvu ne to leem fô ketaŋ ke ncese le keŋke kelaŋ kè bó tone jiin jó, ε bó kene bô ketwaa ke bigew e kè yeεle. E bó nya jiin ê wvú ε dí duule keetaashe yì ketaŋ ke ncese le bô bunle yi bonyii bô è nu bo Nyo' le. E ketaŋ kedvu nu ε bó ε kene bô ketwaa ke bigew kè yeεle, ε kí nu fwe dvu kawla.

4 E wvú ton, ε njiim jiin didvu bô bunle yi bonyii bô è nu bo Nyo' le buy ebo jo wvú ben gen fwe dvu Nyo'.

5 E nceendaa Nyo' wvudvu mum ne jo kelaŋ kè bó tone jiin jó kie, jo ŋguy fô ketaŋ ke ncese le, gεε jó ε wvú yiŋsen, ε wvú mum laŋ yì nshe le. No wvú laŋ nonen, ε jaŋ no lawkene, baykene, dvûmte, ε nshe shiike.

ε bonceendaa bo Nyo' le kew toŋ disoŋ dinew

6 E bonceendaa bo Nyo' le bo bosooshwiyy bô to keŋke disoŋ di disooshwiyy die mum seyse ye keetoŋ disoŋ didvu.

7 E nceendaa Nyo' wvu fwe toŋ ye soŋ, ε ebew bô ŋguy ε bó ε fiysen bô eleme tfuwe yì nshe le. E keba ke nshe le kemwaaŋ ente jo biba bitete fie, ε keba kemwaaŋ ente jo biba bitete bi bite le fie, ε egay yò tæeke ecii fie ten.

8 E nceendaa Nyo' wvu bokaŋ bofæe toŋ ye soŋ, ε bó tfume fiεε fimew ε ŋguy bæenci yì dvú le, ε fí nu diewe kum wvu baay e. E fí gbwe ê joo yi baay e. E keba kemwaaŋ ente jo biba bitete bi joo yi baay e ne tu eleme.

9 E keba kemwaaŋ ente jo bitete bi mwæem mvu mvuyuum e mvù nu ê joo yi baay e kpweken. E keba kemwaaŋ ente jo biba bitete bi boŋguw bo ê joo le sawye.

10 E nceendaa Nyo' wvu bokaŋ botete toŋ ye soŋ, ε jon mi yi baay ne fowe bæenci diewe ken'yeese le, gbwe baŋ keba kemwaaŋ ente jo bitete bi jóo yì booke le bô mondvuum mò jóo ké no buyte mó le.

11 Diee di jon yidvu le nu le Ncewcew. No yí gbwe nonen, ε keba kemwaan̄ ente jo biba bitete bi jóo le no cewcewe. Ε bonyii nteen kpweken nje jóo yidvu yì bó to wuu, njefo jon yidvu to nu ε ge wase ε jóo yidvu no cewcewe lo.

12 Ε nceendaa Nyo' wvu bokañ bonew toñ ye soñ, ε fiεε fimew bvuw diuu keba kemwaan̄ ente jo biba bitete bô keba kemwaan̄ ke kpwee le ente jo bitete. Ε fí bvuw ten jón keba kemwaan̄ ente jo bitete. Ε biba bibole kemwaan̄ kemwaan̄ no jiime. Ε n'yuu fañe yaa bvuu nu dvú ê keba kemwaan̄ e ente jo biba bitete ke emvunsheer̄ noo ke entañ e ke.

13 Ε me no ntaale, ne n'yuw ε nfaanduñ fuun̄ke foweεwe no wvú to bile entelen̄ jo ebule gayte le, “Ngew εεy, ηγεy εεy, ηgew nu ke enu fô bonyii bô nu yí ekole ke nshε le seke bó ε toñ disoñ ò shεke ò bonceendaa bo botete nu wase keeton̄ e.”

Mwm 9

Ε bó toñ soñ yi bokañ botin

1 Ε nceendaa Nyo' wvu bokañ botin toñ ye soñ, ε me n'yen jon mi le ε yí to ne fowe gbwe fokuse. Ε bó nya ken'yene ê jon yidvu kè yen'yi kentuke kè shiile nen ηooññ e.

2 Ε jon yidvu mum yene diuw kentuke kedvu, ε njiim buy jó nen kemm, ke yí buy ê mwεem e fò bó ε kfum. Ε njiim yì buyεε ê kentuke kedvu le ge ε diuu bô ebule ne no yiile lo.

3 Ε cúma buy ê njiim yidvu le shii yí nshε le. Ε bó nya cúma yidvu bô mvun̄gay le yí etawene diewe bon̄gam bo yí nshε le,

4 lew le fo yí ebefe bô mwεem mvù kuu yí nshε le, kenεε è nu egay, kenεε bite, kenεε naa la, gay le yí enya ηgew ε è nu ke ê kfuu bonyii ba bô nu se bó ken̄ke nciise wvu Nyo' fojise fo bó.

5 Bó to nu ε cine le cúma yidvu enya ηgew ê bonyii yí kee le yitin. Geen̄en fo yí eyuwye lo bó ke. Ngew wvù yí to nu keeke enyaa to nu ke diewe wvu ηgam seke wvú ε ta wee le.

6 Yí kee yi yitin yin e nu ε bonyii nu ke egomte kpwe yaa yene yí le ke. Bó nu ke ebeele keekpwe, ε kpwe lewte lo bó.

7 Cúma yin to nu ke diewe nyámbala yì nu ε seyse wase keebuy gbwen jem e. Mwεem mvumew to nu ê yí εfa diewe bifo bi bvunfon e bì bó kene bô ketwaa ke bigew e kè yεele, ε monshim mobole nu diewe mo bonyii le.

8 Yvúw bikuu bibole to nu diewe yi bokene, ε bigew bibole no diewe bigew bi bobvule le.

9 Yí to ken̄ke ηgáw ε yí nu diewe ketwaa kè bonyii bo jem e bañyi gvúw dvú. É yí dioo bile ε bibε bibole no yole diewe bikoto nteen bì è guute nyámbala seke bí lewte gbwen jem e.

¹⁰Ɛ yí kɛŋke diwvunte bô gɛɛŋ diɛwɛ boŋgam e. Ɛ mvuŋgay mvubole mvù bó nyaá ñɛw dvú ê bonyii yí kee yi yitin e nu ɛ è nu yí diwvunte din e.

¹¹Bó to kɛŋke nfon wvubo ɛ è nu nceendaa wvù taale fô kentuke kè shiile nen ŋooŋ e kie, ɛ diee diew nu ê díew Ibulu le le Abadon, nu ê díew Glek e le, Abolion (ɛ diee din nu le wee wvù beete lo).

¹²Wvun wvù fey bæ ɛw wvu fwe. Geenɛn ben eyeke eyuw, bomew boŋɛw bæ bii ejim bofɛɛ.

Ɛ bó toŋ soŋ yi bokaŋ bosooaan

¹³Ɛ nceendaa Nyo' wvu bokaŋ bosooaan toŋ ye soŋ, ɛ me n'yuw ɛ diew buy fô bitoŋ bi binɛw bì è nu bi ketaŋ ke ncese le kè bó kene bô ketwaa ke bigew e kè yɛɛle, kè nu fwe dvu Nyo',

¹⁴jemyi ê nceendaa Nyo' wvu bokaŋ bosooaan wvù to kɛŋke soŋ wɛ le, “Faye bonceendaa bo bonɛw bô bó nu ɛ kay mbew joo yí kuuke yí Yuflets e.”

¹⁵Nonɛn, ɛ nceendaa Nyo' wvudvu mum fay bonceendaa bo bonɛw bodvu. Bonceendaa bodvu nu ɛ bó to seyse gɛɛ no cɛyte kefew bô diuu noo kpwee bô kelum kè bó nu ke efay bó, é bó eyuwye keba kemwaaŋ ente jo bitete bi bonyii le.

¹⁶Me nto nu ɛ n'yuw no ŋoo bonyii bo jem e bo yí nyámbala le nu. Bó to nu bomala gee fɛɛ (200,000,000).

¹⁷Nyámbala yí me nto n'yɛnɛɛ ê fieɛ diɛwɛ ɛfile le fie bô bonyii bô to benɛɛ yí dvú le to nu ê yin je le: bonyii bodvu to nu ɛ jise bitwaa baŋ gvúw dvú ɛ ncom wvudvu yɛɛle diɛwɛ ŋguy e, bvuu nu diɛwɛ ɛbulɛ le, bvuu nu tɛn diɛwɛ fiŋɛŋɛ le. Bikuu bi nyámbala yidvu le to fieesene bi bobvule le, ɛ ŋguy bô njiim noo fieɛ fimew diɛwɛ mvuŋkaŋ mvù bæenci le, buyte ê yí ɛmvu.

¹⁸Mwɛɛm mvu boŋɛw e mvun mvù è to nu, ŋguy bô njiim noo fieɛ diɛwɛ mvuŋkaŋ mvù bæenci le, mvù to buyte ê nyámbala yidvu ɛmvu to nu ɛ yu bonyii keba kemwaaŋ ente jo bitete.

¹⁹Mvuŋgay mvu nyámbala yidvu le nu ɛ è nu ɛmvu jo yí bô yí diwvunte diyile. Diwvunte diyile nu diɛwɛ yó le kɛŋke bikuu, ɛ è nu fieɛ fi yí lɛmse bonyii dvú.

²⁰Naa no fí to kooyɛɛ nonɛn, kebese ke bonyii le kè mwɛɛm mvu boŋɛw e mvun to baa yuwye bó, to baa cim ekumen mvuntelem mvubole yí mwɛɛm mvù bó to gee bô can yibole kɛ. Bó to baa kumen keebunlee bonceendaa bo dɛwle le bô mvumooso kɛnɛɛ è nu mvù bó kene bô ketwaa ke bigew e kè yɛɛle kɛnɛɛ kè baa kɛnɛɛ bô ketfu kè nɛɛ, kɛnɛɛ ɛta, kɛnɛɛ kete. Ɛ mvumooso mvun nu sɛ mvú nulo eyɛn fieɛ le kɛnɛɛ eyuw kɛnɛɛ elɛn.

²¹Bó to baa cim kumen tɛn mvuntelem keeyuwyi bonyii kɛnɛɛ keegeɛ nfim kɛnɛɛ cee nce nnyɛn kenjaŋ kɛnɛɛ coŋene kɛ.

Mwm 10

Nceendaa Nyo' wvù to kɛɲke fiŋwa' ε bó ε yene

- ¹ Ε me mbvuu n'yen nceendaa Nyo' wvumvu wvù tɛmyi le ε wvù shiile too fowe, ε kembew ε sùm wvù diɛwɛ ndvu le, ε kela ε daa εwe jo ekole kew. Bvushiw bwew to nu diɛwɛ diuu le, ε bikaa biew nu diɛwɛ leme di ηguy e fò dí bene.
- ² Wvù to kɛɲke fiŋwa' fimew ê wvù εbo ε bó ε yene. Ε wvù shii tome ekale kew ke εεεy yî joo yi baay e, tome ke ηŋkoŋko yî nshɛ le.
- ³ No wvù tome nonɛn, fuŋ foweɛwe diɛwɛ bvule fò wvù wamte le. No wvù fuŋɛ nonɛn, ε jaŋ yî ké no baykene bokaŋ bosooshwi y mum jeme.
- ⁴ No jaŋ yî ké no baykene bokaŋ bosooshwi yidvu jeme nonɛn, ε me mum no ηgomte keensaŋ fiɛɛ fi yî jeme, ε diɛw mi gay ê me fowe le, “Gɛɛɛ fiɛɛ fi jaŋ yî ké no baykene bokaŋ bosooshwi yin jeme εshem. Fo wo esaŋ ê ηwa' le kɛ.”
- ⁵ Ε nceendaa wvù me nto n'yenɛε ε wvù leeme yî joo yi baay e noo yî nshɛ le we cake kebo kew ke εεεy we,
- ⁶ kan ê dieɛ di wee wvuwe wvù nu dvù sekeciɛ se ηka le wvù è nu wvù wvù to bomɛɛ εbule bô mwɛɛm mvunciim mvù nu yî dvù le, noo nshɛ bô mwɛɛm mvunciim mvù nu yî dvù le, noo joo yi baay bô mwɛɛm mvunciim mvù nu jó. Ε wvù kan gay le, “Kɛ Nyo' bɛɛ edvuyte lo keɛge fiɛɛ fi wvù gomte kɛ!”
- ⁷ È nu ke enu εdiuw yò nceendaa Nyo' wvu bokaŋ bosooshwi nu ke etoŋ ye soŋ, é Nyo' ege é fiɛɛ fi wvù nyile eto ekocɛn no wvù to jemyɛɛ wase ê bonyii bew bo lemme le bô è nu bonyii bew bo ntum e.”
- ⁸ Ε diɛw yî me nto n'yuwɛɛ wase fowe ye bvuu jeme ê me le, “Gɛnɛ efi ηwa' wvù bó nu ε yene we εbo jo nceendaa Nyo' wɛ wvù leeme yî joo yi baay e bô yî nshɛ le.”
- ⁹ Ε me mum ηŋɛn fô nceendaa Nyo' wvudvu le ηgay le wvù enya fiŋwa' fidvu ê me. Ε wvù gay ê me le, “Ko edie. Wvù nu ke edioo ε bow ê wo εshem ecewcewe lo. Geenɛn, ε wvù nu ke eyeke ê wo εmvu diɛwɛ bvutuw e.”
- ¹⁰ Ε me mum nfi fiŋwa' fidvu εbo jo nceendaa Nyo' wvudvu, ndie. No me nto ndieɛ, ε wvù no yeke ê me εmvu diɛwɛ bvutuw e. Geenɛn seke wvù to bowɛɛ wase εshem no cewcewe lo.
- ¹¹ No me ndieɛ, ε bó mum gay ê me le, “Wo kɛɲke keebvuu etefe ntum Nyo' ê bonyii. Ntum wvun nu ekume dikfuu di bonyii le bô bitum noo bonyii bô jemyi dikfuu di díɛw e noo bonfon.”

Mwm 11

Bonyii bo ntum Nyo' le bo bofɛɛ

- ¹ Ε bó mum nɛ nya nfew ê me ε wvù nu diɛwɛ kemaŋ e, gay ê me le, “Gɛnɛ efew yew ncese Nyo' bô ketaŋ ke ncese le, etaŋ tɛn bonyii bô bunlee Nyo' dvù,

² geenen fo wo efew lakfulɛɛŋ yi ekfuŋ ke. Cine dvú njefo bó nu ɛ nya wase ê bonyii bò yaa nu ke Bojuu. Bó nu ke eben yî kelaante kè yuule le, envuwse kelaante kedvu yî kee le mbaanyɛ ncow fɛɛ.

³ Me nu ŋke enya mvuŋgay ê bonyii bem bo bofɛɛ bò jemyi ɛkumɛ me, é bó eteete ntum wɛm ê bonyii yî ɛdiuw e ntfuke bò gee fɛɛ kecow mbaŋsoocaaŋ e (1,260). Bó nu ke eteete ɛ bó ɛ jise bimbamkpwe.”

⁴ Bonyii bo bofɛɛ ban nu bite bi Olif e bi bifɛɛ noo mwɛɛm mvu mvunfɛɛm mvù bó tomyi bin'yeese yî dvú le mvù ké no leeme fwe dvu Tata wvù keŋke nshɛ.

⁵ É wee ke ene ɛ no gomte keege fiɛɛ fi befe bò bó, é ŋguy ebuy dew yibole efiese lo wee wvubo bvuban wvudvu. È nɛɛ no wee gomte keege fiɛɛ fi befe bò bó tu wvú keŋke keekpwe nonɛn.

⁶ Bó keŋke mvuŋgay mvù è nulo é bó ebaŋ ɛbulɛ le fo jaŋ ecem naa lo yî nshɛ le ɛdiuw yò bó nu eteete ntum Nyo' le. ɛ bó keŋke ten mvuŋgay mvù è nulo é bó ebaŋke jóo é yí etu ɛlɛmɛ noo mvuŋgay keelaŋ dikfuu di bimbim e yî nshɛ le naa seke la wvù bó shieele.

⁷ Bó nu ke edioo ɛ mɛse ɛ jeme fiɛɛ fi bó keŋke keejeme, é nyam yì bæmte yì buyte ê kentuke kie kè shiile nɛn ŋooŋŋ e, ebuy etum jem bò bó, eso bó, eyuwye bó,

⁸ é ɛgvun ɛbo emɛy ejiime ê je ê kelaante ke baay e. Kelaante kin nu kè bó teŋe ê díew yi mawɛɛn e le Sodom kɛnɛɛ le Ijiw, ɛ è nu jó jò bó to taɛ Tata wvubo yì kentam e.

⁹ Yì ɛdiuw e eta bò keŋgawten nu ɛ dikfuu di bonyii le, kɛnɛɛ è nu bo ntew wvù la le, kɛnɛɛ bò jemyi kfuu díew yì la, kɛnɛɛ bo bitum bì la le, nu ke etaale ɛgvun ɛbo no yó jiimene, etun le fo bó edwey bó ke.

¹⁰ Bonyii bò è nu bo yî woŋ wvun e nu ke elanlɛɛ laa è kpweɛ bonyii ban ɛ kpweken ɛ. Bó nu ke esakene lo, ɛ wee ciinse nnya ê wee, ɛ wee ciinse nnya ê wee. Bó nu ke egee nonɛn njefo bonyii bo ntum Nyo' le bo bofɛɛ ban nu ɛ to bò ŋgɛw wvu baay yì bonyii bò è nu bo yî woŋ e.

¹¹ ɛ fí ke kooy, ɛ ɛdiuw yo eta bò keŋgawten ɛyan ke fey, ɛ keyoy kè nyaa nshii ne fô Nyo' le, ley yì bó le, ɛ bó kase ja we. ɛ bonyii yɛn nonɛn, keŋke nfan baay.

¹² ɛ bonyii bo bofɛɛ bodvu mum yuw ɛ díew jeme we bò mvuŋgay gayte ê bó le, “Ben eben eto fɛn!” ɛ bó mum no bene gene we ê kembɛw e, ɛ bonyii bobole bo bvuban e taale.

¹³ Kɛ kefew kedvu le, ɛ nshɛ nɛ shiw bò mvuŋgay baay, ɛ keba kemwaaŋ ente jo yuufe jo kelaante kedvu bvuse. ɛ bonyii bontfuke bosooshwiɛ (7,000) kpweken no nshɛ yidvu to shiwɛɛ. ɛ kebɛse ke bonyii bò to shekɛɛ le, keŋke nfan baay, no tumte moŋkum mo Nyo' wvù nu we le.

14 Wvun wvù fey nu ñgɛw wvu bokaŋ bofɛɛ. Geenɛn ben eyekɛ eyuw, ñgɛw wvu bokaŋ botɛtɛ nu eto nfew caan.

Ɛ bó tonɔ son yi bokaŋ bosooshwiɔ

15 Ɛ nceendaa Nyo' wvu bokaŋ bosooshwiɔ ke tonɔ ye son, ɛ me n'yuw no díɛw jemyi bô mvunɔgay we gayte le, “Bvunfon bvú yí wɔŋ wvun e nu ɛ tu wase bvú Tata wesebeene bô Mboyse we wvù wvú to kawɛɛ le, ɛ wvú nu ke esaake sekeciɛ sɛ ŋka.”

16 Ɛ bocɛ' bo bonyii le bo mbaanfíɛɛ ncow bonɛw ba bô shiilɛɛ yí bokawla bobole fwe dvu Nyo' mum no gbwee tumte monshim mobole fokuse, nyaa mbense wvu baay ê Nyo'.

17 Ɛ bó no gee nonɛn, gayte le, “Bese nyaa keyoone ê wo, Tata Nyo' wvù Keŋke Mvunɔgay Mvunciim, wo nu keseen, ɛ wo to nu wase. Bese nyaa keyoone njefo wo nu ɛ jo wase mvunɔgay mvuw mvu baay ɛ kɛw ɛ no saake.

18 Bonyii bô yaa kee ke wo to ton'yi shém, ɛ kefew kè wo nu eduŋɔɔ shém yo yi ffuuke nu ɛ kocɛn wase. Ɛ è nu kefew kè wo nu esaw bonyii bô nu ɛ kpweken wase. Ɛ è bvuu nu tɛn kè wo nu emawɔɔ bonyii buw bo lemme le bô è nu bonyii buw bo ntum e, ebvuu emawɔɔ bonyii bô è nu bo Nyo' le, emawɔɔ tɛn bonyii bocii bô wvumte diee diuw, kenɛɛ è nu bo caan caan kenɛɛ bo baay baay. Ɛ è nu tɛn kefew kè wo nu elɛse bonyii bô beete bô ekolɛ ke nshɛ le.”

19 Ɛ bó nɛ yene kembuŋ ke yew ncese Nyo' yi fowe le. Ɛ ŋkuw moŋkan mo Nyo' le wvù to nu yew ncese yidvu le yenɛ. Ɛ jaŋ nɛ no lawkene, baykene, dvûmte, ɛ nshɛ shiike, ɛ ebew yo baay baay shiile.

Mwm 12

Kpwoon mvu bô keŋguum ke nyam mi le ɛ yí fieesene nyam joo

1 Ɛ me nɛ n'yɛn kfuɛ fieɛ fimew fi diuw wvù yumɛɛn e fowe. È to nu kpwoon mvu ɛ wvú ɛ tfume diuu ye le diɛwɛ ndvu le, ɛ kpwee nu ɛku jo bikaɛ biew, ɛ wvú ɛ bon kefo ke bvunfon e, ɛ jón nu yí dvú le yuufe ncow fieɛ.

2 Wvú to nu bô fue, lumte wase keeboo, yuuke nsase lume, beele.

3 Ɛ me mbvuu n'yɛn kfuɛ fieɛ fimew fi diuw wvù yumɛɛn e fowe. È to nu keŋguum ke nyam mi le ɛ yí yɛɛle lo, ɛ yí fieesene nyam joo. Ɛ yí keŋke bikuu bisooshwiɔ bô bitonɔ yuufe, ɛ bifo bi bvunfon e bi caan caan bisooshwiɔ nu yí bikuu bidvu le.

4 Ɛ yí jiw wvun we, ɛ wvú ka keba kemwaanɔ ente jo bitɛtɛ bi jón e we tfume yí nshɛ le. Ɛ keŋguum ke nyam e kedvu nɛ leem fwe dvu kpwoon wvù to lumte wɛ, wvu le kpwoon wvudvu dɛoo ɛ boo, é wen enɔgele lo wan wvudvu wvù wvú boke.

- ⁵ Ɛ wvú boo wan diemsen, ɛ è nu wvù nu ke esaake bitum bicii bô ketoome ke ketfu le. Geenɛn, no wvú to bokɛɛ ɛ bó mum cun wan wvudvu ben dvú fô Nyo' le, ɛ wvú no nu mbew kawla we le.
- ⁶ Ɛ kpwoon wvudvu mum fɛɛ lo gen no nu ɲkpwaante bvudvuu bvù Nyo' to seysɛɛ wase fô wvú le. Ɛ è nu fò bó nu ke etaale fô wvú le yí ɛdiuw e ntfuke bô gee fɛɛ kecow mbaɲ soocaa e (1,260).
- ⁷ Ɛ jem nɛ kɛw woɲ Nyo' le, ɛ nceendaa Nyo' wvù Maykɛl bô ɲgoo ye bonceendaa no diuu bô bo keɲguum ke nyam yí fieesene nyam joo ye le. Ɛ nyam yidvu bô bew bonceendaa diuu,
- ⁸geenɛn ɛ bó so keɲguum ke nyam e kedvu bô ɲgoo ye, ɛ bó faɲɛ yaa bvuu keɲke bvudvuu woɲ Nyo' le kɛ.
- ⁹ Ɛ bó bvuse keɲguum ke nyam yi fieesene nyam joo le kie wvumse ɛ kí gbwe fokuse yí nshɛ le. Keɲguum kin nu yo yi bvuyvuum e ye yí è nu dɛwle bvuu nu Satan. Ɛ è nu wvú wvù læle bonyii yí ɛkolɛ ke nshɛ le kecii. Bó to wvumse wvú bô bonceendaa bew ɛ bó gbwe yí nshɛ le.
- ¹⁰ Ɛ me nɛ n'yuw ɛ díɛw jemyi foweɛwe woɲ Nyo' le gayte le, “È nɛɛ keseen wvù Nyo' nu eboyse bonyii bew, eduɲɛ mvuɲgay mwew mvu lemme le, esaake bvunfon bwew, é Mboyse we wvù wvú to kawɛɛ eduɲɛ tɛn mvuɲgay mwew mvu sa' le. Fí nu nonɛn keseen njefo bó nu ɛ wvumse wase wee wɛ fokuse wvù se ké no leeme fwe dvu Nyo' wesebeene ɛmvunsheɲ bô ɛntaɲ teyte mwɛɛm yí boom bo bwee wesebeene le.
- ¹¹ Geenɛn, bó nu ɛ so wase wvú nje ɛlɛmɛ ke Waa Njee bô díɛw Nyo' yí bó leeme jim nsaw wvudvu le. Ɛ kɛ bó to baa kooɲke nshii wvubo ê je yí è nulo é bó emum efane lo keekpwe le kɛ.
- ¹² Nonɛn, woɲ Nyo' elanɲanɛ, ɛ bonyii bocii bô nu fó, lanɲanɛ tɛn. Geenɛn, ɲgɛw wvu baay nu fô ben e nshɛ bô joo yi baay, njefo dɛwle nu ɛ shii wase ɛ to ê ben e. Wvú nu ɛ yiɲsen bô shém yí ffuuke baay, njefo wvú kee lo ɛ kefew kewene shɛke wase caan.”
- ¹³Ɛ keɲguum ke nyam yí fieesene nyam joo ye dioo yen ɛ bó nu ɛ tfume wase wen, wen ɛ gbwe yí nshɛ le, ɛ yí daa kenlewte ejim jo kpwoon wɛ wvù to bokɛɛ wan diemsen e.
- ¹⁴Geenɛn, ɛ bó nya bibɛ bi nfaanduɲ e bifɛɛ ê kpwoon wvudvu ɛ wvú ebii dvú keelewte yo ye egen enu ɲkpwaante yí bilum e bitete bô keɲgawtɛn ɛ bó taale fô wvú le.
- ¹⁵Ɛ yo yidvu mum bvuse joo ɛmvu díɛwɛ joo yí booke le ejim jo kpwoon wvudvu wvu ɛ yí etuu wvú egen dvú.
- ¹⁶Geenɛn, ɛ nshɛ ficɛ kpwoon wvudvu, yene diuw we mi lo joo yí keɲguum ke nyam e kedvu to bvusɛɛ ê yí ɛmvu le.

17 Ɛ nyam yidvu mum ton'ye shém bô kpwoon wvudvu, mum ja laa bvudiuw ê kebese ke boom bo kpwoon wvudvu le, Ɛ è nu bó bô gëele bonci bo Nyo' le bvuu leeme jim nsaw Jisos.

18 Ɛ yí mum gen no leeme ñgem joo yi baay e.

Mwm 13

Nyam yì bẽmte yì to buye Ɛ joo yi baay e

1 Ɛ me mbvuu ne n'yen Ɛ nyam yì bẽmte buyte Ɛ joo yi baay e, Ɛ yí keŋke bikuu bisooshwiw bô bitoŋ yuufe noo bifo bi bvunfon e bi caan caan yuufe yí bitoŋ bidvu le, Ɛ ediee yò beete bô diee di Nyo' le nu yí bikuu bidvu le.

2 Nyam yidvu yì me nto n'yene to fieesene biao, Ɛ ekaw eye nu diewe yo nyam mi yì bó teŋe le be le, Ɛ diuw we nu diewe wvu bvule le. Ɛ keŋguum ke nyam yì fieesene nyam joo le kie mum nya nyam yidvu bô mvuŋgay mwew noo kawla we le yí esaake bô mvuŋgay mvu baay.

3 Ɛkolé ke nyam yidvu le kemew to nu Ɛ yuu keŋke wase kfuu kelemte kemew Ɛ è nu kè to nulo eyu lo yí, geenen Ɛ kí to bonen wase. Ɛ diuw yum lo bonyii bocii yí ekolé ke nshé le, Ɛ bó no gbwee ejim jo nyam yidvu.

4 Ɛ bonyii no nyaa mbense wvu baay Ɛ keŋguum ke nyam yì fieesene nyam joo ye le, njefo yí to nu Ɛ nya nyam yì bẽmte yidvu bô mvuŋgay mwew. Ɛ bó mum no nyaa ten mbense wvu baay Ɛ nyam yì bẽmte yidvu gayte le, “È nu yee diewe nyam yì bẽmte le, Ɛ è nulo ediu yee yí?”

5 Bó to nu Ɛ cine nyam yidvu le Ɛ yí no keŋke diuw wvù è nulo é yí ejemyi díew kensaa ye dvú, bvuu beete bô diee di Nyo' le, bvuu cine ten le yí esaake yí kee le mbaanye ncow fee.

6 Ɛ yí mum kew no jemyi díew yì befe ekume Nyo', beete bô diee diew bô bvudvuu bvù Nyo' nu fó le noo bonyii bô nu woŋ Nyo' le.

7 Bó to nu Ɛ cine ten le yí etum jem bô bonyii bô è nu bo Nyo' le, eso bó, cine ten le yí ekeŋke mvuŋgay ewe jo bontew bocii bô bonyii bocii noo bonyii bo díew e yicii, noo bitum bicii.

8 Bonyii bocii yí ekolé ke nshé le nu ke enyaa mbense wvu baay Ɛ yí. Bonyii ban nu wee tfuu wvù bó to baa saŋ wase diee diew ê ñwa' le Ɛ woŋ se ke kew e ke. Ɛ ñwa' wvun nu wvù ediee Ɛ bonyii bô keŋke nshii nu jó, Ɛ è nu ñwa' Waa Njee wvù bó to selee.

9 Wee wvù keŋke bitem, Ɛ wvú yuw.

10 É wee nu Ɛ fí nu le bó nu ekoo wvú, tu bó nu ekoo. Wee é no nu Ɛ fí nu le wvú nu ke ekpwe yí finyo le, tu bó nu ke eyu wvú bô finyo. Fin gene fô bonyii bô è nu bo Nyo' le le bó ekuu shém, eleese fitele yí ye le.

Nyam yi bemte yi to buye ê nshê le

11 E me mbvuu ne n'yen yimi nyam yi bemte le, e yiyin buyte ê nshê le, e yi kenke biton bifee diewe bi waa njee le, jemyi diewe kennguum ke nyam yi fieesene nyam joo ye le.

12 Yi to dunji mvungay mvu nyam yi bemte yi fwe ye le mvunciim ejise jo nyam yidvu. E yi ge e ekole ke nshê le kecii bô bonyii bocii bo yi nshê le no nyaa mbense wvu baay ê nyam yi fwe ye yi kelemtee kew kè to nulo eyu lo yi to nu e bonen wase le.

13 Yi to gee mwem mvu dunji mvungay mwew, gee naa e nguy nen'yi we shiile fokuse e bonyii yene.

14 No bó to nu e cine le yi egee mwem mvu dunji mvungay mwew fwe dvu nyam yi bemte yimi ye, e yi mum no laele bonyii bô nu yi nshê le dvú. E yi mum gay e bó kene lan yi fieesene nyam yi bó to lemsêe bô nyo e yi no nu ke dvú ye le.

15 Bó to nu e cine le yi enya keyoy ê lan nyam yi bemte yidvu, wvu le è nu naa lo é lan yidvu ejemyi, gee e bó yuwyi bonyii bocii bô faanke keenyaa mbense wvu baay ê lan yidvu.

16 Yi to nu e gay le bó ege nciise yi bonyii le bocii yi kebo ke eceey e kenee fojise, gay le bó ege yi wee le kenee è nu wee wvu caan kenee wvu baay, kenee wee kpaw, kenee wvu fuute, kenee è nu nfa, kenee è yaa nu ke nfa,

17 wvu le fo è nulo é wee eguy kenee ege se wvu kenke nciise wvudvu ke. Nciise wvun nu diee di nyam yi bemte ye le, kenee ejise e nwa' yo diee di nyam yidvu le.

18 Fin nu fiee e fi shieele bvufee bvu baay. Wee wvu kenke bvufee etan ejise e nwa' eyan yò è nu diee di nyam yin e ekiee. Ejise e nwa' eyan leeme fô diee di wee wvu wum e, e yó nu ê nta e le, gee soocan bô mban soocan ncow soocan (666).

Mwm 14

Waa Njee bô bonyii bo 144,000

1 Ben eyeke eyuw, e me ndioo mbvuu ntaa, ne n'yen Waa Njee le e wvu leeme yi kum wvu Sayon e, e bonyii bontfuke gbwee kecow mbaanye ncow bonew (144,000) nu bô wvu. Bonyii ban nu bô to kenke nciise diee diw bô di Ice le fojise fo bó.

2 E me n'yuw e diw too fowe yole diewe joo yi gbwee ê nkon e, dvumte ten diewe jan yi baykene le. Diw yi me n'yuwee yidvu to jemyi ten diewe dikome fô bonyii kumte le.

3 Bó to yemte nkiee mvu wvu fwe fwe dvu kawla bô mwem mvu mvuyuum mvu mvunem mwe noo bocé' bo bonyii le ba. Ke è to nulo é wee mvu ekiee nkiee

wvudvu efey bonyii bo bontfuke gbwee kecow mbaanye ncow bonew ba ke. E è nu bó bò bó to sumee wase can kebefe le yî nshe le.

⁴Boban nu bonyii bò to baa ebefe wase ye yiibo bò bokene ke, njefo ke bó to kee wase bokene ke. È nu bó bò ké no bii Waa Njee le naa fee fò wvú gene. Bonyii ban nu bò bó to sumee ente jo engoke ke bonyii le kecii le bó enu diewe mvuntam mvu fwe le fô Nyo' bò Waa Njee le.

⁵ Mbiay ke baa yuu buy wase diuw wvubole ke. Bó nu fibole se nlom.

Njeme bonceendaa bo Nyo' le bo botete

⁶ E me mbvuu ne n'yen nceendaa Nyo' mvu le e wvú bile entelen jo ebule. Wvú to kenke saaka wvú jee wvú mey lo kefewce è bonyii bò nu yî nshe le bocii. Wvú to nu kefewce è bitum bicii, bò bontew bocii, noo bonyii bò jemyi naa díew yì la noo naa bonyii bò la bocii.

⁷ E nceendaa wvudvu funj foweewe le, “Ben efanè Nyo' tumtè monkum mew, njefo kefew ke nsaw we le nu e kocen wase. Ben enyaà mbense wvu baay è wvú wvú to bomee ebule bò nshe noo joo yi baay bò mondvuum mò jóo buyte mó le.”

⁸ E wvumvu nceendaa Nyo' wvu le bofee, no bii wvú le gayte le, “Babilon wvu baay nu e gbwe wase, wvú nu e gbwe wase. È nu wvú wvú nu e ge bitum bicii e wu nce we nsake diewe mbvuum e.”

⁹ E wvumvu nceendaa Nyo' wvu le botete mum bi ten bó le, no fuunke foweewe le, “É wee mom lo e nya mbense wvu baay è nyam yì bemte ye bò è lan nyam yidvu, e kenke ten nciise fojise kenee yì kebo le,

¹⁰ tu wvú nu ke ewu shém Nyo' yì ffuuke diewe no wee ké wu mbvuum. Shém yidvu nu e wvú e beese è fiko fiew fi nsase le e wvú baa fiysen ke. Wvuwee wee nu e bó nu ke elan wvú è fiee le e fí fiee diewe mvunkan e, é wvú eyene ngew jó. Fifin nu ke enu fwe dvu bonceendaa bo Nyo' le bò yuule bò Waa Njee.

¹¹ Njiim nu ke ebene ke lo sekecii se nka fò bó lan bó ngew e. Ke bonyii ban bò nyaa mbense wvu baay è nyam yì bemte bò è lan nyam yidvu noo bonyii bò kenke nciise diee diew nu ke ekenke naa lo nleeten yì ngew wvubole emvunsheen kenee entan ke.”

¹² Fifin gene fô bonyii bò è nu bo Nyo' le bò è nu bó bò gaele bonci bo Nyo' le, e bó e lese fitele yì Jisos e, le bó kenke keekuu shém.

¹³ E me ne n'yuw e diew jemyi won Nyo' le, gayte è me le, “Sanje fin: E kaw yì keseen e gen lo nu e njon wvu baay nu fô bonyii bò kpwee e bó e taashe bò bo Tata le.” E Keyoy ke Nyo' le bense le, “Njon wvu baay nu fô bó le keceey, njefo bó nu elleeten yì monlum mobole, é gee dibole di jee ebi bó le.”

Ngbwele wvú è nu nsaw Nyo'

14 Ben eyeke eyuw, ε me ne ntaa n'yen kembew e ε kí baa lo, ε wee ε shii yí kembew kedvu le fieesene wee wvù diee nu Waawee. Wvú to nu ε bon kefo ke bvunfon e ε bó ε kene bô ketwaa ke bigew e kè yæele, kenke finyo εbo ε fí nu diewe fi yun e, koole.

15 Ε wvumvu nceendaa Nyo' ne buy yew ncese le, fuη wee we wvù to shilæe yí kembew e foweewe, gay le, “Neke finyo fiuw egbwele ηgbwele dvú. Kefew ke ηgbwele le nu ε kocen wase, ε ekole ke nshe le nu ε looce wase ε be kè bó egbwele.”

16 Nonen, ε wee we wvù to shilæe yí kembew e mum jiw finyo fiew yí ekole ke nshe le, ge ηgbwele dvú yí nshe le.

17 Ε wvumvu nceendaa Nyo' bvuu buy yew ncese yi fowe le, ε wvú kenke ten finyo diewe fi yun e εbo ε fí koole.

18 Ε wvumvu nceendaa Nyo' mum buy fô ketanη ke ncese le, ε è nu wvù kenke mvunηay ewe jo ηguy. Ε wvú fuη foweewe ê wvumvu we wvù to kenke finyo fi koole fie le, “Neke finyo fiuw esumye bikawci bi mvuntam mvu mbvuum e dvú yí nshe le, njefo mvuntam mvudvu nu ε yee wase.”

19 Ε nceendaa Nyo' wvudvu mum jiw finyo fiew yí nshe le, sumye mvuntam mvu mbvuum e mvu yí nshe le, baance, tfuw bvudvuu bvu baay bvù bó some mbvuum fó le, ε fifin duηci fieε fi shém Nyo' yí ffuuke nu ke ege bô bonyii.

20 Ε bó no some mvuntam mvu mbvuum e modvu bô bikaa ekfuη jo kelaante, ε è buyte εleme, yiηsene bene buyte diewe fô diuw nyambala le, læηke gene, gen buy diewe bomay e gee fæε.

Mwm 15

Bonηew bo bosooshwiη bô è nu bo kemæse le

1 Ε me mbvuu ne n'yen kfuu fieε fi diuw wvù yumæn e fimew fowe, ε è nu naa lo kenηhaw ke fieε le ke baay. È to nu bonceendaa bo Nyo' le bosooshwiη ε bó kenke bonηew bosooshwiη bô è nu bo kemæse le keenya ê bonyii, njefo boban nu bô Nyo' nu emæse eduηce shém ye yí ffuuke dvú.

2 Ε me mbvuu ne n'yen fieε fimew e ε fí fieesene joo yi baay mi yí nu ε bó ε fiysen bô ηguy, ε yí yuule naa diewe kenlæy e. Ε bonyii bomew leeme mbew joo yi baay yidvu le ε è nu bô to soε wase nyam yí bemte ye bô lanη ye noo ejise ε ηwa' yò è nu diee di nyam yidvu le. Bó to leeme fó kenke dikome di Nyo' le can e,

3 yemte ηkiee Muses wvù wee lemme Nyo' bô ηkiee Waa Njee. Bó to yemte le, “O Tata Nyo' wvù Kenke Mvunηay Mvunciim, mwæm mvù wo gee nu naa mvu baay bô mvu kenηhaw e. Wo nu Nfon bitum bicii, ε je yí wo gee mwæm jó nu yi teytey bô yi kecæy.

- ⁴ O Tata, wee wvù nulo saa efane wo, tumte moŋkum muw nu yee? È mey ke wo maan wvù yuule. Bitum bicii nu ke etoo nyaa mbense wvu baay ê wo, njefo bó nu ε yen mwεem mvù wo gee le ε mvú nu teyteny.”
- ⁵ Ejim jodvu ε me ne ntaa, n'yen ε bó yene yew ncese yi fowe yi è nu cun yi dunji le Nyo' nu bonyii.
- ⁶ E bonceendaa bo Nyo' le bo bosooshiwiy bò to kenke bongew bo bosooshiwiy ba mum buy yew ncese yidvu le. Bó to nu ε tfume ndvú ε yí looci lawkene, waw diŋ'waw yí gvúw e ε bó ε kene bô ketwaa ke bigew e kè yeεle.
- ⁷ E fiεε fimwaanŋ ŋgoo mwεem mvu mvuyuum mvu mvunem mwe le mum nya bintee bisooshiwiy ê bonceendaa bo bosooshiwiy ba ε bó ε kene bô ketwaa ke bigew e kè yeεle. Bintee bidvu to nu ε yiŋsen bô shém yi ffuuke yi Nyo' wvù nu dvú sekecii se ŋka.
- ⁸ E yew ncese ne yiŋsen lo bô njiim yi nen'yi fô n'yu Nyo' bô fô mvunŋay mwew e. E fí mum no nu le wee yaa to nulo ebvuu eley yew ncese Nyo' le ke, gen buy no bongew bo bosooshiwiy bò bonceendaa bo Nyo' le bo bosooshiwiy ba to kenke keenya ê bonyii to kaε.

Mwm 16

Bintee bi bisooshiwiy bi shém Nyo' yi ffuuke le

- ¹ E me ne n'yuw ε diew mi jemyi foweεwe yew ncese yidvu le ê bonceendaa bo Nyo' le bo bosooshiwiy ba le, “Ben egen etfuw shém Nyo' yi ffuuke yi nu ê bintee bi bisooshiwiy biε le yí nshe le.”
- ² E nceendaa Nyo' wvu fwe mum gen tfuw kew kentee ke shém Nyo' yi ffuuke le yí nshe le. E biŋkoken bì bεmte luci, kooyε bonyii bò to kenke nciise nyam yi bεmte ye nyaa mbense wvu baay ê laŋ nyam yidvu.
- ³ E nceendaa Nyo' wvu bokaŋ bofεε tfuw kew kentee ê joo yi baay e, ε joo yidvu baŋke no nu diewe ελεμε ke kenkpwe ke wee le. E fiεε ficii fi to cee ê joo yidvu le kpwe.
- ⁴ E nceendaa Nyo' wvu bokaŋ botate tfuw kew kentee ê jóo yi booke le noo mondvuum mò jóo buyte mó le, ε yí ne tu ελεμε.
- ⁵ E me n'yuw ε nceendaa Nyo' wvù taale fô joo le jeme le, “Nyo', wo nu Nyo' wvu teyteny ê je yi wo sumtene bonsaw ban e. Wo wvù nu keseen, ε wo to nu wase. O Nyo', wo wvù yuule.
- ⁶ Bonyii ban nu bò ελεμε ke bonyii bò è nu buw e noo bonyii buw bo ntum e nu fobo fo bó. Wo ε mum ε nya ελεμε ê bó, bó ε wu. Fifi nu naa nlawma wvubo.”
- ⁷ E me ne n'yuw ε diew buy fô ketaŋ ke ncese le bense le, “Eε Tata Nyo' wvù Kenke Mvunŋay Mvunciim, wo sumtene bonsaw buw bii je keceεy bô yi teyteny e!”

⁸Ɛ nceendaa Nyo' wvu bokaŋ bonew tfuw kew kentee ɛ è nu yî diuu le, ɛ diuu keŋke je keekeyte lo ton'yi bonyii diewe nguy e.

⁹ Ɛ nton'ye wvu baay wvù to buyte yî diuu le no ton'yi bonyii. Geenen ɛ bó faŋe yaa ekumen lo mvuntelem mvubole, etumte ɛ è nu moŋkum mo Nyo' le ke. Ɛ bó kaa no beete lo bô diee di Nyo' wvù keŋke mvuŋgay mvu boŋew ban e.

¹⁰ Ɛ nceendaa Nyo' wvu bokaŋ botin tfuw kew kentee ɛ è nu yî kawla nyam yì bente ye le, ɛ woŋ wvù nyam yidvu to saake ne jiim lo. Ɛ bonyii no nu yî monlum e lumyi elem ebo.

¹¹ Ɛ bó ne no nan'yi lo Nyo' wvù nu we nje nluce bô biŋkoken bibole. Geenen faŋe yaa ekumen gee dibole ke.

¹² Ɛ nceendaa Nyo' wvu bokaŋ bosooaan tfuw kew kentee ɛ è nu ê joo yì Yuflets e, ɛ joo yidvu mum yum, keeseyse je wvu le bonfon bô nen'yi ê keba kè diuu sane le efey jó.

¹³ Ɛ me ne n'yeŋ biyoy bì yiile bimew e bitete ɛ bí fieesene bisham. Ɛ bí buyte diuw keŋguum ke nyam yì fieesene nyam joo le, bô diuw nyam yì bente ye le, noo diuw wee wvù mbiayte le wen nu wee ntum Nyo' le.

¹⁴ Biyoy bin nu bonceendaa bo dewle le. Ɛ è nu bí bì gee mwem mvù duŋci mvuŋgay mvubole. Bí ghane gene fô bonfon bo bitum e bicii yî ekole ke nshe le baanci bó le bó eseyseè jem yì nu ke enu diuu di baay di Nyo' wvù Keŋke Mvuŋgay Mvunciim e.

¹⁵ Jisos to nu ɛ gay le, “Ben eyeke eyuw, me nu ŋke ene nto diewe cooŋ e. Njoŋ wvu baay nu wvu wee wvù baa leete ke, wvù keŋke ndvú ye ye le wvu le fo wvú ke ene etum ebuy kenyi kencimte é bonyii eyen kencimte kew e.”

¹⁶ Ɛ biyoy bidvu ke mum baance bonfon bodvu fô bvudvuu bvù bó teŋe ê díew Ibulu le le Amagedon e.

¹⁷ Ɛ nceendaa Nyo' wvu bokaŋ bosooshwiŋ tfuw kew kentee we yî fwefwe le. Ɛ díew mi buy yew ncese le fò kawla nu jemyi foweewe le, “Fí ɛ ge wase ye!”

¹⁸ Ɛ jaŋ ne no lawkene, baykene, dvûmte ɛ nshe shiike bô mvuŋgay baay. Ke kfuu wvuwe nshiw wvù nshe to shiwee bô mvuŋgay baay nen to ke baa yuu nu wase dvú ɛ kew no wee to kewee enu yî nshe le ke. Nshiw wvudvu to nu ɛ bem baay.

¹⁹ Ɛ kelaante ke baay senen buy biba bitete. Ɛ bilaante bi bitum e no keeshi. Nyo' to nu ɛ kume kelaante ke baay kin kè è nu Babilon, nya fiko fi shém ye yì ffuuke le ɛ wvú selle.

²⁰ Ɛ bitum bi ê joo enteleŋ bicii fee lo, ɛ dikum ten laken lo.

²¹ Ɛ ebew yo baay baay no gbwekene fowe ɛ dimwaan jite diewe bokilu mbaanye le. Ɛ ebew yodvu gbwekene yî bonyii le. Ɛ bó no nan'yi lo Nyo', njefo wvú nu ɛ ciinse ŋgew ebew yî bó le. Wvuwwun ŋgew to bente baay.

Mwm 17

Kentenj ke kpwoon nsake le bô nyam yì bẽmte

- 1 Ɛ nceendaa Nyo' mvu ɛnte jo bonceendaa bo Nyo' le bo bosooshwi y b̀ to kenjke bintee bi bisooshwi y biɛ nɛ to gay ê me le, "To ɛ me enduɔɔɛ ê wo kfuu ŋgɛw wv̀ b̀ nu ke enya ê kentenj ke kpwoon nsake wɛ wv̀ nu ɛ shii ỳ joo le nteen.
- 2 Kpwoon wvun nu wv̀ b̀ bonfon bo ỳ nshɛ le fɛn gee nsake, ɛ nce we nsake wvun ɛ koo wase bonyii bo ỳ nshɛ le fɛn diɛwɛ mbvuum e."
- 3 Ɛ nceendaa Nyo' wvudvu nɛ jo me ɛ me nu can Keyoy ke Nyo' le, gen dv̀ ŋkpwaante. Ɛ me n'yɛn kpwoon mvu le ɛ wv̀ ɛ shii ỳ nyam ỳ bẽmte le ɛ ỳ yɛɛle nɛn ghaŋ ɛ ỳ ɛ yiŋsɛn lo b̀ ɛdiee ỳ ye le yicii ỳ beete b̀ diee di Nyo' le. Nyam yidvu to kenjke bikuu bisooshwi b̀ bitoŋ yuufe.
- 4 Kpwoon wvudvu to nu ɛ sufe ye b̀ ndv̀ bonyii bo baay baay ɛ ỳ yɛɛle lo, ɛ wv̀ lawkene ye le b̀ biɛɛ bi b̀ kene b̀ ketwaa ke bigew e k̀ yɛɛle noo dikfuu di ɛta ỳ lumte le noo ɛjise ɛ baŋ. Wv̀ to jici fiko ê wv̀ ɛbo ɛ b̀ ɛ kene b̀ ketwaa ke bigew e k̀ yɛɛle ɛ f̀ ɛ yiŋsɛn b̀ mwɛɛm mv̀ bẽmte noo nnyɛn ye kenjaŋ.
- 5 B̀ to nu ɛ saŋ diee dimew fojise fo wv̀ ɛ d̀ nu ê ŋgan e le, "Babilon wvu baay wv̀ bwee bokɛnɛ bo nsake le noo wvu mwɛɛm mv̀ bẽmte ỳ nshɛ le."
- 6 Ɛ me n'yɛn ɛ kpwoon wvudvu ɛ wu wase ɛɛmɛ ke bonyii b̀ ɛ nu bo Nyo' le b̀ b̀ yuwyɛɛ nje Jisos, k̀ ɛ koo wv̀ diɛwɛ mbvuum e. No me n'yɛnɛ kpwoon wvudvu le nonɛn, ɛ diuw yum me baay.
- 7 Ɛ nceendaa Nyo' wɛ bife ê me le, "Diuw yumte wo nje la? Me nu ensee ê wo kenyile ke fiɛ le k̀ nu ɛkumɛ kpwoon wvun b̀ nyam ỳ bẽmte yin ỳ kenjke bikuu bisooshwi b̀ bitoŋ yuufe ỳ tuule wv̀.
- 8 Nyam ỳ bẽmte yin ỳ wo yɛn nu ɛ ỳ to nu dv̀, geenɛn keseen wvun kɛ ỳ nu dv̀ kɛ. Ỳ nu ke enɛ ɛkuse ê kentuke kɛ k̀ shiile nɛn ŋooŋ e, eben ê we emum egen f̀ b̀ nu elɛɛ lo ỳ. Diuw nu ke eyumte bonyii b̀ nu ỳ nshɛ le b̀ b̀ ke baa saŋ wase ɛdiee ɛbo ê ŋwa' bonyii b̀ kenjke nshii le ɛ kɛw no woŋ to kɛwɛɛ le. Wv̀ nu ke eyumte no b̀nu ke eyɛne nyam yin e, njefo nyam yin to nu dv̀, geenɛn yaa bvuu nu dv̀ kɛ, ɛ ỳ bɛɛ ke ebvuu eto.
- 9 Fin nu fiɛ ɛ f̀ shiiele ɛkolɛ k̀ kenjke bvufɛɛ. Bikuu bi nyam ye le bi bisooshwi y nu dikum disooshwi y di kpwoon wɛ shiile ỳ dv̀ le. Bikuu bidvu nu tɛn bonfon bosooshwi y.
- 10 Bonfon bo botin nu ɛ b̀ ɛ gbwe wase, ɛ mwaan bɛɛ saake, ɛ wvumvu baa to wase kɛ. Wvuwɛ nu ke edioo ɛ to, ɛ wv̀ ɛkenjke kɛ keenu dv̀ ỳ kefew e nɛn caan.
- 11 F̀ ɛkumɛ nyam ỳ bẽmte ye ỳ to nu dv̀ ɛ ỳ yaa bɛɛ dv̀ kɛ, nu ɛ ỳ nu tɛn nfon, ɛ nfon wvun nu wvu bokaŋ nyaŋ, geenɛn ɛ wv̀ nu ŋgoo bonfon bo bosooshwi y ba le. Wvuwɛ tɛn nu ke edioo ɛ to emum egen f̀ b̀ nu elɛɛ lo wv̀.

12 Bitonɔ bi yuufe bi wo yen bin nu bonfon yuufe bô bó baa enya wase mvunɔay mvu sa' le ê bó ke. Bó nu ke edioo ε ghaa bó, é bó emum ekeɔke mvunɔay keesaake bô nyam yi bemte ye. Geenen bó nu ke esaw ke yi ntam kefew e mwaan maan.

13 Boban bocii nu ε bó keɔke ke nkpwawce mwaan. E bó nu ke enya mvunɔay mvubole mvu sa' le mvunciim ê nyam yi bemte ye.

14 Bó nu ke ebaance etum jem bô Waa Njee, geenen é Waa Njee eso bó, njefo wvú nu Tata botata bocii bô Nfon bonfon bocii. Wvú nu ke etum eso bô bonyii bew bô wvú nu ε tee ε caw ε bó leeme bô wvú sekecii.”

15 E nceendaa Nyo' we gay ê me le, “Jóo yi wo be yen yi kpwoon nsake we shiile yi dvú le nu dikfuu di bonyii le bô bibombom bi bonyii le noo bitum noo bonyii bô jemyi naa díew yi la.

16 E bitonɔ bi yuufe bi wo be yen bie nu ε bô bo nyam yi bemte ye nu ke ebane kpwoon nsake we. Bó nu ke eyow mwem mwew mvunciim é wvú emey kenyi kencimte, é bó enon nyam ye ye, emese eton wvú bô nguy.

17 Fifi nu ε è lese Nyo' ê mvuntelem mvubole le bó ege fie fi wvú shieele, ε mum ε ge le bó ekeɔke nkpwawce mwaan keenya mvunɔay mvubole mvu sa' le ê nyam yi bemte ye egen ebuy no díew Nyo' ke eto ekocen.

18 E kpwoon wvú wo be yen we nu kelaante ke baay kè keɔke mvunɔay ewe jo bonfon bo yi nshε le bocii.”

Mwm 18

No kelaante kè Babilon nu ke egbwe

1 Ejim jodvu ε me n'yen nceendaa Nyo' mvu le ε wvú shiile too we keɔke mvunɔay mvu baay, ε n'yuw we baa yi ekole ke nshε le kecii.

2 E wvú fuɔ foweewe bô díew yi temyi le, “Babilon wvú baay nu ε gbwe wase! Wvú nu ε gbwe wase! Wvú nu ε tu wase bvudvuu bvú bonceendaa bo dewle le cee fó le. Wvú nu tfum biyoy bi yiile bicii. Wvú nu wase tfum mvunyiim mvú nyene bô mvú bó bane mvunciim.

3 Wvú nu ε gbwe wase njefo bitum bicii nu ε wu wase nce we nnyen kenjan wvú ε koo bó díewe mbvuum e, ε bonfon bo yi nshε le nu ε ge wase nce nnyen kenjan bô wvú. Bonyii bo way e bocii bo yi nshε le nu ε kuken wase yi ye le nje kpaw we wvú wvú nu ε baance wa wvú ε fum lo.”

4 E me mbvuu n'yuw ε díew mi fuɔke won wvú we le gayte le, “Bonyii bem, ben ebuy lo jó, wvú le fo ben ke eley bibefe biew e, bô le fo ben ke eley ten ngew wvú nu ke eto fô wvú le.

5 Bibefe biew nu ε bí ε looce wase ε yiɔsen ε ben ε buy fowe, Nyo' ε kume wvú yi mwem mwew mvú befe le.

⁶ Bó ege bô wvú no wvú ge bô bonyii bomew. Bó elaw wvú yî gee diew e bokaŋ bofɛɛ. Bó egɛɛ mbvuum mò è nu ŋgew mvuŋkom mvunfɛɛm ê fiko fi wvú ké no gɛɛle wvu bonyii bomew e jó, enya é wvú ewu.

⁷ Bó efew ŋgew bô nsase enya ê wvú ke lenlen no wvú to saale ye ê bvukuke ente diee ekole kew. Wvú shiile no kfunɛ gvuw gayte le, 'Me nu Yaa yî kawla le, ke me nu kpweɛ ŋkfu ke, ɛ ke me nu ŋke en'yuu mbeelee nsoo ekole ke.'

⁸ No wvú gayte nonɛn, nu ke no ŋgew nu ke eto yî ye le yî diuu le dimwaaŋ. Kencɛm nu ke egbwe yî ye le, é wvú ebeelee soo ekole. ɛ jɛŋ nu ke ekoo tɛn wvú. Bó nu ke eton wvú bô ŋguy, njefo Nyo' Tata wvù nu ke esaw wvú nu ɛ wvú keŋke mvuŋgay.

Bonyii bo yî nshɛ le nu ke ebeelee Babilon

⁹ Bonfon bo yî nshɛ le bô se gee nnyɛn kenjaŋ bô wvú, diee ye bô wvú, nu ke ebeelee ffule seke bó ɛ yɛn no njiim bene yî ye le no wvú fiee.

¹⁰ Bó nu ke eleeme lo ntamndwee bô nfan no bó yene ɛ bó njiɛsene bô wvú. Bó nu ke ecamte ye gayte le, 'Ey me! Ey me! Babilon, wo wvù kelaante ke baay! Wo wvù kelaante kè kuuke! Ŋgew nu ɛ mum ɛ to lo yî yo le ke yî ntam kefew e nɛn mwaan e?'

¹¹ Bonyii bo way e bo yî nshɛ le nu ke ebeelee wvú soo bikuu njefo ke wee bæɛ dvú wvù nu ke eguyte mwɛɛm mvubole ke.

¹² Ke wee bæɛ dvú wvù nu ke eguyte mwɛɛm mvubole diɛwɛ mvù bó kene bô ketwaa ke bigew e kè yɛɛle kenɛɛ kè baa, kenɛɛ mvù bó kene bô kfuɛ ɛta yò lumte kenɛɛ bô ɛjise ɛ baŋ ke. Ke wee bæɛ dvú wvù nu ke eguyte ndvú yibo yi lemeleme kenɛɛ yì yɛɛle ŋgaciŋgaci, kenɛɛ yì bonene kenɛɛ yì yɛɛle ghaŋŋ ke. ɛ ke wee bæɛ dvú wvù nu ke eguyte bite bibole bì samte jee, kenɛɛ mwɛɛm mvubole mvunciim mvù bó kene bô bigew bi keyoo le noo mwɛɛm mvunciim mvù bó kene bô bite bì lumte noo ketwaa noo ketfu noo ɛta yò lawkene ke.

¹³ Ke wee bæɛ dvú wvù nu ke eguyte bite bibole bì bó keenci bonfey bô shfuuŋkene dvú noo mwɛɛm mvù shfuuŋkene mvù bó dɛɛle mwɛɛm dvú noo jiin noo kfuɛ bonfey bô shfuuŋkene bomew, noo kfuɛ jiin dimew, noo mbvuum noo mɛɛm noo mvuum mo ɛgiŋ e bô ɛgiŋ ɛbo ke. Ke wee bæɛ dvú wvú nu ke eguyte bona' bobole noo njée noo nyámbala noo bikoto bibole bì è guute nyam ke. ɛ ke wee bæɛ tɛn dvú wvù nu ke eguyte bonyii bo boyuum bô bó geese le è nu bonfaw ke.

¹⁴ Bó nu ke egayte ê wvú le, 'Mwɛɛm mvunciim mvù fitele fiuw se nu yî dvú le nu ɛ mvú ɛ gen wase, ɛ kpaw wo bô bvukuke bwuw bvucii ɛ ka wase, ɛ wo yaa bæɛ ke ebvuu eyuu eyɛn mvú le ke.'

¹⁵ Bonyii bo way e bô to geese mwɛɛm kawte bigew can ye le, nu ke eleeme lo ntamndwee nu bô nfan no bó yene ɛ wvú yene ŋgew. Bó nu ke efuŋke lo kpwe, soo bikuu camte ye gayte le,

16‘Ey me! Ey me! Yii yi baay fô kelaante ke baay kin e kè se nu ε kí ε sufe ye bô ndvú yi lemeleme noo yì yεele ηgaciηgaci noo yì yεele ghaηη, lawkene ye le bô biεε bì bó kene bô ketwaa ke bigew e kè yεele noo kfuu εta yò lumte noo εjise ε baη.

17Bó nu ε mum ε yεse ke lo bvukuke bwew yî ntam kefew e nen mwaan e?’ ε bocee bikuu bi boηguw e bocii bô bonyii bô lene ê boηguw e noo bô lemte jó noo bonyii bocii bô lene ê joo kamene way, nu ke eleeme lo ten ntamndwee.

18 Bó nu ke eyene njiim yì bene no wvú fiee mum beele ghayte le, ‘Kelaante kè se nu diewe kelaante ke baay kin e nu kè la?’

19Bó nu ke ekfumte kebvu εfa no bó fuunke kpwe soo bikuu, beele ghayte le, ‘Ey me! Ey me! Yii yi baay fô kelaante ke baay kin kè bonyii bocii bô keηke boηguw bo ê joo nu ε kuken yî bvukuke bwew e! Bó nu ε mum ε yεse lo kí ke yî ntam kefew e nen mwaan e?’

20Ben bô nu woη Nyo' le, ben elanlanè finen yî fieε fi kooy fô wvú le. Ben bocii bô è nu bonyii bo Nyo' le bô boom bo ntum e bo Jisos e noo bonyii bo ntum Nyo' le bocii, elanlanè njefo Nyo' nu ε sumten wase nsaw yî fieε fi wvú ge bô ben e!”

21 ε nceendaa Nyo' wvù temyi mvu mum ne tuu kebwee ke te le ε kí nu diewe diene di baay e, shike ε dí shii ê joo yi baay e nen wuuu. No wvú shike nonen mum gay le, “È nu ke nonen no bó nu ke eshike wo wvù kelaante ke baay kè Babilon é wo eshii bô mvunγay nen, bó saa bvuu ke eyen lo wo le ke.

22 Ke bó bæε ke ebvuu eyuw naa lo kome keηεε yowe keηεε ndoη keηεε soη jo wo ke. Ke bó bæε ke ebvuu eyen naa lo ε wee lemte fieε keηεε è nu naa fi la jo wo ke. Ke bó bæε ke eyuw naa lo ε diene jemyi jo wo ke.

23 Ke ken'yeese bæε ke ebvuu eyεε jo wo ke. Ke bó bæε ke ebvuu eyuw naa lo ε diew cee bvujen keηεε yi jen jemyi jo wo ke. Fí nu ke enu nonen njefo bonyii bo way e bo jo wo to nu bonyii bo baay baay bo yî nshe le, ε wo to læele bitum bicii bô nfim yo.

24 È nu kelaante kin kè ελεμε ke bonyii bo ntum Nyo' le bô ke bonyii bô è nu bo Nyo' le nu can kí le. ε è nu kí kè bonyii bocii bô bó yuwyi yî nshe le nu can kí le.”

Mwm 19

ε bó no nyaa mbense ê Nyo'

1 Ejim jodvu, ε me ne n'yuw ε fieε yosene lo woη wvu we le diewe è nu kebombom ke bonyii le ke baay, wamte le, “Mbense enù fô Nyo' wese le. È nu wvú wvù boysee bonyii, ε è keηke wvù bvukuke bô mvunγay.

2 Wvú sumtene bonsaw bew bii keceey bô je yi teyey e. Wvú nu ε laη wase ηgew yî kenteη ke kpwoon nsake we wvù se beete ekole ke nshe le bô nce we nsake le. Wvú nu ε tfuse wase envuke yî kpwoon wvudvu le ke bonyii bew bo lemme le bô wvù se yuwyi le.”

³ Ɛ bó bvuu kase no wante le, “Mbense enù fô Nyo' le. Njiim yì bene ê kelaante kin e nu ke ebene ke lo sekeci sɛ ŋka.”

⁴ Ɛ bocɛ' bo bonyii le bo mbaanfɛɛ ncow bonɛw ba noo mwɛɛm mvu mvuyuum mvu mvunɛm mwɛ mum gbwe ɣɛn fokuse nya mbense wvu baay ê Nyo' wvù nu ɛ shii yì kawla le. Ɛ bó no gayte le, “Fí enù nonɛn. Mbense enù fô Nyo' le.”

⁵ Ɛ diɛw mi mum buy fô kawla le gayte le, “Ben bocii bò nu bonyii bo lemme le bo Nyo' le, ben ebenseè Nyo' wesebeene, é ben bocii bò fane wvù kɛnɛɛ è nu bo caan caan kɛnɛɛ bo baay baay, enyaa mbense ê wvù.”

Dkaw bvujen bvu Waa Njee le

⁶ Ɛ me mbvuu nɛ n'yuw fiɛɛ fimew ɛ fí nu diɛwɛ diɛw kebombom ke bonyii le ɛ fí yole diɛwɛ joo yì gbwee ê ŋkoŋ e, wante diɛwɛ jaŋ yì baykene bô mvuŋgay e le, “Mbense enù fô Nyo' le, njefo Tata wesebeene wvù Nyo' wvù Kɛŋke Mvuŋgay Mvunciim saake wase.

⁷ Beene elanlanè, sakenè, nyaà mbense ê wvù, njefo kefew ke bvujen bvu Waa Njee le nu ɛ to wase, ɛ Jen nu ɛ wvù ɛ seyse wase ɛkolɛ kew.

⁸ Bó nu ɛ nya wase ndvu yì nu lemeleme yuule lawkene wvù ɛ tfume.”
(Ndvu yin nu gee di teyey di bonyii bò è nu bo Nyo' le.)

⁹ Ɛ nceendaa Nyo' wvudvu bvuu gay ê me le, “Sanɛ fin fi le, ‘Njoŋ wvu baay nu wvu bonyii bò bó nu ɛ be bó le bó eto fô ŋkaw bvujen bvu Waa Njee le.’” Ɛ wvù bvuu gay ê me le, “Bonjeme ban nu naa keceɛy bonjeme bo Nyo' le.”

¹⁰ Ɛ me mum nɛ ŋgbwe bikaa biew e keenya n'wvum wvu baay ê nceendaa Nyo' wvun. Ɛ wvù gay ê me le, “Fo wo ege nonɛn kɛ. Me nu ke ten wee lemme diɛwɛ wo noo boom bo bwoo le bò leeme yì fiɛɛ fi bó jemyi ɛkumɛ Jisos e. È nyaà n'wvum wvu baay ɛ è nu ê Nyo'. Fiɛɛ fi bó jemyi ɛkumɛ Jisos fin nu ke fí kebeɛ fi bonyii bo ntum Nyo' le to jemyi.”

Ɛ Waa Nyo' tum jem so bonyii bew bo bvuban e

¹¹ Ɛ me nɛ n'yɛn ɛ fowe ɛ yene, ɛ nyambala mi yì baa leeme. Ɛ wee wvù nu yì dvù le nu ɛ bó teŋe le Wee wvù Leeme yì Diɛw ye le bô le Wee Keceɛy, ɛ wvù ké no sumtene bonsaw bew kɛnɛɛ tumte jem ye teyey.

¹² Ejise ɛye to nu diɛwɛ leme di ŋguy e, ɛ bifo bi bvunfon e nu ɛfa jo wvù nteen. Wvù to kɛŋke diee ɛ bó ɛ san yì ye le ɛ wee mvu yaa nulo ekieɛ dí ɛfey wvù kɛ.

¹³ Wvù to nu ɛ shfuse kekum kè defe ye le ɛ bó ɛ lese ê bilɛɛm e. Diee di bó to teŋe wvù dvù nu le Diɛw Nyo'.

¹⁴ Ɛ bonyii bo jem e bo woŋ wvu we le bii ê wvù ejim ɛ bó ɛ jise ndvù yi lemeleme, ɛ yì yuule baa nen bvuuu.

¹⁵ Nyo jem yì koole to buyte ɛmvu jo wvù ɛ è nu yì wvù nu ke eso bitum dvù emum esaake bí bô mvuŋgay mvu baay. Wvù nu ke ebvuse shém Nyo' wvù Kɛŋke

Mvunḡay Mvunciim eduḡce ê bonyii. Shém Nyo' yin nu yì ffuuke naa baay diewe nsom fò bó somte mvuntam ε mbvuum buyte le.

¹⁶ Yì kekum kew e bô yì kebun e nu ε bó to saḡ diee diew le, “Nfon bonfon, noo Tata botata.”

¹⁷ Ε me mbvuu ne n'yen nceendaa Nyo' mvu le ε wvú leeme ente jo diuu. Wvú to leeme nonen fuunḡe mvunyiim mvunciim mvù bile we gayte le, “Ben eto etaashe fô ḡkaw wvu baay wvù Nyo' ge le.

¹⁸ Ben nu ke edie egvun ε bonfon bô yo bocee bikuu bi bonyii bo jem e noo bonyii bô keḡke mvunḡay noo yo nyámala bô bonyii bô bene yí, noo yo bonyii bocii bô nu bonfaw bô bô yaa nu ke bonfaw noo bonyii bo caan caan bô bo baay baay.”

¹⁹ Ε me mum n'yen nyam yì bemte bô bonfon bo yì nshε le noo bonyii bobole bo jem e ε bó taashe keetum jem bô wee wvù shileε yì nyambala le noo bew bonyii bo jem e.

²⁰ Ε jem kew, ε wvú koo nyam yì bemte ye bô wee wvù to mbiayte le wen nu wee ntum Nyo'. Wee wvun nu wvù to ké no shee fwe dvu nyam yidvu, gee mwεem mvu diuw wvù yumεen e. Mwεem mvun nu mvù yì to læle bonyii bô keḡke nciise nyam yì bemte yidvu ye le dvú, nyaa mbense wvu baay ê laḡ nyam yì bemte yidvu. Wvú to nu ε tfume bó bofεε ban ε bó nu boyuum ê mamase yì è fiee ḡguy bô mvunḡaḡ jó le.

²¹ Ε wvú wvù shileε yì nyambala ye le mum gbwoce kebese ke bonyii le bô nyo jem yì to buyte emvu jo wvú, ε mvunyiim mvunciim die ye bonyii bodvu no ḡeyte lo.

Mwm 20

Sa' yi bilum ntfuke

¹ Ε me mum ne n'yen ε nceendaa Nyo' mvu shiile too fowe keḡke ken'yene ke kentuke kè shiile nen ḡooḡḡ e, noo kebwee ke ncaw e ê wvú εbo.

² Ε wvú koo keḡguum ke nyam yì fieesene nyam joo le kie kè è nu yo yi biyvuum e ye yì è nu dεwle bvuu nu Satan, kay bô ncaw we le wvú enù yì dvú le egen ebuy bilum ntfuke.

³ No wvú kay nonen, mum tfume ê kentuke kè shiile nen ḡooḡḡ e kie, fen, mum lay diuw wvudvu le wvú enù jó, wvu le fo wvú ebvuu eghane læle bonyii bitum e, ke egen ebuy no bilum bi ntfuke bie ke efey. Ejim jodvu nu ε bó nu ke ekase efay wvú ecine wvú le é wvú eghanci ke yì kefew e nen caan.

⁴ Ε me mbvuu ne n'yen bokawla le, ε bonyii bô shiileε yì dvú le nu bô bó nu ε nya bonsaw bô sawεen can yibole. Ε me n'yen ten biyoy bi bonyii bô bó to yuwyεε bvushe bikuu nje bó to fewci ekume Jisos noo diew Nyo' le. Bonyii ban nu bô to baa nya mbense wvu baay ê nyam yì bemte ye bô laḡ ye, ε bó to baa ge ten nciise

nyam yi bemte yidvu fojise keneε can yibole ke. Boban to nu ε kase tu dvú no saake bô bo Klistu yî bilum e ntfuke.

⁵Bonyii bô to kaseε tu dvú ban nu ε fifin nu mbuy wvu yî kpwe le wvu fwe. Ke kebese ke bonyii le bô to kpwekenεε wase to nu ε kase tu dvú ke, gen buy no bilum bi ntfuke to feyεε.

⁶Bonyii bô kenke njoη wvu baay bvuu yuule, nu bô kenke bvudvuu yî mbuy wvu yî kpwe le wvu fwe wvun e. Ke kpwe yi bokaη bofεε bvuu kenke mvuηgay ê bó we ke. Bó nu ke enu bocee ncese bo Nyo' le bô bo Mboyse wvù Nyo' to kawεε le, ε bô bó nu ke esaake egen ebuy yî bilum e ntfuke.

Bó nu ke elεse Satan

⁷Bilum bi ntfuke bin nu ke edioo ε fey, é bó efay Satan yew ncaw e,

⁸é wvú emum ebuy eto eghane læle bitum bicii bì nu yî εbuw ε woη yo εna le. Bitum bin nu Gog bô Magog. Wvú nu ke ebaance bó é bó eseyse keetum jem. Bó nu ke elone lo diewe monsheem mo ê joo yi baay e.

⁹Bó nu ke ebuy elen egen yî nshε le egem bvudvuu bvú bonyii bô è nu bo Nyo' le bô kelaante kè è nu fitele fiew. Geenεn, ηguy nu ke eshii fowe elεse lo bó.

¹⁰Bó nu ke emum ekoo dεwle wvù to ghane læle bó, etfume ê mamase yi è fiee ηguy bô mvuηkaη jó le, fò nyam yi bemte bô wee wvù to mbiayte le wen nu wee ntum Nyo' nu le. Bó nu ke eyene ηgew fó εntaη bô εmvunsheεη sekecii se ηka.

Nsaw wvu fokεmεse

¹¹ε me mum nε n'yεn kebwee ke kawla mvu le ε wvú baa lo, n'yεn ten wee wvù to shiileε yî dvú le. ε εbulε bô nshε nε fεε lo ê wvú εjise laken, ε bó faηε yaa bvuu yεn mvú le bvudvuu le ke.

¹²ε me n'yεn ten bonyii bocii bô to nu ε kpweken wase le bo baay baay noo bo caan caan, ε bó leeme fwe dvu kawla. ε bó yene boηwa', yene wvumvu ε è nu wvu εdieε ε bonyii bô kenke nshii. ε bó mum kew no sumtene bonsaw bo bonyii bô to nu ε kpweken wase le, bii no gee di wee le to nu no bó saη ê boηwa' ba le.

¹³ε joo yi baay bvuse bonyii bô to kpwekenεε wase jó ε bó to. ε kpwe bô woη boηkfu bvuse bobole bonyii bô to kpwekenεε wase ε bó to ten. ε bó mum no sumtene nsaw wee bii fieε fi wvú to gee le.

¹⁴ε bó mum tfume kpwe bô woη boηkfu ê mamase yi è fiee ηguy jó le. Mamase yi é fiee ηguy jó yin nu kpwe yi bokaη bofεε.

¹⁵é dieε di wee le to baa nu ε bó ε saη ê ηwa' bonyii bô kenke nshii le, é bó tfume wvú ê mamase yi è fiee ηguy jó yidvu le.

Mwm 21

εbulε ke kefε bô nshε yi fie

- ¹ Ɛ me ne n'yeŋ wase ɛ è nu ɛbule ke kefe bô nshɛ yi fie le, njefo ɛbule ke keyvuum bô nshɛ yi yvum to nu ɛ la wase, ɛ joo yi baay ten yaa bæe ke.
- ² Ɛ me n'yeŋ kelaante kè yuule kè è nu Jɛlusalɛm wvu fwɛ le ɛ kí ɛ buy fowe fô Nyo' le ɛ no shiile too nu diɛwɛ jen e ɛ bó ɛ bosɛn ɛ sufe keegen nya ê dweese.
- ³ Ɛ me n'yuw ɛ diɛw jemyi fô kawla le foweɛwe le, “Ben etaa eyɛn, fô Nyo' nu ke ecee nu wase bô bonyii. Wvú nu ke ecee bô bó. Bó nu ke enu bonyii bew, ɛ wvú wvù Nyo' kebɛɛ nu bô bó, nu Nyo' wvubo.
- ⁴ Wvú nu ke esho misɛm yicii ê bó ɛjise. Ke bonyii bæe ke ekpwee ke, ɛ ke fieɛ fimew bæe ke enu dvú le bonyii soo bikuu kenɛɛ beele kenɛɛ kenke nsase mvu ke, njefo mwɛɛm mvù to shee nu, nu ɛ fey wase.”
- ⁵ Ɛ wvú wvuwe wvù to nu ɛ shii yî kawla le gay le, “Ben etaa eyɛn, me nu ɛŋge mwɛɛm mvunciim keseen é mvú etu mvunfɛm.” Ɛ wvú bvuu gay ê me le, “Saŋɛ fieɛ fin ê ŋwa' le, njefo bonjeme ban nu bo keɛɛy bô bonyii egɛɛ bvufɛe yî dvú le.”
- ⁶ Ɛ wvú bvuu kase gay ê me le, “Fí nu ɛ ge wase ye. È nu me Alfa, ɛ è nu me Omega. È nu me Keŋkɛwɛɛ, ɛ è nu me Kemɛse. Wee wvù kendoŋ yumte wvú nu ɛ me nu ŋke enya wvú bô joo yi buyte fô ntoŋ joo yi nyaa nshii le é wvú ewu ɛ wvú baa law fieɛ ke.
- ⁷ Wee wvù nu ke eso nu ɛ wvú nu ke ekeŋke mwɛɛm mvun mvunciim diɛwe bvushɛw e. Me nu ŋke enu Nyo' we, ɛ wvú nu waa wɛm.
- ⁸ Geenɛn ɛ bonyii bô gule mvuntelem noo bô nu sɛ mbee, noo bô buwyi mwɛɛm noo bô yuwyi bonyii noo bô gee nnyɛn kenjaŋ noo bo nfim e noo bô bunlee bonyo' bomew noo bonyii bo mbiay e bocii, nu ɛ fibole nu ke enu ɛ è nu ê mamase yî è fieɛ ŋguy bô mvuŋkaŋ jó le. Ɛ fifin nu kpwe yi bokaŋ bofɛɛ.”

Jɛlusalɛm wvu fwɛ

- ⁹ Ɛ nceendaa Nyo' mvu ê ŋgoo bonceendaa bo Nyo' le bo bosooshwiyy bô to keŋke bintee bi bisooshwiyy bi to nu ɛ yiŋsɛn bô bonɔɔw bosooshwiyy bo ɛjim ba, ne to gay ê me le, “To é me ɛŋgen enduŋɛɛ Jen wvù è nu kpweɛ Waa Njee ê wo.”
- ¹⁰ Ɛ wvú mum jo me ɛ me nu can Keyoy ke Nyo' le, ɛ bee wvú gen fô kum mvu wvu baay e ɛ wvú defɛ ê we. Ɛ wvú duŋɛɛ me kelaante kè yuule kè è nu Jɛlusalɛm, ɛ kí ɛ buy fowe fô Nyo' le ɛ no shiile too.
- ¹¹ Kí to shiile nonɛn, ɛ n'yuu Nyo' baa yî dvú le lawkene diɛwɛ tɛ dimew di lawkene di bó teŋɛ le Jasba, yuule nen sakasaka diɛwɛ kenlɛɛy e.
- ¹² Kelaante kedvu to keŋke ketaaŋ ke baay ɛ kí defɛ ê we eke, ɛ dew nu yî ketaaŋ kedvu le yuufe ncow fɛɛ, ɛ bonceendaa bo Nyo' le yuufe ncow bofɛɛ nu fô dew yidvu le. Bó to nu ɛ saŋ edieɛ ɛ dikfuu di Islael di yuufe ncow difɛɛ yî dew ketaaŋ yidvu le.

- 13** Dew yin to nu ê keba kè diuu sane le te, nu eweewe te, nu ekueku te, nu jò diuu seeyi te.
- 14** Eta yo kenffuy ke ketaaη kedvu le to nu yuufe ncow efaa ε bó ε saη ediee ε boom bo ntum e bo Waa Njee le bo yuufe ncow bofee yî eta yodvu le.
- 15** Nceendaa Nyo' wvù to jemyi ê me to keηke nfew εbo ε è nu kemaη ε bó kene bô ketwaa ke bigew e kè yeele. Nfew wvudvu to nu keefew kelaante kedvu bô dew ketaaη noo bimbew bi ketaaη e dvú.
- 16** Kelaante kedvu to nu bimbew binew ε bí nu leηleη bicii, ε mbvuw bô bvundwee noo bvundee nu leηleη. Ε wvú mum few kelaante kedvu bô kemaη kew kie ε kí buy bomay ntfuke bô gee tin (1,500). No wvú fewee ε mbvuw bô bvundwee noo bvundee buy ke leηleη.
- 17** Ε wvú few ten bimbew ε bí no nu ηkeηkeη mbaanshe ncow yisoocaaη (36) yî kefiε le. Ε nceendaa Nyo' wvudvu to few bô nfew ε è nu ke wvù wee wvu wum ké no feeke dvú.
- 18** Bó to bom bimbew bidvu bô eta yò lumte yò bó teηe le Jasba, ε wunte kelaante kedvu nu ε bó bom bô ketwaa ke bigew e kè yeele ekinekin ε kí yuule nen sakasaka diewe kenleeey e.
- 19** Bó to nu ε fee kenffuy ke kelaante kedvu le bô dikfuu di eta yò lumte le jeeey jeeey ε yó keηke ncóm jeeey jeeey. Di fwe to nu ε bó teηe le Jasba, ε di bii fó nu Safiya, ε di ditete nu Aget, ε di dinew nu Emelaal,
- 20** ε di ditin nu Oniks, ε di disoocaaη nu Kanilian, ε di disooshwiη nu Klisolit, ε di nyaη nu Belil, ε di bvooke nu Tobas, ε di yuufe nu Klisobles, ε di yuufe ncow dimwaaη nu Jasint, ε di yuufe ncow difee nu Ametist.
- 21** Dew ketaaη yi yuufe ncow fee yin nu ε bó to fe bô ejise ε baη yuufe ncow efaa, ε bó joo jise di baηe le dimwaaη mum fele diuw ketaaη dvú wvumwaaη. Je yi elaante jodvu to nu ε bó fe bô ketwaa ke bigew e kè yeele ekinekin, ε je yidvu yuule tosene diewe kenleeey e.
- 22** Me nto mbaa n'yen yew ncese le ê kelaante kin e ke, njefo Tata Nyo' wvù Keηke Mvungay Mvunciim bô Waa Njee to nu wase yew ncese yi jó.
- 23** Ke kelaante kedvu to bvuu keηke shiee diuu kenee kpwee wvù ebaa jó ke, njefo n'yuū Nyo' to nu wase n'yuū wvu jó, ε Waa Njee nu wase ken'yeeε ke jó.
- 24** Bitum bicii nu ke elene wase ε è nu ê n'yuū kelaante kedvu le, ε bonfon bo yî nshε le nu ke etoo bô bvukuke bvubole ê kelaante kin e.
- 25** Ke bó nu ke eyuu ebaη dew ketaaη ke kelaante kin e diuu dimwaaη ke, njefo ke ekfuη nu ke eyuu ejiim jó ke.
- 26** Bó nu ke etoo bô bvukuke noo kpaw wvu bitum bicii ê kelaante kin e.

²⁷ Geenen ke fiεε fi nu sε fí yuule lo nu ke eley ê kelaante kin e ke. Ke wee wvù gee mwεem mvù bemte kenεε wvù mbiayte mbiay nu ke eley jó ke. È nu ke eley ke bonyii bò bó nu ε saη εdiee εbo ê ηwa' Waa Njee wvù bó saη εdiee ε bonyii bò keηke nshii le jó.

Mwm 22

Joo yì nyaa nshii

¹ Ε nceendaa Nyo' wvudvu mum duηce me joo yì nyaa nshii ε yí buyte εκuse jo kawla Nyo' bò Waa Njee, ε yí booke yuule nen sakasaka diewe kenλεεy e.

² Yí to booke nonen fele entelenη jo je yi ê kelaante kedvu le. Kete kè nyaa nshii to kuu biba bi joo yidvu le bicii. Kete kin to ké no yumte mvuntam bokaη yuufe ncow bofεε yí kelum e, yumte kaη mwaanη mwaanη yí kpwee le. Bibε bi kete kin e to nu ncew yì bó fele bonyii bocii dvú.

³ Ke fiεε fi Nyo' nu ε jiη nu ke enu ê kelaante kin e ke. È nu ke enu kawla Nyo' bò Waa Njee jó. Bonyii bew bo lemme le nu ke enyaa mbense wvu baay ê wvú.

⁴ Bó nu ke eyene bvushiw bwew e, ε diee diew nu ke enu ε bó ε saη fojise fo bó.

⁵ Ke εκfuη bεε ke ejiim jó ke, ε bó yaa bεε ke ebvuu eshieele n'yuu wvù è nyaa ken'yεese kenεε diuu ke, njefo Tata Nyo' nu ke enu n'yuu wvubo. Bó nu ke esaake diewe bonfon e sekecii sε ηka.

Jisos too nfew caan

⁶ Ε nceendaa Nyo' wvudvu gay ê me le, “Bonjeme ban nu bo kecεεy bò bonyii egεε bvufee yí dvú le. Tata wvù è nu Nyo' biyoy bi bonyii bew bo ntum e nu ε tum nceendaa we le wvú eto eduηce ê bonyii bew bo lemme le, fiεε fi keηke keeke ekooy nfew caan.”

⁷ Jisos gayte le, “Ben eyuw, me ntoo nfew caan.” Njoη wvu baay nu wvu wee wvù nu ε gεε ntum Nyo' wvun wvù è nu bonjeme bò nu ê ηwa' wvun e.

⁸ Me wvù Jon nu wee wvù to yuweε bvuu yen mwεem mvun e mvunciim. Ε me ndioo n'yuw mbvuu n'yen mvú le nonen, ηgbwe bikaa bi nceendaa Nyo' wvù to duηci mwεem mvudvu le ê me, keenya n'wvum wvu baay ê wvú.

⁹ Geenen, ε wvú gay ê me le, “Fo wo emom ke. Me nu ke ten wee lemme diewe wo noo boom bo bwoo le bò è nu bonyii bo ntum Nyo' le noo bonyii bò gεεle bonjeme bo ê ηwa' wvun e. È nyaà n'wvum wvu baay ε è nu ê Nyo'.”

¹⁰ Ε nceendaa Nyo' wvudvu bvuu gay ê me le, “Fo wo enyile ntum Nyo' wvun wvù è nu bonjeme bò nu ê ηwa' wvun e ke, njefo kefew kè mvú nu ekooy nu wase nceencee.

11 Wee wvù gee mwεem mvù befe egeè ke mwεem mvù befe, é wee wvù gee nnyen egeè ke nnyen. Wee wvù gee fiεε fi leη egeè ke fiεε fi leη, é wee wvù yuule emey ke eyuulè.”

12 Jisos gayte le, “Ben eyeke eyuw, me ntoo nfew caan. E me ntoo bô nlawma keenlaw wee tfuu dvú mbii no gee diew nu.

13 È nu me Alfa, ε è nu me Omega. È nu me Fwe, ε è nu me Ejime. È nu me Kenkewce, ε è nu me Kemεse.”

14 Njoη wvu baay nu fô bonyii bò nu ε cuke ndvú yibole, wvu le è nulo é bó ke eley fô diuw ketaaη e egen ê kelaante kedvu le, bô wvu le bó ke ekeηke bvudvuu keedie fô kete kè nyaa nshii le.

15 Bonyii bò nu ke emey ekfuη jo ketaaη nu bò gee diewe bwé le bô bo nfim e noo bò gee nnyen kenjaη noo bò yuwyi bonyii noo bò bunlee bonyo' bomew, naa noo bonyii bò kooηke mbiay, mbiayte mbiay e.

16 “Me wvù Jisos nu ε ntum nceendaa wem fô ben e keejeme mwεem mvun mvù gene fô bintaashe bi bonyii bo mbee le. Me nu Wan bô Biay yì san ê kfuu di Nfon Dawe le, ε è nu me Jon yi Law e.”

17 Keyoy ke Nyo' le bô Jen gayte le, “To!” Naa yεε wvù yuuke gay ten le “To!” Wee wvù kendoη yumte wvú eto, é wee wvù shieele eto, é wvú ekeηke joo yì nyaa nshii ε wvú baa law fiεε ke.

Ntefe wvu fokemεse

18 Me nciise ê wee tfuu wvù yuuke ntum Nyo' wvù è nu bonjeme bò buyte ê ηwa' wvun e le, é wee mom lo ε bise fiεε yì dvú le, é Nyo' ke ebise boηgew bò bó nu ε jeme ê ηwa' wvun e yì ye le.

19 Wee é mom ε bvuse fiεε ê bonjeme bò buyte ê ηwa' wvun e bò è nu ntum Nyo', tu ke Nyo' yaa nu ke ecine é wvú ekeηke kew keba ke kete kè nyaa nshii le bô kew keba ke kelaante kè yuule le kè bó nu ε saη ê ηwa' wvun e ke.

20 Wee wvù jemyi ekume mwεem mvun gayte le, “Yì keceey e, me ntoo nfew caan.” Fí enù nonen. Tata Jisos, to!

21 Tata Jisos ebuw ben bocii bò è nu bonyii bo Nyo' le. Fí enù nonen.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira

2021, Vitória/ES - Brasil